


Esuquidistu Chuiquin
Tantiamete



New Testament in Matsés (PE:mf:Matsés)

Esuquidistu Chuiquin Tantiámete

New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
446da786-5bd1-5ffa-85e2-9eff4052cf8b

Contents

Mateyon Dada uaid	1
Madcosën Dada uaid	60
Ducasën Dada uaid	95
Uanën Dada uaid	152
Esus Chuibenequidon Naid	196
Doma yacnocquidon Iste	248
Codinto yacnocquidon Iste 1	275
Codinto yacnocquidon Iste 2	298
Cadasia yacnocquidon Iste	312
Epeso yacnocquidon Iste	322
Pídiapos yacnocquidon Iste	331
Codosas yacnocquidon Iste	337
Tesadonica yacnocquidon Iste 1	343
Tesadonica yacnocquidon Iste 2	348
Timoteyon Iste 1	351
Timoteyon Iste 2	359
Titon Iste	365
Pidemonën Iste	369
Ebedeyon Isadaidbon Iste	371
Santiacon Dada uaid	388
Petedon Dada uaid 1	394
Petedon Dada uaid 2	402
Uanën Dada uaidëmpi 1	406
Uanën Dada uaidëmpi 2	412
Uanën Dada uaidëmpi 3	413
Udasën Dada uaid	414
Esusën Uan Ismiaid	416

MATEYON DADA UAID

Esuquidistun tsusedpabotedi chiaid (Duc 3.23-38)

¹ Esuquidistu chuiquin dada uanu. Aidèn tsusedpa Abadauan nec. Aidèn tsusedpabidi Abadauanèn tsyuecquid Dabid nec. Abadauanèn tsyuecquido chuiquinc aidèn tsyuecquid Dabidèn tsyuecquido chuiquinc caquin Esusèn tsusedpabotedi chuinu. Tantia.

² Abadauanquio bi bedanquin chuinu. Abadauanèn mado Isac cuëmèdpampic. Isaquèn madobic Acobo cuëmèdquid. Acobon mado dadpen icpampic. Abentsèc Uda cuëmèdnuc aton buchiado utsi-utsiec cuëmèdpampic.

³ Adnubien Acobon mado Uda caidèn Tamad caid abentsen chudpampic. Aden chudaqui bacuè daèd usundoshon abi ushèmbi aton mado daèdpambo tishpampic. Abentsèc Pades cuëntanquin utsi Sada cuëmèdpampic. Padesèn mado Eston cuëmèdpampic. Estonèn madobic Adan cuëmèdquid.

⁴ Adanèn madobic Aminidad cuëmèdquid. Aminidadèn madobic Nason cuëmèdquid. Nasonèn madobic Sadmon cuëmèdquid icpampic.

⁵ Adshumbic Sadmonèn aton chido Daba bedshun aton mado Bos tishmepampic. Adoac canishumbi Bosèn aton chido Dud bedshun aton mado Obed tishmepampic. Obedèn mado Isai cuëmèdquid icpampic.

⁶ Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidèn dada utsi Udias caid cuesunetanquin aton chido bedshun aton mado Sadomon tishmepampic.

⁷ Sadomonèn mado Doboan nepampic. Doboanèn madobic Abias cuëmèdquid. Abiasèn madobic Asa cuëmèdquid.

⁸ Asan madobic Osapad cuëmèdquid. Osapadèn madobic Odan cuëmèdquid. Odanèn madobic Usias cuëmèdquid.

⁹ Usiasèn madobic Otan cuëmèdquid. Otanèn madobic Acas cuëmèdquid. Acasèn madobic Esequias cuëmèdquid.

¹⁰ Esequiasèn madobic Manases cuëmèdquid. Manasesèn madobic Amon cuëmèdquid. Amonèn madobic Osias cuëmèdquid.

¹¹ Osiasèn madobic Econias cuëmèdquid. Aid Econias caid aton matsesadobèdtabi yuajuan Babidonia yacnocquidon aton nidaidèn buampampic.

¹² Buanac shubu dadpen icquid Babidonia caid yacnoshon Econiasèn aton mado Sاداتied tishmepampic. Sاداتiedèn mado Sodobabed cuëmèdpampic.

¹³ Sodobabedèn madobic Abiud cuëmèdquid. Abiudèn madobic Ediaquin cuëmèdquid. Ediaquinèn madobic Asod cuëmèdquid.

¹⁴ Asodèn madobic Sadoc cuëmèdquid. Sadoquèn madobic Aquin cuëmèdquid. Aquinèn madobic Ediud cuëmèdquid.

¹⁵ Ediudèn madobic Ediasad cuëmèdquid. Ediasadèn madobic Matan cuëmèdquid. Matanèn madobic Acobo cuëmèdquid.

¹⁶ Acobon madobic Ose cuëmèdpac caondash. Aidquio Madian bènè nepac caondash. Aidèn inabi Madian Esus usundoshon tishpac caondash. Esus Nuquin Papan chomiaid yec matses bédambo icmequidquio nec. Isadaidbon cainaidquio nec.

¹⁷ Aidedti Esusèn tsusedpabo icpampic. Abadauamba bedanquin aton matses 14tedi chuiquin Dabid ènquin chiombi. Adoshombic Dabid ènquin chuiboed chuiioquin padpiden bedanquin aidèn matses 14tedbidi chuiquin Econias aton matsesbèdta buanaid ènquin chiombi. Adoshombic Econias ènquin chuiboed chuiioquin padpiden bedanquin aton matses 14tedbidi chuiquin Esusquio bi ènquin chiombi.

Esuquidistu tishaid (Duc 2.1-7)

¹⁸ Nèbi aid tishaidquio chuinu. Esus tishabi yec aton tita Madia icpac caondash. Abi inuequidèn Osen bedabi icshobi Nuquin Papan Mayanèn bacuè usundomepac caondash.

¹⁹ Usundoacsho isun abi inuequidèn Osen dada utsin chudaid danec: —“Nèbi mibi bedtiapimbo iquebi,” quequin bedenquio icnuen dada uashun Madia menenu —queuidpac caondash. Nuquin Papan chiacpadquio bédambo icquid icquin naden chiambo icpac caondash. —Bedabi bacuè usundoaque. Cuidquimbien ictiad —quequin aton matses chienquio yequi: —Bedenquio icnuen dada uaid menenu —queuidpac caondash.

²⁰ Adnubien Nuquin Papan abi yacnoshon uaidèn mayan bédan Ose ushquin ismepac caondash. —Dabid yampidèn tsyuecquid icsho mibi chuinu, Ose. Tantia. Chudenquio

icquin Nuquin Papan Mayanën Madia bacuë usundomiaye. Dacuëdenda. Dacuëdenquo icquin Madia min shubuno buanta.

²¹ Adoshombic dada bacuë tishacsho Esus cuënta. “Matses icsaid bedshunquin Nuquin Papa aton matses cuidmenquo iquendac,” quequin Esus cuënta —quequin mayan bédan Ose ushquin ismepac caondash.

²² Aden mayan bédan Esus tishte chiapadomboen Nuquin Papan ambi chiaid naden dada uamepampic.

²³ “Dadan inacmaidëmbi bacuë usundoshon dada bacuë tishendac.

Aidi Imanued cuënendac.

‘Nuquin Papapadquidquibidi matsesbéd tabadnuec choash nec,’ quequin Imanued cuënendac,”

quequin Esus tishte Nuquin Papan dada uamepampic.

²⁴ Aden mayan bédan chiac isucunshumbien aidën chiapadomboen Osen aton shubuno Madia buampac caondash.

²⁵ Buanshun Osen chudenquo icnubi dada bacuë tishpac caondash. Tishacsho Esus cuëmpac caondash.

2

Uispa isquido Esus isec choaid

¹ Nidaid Udeya caid yacno tabadquin shubu daëdpactsëcquid Beden caid yacnoshon Esus tishpac caondash. Adnubien shubu dadpen icquid Edusaden caid yacno isadaidbo matses ancaquid Edodes cuëmëdquid icpac caondash. Aid icnubi matses utsibo uispa isquido Esus isnuec ushë choacmiuësh chopac caondash. Edusaden yacno choquin

² anocquido chuituidpac caondash. —Min matses isadaidbo chuiquid dapa ictequidquo nëbi tishsaidëmpi ¿midambo ictseque? Isnu. Aid tishaid tantiamete uispa isombique. ¿Mitsimbo ictseque? Isnu. “Chuiquid dapa bédamboshë ictequid nec,” quiash aid isnuec chopobi —quetuidpac caondash.

³ Adsho tantiash dacuëdcuedepac caondash abitedimbo. —Padtec. ¿Midapadquid bacuë nependabac? —quecuedepac caondash Edodes isadaidbo ancaquid ambi ancaidobëdi.

⁴ Adshumbien Edodesën abi yacno tsusiobo cho-chomepac caondash. —¿Mitsicquid caique? Tiantianu —qeshun abi yacno Moisesën dada uampid chuibanquido abi chuiquid dapabobëdta cho-chomepac caondash. Cho-chomeshumbic: —¿Mitsishunquo Nuquin Papan chomiaid min matses chuiquid dapa ictequid tishpac? ¿Ada Nuquin Papan chiaid isbanquin tantio? —caquien:

⁵ —Ai, tantiemi. “Nidaid Udeya caid yacno tabadquin shubu daëdpactsëcquid Beden caid yacnoshon aid bacuë tishendac,” quiampicpadembi tantiemi. Nuquin Papan ambi chiaid nuquin tsusedpa dada uamepampic naden.

⁶ Shubu daëdpactsëcquid Beden caid yacnocquido chiec:

“Beden yacno tabadec nidaid Udeya caidën tabadquido mibi nec.

‘Chuiquid dapa nibëdnuc icsambo iquendac,’ quedenedi mibi yacnoshon chuiquid dapa ictequid tishendac.

Aidëmbi isadaidbo matses chuiquid dapa icquin bédamboen tabadmendac,”

—quequin Nuquin Papan Esus tishte chiaid chuipac caondash tsusiobon Edodes caid chuiquin.

⁷ Adoaquien Edodesën ambi ancaido isadaidbo ismenquo icquin matses utsibo uispa isquido chomeshun chuimepac caondash. —¿Nëbida tishaid tantiamete uispa isquin tauao? ¿Nëid inchëshën ushëmbida isbeno? ¿Ëndenda isbenonda? En chui. Tiantianu —cac chuisho

⁸ tantiashun: —Beden yacno istan. Ano nidshun mimbi chiapadquid bacuë istan. Aid bacuë istanec cuenquin ëbi chuibenta. Ëmbitsen istanu. “Nuquin Papan chomiaid chuiquid dapa ictequid bédambo iquec,” quequin ëmbitsen istanu —capac caondash Edodesën muaquimbi. —Cuesunenu —quequimbi adopac caondash.

⁹ Adoaquien ushë choacmiuësh bed-bedquesho ambi isbëquin tsibambëboedi uispa tsibanec Beden yacno nidpac caondash. Adec nidnubien uispa shubu ismec nidtuidpac caondash: —Bacuë ictsaid shubu nëid iquec —quec.

¹⁰ Adsho isashien cuishonquepac caondash uispa isquido.

¹¹ Adash shubun puduedshun isquien aton tita Madiabëd bacuë ictsec. Aid isashic: —Matses chuiquid dapa ictequid nec. Matses bédambo icmetequid nec —quequin aton matsesën nacpadomboen ismequin danëshën sebudpac caondash. Adshumbic ambi bëboed aton na bédambo icquid chicshun menepac caondash nëidtedi. Nëidic shocosh piu. Nëidic bédambo nuadnuc tauitequid. Nëidic bédambo noadec danoshquete. Aidedi menepac caondash. Adoash ushtopac caondash.

¹² Adec ushtoacsho Nuquin Papan ushquin ismepac caondash. —Isadaidbo ancaquid Edodes chuibidanenda —quequin ushquin ismiac isucunanec abi choboedën nidenquio yec podqued utsin nidpac caondash aton shubuno nidec.

Equipito yacno Osen buanaid

¹³ Esus isuanquido nidambien Nuquin Papan abi yacnoshon uaidën mayan bëdan Ose ushquin ismepac caondash. —Isucunanec cuenta. Bacuëmpi aton titabëdta buanec nidaid utsi Equipito caid yacno cuenta. Ëmbi chiabi choenda. Anobi tabadta. Edodesën: “Bacuëmpibo cuesun siatanta,” cac cho-choeque. Cuenta —quequin Ose ushquin ismepac caondash mayan bëdan.

¹⁴ Aden ushquin ismiac isucuntantsequi inchëshëmbi puduanec aton bacuë anibëdta buanec nidaid utsi Equipito caid yacno Ose nidpac caondash.

¹⁵ Equipito yacno nidash ambobi tabadpac caondash. Isadaidbo ancaquid Edodes unësabi icnuc Equipito yacno tabadpac caondash. Esus tishabi icnubi ëndenquimboshë Nuquin Papan tantiamiac ambi chiaid chuibanquidën Esus Equipito yacno buante chuiquin dada uapampic naden chuiquin. “Equipito yacno nidash tabadsho: ‘Auëshquio cho, Mado, caindami,’ quiosh Nuquin Papa,” quequin Nuquin Papan chiaid dada uapampic.

Bacuëbo dadpen cuesun siatanaid

¹⁶ Adnubien isadaidbo ancaquid Edodes: —Uispa isquidon cacuidposhi —quiash comapenec nëishun aton yuabo sondado chuipac caondash. —Uispa isquidon chuibocpadtsëcquid comapenec onquecuenabi ictsëcquidotedi dada bacuëmpibotedi cuesun siatan. Beden yacnocquidon bacuëbobëdtabi uano pauequidon bacuëbotsen cuesun siatan —cac cuesun siatampac caondash.

¹⁷ Aden cuesun siatanambo icnubi Nuquin Papan adote chiaid ëndenquimboshë Edemias cuëmëdquidën dada uapampic naden chuiquin.

¹⁸ “Abi yacnuësh aton bacuëbo nibëdansho isash isadaidbon chidobo sedenquecuededen-dac.

Unësaid tantiec baded ënëdenquio yec sedenquebudnendac,”

quequin chiampicpadomboen aton bacuëbo nibëdamepac caondash.

¹⁹ Yuecquio ictaniashic isadaidbo ancaquid Edodes caid unëspac caondash. Adambic nidaid utsi Equipito caid yacno tabadsho Nuquin Papan abi yacnoshon uaidën mayan bëdan Ose ushquin ismepac caondash.

²⁰ —“Bacuëbo cuesun siatan,” quiondaid unësaccoshe. Min chido min bacuëbëdta buanec min nidaid Isadaid caidën nidoata —caquin

²¹ isucunanec aidën chuibocno buanuec nidpac caondash.

²² Aton nidaidën nidshun aton matsesën chiaid tantiapac caondash. —¿Ada tantio? Udeya yacnocquido ancadenen unësaidën mado Adquedayo caid ancanquidquibidien nechitec —quesho tantiashien dacuëdtampac caondash Ose. Adshobien Nuquin Papan Ose ushquin ismeopac caondash. —Cuesunenushë. Min nidaid Udeya caidën nidenda —quequin ushquin ismiac isucunanec aid nidaid Isadaid caidëmbidi nidec aid nidaid cuëshë utsi Cadidia caidën nidpac caondash. Udeya caidën nidenquio yec uquëmbo nidpac caondash.

²³ Uquëmbo nidec shubu dadpen icquid Nasaded caid yacno choash ambo tabadtuidpac caondash. “Nasaded yacnocquid nendac,” quequin Nuquin Papan chiaid dada uampic-padec anobi tabadpac caondash. Auëshquio canipac caondash Esus.

3

Uan acten mentoanquidën chuibeniaid

(*Mad 1.1-8; Duc 3.1-9, 15-17; Uan 1.19-28*)

¹ Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibëdacno capucuenequin Nuquin Papan chiaid chuibenequid nepac caondash.

² Adquid icquin Esus chote chuibampac caondash naden. —Mibi icsaid ënash bëdamboec tabadta. Nuquin Icbombo choeque —quequin chuipac caondash.

³ Aden Uanën chuite chuiquin Nuquin Papan isadaidbo tsusedpa Isayas cuëmëdquid dada uamepampic naden.

“Masiuidpambo yacno shubu nibëdacno capuquin ëcac matses chosho chuibenendac.

‘Chuiquid dapa choeque. Podqued andëdbanshunta,’ quiacbimboen:

‘Nuquin Icbombo choeque.

Icsaid ënash bëdamboec tabadta,’ quequin chuibenendac,”

quequin Isayasën Uanën chuite chuiampic.

⁴ Nadquid Uan icpondash. Aton dashcute nëish yua dapa cameyo caidën bu daëdcaid dasiuidpondash. Tsipantebic nidaidën capuquid yua bitsi nacnenaaid tsiupondash. Aton pete bacumbëd shioshbimboecquid icpondash.

⁵ Aidën Nuquin Papan chiaid chuibenesho tantianuec nëidtedi matses cho-chopac caondash. Nëidic shubu dadpen icquid Edusaden caid yacnocquido. Nëidic nidaid Udeya caid yacnocquido. Nëidic acte Odan caid cuëman tabadquido. Aidtedi cho-chopac caondash.

⁶ Cho-choshon Uanën chuisho tantiash: —Nuquin Papan chiaid niac-niaquec icsapobi. Icsaboedi aid tantiec bëdamboec tabadtiaquido iquebi —qesho: —“Nëid Nuquin Papa tantianu,” quequid nec —quequin acte Odan caidën mentopac caondash Uanën.

⁷ Adnubien padiseyobobëd saduseyobo Uan isec cho-chopac caondash. Padiseyobo isadaidbo tsusedpabon chiaid namequido nec. Saduseyobobic: —Matses unësaid uincuenenquido iquendac —quequido nec. Aido cho-chosho isun Uanën: —Nisibimboecquido mibi nec. Adquidën icsa uacimboben matses icsa uaquido mibi nec. Bëdambo icquid damianquiec mibi iquec. “Nuquin Papan mibi cuidnushë. Tantiatan,” quequin çtsuntsin chiac cho?

⁸ Mentomete bunec Nuquin Papan chiaid niac-niacboedi ënash bëdamboec tabadta.

⁹ “Èbipadquid Abadauanën tsyuecquidouditsëqui Nuquin Papan bëdamboen isec,” quequin tantienda. çAdquidta Nuquin Papan bëdamboen ispec? Abadauampadquid abi tantiaquidien Nuquin Papan bëdamboen isec. Mimbi bëdamboen tantiatiapimbo icsa isun nëid cuënotebi matses uashun Nuquin Papan Abadauampadquid abi tantiaquidombo icmetsish ash icnushë. Nuquin Papambo tantiata.

¹⁰ “Icsambo icquid nec,” qeshun ambi nitsinaid cuëte bacuëesa dëdshun nëdëncacimboben ambi chiacpadomboen naisa Nuquin Papan cuidendac —quepac caondash Uan padiseyobo saduseyobobëdta chieç.

¹¹ Adshumbic padpiden chuiquin Esusën nate chuiyac caondash. —Nuquin Papa tantianuequid acten mentobanquin chuibanquid nebi. Padnuen con tsyuecquid choshon aidëntsen chuibanendac. Èbi bëdiactsëc tantiaquid ictsëcnuc aidquien comapenen tantiaquidquio yec bëdamboshë iquendac. “Aidquio bëdamboshë icquid icnuc çatotsieshun icsaquidquibi: ‘Aid choec,’ quequin chuiquidquio Nuquin Papan èbi icmeposh?” quec tsadebi. Èmbi chuiboed choshon: “Èbi tantiaquid nec,” qeshun aton Mayan menequin bëdamboec tabadte mibi tantiamendac. Abi tantiesaboen cuidendac.

¹² Piacbo choeshashun putu bushcaquin secacimboben abi tantiesabo chian anëdënquiacno nësecaindac. Adshumbic abi tantiaquido abëdi tabadmendac —quepac caondash Uan acten mentoanquid.

Uanën Esus mentoaid

(Mad 1.9-11; Duc 3.21-22; Uan 1.32-34)

¹³ Acte Odan caidën matses mentoec adpac caondash Uan. Adnubien Uan yacno Esusquio chopac caondash. Aton nidaid Cadidia caid yacnuësh tauamboen matses ismenuec choec: —Èbitsen mento —quetuidpac caondash.

¹⁴ Adshobien Uanën: —Padenquio iquembi. Nuquin Papan chomiaid icquin mimibi èbi nauquen bëdambo ictsish. çAtotsieshun èbi aden chie? Padi —qeshobien:

¹⁵ —En na. Bëdambo iquec. Èbi mentoquin mimbi Nuquin Papan chiacpadomboen natsiaque. Èbi acten mento —qesho tantianshun Esus acten mentopac caondash Uanën.

¹⁶ Adoac Esus pudundonobien canchedacimboc abu shëcuë yampac caondash. Adsho isaquien aid shëcuë yacnuëshquio dëbimbimboec budec Nuquin Papan Mayan Esusquio matsadtopac caondash abëd icnuec.

¹⁷ Adnubien abucuëshquio Nuquin Papa onquiampac caondash. —Nëid èmbi tantiaidquio con Mado nec. Èmbi chiacpadomboen nasho isash bëdambo iquebi —quepac caondash Esus caic.

4

Satanasën Esus icsamenuequin tanuidaaid

(Mad 1.12-13; Duc 4.1-13)

¹ Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. —Ma Nuquin Papa chieshënquid Satanasën Esus icsamenuequin ma tanu —quequin ambo nidmepac caondash.

² Adoquien buna mëmunquin penquio yec Esus tsadpac caondash. Inchëshën ushë abentsëc nidmiasht utsi tashquecuntsëcnuc 40tedec ushquin penquio yec comapenec bumpac caondash.

³ Bunec tsadshobien Satanasën istuidpac caondash. Istuidtanquimbien: —¿Nuquin Papan Madombobida mibi neque? Aidën Madombo icquin nëid cuënote cain: “Pete icta,” cata —caquien

⁴ Esus: —Padi. Nuquin Papan chiaid dada uapampid nad iquec. “¿Peteuidi tantiecta matses bédamboec tabadpec? Nuquin Papan chiacpadomboenuidi naiquien matses bédamboec tabadtsiash,” quequin dada uapampid iquec —quepac caondash Esus.

⁵ Adsho tantiashumbien shubu dadpen icquid Edusaden caid yacno buanshun Nuquin Papa tabadte shubu uashunaid macano Satanasën Esus manidtomepac caondash abucquio.

⁶ Adotanquimbien padpiden chuiquoquin: —¿Nuquin Papa caidën Madombobida mibi neque? Aidën Mado yec nëuëshquio pudunta. Nuquin Papan mibi paëdmenquio ictsiash. Nadentsen Nuquin Papan chiaid dada uapampic.

“‘Uidën uata,’ quequin ambi abi yacnoshon uaido mayan bédabo Nuquin Papan chiac mibi uidën uaidac paëdenquio icnuc.

‘Cuënoten tadquëdnushe,’ queshun adoendac,”

quequin Nuquin Papan chiaid dada uapampique. Pudunta —caquien

⁷ Esus: —Padi. Nuquin Papan chiaid dada uapampid nad iquec. “¿Icsamboen tantiaquin ëmbembi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

⁸ Adoquien Satanasën padpiden buanquin macuësh dapa abucquiocquid manidtomeshun nidaid abichobi Esus ismepac caondash. Chuiquid dapabotedi ismequinc aidobëd icquido ismequinc aidon dayun uaidtedi ismequinc capac caondash.

⁹ Adoshombic: —Nëidtedi mibi menetsiambique. Èbi con icbo cata. Èbi aden chuiquin ismenuen danëshën sebudta. Adsho isun ëmbi ismiactedi mibi menembi. Aidën icbo mibi icmembi —caquien

¹⁰ Esusën: —Padi. Baded cuenta. Nuquin Papan chiaidquido chuiquin naden dada uapampique. “Nuquin Papa abentsëcquiobi mimbi tantiaduidtsëqui min Icbombo neque. Aidën namiaidquido icta,” quequin dada uapampique. Cuenta —capac caondash Esusën.

¹¹ Adoquien Satanas cuempac caondash. Cuenubien Nuquin Papan abi yacnoshon uaido mayan bédabo choshon abëdi tabadquin Esus bédambo icmepac caondash.

Cadidia yacnoshon Esusën chuibeniaid

(Mad 1.14-15; Duc 4.14-15)

¹² Adashic aton nidaid Cadidia caidën Esus nidpac caondash. —Mibi acten mentondaid Uan bedshun quënën nauedac caosh —quesho tantiash nidpac caondash.

¹³ Nidashic shubu dadpen icquid Nasaded caid yacno tabadash nidec chian dapa cuëman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic.

¹⁴ Esus ambo tabadte chuiquin Nuquin Papan con tsusedpa Isayas cuëmëdquid dada uamiampicpadeac ambo tabadpac caondash Esus. Naden dada uapampic.

¹⁵ “Nuquin Papa tantiamequidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëman tabadquidon.

Nëidic isadaidpembo dadpen tabadacno Cadidia caidën tabadquidon.

¹⁶ Aidtedishun Nuquin Papan chomiaid tantiendac.

Pabiate cuënëdacobimboec icsamboec tabadquin Nuquin Papa tantienquido icboedombi tantiabenenendac.

Nuquin Papa tantiamenuen chuibansho tantiashun matsesën paposhquiacbimboen Nuquin Papa tantiabenenendac.

Abi tantienquido icsho Nuquin Papan cuidtsenaidombi Nuquin Papa tantiabenenendac ushash isucunacbimboen,”

quequin Isayas Esus choash tabadte dada uamepampic Nuquin Papan.

¹⁷ Ashunquibi Nuquin Papan chiaid chuiquin tauamboen Esusën matses abitedimbo chuibenepac caondash. —Icsaid ënash Nuquin Papa tantiec ambi chiacpadeac bédamboec tabadta. Nëbi Nuquin Papan abëd tabadtequido icmequin matses bédamboen tabadmendac —quepac caondash Esus ambibi naid chiequi.

Nuëcquid bedquido Esusën: Cho, caid

(Mad 1.16-20; Duc 5.1-11)

¹⁸ Aden chuibenec chian dapa Cadidia caid cuëman nidquin isquien dadan aton ut-sibëdtambi nëshaid dapambo acte nënepec. Aid Simombidi Petedo capec. Aton utsi Andedes nec. Aid daëdshun nuëcquid bedquidombo icquin aton nëshaid acte nënesho istuidpac caondash Esusën.

¹⁹ Adshumbien Esusën: —Nuquibi icnu. Cho. Nuëcquid bedquid ichoedi nëbi ëbi chuibanquid mibi icmenu

²⁰ —caquien aton nëshaid nianec nidquimbi Esus tsibanampac caondash.

²¹ Udictsëc nidquin isquien dada daëd cano antabëdpec. Acobo aton utsi Uambëd icpac caondash. Aton papa Sebedeyo caidbëdi cano antabëdquin nuëcquid bednrun aton nëshaid dapa nacnempac caondash. Adsho istuidshun Esusën: —Nuquibi icnu. Cho —caquien

²² aton papabëdta cano nianec Esusbëd icnuec nidpac caondash.

Matses dadpen Esusën chuibeniaid
(Duc 6.17-19)

²³ Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquiec puduedcuenequin Esusën Nuquin Papan chiaid chuibenepac caondash. Abi yacno tabadmenun Nuquin Papan bëdamboen iste matses chuibeniac caondash. Adshumbic daicsaidotedi bëdamebampac caondash.

²⁴ Adosho istanquin: —Bëdamequidquio nec —quequin isboedon Esusën naid chuibenepac caondash. Ënapen nidec nidaid utsi Sidia caidën nidshun chuibeniac caondash. Aden chiac daicsaidotedi bë-bëpac caondash. Dada paëmboshë icquido yec podobitsi icsa dapuduedaido yec unësanquido yec dada shëquëquenquio icquido yec quenec bë-bëacsho aiddedi bëdamepac caondash Esusën.

²⁵ Aden: —Bëdamiosh —quequin chiac isec cho-choash dadpenquio tsucus-tsucustsëcquio yec tsidadash niquianquin Esus tsibanampac caondash. Nëidtedshun tsibananac caondash. Nëidic nidaid Cadidia caidën tabadquidon. Nëidic shubu dadpen icquid Decapodis caid yacno tabadquidon. Nëidic shubu dadpen icquid Edusaden caid yacnoquidon. Nëidic nidaid Udeya caidën tabadquidon. Nëidic acte Odan caid uquë cuëma utsiuc tabadquidon. Aiddtedshun Esus tsibanampac caondash.

5

Nadquido bëdambo iquendac, quequin Esusën chiaid
(Duc 6.20-23)

¹ Matses dadpenshun tsibananac macuësh dapa cuëte nibëdpamboecquid pudundoec poctsebi Esus tsadtuidpondash. Abi tsibananash matses dadpen abi datsidadnubien abëd icquido Esusën dayunquio tabadpondash.

² Adshobien Nuquin Papan matses bëdamboen isquin bëdambo icmete Esusën matses abitedi chuibampondash.

³ —¿Mitsipadquid Nuquin Papan bëdambo icmepec? Nadquid caimbique. Tantia. Mibitedi chuinu. “Ëbemi bëdamboec tabadtiaimbo iquebi. Bëdapenquio iquebi. Nuquin Papan bëdamboen tabadmiaquini bëdamboec tabadtsiac,” quequid Nuquin Papan: “Ëbëd tabadtequid nec,” quequin bëdambo icmendac.

⁴ “Matses abitedi icsamboec tabadnuc ëbitsen icsamboec tabadquid nebi,” quec shubiquimbi abi tantiaشو Nuquin Papan bëdamboen isquin bëdambo icmendac.

⁵ Aton nauidi tantienquio icquin Nuquin Papa tantiaquin utsibotsen tantiaquid Nuquin Papan bëdambo icmendac. Yuecshun ambi nidaid chuca uaidën tabadmendac.

⁶ Pete bunachimboec ambi chiacpadec bëdamboec tabadte bunquid Nuquin Papan bëdamboen tabadmendac.

⁷ Abi chieshënuquid chieshënenquio icquin bëdamboen isquid Nuquin Papan bëdamboen isendac.

⁸ Ambi chiacpadomboenuidi nate bunquid Nuquin Papan bëdambo icmequin abibi bëismendac.

⁹ Aton matses chieshënansho isash: “Padi. Chën. Bëdamboequien tabadtiaid,” quequid Nuquin Papan bëdambo icmequin con mado caindac. Adquidbidi ademibidi con champi caindac.

¹⁰ Nuquin Papa tantiec bëdamboec tabadsho utsin chieshënaid Nuquin Papan bëdambo icmequin unëscasho abëdi tabadmendac.

¹¹ “Esus tantiaquid nec,” quesshun utsin mibi chieshënuquin chiacsho Nuquin Papan abëd tabadmenuen mibi bëdambo icmendac. Mibi cueso ademibidi mibi bëdambo icmendac. Ademibidi mibi mauasho Nuquin Papan mibi bëdambo icmendac.

¹² Aden utsibon: “Esus tantiaquid nec,” qeshun chieshënaqui cuishonqueta. “Ënden tsusedpabon Nuquin Papan chiaid chuisho chieshënquin cuesunepampic. Adoacsho Nuquin Papan bēdamboen isquin abēdi tabadmec. Adembidi utsibon chieshënacsho ëbi bēdamboen isquin unēsacsho abēdi tabadmendac,” quiash cuishonqueta –quequin chuipondash Esusën.

Abi tantiaquido bēdamboec tabadte chiaid
(Mad 9.50; Duc 14.34-35)

¹³ Abi macuēsh dapa poctse tsadquin Esusën chuibampondash. –“Ma utsibontsen Nuquin Papa tantianu,” quec sa pambid casecac batambo yec petiadquio yacimboec icta. Aden Nuquin Papan chiapadec bēdamboec tabadquin mimbi utsibo bēdamboec tabadte bumetsiac. Sa batambo icquid bēdamboequec. Sa batambo icboedi batapenquio yec icsasho ¿mitsipadentsi batambo icmeoapec? Adotiapimbo quec. Sa icsambo yanacsho penquio icquin scatequid nec. Adembidi matses bēdamboec tabadquio yec icsambo icsho Nuquin Papan chian anēdēnquiacno nēsecatequid nendac –quepondash Esus.

¹⁴ Adashic padpidec onquec: –Nuquin Papan chiapadec bēdamboec tabadte utsibo tantiamequido mibi neque. Aden tantiamenuc bēdamboec tabadta. ¿Nuntanshunda ëapadic? Padenquio. Umanuschumbien ma tantianueshun ëaquid. Adembidi: “Ma Nuquin Papan chiapadec tabadte tantianu,” quiash ënēdenquio yec bēdamboec tabadquin ismeta. Adsho isash: “Nuquin Papa tantiec bēdamboec tabadquid nec,” quetsiash utsibo.

¹⁵ ¿Utsibo chuinueta abentsëqui uano icpadic? Padenquio. “Ma nēidēn tantianu,” quec aidbēdi bēdamboec tabadquin chuibanquid.

¹⁶ Adembidi ëbi tantiesabobēd tabadquin: “Ma Nuquin Papa tantianu,” quequin ënenquio icquin Nuquin Papan chiapadomboen nata. “‘Nuquin Papa bēdamboequec,’ ma utsibot-sen quenu,” qeshun adota –quequin Esusën chuipondash.

Nuquin Papan Moises chuimiai chiaid

¹⁷ Nadentsen Esusën chuipondash. –Ëmbi chuibansho tantianshun: “Nuquin Papan chiaidquio chienquio quec,” quequin tantienda. “Nuquin Papan Moises dada uami-ampidbēda con tsusedpabo utsibo dada uamiampid chienquio icquin utsi uapec,” mimbi ëbi capec. Mambi utsi uainquio yoc. Nuquin Papan chiaid utsi uainquio icquin ambi chiactedimbo namenuc nebique.

¹⁸ Abimbo chuinu. Tanta. Abubēda nidaid nibēdamiabi icnuc Nuquin Papan chiaid bēnudtiapimbo iquendac. Ambi chiactedimbo naquin Nuquin Papan nainendac.

¹⁹ Padnubic Nuquin Papan: “Nadomboen nata,” quequin chiaid abentsëqui niacquid aid chiaidbidi adomboembidi niacmequid Nuquin Papan: “Bēdambo icquid nec,” catiapimbo quec. Utsibic Nuquin Papan chiapadec tabadec: “Nuquitsen bēdamboec tabadnuna,” quequid abi yacno nidacsho Nuquin Papan: “Bēdamboeshë icquid nec,” caindac.

²⁰ Moisesën dada uampid chuibanquido padiseyobobēd Nuquin Papa yacno puduedtequidoen mimbi dampec. Aido bēdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niacniaquec adecbidi Nuquin Papa yacno mibi puduedtiapimbo iquendac. Nuquin Papa tantiec bēdamboec tabadquidien puduedtsiash –quequin chuipondash Esusën.

Chieshëmēnquido nēish bēdante chiaid
(Duc 12.57-59)

²¹ Adshumbic Esusën padpiden chuiopondash. –Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiapadomboen matses cuidte chuiquidēn cuesunemequin cuidquid,” quequin chuipampid mimbi tantiec.

²² “Nadquidotsen cuidtequid nec,” quequin chuinu. Tanta. Aton matses nēishēnash aton nēish bēdanenquio icsho Nuquin Papan cuidtequido nendac. Utsibic chieshëmēnec icsamboec cuēmēnquido isadaidbo tsusiobon cuidacsho isun: “Bēdamboen naic,” catsiambi. Nēidic aton matses chieshënquin shēpiaquid Nuquin Papan icsano nēsecaquin cuidtequido nendac.

²³ “Chieshëmēnquid Nuquin Papan cuidtequid nendac,” quequin ëmbi chuisho tantianshun bēdamboen nata. Nuquin Papa tabadte shubu uashunaidēn puduedash: “Ambi chiapadomboen musuc menenu,” mibi quepec. Aden musuc menenumbi mimbi naid tantiata. “¿Ada ëbi chieshënquid icpec? ¿Ëmbi chieshëmeboedta icpec?” quequin tantiata.

²⁴ Adshun: “Ai, ëmbi chieshëmeboed quec,” qeshun Nuquin Papa tantiaquin mimbi bēboed meniabi mibēd chieshënamboed yacno nidash aidbēd bēdamboec onqueta. Adec bēdamboec onquiash padpidec choashun Nuquin Papa tantiaquin meneta. Adec mibēd chieshënamboebēdi bēdamboec onqueta.

²⁵ Mibêd chieshênamboed utsimbic: “Nêid cuidmenuen cuidte chuiquid yacno buanchitembimbi iquec,” qeshun: “Baded nid,” cac podquedên nidec aidbêd bêdamboec onquenidta: “Ma nêish bêdanu,” quiash. “Matses cuidte chuiquidên cuidchitoshe,” quiash badedquio mibêd chieshênamboedbêd bêdamboec isnanta. Abi yacno buanacsho cuidte chuiquidên: “Icsambo iqueque. Quênên nauedta. Êmbi chiacTED piucquid êmbi bedabi icnu ma tsadpanu,” mibi catsiash. Quênên nauedshun

²⁶ ambi chiacTED piucquid nibêdnuc mibi cuemenquio ictsiash. Mibêd chieshênamboedbêdi bêdamboec onqueta. “Nuquin Papan adembidi cuidnushe,” quiash adta —quequin Esusên chuipondash.

Icsaquin chudaid chiaid

²⁷ Adshumbic naden Esusên chuipondash. —Chiaid utsitsen mimbi tantiec. “Min chidopenquio chudenda. Min bènêpenquio chudmenda. Aben uequidên dada chudmenda,” quequin Nuquin Papan chiaid nuquin tsusedpan dada uapampic.

²⁸ Aden chiaid niac-niaquec icsambo icquid icnubi nadquid icsambo icoaic. Aton chidopenquio isec: “Aidquio chudtiadquio icchitebi,” quequin otacquo tantiequi matses icsapéc.

²⁹ Êshên isec mibi min chidopenquio bunec icsaic. Êshê chicshuniacimboec icsainquio yec ênêdash mibi bêdambo ictsiac. Icsaid ênenquio icquid Nuquin Papan chian anêdênquiacno nêsecaquin cuidendac.

³⁰ Min chidopenquio chudte bunquin mēismec mibi icsaic. Mêteshuniac bedtiapimbo yacimboen mibi icsaid ênta. Ênenquio icquid Nuquin Papan cuidendac —quequin Esusên chuipondash.

Aton chidobêd cuêshêdte chiaid

(Mat 19.3-9; Mad 10.11-12; Duc 16.18)

³¹ Nadentsen Esusên chuipondash. —Nuquin Papan Moises chuimiaiD utsitsen mimbi tantiec. “Aton chido bunenquio icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesên dada uapampic.

³² Utsitsen chinu. Aton chidon bènêpenquio chudmesho istuidshun Moisesên chiacpadomboen nac bêdambo ictsiash. Aton chido dada utsi chudmesa icshobi dadan ambembi dada uaid menequin nidmiac icsambo ictsiash. Aden nidmequin chido icsametsiash. Chido nidmiacsho bedquidtsen icsatsiash —quepondash Esus.

Abimbo chiacimboen chienda, quequin Esusên chiaid

³³ Adshumbic Esusên padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “ ‘Nuquin Papa utsi uatiapimbo yacimboen abimbo caimbi,’ quequin chiaid niactemaid nec. Niacsho Nuquin Papan cuidendac,” quequin Moisesên chuipampic.

³⁴⁻³⁶ Aidên chiacpadec muainquio ictiadquidi mimbi abimbo chiacimboen utsi uain icsamboen chiec. “Abi cuêmêdquid cuênec muasho êbi cuidtsiash. Nuquin Papa cuêmêdquid cuênênquio yec muasho Nuquin Papan êbi cuidenquio ictsiash,” qeshun mimbi utsi chiec. “Abu utsi uatiapimbo yacimboen êmbi chiacpadomboen naimbi. Muainquio iquebi,” mibi quepec. Adecbidi: “Nidaid utsi uatiapimbo yacimboen êmbi chiacpadomboen naimbi,” mibi queoapéc. Adembidi chiec mibi Edusaden queoapéc. Adembidi con mapi quequin mimbi chieque. Aden abimbo chiacimboen chienda. “Nuquin Papa cuêmêdquid cuênênquio iccomb,” mibi quenubi abu abi tabadaid icnuc ashunquio Nuquin Papan abitedi namendac. Nidaidic Nuquin Papan tincate nec. Edusaden yacnoshombic Nuquin Papan chomiaidên bêdamboen namendac yuecshun. ¿Min mapin icboda mibi nedi? Padenquio. ¿Mimbida min mapi masedcamed? Padenquio. Aton Icbombien Nuquin Papan naique. Abimbo chiacimboen icsamboen chienda.

³⁷ Adec muainquio icquin abimbo chuita. “Ai, adembi naimbi,” quequin mimbi chiacpadomboen nata muainquio icquin. Adembidi: “Padi. Natiapimbo iquebi,” qeshun mimbi chiacpadomboen nainda. Utsi uaic matses icsamequidên Satanasên tantiamiacpadec mibi muapeque. Adenda —quepondash Esus.

Chieshê nec cuidnanenda, quiaid

(Duc 6.29-30)

³⁸ Adashic padpidec Esus onquec: —Nuquin Papan Moises chuiquin dada uamiampid mimbi tantiaboed nad iquec. “Chieshênquin êshê ansiac adecbidi cuidnanec êshê ansenanquid. Chieshênquin sêcsiac adecbidi cuidnanec sêcsenanquid,” quequin chiaid icnuc

³⁹ utsitsen chuinu. Tantia. Mibi cuesquid cuidenda. Chieshënaqui cuidnanenquo icquin adembi bédamboen ista.

⁴⁰ Min matses: “Èbi cuidquin mimbi èbi meniambo iqueque. Min dashcute beccho,” qesho mimbi menenquo icsho isun: “Cuidte chuiquid yacno buanshun dashcute dachimechitomane,” qesho aid dashcute meneshumbic min dashcute utsitsen chicshun meneta. Adec bédamboec tabadta.

⁴¹ Utsibic: “Nèbi nidtuidquin con na buanec nid,” quequin ancabudac nèbi nidtuidenquo icquin udimbo buanshunta.

⁴² Aton na nibédquid: “Mitsana beccho,” qesho meneta. Utsibic: “Mitsana buanshun bèuaindami,” qesho: “Padi,” cainda. Meneta. Aden bédamboen nata –quepondash Esus.

Chieshënaquidobi bédamboen iste chiaid
(Duc 6.27-28, 32-36)

⁴³ Adshumbic abi macuësh dapa poctse tsadquin bédamboec tabadte Esusën chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshënaquid chieshënta,” quequin chuiampic.

⁴⁴ Utsi mibi chuinu. Tantia. Mibi chieshënaquidobi bédamboen isquin tantia. Chieshënaqui: “Èbi chieshënaquid bédamboen ista, Papa,” quequin Nuquin Papa chianeta.

⁴⁵ Aden chianec Nuquin Papabimboec mibi ictsiac. Mibi utsibo bédamboen nashunquid ictsiac. ¿Bédambo icquido yacnouidida Nuquin Papan ushë chëncamepadic? Padenquo. Icsaido yacnotsen ushë chëncamec. ¿Bédambo icquido yacnouidida ue chomepadic? Padenquo. Icsaido yacnotsen ue chomec. Bédambo icquidobédtabi icsambo icquido Nuquin Papan bédamboen nashunec.

⁴⁶ ¿Mibéd tantiananquido min shubun icquidoudi mimbi bédamboen nashunsho isunda Nuquin Papan mibi: “Bédambo iquec,” capec? Padenquo. Mimbi icsambo iquec caidontsen ambi tantiaido nashuntsiashe. Aidombien piucquid bedshumënquido icquimbi aton shubun icquidoudi nashuntsiashe. Aden nainda. Utsibotsen bédamboen nashunta.

⁴⁷ ¿Min shubun icquidobéduidida mibi onquec tabadpe? Nuquin Papa tantiesaboen adpec. Utsibotsen bédamboen ista.

⁴⁸ Nuquin Papabimboec icta. Bédambo icquid icta. Bédambo icquidobédta icsambo icquidobi Nuquin Papan bédamboen tantiacpadomboen utsibotsen bédamboen tantia –quepondash Esus.

6

Utsibo bédamboen nashunte chiaid

¹ Adshumbic abi macuësh dapa poctse tsadquin Esusën chuipondash. —Nadquid icsambo iquec. Nuquin Papa tantienquo icquimbi aton matses ismenuenuidi naic icsambo iquec. Adquid Nuquin Papan bédamboen istiapimbo iqueque. “Utsibo nashunu,” quequin utsibo ismenquo icquin nata.

² “Aton na nibédquido menenu,” qeshun utsibo ismequin menenda. Ismenquo icquin meniac bédambo ictsiash. “Nuquin Papa tantiaquid nebi,” quec muaquidën nacpaden nainda. Nuquin Papa tantiaquid damenuembien muaquidën matses dadpen yacnoshonuidi menedenepec. Adosho isun aton matsesënuidi bédamboen isnubi Nuquin Papan bédamboen istiapimbo iquec.

³ Aton na nibédquido menequin utsibo ismenda. Meneshun: “Menebanombi,” quequin utsibo chienda.

⁴ Adsho isun mimbi utsibo ismenquo icquin naid tantiaquid icquin Nuquin Papan bédamboen isquin abèdi mibi tabadmendac –quequin Esusën chuipondash.

Nuquin Papa chianete Esusën chiaid
(Duc 11.2-4)

⁵ Adshumbic Nuquin Papa chianetetsen Esusën chuipondash naden. —Bédambo icquid damianquidën nacpaden nainda. Aidon Nuquin Papan chiaid chuibante shubun pudueshun utsibo tantiamenuenuidi nidthoshon comapenecon quequin Nuquin Papa chianepec. Adash umanuc puduenshun matses dadpen ismenuenuidi padpiden adembidi chianec. Adquid aton matsesën: “Bédambo iquec,” canubi Nuquin Papan padenquo iquec. Bédamboen istiapimbo iquendac.

⁶ Mibi adenda. Utsibo ismenuenuidi nainquo icquin matsesën isacmaidquo Nuquin Papan tantiaquiquin chianeta. Aden chianequid mibi icsho Nuquin Papan mimbi utsibo ismenquo icquin naidtedi tantiaquid icquin mibi bédamboen isquin abèdi tabadmendac.

⁷ Nuquin Papa chuiquin bédamboen chianeta. Nuquin Papa tantiesabon ambi tantiaid chuibudacimboen Nuquin Papa chuibudenda. “Yuenquo chuibudac nuqui tantiaboedën

nuquin nashuntsiash. Padenquo icac nuqi nashunenquo ictsiash,” qeshun Nuquin Papa tantiesabon yuen chuibudacrimboen nainda.

⁸ Adoenquo icquin Nuquin Papa chianeta. Mimbi chiabi: “Adopashuni. Aid nibēdnuc unēsebi. Utsi icnuc bēdambo ictsiabi,” quequin mimbi otacquo tantiaid Nuquin Papan tantieque.

⁹ Naden Nuquin Papa chuita.

“Bēdamboshē icquid icsho matses abitedishunquo mibi tantiapashun, Papa.

¹⁰ Matses abitedishunquo mibi con Icho capashun. Mibi yacnoshon mimbi uaido mayan bēdabon mimbi chiapadomboenuidi naic.

Adomboembidi mimbi chiapadomboen matses abitedishunquo napashun.

¹¹ Bumianenda, Papa. Badiadquidēn badiadquidēnquien con pete icmeta.

¹² Utsibon chieshēnaqui ēbi cuidnanenquo icsho isun ēbi icsashobi cuidenquo icquin ēbi bēdamboen ista, Papa.

¹³ Mimbi chiaid ēbi niacmenda, Papa.

‘Icsamenushe,’ qeshun Satanas ēbi yuamenda, Papa.

Abitedishun Icbombo yec abitedimbo namequidquo mibi nec, Papa.

Ēmbi mibi chuisho tantiata, Papa.

Ēnenquo icquin abitedishunquo: ‘Bēdambo iquec,’ mibi capashun. Padi,”

quequin Nuquin Papa chianeta —quequin Esusēn chuipondash.

¹⁴ Adashic nadpondash: —Utsibo bēdamboen ista. Cuidnanec chieshēnanenda. Cuidnanec chieshēnanenquo icsho isun Nuquin Papan mibi cuidenquo icquin bēdamboen istsiash.

¹⁵ Cuidnanec chieshēnansho isun Nuquin Papan mibi bēdamboen istiapimbo ictsiash —uequin Esusēn chuipondash.

Buna mēmunte chiaid

¹⁶ Adshumbic utsibo ismenquo icte utsi Esusēn naden chuipondash. —Tantia. Nuquin Papauidi tantianuequin buna mēmunquid chuinu. Muaquidēn nacrimboen ismenda. Muaquido: “Buna mēmunquid nec,” aton matses camenuc abibi maniumēdash nēnquidbitsēcquiec mamēnenquo iquec. Adec buna mēmunquid tanemuic. Adsho isun matsesēn bēdambo icquid danubi Nuquin Papan: “Icsambo icquid nec,” qeshun bēdamboen istiapimbo iquec.

¹⁷ “Nuquin Papauidi tantiaquin nēidtedec ushquin buna mēmunu,” qeshun Nuquin Papambo tantiaquin nata. “Utsibon tantianushe,” qeshun bēdamboen min manēdaid shuushcata. Adash bēdamboec mamēnta. Aden utsibo ismenuenuidi nainda.

¹⁸ Aden bēdamboen manēdaid shuushcaid isun: “Buna mēmunc nec,” cainquo ictsiash utsibon mibi chuiquin. Nuquin Papambien: “Ēbiuidtsēqui tantianuen naic,” quequin tantiasiac. Adshun mimbi utsibo ismenquo icquin naidtedi tantiaquid icquin abēdi mibi tabadmendac —quequin chuipondash Esusēn.

Nuquin Papa yacno tabadte bunta, quiaid

(Duc 12.34)

¹⁹ Adshumbic padpiden Esusēn chuipondash. —Ēmbi chuiboedquo tantiasun mimbi dayun uatequiduidi tantienda. Dayun uatequid nadquo iquec. Chodquetequid yec shocosh chiuidtequid yec matsesēn ampeshuntequid yec quec icsabudtequid nec. Adquiduidi tantienda.

²⁰ Icsabudesambo tantiata. Nuquin Papambo tantiec aidbēd tabadte bunquin ambi chiapadomboen nata. Chodquetiapimbo icquid yec shēnibudtiapimbo icquid yec ampeshuntiapimbo icquid yec quec Nuquin Papa yacno iqueque. Aidquo tantiata.

²¹ Mibi bunaidquo ēnenquo icquin tantiec mibi tabadtsiac. Nuquin Papabēd tabadte bunquin aid tantiata —quepondash Esus.

Pabiate shēcūē cuembo icquid chiaid

(Duc 11.34-36)

²² Adshumbic abi macuēsh dapa poctse tsadquin utsitsen Esusēn chuipondash. —Pabiate shēcūē cuembo icquin Nuquin Papa tantiaquiec mitsanauidi tantienquo yec mibi bēdamboec tabadtsiac.

²³ Pabiate cuēnēdacrimboec yec Nuquin Papa tantienquo yec mitsanauidi tantiec bēdamboecta tabadtsia? Padenquo. Adec mibi icsamboec tabadtsiaque. Adenda —quequin chuipondash Esusēn.

Bedteuidi tantienda, quiaid

(Duc 16.13)

²⁴ Adshumbic naden Esusēn chuipondash. —Mitsanauidi tantiec mibi icsamboec tabadtsiac. ¿“Naic cho,” quequin daēdshun chiacta aid daēdi mimbi nashumpatsia? Padenquo

mimbi ictsiac. Abentsëc nashunquin utsin chiaid mimbi natiapimbo ictsiac. Aden mitsana bedtequiduidi tantiaquin aid bednuenuidi mimbi natsiac. Aden naquin Nuquin Papan chiacpadomboen mimbi natiapimbo ictsiaque. Mitsana bedteuidi tantienda. Nuquin Papauidsëqui tantiata —quequin Esusën chuipondash.

*Nuquin Papan abi tantiaquido dayun uaid
(Duc 12.22-31)*

²⁵ Adshumbic Esusën padpiden chuipondash. —Ëmbi aden chuisho tantiash dacuëndenda. “¿Atotsimbi pepe? ¿Atotsimbi acpe? ¿Atotsimbi dasiuidpe?” quec dacuëndenda. Nuquin Papan nac unësabi mibi tabadeque. Aidëmbien petebëdta dasiuidte icmeque. “Con na nibëdtsiash,” quiaish dacuëndec tabadenda.

²⁶ ¿Uicchnüenda ambibi cuëte ëshë siac bacuëacsho chepadic? Padenquo. Adecbidi ambi pete dayun uatequid shubumpi nibëdec. Adquid icsho Nuquin Papan aton pete bedmec. Uicchnun abipadquidpenquo icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuëndenda.

²⁷ ¿“Unëstiapimbo iquebi. Dacuëdebi,” quequidta unësenquo icpadic? Adequi dacuëdquid unëstiashe. Unësteuidi dacuëdënenda.

²⁸ “¿Atotsimbi dasiuidpeba?” ¿quecta mibi dacuëndec tabadpe? Tantia. Chuinu. “Cuëte bacuëc bëdamboshë isadtsec,” quepec nuquin matses. ¿Aton sedquidi shoyontsëcshun abi dasiuidte daëdcash dasiuidtsashta bëdamboshë isadpadic? Padenquo. Nuquin Papan uacpadquiobi iquec.

²⁹ ¿Cuëte bacuëc bëdamboshë isadquidbimboecta nuquin tsusedpa chuiquid dapa Sadomon cuëmëdquidën dashcute icpampic? Padenquo. Adpenquien icpampic.

³⁰ Cuëte bacuëc bëdamboshë isadboed abadiadtsëcshumbi isac ënden chodquiac. Aid badedquio chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmenquioda icpadic? Padenquo. Mibi dasiuidte icmeque. Dacuëndenda. Mitsana nibëdquio icte dacuëdënquimbi mimbi Nuquin Papa bëdiactsëc tantiatseque.

³¹ Dacuëndec tabadenda. “¿Atotsimbi pepe? ¿Atotsimbi acpe? ¿Atotsimbi dasiuidpe?” quec dacuëndenda.

³² Nuquin Papa tantiesaboen adquid bedteuidi bunquieque. Adenda. Mitsana nibëdsho isun Nuquin Papan mitsana icmetsiashe. Abi tantiaquido yec dacuëndec tabadenda.

³³ Adenquo yec: “Con Icho mibi nec, Papa,” quequin ambi tantiacpadec bëdamboec tabadte bunta. Adece tabadec: “Aid nibëdnuc unësebi,” quequin mimbi tantiaidtedi Nuquin Papan mitsana icmetsiashe.

³⁴ Èbi adsho tantiash badiad utsi caic: “Aid badiadën ¿atotsimbi nape?” quec dacuëndenda. Aid badiadën Nuquin Papan ambi tantiacpadomboen mibi nametsiashe. Nëid ushëmbi: “Naden naimbi,” quequin tantiec tabadnuna dacuëdenquo yec —quequin chuipondash Esusën.

7

*Utsibo icsaid chienda, quiaid
(Duc 6.37-38, 41-42)*

¹ Naden Esusën Nuquin Papan chiacpadec tabadte chuipondash. —Mibi icsaid ucu-dambobi utsibo icsaiduidi chienda. Adembidi Nuquin Papan: “Icsambo iquec,” mibi canushe.

² “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda.

³⁻⁴ ¿Abi bëtsiadaid bëchish nua bëuequid bëbedadabi icquidënda: “Mibi bëtsiadaque. Bëbednu,” capatsiashe utsi chuiquin? Padenquo.

⁵ Abi bëtsiadaid abia bëbedadashien: “Mibitsen bëbednu,” quetsiashe. Adembidi mimbia mibi icsaid ënshun: “Icsaid ënash bëdamboequien tabadtiad,” quequin utsibo bëdamboen chuita. Bëdambo icquid damianquidën abi icsaid ënabi: “Aid icsambo iquec,” quequin utsibo icsaid chuibanec. Adquid tanenda.

⁶ Mimbi bëdamboen chiaqui tantienquo icsho chuidonenda. Nuquin Papan chiaid chuibudaqui tantiatiapimbo icquin niac-niacsho isun adenuidi chuidonenda. Opa icsan abi pemequid piacbimboen mibi chieshëntiashe. Chanchon icbon dashcute nebudshun bëchish uaquein tin-tincacbimboen Nuquin Papan chiaid niac-niactiashe. Adquid chuidonenda —quepondash Esus.

*Ënenquo icquin Nuquin Papa chianete chiaid
(Duc 11.9-13)*

⁷⁻⁸ Nadembidi Esusën chuipondash. —Nuquin Papa ënenquo icquin chuidoneta. Bacuëbon: “En na,” cadoniachimboen chuidoniac Nuquin Papan mibi tantiatsiashe. Adem-bidi: “Ëbi bëdamboen name, Papa,” mimbi cacpadomboen bëdamboen mibi nametsiashe. Adembidi: “Ëbi nashunquin ëbi bëdambo icmeta, Papa,” quequin chuidoniac Nuquin Papan mibi bëdambo icmendac.

⁹ ¿Icsambo icquidta Nuquin Papa icpadic? Padenquo. Bëdambo icquidquo nec. Bacuëmpi: “Bundobique. Penu. Beccho, papa,” ¿qeshoda amën cudasënquin cuënotebi menepadic? Padenquo.

¹⁰ ¿Adembidi aton bacuën: “Nuëcquid chenu. Beccho, papa,” cacta cudasquin nisimbo menepadic? Padenquo.

¹¹ Matses yec icsaquito icquimbi min bacuëbo abimbo mimbi menenubien Nuquin Papan ambi uaido matses: “Ëbi nashunta, Papa,” qesho tantiashun bëdamboen nashuntsiashe. Nuquin Papa chianeta.

(Duc 6.31)

¹² Nuquin Papan tantiaido icquin utsibo bëdamboen isquin bëdamboen nashunta. Utsibo caic: “Aidon nashumpashuni,” quequin mimbi otacquo tantiacpadomboembidi utsibotsen nashunta. Aden Nuquin Papan chiaid Moisesbëditan nuquin tsusedpabo utsibon dada uaquin chiampicpadomboen mimbi natsiaque. Aden utsibo nashunta —quequin chuipondash Esusën.

Daëdpactsëcshun Esus tantiabente chiaid

(Duc 13.24)

¹³⁻¹⁴ Adshumbic Esusën naden chuipondash. —Nuquin Papabëd tabadnuec aid tantiec bëdamboec tabadta. Shëcuë aniambo icquidën matses abentse-abentsec puduedachimboec abentse-abentsec Nuquin Papa yacno puduednuec aid tantiec bëdamboec tabadec. Padnuen antied dapan abi maisi nidachimboec matses dadpenquo abi tantiesabo yec Nuquin Papan icsaido nësecacno nidendac —quepondash Esus.

Icsambo icquid nec, quequin tantiate chiaid

(Duc 6.43-44)

¹⁵ Abi macuësh dapa poctse tsadquin naden Esusën chuipondash. —Utsibo: “Nuquin Papan chiaidquo chuiquid nebi,” quec bëdambo icquid damianquid iquendac. Adquid choshon Nuquin Papan chiaid niac-niacmequin icsamendac. Bëdi dapa nëish yua pete bunquiacimboec mibi icsamete bunquieque. Adquidën chuisho tantienda.

¹⁶ “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquo chienquo icsho tantiashun: “Utsi uain chiec,” mimbi catsiac. Chetequid isun cuëte dada matsesën tantiec. Aden tantiec nisanquidën bacuë bësho isash: “Dadainën bacuë nec,” quesa matses nec. Adecbidi echo bacuë bësho isash: “Bata nec,” quesa matses neoaic.

¹⁷ Cuëte bëdan bacuë adquiobidi bacuëec. Cuëte icsan bacuë adquiobidi bacuëoaic.

¹⁸ ¿Cuëte bëdan bacuë chetemaidta nepec? Padenquo. ¿Cuëte icsan bacuë chetequidta icpec? Padenquo.

¹⁹⁻²⁰ Chetemaidbimboec muaquid bëdambo ictiapimbo iquec. Nuquin Papan chiaid niacniaquec icsamboec tabadsho isun: “Muaquid nec,” quequin mimbi tantiatsiac. Adembidi Nuquin Papan chiaidquo chienquo icsho: “Muaquid nec,” quequimbidi mimbi tantiatsiaque. Adquidën chuisho tantienda. Cuëte bacuëesa dëdshun nëdëncacimboen: “Nuquin Papan chiaid chiembi,” quec muaquid Nuquin Papan icsaido cuidacno nësecaindac —quepondash Esus.

Nuquin Papa yacno puduednu, queuide chiaid

(Duc 13.25-27)

²¹ Utsitsen Esusën chuipondash. —Ëbi caic: “Con Icho mibi nec. Mibi tantiembique. Mibi yacno ëbi puduedme,” ¿quequidtedida Nuquin Papa yacno puduedpatsiashe? Padenquo. Nuquin Papan chiapadomboen naquidquien abi yacno puduedtsiashe.

²² Nuquin Papa yacno ëmbi yuede ushën matses dadpenshun ëbi chuuiuidendac. “Con Icho mibi nec. Mibi caic: ‘Aidën namiaidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuduedaido cuemequinc comapenen tantiaquin ismequinc caombique. Nuquin Papa yacno ëbi puduedme,”

²³ qesho ëbimbo tantiec Nuquin Papan chiapadec bëdamboec tabadabi icsho: “Ëmbi tantiacmaidquo mibi neque. Baded cuenta. Icsamboec tabadquid mibi neque,” caindambi. Ëbi adsho tantiash muainquo yec bëdamboec tabadta —quepondash Esus.

*Shubu uaquidbimboecquid chiaid**(Duc 6.47-49)*

²⁴ Adshumbic Esusën padpiden chuipondash naden chuiquin. —Ëmbi chiacpadomboen nata. Aden mimbi bédamboen natsiaque. Shubu uaquin bédamboen tantiaquidbimboec mibi ictsiaque. Tantia. Chuinu. Bédamboen tantiaquidën mananënquo shubu uaquin buntain nitsinguid.

²⁵ Aden shubu uan ue dapa conquequidbëdi chonoc shubu chimeshadenquo icquid. Shubu nuntan anchiuidenquo icquid.

²⁶ Aden ëmbi chiacpadomboen naquid icnubi utsibo ëbi tantiesa iquendac. Aido shubu uaquin tantienquo icquidbimboec iquec. Tantienquo icquidën nadoquid. Acte cuidi cuëmanquiobi shubu uaquin badedi unëstsëcquidquo cueste nitsinguid.

²⁷ Adquid nitsinaid ue dapabéd conquequid choquin shubu chimeshquid. Adecbidi acte cubudtoquidën shubu nuntan mauanquid. Aden tantesa uatsëcquidbimboec ëbi tantiesa iquec. Adquid Nuquin Papan cuidtequido neque. Ëbi tantiata —quequin chuipondash Esusën.

(Mad 1.22)

²⁸⁻²⁹ Adsho tantiash: —Ma comapenen tantiaquidquo Esus neyoc. Nuquin matses tsusiobon Moisesën chiampid bëdiactsëc tantiatsëcquin chuitsëccosh. Padnuen Esusënquo comapenen tantiaquin chuiposh —quecuededpondash matses dadpenquo.

8*Esusën daicsaid bédamiaid**(Mad 1.40-45; Duc 5.12-16)*

¹ Ambobi macuësh poctse tsadquin ënquin chuitanequien Esus macuësh budpondash. Adec budanec nidsho isumbien matses dadpenshun tsibanampondash.

² Adnubien dada ushumbo yec daicsaidquo choshon Esus ismenuen danëshën sebudpondash. —Ëbi bédamete bunquin mimbi ëbi bédametsiaque. Ëbi bédame, Icho —caquien Esus:

³ —Ai, mibi bédamete bunebi. Mibi bédanendac —quequin mishtemaidquiobi mishnubi badedquo bédampondash daicsaid nibëdquiec.

⁴ Adsho Esusën: —Utsibo chienquo yec nëish yua abided unës uaquido ismenuec nidta. Mibi isash: “Bédamiaid nec,” quequin ma aidon tantianu. Moisesën chuipampicpadomboen nanuen: “Nuquin Papan bédamioshi,” quequin Nuquin Papa menetequid buanquin ismec nidta —quequin Esusën chuipondash. Adtanec shubu dadpen icquid Capednaun caid yacno chopondash Esus.

*Sondado chuiquid dapan yua Esusën bédamiaid**(Duc 7.1-10)*

⁵ Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash.

⁶ —Tantia. Chuinu, Icho. Con shubun icquid con yua shëquëquenquo iccosh. Natiambo yec unëstiadsëcquo iccoshe. Bédameta

⁷ —quesho tantiashun: —Ai, bédamec nidnu. Nid —caquien:

⁸ —Padi. Mibi bédamboshë icquidquo nec. Ëbibi icsactsëcquid icquin mibi con shubun puduedmetiapimbo iquebique. Nëshunquiobi bédameta. Nidenquo icquin nëshunquiobi mimbi: “Bédanta,” cac con yua bédantsiashe. Mimbi tantiacpadomboen namequidquo mibi nec.

⁹ Ëbibe chuiquid dapan namiac sondado utsibo namequid nebi. Ëmbi: “Nid,” cac badedi nidec. Ëmbi: “Baded cho,” cac badedquo choec. Con yuan ëmbi: “Nata,” cac ëmbi chiacpadomboen naic. Mibi adquidquiobidi neque. Con yua bédameta —quepondash sondado chuiquid dapa.

¹⁰ Adsho tantiashun Esusën abi tsibambëquido chuipondash. —Bédamboen nëidën chuipec. “Comapenen tantiaquin chuiquinuidi con yua bédametsiashe,” quequin ëbi bédamboen tantiaquid nec. Isadaidbo adquid nibëdec. Isadaidbon ëbi bëdiactsëc tantiabedtsec.

¹¹ Tantia. Chuinu. Matses utsi icquimbi sondado chuiquid dapan ëbi bédamboen tantiec. Adec nidaid utsi-utsiec yacnoquido isadaidpembo ëbi tantiaquido yanash Nuquin Papa yacno puduedendac. Ambo puduedash isadaidbo tsusedpabobéd tabadendac. Abadauan caid yec Acobo caid yec Isac caid yec quequidobéd tabadendac.

¹² Padnuen Nuquin Papan con matses caido isadaidbo dadpenquo Nuquin Papa yacno puduedenquo iquendac. Abi tantiesabo icsho Nuquin Papan cacumequin icsaido

nësecacno mibi nidmendac. Adoac mibi tènquebudquiendac —quequin abi tsibambëquido isadaidbo chuipondash Esusën.

¹³ Adshumbic sondado chuiquid dapa chuiquin: —Nidec nid. Mimbi tantiacpadec min yua bédaneque —cac nidshun isquien bédanac Esusën chuibocpadequi.

Petedon nachi Esusën bédamiaid
(Mad 1.29-31; Duc 4.38-39)

¹⁴ Adash yuec-yuecpectsëc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec.

¹⁵ Uesho istuidshun mëdinquin Esusën bédamepondash. Aden bédamiac Esus pemepondash.

Esusën matses dadpen bédamiaid
(Mad 1.32-34; Duc 4.40-41)

¹⁶ Petedon nachi bédamiaid inchëshbudtsëqui Esus ismenuequin matses daicsaido dadpen bē-bēpondash. Bē-bëshobien podobitsi icsa dapuduedaido comapenec cuëdquin cuemeshumbic daicsaidotsen Esusën bédamebampondash.

¹⁷ “Nuqui icsaid ucquin nuqui daicsaidobi bédamiac,” quequin ëndenquio Nuquin Papan Esusën nate Isayas dada uamepampicpadomboen nanuen adopondash Esusën.

Abëd icte bunquido Esusën chiaid
(Duc 9.57-62)

¹⁸ Adashic abi isnuec matses dadpenquio datsidadsho isash abëd icquido chiec: —Chian potec nidnu. Nid —quianec chian yacno nidec puduampondash Esus.

¹⁹ Puduane nidaneshobien Moisesën dada uampid chuiquanquidën Esus chinuntuidpondash. —Con Icho mibi caindami. Mibëd nidendabi —caquien:

²⁰ —¿Ëbëdta nide? Tantia. Mibi chuinu. Bëdi chëshë shëcuën ushquid. Uicchun shubu uash abuc ushquid. Padnueni con shubu nibëdnuc Nuquin Papan matsesmiad yec quenenenquio yec capucuenendac. ¿Ada mibi adpatsia? —capondash Esusën Moisesën chiampid chuiquanquid chuiquin.

²¹ Adnubien abëd capucuenoed utsin: —Chiata, Icho. Con pa unësoshe. Chococatamono —caquien:

²² —Padi. Cho. Ma unësaidën tantienquio yacimboen ëbi tantienquio icquidon ma papa chococanu. Ëbëdtan bédamboen naic cho —capondash Esusën amë unësaid chuiquin. Adobidanec nidanepondash chian yacno.

Natiambo cunquenuc acte tēcucasquiaid Esusën ënëdmiaid
(Mad 4.35-41; Duc 8.22-25)

²³ Chian budash Esus chedo cano antabëdtopondash. Adashic potenuc puduampondash.

²⁴ Aden potenubi nënantanquio icnuc cunquetuidpondash. Adnubien acte comapenec tēcucasquiampondash. Adec acte tēcucasquenuc cano acte ancushad-ancushadquieq yampondash cano mentoadtiadtsëcquio yec. Adsho isun abëd icquidon: —Dacuëdampambo iquec —quetanquin isquien Esus ushpec.

²⁵ Adshobien tinquin: —Nuqui mentoadeque. Isucun, Icho. Baded ëbi nashun —caquien:

²⁶ —¿Atotsi quiash dacuëde? Ëbi bëdiactsëc tantiatsec dacuëdquidquio mibi neque. Istac —quetanec nidtoshon actebëdtabi cunquequid chuipondash. —Padi. Ënëdta —caquien natiambo cunqueboedi badedquio ënëdpondash cano mentoadtsenquionobi. Actetsen tēcucasquenquio yampondash.

²⁷ Adsho isashien: —¿Mitsipadquidënquio actebëdta cunquequid ënëdmepashba? —quecuededpondash Esusbëd icquido.

Dada daëd dapuduedaido podobitsi icsabo Esusën cuemiaid
(Mad 5.1-20; Duc 8.26-39)

²⁸ Aden chian potias pudundonobien Cadada yacnocquid podobitsi icsa dadpen dapuduedaid dada daëd choshon Esus chuituidpondash. Aid daëd unësaido chococaid shëcuëmbi tabadpondash. Matses cuesunete bunquieq dacuëdampambo icsa isash aid yacno matses nidenquio icpondash.

²⁹ Aidon podobitsi icsabon oncamiacpadomboen comapenec cuëdquin Esus chuituidpondash. —¿Nuquin Papa caidën Madombo icquin ëbi natiamequin cuidnuecta cho? ¿Nuquin Papan cuidte ushë choabi icnubida ëbi cuide? —capondash dada daëdshun abi oncamequidën chiaid chuiquin.

³⁰ Uano chanco dadpenshun natiacquin udquin pebededpondash.

³¹ Adnubien podobitsi icsabon aid dada daëd oncameoac: —Ëbëdidi cuemiac chanco icbo-icboec dapuduedtsiabi —quecuededpondash podobitsi icsabo.

³² Adsho tantiashun Esusën: —Ai, mimi tantiacpadec nid —cac nidash chanco icbo-icboec dapuednubi chanco abitedi macuësh budec acte nësebudec mentoadbudnepondash nibëdquiec yec. Adec podobitsi icsabo dapuduenanec nidnubi dada daëd bëdambo yampondash.

³³ Adsho istanequien chanco pemequido aton matses chiec niqianec shubu dadpen yacno nidanepondash. Chanco mentoadbudneboedbëdta podobitsi icsabo dapuduemeboed uesquin chuituidpac caondash. —Nuqui dacuëdëmboedobi bëdambo yanosh —quequin

³⁴ chuituidaquien anocquido abitedi Esus isec cho-chopondash. Adec cho-choshombien: —Dacuëdampambo mibi iqueque. Èbi yacno choenda. Nidec nid —cabededpondash. Adoac Esus nidpondash.

9

Shëquëquenquo icquid Esusën bëdamaid

(*Mad 2.1-12; Duc 5.17-26*)

¹ —Nid —cac nidanec chian budash cano antabëdtoshon chian potiash abi iccondacnobidi Esus choapondash.

² Adnubien utsibon dada shëquëquenquo icquid Esus ismenuen aton uetechobi bëpondash. Bësho isumbien Esusën: —Èbi caic: “Aidën bëdametsiash,” queshun bëac —quequin daicsaid chuipondash naden. —Dacuëdenda, madosio. Ambi chiaid niac-niaquec icsaboedi cuidmenquo icquin Nuquin Papa mibi bëdamboen ismembique —capondash Esusën.

³ Adsho tantiash aid datsidadash tabadquido Moisesën dada uampid chuibanquido: —¿Adpecta matses icquid? “Nuquin Papapadquidquibini nec,” quepequien iquec. Icsamboen chiec —quecuededpac caondash Esus caic.

⁴ Uanuësh adsho ambembi tantiashumbien Esusën aido chuipondash. —¿Atotsi quequin mimi èbi chieshëmpe?

⁵ Ambi namiaid icquin èmbi: “Nuquin Papa cuidmenquo icquin mibi bëdamboen ismembì” cac Nuquin Papan nëid cuidenquo iquendac. Adembidi ambi namiaid icquin èmbi: “Caputa,” cac nëid capuendac.

⁶ Istac. Mibi ismembique. “ ‘Nuquin Papan chomiaid nec. Icsaidobi Nuquin Papa bëdamboen ismequid nec,’ mabi canu,” queshun naimbique. Istac —quetanquin dada shëquëquenquo icquid chuiquin: —Caputa —capondash Esusën.

⁷ Adoac bëdanash aton shubuno nidpondash.

⁸ Adsho isashien: —Adquidshenda nepec. Nuquin Papan namiaid icquimbien adochitec. Abi namequid Nuquin Papa bëdambo iquec —quecuededpondash isquido.

Èbëd iquec cho, quequin Esusën Mateyo chiaid

(*Mad 2.13-17; Duc 5.27-32*)

⁹ Adnubini con matses aton piucquid bedshunuec podqued cuëman tsadquid shubumpin tsadpondac. Con matses yuaquid ancaquid dapan: —Min matsesën na èmbi chiacctedi piucquid bedshun èbi meneta —cac niondabi. Ambo tsadshobini Esusën istuidpondash. Istuidshumbini Esusën: —Nuquibi icnu. Cho —capondash. Adoac badedi tsibananec

¹⁰ nidequi con shubun Esusbëd puduedpondabi.

Adec puduedsho isashien matses dadpen pudued-puduedpondash. Esusbëd pec tabadnuec èbëdtan piucquid bedshunquidobëdi con matsesën: “Icsaido nec,” caidombo pudued-puduedpondash.

¹¹ Adsho isumbien Esus chieshënquido Padiseyobo caidon Esusbëd icquido chuituidpondash. —¿Atotsi quiash mibi chuiquid Esus caid icsaquidobëdi pec tabadpec? Icsambo iquec —capondash Esus chieshënquidon.

¹² Adsho tantiash Esus nadpondash. —¿Bëdambo icquidta dauëchoquidën dauë menepadic? Padenquo. Ma daicsaidi dauëchoquidën menepaid yoc. Adembidi icsaidobi abi icsaid ucquin bëdambo icmenuec nebi.

¹³ Nuquin Papan naden dada uamiampid pausudshun bëdamboen naic nid. “Èmbi chiacpadomboen abentse-abentsen mimi naic. Adoquimbi èmbi chiaid utsi niaquec mimi icsaido caido mimi bëdamboen istiapimbo iquec. Adsho isun: ‘Mibi bëdambo iquec,’ catiapimbo iquebi” quequin Nuquin Papan dada uamiampid pausudta. Èbibi matses bëdamboen ismequid nebi. Muaquido: “Bëdambo icquid nebi,” quesho bëdambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” quesho: “Icsainquo yec ènëdta,” canuec nebi —quepondash Esus abi chieshënquido chiec.

Esusën buna mëmunquido chiaid

(*Mad 2.18-22; Duc 5.33-39*)

¹⁴ Adnubien Uan acten mentoanquidbéd icquidon choshon Esus chuituidpondash. — Nuquin tsusedpabon nacpadomboen Nuquin Papauidi tantianuen buna mēmūquidquio nebi. Padiseyobo adembidi naquidquio nec. ¿Atotsieshun mibéd icquidon aden nainquio icpec? ¿Natiapimboda iquec? —caquien

¹⁵ Esus nadpondash. —¿icbon: “Pec cho,” cacta aid tantiec sedenquecuededquin buna mēmūmpadic? Padenquio. Adquidbédtan pec cuishonquec tabadquid. Icho nibédanan sedenquecuededquin buna mēmūnquid. Èbi nibédanan èbéd icquidon èbiuidi tantianuen buna mēmūnendac —quepondash Esus.

¹⁶ Adshumbic Esusèn naden chuipondash. —Dashcute chuca cuëshun dashcute shèni nedesquiaidbédta tuscaisa. Aden tuscashun panac shèni badedquio nedesquequid.

¹⁷ —¿“Machi sandono,” qeshun tsitsan shènimbida sandopadic? Padenquio. “Machi sebudnushe,” qeshun tsitsan shènin sandoenquio icquid. Tsitsan chuca daèdcashumbien machi sandoquid —quepondash Esus. —Adembidi tsusedpabon: “Naden nata,” quequin chiaid chienquio icquin ambi bédamboen iste chuiquin Nuquin Papan chiaid utsi chiec nebi —quequin tantiec adpondash Esus Uan acten mentoanquidbéd icquido chiec.

Champi uincuemiaidbédta chido bédamiaid

(Mad 5.21-43; Duc 8.40-56)

¹⁸ Aden chuishobien Nuquin Papan chiaid chuibante shubun tabadsho isquid dapan chuituidpondash. —Con champi unèstiadtsécquio iccoshe. Mishec cho. Mimbi mishac bédantsiashe —capondash. —Mibi con Icho canu —quequin danèshèn sebudquin ismepondash.

¹⁹ Adoaquien Esus aibdédi nidpondash.

²⁰⁻²¹ Nidnubien chido intac budted-budtedec seta 12tedi matamec bédanenquio yec nacchoadbudquidèn Esusèn cachotsèqui choquin: —Bédamianquidèn dashcute mishec bédampatsiashe icmanendac —qeshun ismenquio icquin dashcute cuèmano mishtsac caondash.

²² Adoaquien bidadquin isun Esusèn chuipondash. —Dacuèdenda. Mibi: “Aidèn nac bédantsiabi,” quiacpadec mibi bédanendac —Esus quenubi bédampondash.

²³ Aid bédamebidanec nidequi chuibante shubun tabadsho isquidèn shubun puduedshun isquien matses dadpen tabadec. Champi unèsacscho isash sedenquecuededec tabadec. Nèidic matses unèsan con matsesèn nacpadomboen shoncate shoncaquido. Nèidic comapenec sedenquecuededquido dadpen. Aidedi icpondash.

²⁴ Adshobien Esusèn abitedi chuiquin: —Baded umanuc niecun. Champi unèsabi iquec —capondash. Adoac: —“Champi unèsabi iquec,” quepequien iquec —qeshun Esus mamènshumbedpondash.

²⁵ Niecunan Esusèn champi uiacno quènèn puduedtanquin mēdinac champi uincuenash bédambo yec capupondash.

²⁶ Adsho isun champi unèsaid uincuemiaid chuibenepac caondash shubu utsinutsinquin. Anocquido Capednaun caid yacno pauequidotedishun tantianuc chuibeniac caondash.

Bèshuaid daèd Esusèn bédamiaid

(Duc 18.35-43)

²⁷ Auèshquio puduanec nidshobien bèshuaid daèdshun chinunshun comapenec cuèdquin Esus chuituidpondash. —Dabidèn tsyuecquid Nuquin Papan chomiaid icquin bédamboen isquin èbi bédame —quebud-quebudpondash.

²⁸ Shubu utsin puduedash abédi tabadshobien Esusèn: —“Èbi bédametsiashe,” ¿caindabi ique? —caquien: —Ai, adebi —quepondash.

²⁹ Adshobien aid daèdi bēmishquin: —Mimbi tantiacpadec bédanta —cac

³⁰ bédampondash. Adsho isun Esusèn: —“Bédamioshi,” quequin utsibo chienda —capondash.

³¹ Adoboqui anocquidotedi chuiben-chuibempac caondash.

Esusèn onquesa bédamiaid

³² Bèshuaid bédamiaid puduenubien podobitsi icsa dapuduedaid onquesa dada Esus ismenuen bēpondash.

³³ Bèacscho isun Esusèn podobitsi icsa dapuduemiac bédanash onquiampondash. Aden bédamesho isash: —Nuquin nidaid Isadaid caidènshun adoén ictenec —quecuededpondash isquido.

³⁴ Adnubien Esus chieshènquido Padiseyobo: —Podobitsi icsan icbon namiaid icquin podobitsi icsa cuemequidien nechitec —quecuededpondash Esus caic.

Esusèn matses tantiaquiaid

³⁵ Aden onquesa bédamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaido bédamboen iste chuipondash. Adshumbic anocquido daicsaidotedi bédamebampondash. Adenuidi shubu dadpen yacno-yacnomboen chuibanquimbi matses bédamebampondash.

³⁶ Abi tantienquo icquido dadpen cho-chosho isash unēsquo icnuc shubiantiadquo icpondash Esus. —Abi isquid nibēdnuc bacuēbo icsamboec tabadacimboec icsambo iquec. Nuquin Papa bédamboen ismete chiabi yac tantienquo yec natia chieshēmēnec bédamboec tabadtiaimbo iquec —quiash shubiantiadquo icpondash Esus.

³⁷ Adshumbic abēd icquido chuipondash. —Pete dadpen nitsinaid caniacsho bedtanenquo icnuc sinash chodquebudnequid. Adecbidi Nuquin Papan chiaid chuibanquid nibēdnuc matses icsamboec tabadec. Aden chuibanquid nuquipadquid daēdpactsēquico iqueque.

³⁸ Nuquin Papa chianeta. “Matses dadpenshunquo mimbi bédamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusēn abēd icquido chuiquin.

10

Esusbēd icquido 12tedi chiaid (Mad 3.13-19; Duc 6.12-16)

¹ Adshumbic Esusēn abēd icquido 12tedi chuipondash. —Ēmbi naid chuibeneta. Ēmbi namiaid icquin ēmbi nabocpadomboen podobitsi icsa matses dapuduedaid mimbi cuemendac. Adembidi daicsaido abitedi mimbi bédamendac —quequin chuipondashi nēidtedi.

² Nēidic Petedo caidbidi Simon cuēmēdquid. Nēidic abēdta tishaid Andedes cuēmēdquid. Nēidic Sebedeyon mado abi daēdi. Abentsēc Acobo icnuc utsi Uan icpondash.

³ Nēidic Uedipe. Nēidic Badtodome cuēmēdquid. Nēidic Tomas. Nēidic ēbibi Mateyo con matses piucquid bedshundenedi. Nēidic Acobo cuēmēdquid utsi Adpeon mado. Nēidic Debeyo caidbidi Tadeyo cuēmēdquid.

⁴ Nēidic Simon cuēmēdquid utsi con matses yuaquido cuemete bunquid. Nēidic Iscadiote caidbidi Udas cuēmēdquid abi chieshēnquido Esus bedmequid. Aidtedi abēd icquido icsho chuipondashi.

Abēd icquido: Chuibeneta, caid (Mad 6.7-13; Duc 9.1-6)

⁵ Adshumbic: —Ēmbi chiacpadomboen chuibenenuec nidshun isadaidpembo chienda. Aido yacno nidenda. Nidaid cuēshē Samadia caid yacnocquidon shubu datambidanta.

⁶ Nuquin matses isadaidboudi chuibeneta. Bēnudshun podqued tantienquo yacimboen nuquin matsesēn Nuquin Papambo tantienquo iqueque.

⁷ “Mibi icsaid ēnash bédamboec tabadta. Nēbi abēd tabadtequido icmequin Nuquin Papan matses bédamboen tabadmendac,” quequin chuibeneta.

⁸ Adembidi daicsaido bédamequinc unēsaido uincumequinc dada ushumbo yec daicsaido bédamequinc podobitsi icsa dapuduedaido cuemeshunquinc cabeneta. Adoshon: “Piucquid beccho,” cainda. Ēmbi nabocpadomboembidi mibi namembique. “Piucquid beccho,” quequin nainquo iccombique. Adembidi nashumbanta.

⁹ Aden chuibenec nidquin min piucquid buanenda.

¹⁰ Adembidi pete sandoaid buanenda. Dashcute utsibēdta tapucudte utsi sandoshon buanenda. Mibi tidinquette cuate abentsēqui buanta. Adec mēdaduidquico chosho isun mimbi bédamaidon: “Mibi bédambo iquec. Ēbi yacno ushec cho,” mibi cac bédambo ictsiash. Adembidi: “Mitsana nibēdsho isun mibi menenu,” mibi cac bédambo ictsiash.

¹¹ Aden chuibenec shubu dadpen icquid yacno nidshun bédambo icquid istuidta. Istuidshun: “Min shubu yacno ushec nidnu,” mibi cac: “Ai,” qesho tantiaish aidēn shubun ushta. Auēshquo nidabi yec aidēn shubunuidi ushta.

¹² Aidēn shubun puduedshun: “Mibi isnuec chopobi,” cata. Adoshombic: “Nēid shubun icquido Nuquin Papan bédambo icmepashun,” quequin aido bédamboen ista.

¹³ Adoac anocquidon mibi bédamboen iso: “Nuquin Papan bédambo icmepashun,” mibi canubi Nuquin Papan aido bédambo icmendac. Anocquidon mibi chieshēnsho Nuquin Papan aido bédamboen istiapimbo iquec.

¹⁴ Shubu dadpen icquid utsi yacno mibi nidacsho anocquidon cuemiac naden ismeta. Auēshquo puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta.

¹⁵ Mimbi adosho isun matses cuidte ushēmbi Nuquin Papan aido comapenen cuidendac. Ēndenquimbo shubu dadpen yacnocquidotedi cuidquin Nuquin Papan uesquin unēs uapampic. Aid shubu dadpen icquid abentsēc Sodoma canubi shubu dadpen icquid utsi

Comoda capampic. Aid daëd yacnoquido bêdiactsêc cuidshun mimbi chiaid tantienquo icquido comapenen cuidenda –quepondash Esus abêd icquido chiec.

Esus tantiaquido chieshênte chiaid

¹⁶ Adashic padpiden chiuoaic: –Ëmbi naid chuibenequido icsho utsin-utsinquien mibi chieshênendac. Bêdi nêish yua acte bunacimboec chieshêmênquido mibi cueste bunendac. Aidobêd chieshênanenda. “¿Mitsipadomboen chiac Nuquin Papan chiaid tantiabempatsi-ash?” qeshun bêdamboen tantiaquin bêdamboen chuïta.

¹⁷ Mibi chieshênquin cuesunetiadquo iquendac. Mibi bedshun: “Cuesmenu,” qeshun abi chuïquido mibi cuidmenuen Nuquin Papan chiaid chuïbante shubuno mibi buanendac. Ashunquo mibi cueshcaten cueshcaindac.

¹⁸ Utsibombic adembidi cuesmenuen chuïquid dapa cobenadod yacno mibi buanendac. Adembidi chuïquid dapa utsi yacnotsen mibi buanendac. “Ma êbi chuïquidon chuïquid dapabêdta isadaidpembo êmbi naid chuïbanu,” êbi quenuc mibi aden buanendac.

¹⁹ Adoac dacuêdenda. “Chuïquid dapa yacnoshon ¿atotsimbi chuïpatsiaba? ¿Adambi bêdamboen chuïpatsiaba?” quec dacuêdenda. Chuïquid dapa mimbi bêisnubi Nuquin Papan ambi tantiacpadomboen mibi oncamendac.

²⁰ Aden aton Mayanên ambi tantiacpadomboen mibi oncamendac –quepondash Esus.

²¹ Adashic padpidec onquec: –Ëbi chieshênquidon êbi tantiaquidotsen comapenen chieshênendac. “Esus tantiaquid nec,” qeshun aton buchimbi aton utsi cuesunemendac. Amêmbi ambi tishmiaid cuesunemendac. Aton bacuêbombi chieshtoshon anibêdta amê cuesunemendac.

²² “Esus tantiaquid nec,” qeshun matses dadpenshun aden chieshênaqui chieshtoenu icquin êbi tantiasho Nuquin Papan abi yacno mibi puduedmendac.

²³ Shubu dadpen yacno nidacsho chieshênac shubu dadpen icquid utsi yacno cuenta. Anoshontsen êmbi naid chuïsho chieshênoac shubu dadpen icquid utsi yacnotsen cuenoata. Adecuidi cuendeneta. Nêid nidaid Isadaid caidên shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuêsh choaindabi.

²⁴ Mibi tantiamequid nebi. Êmbi tantiamiaido icsho êbi icbocpadomboembidi mibi chieshênendac. Abi chuïquid dapa chieshênacpadembidi ambi namiaïdtsen chieshênquid. Icho chieshênquimbi yuabotsen chieshênquid.

²⁵ Adembidi êmbi chiacpadomboen natiadquo icsho mibitsen chieshênendac. Nuquin Papa yacno puduedmianquid icsho: “Ma podobitsi icsan icbo Betsibu caid neyoc,” ¿cainquiodabi ictiosh? Adembidi mibi Nuquin Papa yacno puduedtequido icsho mibitsen chieshênendac –quequin chuïpondash Esusên abêd icquido chuïquin.

Dacuêdenquo icquin chuï, quequin chiaid

(Duc 12.2-7)

²⁶ Adshumbic padpiden chuïquin: –Mibi chieshênquido dacuêdênenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsêcquin chiaid Nuquin Papan utsibo tantiamendac. Adembidi mimbi bêdamboen naidtedi Nuquin Papan utsibo tantiamendac.

²⁷ Nêbi êmbi mibitedictsêqui chuïboed dacuêdenquo icquin utsibo chuïbeneta.

²⁸ Chuïbenesho min dadauïdtsêqui cuesunetequid dacuêdênenda. Min tantiate unêstiapimbo icquid icsho nibêdametiapimbo iquec. Min dada unêsan min tantiate abi icsho cuidnuequin chian anêdênquequid nêscanquid tantiate. Adquid Nuquin Papa icsho dacuêdênta.

²⁹ Utsibon chieshênaqui dacuêdenda. Nuquin Papan mibi tantieque. ¿Padichucu cuesaid isashta unêsqüo icti? Padenquo. Padnuen ambi tantiacpadomboembi padichucu dadpen icquid abentsêc cuesac paêdsho Nuquin Papan tantieque.

³⁰ Adembidi min manêdaïd Nuquin Papan tambanaidquo nec. Aden min manêdaïd abentsêc paêdsho aidên tantieque.

³¹ Aden min manêdaïd tambanquid icquin padichucu bêdiactsêc tantiatsêcquin mibien comapenen tantieque. Mibi chieshênquido dacuêdênenda –quequin chuïpondashi Esusên.

Esus con Icho nec, quequido chiaid

(Duc 12.8-9)

³² Adshumbic padpiden chuïquin: –Utsibo chuïquin: “Con Icho Esus nec. Nuquin Papa yacno êbi puduedmequid nec,” quequin chianequid Nuquin Papa yacno chosho isun: “Nêid êbi tantiaquid neque. Puduedmeta, Papa,” quequin Nuquin Papambo chiendambi.

³³ Padnuen utsibo chieshec: “Con icbo Esus catiapimbo iquebi. Tantiatiapimbo iquebi,” quequid bêdamboen istiapimbo iquebi. “Nuquin Papa yacno puduednu,” qesho: “Padi. Êbi

tantiaquidpenquo neque. Puduedmenda,” quequin Nuquin Papa chiendambi —quequin Esusën chuipondashi.

*Esus tantiaquidobëdi cuëshëdte chiaid
(Duc 12.51-53; 14.26-27)*

³⁴ Adshumbic padpiden chuiquin: —Ëmbi chuiboed tantiashun: “Nuquin Papa yacnuësh choquid icquin abitedimbo bëdamboen tabadmetsiash,” ¿caquindabi ique? Padenquo ictsiambi. Ëbi tantiaquidobëd ëbi tantiesabo cuëshëdenquo icte danenda. Ëbi tantiaquidobëdi ëbi tantiesabo cuëshëndendac.

³⁵ Amëbëd aton mado cuëshëndendac. Adecbidi anibëd aton champi cuëshëndendac. Adecbidi aton chayabëd aton babanën cuëshëndendac.

³⁶ Aden aton shubun icquidombi ëbi tantiaquid chieshënendac.

³⁷ Padnubic aton matsesuidi tantiaquidën ëbi bëdiactsëc tantiatsëctsiash. Aton tita tantiaquinc aton papa tantiaquinc cain aidën chiacpadomboenuidtsëqui naquidën ëbi bëdiactsëc tantiatsëcquin ëmbi chiacpadomboen natiapimbo ictsias. Adembidi aton mado tantiaquinc aton champi tantiaquinc cain aid bëdambo icmeteuidtsëqui bunquin ëbi bëdiactsëc tantiatsëcquin ëmbi chiacpadomboen natiapimbo ictsias. Adquido bëdamboen istiapimbo iquebi. Ëbi tantiesabo nec.

³⁸ Utsibon chieshënac ëbi tantiatsëcboedi badedi chieshtoshon ëmbi chiacpadomboen natiapimbo yantsias. Adquidotsen ëbi tantiaquidpenquo iquendac.

³⁹ Matses ambi naiduidi naquid Nuquin Papa yacno puduedtiapimbo iquendac. Padnuen ëbi tantiaquinc ëmbi chiacpadomboen naquid Nuquin Papa yacno puduedendac. Adquid chieshënaqui chieshtoenquo ictsias —quequin Esusën chuipondashi.

*Nuquin Papan bëdambo icmete chiaid
(Mad 9.41)*

⁴⁰ Adshumbic Esusën ëbi chedo padpiden chuipondash. —Mibi chieshënquido icnubi mibi bëdamboen isquid iquendac. Ëmbi naid mimbi chuisho tantiash: “Ai, abimbo caic,” qeshun ëbi tantiabenquin ëbi chomequidtsen tantiabenendac.

⁴¹ “Naden naindambi,” quequin ambi chiaid chuibeneguid Nuquin Papan bëdamboen isaido nec. Adquid shubu utsi yacno nidacsho isash: “Nuquin Papan chiaid chuibeneguid choeque. Bëdamboen chuisho tantianu,” quequid icsho Nuquin Papan bëdamboen isendac. Adembidi abi tantiec ambi chiacpadec bëdamboec tabadquid Nuquin Papan bëdamboen isaidobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” qeshun bëdamboen isquidotsen Nuquin Papan bëdamboen isendac.

⁴² Adembidi ëbi tantiaquid yec acte bundoacsho acte meneguid Nuquin Papan cuidnanquin bëdambo icmendac. Adembidi utsibon Esus tantiaquido bëdamboen nashunsho Nuquin Papan bëdambo icmendac —quequin Esusën chuipondashi. Adshun: —Chuibenetan —cac nidshumbimbi chuibenepondac.

11

*Uan acten mentoanquidën chuimaid
(Duc 7.18-23)*

¹ Esusën: —Chuibenetan —cac abëd icquido nidanenubi auëshquiobi puduanec nidquin shubu dadpen icquid shubu dadpen icquidquien Esusën Nuquin Papan chiaid chuibeniac caondash. Aid nidaid cuëshë Cadidia caidën capucueneguin adoac caondash. Adnubini yuec-yuecpambo ictanec Esusbëd icoaic cho-chopondac.

² Adnubien Uanën Esus acten mentonaidëmbi quënëen nauedaic icquin Esusën naid tantiapac caondash. Adshumbic abëd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambëd icquidon Esus chuituidpondash.

³ —Uanën: “Chuitan,” cac chobi. ¿Ëmbi cainaid Nuquin Papan chomiaidquioda mibi nepe? Mibi adquidpenquo icnuc ¿ada utsi chopatsias? —caquien

⁴ Esusën: —Ëmbi nadatiambo icquin nabamboedbëdta ëmbi chuiboed Uan chiec nid.

⁵ “Bëshuacboedën isbenosh. Canite icsaidi capucuenosh. Daushumbo icquid nami mishadenquo icquid bëdanosh. Pashuacboedën tantiabenosh. Adoshombic unësaidi uincuemiosh. Adoshombic Nuquin Papa tantienquo icquido Nuquin Papan bëdamboen iste chuiposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomiaidquio nec,” quequin ëbi tantiendac.

⁶ Adshumbic nadentsen chuita. “Muambo nec, ëbi cainquo icquin: Ambi chiacpadquid Nuquin Papan chomiaidien nec, quequin ëbi tantiaquid Nuquin Papan bëdambo icmendac,” quiosh,” quequin chiec nid —cac nidanepondash Uambëd icquido.

*Uan acten mentoanquid chiaid**(Duc 7.24-35)*

⁷ Aido nidanebon Esusën Uan acten mentoanquid chuiquin abi datsidadquido naden chuipondash. —Matses nibëdacno ¿atotsi quenuec nidonda? ¿Cunquequidën ishcunaid isnuecta nidtionda? Padenquio.

⁸ ¿Dashcute bëdaidquio dasiuidaid isnuecta nidtionda? Padenquio. Icsactsëcquid Uan dasiuidpondash. Dashcute bëdamboshë icquid dasiuidquido ancanquidën shubu dapan tabadquido nec.

⁹ Ad icnuc ¿atotsi quenuec nidonda? “Naden naindami,” quequin Nuquin Papan chiaid chuibenequid chuisho tantianuec ma mibi nidondac. Adec Nuquin Papan oncamiadquio Uan nec.

¹⁰ Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bëdambo icquid choeque. Icsainquio yec ënëdta,’ quequin mibi chote chiendac, Mado,” quequin Nuquin Papan ambi chiaid dada uamepampic.

¹¹ “Nuquin Papan chomiaidquio choec,” quequin chuiquid Uanpadquid utsi nibëdec. Adquid yequi: “Abi choec,” quequin ambi chuiboedën ëmbi nabansho isabi yequi bëdapabi Uan ictsec. Padnuen ëmbi Nuquin Papan chiacpadomboen nabansho isash ëbi tantiaquido bëdamboshë iquendac.

¹² Uanën chuisho Nuquin Papa tantiabenacpadomboen ëmbitsen Nuquin Papan bëdamboen iste chuisho tantiashun adembidi abi icsaid ënshun icsaboedon dadpenshun Nuquin Papa tantiendac.

¹³ Nëbi Uanën: “Nuquin Papan abi yacnoshon bëdambo icquid chomendac,” quequin chuipondash. ¿Ambiada adopondash? Padenquio. Èdenquimboshë tauamboen nuquin tsusedpa Moisesën chuibempampic. Adshumbic utsintsen. Adshumbic utsintsen. Aden Nuquin Papan ambi bëdambo icquid chomete chuiquin dada uamianepampic.

¹⁴ Adembidi Uan chote chuiquin dada uamepampic. “Nuquin Papan ambi tantiacpadomboen oncamiadquio Edias cuëmëdquid choendac,” quequin Ediasbimboecquid Uan chote chuiampic. Bëdamboen tantiaquin: “Nuquin tsusedpa Ediasbimboecquid Uan nec,” mimi catsiac.

¹⁵ Bëdamboen tantiaquidën adembidi tantiatsiash —quepondash Esus abi datsidadquido chiech.

¹⁶ Aden chuisho tantiash chieshtoshobien Esusën chuipondash naden. —Nuquin Papan chiaid tantienquio icquido yec nëmbo icquido ¿midapadquidooen nec? Bacuëbo nëishnanabictsëcquieci mibi iquec. Bacuëbo: “Èmbi chiacpadomboen nanuna,” queuidash ambi chiacpadomboen aton utsibon nainquio icsho isash nëishash chushcananquid.

¹⁷ “‘Cuëdënuna,’ queuidbosh ëbi cuëdënubi ma mibi cuëdënenquio icboc. ‘Sedenquenuna,’ queuidbosh ëbi sedenquenubi ma mibi sedenquenquio icboc,” quetsash bacuëbo nëishnanabictsëcquieci ma mibi iqueyoc. Adec nëishëmënkquido yec icsambo ma mibi iqueyoc.

¹⁸ Uan pete utsi-utsien pesa iccosh. Adecbidi acte paëmbo icquid aquesambo niosh. Adquid icsho isash nëishash: “Èmbi nacpadomboen naisa nec. Podobitsi icsa dapuedashien nechitec,” mibi quepondac.

¹⁹ Èbien nuquin matsesën piacbimboen pequid nec. Adembidi actequid acquid nebi. Adsho isash nëishun ëbitsen icsamboen chuishunquin: “Peteuidi tantiaquin nua pequid nec. Tantiadenuen acte paëmbo icquid acquid nec. Adecbidi nuquin matses piucquid bedshunquidobëd onquec icsambo icquid caidobëd onquec quequid ma aidobëdi icsambo icquid nepayoc,” mimi ëbi capec. Padnuen bëdamboen tantiaquidën Nuquin Papan chiacpadomboen nasho isun Uambëdta ëbi: “Bëdambo iquec,” caindac —quepondash Esus abi chieshënkquido chiech.

*Shubu dadpen icquidën tabadquido cuidte chiaid**(Duc 10.13-15)*

²⁰ Adshumbic Esusën padpiden chuipondash. —Nëbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bëdamboec tabadtiaquidquio iquebi,” quetiadquidi chieshec adenquio iquec —queshun Esusën naden chushcapondash.

²¹ —Shubu dadpen icquid Codasin caid yacnocquidobëdi shubu dadpen icquid utsi Betsaida caid yacnocquido Nuquin Papan cuidtequido nec. Èmbi aido ismebocpadomboen ismiac isadaidpembo cuidadenquio ictsempampic. Aden ismiaqui: “Ai, icsapobi,” quiash shubibudequi icsainquio yec ënëdtsempampic. Shubu dadpen icquid Tido caid yacnocquidobëdi shubu dadpen icquid utsi Sidon caid yacnocquido adtsempampic.

²² Nuquin Papan matses abitedi cuidte ushën: “Nadatiambo icquin nabanquin ismiacmaido nec,” qeshun Tido caid yacnocquido Sidon caid yacnocquidobêda bêdiactsec cuidendac. Adoshombic: “Comapenen tantiaquin ismiaqui tantienquo icquido nec,” qeshun Codasin caid yacnocquidobêda Betsaida caid yacnocquido comapenec sidquenuc cuidendac.

²³ Adembidi nêmo icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquo yec Nuquin Papa chieshênquido cuidacno nidmetequido ma mibi nepayoc. Êndenquimboshê yampido shubu dadpen icquid Sodoma caid yacnocquido cuidquin Nuquin Papan nibêdamepampic. Êmbi mibi ismebocpadomboen ismiac aidon abi icsaid êntsempampic. Abi icsaid ênsho Nuquin Papan cuidenquo ictsempampic. Cuidenquo yac nêbi aton matses abi ictsiash.

²⁴ Nuquin Papan matses abitedi cuidte ushën: “Comapenen tantiaquin ismiacmaido nec,” qeshun Sodoma caid yacnocquido bêdiactsec cuidendac. Nuquin Papan chomiaid icquin êmbi ismeboedo Capednaun caid yacnocquidoen comapenec sidquenuc cuidendac —quequin abi tantiesabo Esusên chushcapondash.

*Esusên dayacquiobimboecnuc icmete chiaid
(Duc 10.21-22)*

²⁵ Adshumbic Esusên Nuquin Papa chuipondash. —Mibi bêdamboshê iquec, Papa. Mibi yacnocquidotedishun Icbombo yec nidaidên tabadquidotedishun Icbobidi mibi nec. Mimbi tantiamiabi: “Dadpen tantiaquid nebi,” quequidombi êbi tantiaibi iquec. Mimbi tantiamiac nêidon êbi tantiec. Aden mimbi bêdamboen naic.

²⁶ Mimbi tantiacpadomboen mimbi bêdamboen naic. Mibi bêdamboshê iquec, Papa —quequin Esusên Nuquin Papa chuipondash.

²⁷ Adshumbic abi datsidadquido chuipondash. —Nuquin Papan ambi tantiaidtedi êbi chuimec. Êmbi naboedbêda êmbi nate abitedi con Pan ambentsêqui tantiec utsibon tantienquo icnuc. Adembidi Nuquin Papan natebêda ambi naboed abitedi êmbentsêqui tantiembi. Aden Nuquin Papa tantiaquin: “Nêidtedi matses bêdamboen tantiamembi,” qeshun: “Nuquin Papa nadquo iquec,” quequin tantiamembi.

²⁸ Êbi tantiata. Dayacquio yachimboecnuc mibi bêdambo icmembique. “¿Mitsipadequibi Nuquin Papa yacno puduedpe?” quec ¿uimambo yachimboecta mibi icpe? Adquidên êbi tantiasho Nuquin Papa yacno puduedtequid mibi icmembique. Êbi tantiata.

²⁹ Con Icho êbi cata. Con yuambo icquin êmbi chiacpadomboen nasho mibi bêdamboen isquin dayacquio yachimboecnuc mibi bêdambo icmembique. Ancanesambo yec bêdambo icquidini neque. Con Icho êbi cata. Adsho mibi bêdambo icmembique.

³⁰ Mibi ancainquio icquin dayacquio yachimboecnuc bêdamboen mibi tabadmembique. Con Icho êbi cata —quequin chuipondash Esusên.

12

*Esusbêd icquidon petsêcsho istuidshun chushcaid
(Mad 2.23-28; Duc 6.1-5)*

¹ Adshumbic chonoadtemaid ushën Esusbêd capucuenequin tied matanquin bundotsêcshun tiedên caniquid êshchicshun petempi petsêcondambi.

² Pesho istuidshumbini con tsusedpabon chiampid namequido padiseyobon: —Is. Mibêd icquido chonoadtemaid ushêmbi chonoadeque —capondash Esus chuiquin.

³ Adoquien Esus: —Ma icsapenquo icpayoc. ¿Nuquin tsusedpa Dabidên bundoshon ambi petemaidquo pepampid chuiquin dada uapampid isamboda ictio?

⁴ Aidên Nuquin Papa tabadte shubu uashunaid abi puduedtemaidên puduedshun ambi petemaid pan sanaid istuidpampic. Aid panêmpi nêish yua abided unês uaquidon petequid nepampic. Aid panêmpi bedshun abêd icquidobêdan Dabidên pepampic. Aden nuqui bêdambo icquid caidên ambi natemaidi napampic.

⁵ Adembidi chonoadtemaid ushën natemaid chiaid niacquimbi nêish yua abided unês uaquidon aid ushêmbi Nuquin Papa tabadte shubu uashunaidên puduedshun nacenenepec. Nuquin Papan chiacpadomboen naiqui icsainquo icpec.

⁶ Nuquin Papa tabadte shubu uashunaid tantiaquin adopec. Aid shubu bêdapabi icnuc bêdamboshê icquid nebi.

⁷ Nuquin Papan naden chiaid mimbi bêdamboen tantienquo iquec.

“Êmbi chiacpadomboen abentse-abentsen mimbi naic.

Adoquimbi êmbi chiaid utsi niaquec mimbi icsaido caido mimbi bêdamboen istiapimbo iquec.

Adsho isun: ‘Mibi bēdambo iquec,’ catiapimbo iquebi.”

quequin Nuquin Papan chiaid bēdamboen tantiashun ēbēd icquidon bēdamboen nasho mimbi chushcainquo ictsenoc.

⁸ Tantia. Nuquin Papan chomiaid icquin chonoattemaid ushē ěmbibi chiampid icnuc ěmbi tantiacpadomboen aid ushēmbi ěbi tantiaquido namembique —quepondash Esus ěmbi petsēcsho istuidquido chiec.

Mēicsatsaid bēdamiaid

(*Mad 3.1-6; Duc 6.6-11*)

⁹ Adanec nidec Nuquin Papan chiaid chuibante shubun puduedshun

¹⁰ isaquien mēicsatsaid icpondash. Adnubien padiseyobon: —Chonoattemaid ushēmbi bēdamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: “Icsambo mibi iquec,” canuna —queshun Esus chuituidpondash. —¿Nadquid chonoattemaid ushēmbi matses bēdamequinda Nuquin Papan chiaid niacpec? —caquien

¹¹ Esusēn: —¿Ada min nēish yua obeca caid icpec? Adquid chonoattemaid ushēn shēcuē uquēduc ampaēdacsho istuidshun ¿chiquenquioda mimbi icpatsia? Ai, mimbi chichtsia. Chonoattemaid ushēmbi mimbi chonoadquin chicpatsiac.

¹² Aden min obeca bēdiactsēc tantiec mibi bēdapabi icnuc matses tantiaquiquin nashunquid bēdamboshē ictsiash. Nadquid chonoattemaid ushēmbi matses aden bēdamboen nashunquidēn Nuquin Papan chiaid niaquenquo ictsiash —quequin Esusēn abi icsamenu caquido chuipondash.

¹³ Adotanquimbien Esusēn mēicsatsaid chuiquin: —Mēcueta —cac mēcuēc bēdampondash aton mēdante abiuc daēdi bēdambo yec.

¹⁴ Adsho isashien abi chieshēnquido padiseyobo nēishquiapac caondash. Adec nēishanec nidash aton matses utsibobēd: —Cuesunequimbien Esus ictiad —quecuededpac caondash.

Esusēn nate ěndenquimboshē chiampid

¹⁵ Adnubien Esus: —Ěbi cuesunetiadquio iquec —quianec auēshquioibi puduanec nidpondash. Nidsho isumbien matses dadpeshun tsibanampondash. Adshumbic aidon bēaid daicsaidotedi bēdamebampondash.

¹⁶ Adshumbic ambi bēdamiaido chuiquin: —“Bēdamioshi,” quenda —quequin chuipondash Esusēn: —Ěbi abi chuiquid dapa icmenushe —quiash adpondash Esus.

¹⁷ Aden Esusēn nate chuiquin Nuquin Papan isadaidbo tsusedpa Isayas dada uamepampic naden chuiquin.

¹⁸ “Ěmbi chomiaid ěmbi chiacpadomboen naquidquido nec.

Aid tantiaquiec bēdambo iquebi.

Con Mayan bēdambo icquid abēdi tabadmembu.

Adoac ěmbi bēdamboen iste isadaidbobēda matses utsibo abitedi bēdamboen chiendac.

¹⁹ Chushcanante bunenquo yec ancanenquo iquendac.

Chuiquid dapa ictiapimbo iquendac.

²⁰ Icsambo icquido yec shubiquido yec natiaic tabadquido yec daicsaido yec quequido abi bēdiactsēc tantiabentsēcsho bēdamboen isquin bēdamboen tantiamendac.

Nuquin Papan chiacpadec cuidte ushē choabi icnuc adoendac.

²¹ ‘Nuquin Papan tantiacpadomboen matses bēdamboen namendac,’ quesnun nidaid utsiatsiec yacnocquidon matses dadpeshun aidi tantientiac,”

quequin Esusēn bēdamboen nate chuipampic Isayasēn.

Podobitsi icsan namiaidi Esus nec, quiaid

(*Mad 3.20-30; Duc 11.14-23; 12.10*)

²² Adnubien Esus ismenuen daicsaid bēpondash. Dapuduedshun podobitsi icsan bēshu uain eme uaidi onquesa nepondash. Isenquo yec onquenquo icshobien Esusēn bēdamepondash. Adoac isbenequid onquiampondash.

²³ Adsho isashien Esus datsidadquido: —Is. Comapenen tantiaquin nabanquidquido nēid neque. ¿Nuquin tsusedpa Dabidēn tsyuecquidta nepec? Adquid yec nuqui cainaidquido Nuquin Papan chomiaidien nechitec —quecuededpondash.

²⁴ Adsho tantiash Esus chieshēnquido padiseyobo: —¿Aidta nedic? Ma aidpenquo neyoc. Betsibu caidēn podobitsi icsan icbon namiaid icquimbien Esusēn podobitsi icsa cuemehitec —quequin otacquo tantiapanēdash.

²⁵ Adshobien Esusēn aidon otacquo tantiaid ambembi tantiashun naden chuipondash. —¿Adquidēnda aton yuabi cuemepatsiash? Padenquo. Chuiquid dapan aton yuabo nēishtanquin chushcac cuēsh-cuēshēdec aton yuabo uesadec nietsiash. Aido nibēdnuc

chuiquid dapa ictiapimbo ictsias. Adecbidi shubu dadpen icquidën tabadquido chush-cananash cuësh-cuëshêdec niquian shubu dadpen icboedi daêdpactsêc yanec.

²⁶ “Betsibu caidbidi Satanas caidëmbi namiaquien podobitsi icsa cuemechitec,” mimbi ëbi capoc. ¿Ambi naid nashobida Satanasën aton yuabo podobitsi icsabo cuemepatsias? Padenquo ictsias. Satanasën cuemiac aibëdi aton yuabo cuësh-cuëshêdtsias. Adnuc Satanas aton icbopenquo yantsias.

²⁷ Mibêd icquidon podobitsi icsa dapuduedaid cuemiac caosh. ¿Cuemesho isun mimbi ëbi chiapadomboen: “Betsibu caidën namiaquien nachitec,” cainda ictio? Ma mimbi padenquo icpaboc. Mimbi adoac: “Mimbi icsamboen chiech,” quetsenosh podobitsi icsa dapuduedaid cuemequido mibêd icquido.

²⁸ Nuquin Papan Mayanën namiaquimbi podobitsi icsa cuemioc. Ëmbi adosho isash: “Nëbi matseshêd icquin Nuquin Papan namiaidën naosh,” quetiadquidi mibi nec – quepondash Esus.

²⁹ Adashic abi onquec: –Tantia. Mibi chuinu. Ampenuesho icbon istuidac ampequidën icbo uidën uabi ampeshuntiapimbo iquec. Icho uidënquo icquid bucun cataneshun ampeshunquid. Adecbidi Satanas bêdiactsêc tantiaquid icnuc ëbien comapenen tantiaquidquo nec. Uidën uacimboen nadatiambo icquin nabanquin aton yua cuemepombi.

³⁰ Ëbi con icbo cainquo icquido Satanasën yuabo nec. Adquid icquin ëbi chieshënquin ëbi tantiatsêquido cuëshêdmendac. Adquidbidi mibi nec –quequin Esusën abi chieshënquido chuipondash.

³¹ Adshumbic nadentsen chuipondash. –Nuquin Papan chiaid niac-niacboedëmbi ênacsho Nuquin Papan bédamboen isec. Nuquin Papan icsamboen chuishunquidëmbi abi icsaid ênacsho Nuquin Papan bédamboen isec. Aton Mayanën namiascho isash: “Icsambo iquec,” quequin bédamboen tantienquo icsho Nuquin Papan bédamboen istiapimbo iquec.

³² Ëbi chieshënquin icsamboen chuishunquidëmbi ênacsho Nuquin Papan bédamboen isec. Aton Mayanën namiascho isash: “Icsambo iquec,” quequin icsamboen tantiascho Nuquin Papan bédamboen istiapimbo iquec. Aden ênenquo icquin icsamboen tantiascho adembidi ênenquo icquin bédamboen istiapimbo iquendac –quequin abi chieshënquido Esusën chuipondash.

Bédambo icquid nec, quequin tantiate chiaid
(Mat 7.15-20; Duc 6.43-45)

³³ Adshumbic naden bédamboec tabadte Esusën chuipondash. –Cuète bédan bacuê bédambo iquec. Cuète icsan bacuê icsambo iquec. Chetequid isun cuète dada matsesën tantiec. Adembidi matses bédambo icquid bédamboec onquec bédamboec tabadsho isun: “Aid bédambo icquid nec,” quequin matsesën tantiatsias.

³⁴ Ma mibi adquidpenquo neyoc. Nisibimboec icsa uanquido mibi nec. ¿Icsambo icquinda mimbi bédamboen chuidio? Ma mimbi padenquo icboc. Mimbi icsamboen tantiaid ma mimbi utsibo icsamboen chuiboc.

³⁵ Bédambo icquidën ambi bédamboen tantiaid bédamboen chuitsias. Icsambo icquidëmbien ambi icsamboen tantiaid icsamboen chuitsias. Aden mimbi icsamboen chuipoc.

³⁶ Ambi cuidte ushën Nuquin Papan: “¿Ada bédamboen tantiaquin chuidenio?” quequin matses abitedi chuimendac.

³⁷ Adoac abimbo chiech: “Ai, bédamboen nadeniombi,” qesho icsano nidmenquo iquec. Padnuen utsi: “Padenquo. Icsamboembimbi chuidenechitoc,” qesho icsano nidmequin cuideque. Icsamboec onqueboedi ênêdta –quequin Esusën abi chieshënquido chuipondash.

Padiseyobon: Ëbi isme, quequin Esus chiaid
(Mad 8.12; Duc 11.29-32)

³⁸ Aden chuisho tantiasumbien abi chieshënquido utsibon Esus chuituidpondash. – “Nuquin Papan chomiaidini nec,” quequin ëbi ismequin nadatiambo icquin nabanta. Isnu –quepondash padiseyobo Moisesën dada uapampid chuibanquidobëdi.

³⁹ Adoquien Esus: –Padi. Nuquin Papan chiaid niac-niaquec mibi icsamboshê iquec. Ëbi tantiate bunenquo icquimbi mimbi: “Ëbi isme,” ëbi capec. Adsho nëbi mibi ismenquo iquemb. Yuecshumbimbi mibi ismendac. ¿Ada nuquin tsusedpa Onas caidën nampid tantie? Aid yampicpaden naindambi.

⁴⁰ Chishcambieccquid dapan chebudac aidën pucun uec daêdec ushacsho ucbudac Onas padpidec nidpampic. Adecbidi unêsacsho chococac Onas yampicpadec daêdec ushach uincuenendabi. Aden ismendambi.

⁴¹ Ëbi tantienquo yec mibi icsambo iquec. Padnuen Nuquin Papan chiaid Onasën chuibanac shubu dadpenquo icquid Ninibe caid yacnoquido badedi icsainquo yec

ënēdpampic. Nuquin Papan chiaid chuibanquid Onas bēdambo icpampic. Ēbien bēdamboshē icquidquio nec. Adquid icquin nadatiambo icquin dadpen ismiaqui mimi ēbi tantienquio iquec. Aden ēbi tantienquio icquido icsho Nuquin Papan matses abitedi cuidte ushēn Ninibe caid yacnocquidon: “Icsambo iquec,” mibi caindac.

⁴² Adquid cuidte ushēmbi matses utsi Sud yacnocquido ancaquidēn nuquin tsusedpa Sadomonēn chuisho tantiec chopampidēntsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuēmēdquid dadpen tantiaquid nec,” quequin chuituidac Sadomonēn chuisho tantianuec nidshun aid chidon tantiatuidpampic. Adash: “Nuquin Papan tantiamiaidēnquio Sadomonēn bēdamboen chuipec,” quepampic. Ēmbien abitedi tantiaquid icquin nadatiambo icquin ismeuidpoc. Adoqui mimi tantienquio icpec —quepondash Esus abi chieshēnquido chiec.

Abi nianaia podobitsi icsa dapuedoaid
(Duc 11.24-26)

⁴³ Adshumbic naden Esusēn chuipondash. —Icsaquido mibi nec. Podobitsi icsa dapuedaidbimboecquid mibi nec. Tanta. Mibi chuinu. Abi dapuedaid matses nianashi podobitsi icsa abi dapuedtequid nibēdacno yuec capucuen-capucuenec. Adtanequi: “Ēbi icbocnobidi dapuedoaid nidebi,” quianec choec.

⁴⁴ Chonobi ambi niamboed matses: “Ēbi dapuedaid podobitsi icsa nibēdnuc bēdambo iquebi. Adquid chomeoatiapimbo iquebi. Ēmbimbo naic bēdamboec tabadquidquio nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuedtequidquio nēid nec,” quianec

⁴⁵ abipadquid utsi bedec nidoaic. Nidshumbic 7tedi icsamboshē icquido istuidshun bēash aidobēdi dapuedec. Adnuc podobitsi icsa abentsēc dapuedaid yec ēnden icsambo icboedi aido dadpen dapuedaid yec buēdanquiec aid matses icsamboshē yanec. Adquo mibi iquec. “Bēdambo iquebi,” queboedi nēbi mibi icsamboshē yanec —quequin Esusēn chuipondash.

Anibēdi Esusēn utsibo choaid
(Mad 3.31-35; Duc 8.19-21)

⁴⁶ Adanec shubun puduedshun Esusēn abēd puduedquido dadpen chuinubi aton utsibo aton titabēdi Esus isnuec chopac caondash. Umanuc tabadnubi

⁴⁷ utsin puduedshun Esus chuituidpondash. —Mibi isec tita min utsibobēdi choacchos. Umanuc tabadec —caquien badedi nidenquio yec

⁴⁸ Esus: —Utsitsen con ta caimbi. Adembidi utsitsen con utsi caimbi —quetanquin

⁴⁹ abēd icquido mēdqin ismepondash. —Nēid ēbēd icquido con utsibo caimbi.

⁵⁰ Nuquin Papan chiacpadomboen naquidquio icsho con matses caimbi. Con utsi caquinc con chibi caquinc con ta caquinc caimbi —quepondash Esus.

13

Piacbo ēshē siaid chiaid
(Mad 4.1-9; Duc 8.4-8)

¹ Adtanec nidec chian budash cuēmano tabadtuidpondash.

² Tabadtuidsho isash matses dadpenquio cho-choash tsucus-tsucustsēcquio yec Esus datsidapondash. Adsho istanec cano dapa antabēdtoash cuēma anoentsēc canon nuadquin Esusēn chuipondash cuēmano tabadquidon tantianubi.

³ Adshumbic abi tantiate chiuinen naden ompoacbimboen chuipondash. —Piacbo ēshē siaid utsi-utsiec bēdamboec caniec. Utsi-utsiec padenquio.

⁴ “Abitedi ansecanu,” caidi utsi-utsiec shēcuē nibēdacno paēdec. Paēdacsho paēdaid uicchunēn chequid.

⁵ Ēshē utsibic nidaid tsasimbo yacno siac badedi dēyucuidash

⁶ aton tapun nidaidēn puduedenquio icnuc ushē chēnquequidēn badedi unēsquid.

⁷ Ēshē utsibic nisanquid diadacno siaid dēyucash canidouidsēcsho nisanquidēn dayunac unēsquid.

⁸ Padnuen ēshē utsi-utsiec nidaid bēdanquio siac dēyucash caniaash dadpenquio ēshēquid. Utsi-utsiec 100ted ēshēquid icnubi utsi-utsiec 60ted ēshēquid icnuc utsi-utsiec 30ted ēshēquid —quepondash Esus.

⁹ Adashic: —¿Min pabiate shēcuē nibēdquiecta iquec? Ēmbi chuiboed bēdamboec pausudta —quepondash Esus.

Ompoacbimboen chiec nebi, quiaid
(Mad 4.10-12; Duc 8.9-10)

¹⁰ Adsho tantiashton abéd icquidon Esus chuipondash. —¿Atotsieshun ompoacbimboen nēid matses dadpen chie? —caquien

¹¹ Esus nadpondash. —Utsibo tantiamenquo icquin Nuquin Papabéd tabadte chuiquin nēbi mibiuidtsēqui tantiamembi.

¹² Nuquin Papa tantiatadquo icquidēn ēbi tantiasho bēdamboen tantiamendambi. Nuquin Papa tantiauidtsēcquidēn ēbi tantienquo icsho ēmbi ompoacbimboen chiac tantienquo ictsiash.

¹³ Ompoacbimboen aido dadpen chuibanembi. Ēmbi naid isun ēbi tantienquo iquec. Ēmbi chuisho pamumēdadbimboen tantienquo iquec. Adsho aidon tantiatiapimbo icnuc chiembi.

¹⁴ Nēidon tantienquo icte chuiquin Nuquin Papan nuquin tsusedpa Isayas caid naden dada uamepampic.

“Chiac tantiaboshombi tantienquo iquendac.

Ismiac isquioboshombi: ‘Ai, aidi nec,’ cainquo iquendac.

¹⁵ Ai, ēmbi chiaid tantiatiapimbo iquec.

Ushacbimboen tantienquo yec pamumēdadbimboec chieshēmēnquidombo iquec.

Ēbi tantiate bunenquo iquec.

Ēmbi chiaid tantiaquidombien paposhquiachimboen bēdamboen tantiabentsiash.

Pausunacbimboen tantiashton ēmbi chiacpadomboen natiadquo yansho aton chiesh bēdametsiambi. Aton chiesh bēdamete bunenquo iquec,”

quequin Nuquin Papan dada uamepampic —quepondash Esus abéd icquido chiec.

¹⁶ Adashic aidobidi chiec: —Isayasēn chiacpadomboen utsibon ēbi tantienquo icnubi mimbien ēbi tantiec. Ēbi isec mibi tabadec. Ēmbi chuibansho tantias: “Ai, abimbo caic,” quec mibi bēdambo iquec.

¹⁷ Ēbi chote chuiampidobēdtan bēdamboec tabadquido dadpenshun mimbi ēbi isacpadomboen ēbi iste bunequi ēbi isambobi unēspampic. Mimbi ēmbi chuisho tantiacpadomboen tantiatadquo yequi tantiambobi unēspampic —quepondash Esus.

Piacbo siaid sebadēnquo chiaid

(Mad 4.13-20; Duc 8.11-15)

¹⁸ Adashic abi onquec: —Tantia. Ēmbi piacbo ēshē siaid quequin chuiboed sebadēnquo mibi chuinu.

¹⁹ Nuquin Papabéd tabadte chiaid piacbo ēshē siaidbimboecquid nec. Nuquin Papan chiaid chiaqui tantiadnenquo icsho Satanasēn nac badedi bēshumpec. Uicchunēn piacbo ēshē paēdaid badedi chiacbimboen adoec.

²⁰ Utsibic Nuquin Papan chiaid chiaqui bēdiactsēc tantiauidtsash: “Bēdambo iquec,” quec cuishonqueuidtsec.

²¹ Adsho: “Nuquin Papan chiaid tantiaquid nec,” qeshun utsibon chieshēnac badedi chieshtoshon tantienquo yanendac. Piacbo ēshē tapunuidtsash unēsacbimboen adoendac.

²² Utsibic Nuquin Papan chiaid tantiatasashi ambi dacuēdquin tantiauidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquo icpec. Isitodon dayunac unēsacbimboen adoendac.

²³ Padnuen utsibon tantiate nidaid bēdan siaidbimboecquid nec. Nuquin Papan chiaid chuisho tantiaquioshon ambi tantiaid bēnuainquo icquin tantiabudec bēdamboec tabadec. Adshun aidēn chiac utsi dadpenquioshē ēbi tantiaquid yanendac. Utsin chiac dadpen adecbidi ēbi tantiaquid yanendac. Utsin chiac daēdpactsēc adquidbidi yanendac —quequin abi tantiate chuipondash Esusēn.

Ēshē icsambo icquid seuanaid chiaid

²⁴ Adshumbic Esusēn naden chuipondash. —Tantia. Nuquin Papan namiaid tantiamenuen utsi chiacbimboen chuinu. Tiedēn caniquid pete adosbiecquid icbon siac caondash.

²⁵ Adanec nidambic inchēshēmbi choshon chieshēmēnquidēn ēshē icsambo icquidtsen daēd uain seuanac caondash.

²⁶ Adoac adosbiecquid canidotsēcnubi abēdi tancandaēdpamboec icsambo icquid canidot-sac caondash.

²⁷ Adsho istanquin yuabon aton icbo chuituidpac caondash. “¿Pete ēshēda sio?” cac: “Ai,” qesho tantias: “Icsambo icquidbéd tancandaēdec canidopacbec. ¿Mitsipaden sio?” quequin yuabon icbo chuipac caondash.

²⁸ Adoaquien: “Chieshēmēnquidēmbien seuanchitash,” cac: “¿Chicshunetanquindambi icpe?” yua qesho:

²⁹ “Padi. Petebēdi chiquidtsiash.

³⁰ Aïdbëdi ma canipanuna. Ëshëacsho tacuesquimbi teshun sianun nanuna. Adoshombic icsambo icquid tsindobanshun nêdêncanun nanuna. Icsambo icquid nêdêncatanquimbic pete bedshun sandoshon shubun dectandonon nanuna,” quepac caondash tied icbo – quequin Esusên chuipondash.

Esus tantiaquido dadpen yante chiaid
(Mad 4.30-32; Duc 13.18-19)

³¹ Adshumbic abi tantiaquido dadpen yante tantiamuen Esusên naden chuipondash. –Cuête bacuë êshêmpi

³² pistsêcquidi nuamboshê caniec. Aid cuête cuidin uicchun dadpen tabadtonec. Adecbidi ëbi tantiaquid abentsêcshun bêdamboec tabadquin ismiac ëbi tantiaquid dadpenquo yanendac –quepondash Esus.

Abi bêdamboen tantiate Esusên chiaid
(Mad 4.33-34; Duc 13.20-21)

³³ Adshumbic Esusên abi bêdamboen tantiate chuipondash. –¿Mitsipad nami uaid icpec? Aniactêc nami uashun utsibêda daêd uain cabiunac abichobi batambo yanec. Adembbidi ëbi bēdiactêc tantiatsêcboedi ëmbi chiaid tantiash ëbi bēdamboen tantiaquid yanendac

³⁴ –quequin Esusên chuipondash. Sebadênquo chienquo icquin ompoachimboenuidi Esusên chuipondash.

³⁵ Aden Esusên chuite chuiquin Nuquin Papan dada uamepampicpadomboen nanuen adopondash. Nuquin Papan dada uamepampid nad iquec.

“Sebadênquo chienquo icquin ompoachimboenuidi chuibanendambi.

Ëndenquimboshê matses uaboshombi Nuquin Papan ambi tantiaidi ambi uaido chiambo iquec. Adembbidi aidon tsyuecquidotedi chiambobidi iquec.

Nêbimbi chuibanendac.”

quequin nuquin tsusedpan Esusên chuite dada uapampic.

Ëshê icsambo icquid seuanaid sebadênquo chiaid

³⁶ Adashic matses dadpen tabadacnuêsh nidec Esus shubun puduedondash. Puduedshobien abêd icquidon chuipondash. –“Chieshêmênquidên êshê icsambo icquid siaid nec,” quequin mimbi chuiboed en sebadênquo chui, Icho. Tantienu. ¿Atotsi chuitiadquo icquin aden chio?

³⁷ –caquien Esusên chuipondash naden. –Tantia. Mibi chuinu. Pete êshê bēdambo icquid sequidbimboecquid nebi. Nuquin Papan chiaidquo tantiamequin matses bēdambo icmequid nebi.

³⁸ Padnuc tied dapabimboecquid nidaidên tabadquidtedi nec. Padnuc pete êshêbimboecquid ëbi tantiaquid nec. Nidaid utsi-utsiec yacno tabadquido utsi-utsien ëbi tantiaquid icmendambi. Padnuc ëbi chieshênquid Satanasên yuaido icsambo icquid siaidbimboecquid nec.

³⁹ Padnuc êshê icsambo icquid sequidbimboecquid Satanas nec. Aidên yuaido matses icsambo icquidon ëbi tantiaquidobêd tabadquin icsametiadquo iquec. Adsho badedi cuidenquo icquin Nuquin Papan cuidte ushê choabi icnuc matses icsambo icquidobêd bēdambo icquido tabadmendambi. Padnuc ambi chiacpadên Nuquin Papan abi yacnoshon uaido mayan bēdabon ëmbi chiacpadomboen naïndac.

⁴⁰ Icsambo icquid tsindoshon nêdêncacimboen Nuquin Papan cuidte ushêmbi icsambo icquido cuidendac.

⁴¹ Ëmbimboen mayan bēdabo namendac. “Icsamianquidobêdta icsaidotedi bedshun chian anêdênquiacno nêseca,” quequin ëmbi chiac

⁴² bedshun chian anêdênquiacno nêsecaïndac. Adoac natiaic mëyadbudêc sidquequiendac.

⁴³ Padnuc ëbi tantiec bēdamboec tabadquido Nuquin Papa yacno nidash icsatiapimbo icquid iquendac. Ëmbi aden chuiboed tantiashun ëmbi chiacpadomboen nata –quepondash Esus.

Nuquin Papabêd tabadte bunquiota, quiaid

⁴⁴ Adshumbic padpiden Esusên chuipondash. –Tantia. Matses ambi istuidaïd bedte comapenec bunquiaïd mibi chuinu. Utsin tied nantan nidshun dadan êndenquimbo ompoampid piucquid dadpenquo icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: “Nêbi con tied nec,” qeshun piucquid ompoampid bedpac caondash. Adomboen matsesên Nuquin Papabêd tabadte bunquin aton nauidi nainquo icquin Nuquin Papan chiacpadomboenuidi nac bēdambo ictsiash.

⁴⁵ Tantia. Casëdu bēdaidquoio bunaidtsen mibi chuinu. Dadan casëdu bēdaidquoio bunquin bednuen nibēnbenepac caondash.

⁴⁶ Adshun bēdaidquoio istuidash: “Nadquid utsi nibēdec,” quiaſh comapenec bunquiaic caondash. Adshun aton na abitedimbo menequin piucquid bedshun casëdu icho menequin aid casëdu bedac caondash. Adomboen Nuquin Papabēd tabadte bunquin matsesēn ēbi tantiaquiaic bēdambo icſtiasih —quepondash Esus.

Nuquin Papan cuidte uſhē Esusēn chiaid

⁴⁷ Adshumbic Esusēn naden chuipondash. —Tantia. Mibi chuinu. Nuēcquid nibedacimboen naindami. Isadaidbon nuēcquid dadpenquoio bedte nēshaid dapa acte nēnequin

⁴⁸ nēshaid cubu-cubuctsēcquoio icnuc nuēcquid bedshun acte cuēman tabadquin nuēcquid nibedquid. Nuacquid sandobanquin pistsēcquid acte nēsecaquid. Aden Isadaidbon nuēcquid bedquid.

⁴⁹ Adomboembidi namendambi. Nuquin Papan cuidte uſhē chonoc ambi abi yacnoshon uaido mayan bēdabo namendambi. Adoac choshon nibedacimboen matses bēdambo icquido Nuquin Papa yacno nidmequimbi

⁵⁰ icſambo icquido chian anēdēnquiaicno nēsecaindac. Adoac natiaic shubiquiendac —quequin Esusēn Nuquin Papan cuidte chuipondash.

⁵¹ Adshumbic: —¿Ada ēmbi chuiboedtedi tantie? —caquini: —Ai, tantiemi —quepondac.

⁵² Adsho tantiaſh Esusēn chuipondashi. —Nuquin Papan chiaid chuibanquid mibi iquendac. Matsesēn aton na ēndenquimbo dayun uanēdaidbēdta aton na chuca ismequin chiacimboen mimbi naindac. Nuquin Papan chiaid ēndenquimbo dada uampidbēdtabi Nuquin Papan chiaid utsi ēmbi chuiboedquoio mimbi chiendac —quepondash Esus.

Nasaded yacno Esus nidaid

(*Mad 6.1-6; Duc 4.16-30; Uan 4.44*)

⁵³ Adanec auēshquiobi nidequi

⁵⁴ abi caninēdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoaquien: —¿Mitsipaden comapenen tantiaibempash neba? ¿Mitsipadec comapenen tantiaquin bēdamequid yampash?

⁵⁵ ¿Nuqui isacmaidta nedic? Ma aton papa cuēte nacnenquid nepaboc. Ma aton tita Madia nepayoc. Aton utsibo nēidtedi iccosh. Nēidic Acobo. Nēidic Ose. Nēidic Simon. Nēidic Udas. Aidedi aton utsibo iccosh.

⁵⁶ Aido nēmba tabadosh. Aton chibichedotsen nēmba tabadosh. ¿Comapenen tantiaquidta nedic? Ma adquidpenquoio neyoc —quequin

⁵⁷ Esus chieshēnquin tantienquoio icpondash.

Adsho tantiaſh Esusēn nadopondash: —Nuquin Papan: “Ēmbi tantiamiacpaden chuibanta,” caidēn chiac utsibon tantiaquid. Adquidēn abi caniacnoshon chuibansho tantienquoio icquid —quepondash Esus.

⁵⁸ Adshun nadatiamao icquin nabanquin daēdſpactſēc ismetsēccondash: —“Nuquin Papan chomiaidquid nec,” quetiapimbo iquēc —qeshun.

14

Uan acten mentoanquid

unēs uaid

(*Mad 6.14-29; Duc 9.7-9*)

¹ Adnubien ancaquidēn Edodes caidēn Esusēn comapenen tantiaquin nabanaid chuisho tantiapac caondash.

² Adshumbic aton yuabo chuipac caondash. —Uan pado acten mentoandened nepash icnui. Ēmbi mapi butemiondaid uincuempash icnui. Adquid icquin comapenen tantiaquin nabampash icnui —quepac caondash Edodes.

³⁻⁴ Edodesēn Uan cuesuniac caondaid chuinu. Tantia. Uanēn: —Mimbi bedaid Edodias caid min chidopenquoio nec. Min utsi Uedipe caidēn chido bedshun Nuquin Papan chiaid mimbi niaquēc —cadoniaquien Edodesēn chieshtoshon uidēn uameshun Uan quēnēn nauedmepac caondash.

⁵ Adshumbic Uan cuesunetiadquoio icquimbi aton matses: —Nuquin Papan chiaid chuibanquidquoio nec —quesho tantiaſh aton aiduacūēdēnquin Uan badedi cuesunenquoio icpac caondash.

⁶ Adshumbic Edodesēn: —Ēbi tishaid uſhē nec —qeshun matses dadpen aton shubun puduedmeshun pemepac caondash. Adnubien ambi inaidēn champin Edodesēn pemiaido

baidaquin ismepac caondash. Adsho isumbic Edodesën: —Bëdamboenshë mimbi naic — qeshun

⁷ naden chuipac caondash. —Tantia, champi. ¿Atotsi buneque? Mibi bunaidquio mibi menenu. “Nuquin Papan cuidnushe,” quiash muatiapimbo iquebique. En ëbi chui —capac caondash Edodesën.

⁸ Adoaquien champin aton tita chuitampac caondash. Chuitanec choshon anin chiaid chuituidpac caondash. —Uan acten mentoanquidën mapi butetanquin pada-padaid dapan ananshun baded ëbi mene —capac caondash champin Edodes chuiquin. Uanën —Min bënë nianshun utsi bedmec mibi icsaic —cac champin tita Uan cuesunemete bumpac caondash.

⁹ Adoaquien Edodesën: —¿Atotsi quepequini ado? ¿Adoenquo ictiadtsimbi icpoba? — quequin ambi chuiboeo niactiadquio icpac caondash. —Ëbi isedquidon: “Mibi muambo nec,” canushe —quetanquin champin chiacpadomboen aton yuabo: —Uan mapi butetan —capac caondash.

¹⁰ Adoac quënë tsadacnobi Uan mapi buteshun

¹¹ mapi pada-padaid ananshun buanshun champi menepac caondash yuabon. Adoaquien champin ani menenun buampac caondash.

¹² Adnubien Uanbëd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

Comapenen tantiaquin 5000tedi pemaiid

(Mad 6.30-44; Duc 9.10-17; Uan 6.1-14)

¹³ Nidshumbic: —Mibi acten mentonaid mapi butiaccosh —catuidpondash. Adsho tantianec cano antabëdtoshon chian potiash pudundoanec matses nibëdacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dëquiadec podqued nidquidën nidanejac caondash.

¹⁴ Adnubien Esus matses nibëdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquio icquin daicsaidotedi bëdamebampondash.

¹⁵ Ushë budambi Esusbëd icquidon: —Inchësheque. Pete nibëdacno nuqui tabadeque. Nidaneme, Icho. Shubu dadpen icquid utsi-utsiec yacno nidshun ma piucquid menequin ma pete bednu —caquien

¹⁶ Esusën: —Padi. Ma tabadnu. Mimbibi peme —capondashi.

¹⁷ Adoaquini: —Ma panëmpi 5tedpactsëc icpayoc. Nuëcquidëmpi daëdquobi ictsec — quepondac.

¹⁸ Adsho: —Aidtedtsëqui beccho —cac meniondambi.

¹⁹ Adoaquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bëdambo iquec, Papa —quetanquin panëmpi cuësh-cuëshun abëd icquido menebanac aidontsen matses abitedi menebampondash. Adembidi nuëcquidëmpi bushtebantsëcshun menebampondash.

²⁰ Adoaquien nua cubudcuededquin pebededpondash abitedishumbi. Piacsho isun napi uaid bedtanequin tsitsan dapan sandotanquin isquien tsitsan dapa 12tedi cubucubuctsëcquio iquec pete cuësh-cuëshaid napi uaid.

²¹ Aden matses dadpenquio pemebampondash. Aido dadatedi tambanac 5000tedi icpondash. Aton chido aton bacuëbobëdta tambanambo iccondambi.

Acte bëntse Esus choaid

(Mad 6.45-52; Uan 6.16-21)

²² Adshumbic Esusën abëd icquido chuiquin: —Chian potec nidta —capondash. Adoac cano antabëdtoanec potec nidnubi Esusën abi datsidadquidotsen: —Nidanec nid —cac nidanejac caondash.

²³ Adec nidanebon Nuquin Papa chuinuac macuësh dectatoash abentsëqui Esus inchëshpac caondash.

²⁴ Adnubien chian dapa potequi abëd icquidotsen inchëshpondash. Chian nënantanquio yanubi cunquetuidpondash. Adnuc acte comapenec tēccuasquiampondash uncadenquio yec. Comapenec acte ishcu dnuc cano mentoatdiadpambo icpondash.

²⁵ Adnubien badiadte anoentsëqui acte bëntse Esus chopondash.

²⁶ Acte bëntse chosho isashini: —Podobitsi nec —quiash dacuëdtanec sidquecuededpondac.

²⁷ Adshobini Esusën: —Ëbien neque. Dacuëndenda —capondash.

²⁸ Adoaquien Petedon: —¿Con Icbombobida ne? Con Icho icquin: “Acte bëntse cho,” ëbi ca —capondash.

²⁹ Adsho tantiashun Esusën: —En cho —caquien Petedo canonoësh budanec acte bëntse Esus bëquedbanec niduidtsëccondash.

³⁰ Esusuidi isec bëdamboec niduidtsequi acte comapenec tēcguasquesho isash dacuëdtanec acte bëntse niduidtsëcboedi mentoadtsempondash. —Ëbi bed, Icho. Mentoadebique —caquien

³¹ Esusën badedquio bedtanquin indopondash. Aden indoequi: —“Con icbon ëbi bëdamboen nametsiash,” queboedi ¿atotsi quiash dacuëdtano? Ëbi bëdiactsëc tantiatsëcquid mibi nec —quepondash Esus Petedo caic.

³² Adtanec Petedobëdi cano antsadtonobien cunqueboedi cunquenquio yampondash. Actetsen tēcguasquenquo yanondash.

³³ Adsho isun cano antabëdquidon: —Mibi bëdambohë iquec. Comapenen tantiaquidquo yec Nuquin Papan Madombo mibi nec —quequin Esus tantiabedpondash.

*Quenesaded yacnoshon Esusën bëdamiaid
(Mad 6.53-56)*

³⁴ Adashic chian potiash Quenesaded yacno pudundopondash.

³⁵ Pudundosho isun anocquidon: —Esus chosh —quequin uanocquido abitedi chuibeniac daicsaido abitedi bë-bëpondash.

³⁶ Bë-bëshumbic: —Dashcuteuidtsëqui mishashi bëdantsiash —queshun Esus chuituidquin: —Min dashcute cuëmano daicsaido mishme —cac mishmiaqui bëdampondash abitedi.

15

*Padiseyobo icsaid Esusën chiaid
(Mad 7.1-13)*

¹ Adnubien padiseyobo Moisesën dada uampid chuibanquidobëdi shubu dadpen icquid Edusaden caid yacnuësh cho-choquin Esus istuidpondash.

² Istuidashic: —¿Atotsieshun mibëd icquidon nuquin tsusedpabon chiaid niac-niacposh? Penush mëpamëdenquo icquin nuquin tsusedpabon chiaid ma niac-niacpaboc —quepondash Esus chieshënquido.

³ Adsho tantiashun Esusën: —Ma mimbi. ¿Atotsieshun Nuquin Papan chiaidquo niac-niaque? Nuquin tsusedpabon chiacpadomboen naquin ma mimbi Nuquin Papan chiaidquo niac-niacpayoc.

⁴ Tantia. Mibi chuinu. “Titabëdta papa chieshënenquo icquin bëdamboen tantiata,” quequin Nuquin Papan chiampidquo ma mimbi niacpaboc. Adembidi: “‘Con pa unëspashun,’ quec chieshëmënquid icsho unës uaquid. Adembidi ani icsamboen chuishunsho unës uaquid,” quequin Nuquin Papan chiampid utsi mimbi niacpec.

⁵ Aid niacquin nuquin tsusedpabon ambembi chiaidien mimbi chiec. “Anibëdta amë naden cudasënac bëdambo ictsias,” mibi quepec. “‘Nuquin Papa menetequid nëidted con piucquid iquec. Mitsana nibëdsho menetiadquidi mibi menenquo iquembi. Nuquin Papa menetequid nec,’ quequidën

⁶ cudasënac bëdambo ictsias,” mibi quepec. Aden nuquin matsesën chiaid naquin Nuquin Papan chiaidquo ma mimbi niac-niacpayoc.

⁷ “Nuquin Papa tantiaquidquo nebi,” quec muaquid mibi nec. Ëndenquimboshë Nuquin Papan chuimiic nuquin tsusedpa Isayas caidën mimbi icsamboen tantiate chuiquin dada uapampic naden.

⁸ “Isadaidbo: ‘Nuquin Papambo tantiembi,’ quepec.

Adboedëmbi ëmbi chiaid niacquin ëbi tantienquo iquec.

⁹ “Ma Nuquin Papan ëbi bëdamboen isnu,” queboedëmbi ëbi bëdamboen tantienquo iquec.

Ëmbi chiaidquo namenquo icquin aton matsesën chiaiduidi namepec,”

quequin Isayasën Nuquin Papan chiaid dada uapampic —quequin Esusën abi chieshënquido chushcapondash.

*Ana shëcuënuësh choaid chiaid
(Mad 7.14-23)*

¹⁰ Adshumbic abi isec datsidadquido ompoachimboen chuipondash. —Tantia. Mibitedi chuinu.

¹¹ Ana shëcuëni puduedaidën matses icsaten mimbi dampec. ¿Adquidënda matses icsape? Padenquo. Ana shëcuënuësh choaidëmbien matses icsatsias —quequin Esusën chuipondash.

¹² Adnubien abëd icquidon: —Mimbi aden chuiboed tantiashun padiseyobon mibi chieshënosh, Icho —caquien:

¹³ —Dacuëdenda. Icsa bescatanquin tsindoshon nêdêncacimboen ambi tantiamiabi yaido ambemi chuiquido Nuquin Papan cuideque.

¹⁴ Dacuëdenda. Padiseyobo bëshuaidimboec icquido neque. Bëshuaidên aton matses bëshuaid utsi bêdamboen buantiapimbo iquec. Buanuec abi shêcuê ampâedtsiash. Adembidi Nuquin Papan chaidpenquoio namequin aton matses bêdamboen tantiametiapimbo iquec —quepondash Esus abêd icquido chiec.

¹⁵ Adshobien Petedon: —Mimbi ana shêcuênuêsh choaid quequin chuiboed tantiambo iccombique. Aid sebadênquoio chui. Tantanu, Icho —caquien:

¹⁶ —¿Tantiamboda icco?

¹⁷ Chuinu. Tantia. Ana shêcuên puduedaid mimbi peboed min pucun uedoash chimute shêcuênuêsh choec. Adquidên Nuquin Papan chaid niacmenquoio iquec.

¹⁸ Matses onquiaidimbi ana shêcuênuêsh choaid caoc. Abibi uquêducuêsh onquec: “Adoembi,” quequin otacquoio tantiaquin naic matses icsatsiash.

¹⁹ Icsambo icquido yec: “Ai, adoembi,” quequin otacquoio tantiaquin Nuquin Papan chaid niactsiash nadquidên. Nêdic unês uanquid. Nêdic aton chidopenquoio chudquid. Nêdic aton bênêpenquoio chudmequid. Nêdic aben uequid. Nêdic ampequid. Nêdic muaquid. Nêdic icsamboec chuishumênquid.

²⁰ Adquidtedi: “Ai, adote bunebi” quequin otacquoio tantiaquin icsaquid nec. Padnuen penush mêpamêdenquoio icquin Nuquin Papan chaid niaquenquoio ictsiash —quepondash Esus abêd icquido chiec.

Isadaidpembo chidon Esus tantiaid

(Mad 7.24-30)

²¹ Adanec auêshquiobi Esus nidpondash. Shubu dadpen icquid Tido caid anoentsêqui datambidanec choec shubu dadpen icquid utsi Sidon caid anoentsêqui chopondash.

²² Adnubien anocquid cananeyabo chidon Esus cuêntuidpondash. —Tsusedpa Dabidên tsyuecquid Nuquin Papan namiaid icquin êbi bêdamboen ista. Con champi podobitsi icsa dapuduedaid yec natiambo iqueque. Con champi bêdameta —caquien

²³ Esusên êcbedenquoio icpondash. Êcbedenquoio yaqui chidon tsibanbanquin cuênbampondash. Adsho tantiaquin Esusbêd icquidon: —Chieshanquieic cuêdpeque. Cuemepa —caquien

²⁴ Esusên cuemenquoio icquimbi aid chuiquin: —Nuquin Papan chiacpaden Isadaidbo matsesba Nuquin Papa bêdamboen ismete tantiamenuc nebi. Bênudacimboec icquin Nuquin Papa tantienquoio icscho aidoba tantiamenuc nebi —quepondash Esus.

²⁵ Adsho tantiaquin nidenquoio yec chido cuêdboed Esus ismequin danêshên sebudtsec: —Êbi nashunta, Icho. Con champi bêdameta —gueshobien Esusên:

²⁶ —¿Aton bacuêbo pemenquoio icquimbi aton opa pemiacta bêdambo icpatsiash? Padenquoio. Adembidi Nuquin Papan con matses caidotedi tantiamiabi utsibo êmbi nashunac icsambo ictsiash. Isadaidboba tantiamenuc nebi —quepondash Esus.

²⁷ Adsho tantiaquin chidon: —Ai, abimbo mimbi caic. Padnuen bacuêbon pequin paêdmiaid opashêmpin petsêcquid. Adembidi mimbi comapenen tantiaquin nabanaqui isadaidbo dadpen bêdanubi isadaidpembo abentsêc tantiaquid icscho êbi nashunquin con champi bêdameta

²⁸ —caquien Esusên: —Ai. Êbi tantiaquidquoio mibi nec. Mimbi chiacpadece min champi bêdanendac —quesho tantianec aton shubuno nidshun isquien aton champi bêdanac Esusên chuinubi.

Daicsaido dadpen Esusên bêdamiaid

²⁹ Adanec auêshquiobi nidec chian dapa Cadidia caid cuêman nidquid podquedên nidanepondash. Adashic macuêsh dapa dectatoec poctsebi tabadtuidpondash.

³⁰ Tabadtuidsho isun matses dadpenquoio cho-choquin daicsaido dadpen Esus ismenuen bê-bêpondash. Tidinequido yec bëshuaido yec shêquêquenquoio icquido yec onquesabo yec daicsaido utsibotedi yec quenuc bê-bêpondash. Adsho Esusên bêdamebampondash.

³¹ Bêdamiaid onquenquoio icboedi onquianondash. Bëshuacboedêmbi isbenondash. Capuenquoio icboedi capucuenondash. Daicsaido utsibo adecbidi bêdanondash. Adsho isquido nadpondash. —¿Adquidta ictenece? Nuquin matses isadaidbon tantiaidên Nuquin Papan namiaid icquin bêdamepash icnui. Nuquin Papa bêdambo iquec —quepondash Esusên bêdamiaid tantiaquin.

Matses 4000tedi pemiaid

(Mad 8.1-10)

³² Adec tabadsho isashien Esus: —Nëido tantiac unësquoio iquec. Ĕmbi nabansho isnuec choash 3tedec ushquin piac ambi bëboed pete naimëdaccosh. Ĕmbi: “Nid,” cac nidnuequi bunambi padishtsiash. Pemiabi nidmetiapimbo iquebi —quepondash.

³³ Adsho tantiashun abëd icquidon: —¿Midambo pete bedtiapimbo iquec? Pemetiapimbo matses dadpen iquec —capondash.

³⁴ Adoaguien Esusën: —¿Tedtsi panëmpi iquec? —cac: —Sieteted ictsec. Nuëcquidëmpi daëdpactsëc ictsec —quesho

³⁵ tantiashumbien abi datsidadquido chuiquin: —Nëmbo tabadbud —capondash. Adoac tabadbudpondash abitedi.

³⁶ Adshumbic panëmpibëdta nuëcquidëmpi bedshun Nuquin Papa chuipondash. —Nëid mimbi uaid bëdambo iquec, Papa —queshun pete cuësh-cuëshbantsëcshun abëd icquido menebampondash: —Pemeban —quequin. Adoac abitedimbo pemebampondash.

³⁷ Aden pemiab abitedimbo nua cubudcuededpondash. Piacsho isun pequin napi uaid bedbanquin tsitsan 7ted icnuc cubu-cubuctsëcquio icnuc sandobampondambi.

³⁸ Esusën pemiado dadpenquoio icpondash. Tambanac 4000tedi dada icpondash. Chido bacuëbobëdta tambanambo iccondambi.

³⁹ Adashic: —Nidanec nid —quepondash Esus ambi pemeboedo caic. Aido nidanenubi chian budash cano antabëdtoshon Esusën chian potepondash. Chian potiash nidaid Mactada caid yacno pudundopondash.

16

Saduseyobon: Ĕbi isme, quiaid
(Mad 8.11-13; Duc 12.54-56)

¹ Pudundoanec nidshobi anocquidon abi chieshënquidon Esus chuituidpondash. —“Nuquin Papan chomiaid nebi,” quequin comapenen tantiaquin nabanquin ëbi isme —cabededpondash padiseyobobëdta saduseyobon.

² Adshobien Esusën: —Nuquin matsesën chiaid mimbi tantiec. “Inchëshbudtsëqui abu piumbo icsho isash: ‘Tanunquio badiadec,’ quequid.

³ Badiadnubi abu inchëshpambo icsho isash: ‘Ue dapa choec,’ quequid,” quequin nuquin matsesën chiaid mimbi tantiec. Aden chiaid tantiacimboen bëdamboen tantiatidquidi Nuquin Papan nëmbobobi naid mimbi tantienquoio iquec.

⁴ Icsambo icquid icquimbi mimbi: “Ĕbi isme,” cadednepec. Nëbi mibi ismenquoio iquembi. Nuquin Papan nuquin tsusedpa Onas chishcambiëcquid dapan chebudacsho daëdec ushun ucbudmiacimboec unës uacsho chococac daëdec ushash uincuenendabi. Aden ëbi tantiesabo ismendambi —quianec nidpondash Esus.

Padiseyobon chiaid tantienda, quiaid
(Mad 8.14-21)

⁵ Adanec nidec chian budash cano antabëdtoshon chian poteoapondash. Chian potequan Esusbëd icquido: —Pete nianchitombi. Bëtiadquidi nepobi —quepondash.

⁶ Adshobien Esusën abëd icquido chuiquin: —Padiseyobëdta saduseyobon naid pan bidiscamete bimboecquid iqueque. Ista —caquien

⁷ tantienquoio yec abëd icquido nadec onquecuededpondash. —Nuqui niamboed pete chiequi nepanui —quepondash.

⁸ Adsho ambembi tantiash Esus: —Ĕbi bëdiactsëc tantiatsëcquid mibi nec. ¿Mimbi pete niamboed chiectabi nedi? Padenquoio.

⁹ ¿Bëshunashta mibi nepe? Pete Stedtsëcboedi ëmbi 5000tedi pemiadën napi uaid dadpen iccondaid ¿tantienquioda yano?

¹⁰ ¿Adembidi pete 7tedi ictsëcboedi ëmbi 4000tedi pemiadën napi uaid dadpen tsitsanën sandoboed tantienquioda yano?

¹¹ ¿Aden comapenen tantiaquid icquimbidambi pete niamboed chuipadi? Padenquoio. Pan bidiscamete pictsëc cabiunac pan abichobi nua bidisquiacimboecquid padiseyobobëdta saduseyobon chiaid iquec —quepondash Esus.

¹² Aden chuisho tantiash abëd icquido nadpondash. —Pan chienquoio icquimbi nuquin matses tsusiobon chiaidshenda capec. Aido caic: “Icsamenda,” quepecshenda niosh. “Padiseyobon chiaidbëdta saduseyobon chiaid tantienda,” quepecshenda niosh —quepondash Esusbëd icquido.

Nuquin Papan Mado mibi nec, quiaid
(Mad 8.27-30; Duc 9.18-21)

¹³ Adash yuectaniash puduanec nidequien Esus nidaid utsi Sesadeya Uedipo caidën nidanepondash. Adshumbic abëd icquido chuimepondash. —Utsibon ¿tsutsi ëbi caosh? —caquien:

¹⁴ —“Uan pado acten mentoanondaidien nec,” mibi caosh. Utsimbic: “Edias cuëmëdquid Nuquin Papan ambi tantiaid oncamiampid nepanui,” mibi caosh. Utsimbic: “Edemias cuëmëdquid Nuquin Papan oncamepampid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abëd icquidon.

¹⁵ Adsho tantiaishun Esusën: —Ma mimbibi. ¿tsutsi ëbi mimbicao? —caquien

¹⁶ Petedo Simon caidën: —“Quidistu caid Nuquin Papan chomiaidquio nec,” caombi mibi. Aton Madombo mibi nec —capondash.

¹⁷ Adsho tantiaishun Esusën: —Nuquin Papan aden tantiamiac mimbi bëdamboen chioc, Petedo. Onasën mado Simon caid yec matsesien mibi nec. Adquid icquimbi matsesën tantiaid chienquio icquin Nuquin Papan tantiamiaidquio mimbi abimbo chioc.

¹⁸ Tanta. Ëmbitsen mibi chuinu. “Cuënotebimboecquid nec,” quequin mibi Petedo cuënondambi. “Cuënote dapa utsi ictiapimbo yacimboc chieshtoenquio icquid iquendac,” queshun mibia ëbi tantiaquido chuiquid dapambo icmendambi. Adec mimbi namiaido ëbi tantiaquido iquendac. Satanasën aido: “Nëid yuanu. Utsibic chieshtomeni. Utsibic unës uamenu,” caqui abi ëbi tantiaquido iquendac.

¹⁹ Padnuc Nuquin Papan chiacpadomboen ëbi tantiaquidon nate mimbi chiendac. Adembidi ëbi tantiaquidon natemaidtsen mimbi chiendac —quepondash Esus Petedo chiec.

²⁰ Adashic abëd icquido abitedi chuioaic: —“Nuquin Papan chomiaidquio nec,” quequin utsibo ëbi chienda —quepondash Esus.

*Abi unës uate Esusën chiaid
(Mad 8.31-9.1; Duc 9.22-27)*

²¹ Adshumbic tauaquin abi unës uate chuidondash. —Shubu dadpen icquid Edusaden caid yacno nidendabi. Anoshon nuquin matsesën ëbi chieshënquendac nëidtedshun. Nëidic tsusiobon. Nëidic nëish yua abided unës uaquido chuiquid dapabon. Nëidic Moisesën dada uampid chuibanquidon. Aidedishun mëyanquioquin ëbi unës uamendac. Adoacsho chococac daëdec ushash uincuenendabi —quequin chuïsho

²² tantiaishun Petedon uanotantsëcquin tsadumbudshun Esus chuipondash. —Unësquio icnuc mimbi chieque. Aden chienda. Ma mibi unës uatiapimbo icpayoc —capondash Petedon.

²³ Adoaquien Esusën: —Satanasën oncamiac Petedo adec onquec —queshun Petedo isquin Satanas chushcapondash naden. —Cuen, Satanas. Nuquin Papan chiaid mimbi ëbi niacmetiadquio iqueque. Cuen —quetanec Petedobi chiec: —Matsesën tantiaid chuiquimbi Nuquin Papan tantiaidquio mimbi chienquio iccoco —capondash.

²⁴ Adashic abëd icquidodeti chuioaic: —Ëbi tantiaquidon aton nauidi nainquio icquin ëmbi chiacpadomboen natsiash. Adsho chieshëmënuquidon: “Unës uachitome,” cac chieshtoenquio icquin ëbi tantiatsiash. Adquid ëbi tantiaquidquio nec.

²⁵ Padnuen ëbi tantiatsëcquid: “Esus tantiaisho unës uachitoshe,” quiaish ëbi tantienquio yanec unësash Nuquin Papan cuidaidobëd nidendac. Padnuen chieshtoenquio icquin ëbi tantiaquid Nuquin Papa yacno tabadendac.

²⁶ ¿Nuquin Papa tantienquio yec tabadecta matses bëdambo icpatsiash? Abi bunaidtedi bedquin Nuquin Papa tantienquio yec unësash ¿mitsimbo tabadpatsiash? Nuquin Papabëd tabadte bunquin ¿atotsi menepatsiash? ¿Piuquid meniashta Nuquin Papa yacno tabadpatsiash? Padenquio. Adotiapimbo iquec. ¿Atoda meniantiapimbo iquec?

²⁷ Ëmbien matses cuidte chiendac. Nuquin Papa yacnuësh ambi abi yacnoshon uaido mayan bëdabobëd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantiec bëdamboec tabadquid Nuquin Papabëd tabadmequin Nuquin Papa tantienquio yec icsaquido icsano nidmendambi.

²⁸ Tanta. Chuinu. Utsi-utsiec unësabi icquin ëbi tantiaquido dadpen yansho mimbi isendac —quepondash Esus.

17

*Esus bëchamauanquiescho isaid
(Mad 9.2-13; Duc 9.28-36)*

¹ Aden chiash 6tedec ushanec nidquimbi Esusën abëd icquido 3tedtsëqui buampondash. Petedo yec Acobo yec Acobon buchi Uan yec quetsëcnuc buanash macuësh dapa dëctatoash mananënuo tabadtuidpac caondash.

² Tabadtuidshun isquien Esus utsiacbimboec isadpec. Aton dashcutebēdi aton bētantete ushēbimboec bēchamauanquieic yanac caondash.

³ Esus bēchamauanquieic icnubien dada utsi daēd isadcuenash Esusbēd onquiampac caondash. Abentsēc Moises yampid icnubi utsi Edias Nuquin Papan ambi tantiaid oncamiampid icpac caondash.

⁴ Adsho isashien Petedo: —Mibi adec tabadsho isash bēdambo iquebi. Mibi nēmbobi tabadmenun abentsēc chotsecnuc shubumpi uatsēcnuna, Icho. Mitsana natsēcquinc Moisesēn na natsēcquinc Ediasēn na natsēcquinc canuna. ¿Ada bēda icpec? —quenubi

⁵ abu ushu bēchamauanquieic icquidēn isadenquio icnuc bētipac caondash. Adnubien abu ushu nēnantanuēshquio Nuquin Papa onquiampac caondash. —Nēid con Madombo nec. Ēmbi tantiaidquio yec ěmbi bēdamboen isaidquio neque. Nēidquio tantiaata —quec dacuēdampamboec onquenubien

⁶ uinte paēdtampamboec dacuēdtanec uebudcuededpac caondash Petedo chedo.

⁷ Adshobien Esusēn camishquin: —Dacuēdenda. Nidto —cac

⁸ nidtoquin isquien Esus abentsēqui iquec.

⁹ Adtanec macuēsh budequi Esus: —Mimbi isboed nēbi utsibo chienda. Unēs uac ěbi uincuenacsho isun chianta —quepac caondash abēd icquido chieic.

¹⁰ Adsho tantiaish Petedo chedo: —“Nuquin Papan chomiaidquio nec,” quequin nēbi mibi tantiembi. Mibi adquid icnuc ¿mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —qeshobien

¹¹ Esusēn: —Abimbo chiosh. “Edias yampid bēyuc choshon: ‘Nuquin Papan chomiac bēdambo icquid choeque. Bēdamboec tabadta,’ quequin chiendac,” quequin abimbo chiosh.

¹² Adquid Ediasbimboecquid chondash. Choacsho tantienquio icquin matsesēn abi bunacpaden unēs uapac caondash. Adembidi Nuquin Papan chomiaid icsho ěbitsen chieshēnquin unēs uaindac —qesho tantiaishien:

¹³ —“Ediasbimboecquid nec,” quequinshenda chuiposh. Uan pado acten mentoandened caquinshenda Edias capec —quepac caondash Petedo chedo.

Madompi dapuduedaid podobitsi icsa cuemiaid

(Mad 9.14-29; Duc 9.37-43)

¹⁴ Bēchamauanquieic ictanec choequi abēd icquido utsibo yacno choquin matses dadpen aido datsidadacsho Esusēn istuidpondash. Adec Esus chosho isumbien unēsanetsēcquidēn papan Esus ismequin danēshēn sebudshun chuipondash.

¹⁵ —Con mado bēdamboen isquin bēdameta, Icho. Baded-badedquieic unēsaneic cuēten pichiquianec. Adecbidi unēsaneic acten mentoadtsenacosh.

¹⁶ Mibēd icquidon bēdamete danquin bēuidombi. “Nē bēdame,” cac bēdamenuen tanuidosh. Bēdamenuo iccoshe. Mimbinbo bēdameta —caquien

¹⁷ Esusēn ambo icquidotedi chuipondash. —Ēmbi nadatiambo icquin nabanquin ismiaqui mimbi ěbi tantienquio iquec. Adsho isash chieshtoash cuentiaidquio icchitebi. Adtiaidquio yequi padenquio iquec nebique. Min mado beccho —cac

¹⁸ bēsho istanquin Esusēn podobitsi icsa chushcapondash. —Padi. Daicsa uainda —cac podobitsi icsa cuenubi madompi bēdampondash.

¹⁹ Adsho isun abēd icquidon Esus chuipondash utsibo tantiamenuo icquin. —Ēmbi: “Cuemenu,” cac ¿atotsi quiash podobitsi icsa cuenenuo icposh? —caquien:

²⁰ —Nuquin Papa bēdamboen tantiaquin mimbi bēdamboen natsenoc. Mimbi bēdiactsēc tantiatsec. Pete ěshēmpi mostasa caid pistsēcquidi siac nua yec canitsiash. Adecbidi Nuquin Papa tantiatsecboedi: “Ambi natiapimbo ictequid nibēdec,” quequin abimbo tantiaquidquio yanshun comapenen tantiaquidbimboec mibi ictsiac. Adquidēn nēid macuēshquioibi cain: “Uquē manēd,” cac manēdtsiash. Aden mimbi: “Ēbi bēdamboen nameta, Papa,” quequin Nuquin Papa chianiac aidēmbi mimbi: “Ēmbi natiapimbo ictequid nec,” caid mibi bēdamboen nametsiash.

²¹ Nēbi ěmbi cuemeboed abembi cuentiapimbo icquid nec. Nuquin Papauidi tantianuen buna mēmunquin Nuquin Papa chianeshun adquid cuemequid —quequin Esusēn chuipondashi.

Abi unēste Esusēn chuioid

(Mad 9.30-32; Duc 9.43-45)

²² Adanec aton nidaid Cadidia yacnobi capucuenquimbi Esusēn abēd icquido chuipondash. —Ēbēd icquid abentsēcshun ěbi chieshēnquido ěbi bedmendac.

²³ Bedshun ëbi unës uamendac. Aden unës uamiacsho chococaquini daëdec ushash uincuenendac –quesho tantiatanequien abëd icquido: –Unësquo icnuc chiec –quiash shubiantiadtsëcquio icpondash.

Chuiquid dapa menetequid piucquid Petedon istuidaid

²⁴ Aden chianec nidequi shubu dadpen icquid Capednaun caid yacno Esus chopondash. Adnubien Nuquin Papa tabadte shubu uashunaid nacenemuequien piucquid bedquidon Petedo chuituidpac caondash. –Nuquin Papa tabadte shubu uashunaid nacenemuenen *¿*ada min icbon dos dada uatsaid piucquid shocoshëmpi abentsëc menepatsiash? –cac

²⁵ Petedo: –Ai, menetsiash –quepac caondash. Adanec nidec shubun puduedshobien Esusën ambia Petedo chuipondash. –*¿*Atotsi mimbi chie, Simon? Aton matsesën na nacenemuenen *¿*tsutsi chuiquid dapabon piucquid bedshumpec? *¿*Ada aton matses piucquid bedshumpec? Aido bedshunenquio icquin *¿*ada ambi bedaido aton yuabo piucquid bedshumpec? –caquien

²⁶ Petedo: –Ma aton yuabo bedshumpaid yoc. Aton matses piucquid bedshunenquio iquec –quesho tantiashien: –Adembidi aton Mado icsho aton shubu nacenemuenen Nuquin Papan ëbi bedshuntiapimbo iquec.

²⁷ Aden tantiaquimbi: “Nëishnushe,” qeshun menenun nanuna. Chianën ansetaman. Tauquin ansemiaidi ancanshun anisquin 4 dada uatsaid piucquid shocoshëmpi abentsëc mimbi istuidendac. Aid bedshun piucquid bedshumënquido menetanta. “Në con icbon nabëdi con na nec,” quequin menetanta –capondash Esusën. Adoac Petedon Esusën chiacpadomboen menetampac caondash.

18

¿Mitsicquid chuiquid dapa mimbi icmepatsia?

quequin chiaid

(Mad 9.33-37; Duc 9.46-48)

¹ Adshumbic abëd icquidon Esus chuipondash. –Abitedishun Icho icquin matses mimbi namendac. Ëbi chedo caic *¿*mitsicquid mibëdtan chuiquid dapa mimbi icmepatsia? –quesho ² tantiashun abi tabadacno nënantanquio bacuë tsaduntsëcshun Esusën chuipondash.

³ –Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuën amën chiacpadomboen nacbimboen ëbi tantiaquiota. Adash ambi namiaid yanash Nuquin Papa yacno mibi puduedendac.

⁴ Aden ëmbi chiacpadomboen naquidquio icsho mibi Nuquin Papan: “Bëdamboshë iquec,” caindac.

⁵ Nadquid bacuëbëdta ëbi tantiabentsëcquid bëdamboen tantiaquidën ëbitsen bëdamboen tantiendac –quepondash Esus.

Tantiabentsëcquido icsamete chiaid

(Mad 9.42-48; Duc 17.1-2)

⁶ Adshumbic padpiden chiec: –Ëbi tantiabentsëcquid caic: “Nuquibi Nuquin Papan chiaid niac-niacquiec icsaquionona,” quequid Nuquin Papan cuidendac. Icsamiabi yec unësacsho isun: “Bëdambo iquec,” catsiambi. “Cuënote yuëmboshë icquid tédectanshun acte nënepatecnëdan,” caimbi icsamiente bunquidquio.

⁷ Aden ëbi tantiatsëcquid utsibon icsamendac. Adec icsamianquid Nuquin Papan cuidendac.

⁸ Aden Nuquin Papan cuidte chuisho tantiequi icsainda. Mëdanten naic mibi icsaic. Mëteshuniac bedtiapimbo yacbimboec icsainquio yec ënëdta. Taën capuec mibi icsaic. Tateshuniac caputiapimbo yacbimboec icsainquio yec ënëdta. Ënëdenquio icsho Nuquin Papan mibi cuidendac.

⁹ Adecbidi ëshën isec mibi icsate bunquiec. Ëshë chicshuniacimboec icsainquio yec ënëdacsho: “Bëdambo iquec,” catsiambi. Ënëdenquio icsho Nuquin Papan chian anëdënquiacno nësecaindac –quequin Esusën chuipondash.

Matses ëbi tantiamete Nuquin Papa bunaid

(Duc 15.3-7)

¹⁰ Adashic padpidec: –Nadquid bacuëmpin ëbi tantiatsëcsho isun: “*¿*Adtsëcquidëmpinquiobida bëdamboen tantiapec?” cainda. Nuquin Papan abi yacnoshon uaid mayan bëda aid bacuëbo dayun uaquid icquin Nuquin Papa yacno puduedshun mimbi mamëshumboed Nuquin Papa chuinushe. Adtsëcquidëmpi mamëshunenda. Ëbi tantiabentsëcquido con Pan tantiaquieque.

¹¹ Ēmbitsen aido tantiemi. “Bēnuidaid istuidacimboen ēbi tantienquo icquidobi ēbi tantiaquido icmenu,” quiash matsesondabi –quepondash Esus.

¹² Adashic padpidec: –*ζ*Mitsipadquo nuquin matses icpec? Nēish yua obeca dadpen 100ted dayun uaquidēn aton yua tambanac abentsēc nibēdsho istanquin utsitedi nianshun aid abentsēc nibēnbenequin istuidquid.

¹³ Aden istuidash comapenec cuishonqueuid: “Con yua nibēdantsenquiac,” quiash. Aton yua utsi yacno bēash abi icbocdedi icsho isash bēdambo icquid. Adecbidi matsesēn ēbi tantiabensho isash Nuquin Papabēd cuishonquebi bēnuidaid istuidacimboec.

¹⁴ Icsaido cuidacno matses nidmete Nuquin Papa bunenquo iquec. Matses bēdamboen isquin abēd tabadmete Nuquin Papa bunquiec –quepondash Esus.

*Chieshēnquidobēdi onquete chiaid
(Duc 17.3)*

¹⁵ Adashic padpidec: –*ζ*Ada ēbi tantiaquid utsin mibi icsa uaosh? “Ai, icsa uaoshi. Chieshēmiantiadquo icchitosh,” qeshun nadoac bēdambo ictsiash. Aid abentsēcqui chuiquin aidbēd bēdamboec onquequin: “Ēbi icsa uaquin Nuquin Papan chiaid mimi niac-niaccoc. Adec icsainquo yec ēnēdta,” mimi cac: “Ai, adebi,” quiash mibēdi bēdamboec tabadtsiash Nuquin Papa tantiesabimboec icuidboedi.

¹⁶ Mimi: “Icsainquo yec ēnēdta,” caqui: “Padi. Adequi icsaibi,” qesho tantiashun ēbi tantiaquid utsi beduanshun aidbēdētan chuitanta. “Nuquin Papan chiaid niac-niacsho isun daēdshun chiaid abimbo chiaid nec,” quequin chiaid tantiaquin adota.

¹⁷ Mimi buanaidēnsen: “Adec icsainda,” caqui: “Adequi icsaibi,” qesho tantiatanec choashun mibēdētan ēbi tantiec iccuededquido chuiquido chuituidta. “Mimbitsen chuitanta,” cac aidontsen chiaqui tantienquo icsho isun: “Nuquin Papan chiaid niac-niacquid yec Esus tantiesabimboecquid nec,” qeshun ēbi tantiaquido cuēdēnacno chomenda.

¹⁸ Aden mimi: “Esus tantiesabimboecquid neque. Cuēdēnacno chomenquo ictiad,” casho Nuquin Papan: “Bēdamboen naic,” mibi catsiash. Adembi mimi: “Adec icsaboedi icsainquo yec ēnēdsho isun cuēdēnacno chomeoanuna,” qeshun chomeoasho Nuquin Papan: “Bēdamboen naic,” catsiash.

¹⁹ Padpiden chuinu. Tantia. Mimi: “Nuquin Papa chuinuna,” cac: “Ai, adonona,” qesho tantiashun aidbēdētan mimi Nuquin Papa chianiac mimi chiacpadomboen Nuquin Papan natsiash.

²⁰ Ēbi tantiec daēd tabadnuc aidbēd con Mayan yec ēbēd yacimboec tantiadendac. Adec tabadsho isun: “Con Mado tantiaquido nec,” qeshun aidon chianiaid Nuquin Papan tantiendac.

Yuan bēdamboen istiapimbo yaid

²¹ Adec: –Icsa uanec chieshtomiantiadquo iquec –Esus qesho tantiashumbien Pedeton Esus chuipondash. –*ζ*Icsa uanec chieshtomianquid tedentsimbi chieshenquo icquin bēdamboen ispe? Chieshēnquin padpiden icsa uac *ζ*padpidendambi bēdamboen isoape? *ζ*Mēdante utsiuc daēd tauadoquin sietetedembi nashun padpiden bēdamboen isenquo icquin ēnacta bēdambo icpatsiash? –caquien

²² Esusēn: –“Mēdante utsiuc daēd tauadoec sietetedi” quequin daēdpacksēcquo mimi chuipec. 70 por 7 caid *ζ*tedtsi icpec? Aidteden 490tedembi ēnenquo icquin bēdamboen isoadoniac bēdambo ictsiash –quepondash Esus.

²³ Adashic abi onquec: –Nuquin Papan chiacpadomboen matses bēdamboen iste mibi chuinu. Tantia. Tsusion yuabo dadpen icpac caondash. “Ma bēnu,” quequin ambi meniactedi piucquid bednuen aton yuabo aton shubuno chomepac caondash.

²⁴ Abia chomiaidēn piucquid dadpenquioshē bedshun aton icbo meniambo icpac caondash.

²⁵ Adsho icbon: “Mimi bedactededi beccho,” cac: “Nibēdec,” quepac caondash yua. Adshobien icbon: “Aidtedi piucquid bednuen matses utsibo mibi yuamenu. Min chido min bacuēbobēdtabi cuēsh-cuēshēdmeshun aidtedi piucquid bednu. Mibi icsambo iqueque,” cac

²⁶ yua abi yuaquid ismequin danēshēn sebudash: “Padi. Ēbi yuamenuen cuēsh-cuēshēdmenda. Chiata. Yuecshun aidtedi bedshun mibi menenun nanu,” capac caondash.

²⁷ Adoquien icbon bēdamboen isquin: “Padi. Ēbi menenda. Mibi utsibo yuamenuquo iquembique. Dacuēdenda. Nidēc nid,” quequin icbon aton yua bēdamboen nidmepac caondash.

²⁸ Adoac nidquimbien aid yuan icbon bēdamboen isboedēn ambi: “Ma bēnu,” quequin piucquid daēdpacksēc meniaid yua utsi istuidpac caondash. Istuidshumbic bedtanquin tēdēdquin: “Mimi bedactededi piucquid beccho. Unēs uachitomane,” caquien

²⁹ aidtsen ambi piucquid bedshunondaaid ismenuen danëshën sebudtsec: “Chiata. Ēbi unēs uainda. Yuecshun bedshun mibi menenun nanu. Chiata,” quepac caondash yua utsi.

³⁰ Adsho tantiashun icbon bēdamboen isboedēmbi chieshēnquin: “Padi. Mibi cuidmēmbi,” queshun quēnēn nauedmpac caondash. “Piucquid aidted abi menianenquio yacpadequi ma quēnēnuēsh mēyadbudchitono,” queshun nauedmiac caondash.

³¹ Aden chieshēnquin quēnēn nauedmiacsho isumbien yua utsibon: “Chieshanquieç,” queshun icbo chuituidpac caondash. “Mimbi bēdamboen isboedēmbi min yua utsi quēnēn nauedmiac: ‘Piucquid menianenquio iquec,’ queshun,” quequin icbo chuipac caondash.

³² Adsho tantiashun icbon ambi cuidenquio icquin bēdamboen isboed chomeshun chushcapac caondash. “Icsambo icquidquio mibi nec. ‘Chiata. Mibi menenun nanu,’ mibi quesho: ‘Padi. Ēbi menenda,’ quequin mibi bēdamboen isombi.

³³ Ēmbi mibi adobocpadomboen utsi bēdamboen istiapimboda icco? ‘Ma bēnu,’ queshun mimbi meniactedi bēabi icsho bēdamboen isec mibitsen bēdambo ictsenac. Mibi yacpadeç nēishun mibi cuidēmbi,” quepac caondash icbo.

³⁴ Adshun quēnēn nauedmpac caondash. “Ambi bedactedi piucquid dadpenquio meniash ma puduēmpanu,” queshun quēnēn nauedmiac caondash.

³⁵ Aden matses yuan icbon nacpadomboen Nuquin Papan naindac. Utsibon chieshēnaqui chieshēnansho Nuquin Papan mibi bēdamboen istiapimbo iqueque. Chieshēnanenda. Mibi chieshēnquidobi bēdamboen ista —quepondash Esus.

19

Chidobēd cuēshēdte Esusēn chiaid

(Mad 10.1-12; Duc 16.18)

¹ Adanec nidaid cuēshē Cadidia caid yacnuēsh puduanec nidec nidaid cuēshē utsi Udeya caidēn nidquin acte Odan caid potebidanec Esus nidpondash.

² Adec nidshobien matses dadpenhshun tsibanampondash. Abi tsibanansho isun nidtuidshun daicsaidtedi Esusēn bēdamepondash.

³ Adnubien tsusedpabon chiampid namequido padiseyobon chieshēnquin: —Nuquin Papan chiaid niacmenu —quequin Esus chuituidpondash. —ĶAtotsi mimbi chuipe? Dada uashun aton chidobi nidmete Ķmitsipaden mimbi chuipe? En chui. Tiantianu —capondash.

⁴ Adoaquien Esus: —ĶNuquin Papan chiaid isamboda ictio? “Nuquin Papan dadaba uashun aton chido uapampic,” quequin dada uaid ma mimbi ispaboc.

⁵ Adembidi: “Dadan canite chido uaid icsho dadan aton chido bedquid. Amē chedobēd icboedi aton chido bedash aid nianenquio yec aidbēd tantiananquieç dada aton chidobēd abentsēç yacimboc tabadquid,” quequin dada uaid ma mimbi ispaboc.

⁶ Aden Nuquin Papan tantiapadomboen aton chido nianenquio yec aidbēdi tantiananquieç abentsēç yacimboc tabadac bēdambo ictsiash. Padnuen aton chido nianec aidbēdi cuēshēdquin Nuquin Papan chiaid niactsiash. Adeçbidi chido aton bēnē nianec icsaquid —Esus quesho

⁷ tantiashumbien abi chieshēnquidon: —ĶAbimboda mimbi capadi? Nuquin Papan chiaid dada uaqūn Ķatotsieshshun Moisesēn naden chuipampic? “Aton chido bunenquio yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesēn dada uapampid ma icpayoc —quequin chuipondash Esus chieshēnquidon.

⁸ Adsho tantiashun Esusēn chuipondash. —Ai, Nuquin Papan chiapadec aton chidobēd bēdamboec tabadtiaimbo icsho isun Nuquin Papan Moises aden dada uamepampic. Tauamboen matses uaqūn Nuquin Papan aden chiamo icpampic.

⁹ Tantia. Mibi chuinu. Aton chidobēd cuēshēdshun chido utsi bedquin Nuquin Papan chiaid niactsiash. Padnuen aton chidon bēnēpenquio chudmesho istuidash aidbēd cuēshēdquin Nuquin Papan chiaid niaquenquio ictsiash —quepondash Esus.

¹⁰ Adnubien abēd icquidon: —Adotiapimbo icte mimbi chuipec. Aton chidobēd cuēshēdenquio icte mimbi chuisho tantiashun: “Aton chido bedesambo dada bēdambo ictsiash,” caimbi —quepondash abēd icquido.

¹¹ Adsho tantiash Esus: —Ai, utsi-utsieç pabiate shēcuē nibēdacimboen ēmbi chiaid tantiatiapimbo iquec. Utsiboen aton chido bedash Nuquin Papan chiapadec bēdamboec tabadquid nec.

¹² Utsibic mimbi chiapadquid chido bedesa iquec. Nēidtedi chido bedesa iquec. Nēidic aton padibi impadishtsaid. Nēidic matsesēn inicsa uaid. Nēidic: “Nuquin Papan yuambo icquin aidēn chiapadomboenuidi naquin chido bedtiaimbo iquebi,” queshun chido bedesa. Adquidtedi chido bedesa nec. Ēmbi chuiboed tantiashun ēmbi chiapadomboen nac bēdambo ictsiash —quepondash Esus.

*Esusën bacuëbo chiaid**(Mad 10.13-16; Duc 18.15-17)*

¹³ Adnubien Esus ismenuen bacuëbo bë-bëpondash. —Mamishquin ma Nuquin Papa Esusën chuinu —quequin bë-bësho isumbimbi: —Padi. Bëenda —cauidpondash.

¹⁴ Adshobini Esusën: —Chën. Ma bënu. Cuemenda. Bacuëbimboecquid Nuquin Papa yacno puduedtequid nec. Amën chuisho tantiaish bacuë badedi: “Abimbo caic,” quiacbimboen ëbi tantiaquid Nuquin Papa yacno puduedtequid nec. Bacuëbo bëdambo iqueque. Beccho —cac bë-bëpondash.

¹⁵ Adshobien mamishbanquin Nuquin Papa chuipondash. Adobidanec nidondash Esus.

*Cania aton na dadpenquo dayun uaquid Esusbëd onquiaid**(Mad 10.17-31; Duc 18.18-30)*

¹⁶ Adnubien dada caniampinquo Esus chuituidpondash. —Mibi bëdambo iquec. Bëdamboen chuiquidquo mibi neque. Ëbi chui. Padpidec unëstiapimbo icquid icmenun bëdambo icquid Nuquin Papan abi yacno puduedmetsiash. ¿Atotsi nasho Nuquin Papan ëbi bëdambo capatsiash? —caquien

¹⁷ Esusën: —¿Mitsipadquid bëdambo icquid cai? Nuquin Papauidsëqui bëdambo icquid nec. Aibëd tabadnuen ambi Moises dada uamiampictedi nata —capondash.

¹⁸ Adoquien cania: —Nuquin Papan chiaid ¿mitsipadquid cai? —quesho tantiaishumbien: —Naden chiaid cainbi. “Cuesunenda. Min chidopenquo chudenda. Min bënëpenquo chudmenda. Ampenda. Muainda.

¹⁹ Titabëda papa chieshënenquo icquin bëdamboen tantiaata. Adembidi mibibi datantiadacimboen matses utsi abitedi tantiaquiota,” quequin chiaid cainbi —capondash Esusën.

²⁰ Adsho tantiaish cania: —Aidtedi niaquenquo icquin nabanquidquo nebi. Bacuëtsëc icquimbi tauaondambi. “Nuquin Papabëd tabadnuen ¿atotsimbi utsi nape?” cainbi —quepondash.

²¹ Adsho tantiaishumbien Esusën: —Nuquin Papan chiaid niaquesambo ictiadquo icquin mimbi dayun uaidtedi uesquin menequin piucquid bedta. Piucquid bedshun piucquid nibëdquido min piucquid uesquin menebanta. Adsho abëd tabadmenun Nuquin Papan mibi bëdamboen istsiashe. Adota. Adotanequic ëbëd iquec cho —caquien

²² cania: —Con na dadpenquo icsho uesquin menetiapimbo iquebi —quiash shubiantiadtsëcquo ictanec nidpondash Esusën chiacpadomboen natiapimbo yec.

²³ Adsho isun Esusën abëd icquido chuipondash. —Chuinu. Tanta. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedëmbi ëbi tantiatiapimbo iquec. Aton nauidsëqui tantiec.

²⁴ ¿Ada nëishamën pinchuc chichte ancumpadic? Padenquo. Adecbidi aton na dadpenquo dayun uaquidën aton nauidsëqui tantiaquin ëmbi chiacpadomboen natiapimbo yec Nuquin Papa yacno tabadtiapimbo iquendac —quequin Esusën chuipondash.

²⁵ Adec: —¿Ada nëishamën pinchuc chichte ancumpadic? —quesho tantiaishien abëd icquido nadpondash. —¿Tsudain Nuquin Papa yacno puduedtequid ichtotsiash? Nibëdchitequien iquec —quesho tantiaishumbien

²⁶ Esusën abëd icquido bëisquin naden chuipondash. —Matses namiantiapimbo icnuc Nuquin Papan namianquidquo nec. Ambi natiapimbo ictequid nibëdec —quepondash.

²⁷ Adsho tantiaishun Petedon: —Mimbi: “Nuquibi icnu. Cho,” cac con na abitedi nianec mibëd icnuec chopondabi. ¿Mitsimbo tabadtequidini nepe? ¿Atotsimbi nape? —caquien

²⁸ Esusën: —Tanta. Mibi chuinu. Nuquin Papan ambi uaid abitedi chuca uabocnoëshquo ëbëd tan chuiquid mibitedi iquendac ëmbi abitedi namiacnuëshquo. Ëbëd icquido icsho isun Nuquin Papan mibi chuiquid icmendac. Nuquin tsusedpa Acobon mado ¿tedsi icpampic? Aidtedi 12tedshun tsyuecquidon shubu 12tedi shubun-shubunquiech chuiquid dapabo mibitedi iquendac.

²⁹ Utsibontsen ëbi tantierendac. Aton shubu nianquinc abëda tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain ëbi tantiaquin ëmbi chiacpadomboen naquid iquendac. Adsho nëbi unësabi icsho ambi nianaidobëd tabadacimboecnuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquo icnuc.

³⁰ Nidaidënuësh chuiquid dapambo icboedi Nuquin Papa yacnuësh utsi-utsiech chuiquidpenquo iquendac. Utsibic nëuëshquo chuiquidpenquo icboedi Nuquin Papa yacnoshon: “Bëdambo icquid nec,” quequin chuiquid dapa icmendac —quepondash Esus.

¹ Adshumbic abĕd icquido Esusĕn ompoacbimboen chuipondash. —Tantia. Ĕbi tanti-aquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash.

² Istuidshumbic: “Badiadnubi tauashun ushĕ budtsambi mimbi ĕnacsho nĕidtedi piucquid mibi menenu. Naic cho,” cac chonoadec cho-chopac caondash.

³ Ushĕ abucquio yanubi tied icbon pete meniacno nidshun utsibo nainquoio yec samĕdsho istuidpac caondash.

⁴ Adoshombic aidotsen chuiquin: “Con tied neshcaic cho. Mibi bĕdamboen cuidquin menenu,” cac

⁵ tied neshcaic nidpac caondash. Ushĕ cuembo icnubi tied icbon padpidec pete meniacno nidoashun utsitsen istuidshun adembidi aton tied neshcamepac caondash. Ushĕ budambic padpiden utsitsen.

⁶ Inchĕshbudtsĕqui nidoaquin utsibo nainquoio yec samĕdsho istuidoashun: “ĴAtotsi quiash samĕduidequi ique?” cac

⁷ samĕdquido: “Chonoa uanquid nibĕdosh,” qesho tantiaashun tied icbon: “Mimbit-sen con tied neshcaic cho. Mibi menenu,” cac tied neshcaic nidaneoapac caondash inchĕshbudtsĕqui neshcaquin tauaic.

⁸ Inchĕshtsĕcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushĕ budambi choboedotsen meneta. Adoshombic ushĕ cuembo icnuc choboedotsen. Adoshombic ushĕ abuctoan choboedotsen. Adoshombic badiadnubi abia choboedo ĕnquimbi meneta,” cac menequin tauapac caondash.

⁹ Inchĕshbudtsĕqui chonoadec choboedoba menequin badiadnuc chonoadec taĕboed tied icbon: “Menenu,” cactedquio piucquid menepac caondash.

¹⁰ Adosho isashien badiadnubi choboedo: “Aido aden meneshun nuqui chonoadquioebo yuapambo nuqui menec,” qeshobi aidtedtsĕcbidi piucquid menepac caondash.

¹¹ Aidtedtsĕcbidi meniaquien tied icbo chushcapac caondash.

¹² “Tsyuec chonoadboed meniactedsĕcbidi menioshi. Icsambo iquec. Inchĕshbudtsĕqui chotsash daĕdpactsĕc chonoadtsĕcquid meniactedsĕc yuec chonoadquid piucquid meniac icsambo iquec. Chun mĕyadec yuecquio chonoadobi. Aidtedtsĕc menianec mibi chieshanquec iquec. Ĕbi dadpen meniac bĕdambo ictsias,” quequin chushcapac caondash.

¹³ Adoquien tied icbon: “ĴChieshanquictabi ique? Ĕmbi: ‘Nĕidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidtedquio menepaboc.

¹⁴ Mimbi bedboed buanec nid. Ĕbi bunacpaden tsyuec choash chonoadquid mibi meniactedquioibi meniombi. ĴIcsamboda iquec?

¹⁵ ĴIcbon ambi tantiacpadomboen aton na dadpen meniac ada aid icsambo icpec? ĴUtsibotsen menesho isunda mimbi ĕbi nĕishĕmpe? Aden nĕishĕnac Ĵada bĕdambo iquec?” quequin tied icbon chuipac caondash —quequin ompoacbimboen chuipondash Esusĕn.

¹⁶ Adashic: —Adembidi abi yacnoshon ambi tantiacpadomboen Nuquin Papan naindac. Utsi-utsien chuiquid dapa icmequin utsi-utsien padenquoio icmendac —quequin chuipondash Esusĕn.

Abi unĕste Esusĕn padpiden chuioid

(Mad 10.32-34; Duc 18.31-34)

¹⁷ Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquoio icquin abĕd icquido 12tedi icquid chuinuen uanotantsĕcquin buampondashi.

¹⁸ Buanshun chuipondashi naden: —Edusaden yacno nidacsho Nuquin Papan matsesmi-aid icsho ĕbi chieshĕnquido ĕbi bedmendac. Nĕish yua abided unĕs uaquido chuiquid dapabobĕdtan Moisesĕn dada uampid chuibanquidon ĕbi bedshun: “Ma unĕs uamenu,” qeshun

¹⁹ matses utsibo isadaidpembo ĕbi bedmendac. Aden bedmiac matses utsibon mamĕnshunquin ĕbi cueshcaten comapenen cueshcaindac. Adshumbic ĕbi unĕs uanuen cuesten dectanendac. Aden unĕs uaqui daĕdec ushash uincuenendabi —quequin Esusĕn abi unĕs uate padpiden chuiopondashi.

Uanĕn titan chiaid

(Mad 10.35-45)

²⁰ Adnubien Sebedeyon chido Uanĕn titan Esus chuituidpondash. Uambĕdta Acobo aton mado daĕdi bĕshun ismequin danĕshĕn sebudtanquin chuipondash. —Ĕmbi chiacpadomboen ĕbi nashunta, Icbo —caquin:

²¹ —¿Atotsi cai? —capondash Esusën. Adoaquien: —Nëid con mado daëdi nec. Abitedishun icbo icquin mibëdtan chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusën:

²² —Ëmbi naid tantienquo icquin mimbi chuipec —quequin ani chuishumbic Uanbëdta Acobo Esusën chuipondash. —¿Ada ëbi mëyadacpadquiecbidi mëyadtsia? ¿Ada chieshtoenquo icpatsia? —caquien Uan: —Ai, chieshtoenquo ictsiabi. Mibëd mëyadtsiabi —quepondash.

²³ Adsho tantiashien: —Ai, ëbi tantiaquid yec mibi mëyadendac. Padnuembi ëbëdtan chuiquid dapa icmequin mibi ëbi datsadmetiapimbo iquec. Nuquin Papambien ambi tantiapadomboen ëbëdtan chuiquid dapa icmendac —quequin Esusën chuipondash.

²⁴ Adnubimbi: —Chuiquid dapa ëbi icme —Esus casho tantiashun Uan chedo nëishëmpondac.

²⁵ Adsho Esusën ëbitedi chuipondash. —¿Mitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuëdquin aton uyabon badedi naic.

²⁶ Èbi tantiaquido icquin mimbi adoenquo iquendac. “Bëdambo mibi iquec,” Nuquin Papa cametiadquo icquin utsibo tantiaquin mimbi utsibo nashuntsiac.

²⁷ Bëdambo icquid ictiadquo icquin yuan aton icbo nashunacimboen mimbi utsibo nashuntsiac.

²⁸ Ademibidi Nuquin Papan matsesmiaid icquin matses nashunquid nebi. Ancainquo icquin matses tantiaquin Nuquin Papa icsaquidobi cuidmenquo icnuec ëbided cuidadec unësendabi —quequin Esusën abëd icquido chuipondash.

*Bëshuaid daëd Esusën bëdamiaid
(Mad 10.46-52; Duc 18.35-43)*

²⁹ Adashic yuecquo ictanec shubu dadpen icquid Edico caid yacno tabadash auëshquiobi Esus nidpondash. Adsho isanec nidquin matses dadpenshun Esus tsibanampondash.

³⁰ Adnubien aid podquec cuëman bëshuaid dada daëd tsadpondash. —Esus cuenec —quesho tantiashien aid daëdi comapenec cuëdpondash. —Tsusedpa Dabidën tsyuecquid Nuquin Papan namiaidquo icquin ëbi bëdamboen ista, Icbo —quepondash Esus caic.

³¹ Adsho tantiashun matses dadpenshun chushcapondash. —Padi. Chën. Adec cuëdec chieshanquiec mibi iqueque —caquien abi niacbidanec buëdanquiec cuëdpondash. —Tsusedpa Dabidën tsyuecquid Nuquin Papan namiaidquo icquin ëbi bëdamboen ista, Icbo —queopondash.

³² Adoaquien Esusën nidtuidshun ëcbedpondash. —¿Atotsi chuinuec ne? —caquien:

³³ —Isbente bunquiebi, Icbo —quepondash.

³⁴ Adsho tantiash: —Unësquo iquec —quetanquin Esusën bëshuaid daëdi bëmishpondash. Adoac abi daëdi bëdampondash. Bëdانشun aidëntsen Esus tsibanampondash bëshuacboedëmbi.

Edusaden yacnoshon chuiquid dapabimboecnuc Esus bëdamboen isaid

21

*Edusaden yacnoshon chuiquid dapabimboecnuc Esus bëdamboen isaid
(Mad 11.1-11; Duc 19.28-40; Uan 12.12-19)*

¹ Adanec nidequi shubu dadpen icquid Edusaden caid anoentsëqui macuësh dapa Odibos caid poctse shubu daëdpactsëcquid Bedpaque caid yacno Esus nidpondash. Adshumbic anoentsëqui choshon abëd icquido daëd chuipondash.

² —Nëid podquedën nidquin shubu daëdpactsëc yacno nidshun cabayobitsecquid aton bacuë caniatsecbëdta mimbi badedquo istuidendac. Istuidshun tënëshaid tëdiadsho tëchicta.

³ Mimbi tëchichso isquidën: —¿Atotsi acnun nai? —cac: —Nuquin Icbo: “‘Bedtan,’ quiosh,” mimbi cac: “Ai, buantan,” quendac —quequin Esusën chuipondash.

⁴ Ambi Esusën nate chiaid Nuquin Papan con tsusedpa dada uamiampicpadomboen nanuen Esusën adopondash. Naden dada uapampic.

⁵ “Shubu dadpen icquid Sion caidën tabadquido chui. Edusaden cain Sion capec.

‘Is. Mibi chuiquid dapa cabayobitsecquidën bacuë caniatseëc catsadtoash choeque. Ancanenquo yec bëdamboshë icquidquo neque. Is,’ quequin chui,” quequin dada uapampic.

⁶ Aden dada uampicpadomboen ambi: —Bedtan —caidon bedtampondash.

⁷ Adotanquin cabayobitsecquid anibëdta caniatseëc bëacshobimbi con dashcute bëntse dasiuidboed chictanquin casanondac. Aden ëmbi cabayobitsecquid casansho isash caniatseëquën Esus catsadtopondash.

⁸ Adanec nidsho istanquin matses dadpeshun aton dashcute abi dasiuidaid bëntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec — qeshun.

⁹ Matses dadpen bëyuc nidnubi aidtedbidi tsyuec nidpondash. Abitedi cuëdënidpondash. “Adeduya. Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec.

Nuquin Papan chomiaid yec mibi bëdamboshë iquec.

Mibi chomequid Nuquin Papatsen bëdamboshë iquec. Adeduya,”

quec cuëdëncuededpondash.

¹⁰ Adec Edusaden yacno matses dadpenquo cuëdënidec nidsho isashien Edusaden yacnocquido: —¿Ttsutsi tantiec cuëdëncuededpec? —quepondash.

¹¹ Adsho tantiashun Esusbëd nidquido: —Esusquo tantiec nec. Nuquin nidaid cuëshë Cadidia caidën shubu dadpen icquid Nasaded caid yacnuësh caniondaid Nuquin Papan chiaidquo chuiquid Esus tantiec nec —quepondash.

Esusën chushcaquin cuemiaid

(Mad 11.15-19; Duc 19.45-48; Uan 2.13-22)

¹² Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquo puduedenquo yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunqimbi muaquin piucquid utsi daëdpactsëc menequid icnubi utsi-utsiec: —Nëid bedquidën: “Ma Nuquin Papan ëbi bëdamboen isnu,” qeshun pichicametsiash —quequin aton nëish yua menequin piucquid dadpenquo bedquid nepondash. Adsho istanquin Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin.

¹³ —¿Adenda mimbi Nuquin Papan chiaid bëdamboen nape? Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,”

quequin Nuquin Papan chiaicpadomboen aton shubun puduedshun aid chianetiadquidi mimbi adoenquo iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

¹⁴ Adnubien Nuquin Papa tabadte shubu uashunaid yacno bëshuaid yec daicsaid yec quenec bë-bëpondash. Aden bë-bëshobien Esusën bëdamepondash.

¹⁵ Adsho isashien Esus chieshënquido nëishpondash. Adec nëish yua abided unës uaquido chuiquid dapabobëd Moisesën dada uampid chuibanquido nëishpondash. Adec comapenen tantiaquin Esusën nabansho isash nëishboedi bacuëbotsen: —Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec —quec Esus caic cuëdëncuededsho tantiash nëishquipondash.

¹⁶ Adshumbic: —Icsambo iquec —qeshun Esus chuituidec: —¿Ada bacuëbo cuëdënsho tantio? —caquien: —Ai, tantiombi. ¿Nuquin Papan chiaid isabida ictio? Naden bacuëbo cuëdënte chuiampic.

“Nuquin Papan oncamiac bacuëmpin aton bacuë utsibëdtan:

‘Nuquin Papa bëdambo iquec,’ caindac.”

quequin chuiampic —quepondash Esus.

¹⁷ Adanec nidec shubu dadpen icquid Betania yacno nidash ushtuidpondash.

Esusën cuëte unës uaid

(Mad 11.12-14, 20-26)

¹⁸ Badiadnubi ënden aubidi nidoaic Edusaden yacnobidi nidoapondash. Piabi nidec bundoshon

¹⁹ podqued cuëman nidquid cuëtempi icueda caid istuidash: —¿Ada bacuëaye? Chenun isbono —quepondash Esus. Adshun isquien bacuë nibëdec. Podouidquo icpec. Adsho isumbien Esusën: —Adequi bacuëesambo yec unësta —capondash. Adoac badedquo unëspondash.

²⁰ Adosho isun abëd icquidon: —¿Atotsi quiash badedquo unësposh? —caquien

²¹ Esusën: —Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenquo icquin: “Nuquin Papan ambi chiaicpadomboen naquidquo nec,” qeshun mimbi Nuquin Papa chianesho aidëmbi mimbi: “Natiapimbo iquec,” caidi mibi nametsiash. Aden tantiaquin mimbi nëid macuësh cain: “Mananuc tabadoedi adquiecbidi acte nantan tabadoata,” mimbi cac nëid macuësh acte nantan tabadoatsiash.

²² “Ambi chiacpadomboen naquidquo Nuquin Papa nec,” qeshun mimbi aid chianiac mimbi chiaid Nuquin Papan mibi nashuntsiash –quequin Esusën abéd icquido chuipondash.

¿Tsuntsin: Naic nid, cac nai? quequin Esus chuimiai
(Mad 11.27-33; Duc 20.1-8)

²³ Adcuidanec Edusaden yacno padpidec nidshun Nuquin Papa tabadte shubu uashunaid daquënë uaidën puduedshun Esusën Nuquin Papan chiaid chuipondash. Adsho tantiashun con matses tsusiobon Esus chieshënquidon chuituidpondash. –¿Tsuntsin: “Naic nid,” cac nai? En chui. Tiantianu –caquien

²⁴ Esusën: –En mimbia chui. Ĕmbia tiantianu. Mimbi chuisho tantiashun ëbi namequidt-sen chuinu.

²⁵ ¿Tsuntsin namiac Uan padon acten mentopadenec? ¿Ambembida napadenec? –capondash Esusën. Adoaquien badedquio chienquio yec uanotantsec tabadec onquecued-edpondash Esus chieshënquido. –¿Atotsi nuqui chuipeba? “Nuquin Papan namiaidquio Uan pado nepadenec,” cac Esusën: “¿Atotsieshun aidën chiacpadomboen nainquio ique?” canushe. Aden chienquien ictiad.

²⁶ Nuqui: “Ambembi napondash,” qesho tantiashun nēmbo icquidon nēishënushe: “Nuquin Papan namiaid Uan pado niondash,” qeshun. Aden chienquien ictiad –quepac caondash Esus chieshënquido. Isadaidbo tsusiobobëdi nēish abided unēs uaquido chuiquid dapabo adpac caondash.

²⁷ Adashien Esus padpiden chuioaic: –Tsaudi. ¿Tsundan chiaquien nachitondash? –qeshoben: –Mimbi chienquio icsho tantiashun ĩmbitsen ëbi namequid chienquio iquemi –capondash Esusën abi chieshënquido cuidquin chuiquin.

Mado daëdshun nachimboecquido chiaid

²⁸ Adshumbic Esusën padpiden chuipondash. –Tantia. Mibi chuinu. Ĕmbi chiaid tantiashun ¿mitsicquid: “Bëdambo iquec,” catsia? Dada aton mado daëdpambo icquid icpac caondash. Abentsëc chuiquin: “Neshcaic nid, mado,” cac:

²⁹ “Padi,” quec chieshuidboedi yuec-yuecpactsëctanec: “Tiedimbi neshcatanchitec,” quiaish neshcaic nidac caondash.

³⁰ Adshumbic amën aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquio icpac caondash.

³¹ ¿Mitsicquidën aton papan chiacpadomboen napac caondash? En chui. Tiantianu –caquien Esus chieshënquido: –Abia chiac chieshuidboedën –quesho tantiashumbien Esusën: –Adquidpenquien mibi nec. Mibi tantiatiapimbo yec tabadnubi mimbi icsambo caido Nuquin Papa yacno puduednec. Chieshuidacimboecquid aido nec. Aton matses piucquid bedshundenedo yec aton piucquid bednuen dada chudmeboedo chido yec quequin Nuquin Papa tantiabenash abéd tabadtequido yanendac. Mibien padenquio iquec.

³² Uan pado acten mentoandenedën Nuquin Papan chiaid chuiquin bëdamboec tabadte chuipadenec. Adsho mimbi tantienquio icnubi mimbi icsambo caidombi Nuquin Papa tantiabempondash. Adsho isun Uan padon chiacpadomboen mibi icsaid ëntiadquidi mimbi ënenquio iccondac. Aton papan chiaid niacquidbimboecquid mibi nec –quepondash Esus abi chieshënquido chiech.

Abi chieshënquido icsaid Esusën chuioaid
(Mad 12.1-12; Duc 20.9-19)

³³ Adshumbic Esusën abi chieshënquido ompoacimboen chuipondash naden. –Tied icbon chetequid nidtsinac caondash. Adoshombic aid tied daquënë uatanquimbic chetequid chintetsen nacenmpac caondash. Adoshombic: “Ampequid chosho isnu,” qeshun shubu abucquio icnuc shubu uapac caondash. Adoshombic: “Nëid tiedën caniquid chetequid iquec. Aid chequin ëbi neshcashunta,” utsibo canec ënapen nidpac caondash.

³⁴ Adash yuectaneshumbien abéd nidondaïdo aton yuabo chuiquin: “Nëen chetequid sinashe. Bedtan,” cac aton yuabo nidanepac caondash.

³⁵ Adec aton icbon tiedno nidaniacshobien neshcaquidon cudasënquin chieshëmpac caondash. Abentsëc cuesunetanquin utsi cuënoten seshunequiopac caondash. Utsibic cuesquin cuemepac caondash.

³⁶ Aden cuemiaid choshon chuituidaquien icbon nidboedtedpenquio dadpenquio aton yua utsibo chuipac caondash. “Bedtan,” cac nidanec tiedno choacsho isun ademibidi cuesun siapac caondash.

³⁷ Adoacsho tantiash aton madombo caic: “Bedtan,” quepac caondash. “Con mado cuesunenquo icquin ěmbi chetequid menetsiash,” qeshun aton madotsen nidmepac caondash

³⁸ Adoac nidec aton papan tiedno choacsho chetequid cudasquidon: “Tied icbo uněsan aiděn natedi aton madon bedtsiash. Něbien aton mado cuesunetiad. Aid nibědnuc icbo uněsan aiděn natedi nuquin nabi ictsiash,” qeshun

³⁹ tied tsitsuno buanshun cuesunepac caondash –quequin Esusěn chuipondash.

⁴⁰ Adshumbic ambi chuiboedquo abi datsidadquido chuimenuen chuipondash. –Ěmbi chuiboed tantiash ĵatotsi mibi quepatsia? “Min mado cuesuniaccosh,” cac ĵatotsi tied icbon napatsiash? –quesho

⁴¹ tantiash datsidadquido: –Aido icsamboshě icsho comapenen cuidtsiash. Adshumbic ambi chetequid sinacsho abi cudasěnesambo utsibo aton tied neshcametsiash –quecuededpondash datsidadquido.

⁴² Adsho tantiashun Esusěn: –Ai, abimbo caic. Adembidi ambi chomiaid chieshěnsho Nuquin Papan mibi cuidendac. ĵNuquin Papan chiaid isabida ictio? Naden chiampid ma mimbi ispaboc.

“Buintad bědambo icquid istuidashi: ‘Něidquo shubu uanun nitsinemi,’ quetiadquidi isuidacimboen Nuquin Papan namiaid chieshěnac.

Aden buintad isuidaid utsin bedshun shubu uanun nitsinacimboen Nuquin Papan tantiamicpadomboen utsibon ambi namiaid tantiosh.

Adsho isun: ‘Nuquin Papan namiaid bědambo iquec,’ caimbi,” quequin dada uapampic.

⁴³ Aden ambi namiaid ěbi chieshěnsho isash mibi caic Nuquin Papa nadpec. “Ěmbi con matses caid isadaidbo ěbi bědamboen tantiametiadquidi chuiquid dapabon namenquo icsho isun utsibotsen: ‘Ěbi chuiquid icta,’ caindambi,” quepec Nuquin Papa. Aden ambi chiapadquiděn bědamboen chuibanac abi tantiaquido dadpen yanendac.

⁴⁴ Mibien Nuquin Papan cuidtequido nec. Cuěte uebudquin catashac canite uesadec podquěd-podquědacimboecnuc mibi comapenen cuidendac –quepondash Esus abi chieshěnquido chiec.

⁴⁵ Adsho tantiashun padiseyobobědtan něish abided uněs uaquido chuiquid dapabon: –Nuquien cachitec –quequin tantiabempanědash.

⁴⁶ Adshumbic Esus cuesunemenuen bedtiadquo icquimbi bedenquo icpanědash. –Abi datsidadquidon: “Nuquin Papan chiaid chuibanquidquo Esus nec,” qeshun Esus bedsho isun nuqui cuesnushe –qeshun aton matses dacuěděnquin bedenquo icpanědash.

22

Cacuidanaid chiaid (Duc 14.15-24)

¹ Adshumbic Esusěn padpiden ompoachimboembidi chuipondash naden.

² –Tantia. Isadaidbon nacpadomboen aton mado chido bednuesho tantiashun aměn matses dadpen: “Pec cho,” cauidaidd mibi chuinu.

³ Chuiquid dapan aton yuabo chuiquin: “ ‘Con icbon madon chido bedequē. Aidběd cuishonquenuen pec cho,’ quequin ěmbi tantiaidotedi chuitan,” cac yuabon chuitanaqui choenquo icpac caondash.

⁴ Adsho isumbien chuiquid dapan aton yua utsibo chuiquin: “Něish nua běchichoquidquido dadpen codoquiacoshe. Padpiden chuitan,” cac chuitanoaqui

⁵ choenquibidi icpac caondash. Adec cacuidanquieac abentsěc aton tied nantan nidnubi utsi piucquid bednuequin ambi aton na menebante shubuno nidpac caondash.

⁶ Utsimbic abi: “Pec cho,” cashobi yuabo měyanquin cuesun secapac caondash.

⁷ Adoshobien chuiquid dapan něishtanquin shěpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin něděncapac caondash.

⁸ Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Utsibo chuitan.

⁹ Ěmbi: ‘Pec cho,’ cacmaidobi chuibenetan. Podquěděn nidquin mimbi istuidaidtedi: ‘Pec cho,’ cabenetan,” cac nidshun

¹⁰ ambi istuidaidtedi chuibenetanac matses dadpenquo pec cho-chopac caondash. Icsambo icquidobědi bědambo icquido cho-choash chuiquid dapan shubun puduedash pec tabadte quěně dapan tabadcuēdedpac caondash tsucus-tsucustsěcquo yec.

¹¹ Adshun chuiquid dapantsen puduedshun isquien dashcute bědaidquo dasiuidabi icquid abentsěc tsadtsec.

¹² Adshobien chuiquid dapan: “¿Atotsi quiash dashcute bédaidquio dasiuidambobi cho, buchi?” caqui écbedenquio yec tsadec.

¹³ Adshobien chuiquid dapan: “ ‘Chido bedacno isnuec dashcute bédaidquio dasiuidquid,’ quepadenec. Mibi icsambo iqueque. Mibi cuidnu,” qeshun aton yuabo chiec: “Shëbunshun buanshun icsano netan,” capac caondash. Adoac taneshun netanac mëyadquiec natiac shubiquiopac caondash.

¹⁴ Adembidi Nuquin Papan ambi matses bédamboen iste dadpen tantiamiaqui utsin-utsinquien tantienquio iquendac. “Abi yacno puduednu,” queuidboedi bédambo icte bunenquio yec abi tantiatipimbo icsho Nuquin Papan comapenen cuidendac. Utsi daédpactëquien Nuquin Papan tantiacpadec abéd tabadtequid iquendac —quequin Esusën chuipondash.

Chuiquid dapa piucquid menete chiaid

(Mad 12.13-17; Duc 20.20-26)

¹⁵ Adsho tantianec nidash abi chieshënquido padiseyobo: —Esus icsamboen chuimenuna. Icsamboen chuisho tantianshun bedshun unës uamechitono —qeshun ambi chuibanquin tantiamiaido chuipac caondash.

¹⁶ —Icsamboen chuimetan —caquien chuiquid dapa Edodes caid tantiaquidobédtan icsamboen chuimenuc cho-choshon chuituidpondash. —Bédamboen chuiquid mibi neque. En ébi chui. Tantianu. Muesambo icquin Nuquin Papan chiapadec bédamboec tabadte mibi abimbo chuihoc. Matses dacuédënenquio icquin Nuquin Papan chiaidquio mibi chuihoc.

¹⁷ Adquid icquin ¿atotsi mibi chuipe? Tantianu. Chui. Nuquin matses yuaquid chuiquid dapa Sesad caidën: “Piucquid shocoshëmpi dadpen beccho,” cac nuqui meniac ¿ada bédambo icpatsiash? —capondash.

¹⁸ Adoquien Esusën ambembi tantianshun: —Bédambo icquid damianquiec mibi muambo nec. ¿Atotsieshun ébi icsamboen chuimetiadquio ique? —quetanquin:

¹⁹ —Chuiquid dapa menetequid piucquid shocoshëmpi beccho —ambi cac

²⁰ bësho bedshun Esusën chuipondash. —¿Në tsutsibimboecnuc dada uaid në iquec? ¿Tsutsi cuëmédquidbédta dada uac? En chui. Tantianu —caquien:

²¹ —Ma nuqui yuaquid chuiquid dapanbo Sesad neyoc —quepondash. Adsho tantianshambien Esusën: —Abibimboecnuc dada uaid abi cuëmédquid dada uaid bedtequid shocosh icnu Sesadën na neque. Icbon: “Beccho,” cac meneta. Adecbidi Nuquin Papa nuquin Icbombo neque. Aidën chiapadomboen nabanta —quequin Esusën bédamboen chuipondash.

²² Adsho tantiansh icsamboen chuimetiadquio icboedi: —Bédamboen chuipec —quetanec nidanepondash.

Matses uincuemete chiaid

(Mad 12.18-27; Duc 20.27-40)

²³ Adnubien aid ushëmbi Saduseyobo: —Matses unësaid uincuenesambo nec —quequidotsen: —Esus icsamboen chuimenu —quec cho-chopondash.

²⁴ —Bédamboen chuiquidquio mibi neque. Mibi chuisho tantianu. ¿Mitsipaden mibi chuiatsia? Nuquin tsusedpa Moisesën naden chuiquin dada uapampic. “Aton chido bedash bacuë tishmiabi unësacsho aton utsin aid chido bedshun: ‘Con buchin bacuëbo nibèdeque. Con buchin madobimboecnuc tishmenu,’ quequin tishmequid,” quequin Moisesën dada uapampic.

²⁵ Aid tantiaquin chuinu. Dada aton utsibobéd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi tsibanquidën aidën chido bedash

²⁶ bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënquien aton buchi unësan-unësanquien aid chidoudi beduid-beduidpac caondash. Bacuë tishmiabi-tishmiabiec abitedi unësbudnepac caondash.

²⁷ Adashic bacuë tishambobi aid chidotsen unëspac caondash.

²⁸ Aid abitedi uincuemiac ¿mitsicquidën chido icpatsiash? —caquien

²⁹ Esusën: —Nuquin Papan chiaidquio tantienquio icquin Nuquin Papan nadatiambo icquin nabanquin uincuemete mibi tantienquio iqueque. Chuinu. Tantia.

³⁰ Uincuemiac dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bédabobimboec matses uincuemiaido iquendac. Aden uincuemiaidën chido bedesa —quepondash Esus.

³¹ Adshumbic padpiden chuipondash. —Ambi unësaid uincuemete chuiquin Nuquin Papan dada uamepampid ¿isbanabida ictio? Ma mibi aid isbampaboc.

³² Naden dada uapampic. “Abadauan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimbi danec. Unësash aton dada chodquiambic aton tantiate unësambo icnuc abi Nuquin Papa tantiatsiash –quepondash Esus.

³³ Adsho tantiash abi datsidadquido: –¿Mitsipadquid nepec? Bëdamboenshëen chuipec –quepondash.

*Moisesën dada uampid chiaid
(Mad 12.28-34)*

³⁴ Aden unësaid uincuemete chuisho tantiashumbien Saduseyobon padpiden: –En chui –cainquio icpondash. Adsho isashien Esus chieshënquid utsibo Padiseyobo: –Nuquin Papan chiaid Esus icsamboen chuimenu. Nid –quianec Esus chuimec cho-chopondash.

³⁵ Cho-choquin abentsëcshun Nuquin Papan Moises dada uamiampid tantiaquidquido icquin chuimetuidpondash.

³⁶ –Chuiquidquido mibi neque. En ëbi chui. Tiantianu. Nuquin tsusedpa Moisesën dada uaquin dadpen chiampic. ¿Mitsicquid abentsëc ëmbi nasho Nuquin Papan: “Bëdamboshë iquec,” capatsiash? –caquien

³⁷ Esus: –“Nuquin Papa tantiaquieci ambi chiacpadec tabadte bunquiota,” quequin

³⁸ chiampidba naic Nuquin Papan chiacpadec mibi bëdamboec tabadtsiandac.

³⁹ Adembidi Moisesën chiampid utsitsen naic matses bëdamboec tabadtsiash. “Min dada mibibi datantiadacimboen utsibotsen tantiaquiota,” quequin chiampicpadomboen nasho Nuquin Papan bëdambo catsiash.

⁴⁰ Aden matses bëdamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic –quequin Esusën bëdamboen chuipondash abi chieshënquido chuiquin.

*Nuquin Papan chomiaidquido chiaid
(Mad 12.35-37; Duc 20.41-44)*

⁴¹ Adshumbic Esusëntsen abi icsamboen chuimete bunquido Padiseyobo chuipondash.

⁴² –Ëmbitsen mibi chuimenu. Tantia. Nuquin Papan chomiaid ¿mitsipadquid nec? ¿Matsesën madouidida nepec? –capondash Esusën abibi cadquimbi. Adoquien badedi: –Nuquin tsusedpa yampid Dabidën tsyuecquid icsho Dabidën mado caimbi –quepondash Padiseyobo.

⁴³ Adsho tantiashumbien Esusën: –¿Bëdamboenda chuidio? Mimbi chiacpadquid aton mado icsho ¿atotsieshshun Nuquin Papan Mayanën tantiamiacpadomboen Dabidën con Icho capampic? Naden Dabidën dada uapampic.

⁴⁴ “Nuquin Papan con Icho naden chiendac.

‘Con abiuc tsadash abitedishun Icbombo icnush nëmbo cho.

Mibi chieshënquidobi con Icho mibi camenu,’ quequin Nuquin Papan con Icho chiendac,” quequin Dabidën dada uapampic.

⁴⁵ Con mado cainquio icquin con Icho capampic Dabidën. ¿Atotsieshshun mimbi: “Dabidën mado nec,” quequin tantiap? –caquien

⁴⁶ ëcbedenquio yec otacquio tabadpondash. Esusën bëdamboen chuisho tantiash: –Icsamboen chienquien icchitec. Ëmbi padpiden: “Icsamboen chuimenu,” cac bëdamboembidi chuiotsiash –qeshun abi chieshënquido abitedishun Esus padpiden chuimenquio icquin ënaccondash.

23

*Bëdambo icquid damianquido tanenda, quiaid
(Mad 12.38-39; Duc 11.43, 46; 20.46)*

¹ Adshumbic Esusën abëd icquidobëdta abi datsidadquido tantiamequin chuipondash.

² –Tantia. Moisesën dada uampid chuibanquidobëdta tsusedpabon chiampid namequido Padiseyobon naid mibi chuinu. Aidon: “Moisesën chiampicpadomboen nata,” quequin nuquin matses isadaidbo chuidenepec.

³ Aden Moisesën dada uampid abimbo chiac adenuidi mimbi nac bëdambo ictsiash. Aden naquin padiseyobon nacpadomboen nainda. Aidon Moisesën chiampid chuiquimbi ambibi aidën chiaid niac-niaquec.

⁴ Chieshëmënquido nec. Nuquin Papan chiaid nametiadquidëmbi tsusedpabon ambembi chiaid dadpenquio namepec chushcanquin. “Matsesën aidtedi natiapimbo iquec. Padi icnuna. Nuquin matsesën chiampidtedi nainda,” catiadquidi adoenquio iquec.

⁵ Aden padiseyobon Nuquin Papa tantiaquidquido damequin matses ismenuenuidi naic. Nuquin Papan chiaid dada uaidëmpi sauedtsash bëdectamëdec abiuc daëdi pëdectamëdec

queshun matses ismenuuidi naic. Adembidi aton dashcute tēdiadte nacnuequ: “Nuquin Papa chianequidquo nec,” ma ēbi canu,” qeshun sedquid shoyonaid ēnapenpactsēcnuc cuiddicash matses ismenuec matses tabadacno capucuenep. Adec Nuquin Papa chianequid damianquie.

⁶ “Chuiquid dapa nec,” cameteuidi bunec. Isedec puduedash: “Chuiquid dapa icsho ichon abēdi tsadmequid,” quiash icbobēdi tsadte bunquie. Nuquin Papan chiaid chuibante shubun puduedash: “Tsiusio dapambo nec,” camenuc utsibobēd tabadenquio yec tsusiobobēduidi tabadquid nec.

⁷ “Chuiquidquo yec mibi bēdambo iquec,” camete bunquie matses dadpen tabadacno nidtenepec.

⁸ Mibitsen adenda. Utsibo: “Mibiuidtsēqui bēdambo iquec, Icho,” camenuc adenda. Min Icho abentsēcquiobi ēbi iquec. Ēbi abentsēqui con Icho cata. Con yuabo yec con utsibo mibi neque. Bēdamboec isnanta.

⁹ Adembidi mibi chuibanquid chuiquimbi: “Mibiuidtsēqui bēdambo iquec, Papa,” cainda. Nuquin Papauidtsēqui aden chuita.

¹⁰ Adembidi: “Chuiquid dapa yec mibiuidtsēqui bēdambo iquec,” utsibo camenuuidi nainda. Ēbiuidtsēqui mibi chuiquid dapa nec. Nuquin Papa yacnuēshquio choquid ēbipadquidquo utsi nibēdec.

¹¹ Padnuen ambi chiapadomboen utsibo nashunquidquo utsibo dēniacte bunenquio icquid Nuquin Papan bēdamboshē catsiash.

¹² Utsien abibi cadequi: “Ēbiuidtsēqui bēdambo iquec,” quequin utsibo ismenuuidi naquido Nuquin Papan icsambo catsiash. Utsibic Nuquin Papan chiapadomboen naquin utsibo nashunquid yec utsibo ismeteuidi bunenquio icsho Nuquin Papan bēdambo caindac –quepondash Esus abi datsidadaido chie.

Abi chieshēnquido Esusēn chushcaid
(Mad 12.40; Duc 11.39-45, 52; 20.47)

¹³ Adshumbic abi chieshēnquidotsen chuipondash. –Tantia. Moisesēn chiampid chuibanquidobēda Padiseyobo mibi chuinu. Nuquin Papan cuidtequidombo mibi nec. Bēdambo icquid damianquie mibi icsambo iquec. Nuquin matses: “Nuquin Papabēd tabadte tantianu,” qeshobi mimbi bēdamboen chienquio iquec. Ēmbi Nuquin Papabēd tabadte bēdamboen chuisho mimbi tantienquio iquec. Aden tantienquio icquin: “Aidēn chiaid tantienda,” quequin mimbi utsibotsen Nuquin Papabēd tabadte tantiametiapimbo iquec.

¹⁴ Nuquin Papan cuidtequido mibi nec. Muaquin unēsboedēn niantie piucquid bedshunquido mibi nec. Nuquin Papa tantiaquidquo damenuen utsibo tantiamequinuidi buēdpambo cuēdquin Nuquin Papa chiachimboen mimbi chianepec. Aid abimbo mimbi chienquio iquec. Adec chieshanquiesho isun Nuquin Papan mibi comapenen cuidendac.

¹⁵ Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenec. Nidaid utsi-utsiec yacno nidshun mimbi chuibenesho tantiaquido mimbi tantiacpadquio yanash Satanasēn yuambo yanec Nuquin Papan cuidtequidombo iquendac.

¹⁶ Nuquin Papan cuidtequido mibi nec. Isadaidbo chuiquid icquin bēdamboen tantiamenquien mimbi icchitec. “Nuquin Papa utsi uatiapimbo yacpaden abimbo caimbi,” quequid muaisa nec. Muaquidēn Nuquin Papan chiaid niacquid,” quetiadquidi mibi adenquio iccoc. “Nuquin Papa tabadte shubu uashunaid utsi uatiapimbo yacpaden abimbo chiombi,” quequid muasa nec,” quetiadquidi mibi adenquio iccoc. Padenquio yec: “Nuquin Papa tabadte shubu uashunaid dapan icquid shocosh piu nacnenaidquio utsi uatiapimbo yacpaden abimbo chiombi,” quequid muasa nec,” quechitequien mibi iquec.

¹⁷ Aden tantienquio icquin mimbi icsamboen chie. Nuquin Papa tabadte shubu uashunaid Nuquin Papa tabadtequid yec bēdāpenquioda icpec? “Aid bēdamboshē icnubi aid nuntan icquid bēdiactēc bēdambo iquec,” caimbi. Mimbien icsamboen tantiec.

¹⁸ Nadentsen mimbi icsamboen chie. “Nuquin Papa tabadte shubu uashunaid dapa yacnoshon: Mabi Nuquin Papan bēdamboen isnu, quequin nēish pichicate nacnenaid dapa utsi uatiapimbo yacpaden abimbo caimbi,” quequid muasa nec,” quetiadquidi mibi adenquio iccoc. “Nuquin Papa mabi bēdamboen isnuenquien pichicatequid nēish utsi uatiapimbo yacpaden abimbo caimbi,” quequid muasa nec,” mibi quepec.

¹⁹ ¿Adenda mimbi bēdamboen chuipe? Pashuacimboen mimbi bēdamboen tantienquio iquec. ¿Mitsicquid bēdambo iquec? “Mabi Nuquin Papan bēdamboen isnu,” quequin nēish pichicate nacnenaid dapa bēdambo icnu aidēn pichicatequidi nēishquio bēdapabi ictec. Nuquin Papamboen bēdamboshē iquec.

²⁰ Nèish pichicate nacnenaïd caic: “Aïd utsi uatiapimbo yacpaden abimbo caimbi,” quequin aïd nantequïd nèish abitedi chiaïdbidi nec. Adembidi ambi: “Mabi bédamboen isnu,” caïd Nuquin Papatsen chuipec.

²¹ Adembidi Nuquin Papa tabadte shubu uashunaïd caic: “Aïd utsi uatiapimbo yacpaden abimbo caimbi,” quequin ambo tabadquïd Nuquin Papatsen mimbi chiec.

²² Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaïdtsen chiec. Nuquin Papa tsadaïd cain Nuquin Papambo chiec. Aïdèn chiaïdquïo tantiec: “Abimbo cacbimboen chuiquïd icsaquïd nec,” quetiadquïdi mibi adenquïo iccoc.

²³ Bédambo icquïd damianquïd yec Nuquin Papan cuïdtequïdo mibi nec. Nuquin Papan chiaïd abentsèquï tantiatseçquï min tiedèn canitseçquïd musuquèmpi bedshun Nuquin Papa mimbi menepec. Aden menequïd icquïmibi mimbi Nuquin Papan chiaïd utsi dadpen niac-niacpec. Chieshèmianquïd icboedi: “Èbi bédamboen ista,” quesho bédamboen istiapimbo mibi iquec. Adembidi bédambo icquïdi muauaquïn mimbi tsusio icsamboen cuïdmeç. Adembidi mimbi Nuquin Papa abimbo tantienquïo iquec. Aden mimbi Nuquin Papan chiaïd niac-niacpec. Ambi chiacpadomboen Nuquin Papa menequïd icquïmibi ambi chiaïd utsi abitedi natiadquïdi ma mimbi nainquïo icpaboc.

²⁴ Tantesa uatsèquïmibi mimbi utsibo icsamboen chiec. Manuampi nibedbantsèquïmibi utsi nuacquïd nibedquïabi abi nèsamèdpanumbobi acacbimboembien mimbi nachiteç. “Nuquin Papa meneta,” quequin chiaïduïdtsèquï natsècshun adenuïdtsèquï mimbi utsibo namepec. Adenuïdtsèquï namequïmibi Nuquin Papan chiaïd utsien mimbi niac-niacchiteç.

²⁵ Nuquin Papan cuïdtequïdo mibi nec. Padiseyobo yec Moisesèn dada uapampid chuïbanquïdo yec quequïmibi mimbi icsamboen naic. Pada-padaïdbèdta dèshote chieshquin cachocuidtsèquï dapanshun anauc ampanambo icquïdi ampanaïd damianacbimboec mibi bédamboec tabadquïd damianquïec. Nuquin Papan chiaïd dadpen nainquïo icquin mitsanauidi bednuen mibi bunaiduidi mimbi napeç.

²⁶ Pamumèdacbimboec tantiatiapimbo mibi iquec. Dèshote abichobi bédamboen ampanacbimboec icsaïd ucudash bédambo icta. Adèç icsainquïo yec ènèdash Nuquin Papan chiacpadec mibi bédamboec tabadtsiac.

²⁷ Bédamboec tabadquïdo mimbi damesho isun Nuquin Papan mibi cuïdendac. Unèsaid chococacno bédamboen nacnenac bédambo isadec ènden pisenambi.

²⁸ Adembidi bédamboec tabadquïd mimbi dameç. Matses ismeç bédamboec tabadshumbic omposhon Nuquin Papan chiaïd niac-niacquin mimbi natemaidien mimbi nachiteç.

*Padiseyobo chedo cuïdte chiaïd
(Duc 11.47-51)*

²⁹ Nuquin Papan cuïdtequïdombo mibi nec. Nuquin Papan oncamiaïdobèdta bédamboec tabadquïdo nuquin tsusedpabon unès uampido tantiaquin aïdo chococampicno shubu uaqin mimbi nacnempec.

³⁰ Adoshombic: “Nèmo con tsusedpabon chieshènquin unès uampid chococac. Aïdbèd tabadquin èmbi unès uainquïo ictsenèdac. Èmbien bédamboen istsenèdac,” queshun mimbi aïdo chococacno nacnempec.

³¹ Adoboedèmbi nuquin tsusedpabon bédambo icquïd unès uampicpadomboen adoante bunquin mimbitsen chieshtoshon adoaindac.

³² Ai, nuquin tsusedpabon Nuquin Papan oncamiaïmpid unès uacpadombota – quepondash Esus abi unès uate chiec.

³³ Adashic abi padiseyobo chiec: –Nisibimboec icsa uanquïdo mibi nec. Adquïdo icsho Nuquin Papan icsano nèsecaquin mibi cuïdendac.

³⁴ Icsaïdo icsho isun: “Ma Nuquin Papan bédamboen iste tantiamenu,” queshun Nuquin Papan chiaïd chuïbanquïdo utsi-utsien mibi yacno nidmendambi. Adquïd mibi yacno chochoacsho mimbi dadpen unès uaindac. Utsi-utsien cuesten dectanquin utsi-utsien Nuquin Papan chiaïd chuïbante shubunoshon cueshcaten mimbi cueshcaïndac. Utsi-utsien cuesnuequin nadancatanequin shubu utsin shubu utsinquin mimbi cuemetanendac.

³⁵ Adosho isun Nuquin Papan mibi cuïdendac. Nuquin Papan chiacpadec bédamboec tabadsho tsusedpan chieshènquin tauamboen cuesuniampid Abed nepampic. Adoshombic adecbidi bédamboec tabadsho tsusedpa utsibon utsi-utsien unès uapampic. Adoshombic ènquin Bedequias caidèn mado Sacadias caïd unès uapampic. Aïdi Nuquin Papa tabadte shubu uashunaïd dayunshunquïo cuesunepampic. Aïdtedi unès uampido tantiaquin aïdo unès uaquïdo cuïdacbimboen Nuquin Papan mibitsen cuïdquïendac.

³⁶ “Yuecshun min tsyuecquïdo cuïdendac,” quec nenquïo iquebi. Nèbi caimbi – capondash Esusèn abi chieshènquïdo chuïquin.

*Edusaden yacnocquido Esusën shubi uaid
(Duc 13.34-35)*

³⁷ Adshumbic Esusën chuiopondash. —Tantia, Edusaden yacnocquido. Mibitsen chuinu. Mibi tantiac unësquio iquec. Mibi yacnobidi tabadquin Nuquin Papan on-camiaidon chuisho nuquin tsusedpabon unës uapampic. Adembidi Nuquin Papan: “Isadaidbo chiec nid,” caido chosho utsi-utsien cuënoten seshunequiopampic. Adembidi mimbi nëbi naindac. Adquidombo icsho mibi tantiaquiemi. ¿Mitsipadec cachina aton bacuë cudaspec? “Penushe,” quiash aton bacuëmpi nua shoccoshon madadec cudasquid. Adecbidi: “Satanasën yuanushe,” quiash cudasquiec mibi Nuquin Papa bëdamboen ismete tantiametiadquio iccobi. “Tantiamentu,” cac tantiate bunenquio mibi icchitoc.

³⁸ Èbi nidambic èbi tantiatiapimbo icsho Nuquin Papan namiac min shububëdtabi mibi nibëdamendac.

³⁹ Nëbi mimbi èbi isenquio yanendac. Padnuen min matsesën yuecash chosho èbi isendac. Aden isash: “Nuquin Papa yacnuësh choquid bëdambo iquec,” min matses quendac —quequin Edusaden yacnocquido Esusën chuiopondash.

24

*Nuquin Papa tabadte shubu uashunaid nibëdante chiaid
(Mad 13.1-2; Duc 21.5-6)*

¹ Adash Nuquin Papa tabadte shubu uashunaid daquënë uacno tabadanec nidequi Esusbëd icquido Nuquin Papa tabadte shubu uashunaid caic: —En is, Icbo. Nèid shubu bëdamboen nacnenaidquio neque —quepondash.

² Adsho tantiaishun Esusën: —Mimbi isboedquio cuënote bëdamboen nacnenaid matses utsibon cuënote chic-chiquendac nibëdquiecnuc —capondash.

*Nuquin Papan cuidte ushë chiaid
(Mad 13.3-13; Duc 21.7-19)*

³ Adanec nidequi macuësh dapa Odibos caidën pudundoec poctsebi tabadtuidshun abëd icquidon utsibo tantiamenquio icquin Esus chuipondash. —En mibi chote chui. Tiantianu. “Nëbi choec,” quequin mibi chote ¿mitsipadembimbi tantiape? Adecbidi ¿atotsi isashini: “Nuquin Papan cuidte nëbi nec,” quepe? —capondash abëd icquidon.

⁴ Adoaquien Esusën naden chuipondash: —Tantia. Mibi chuinu. Muaquidoba choendac. Aidon chuisho tantiash: “Abimboen chuichitec,” quenda.

⁵ Adquido choshon: “Nuquin Papan chomiäidquio Quidistu caid nebi,” quequin muaquin chiaqui dadpeshun: “Ai, abimboen mimbi caic,” capendac.

⁶ Èbi choabi icnuc: “Matses dadpenquio cuesnan-cuesnanac caosh,” quecuedendac. Adsho tantiash dacuëdenda. Nuquin Papan matses abitedi cuidte ushë choabi icnuc ambi tantiacpadec matses adonanendac.

⁷ Adec matses utsi dadpen icquido matses utsibobëd cuesnanendac. Nidaid utsi-utsiec yacno pete nibëdquiec icted-ictedendac. Nidaid utsi-utsiec yacno nidaidquiobi comapenec uëdëquedenendac.

⁸ Adsho isash chido bacuë nëncuenacsho isun: “Nëbien tishchitec,” quequin tantiacimboen tantiata. “Nuquin Papan abitedi cuidte nëbi nec,” quequin tantiata —quepondash Esus.

⁹ Adashic abi onquec: —Èmbi chiacpadquio icnuc chieshëmënuquidon èbi tantiaquido bedshun chieshënquin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpeshun èbi tantiaquido chieshënquindac.

¹⁰ Adoac èbi tantiatsëchoedëmbi chieshtoshon èbi tantienquio yanendac. Aidëmbi èbi tantiaquid ompodacsho istuidmeshun mëyamendac. Adashic abipadquid utsibobëd chieshënanendac.

¹¹ Padnuen muaquido: “Nuquin Papan chuiobedquio chuinu. Tantia,” quependac dadpen. Adsho tantiashun dadpeshun: “Ai, abimboen mimbi chiec,” caindac.

¹² Matses dadpenquio icsamboecshë tabadsho isun èbi tantiatsëchoedëmbi èbi tantienquio yanendac.

¹³ Padnuembi èbi choabi icshobi ënenquio icquin èbi tantiaquido Nuquin Papa yacno tabadmendac.

¹⁴ Èbi choabi icnuc: “Ma matses abitedishun Nuquin Papabëd tabadte tiantianu,” queshun èbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi —quepondash Esus.

*Matses icsamboshë icquid chote chiaid
(Mad 13.14-20; Duc 21.20-24; 17.22-24)*

¹⁵ Adashic abi onquec: —Ëbi chote ushë nèbi yanuc matses icsamboshë icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Ëmbi chiacpadomboenuidi nata,” quequin Nuquin Papa chieshënquin chiendac. Ëndenquimbo nuquin tsusedpa Danied caidën aden icsa uate chuiquin Nuquin Papan chiaid dada uapampic. Aidën dada uampid mimbi isaidquio nec.

¹⁶ Aden: “Nuquin Papa tabadte shubu uashunaid dapa icsa uanuec puduedosh,” qesho tantiash Udeya yacnocquido macuëd dapa yacno ompodec cuenac bëdambo ictsiash.

¹⁷ Adec cuenec shubu dayun icquido puduedenquio yec: “Con na bednu,” quenquio yec umanucuëshi cuenac bëdambo ictsiash.

¹⁸ Adecbidi badedquio cuenuen tied nantan icquidon aton dashcute utsi aton shubuno beduanenquio yac bëdambo ictsiash.

¹⁹ Nidequi bacuë usunquid yec bacuë chishmequid yec quec badedquio cuentiapimbo yec mëyadquiendac.

²⁰ Adec cuente tantiec: “Ue sequenambo cuemenquio icpashuni,” queta. “Pete bedmianenquio icnushe,” quiaish “Chonoadenquio icte ushënquio cuemenquio icpashuni,” queoata.

²¹ Aden Nuquin Papa tabadte shubu uashunaid dapa icsa uate bunquid icsamboshë icquid choan matses dadpenquio natiambo chieshëmënquieq tabadendac. Nuquin Papan tauamboen matses uac adec tabadenquio ictenec. Nèbi adec tabadenquio iquec. Aido icsamboeshë tabadquido nibëdanambic utsibo adquidpenquio yanoaindac.

²² Adec icsamboeshë tabadte tantiaquin Nuquin Papan: “Ëmbi Esus tantiaquid icmiaido uesquin cuesun sianushe. Matses abitedi nibëdanushe,” qeshun yuenquio icsamboen tabadmenquio icquin ënëdmendac —quepondash Esus.

²³ Nuquin Papan aden ënëdmiabi yac icsamboeshë tabadec utsibo: “Is. Nëid Nuquin Papan chomiaidquio Quidistu neque,” quependac. Utsibic: “Is. Nëidquien Nuquin Papan chomiaidquio Quidistu caid neque,” quequin icsamboen chuoaindac. Adsho tantiashun: “Nuquin Icho Esus choashien nec,” cainda.

²⁴ Adec muaquidoba choendac. “Nuquin Papan chomiaidquio nebique. Is,” quequin compenen tantiaquin nabanquin ismendac. Utsibontsen: “Nuquin Papan oncamiaid nebique. Is,” quequin nadatiambo icquin nabanquin ismendac. Adsho isun dadpenshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ëbi tantiaquidontsen: “Ai, abimbo caic,” catsempendac. Nuquin Papan bëdamboen tantiamiado yec adtiapimbo iquendac.

²⁵ “Chieshëmënquido iquendac,” quequin tantienquio icquidën ëbi tantienquio yanushe,” qeshun: “Aden ëbi tantiaquido chieshënquiendac,” quequin chiombi —quepondash Esus.

²⁶ Adashic padpidec onquec: —Ëmbi aden chuiboed tantiashun utsibo muasho tantienda. Ëbi caic: “Utsibo ismenquio yec matses nibëdacno choac caoshe. Isnu. Nid,” cac istanenda. Adembidi: “Choash nëid shubun puduedac caoshe. Isnu. Nid,” cac adembidi istanenda. Muambo neque.

²⁷ Ëbimbo padpidec choquimbimbi abitedimbo ismendac. Abu ushëmbo yec bedbedquetanesho ¿ada matsesën abitedishunquio isenquio icpadic? Ai, isec. Adembidi ëbi choasho matses abitedishunquio isendac.

²⁸ Adec choendabi. ¿Ada edeste pisen chec budenquio icpadic? Ai, budec. Adecbidi Nuquin Papan cuidte ushë chonoc choendabi —quepondash Esus.

Abi chote Esusën chiaid

(Mad 13.24-37; Duc 21.25-33)

²⁹ Adashic padpiden chiec: —Aden matses icsamboshë icquidon ëbi tantiaquido natiamenubi ushë chënquenquio yanendac. Inchëshën ushëtsen chënquenquio yanendac. Uispa chedo paëdbudnendac. Uispabimboecquid abitedimbo uëdëquendac.

³⁰ Adnubini abitedishun Icho yec dacuëdampambo yec abucuësh choendac. Ëbi nadatiambo icquin nabanquidquio yec chosho isash cuidadtequido abitedimbo dacuëdec natiaic shubiquiendac.

³¹ Adnuc nua shoncanubimbi Nuquin Papan abi yacnoshon uaido mayan bëdabo: “Bedtan,” caindac. Adoac nidaid utsi-utsiec yacno nidshun ëbi tantiaquido abitedimbo bedtanendac.

³² Ëmbi chuibocpadquieq yansho isun: “Esus chote nèbi nec,” quequin tantiata. ¿Mitsipaden: “Seta taëc,” quequin tantiapac? Suc seccuduquiaid isun: “Nèbi seta taëc,” quequin tantiaquid.

³³ Adembidi ëmbi chuiboed isun: “Nëbimbobi Esus choec,” quequin tantiata.

³⁴ ¿Muectabi nedi? Ĕmbi chuibocpadquo iquendac. Ĕmbi chiacpadec yanabi matses abitedi nibēdantiapimbo iquendac.

³⁵ Abimbo caimbi. Abu nibēdanendac. Nidaidtsen nibēdanendac. Padnuen Ĕmbi chuiboedquo nibēdantiapimbo iquendac. Bēnudenquo iquendac. Ucutiapiimbo iquendac. Ĕmbi chuibocpadquo iquendac —quepondash Esus abēd icquido chiec.

Esus chote ushē tantienquo icte chiaid

(Mad 13.32-33; Duc 17.26-35)

³⁶ Adashic abi onquec Esus: —Ĕbi chote tantienquo iquembi. “Aid ushēnquo choendabi,” quetiapiimbo iquebi. Adembidi mayan bēdabon tantienquo iquec. Ĕmbibi Nuquin Papan Madonquiobi tantienquo iquembi. Nuquin Papanuidtsēquien tantiec.

³⁷ Matses Ĕbi caic: “Nēbi choec,” quetiapiimbo icnuc choendabi. Noen cano nacnenubi ¿mitsipaden aton matses icsambo icquidon tantiapampic?

³⁸ Nidaid abichobi mauanabi icnuc: “Nuquin Papan nuqui cuidendac,” quequin tantienquo icquin peshun acquinc aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaquin nacnenash puduedpampic.

³⁹ Aton matses: “Nēbimbobini Nuquin Papan cuidchitec,” quenquo icnubi ue dapambo choec mauanquidēn matses abitedimbo unēsbudnepampic Noe ambi cano anshubu uaidēn nuadtonobi. Adecbidi Nuquin Papan cuidtequido Ĕbi caic: “Choec,” quenquo icnubini choendac.

⁴⁰ Choquin Nuquin Papa yacno tabadmenuen beduamendambi. Ĕmbi: “Bedtan,” cac tied nantan dada daēd icsho istuidshun Ĕbi tantiaquid abentsēc icsho beduanendac. Utsibic Ĕbi tantiesa icsho nianendac.

⁴¹ Adembidi Nuquin Papa yacno tabadmenuen chido daēdshun macueso istuidshun abentsēc Ĕbi tantiaquid icsho aid abentsēc beduanendac. Chido utsibic Ĕbi tantiesa icsho nianendac.

⁴² Aden Ĕmbi chuiboed tantiashun: “¿Nēbida con Icho chopeba?” quequin Ĕnenquo icquin tantia. Ĕbi chote mimbi tantienquo iquec.

⁴³ ¿“Nēbi ampequidēn ampec,” quequina tantiapadic? Padenquo. Tantiaquidēnquien aid ushēnquo aton na bēdamboen isquin ampemenquo ictsias. Aden tantienquo icquin: “Ampesho isnu,” quequin Ĕnenquo icquin isquid.

⁴⁴ Adembidi Ĕbi chote ushē mimbi tantienquo ye. ¿“Nēbida nuquin Icho chopeba?” quec Nuquin Papabēd tabadte bunec bēdamboec tabadta. Matses dadpen: “Nēbien chochitec,” quenquo icnubini choendac —quepondash Esus abēd icquido chiec.

Esus bēdamboen cainte chiaid

(Duc 12.41-48)

⁴⁵ Adshumbic abi bēdamboen cainte Esusēn chuipondash. —Tantia. Aton icbo tantiaquin yua bēdambo icquidēn naid mibi chuinu. Icbon: “Ĕbi nidan mibēda yuaido pete sandoaid musucshun Ĕmbi chiacpadēn Ĕmbi chiacpadēnquien menianeta,” cac yua bēdambo icquidēn adotsias.

⁴⁶ Adnubien icbon choshon ambi chiacpadomboen yuan nasho isun bēdamboen istsias.

⁴⁷ Adshumbic aton yua chuistsias. “Bēdamboen tantiaquid mibi neque. Con yua utsibo namequin con natedi dayun uata,” catsias icbon yua bēdambo icquid caquin.

⁴⁸ Padnuen yua icsambo icquid: “Ĕndenquimbo con icbo nidondash. Choenquien icchitec. Con nauidi nanu,”

⁴⁹ quiampatsias. Adshumbic chieshtoshon abēda yuaido cuesanetsias. Adashic icsambo icquidobēdi icsamboec tabadtsias.

⁵⁰ Adec: “¿Nēbida con icbo chopeba?” quenquo icnubien aton icbo chotsias.

⁵¹ Choshon ambi chiacpadomboen nainquo icsho istuidshumbic: “Icsambo iquec,” qeshun comapen cuesquin cuesunetsias. Adembidi Nuquin Papan icsambo icquido cuidendac. Bēdambo icquid damianquido cuidacno icsamboshē yacno nidmendac. Adoac natiac shubiquendac —quequin abi bēdamboen cainte Esusēn chuipondash.

25

Chido 10tedshun cainaid

chiaid

¹ Adshumbic Esusēn ompoacimboen chuiquin abi chote ushē tantienquo icte chuipondash. —Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchēshēmbi chosho aton matsesēn bēquedtanquid. Bēquedtanec choec shubun puduedash cuishonquec aidbēd pec tabadquid. Adquido icpac caondash.

Chido 10tedishun: “Champi bedtanec choquid bëquedtanu,” qeshun aton tabote bëchin taboadquid icho-ichoen buanuen sanambededpac caondash.

² Aid chido 5tedi tantienquo icquido icnubi 5tedbidi bédamboen tantiaquido icpac caondash.

³ Tantienquo icquidon: “Tabote bëchi naimédsho cushtonon buanu,” quenquo icquin bëchi uesadbudtsaid taboteuidtsëqui sananquin caimpac caondash.

⁴ Padnuen bédamboen tantiaquidon naimédsho cushtonoequin tabotebëdta sedunten cushtoaid bëchi sananquin caimpac caondash.

⁵ Aden cainaqi: “Chido bedtanu,” quianec nidboed choenquo icsho isash abitedi ushcastoash ushcuededpac caondash.

⁶ Inchësh poctsemboen: “Choeque. Bëquednu. Nid,” cac

⁷ isucunshun chidobon tabonon tabote dëbedpac caondash. Adoshon bédamboen tantiaquidon ambi bëboed bëchi cushtonobien

⁸ icsamboen tantiaquidon: “Bëchi beccho. Con na naimèdeque,” caquien bëchi bëboedën

⁹ bédamboen tantiaquidon: “Padi. Mibi meniäc con na uesadtsiash. Aid uesadan shubun puduedabi nuquitedi inchështsiäc. Piuquid menequin bëchi cushtoquid baded cushtometan,” cac caondash.

¹⁰ Adoac bëchi bedec nidnubien chido bedtanec dada chopac caondash. Chosho bédamboen tantiaquidon aton tabote taboshon chido bedtanec choquid bëquedampac caondash. Adtanec abëdi choash puduedshun bëtashte puduedtiapimbo icnuc bédamboen bëtashpac caondash.

¹¹ Adnubien bédamboen tantienquo icquido bëchi bedtanec chopac caondash. Choshon shëcuë bëtashacsho isun: “Shëcuë shëcne, buchi. Èbitsen puduednu,”

¹² caquien chido bedquid: “Padi. Èmbi tantiaçmaido mibi nec,” quepac caondash.

¹³ Èmbi chuiboed tantiaquidon chido icsamboen tantiaquido tanenda. Bédamboen nabi icsho: “Èmbi tantiaçmaid mibi neque. Puduedenda,” aido cacbimboen èmbitsen Nuquin Papa yacno puduedmenquo icquin cacumeçhitomane. Èbi chote ushë tantiaquidon icnuc: “¿Nëbida con Icho chopeba?” quequin èbi bédamboen tantieç èmbi chiäcpadec bédamboec tabadta –quepondash Esus abëd icquido chieç.

*Içbon piucquid daëd uaid chiäid
(Duc 19.11-27)*

¹⁴ Adshumbic äbi tantiaquidon ambi chiäcpadomboen nate Esusën ompoacbimboen chuiopondash. Ènapen nidnun aton piucquid dadpen dayun uaquidën aton yuabo: “Èbi piucquid daëd uashunta,” quequin chuiäpac caondash.

¹⁵ “Nëidën bédamboen tantiaquidquido icquin con piucquid èbi daëd uashuntsiash,” qeshun aton yua piucquid 5tedi meniäc caondash. Adshumbic: “Nëidëntsën bédamboen tantiaquidon ademididi con piucquid èbi daëd uashuntsiash,” qeshun utsitsen 2tedi menepac caondash. Adshumbic: “Nëidëntsën bëdiäcstëc tantiaçtsëcquin ademididi èbi con piucquid daëd uashuntsëcstsiash,” qeshun utsitsen piucquid abentsëcquiobi menetsac caondash. Adanec nidpac caondash icho.

¹⁶ Adnubien piucquid 5tedi bedboedën aton matsesën nacpadomboen piucquid daëd uanuen utsibo menequin yuecshun ambi meneboed uidictëc dëniäcquin bedoapac caondash. Sincoted ichoedi 5tedbidi bedoapac caondash 10ted icnuc.

¹⁷ Ademididi piucquid 2ted meneboedën 2bidi daëd uapac caondash 4tedi icnuc.

¹⁸ Padnuen abentsëc meneboedën chieshquin aid daëd uainquo icquin ambi uëdëshcaboed shëcuë anantsëcquin piucquid abentsëqui ompopac caondash.

¹⁹ Yuecquo ictaneshumbien icbon choshon ambi piucquid meniondaido chuituidpac caondash. “¿Atotsi nao?” cac

²⁰ sincoted meniondaidën: “Is, icho. Mimbi èbi meniondaidtedbidi daëd uaombi. Nëbi mitsana 10tedi iquec,” caquien

²¹ icbon: “Äi, con na daëdpactëc ichoedi daëd uaquin mimbi bédamboen nac. Nëbi èbëdtan chuiquid dapa icä. Èbëd cuishonquec tabadec cho,” cac caondash.

²² Adnubien piucquid 2tedi meniondaidën: “Is, icho. Mimbi meniondaid 2ted ichoedi daëd uaondambique. Nëbi mitsana 4tedi iquec,” caquien

²³ icbon: “Äi, èmbi chiäcpadomboen mimbi con na daëd uac. Nëbi èbëdtan chuiquid icä. Mibitsen èbëd cuishonquec tabadec cho,” cac caondash.

²⁴ Adnubien piucquid abentsëcquiobi meniondaidën chieshquidëntsën: “Mimbi ancaidon nidtsinaid peteuidi bedquid mibi nec, icho. Mimbi chiäcpadomboen nainquo icsho isash chushcanquidquido mibi nec.

²⁵ Adec dacuëdampambo icquid icsho mibi dacuëdênquin mimbi meniondaid piucquid ompoquin chococaondambi. Nê mimbi meniondauidtsêqui ictsec," caquien

²⁶ icbon: "Chieshquieq mibi icsac. Êmbi chiacpadomboen nambo mimbi iquec. Êbi caic: 'Ancanquid icquin êbi chushcanushe,' queshun

²⁷ nuquin matsesên nacpadomboen utsibo meneshun piucquid daëd uaquin mimbi bedtsempac. Adoacsho aid daëd uaquin bedtsenombi. Chieshquin mimbi icsamboen nac,"

²⁸ quepac caondash. Adshun aton yua utsi caic: "Chieshquidên na bedshunshun piucquid 10ted dayun uatsêcboed mene," cac meniac 10ted icboedi 11ted yanac caondash. Adshumbic chieshquid comapenen cuidpac caondash.

²⁹ Adembidi naindambi. Êbi tantiaquin êmbi chiacpadomboen naquid adembidi namequin bêdamboen tantiamendambi. Êbi tantiesabo êmbi chiaid niacquid bêdamboen tantiamenquio iquendambi.

³⁰ Aid yua icsambo icquid cuidacimboben Nuquin Papan êbi tantiesabo cuidquiendac. Ambi icsaïdo cuidquiagno nêsecac natiaic shubiquiendac —quepondash Esus abêd icquido chiec.

Mates nashunesa cuidte chiaid

³¹ Adshumbic Esusên padpiden chuipondash. —Nuquin Papan abi yacnoshon uaido mayan bêdabobêd choec: "Abitedishun Icbomboeni nec," quiash bêchamauampamboec dacuëdampamboec choequi chuiquid dapan tsadten tsadtoquin abitedi ismendambi.

³² Adshumbic matses abitedimbo cho-chomequin tsidadmendambi. Adshumbic icbon aton nauidquio tsinacacimboben êbi tantiaquido naden chiendambi.

³³ "Êbêd tabadtequido mibi neque. Nêmbô con abiuc tabadec cho," caindambi. Adshumbic êbi tantiesabo chuiquin: "Êbi tantiesabo cuidadtequido mibi neque. Con copioc tabadec cho," caindambi.

³⁴ Adshumbic êbi tantiaquido padpiden chuioaïndambi. "Êbêdi tabadec cho. Matses uaquin tauabi êndenquimboshê mibi caic: 'Aïdo êbi tantiaquido icmeshun êbêdi tabadmendambi,' quequin Nuquin Papan tantiaïdombô yec êbêdi bêdamboec tabadec cho.

³⁵ Mimbi êbi nashundenec. Bundoacsho mimbi êbi pemedenedec. Acte bundoacsho adembidi mimbi êbi acmedenedec. Mimbi isacmaidquio icsho mimbi êbi yuedtenec.

³⁶ Con dashcute nibêdsho mimbi êbi dashcute menenedec. Daicsabudtsash unêstiadtsêcquio icsho êbi tantiec mibi datsadtenec. Quênên nauedacsho mimbi êbi isuan-isuandenec," caindambi.

³⁷ Adoaquien bêdamboec tabadquido: "Tantiadenquio icnuc mimbi chuipec, icbo. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc.

³⁸ ¿Êmbi isacmaidquio icshodambi mibi yuedtionda? Mambi padambo yoc. ¿Dashcute nibêdshodambi mibi dashcute menepacti? Mambi padambo yoc.

³⁹ Mibi daicsacsho datsadambo iquebi. Quênên nauedacsho mibi istaniambo iquemi. Mimbi tantiadenquio icnuc chuipec," êbi caindac.

⁴⁰ Adoac naden chiendambi. "Tantia. Mibi chuïnu. Êmbi chiacpadomboen êbi tantiaquido utsibo bêdamboen isquin mimbi nashundenec. Aden êbibi nashunacimboben mimbi utsibo nashundeneque. Êbêdi tabadec cho," caindambi.

⁴¹ Adoshombic êbi tantiesabotsen chiendambi. "Nuquin Papan cuidtequido mibi neque. Mibi icsaïd ênte bunenquio icquid mibi neque. Nuquin Papan Satanas aton yuabo podobitsi icsabobêdta ênenquio icquin cuidacno nid.

⁴² Êmbi chiacpadomboen êbi tantiaquido nashunesambo mibi icteneque. Bundoacsho mimbi êbi pemenquio icteneq. Acte bundoacsho mimbi êbi acmenquio icteneq.

⁴³ Mimbi isacmaid icsho mimbi êbi cacumedenedec. Dashcute nibêdsho mimbi êbi menenquio icteneq. Daicsacsho isash mibi êbi datsadenquio icteneq. Quênên nauedacsho mimbi êbi istanenquio icteneq," caindambi.

⁴⁴ Aden chiaquien: "Tantiadenquio icnuc mimbi chiec. 'Pete bundopash,' quequin tantienquio iccondambi. 'Acte bundopash,' quequin tantienquio iccondambi. Êmbi isacmaid icsho mambi mibi isambo yoc. ¿Min dashcute nibêdshodambi mibi istionda? Mambi padambo yoc. Mambi mibi daicsacsho isambo yoc. Mibi quênên nauedaïd tantiambo iccondambi. Tantiadenquio icnuc mimbi chuipec," caindabi êmbi chiacpadomboen naisabon.

⁴⁵ Adoac naden chiendambi. "Êbi tantiaquido nashunenquio icquin êbibi nashunenquio yacimboben êmbi chiacpadomboen naisabo mibi neque. Nuquin Papan cuidacno nid," caindambi.

⁴⁶ Adoac icsamboec tabadquido ënenquo icquin cuidacnombo nidnubi bédamboec tabadquido Nuquin Papa yacno ënëdenquo yec tabadendac –quequin Esusën chuipondash.

26

Esus bedshun unës uanuequin chiaid
(*Mad 14.1-2; Duc 22.1-2; Uan 11.45-53*)

¹ Aden abi chote ënquin chuitanquimbic abi unës uatetsen abéd icquido Esusën chuipondash.

² –Daëdec ushun nuquin matsesën obeca bacuë unës uaindac. Tsusedpabon: “Ma con mado unës uainquo icnu,” qeshun obeca bacuë abided unës uampid tantiaquin badiadshun penun obeca bacuë unës uaindac. Aid ushëmbi ëbi bedshun cuesten dectamendac –quepondash Esus.

³ Adnubien tsusiobobëdi con matses chuiquid dapa dadpen abi chuiquid dapambo Caipas cuëmëdquidën shubun puduedpuduedpac caondash.

⁴ Adashic: –Nëbien Esus unës uametiad utsibo ismenquo icquin bedshun.

⁵ Nuquin matses obeca pec tabadnuc bedenquien ictiad. “Esus bédambo icquidi cuesunec,” qeshun obeca penuec cho-choquidon nuqui cuesnushe –quepac caondash.

Chidon Esus machiuinaid
(*Mad 14.3-9; Uan 12.1-8*)

⁶ Adnubien Esus shubu dadpen icquid Betania caid yacno choash ambi daushumbo yec daicsaid bédamiondaid Simon caidën shubun puduedpondash.

⁷ Puduedshun pec samëdshobien chidon puduedshun ambi piucquid dadpenquo menequin bedaid tëchumpin icquid bédambo nuadquid Esus machiuimpondash: –Esus bédamboshë icquid nec –qeshun.

⁸ Adsho isumbien Esusbëd icquidon: –¿Adenda bédamboen nai? Ma icsambo yoc.

⁹ Utsibo menequin dadpen piucquid bedshun piucquid nibëdquido aid piucquid menetiadquidi mibi nec –quequin chido chushcapondash.

¹⁰ Adsho tantiashumbien Esusën: –¿Atotsieshun chido chushcai? Èbi bédamboen tantiaguin ëbi ismequin bédamboen nashunebique. Chushcainda.

¹¹ Mimbi chuiboed piucquid nibëdquido ënëdenquo yec mibëdi tabadendac. Èbien mibëdi tabadenquo yanendac.

¹² Èbi unës uashun chococate tantiacimboen machiunoshibique. Chushcainda.

¹³ Èmbi chiaid chuibeniacnoshon nëid chidon ëbi machiuimboed chiendac –quepondash Esus abéd icquido chiec.

Udasën Esus bedmenun piucquid bedaid
(*Mad 14.10-11; Duc 22.3-6*)

¹⁴ Adnubien Udas Iscadiote caid Esusbëd icboedi Esus chieshënquido chuiquid dapabo chiec nidpac caondash.

¹⁵ Nidshumbic chuituidpac caondash. –Utsibo ismenquo icquin mibiuidtsëqui Esus bedmenu. ¿Tedsit piucquid ëbi menetsia? –caquien badedi pudunquin piucquid shocoshëmpi 30ted icnuc tambantanquin menepac caondash: –Baded ëbi bedme –quequin.

¹⁶ Meniac bedanec nidec: –¿Mitsishunquiemi utsibo ismenquo icquin Esus bedmepeba? –quepanëdash Udas. Adashic Esusbëdi tabadoaic chopondash.

Unësnush abéd icquidobëd Esus pec tabadaid
(*1Cod 11.23-26*)

¹⁷ Adnubien Esusbëd icquidon: –Equipito yacnuësh cuenun pan bidiscamiabi yampid 7tedec ushquin tantiaquin tauaid ushë nëid nec –qeshun Esus chuipondash. –Nuquin Papan nuquin tsusedpabo unës uamenquo icquin matamiampid inchësh tantiaquin obeca bacuë penuen ¿mitsishunquiemi mibi codocashumpe? –caquien Esusën:

¹⁸ –Édusaden yacno nidshun ëmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nëbi Nuquin Papan chiapadomboen uesquin nabanemi,’ quiosh. Min shubumbo caic: ‘Aidën shubun puduedshun Nuquin Papan nampid tantiaquin obeca bacuë pec tabadcuedednu,’ quiosh,” quequin chiec nid

¹⁹ –cac nidquimbi shubu icbo chuituidac caondash. Adoac: –Ai, ma chobono –quesho tantiashumbien abia nidboedon aidën shubun puduedshun penuen nëish yua obeca codocapaccondash. Adnubien Esus chedo puduedpondash.

²⁰ Inchëshëmbi abéd icquido 12tedbëd samëdquin Esusën pepondash.

²¹ Pec samëdquin Esusën chuipondash. —Tantia. Mibi chuinu. Èbi chieshënquido èbi bedmequid abentsëc nëmbobi iquec —quesho tantiaashun

²² unësquio yanshun abentsëcshun abentsëcshunquien Esus chuipondash abëd icquidon. —¿Èbida cai, Icbo? —quequin abi chuishobien

²³ Esusën: —Èbëdtan pete codocaid ènë punquid èbi bedmequid nendac.

²⁴ Èbi Nuquin Papan chiaid dada uamepampicpadquid matsesmaid yec unësëndabi. Padnuen èbi bedmequid comapenen cuidtequidquo nec. Anin aid tishenquio icpatecnëdan. Cuidac natiaquiendac —quepondash Udas caic.

²⁵ Adoaquien Udasën abi bedmequidënquio: —¿Èbida cai, Icbo? —caquien: —Ai, mibibimbi caic —capondash. Adoac Udas puduenanec nidpondash.

²⁶ Adshumbic Esusën pete sananquin: —Mimbi pete uaid nëid nec. Mibi bëdambo iquec, Papa —quequin Nuquin Papa chuitanquin cuësh-cuëshbanshun abëd icquido menebampondash. —Nëid cuësh-cuëshquin nibëdamiacimboen èbi mëyanquin unës uaindac. Èbi unës uate tantiaquin nëid peta —cac pebededtsëccondambi.

²⁷ Adshumbien Esusën dëshoten actequid cushtoshon sananquin: —Mimbi uaid nëid nec. Mibi bëdambo iquec, Papa —quequin Nuquin Papa chuishun: —Nëid abitedishun abeced —cac dëshoten abentsen cushtoaid pictsë-pictsen acbampondambi.

²⁸ Aid actequid acshobien Esusën: —Nuquin Papan chiaid nuquin tsusedpan dada uapampicpadec èbided ciudadec unësëndabi. Nëid acquin: “Esusded Nuquin Papan cuidac aton intac siebudpamboec unësposh. Aton Madoded cuidshun Nuquin Papan èbi padenquio iquec,” quequin nëid acquin tantia —capondashi.

²⁹ Adashic: —Nadquid actequid padpiden aquec cuishonquec mibëd tabadenquio iquendabi. Nuquin Papan abitedishun Icbombo icmiac abi yacnombo mibëdi cuishonquec tabadendabi —quepondash Esus èbi chedo chiec.

³⁰ Adashic cuëdënten abentsec cuëdëdash macuësh dapa Odibos caid pudundonoc nidanepondash Esus Udas Esus chieshënquido chiec nidbon.

Petedo chieshuidte Esusën chiaid

(Mad 14.26-31; Duc 22.31-34; Uan 13.36-38)

³¹ Macuësh dapa Odibos caid yacno nidquimbi Esusën chuipondashi. —Nëid inchëshëmbi Nuquin Papan chiaicpadec èbi nianec mibitedi niquendac. Nuquin Papan naden chuipampic. “Icho cuesnu,” canubi aton yuabo niquendac,” quequin Nuquin Papan dada uamepampicpadec mibitedi adec niquendac.

³² Padnueni unësash uincuenendac. Adanec mibi cainuec nidaid cuëshë utsi Cadidia caid yacno èbia nidendabi —quepondash Esus abëd icquido chiec.

³³ Adoaquien Petedo: —Mibi cuesnuec cho-chosho isash utsibo dacuëdec niqunec èbimboen cuenenquimbo ictsiandac —queshobien

³⁴ Esusën: —Tantia. Mibi chuinu. Nëid inchëshëmbi cachina bënë cuëdanabi icnuc: “Èmbi isacmaidquio aidi nec,” mimbi èbi caindac. Cachina bënë cuëdanabi icnuc 3tedec mibi adendac —caquien

³⁵ Petedo: —Pada. Adtiapimboeni iquec. Chieshëmënquidon: “Esusbëd icquid mibi neque. Mibi cuesunenu,” caqui: “Èmbi isacmaid neque. Padi,” quenquio iquendabi. Mibëdquiobi unësstsiandabi —Petedo quenubini: —Ai, èbibic adecbidi ictsiac —quecuededpondabi Esusbëd icquidotedi.

Quetsemani caid yacnoshon Esusën Nuquin Papa chiaid

(Mad 14.32-42; Duc 22.39-46)

³⁶ Adanec nidequi cuëte dadpen nitsinacno Quetsemani yacno nidpondash. Auëshquio Esus nadpondash. —Ambobi tabadta. Udictsëc nidshun Nuquin Papa chuitanu —quepondash.

³⁷ Adashic Petedobëda Sebedeyon mado daëd buanec nidpondash. Udictsëc nidequi unësquio yanec shubiantiadtsëcquio yampac caondash.

³⁸ Adshumbic Petedo chiec: —“Matssteddi icsaid èmbi bedshunsho isun Nuquin Papan èbi istiapimbo yanendac,” quiaash unësquio iquebi. Èbi yacpadec ushenquio yec nëmbobi isec tabadta —quianec

³⁹ udictsëc nidash nidaidën uebudshun Nuquin Papa chuipac caondash. —¿Ada mimbi èbi unës uamenquio icpatsia, Papa? Mimbi: “Ai, mibi unës uamenquio iquembi,” cac bëdambo ictsiabi. Mimbi: “Nëbi mibi unës uamenu,” cac mimbi tantiacpadequi unësëndabi —quepac caondash Esus Nuquin Papa chiec.

⁴⁰ Adtanec choshon isquien Petedo chedo ushpec: —Ushenquio yec isequi tabadta —caboqui. —¿Yuec-yuecpactsec ushenquio icquin istiapimboda icco?

⁴¹ “Satanasën icsamenushe,” queshun ushenquo icquin Nuquin Papa chuita. “Ushenquo iquebi,” queboedobi ushcas mëmunenquo yec mibi ushpec —capac caondash Esusën Petedo chedo chuiquin.

⁴² Adtanec padpidec nidoashun Nuquin Papa chuioaic: —Ëbi unës uametiadquo icquin ëbi unës uameta, Papa. Ëbi unës uametiapimbo icquin mimbi ëbi unës uamenquo ictsiac. Mimbi tantiacpadomboen nata, Papa —quetanec

⁴³ choaquin isquien Petedo chedo ushoaic ushcas mëmuntiapimbo yec.

⁴⁴ Adsho istanec nidoashun ambi chuibocpadomboebidi Esusën Nuquin Papa chuitanepac caondash tedesteden.

⁴⁵ Adtanec choaquin ushash uesho istuidoashun: —¿Ushecta ue? Nëbimbobi ëbi unës uamenun ëbëd ichoedëmbi icsambo icquido ëbi bedmeque.

⁴⁶ Nidnu nid. Is. Ëbi bedmenuec ëbi bedmequid choeque —quepondash Esus Udas chosho isash.

Abi chieshënquidon Esus bedaid

(*Mad 14.43-50; Duc 22.47-53; Uan 18.2-11*)

⁴⁷ Adnubien Udasën Esusbëd ichoedën bedtanac matses dadpen cuesantiadpambo yec chështebëdta cuate sanambededtsëcquiec cho-chopondash. Nëish yua abided unës uaquido chuiquid dapabobëdta con matses tsusiobon: —Bedtan —cac cho-chopondash.

⁴⁸ Ambi bedtanadobëd cho-choquimbien Udasën: —“Nëid Esus nec,” quequin adoendambi —abi quiacpadembi

⁴⁹ Esus tansudcatuidpondash: —Chobi, Icbo —quequin.

⁵⁰ Adoaquien Esusën: —Ëmbi tantiaboedquo mibi nec. Ëmbi adoboedënquibi mimbi tantiacpadomboen nata —queshobien cho-choquidon Esus bedtuidpondash. Aden bedshun: —Cuidmenun chuiquid dapa yacno mibi buanu —capondash.

⁵¹ Aden Esus bedshobien abëd icquidën abi tsiusudaïd chështe chictanquin chuiquid dapan yua pateshunepondash.

⁵² Adoshobien Esusën: —Padi. Chën. Min chështe tsiusudoata. Cuesanquid icscho adembi cuidnushe.

⁵³ ¿Tantienquioda ique? Ëmbi chiac con Pan ambi abi yacnoshon uaido mayan bëdabo dadpenquioshë ëbi cudasmenuen chometsiash.

⁵⁴ Nuquin Papan aden ëbi cudasmiac bedadtiapimbo icscho ¿mitsipaden Nuquin Papan chuiquin dada uamiampicpadomboen ëbi naden bedpatsiash? —capondash pateshunianquid chuiquin.

⁵⁵ Adashic abi bedquido chiec: —¿Atotsi quenuc chështebëdta cuate sanambededtsëcquiec ëbi bednuec cho? ¿Nuqui chuiquid dapan chiaïd niac-niacquin matses cuesanquido chuiquid dapadabi nedï? Mabi mimbi isboedquibi neyoc. Badiadquidën badiadquidënquien Nuquin Papa tabadte shubu uashunaid daquënë uaidën puduedshun chuideneshobi ma mimbi ëbi bedenquo icbob.

⁵⁶ Padenquo ichoedombi Nuquin Papan tantiacpadënquibi mimbi ëbi bedec. Ëbi bedte chuiquin Nuquin Papan nuquin tsusedpa dada uamiampicpadomboen mimbi ëbi bedec —quequin Esusën chuïnubini niquepondac: —Cuenenquo ictsiabi —queboedi.

Caipas caïd yacno Esus buanaid

(*Mad 14.53-65; Duc 22.54-55, 63-71; Uan 18.12-14, 19-24*)

⁵⁷ Adnubien chuiquid dapambo Caipas cuëmëdquid yacno Moisesën dada uampid chuibanquidobëdi tsusio utsibo cho-chopac caondash. Adnubien ambobi Esus bëpac caondash.

⁵⁸ Adnubien Petedo uanoshon isbëec tsyuec chopac caondash. Choash chuiquid dapabo tabadacno daquënë uaidën puduedpac caondash. Adashic Esus mëyansho isnuec puduedash chuiquid dapan namiaïdo sondadobëdi tsadtuidpac caondash Petedo.

⁵⁹ Adnubien cho-chobedo tsusio dapabo: —Esus unës uamenuen: “Esus icsasho isombi,” quequin muaquidon chuïsho tantianuna —queshun chomiac muaquido dadpeshun: —Esusën icsamboen nasho isombi —quequin chuipac caondash.

⁶⁰ Aden Esusën naid muaquin chuiquin Esus unës uatiadquo icquid chiambo icpac caondash. Adnubien muaquid daëdshun chuituidpac caondash.

⁶¹ —Nuquin Papa tabadte shubu uashunaid caic: “Uesquin chic-chictanquin padpiden nacnenoaquin daëdec ushquin nainendambi,” ma Esus quepondac —quepac caondash.

⁶² Adshobien chuiquid dapabo chuiquidën Esus chuiquin: —¿Atotsi quenuc ado? ¿Atotsi nëidën chiec? —caquien

⁶³ Esusën ëcbedenquoio icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” qeshun abimbo cata. ¿Nuquin Papan chomiaidquoio aton Madombobida mibi nepe? —caquien

⁶⁴ Esusën: —Ai, mimbi chiaidquoio nebi. Tantia. Mibitedi chuinu. Nuquin Papan abitedishun Icbombo icmiacshobini mimbi isendac. Adecbidi Nuquin Papa yacnuësh padpidec choec abu ushu yacnuësh choshobini mimbi isendac —quepac caondash Esus.

⁶⁵ Adsho tantiaish chuiquid dapambo chieshtotanquin aton dashcute bëntse icquid dached-dachedquepac caondash. —¿Ada tanto? “Nuquin Papan Madombobi nebi,” quequin Nuquin Papambo icsamboen chiec muaposh. Ambi icsamboen naid utsi chuisho tantiatipimbo iquebi. Ambibi Nuquin Papa muauasho tantiaishun

⁶⁶ ¿Atotsi natiadquoio ique? —caquien abëdtan chuiquid utsibo: —Adquid cuidquid quedeneque. Unës uamequimbien ictiad —quecuededpac caondash.

⁶⁷ Adshumbien Esus chieshënquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen istiatipimbo icnuc Esus dashcuten bëpuctanquin mëdanten bëcues-bëcuespac caondash.

⁶⁸ Bëcuestanquin: —“Nuquin Papan madombobien nec,” canu. En chui. Tantanu. ¿Tsunandan mibi naoshe? —cabededtsëcquien mamënshumpac caondash Esus.

Esus caic: Ëmbi isacmaid nec, quequin Petedon chiaid

(Mad 14.66-72; Duc 22.56-62; Uan 18.15-18, 25-27)

⁶⁹ Adnubien Petedo tabadacno choshon chido yuan chuituidpac caondash. —Cadidia yacnocquid Esus caidbëd ma mibi icpaboc —caquien:

⁷⁰ —Tantiadenquoio icnuc mimbi chiec. Ëmbi isacmaidquoio mimbi chiec —quec Petedo muaic taëpac caondash.

⁷¹ Adanec daquënë uaidën puduedte shëcuë dayun nidash nidtuidpac caondash.

Adshobien chido yua utsin: —Nasaded yacnocquid Esusbëd ma nëid icpaboc —caquien

⁷² Petedo: —Ma ëmbi isacmaidquoio Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

⁷³ Adash yuec-yuecpactsëcshumbien ambo tabadquidontsen Petedo chuipac caondash. —Aidbëd icquidien mibi nec. Cadidia yacnocquid onquiachimboec ma mibi onquepayoc —quesho tantiaish

⁷⁴ Petedo: —Comapenen Nuquin Papan cuidchitoshe muasho. Abimbo caimbi. Ma ëmbi isacmaidquoio neyoc —queoapac caondash.

Adec 3tedec Petedo muanubien cachina bënë cuëdampac caondash.

⁷⁵ Adsho tantiaishun Petedon Esusën chuiboedquoio tantiaactampac caondash. —Cachina bënë cuëdanabi icnuc mimbi ëbi caic: “Ëmbi isacmaid nec,” capendac tedesteden —quequin Esusën chuiboedquoio tantiatanec umanuc puduenanec nidec Esus muauabosh natiac shubinidpac caondash.

27

Pidato caid yacno

Esus buanaid

(Mad 15.1; Duc 23.1-2; Uan 18.28-32)

¹ Adnubien chuiquid dapabo aton tsusio utsibödi Esus isec ushenquoio badiadpondash. Badiadshun Esus chieshënquin: —Nuqui yuaquid ancanquid Esus unës uamec nidnu. Nid —qeshun

² podocataneshun ancanquid Pidato cuëmëdquid ismenuen Esus buampac caondash.

Esus bedmequid Udas têtaniadaid

³ Adnubien Udas Esus bedmeboed: —Unës uamechitembien iquec. Unës uametiapimbo iquebi. Ëmbi bedboed piucquid shocoshëmpi 30ted meneoatanu —quianec abi meneboed tsusiobo menenuc nidpac caondash.

⁴ Nidshun tsusiobo chuituidpac caondash. —Icsachitobi. Unës uanuequido bëdambo icquidi bedmechitombi. Mibi mimbi meneboed mibi menenuc chobi. Në bed —caquien tsusiobo: —Padi. ¿Atotsieshun nai? Ma mimbi bedmepaboc —quepac caondash Udas caic.

⁵ Adoaquien Nuquin Papa tabadte shubu uashunaid shëcuën ambi bedboed shocoshëmpi piucquid ansecanec nidash uano cuenash têtaniadpac caondash Udas.

⁶ Aden piucquid shocoshëmpi ansecacsho bedashien tsusio dapabo: —Nuqui dayun uaid shocosh utsibëdta dayun uatiapimbo iquec. Unës uanuen meniaid shocoshëmpi dayun uatemaïd quedeneque.

⁷ Matsu nacnenquidën tied bedquin nëid menenuna. Nuquin matsespenquoio isedquido unësacsho ambo chococanun aid tied bednuna —qeshun piucquid meniac caondash.

⁸ Aidon bedacsho isun nëbi aid tied cuënquin nadopec. —Unēs uamequidën bedaid tied nec —capec.

⁹ Aden Udasën shocoshëmpi 30ted menete nuquin tsusedpa Edemias caidën dada uapampicpaden napac caondash. Naden dada uapampic. “ ‘Aid bednuen Isadaidbon piucquid shocoshëmpi 30ted meneuidaid bedoashun

¹⁰ matsu nacnenquidën tied bedquin meneoapondash,’ quequin Nuquin Papan chiaid dada uaombi,” quepampic Edemias.

Pidato caidën Esus chuimaid
(*Mad 15.2-5; Duc 23.3-5; Uan 18.33-38*)

¹¹ Adnubien isadaidbo yuaquid ancanquid Pidaton Esus bëacsho chuipac caondash. —¿Min matses isadaidbo chuiquid dapamboda mibi nepe? —caquien Esusën: —Ai, aid nebi —capac caondash.

¹² Adnubien abi chieshënquidon muaquin Esusën naid Pidato chuipac caondash. Adsho tantiahsun Esusën êcbedenquio icpac caondash.

¹³ Adshobien Pidaton Esus padpiden chuioaquin: —Mibi icsaid dadpen chuipec. ¿Tantienquioda ique? ¿Êcbedantiapimboda ique? —caquien

¹⁴ êcbedenquio icpac caondash Esusën. —Nëidon muauac nebi —quequin chienquio icsho tantiahs: —Adquid tantiambo iquembi —quepac caondash Pidato.

Esus unēs ua, quequin chiaid
(*Mad 15.6-15; Duc 23.13-25; Uan 18.38-19.16*)

¹⁵ Nuquin Papan isadaidbo unēs uainquio icquin matamiampid tantiate ushëmbi seta utsin-utsinquin Pidaton quënën nauedaid isadaidbo abentsêc cuemedenedec. Pidaton: —¿Tsutsi abentsêquimbi cuemepe? —cac isadaidbon chiapadquid abentsêc cuemedenedec.

¹⁶ Esus bëabi icnuc uimanëmênquidquio Badabas cuëmêdquid nauedpac caondash.
¹⁷ Adnubien Esus cuidte chuisho tantianuec cho-choash dadpenquio tabadpondash. Adsho isumbien Pidaton: —¿Tsutsi abentsêquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caidambi cuemepe? —capondash.

¹⁸ —Esus chieshënquidon: “Nuqui padenquio yanuc nuqui dëniaquec Esus chuiquid dapa yanushe,” qeshun Esus bëacosh. Nëmbo tabadquidon: “Esusquio cueme,” capashuní —quequin tantiaquin aden chuipanêdash Pidaton.

¹⁹ Adashic matses icsaido cuidte chuinuec tsadte dapan abucquio tsadtopondash Pidato. Adshobien yuan chuituidpondash. —Min chidon: “Chuitan,” cac chobi. Esus caic: “ ‘Aid dada bëdambo icquid neque. Unēs uamenda. Dacuêdampambo icsho ushquin isombique. Unēs uamenda, quiosh’ quequin chuitan,” min chidon cac chobi mibi chiec —quequin aton yuan chuituidpac caondash.

²⁰ Adnubien Esus chieshënquido tsusiobon ambo tabadquido chuibudpondash. —Pidaton: “¿Mitsicquidimbi cuemepe?” cac: “Badabas cuemequin Esus unēs ua,” cado-cadota —cac: —Ai, adoendambi —quecuededpondash.

²¹ Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash.

²² Adoquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unēs ua. Cuesten dectanquin unēs ua —quecuededpondash.

²³ Adoquien Pidaton: —¿Atotsieshun mimbi adope? ¿Atotsi icsa uasho mimbi adope? —caquien buêdanquiecuêdec: —Cuesten dectanquin unēs ua —quecuededpondash.

²⁴ Adsho —Padi icnuna —caqui niachidanquiecuêdec unēs uate bunquiecuêdec cuesantiadpambo yansho isash: —Acte beccho —quepondash Pidato. Bëacsho tasan dapan cush-totanec mëpamêdquin abitedi ismepondash. Adashic Esus caic: —Nëid unēs uametiapimbo iquebi. Nëid unēs uamete bunec mibien cuidatquidombo nendac. Êmbien adotiapimbo iquec. Mëpamêdec bëchish ucudachimboec mimbi icsamiaid ucudebi —quiashe mëpamêdquin ismepondash Pidaton.

²⁵ Adsho tantiahsien: —Con nabobêdtsëqui adequi cuidatquidombo icnuna —quecuededpondash abitedimbo.

²⁶ Adsho tantiahsun Badabas caid cuemequin Esus cueshcaten cueshcamepac caondash. Adshumbic: —Cuesten dectanquin unēs uatan —quequin sondado buamepac caondash Pidaton.

Esus mamëshunaid
(*Mad 15.16-20; Uan 19.2-3*)

²⁷ Adoquien sondadon Pidaton shubun Esus yuedshun: —Isec cho —cac aton sondado utsibo dadpen cho-chopac caondash. Cho-choshon Esus mamëshumbedepac caondash unēs uanumbi.

²⁸ Abi dasiuidaid ënapen icquid chicshun: —¿Chuiquid dapada nedi? —quequin dashcute piumbo icquid dasiuintanquin

²⁹ mauete pinchuc-pinchucpambo icnuc nacnenaïd mauemepac caondash. Adshumbic aton matses chuiquid dapan sananacimboen sananuc abiucshun cuate sanamepac caondash. Adshumbic aton matses chuiquid dapa ismiacimboen mamënsnunquin: — Is. Isadaïdbo chuiquid dapambo neque —queshun danëshën sebudquin Esus ismepac caondash.

³⁰ Adshumbic dacuishtucatanquin ambi cuate sanameboed bedshuntanquin aidëmbi matombudnepac caondash.

³¹ Aden mamënsnunquin ambi dasiumboed chictanquin aton dashcutebidi dasiunoapac caondash. Adoshon: —Ma unësnuequin cuate dectanec nidnu. Nid —quequin Esus buampac caondash.

Esus cuate dectanaïd

(*Mad 15.21-32; Duc 23.26-43; Uan 19.17-27*)

³² Buanquin Esus abi dectante cuate yuëmemebanquimbi dada nidaïd Sidene caïd yacnësh choquid Simon cuëmëdquid Esusën yuëmiaïd sondadon chiadto mebidampondash.

³³ Adobidanec nidec macuësh dapa yacno matses mapi canitebimboec isadquid Codocota caïd yacno chopondash.

³⁴ Choshombien sondadon uba chinaïd actequid paëmbo dauë nëcushaid Esus meneuidpondash. —Në. Ac —cac pictscë tantanec: —Padi —quepondash aquenquoï yec.

³⁵ Adshobien cuate napotiaïd bëboedën dectampondash. Dectanshumbic ambi chicshumboed Esusën dashcute bednuequin sondadobon abi cuëmëdquidtedi dada uabanshun tëchun sandoshon cadotanequin dada uatempi puduemiaïd isbanquin Esusën dashcute bedhampondash.

³⁶ Adash: —Esus unëso isnu —quec sondado tabadcuededpondash.

³⁷ Adshumbic: —“Nadquid icsho cuidquin unës uac,” quequin ma isquidon tantianu —queshun cuate cuëshën naden dada uapacpondash. —Nëïdquoï Esus nec. Isadaïdbo chuiquid dapambo nec —quequin dada uaid Esusën mapino dectampondash.

³⁸ Ampequid daëd cuate ëquë dectambudcuenquin dectantanquin nënantanquoï Esus dectampondash.

³⁹ Adshobien podqued cuëmanquoï Esus diadsho isbidanequin chieshënquin chuipondash.

⁴⁰ —“Nuquin Papa tabadte shubu uashunaïd chic-chictanquin daëdec ushquin nacnenquin nainendambi,” quiondaïd yec bud. Nuquin Papan madombo yec unësenquoï yec auëshquiobi bud —cabidanepondash.

⁴¹ Adecbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamënsnunec nadpondash.

⁴² —Utsibo ismenuembien comapenen tantiaquin matses bëdamechitosh. Adembidi comapenen tantiaquin nacnesh budsho isnuquï. “Isadaïdbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaïd yec Nuquin Papan Madombo nec,” quetsiabi.

⁴³ “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu. Unësenquoï icsho isnu —quepondash tsusiobo.

⁴⁴ Adnubien abëdta cuate dectamboedon ampequidontsen Esus mamënsnunpondash.

Esus unësaïd

(*Mad 15.33-41; Duc 23.44-49; Uan 19.28-30*)

⁴⁵ Adnubien ushë cuembo icnuc inchëshbocpadquieç inchëshpondash. Ushë cuembo icnuc inchështanec ushë budambi ushëmbo yanoapondash.

⁴⁶ Ushëmbo yanubien Esus comapenec cuëdec nadpondash. —Eloi, Eloi, lama sabactani —quec con onqueten cuëdpondash. —¿Atotsieshun ëbi bëdamboen isenquoï yano, Papa Edoen? —quec adondash.

⁴⁷ Adec cuëdsho tantiaish isquido nadpondash. —Edias yampid cuëchitequien nec —quiampondash.

⁴⁸ Adnubien Esus isec tabadquid abentsëc titingianec nidshun shapu-shapupactsëcquid bedtampondash. Bedtanshumbic actequid mucacquid anïdtsëcquidën shapu-shapupactsëcquid punshun cuate dëdectanshun abuc sananec: —Chishmenu —quequidpondash.

⁴⁹ Adnubien abi isquido: —Padi. Nuquin tsusedpa Edias yampid choshon budmesho isnu —quepondash.

⁵⁰ Adnubien padpidec buëdanquieç cuëdtanec Esus unëspondash.

⁵¹ Esus unēsnuibi Nuquin Papa tabadte shubu uashunaid yacnuēsh: —“Quēnē uquēducquidēn Nuquin Papa tabadtembo nec,” caidēn utsi puduednushe —qeshun dashcute ēnapen icquid dectanaid abucuešh canchedbudcuenac caondash abitiombi. Nuquin Papan ambi bēdamboen iste tantiamenuen nanēdash. Adnubien nidaid uēdēquequidēn cuēnote dapa dadpen cuēshēdbudnepac caondash.

⁵² Adec unēsaid nauedaid shēcuē bētashite cuēnote dapambo cuēshēdnubien Nuquin Papa tantiaquido ēnden unēsaido abentse-abentsec uincuenanec chopac caondash.

⁵³ Esus uincuenan adec uincuenaidon shubu dadpen icquid Edusaden caid yacno nidshun matses dadpen ismepac caondash.

⁵⁴ Nidaid uēdēquenuc dacuēdampambo icsho isashien: —Esus unēsō isnu —quiash tabadquido sondado chedo abi chuiquidbēdi dacuēdtanec: —Ma Nuquin Papan Madombobi nepayoc —quepac caondash.

⁵⁵ Adnubien chidobo Cadidia yacnuēsh Esusbēd choquin abi codocashumboedo Esus unēsō isnuac ancuenashun isec tabadpac caondash.

⁵⁶ Nēidted icpac caondash. Nēidic Madia Mactada yacnuēsh choquid. Nēidic Madia utsi Acobon tita. Aid Ose cuēmēdquidēn titabidi niosh. Nēidic Sebedeyon chido Uanēn tita. Aid Acobo cuēmēdquidēn titabidi niosh. Aidtedi uanoshon isbededec tabadpac caondash.

Esus chococaid

(*Mad 15.42-47; Duc 23.50-56; Uan 19.38-42*)

⁵⁷ Adnubien inchēshbudtsēqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac caondash.

⁵⁸ Choshombic chuiquid dapa Pidato caid chuituidpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton.

⁵⁹ Aden bedtanshun Osen Esus dashcute bēchish nibēdquidēnquo nuamboshē icnu datanedonepac caondash.

⁶⁰ Adotanquimbic nidaid cuēnoteuidpambo icquid macuēsh tsimpiduc shēcuē uaboed ambi: —Ēbi unēsacsho nauedte nendac —caidēmbi Esus nauedpac caondash Osen. Adotanquimbic cuēnote dapabidi bētashite uaid bincumbēshun bētimpac caondash. Adotanec nidpac caondash Ose.

⁶¹ Adnubien Madia utsibēd Mactada yacnuēsh choquid Osen Esus nauedsho isbosh ambobi tsadpac caondash.

Esus nauedaid isec sondado tabadaid

⁶² Isadaidbon obeca bacuē unēs uacpadēn Esus unēs uamiash abentsec ushashi chonoadtemaid ushēmbi Esus chieshēnquido Pidato caid chiec nidpac caondash. Padiseyobobēdi nidshun chuiquid dapabon Pidato chuituidpac caondash.

⁶³ —Esus nadpadenec. “Unēsash daēdec ushash uincuenendabi,” quec muapadeneque.

⁶⁴ Daēdec ushquin min sondado Esus nauedaid cudasmeta. Esusbēd icboedon chichshun buanushe. Aden buanash: “Uincuenaccosh,” quec muanushe. Unēsabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshē ictsiashe. Min sondado: “Cudasta,” quequin chuita —capac caondash Esus chieshēnquidon.

⁶⁵ Adoaquien Pidaton: —Ai, con sondado buantan. Aden buanshun: “Unēsaid nauedaid cudasec databēdta,” cata —capac caondash.

⁶⁶ Adoaquien isadaidbo tusiobon sondado buanshun cuēnote dapa bētashaid bucin bēbitaccapac caondash. —Bēbitaccaid isash: “Chuiquid dapan bēbitaccamiaid nec. Cuidnushe. Esus chictiapimbo iquebi,” ma quenu —qeshun bucin bēbitaccapac caondash. Adoshon: —Beduanushe. Isquieq tabadta —capac caondash sondado chedo chuiquin.

28

Esus uincuenaid

(*Mad 16.1-8; Duc 24.1-12; Uan 20.1-10*)

¹ Esus unēsbon abentsec ushash abi chonoadtemaidēntsen abentsecbidi ushash dominco badiadnuc chidobo Esus nauedshun bētimboed isec tabadnuec padpidec choapac caondash. Mactada yacnuēsh choquid Madia utsibēd isec choapac caondash.

² Choash isec tabadnubi nidaid uēdēquiampac caondash. Adnubien Nuquin Papan abi yacnoshon uaid mayan bēda abucuešh budtanquin cuēnote dapa bētashaid shēcbempac caondash. Adtanec cuēnoten tsadtopac caondash.

³ Mayan bēda yec abu bed-bedquiabimboec ushēmboshē bēchamuanquieq icpac caondash. Aton dashcute adquibidi bēchish nibēdquieq ushumboshē icpac caondash.

⁴ Adec dacuëdampambo icsho isashien unësaid cudasquido sondado dacuëdtanec uëdëquec tantiadempambo yec padishbudnepak caondash abitedi.

⁵ Adnubien mayan bëdan Madia chedo chuipac caondash. —Dacuëndenda. Cuesten decanquin unës uaboed Esus isnuec mibi tabadec.

⁶ Nibëdec. Nidosh. Ambi chuibocpadequi uincuenash nidosh. Abi uebocno en isec cho —cac chidobon anisnubien padpidec onquequin chuiopac caondash.

⁷ —Mimbi isboed Esusbëd icboedo chiec nid. Badedquio nidshun naden chuita. “Unësboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien

⁸ auëshquiobi chidobo dacuëdboedi cuiшонquec titinguanec nidanepak caondash.

⁹ Titinguanec nidaneshobien Esusënquiotsen bëquedpac caondash. Adash: —Mibi isnuec nebi —quepac caondash. Adshobien chidobon: —Con Icho nec —quequin ismenuen danëshën sebudquin taë uidën uapac caondash.

¹⁰ Adoquien Esusën: —Dacuëndenda. Con utsibo ëbëd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

Esus uincuenasho isun sondadon muauaid

¹¹ Madia nidnubien Esus nauedaid isquido sondado abi chomeboedo isadaidbo chuiquido chiec chopac caondash. Mayan bëda chonoc Esus uincuenboed chuituidpac caondash.

¹² Adoquien isadaidbo chuiquidon aton chuiquid utsibobëd onqeshun aid sondado chedo chuipac caondash. —Mimbi chuiboeed utsibo chienda. Mibi piucquid dadpen menenu —qeshun piucquid dadpenquo menepak caondash.

¹³ —Mimbi isboedquio chienquo icquin naden chuita. “Ëbi chedo ushtoan abëd icboedon Esus ampequin beduanaccosh,” quequin utsibo chuita.

¹⁴ Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —qeshun

¹⁵ piucquid meniac bedanec nidec isadaidbo chuiquidon chiacpadec muapac caondash sondado. Adembidi nëbi isadaidbo dadpenshun: “Esus ampiac,” quequin chuioiac.

Ëbi chuibeneta, quequin Esusën chiaid

(*Mad 16.14-18; Duc 24.36-49; Uan 20.19-23*)

¹⁶ Adnubini Esusbëd icboedo 11tedi yec Esusën chiacnombo Cadidia yacno nidec macuësh dapa yacno nidanepondac.

¹⁷ Macuësh dapa yacno nidquimbi Esus istuidpondambi. Istuidshumbic: —Con Icho neque. Ismenu —qeshun danëshën sebudpondambi. Utsibombien: —¿Con Icbombobida nepeba? —capondash.

¹⁸ Adsho isun Esusën anoentsëqui choquin chuituidpondash. —Ëbipadquid utsi nibëdec. Nuquin Papan uaido abitedi con na nec. Abitedishun Icbombo icquin abitedimbo namequidquo nebique. Mibitsen namenu.

¹⁹ Nidaid utsi-utsiec yacno nidshun ëbi tantiaquido icmenuen matses abitedi ëmbi chiaid chuibeneta. Adoac ëbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nëibëd Nuquin Papan Mayan tabadeque. Utsibo ismenu,” quetanquin aden acten mentobeneta.

²⁰ Mimbi mentoaido chuiban. “Nuquin Icbon chiacpadec bëdamboec tabadnuna,” quequin ëmbi chuiboeedtedi chuiban. Mimbi adosho isash mibëd iquendabi. Nidaid abitedi nibëdanabi icnuc mibi chedo nianenquo iquendambi. Adembidi ëbi tantiaquidotedi niantiapimbo iquebi —quepondash Esus ënquimbi chiec.

MADCOSEN DADA UAID

Bëyuc choshon Uanën Esus chote chiaid

(Mat 3.1-12; Duc 3.1-18; Uan 1.19-28)

¹ Madcos nebi. Nuquin Papan tantiampicpadquiec aton madombo Esus abi yacno matses yuedquid chote tauamboen chiaid bëda chuinu. Tantia.

² Abi aton mado Esus chiec onquiaid Nuquin Papan Isayas dada uamiampid nad iquec: “Naden naimbique. Tantia, mado. Mibi chotequid chuibanquidba chomendambi. Aidën chuibanac ambi tantiaid icsa ënshun mibi cainquidombo iquendac, mado.

³ Shubu nibëdacnoshon comapenec onquequin mibi chotequid aidën chuibanendac naden: Nuquin Icho choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chiec onquiaid Nuquin Papan Isayas dada uamiampid nec.

⁴ Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ënshun Nuquin Papan chiaid tantiaquin nabanta. Aden tantiaquidquo icscho mibi cuidenquo yec mibi icsaid Nuquin Papa bëpiscudendac quequin chuibampondash. Aden chuibanquimbi ambi chiacpadomboen naquid acten mentobampondash Uanën.

⁵ Aden Uanën chuibanubien matses dadpen tantianu quec choded-chodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Cho-choash tabadquin tantiahsien, Icsapobi, quec abi icsaid chiec utsi-utsiec onquecuedpondash. Aden abi icsaid chuibanquidtedictsëqui Uanën acte Odan caidën mentobampondash.

⁶ Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaïd tsiquid niondash. Shioshbimboecquid shuishun pequid niondash. Bacun chequid niondash.

⁷ Aidëmbi naden chuibampondash: —Con tsyuecquid choendac. Aidi nadatiambocquin naquidquo nendac. Aidi bëdamboshëcquid icnuc ëbi icsaidquid icscho çatotsieshun aid choec quequin chuiquidquo Nuquin Papan icmioshi? quec tsadebi.

⁸ Mibi acten mentoquid nebi; aidien abipadquiocquid aton Mayan menianquidquo nendac —quepondash Uan.

Esus acten mentoaid

(Mat 3.13-17; Duc 3.21-22)

⁹ Adnubien ambi chian-chianaidquio Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash.

¹⁰ Aden acten mentoac Esus pudundonobi abu bëcadoacnoëshquio dëbimbimboec isadquid abipadquiocquid aton Mayan bede-bedequemboec Esusbëd icnuec budpondash.

¹¹ Aden budmetanec ambi bëcadoacnoëshi: —Mibentsëcquiobi icscho ëmbi tantiaidquio mibi nec, mado. Èmbi bëdamboen isaidquio mibi nec —quepondash aton Papa Esus chiec.

Esus Nuquin Papan chiaid niacmenuequin Satanasën tanaïd

(Mat 4.1-11; Duc 4.1-13)

¹² Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëcquiobi.

¹³ Ambo tsadquimbi ushë abentsëc nidmec utsi choaid abutometsëcquiec tabadpondash. Ambo tabadshobi Nuquin Papan chiaid niacmenuequin tanu quianec mayan icsan icho Satanas caid chopondash. Aden tanauin niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bëdabon cho-choshon nashumbededpondash.

Cadidia yacnoshon tauamboen chuibanaid

(Mat 4.12-17; Duc 4.14-15)

¹⁴ Ambo yuec tabadash Esus choambien isadaïdpembo ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash.

¹⁵ —Nuquin Papan chiampidpadquid abi yacno yuedanquid nëmbobi iqueque. Mibi icsaid ënshun ëmbi chiaid bëda tantiaata —quepondash Esus comapenec onquec.

Ëbëd iquec cho Esusën abia caido
(*Mat 4.18-22; Duc 5.8-11*)

¹⁶ Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash.

¹⁷ Aden nuëcquid bednuen nëshaid nënesho isec: –Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëbëd iquec cho –quepondash Esus.

¹⁸ Adsho tantiaash nëshaid abëd icquid menianec abi chuiquidbëd nidanepondash.

¹⁹ Adanec uidictëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin.

²⁰ Aden nacnensho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

Mayan icsa Esusën dapuduemiaid
(*Duc 4.33-37*)

²¹ Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoattemaid ushë icnuc ënapen capuenuquo yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash.

²² Aden chuisho tantiaashun: –Ambia tantiaquidën chiaicpadomboen Esusën chuibanec. Utsimbien adomboen chienquio iccosh –quec onquec tabadcuededpondash.

²³ Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash:

²⁴ –Esus Nasaded yacnoësh choquid mibëd icquidpenquo nebique. Nidec nid. ¿Chian anëdënguiacono ëbitedi nidmuenuecta cho? Nuquin Papan Madombo icsaisa nec quequin ëmbi tantiaid mibi nec –quec mayan icsa dapuduedtsaid onquepondash.

²⁵ Adoquien: –Otaçquio tabad –quetanquin: –Dapuduen –capondash Esusën.

²⁶ Adoac comapenec abi dapuduedaid uëdëquenec sidquianec dapuduempondash.

²⁷ Adsho isash: –¿Abimbodambi ispo? ¿Mitsipadquidquio nepec? Ambi tantiamiaid utsien nechitec. Chuiquidën nacpadomboen naid nec. Dapuduen, ambi cac ambi chiaicpadomboen mayan icsan naic –quec onquecuededpondash Esusën naid chiec.

²⁸ Adec onquecuededash auëshquio nidaneshun ambi isboed, Esusën naid, chuibampondash. Aden chuibanasho nidaid Cadidia caid yacnocquidtedishuntsen tantiabededpondash.

Simonën nachi bëdamiaid
(*Mat 8.14-15; Duc 4.38-39*)

²⁹ Ambi chuisho tantiaboedo nidanenubien Petedo Simon caidën shubu yacno Esus Acobo Uan aidtedi nidpondash. Aidën shubun icquidbidi aton utsi Andedes icpondash.

³⁰ Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin.

³¹ Aden chiaquien Simonën nachi yacnombo choshon Esusën mëdinquin uëtsëndoac abi chumbo yaid badedquio bëdampondash. Adec bëdanash nidtoshon codocashun abi choquidtedi pemebampondash Simonën nachin.

Esusën dadpen bëdamiaid
(*Mat 8.16-17; Duc 4.40-41*)

³² Adnubien inchëshbudtsëqui Capednaun caid yacnocquidën daicsaidtedi bë-bëpondash. Adembidi mayan icsa dapuduedaidtedi bë-bëpondash.

³³ Bë-bëash Simonën shubu shëcuë cuëmano puduedabi tabadcuededpondash.

³⁴ Adsho isun daicsaidtedi Esusën bëdamebampondash. Adembidi mayan icsa dapuduedaid dapuduemebampondash oncamenquiocquin. Nuquin Papan Madombo abi yacno yuedmianquid abentsëcquiobi mibi nec quequin chuinushe queshun oncamenquiocpondash.

Shubu nibëdacno Nuquin Papabëd onque Esus onquiaid
(*Duc 4.43-44*)

³⁵ Adashic badiadte anoentsëqui yanubi isucunanec puduanec shubu nibëdacno Esus nidpondash. Nidec tabadtuidshun Nuquin Papabëd onquequin chuibampondash.

³⁶ Esus nidacshobi isucunshun Petedo Simombëd icquidën nibënampondash.

³⁷ Aden nibënquin istuidashi: –Mibi isec cho-choquidtedishun mibi nibëmbededec –quepondash Esus caic.

³⁸ Adoquien Esus: —Capucuenequin utsibotsen Nuquin Papan shubu abentsëquën yuedanquid iquec quequin chuibenec chobique. Shubu utsi-utsiec dadpen yacno nidnu. Nid —quepondash.

³⁹ Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuiopondash. Adembidi mayan icsa dapudueoapondash.

Nami mishac tantiadenquiocquid bëdamiad
(*Mat 8.2-4; Duc 5.12-13*)

⁴⁰ Aden Esusën chuibanubien daushacimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bëdame —quequin Esus chiec comapenec cuëdpondash.

⁴¹ Adec cuëdshobi nëid isash unësquio iquebi quequin ëquëducshun tantiaquin mishec Esus: —Mibi bëdamembique. Bëdambo icta

⁴² —quenubi daicsaid nibëdquio yec bëdampondash.

⁴³ Aden bëdametanquin nidmepondash: —Nidec nid.

⁴⁴ Nidquimbi, Esusën bëdamioshi quequin chuituidenda. Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bëdambo icquin anocquid, Nuquin Papa matses chiec onquianequid, isme. Adoshon dëbimbiecquid daëd meneta Moisesën chiacpadomboen ma anocquidën napanueshun. Aden meniac abentsëc cuesuneshun utsi cuesunenu quenquiocquid cuesuniadën intac puntanequin intac mibi daseccashun dëbimbiecquid utsi cuemeshun naden aidën mibi chuipec. Nuquin Papan mibi bëdamboen istiapiamboedi nëbi bëdamboen mibi isendac. Aden chuiquin mibi bëdamiad Nuquin Papan naid nec quequin tantiatsiash —quepondash Esus ambi bëdameboed chiec.

⁴⁵ Adsho tantiaboshombi niacbidanquin Esusën bëdamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiapimbo yec shubu nibëdacno capupondash. Adnubien Esus nibënac nidaid utsi-utsiec yacnoësh dadpen cho-chopondash.

2

Cuembo yec uishquiaid Esusën bëdamiad
(*Mat 9.2-8; Duc 5.18-26*)

¹ Adashic Capednaun yacno nidoash shubun puduedpondash Esus. Adnubien, Esus chosh qesho tantiash padpidec dadpen cho-choapondash.

² Dadpen cho-choash puduedash tsucus-tsucustsëcquio yec tabadnubi adecbidi shëcuë cuëmano tabadpondash. Adec tabadsho isun Esusën Nuquin Papa yacno shubu abentsëquën tabadte iquec quequin chuibampondash.

³ Adnubien cuembo yec uishquiaid bëec dada daëd-daëdquiec 4ted cho-chopondash.

⁴ Cho-choshon matses tsucus-tsucustsëcquio yec tabadsho isun dectatoshon macano nacnenaid chic-chictanquin Esusën dayunquio uishquiaid imbudpondash.

⁵ Aton dayunquio imbudsho isun Esusën bëdamec quequin abi imbudboedën tantiec quequin ambibi tantiapondash Esusën. Adashic: —Mado, mibi cuidenquio yec mibi icsaid bëpiscudobi —quepondash Esus.

⁶ Adnubien isadaidbo tsusedpabon nadomboen nata quequin chiaid tantiamequidon ambibi tabadquin naden onquenquiocquid icsamboen tantiapondash.

⁷ ¿Atotsi quiaish adec Esus onquepeque? Tantianu. Nuquin Papa icsamboen chuiquidien aid nechitec. Nuquin Papauidi matses cuidenquio yec abi icsaid bëpiscudquid nec, quetsëcquiec tabadpondash.

⁸ Aidon tantiaid tantiec nadpondash Esus: —¿Atotsieshun aden mimbi icsamboen tantiape?

⁹ ¿Mibi cuidenquio yec mibi icsaid bëpiscudobi quequin ëmbi chiaidquio bëdantequidpenda nedic? Adecbidi, ¿Mibi icsambochoedi mibi bëdanoque. Nidtoshon mibi imbudboed chiadtoshon buanec nid quequin ëmbi chiaid bëdantequidpembidida neoadic?

¹⁰ Ai, adquidquobidi nec. Mibi cuidenquio yec mibi icsaid bëpiscudobi queboed chidon tishac matses yanaid yequi chuiquidquio Esus nec quequin tantiesabo mibi nepec. Adquid icsho ëbi tantiamenuequin

¹¹ cuembo yec uishquiaid naden chiembique Tantia. Mibi icsambochoedi mibi bëdamiombique. Nidtoshon mibi imbudboed chiadtoshon buanec nid —capondash Esusën.

¹² Adoquien nidtoshon abi imbudboed chiadtoanquin buampondash. Aden buansho isash: —Nideque. Is. Adomboen nasho isamboccondambi —quetsëcquieq onquiash Nuquin Papan naid nec quec cuëdëncuededpondash.

Ëbëd iquec cho Esusën Debi caid
(Mat 9.9-13; Duc 5.27-32)

¹³ Adashic padpidec chian Cadidia caid cuëmano nidoapondash Esus. Ambobi tabadnubien aidën chiaid tantianuec matses dadpen cho-choapondash. Cho-choasho isun Nuquin Papan chiaid chuibanoapondash Esusën.

¹⁴ Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuënondash. Nidaid utsi yacno aton na utsibon buan-buansho isun piucquid bedshunquid Debi nepondash. Adembidi nidaid utsi yacnoshon aton na bë-bësho isun piucquid bedshunoquid Debi nepondash. Isadaidpembo ancaquidën. Con matsespembon piucquid bedshunta, cac bedshunoquid Debi nepondash. Adshobien: —Ëbëd iquec cho —Esusën cac: —Ai, mibëd nidnu. Nid —quianec badedi Esus tsibananec Debi nidpondash.

¹⁵ Adshumbic Debin shubuno nidshun Esusbëd icquidon pepondash. Ashunquiobidi aton na buansho isun piucquid bedshunquid Debipadquidën utsin-utsinquier pepondash. Ashunquiobidi isadaidbo tsusedpabon nadomboen nata quequin chiaid naisan utsin-utsinquier pepondash. Debin shubuno Esus tsibanec choquid dadpen icpondash.

¹⁶ Aden adquidbëdtan Esusën pesho isun isadaidbon nadomboen nata quequin chiaid tantiamoequid padiseyobo caid: —¿Atotsieshun piucquid bedshunquidbëdtambi isadaidbon nadomboen nata quequin chiaid naisabëdtambi mibi chuiquidën pepec? Tantiuan. Ëbi chui —quepondash padiseyobo Esusbëd icquido chiec.

¹⁷ Adsho tantiashien Esus: —¿Dada bëdambocquidta dauëchoquidën bëdametequid nedic? Padenquo. Daicsaidien dauëchoquidën bëdamec. Adquiechidi, icsaisa nebi quequin ambibi tantiaquid icsho mibi icsaid ënta. Aden ënash ëbëd icquid mibi iquendac quequin chiesha nebi. Icsaquid nebi qeshun mibi icsaid ënta. Aden ënash, ëbëd icquid mibi iquendac quequin chuiquid nebi —quepondash Esus.

¿Atotsi quiash mibëd icquid buna mëmunesa nec? quiaid
(Mat 9.14-17; Duc 5.33-39)

¹⁸ Adnubien abi chuiquid quenën nauedan aid tantiec unësquioocquin Uan acten mentoanquidbëd icquidën buna mëmunubi padiseyobobëd icquidon unësaid tantiec unësquioocquin buna mëmunoapondash. Aden buna mëmunsho isanec nidequi Esus yacno nidash Esusbëd icquidon buna mëmunenquo icsho isash utsibo: —¿Atotsieshun Uambëd icquidon adembidi padiseyobobëd icquidon buna mëmunubi mibëd icquidon buna mëmunenquo icpec? Tantiuan. Chui —quepondash.

¹⁹⁻²⁰ Adoquien Esus: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquocquin isuidenquo iquec. Yuecsh chido inquid nibëdanan abëd icboedo unësquioocquin buna mëmunquin isuidpec. Adecbidi ëbi nibëdanan ëbëd icboedo unësquio yampec.

²¹ “Adembidi dashcute shë nibëdta chucambocquid bëtuscaisa matses nec. Shë nibëdta chucambocquid bëtuscatsaid amëc canchedoaic. Adecbidi abi icsaid ënesa tantiaid bëda pausudtiapimbo yec icsabudec.

²² Adembidi dadpen icquid chodo uashun sandoc. Adotanquimbic istuidshun chuca uain chodo uashun sandoaic. Chodo shënin icsa sandoshon nequid bënquioocquin. Adecbidi Nuquin Papan tantiapadec pausudnu qeshun mibi icsaid ënacsho isun Nuquin Papan pausunendac —quepondash Esus.

Chonoattemaid ushë icbo nebi quiaid
(Mat 12.1-8; Duc 6.1-5)

²³ Adnubien chonoattemaid ushë utsi icnuc ënapen capuenquioocquin tied matanquin adosbiecquid trico caid ëshë bedshun Esusbëd icquidon pepondash.

²⁴ Adshobien: —Mibëd icquido is. Chonoattemaid ushën chonoadeque. Abi chuiquid mibi iquec ¿atotsi quiash, Padi. Chën, quenquo ique? —quepondash padiseyobo Esus caic.

²⁵ Adoquien Esus: —¿Chuiquid Dabidbëd icquidon natia bunquin ambi petemaid pepondash quequin dada uapampid tantiamboda icconda?

²⁶ Nad icpampic. Abëd icquidobëd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quenën puduedshun Nuquin Papa tantianuequin pan meniac sanaid bedshun ambi petemaid abëd icquidobëdtambi abi chuiquidën Dabidën pepampic. Puduedtemaid quenën puduedquid, Nuquin Papa matses chiec onquianequid, Abiatad abentsëqui icnubi aid

quënëen puduedshun bedshun Dabidën pepampic. Abiatadpadquidën peteuidtsëqui nec quenquiocquin abèd icquido tantiaquin pan bedshun aidobèdtambi pepampic chuiquid dapa Dabidën —quepondash Esus padiseyobo caic.

²⁷ Aden chuishumbic naden padiseyobo Esusën chuiopondash: —Nabanash tiboedte matses bumpec quequin tantiaquin abitedi uabanquin ènashini con pabèdi tiboquepampic. Adashic yuecash, Chonoadtemaid ushë nec, quepadenebi con pabèdi. Aden chiequi matses tiboedte ushë aton icbo ictiapimbo iquec.

²⁸ Aid ushë icbo icquin èbèd icquidon bunquin pebededsho isash, Padi. Chonoadtemaid ushë neque. Aden penda, quenquioccobi —quepondash Esus abi chieshënquido padiseyobo chiec.

3

*Mëuesadaid Esusën bédamiaid
(Mat 12.9-14; Duc 6.6-11)*

¹ Adashic padpidec Nuquin Papan chiaid chuibante shubun Esus puduedpondash. Ambo dada mëuesadaid tsadnubi

² Esus chieshënquid padiseyobo dadpen tabadpondash. Adec tabadec, Nèbi chonoadtemaid ushë icnuda Esusën mëuesadaid bédamepeque. Nèid badiadën bédamesho isun bedmeshun quënëen nauedmenu quetsëcquiec padiseyobo tabadcuededpondash.

³ Aden tantiec padiseyobo tabadnubien mëuesadaid chuiquin Esusën: —Nënantanquio nidto —capondash.

⁴ Adoac nënantanquio nidtoash mëuesadaid nidnubi iccuededquido chiec Esus onquepondash: —¿Chonoadtemaid ushën matses tantiaquindambi nape? ¿Adoenquiocquin matses icsa uapendambi ique? ¿Nèid ushëndambi matses bédamepe? ¿Bédamenquiocquindambi cuesunepe? —quepondash. Aden chiec Esus onquenubien onquenquio yec tabadpondash padiseyobo.

⁵ Adoaquien nëishtanquimbi abi chieshënquido bëisbanec Esus, Nuquin Papan chiaid tantiabanquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: —Èbi mēd —cac mëdequi bédampondash.

⁶ Adosho isash puduenanec nidquin edodesbo padiseyobon badedquio istuidpondash. Aido istuidash: —Esus cuesunete mibi bunacpadquiec bunebi. ¿Mitsipadentsimbi cuesunemenuen bedmepeba? —quecuededpondash padiseyobo.

Esus yacno matses dadpen choaid

⁷ Adnubien Esusbèd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash.

⁸ Adnubien Esusën nabansho isboeden chiac nidaid Udeya caid yacnocquido dadpen cho-chonobi adecbidi Edusaden yacnocquido cho-chonobi adecbidi Idumeya yacnocquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuisho tantiaish cho-chopondash.

⁹ Adec cho-choash tsucus-tsucustsëcquio yec tabadquin tsicatiac nënantanquio tsadacnoësh i catashnushe quiash Esus: —Cano bec cho —quiampondash abèd icquidquio caic.

¹⁰ Dadpen bédamiosh cadoshe. Èbitsen bédanu quequin ambibi tantiaquin Esus mishbededpondash.

¹¹ Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuèdpondash.

¹² Adoaquien: —Padi. Aden èbi chienda —quepondash Esus.

*Abèd 12ted icquid Esusën tantiamenu caid
(Mat 10.1-4; Duc 6.12-16)*

¹³ Adashic macuësh dapa yacno nidnushi abèd 12ted icquido chomeshun nadopondash:

¹⁴ Èmbi tantiapadomboen mibitedi tantiamembi. Adquid icquin èbèd tabadquin èmbi chiapadomboen mimbi tantiabendac. Aden tantiabencasho isun èmbi chiapadomboen chuimenuen mibitsen nidmembi.

¹⁵ Adembidi mayan icsa dapuduedaid dapuduequidbidi mibi icmembi quequin abèd icquido Esusën chuipondash.

¹⁶ Ambi tantiamenu caid nèidtedi icpondash: Simon cashumbic Esusën Petedo capondash,

¹⁷ utsibic Sebedeyon mado daëd, Acobobëd Uan. Aid daëdi, abu cuëdtequidën mado nec quequin oncain Buanedquis quequin Esusën cuëmpondash.

¹⁸ Utsibic Andedes, utsibic Uedipe, utsibic Badtodome, utsibic Mateyo cuënshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash.

¹⁹ Utsibic Udas Iscadote, aidi abi chieshënquido Esus bedmenush Esusbëd capuquid nepondash. Aidtedi Esusën tantiamequin chuiquin ismiaido niondash.

Bedtsibu caidën dausunaid Esus nec quiaid
(Mat 12.22-32; Duc 11.14-23; 12.10)

²⁰ Aidtedi chianec nidequi Esusbëd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusbëd icquidon penquo icpondash.

²¹ Aden penquioscho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

²² Adomboebidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiamequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshënquid yec nadpondash: —Mayan icsan icbo Satanas cashumbic Bedtsibu caidën tantiamiaid Esus nec. Adquid icquin mayan icsa matses dapuduedaid dapuduemec —quepondash.

²³ Adoquien Esus: —Mimbi icsamboen tantieque. Mibi chuibanu. Tantieq tabadta. ¿Mayan icsan icbo ambi dapuduedmiaid dapuduemequidta nepadic? Padenquo.

²⁴ Adquiecbidi shubu icbo abëd icquido cuëshëdmesa nec.

²⁵ Icbon abëd icquido cuëshëdmiaish shubu abentsëquën tabadiapimbo iquendac.

²⁶ Adembidi ambi dapuduedmiaid dapuduemiaish adquidën icbo ictiapimbo Satanas iquec. Icho icnuequid abëd icquid puduemesa nec.

²⁷ Dadpeshun icbo Satanas nec. Adquid icquin ambi matses dapuduedmiaid dëniacanquidënuidquio nadatiambocquin nabanquin cuemepec. Adquid icquin ëmbi nac mayan icsa dapuduedaid Satanasën yua icboedi icbombo tantieq bëdambo yanec ëbëd iquendac.

²⁸ Abimbo chiembique. Tantiata. Matses cuidenquiocquin abi icsaid bëpiscudquin paucquid Nuquin Papa nendac. Adecbidi Nuquin Papa icsamboen chuiboedi, Icsaobi, Papa, qesho fantiashun Nuquin Papan aid pauquendac.

²⁹ Utsien Nuquin Papan Mayan abipadquidën tantiamiac nasho isun Satanasën naid nec qesho pauquenquo iquendac. Adquid ënëdenquo yec icsaquid nendac —quepondash Esus

³⁰ Satanasën tantiamiac mayan icsa dapudemequid Esus nec abi caquido chieq.

Esus yacno aton utsibo anibëd choaid
(Mat 12.46-50; Duc 8.19-21)

³¹ Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chieq.

³² Adoac puduedshun Esus nënantan tsadsho isun: —Titabëd min utsibo choshon umanucshun mibi isnuen cainec —quequin chuituidpondash.

³³ Adoquien Esus: —Adquid utsi chuïnu. Tantiata.

³⁴ Në tabadquido ëbëd icquido neque. Is —quepondash Esus abëd iccudedquido chieq.

³⁵ Adashic: —Nuquin Papan chiacpadomboen nabanquid ëbëd icquid nec. Adquid buchï caïndambi. Adquid chido chuchu caïndambi. Adquid utsi tita caïndambi —quepondash Esus.

4

Tantiamequin pete ëshë nësecain chiaid
(Mat 13.1-9, 18-23; Duc 8.4-15)

¹ Adashic padpidec chian cuëmano nidshun Esusën tantiamequin chuïbanoapondash. Aden chuïbanuc cho-choquid dadpen icsho isash cano antabëdtopondash cho-choquid acte cuëmano tabadnubi.

² Adec tabadshobi, matses nadquio iquec quequin tantiaquin tiedën caniquid ëshë Esusën tantiamequin naden chuïbampondash:

³ —Tied icbo pete ëshë nësecanuec aton tied yacno nidquid.

⁴ Adec nësecanuec nidshun pete ëshë nësecac maisec pudun-pudunaid uicchunën chequid.

⁵ Adnubien nidaid cuënote dadpen samëdacno utsi-utsiec paëdash badedquo dëyucuidtsash

⁶ tapunenquo iquec ushën shoedec.

⁷ Adnubien pete ëshë utsi-utsiec nisanquid dëyucacno paëdash dëyucash canidoudtsacsho nisanquidën bëtinac podo sinash bacuëtiapimbo iquec.

⁸ Adnubien nidaid bëdambo yacno paëdaid dëyucaid caniaash dadpen pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec –quepondash Esus.

⁹ Aden chiash: –Ëmbi chuiboed tantianu quiash bëdamboen tantiec papuedta –quepondash Esus.

¹⁰ Aden chuibanash udictsëc Esusbëdi nidshun utsibo choenquiocsho isun databëdtuidquin abëd icquidon: –Mimbi chuibamboed tantianu. Ëbi chui –capondash Esus chuiquin.

¹¹ Adoquien: –Nuquin Papan shubun tabadquid tantiamendambi utsiboembi, Mibi nadquido iquec, quenquiocquin chuibanoc.

¹² Aden chiac:

“Nuquin Papan nabamboed isto-istoboedi ma padenquo tabadteneyoc.

Adembidi tantiado-tantiadoneboedi ma padenquo tabadteneyoc.

Aidon abimbo tantiaquin abi icsaid ëntsiandac. Aden abi icsaid ënsho isun cuidenquo yec Nuquin Papa abi icsaid bëpiscudtsiandac”

–quepondash Esus abëd icquido caic.

¹³ Aden chiashic: –¿Mimbitsen ëmbi chuiboed tantienquioda ique? Aidi tantienquiocquin ¿mitsipadentsi adomboembidi chuibanasho mimbi tantiape? Ëmbi chuiboed nad iqueque. Tanta. Chuinu.

¹⁴ Pete ëshë sequidbimboecquid Nuquin Papan chiaid chuibanquidquo nec. Ëshë ambi siaidbimboecquid Nuquin Papan chiaid nec. Abi paëdacno nidaidbimboecquid matsesën tantiate nec.

¹⁵ Nidaidën paëdash pete ëshë dëyuctiapimboesho uicchnën chiaidbimboec matses utsi-utsiec iquec. Adquid Nuquin Papan chiaid tantiaash papuednu qesho Satanasën bëpiscudmiac tantienquo yanec Nuquin Papa yacno puduedtiapimbo iquec.

¹⁶⁻¹⁷ Nidaid cuënote dadpen samëdacno pete ëshë paëdash badedquo dëyucuidtsash tapunenquo yec ushën shoedaibimboec matses utsi-utsiec iquec. Adquid Nuquin Papan chiaid tantiauidash bëdambo iquec queboedi ¿Esus tantiaquid nebi quecta icco? quequin utsibon mamëshunac badedquo tantiesa nebi quendac.

¹⁸⁻¹⁹ Nisanquid dëyucacno pete ëshë paëdash dëyucash canidoudtsacsho nisanquidën bëtinac podo sinash bacuësabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nënaid, abi icsaid aitedi tantiaquin Nuquin Papan chiaid tantiesa yanshun bëdamboec tabadaid ismesa yanec. Adquidën Nuquin Papan chiaid tantiaquid utsi icmetiapimbo iquec.

²⁰ Ëshë utsibic nidaid bëdamboecquidën paëdash dëyucash caniaash dadpen bacuë icquidbimboec matses utsi-utsiec iquendac. Adquid Nuquin Papan chiaid tantiadonec bëdamboec tabadquin utsi ismequid nec. Aden ismiac Nuquin Papan chiaid tantiaquid daëdpactsëc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshë yanendac –quepondash Esus abëd icquido tantiamenuc.

Tabote nënantan nanac chënquiacbimboec ictiad quiaid

(Duc 8.16-18)

²¹ Aden chuishumbic abëd icquido naden Esusën chuipondash: –¿Tabote icbon ambi dayun uaboed taboshon tsadte tédion nanshun isaidta nedic? Adembidi ¿Tabote matsun bëtashun isaidta neoadic? Padenquo. Nënantan tabote nanac chënquiacbimboec ismenu quec ictiad.

²² Adquiobidi abi yacno yuedanquid ambi dayun uapampidi nëbi Nuquin Papan dayun uainquiocquin ëbi chomeshun ismec. Adembidi con mado chuiban quenquiocboedëmbi nëbi ëbi ismec ma con mado chuibanu quequid con Pa nec.

²³ Ambi chiaid tantianu qeshun tantiaquiec papuedta –quepondash Esus.

²⁴ Aden chiash Esus: –Chiaid bëda tantiatequidquo iquec qeshun tantiaquiec papuedquid icta. Aden chiaiduidi tantiec papuedquid abipadquid bëdamboecquid ambia tantiaquidën Nuquin Papan mibi icmendac.

²⁵ Adquid ambi tantiaoniaidquo iquendac. Aden tantienquioctsëcquidën tantiaid bëda uesadendac nibëdquiec –quepondash.

Ambi siaboed icbon isenquiocnoc bacuëc quiaid

²⁶ Adec onquequin abëd icquidquo chuishumbic cho-choquidtsen naden Esusën chuipondash: —Nuquin Papan shubu abentsëquën tabadec caidaidquo chuibanu. Tantiata. Nidaid bëdan tiedën caniquid pete ëshë siash

²⁷ tabadquin cainquidquo icbo nec. Dadpen ushquin ambi seboed isenquoio yec icbo tabadnubi

²⁸ ambi seboed dëyucash caniec taitanec bacuëec.

²⁹ Ambi siaid isenquiocnoc canitanec bacuëacsho badedquoio bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidën isenquiocnobi. Papuedquioshon tantiabenec. Adquid isash con shubun puduedquido neque. Bednu quependac Nuquin Papa —quepondash Esus.

Mostasa caid ëshë chiaid

(Mat 13.31-35; Duc 13.18-19)

³⁰⁻³² Adec onquequin chuibanashic Esus: —Nadquoio Nuquin Papan shubun icquido iqueque. Chuinu. Tantia. Mostasa caid pistsec ëshëmpi ictsëcquid nësecaid dëyucash nuamboshë caniec cuidi-cuidipambo iquec shubu-shubupambo yec podoe. Ambo uicchunën shubu uaic. Adomboebidi aton shubun abi tantiaquid dadpen dayun uaquid Nuquin Papa nec —quepondash.

³³ Aden chuibanshumbic adomboebidi Esusën chuibampondash. Aden chuibanash, aidtedquoio tantiapec abibi queshumbic aden chiaid chuiquin ëmpondash Esusën.

³⁴ Aden abited chuibanshumbic abëd icquidouidtsëqui bëdamboen tantiamequin chuipondash.

Acte tëccoasquaid ënëd cac ënëdaid

(Mat 8.23-27; Duc 8.22-25)

³⁵ Adashic abi ushëmbi inchëshbudtsëc cano antabëdtoanec Esus: —Chian uquë cuëma utsiuc nuquiuidtsëqui nidnu. Nid —quiampondash abëd icquido caic.

³⁶ Aden chiac chian cuëman tabadcuededquido niananec badedquoio nidquin canon Esus buampondash. Abëd icquidon potenubien cano antabëdtoanquin utsin-utsinquin potepondash.

³⁷ Aden potenubien cunquequid dapan acte tëccoasquequin cano acte uemiaidën mentoatdsempondash Esus tëtadec ushñubi.

³⁸ Adec uec usho: —Cunquequid dapan acte tëccoascaidën nuqui mentoeque. Isucunta, icbo —quequin Esus timpondash.

³⁹ Aden tinac uëtsëdtoshon Esusën: —Mibi comapenec cunqueque. Ënëd —cac badedquoio ënëdpondash. Adembidi: —Mibi comapenec tëccoasqueque. Ënëd —cac badedquoio ënëdoapondash acte.

⁴⁰ Aden ënëdmetanec Esus: —¿Atotsi quiash ëbi tantienquoio yec dacuëdcuedede? Ëbi tantiesa mibi nepec —quepondash abëd icquido caic.

⁴¹ Adec Esus cuëmbi badedquoio cunquequid dapa ënëdposh. Adecbidi acte tëccoasquequid ënëdoaposh. ¿Mitsipadquidën napeba? Ënëd cacpadequi ënëdposh —quec abibi onquecuedequi uëdëquianquipondash abëd icquido.

5

Mayan icsa dadpen dapuedaid bëdamiaid

(Mat 8.28-34; Duc 8.26-39)

¹ Adshumbic acte tëccoasquec ënëdmebon nidquimbi cuëma utsiuc potiaish nidaid Cadada cashumbic Quedasa caid yacno choapondash.

² Ambobi choash pudundosho mayan icsa dapuedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash.

³ Aidi unësaid chococate cuënote dapa shëcuë uaidën tabadquid icpac caondash. Aidi shocosh bucun mëdantebëdta taë taniaid icboedi nadatiambo yanshobi mëtanetiapimbo yampac caondash.

⁴ Abi mëtaniaid shocosh bucu seccuduatanquin tës-tëstenepec caondash. Adosho isac abi tanebocpadquid utsi nibëdpac caondash.

⁵ Aidi inchëshën capucuenequi mëyanacimboc sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

⁶ Aidi abi yacno Esus canon chosho isanec titinquianec choash: —¿Tsusio, ada cho? —quiashic:

⁷—¿Mibëd icquidtabi nedi? Mimbi namiaidpenquo nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquo iquembi. Abimbo chiemi quequin ëbi chuita —quepondash mayan icsa dapuduedaid Esus chiec.

⁸Adec mayan icsa dapuduedaid abi onqueshobien Esusën: —Dapuduen —cashic:

⁹—¿Tsutsi cuëmëdquid mibi ne? —quepondash Esus.

Adoaquien: —Dadpenquioshë. Cuëte podotedi dapuduedondaid nebi —quepondash mayan icsa dapuduedaid abentsëc yacimboec onquec.

¹⁰Adashic: —Mibi nadatiambocquid cadoque. Èbitedi chian anëdënquiacno nidmenquicnuequin ¿nëid nidaidën adabi tabadmetsia? —quepondash mayan icsatedi.

¹¹Adnubien macuësh potseshun chancho dadpenshun pec tabadpondash.

¹²Aden pec tabadsho isashien: —¿Ada mimbi ëbitedi chancho dapuduedmetsia? —quepondash mayan icsa Esus caic.

¹³Adoaquien: —Dada dapuduencuededash chancho dapuduedcuededta —Esusën cac dapuduededdash acte dapa quiusudacnombo compapenec niquec pudun-pudunec mentoadbudnepondash chancho nibëdquieic.

¹⁴Adsho isash chancho pemequin isquido chiec nidanepondash. Adec nidquimbi shubu dadpen icquid uano-uanoec tabadquido chuituidac aidotsen isec cho-chopondash.

¹⁵Esus yacno cho-choshon mayan icsa dapuduedaid bëdamiosh quequin chuituidac mayan icsa dapuduedaid icboed naden isbededpondash. Dashcute dasiuidesa icboedi dasiuidash tsadsho abimbo iquec quequin isbededpondash. Aidën tantienquicboedi tantiec tsadsho adembidi isbededoapondash. Adec tsadsho compapenen isbededequi nadatiambocquin naid nepec quetsëcquieic tabadcuededpondash.

¹⁶Adec tabadsho isun mayan icsa dapuduedaid bëdamequin chancho dapuduedmesho isboedon cho-choquido tantiamenuen chuibampondash.

¹⁷Aden chuisho tantiaishun cho-choboedon: —Nëmbö tabadenquo yec nidec nid. Mibëd tabadtiapimbo iquebique —capondash compapenen Esus chushcaquin.

¹⁸Adsho tantias cano yacno nidequi cano Esus antabëdtonobien mayan icsa dadpen dapuduemoed choash: —Mibëd icte bunebi. ¿Adabi buane? —quepondash.

¹⁹Adoaquien: —Padi. Min shubuno nidtan. Ambo nidshun mibi bëdamequin mayan icsa dadpen dapudumeboed Nuquin Papa tantiaquin chuiban. Nuquin Papan ëbi ad icsho unësquicquin dapuduemiac quequin chuiban —quepondash Esus.

²⁰Aden Esusën chiaquien nidpondash. Nidequi shubu dadpen icquid yacno-yacnomboec nidane nidaid Decapodis caid yacno choshon Esusën naid chuiban-chuibampondash. Aden chuiban-chuibansho tantiaquidtedi, Adopenshenda Esusën bëdamias, quec abibi onquec tabadcuededpondash.

*Nua intac budaid bëdameshun champi unësaid bëdamiaid
(Mat 9.18-26; Duc 8.40-56)*

²¹Adshumbic canon Esusbëd icquidon padpiden abi chobocmibidi chian poteapondash. Adec chosho isash matses dadpen chian cuëmano padpidec cho-choashun mananuc Esus pudundotsëcshobi badedquo tsucus-tsucustsëcquo yec datsidadpondash.

²²Adnubien Nuquin Papan chiaid chuibante shubun tabadquido isquid, Aido cuëmëdquid, chopondash. Adec choquimbi Esus istuidash mibi bëdambocquid nec quequin ismenuec Esus tauebudshun:

²³—Con champi unëseque. Aid mishquin bëdamec cho —cac

²⁴Aidobëdi Esus nidpondash.

Adec nidshobi matses dadpenshun tsibanampondash. Tsucus-tsucustsëcquo yec nidquin Esus tsibanampondash.

²⁵Esus tsibanquidquid chido utsi icpondash. Aid chido seta 12ted matamec intac budash bëdanenquicquid icpac caondash.

²⁶Dauë meniaqui bëdanenquo icpac caondash. Dauëchoquid utsi-utsien piucquid menequin dauë bedshun chequi bëdanenquo yec intac nuambo yampac caondash aton piucquid naimëdhubi.

²⁷Adec intac icnubi capuquin Esusën nabanaid chuisho tantianec nidquimbi matses dadpenshun tsibananubi aidëntsen tsibanampondash. Aden matses dadpenshun tsibananubi ismenquicquin cachoc choshon Esusën dashcute mishpac caondash.

²⁸Aden aton dashcuteuidtsëqui mishec bëdampatsias icmane qeshun mishtsequi bëdampac caondash.

²⁹Intac bëdanenquicquid Esus mishec bëdampac caondash. Èmbi tantiacpadquiequi bëdanobi quequin ambibi tantiapondash.

³⁰Adec chido bëdanubien ëmbi nadatiambocquin naoc quequin tantiec amibidi bidi-adquin isec Esus: —¿Tsuntsimbini mishposh? —quepondash.

³¹ Aden chuisho tantiashun abèd icquidènquoio: —Tsucus-tsucustsècquoio matses dadpen iquec, ¿tsuntsimbini mishosh, quecta ique? —capondash.

³² Adec abèd icquid cuèdnubi onquencuioquin, ¿Midaquidènquoio mishoshibique? Isnu, abibi quequin matses utsi-utsien béispondash Esusèn.

³³ Aden béisbanubi, èmbi mishoc quenquoio yec bédamboed uèdèquec choequi mibi nada-tiambocquin naquid nec quequin tantiequi Esusèn taèno uebudshun abi mishec bédanaid chuibampondash.

³⁴ Adoaguien Esusèn: —Champi, mimbi tantiacpadquequi mibi bédanoc. Dada icsambo ichoedi nèbi dada bédambo mibi iqueque. Bédambo yec nid —capondash chido chuiquin.

³⁵ Aden nidmenubien Aidon shubun icquid cho-choshon: —Min champi unèsoshe. Tsusio chomenda —capondash Aido chuiquin.

³⁶ Adnubien Aido Nuquin Papan chiaid chuibante shubun tabadquido isquid caic: —Dacuèdenquioquin èbi tantiata —quepondash Esus.

³⁷ Aden Aido chuishun Esusèn: —Cho-choenda —capondash abi tsibanuequido chuiquin. Aden chianec Petedobèda Acobo Uan, Acobon utsimbo aitedi buanec Esus nidpondash.

³⁸ Adec nidequi Aidon shubuno choquin comapenec shubicuededsho tantiatuidpon-dash.

³⁹ Aden tantiequi puduedash Esus: —¿Atotsi quec comapenec shubicuedede? Champi unèsenquoio yec ushachimboec uec nec —quepondash.

⁴⁰ Adshobien tantiesha icquin mamènshumbededpondash. Adoaguien aitedi puduemiasch champin tita aton papa chedo abèd icquidbèd champi yacno Esus puduedpondash.

⁴¹ Ambo choshon mèdante mèdintanquin Esusèn: —Talita, cumi —capondash. Aton onqueten, Champi, isucunash nidto, quequin adopondash.

⁴² Adoac badedquio isucunash nidtoash capupondash. Champi seta 12ted icquid nion-dash. Aidi bédansho isun abitedishun, Adopenshenda iquec quequin isbededpondash.

⁴³ Aden champi bédameshun Esusèn: —Èmbi naboeed utsi chienda. Abimbo caimbi. Abentsècquiobi chienda —capondash. Aden chuitanequi: —Champi peme —quepondash Esus.

6

Abi icnèdacnoshon Esus chieshènquido (Mat 13.53-58)

¹ Auèshquoio puduanec nidequi abi icnèdacno Nasaded caid yacno Esus choapondash. Abèdi abèd icquido chopondash.

² Ambo tabadashic chonoadtemaid ushèn Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusèn. Aden chuiban-sho tantiencuioquin abentsèc: —¿Mitsishun chuiban-sho tantiashun adomboen Esusèn chuibampec? —quepondash.

Adnubien utsi: —¿Mitsicquidèn ismiac Esusèn nadatiambocquin nabampec? —queoapondash.

³ Adnubien utsi: —Nèmbocquid, cuète nacnenquid, Osen mado nec —queoapondash.

Adnubien utsi: —Ani Madia nec. Aton utsibo nèidtedi nèmbi tabadquid nec. Nèidic Acobo, utsibic Ose, utsibic Udas, utsibic Simon. Nèmbobidi aton chibi chedo tabadoaic —quetsècquieq tabadec onquecuededec chieshucuededpondash.

⁴ Aden chieshènquid Esus nadpondash: —Utsi yacno nidshun Nuquin Papan chiaid chuiban-sho tantiencuioquin dadpen icnubi abi yacno chuiban-sho chieshènquid aton matses iquendac. Aton shubun icquido adecbidi iquendac —quepondash Nasaded yacnocquido chiec.

⁵ Aido abi chieshènquid icsho isun nadatiambocquin nabantiapimbo icpondash. Èbi bédamepec quequin tantiaquidquido daèdpactsèc icsho mishquin bédamepondash.

⁶ ¿Atotsi quish èmbi chiaid tantiatiapimbo icpec? Adembidi nadatiambocquin nasho istiapimbo icpec quepondash Esus abibi onquec.

Abèd icquido Esusèn nidmiaid (Mat 10.5-42; Duc 9.1-6)

Adashic auèshquiobi puduanec nidaniash shubu daèdpactsèc yacno puduedcuenequin Nuquin Papan chiaid Esusèn chuibenepondash.

⁷ Adec cuenadquin chuibanecqui abèd icquido caic: —Cho —quetanec tabadtuidpondash. Adec tabadtuidash Esus: —Nèbi mibi daèdshun-daèdshunquien chuibanec nid. Chuiban-quimbi mayan icsa dapuduedaid dapudemeta.

⁸ Nidquin dadpen mitsana sauedshun buanenda.

⁹ Tapucudte sandadia caiduiditsëqui tapucudash nidaneta. Adecbidi utsi bedenquio yec mibi dasiuidaiduiditsëqui dasiuidec nidaneta.

¹⁰ Shubu dadpen yacno nidash mibi yuedaid shubun puduedash ambouidi tabadquin chuibanta. Auëshquio puduanec nidequi shubu dadpen yacnobidi nidshun adquiecbidi tabadquin chuibanoata. Adenuidi naquin chuibanta.

¹¹ Mibi yuedquid nibëdsho isash nidaneta. Auëshquio nidash shubu ënëdacno choash, Nëmbo icquido tantiate icsachoquid yec abibi cuidadtequido nec, Papa. Adquid icsho isun abi capuaid nidaid pututedi tasequequin Nuquin Papan chiacpadomboen ismeta – capondash Esusën abëd icquido chuiquin.

¹² Aden Esusën chiaquien nidanepondash. Adec nidshumbic, mibi icsaid ënshun padpiden tantianu quenquiocquin Nuquin Papan chiacpadomboen nabanta quequin chuibampondash Esusën nidmiaidon.

¹³ Adembidi mayan icsa dapuduedaid dadpen dapuduemepondash aidëmbidi. Adembidi nënquid dadpen daicsaid chedo cuëte bacuë bëchichoquid ënë dachinquin bëdameoapondash Esusën nidmiaidon.

*Uan acten mentoanquid mapi butiaid
(Mat 14.1-12; Duc 9.7-9)*

¹⁴ Adnubien, Chuibanquimbi Esusën nadatiambocquin nabanosh, quequin isboedon ancanquid Edodes chuipondash. Aden chuiban-chuibanac dadpeshun Esusën nabanaid tantiapondash. Aden tantiash: –Uan acten mentoanondaïd mapi butemeboed uincuem-pash icnui. Adec uincuenshun nadatiambocquin nabanec nepanui –quecuededpondash tantiaquido.

¹⁵ Adnubien utsibo: –Ediasien nechitec. Nuquin Papan chiampicpadquieç choashien nec –quecuededpondash.

Adnubien utsibo: –Nuquin Papan chiaïd chuipampidien Esus yanchitash –quecuededpondash.

¹⁶ Adnubien Edodes: –Ëmbi mapi butemiondaïd, Uan pado, uincuem-pash icnui –quepac caondash.

¹⁷ Ënden aidëmbi Uan bedmeshun tanemeshun quënën nauedmepac caondash. Aidëmbi aton utsin chido, Edodias caïd, bedacsho isash:

¹⁸ –Min utsin chido mimbi bedaid natemaïd niosh –qeshun Nuquin Papan Moises dada uamepampicpaden Uanën Edodes chuipac caondash. Adoac, Uanën chuïsho dadpeshun tantianushe qeshun Uan bedmeshun quënën nauedmepac caondash Edodesën.

¹⁹ Adoacquien Uan Edodiasën chieshëinquin: –Uan cuesunemetiaidquidi mibi nec –quepac caondash aton bënë Edodes caic.

²⁰ Uan bëdambocquid Nuquin Papan chomiaïdbidi nec qeshun Edodesën Uan cuesunemetiapimbo iquec cudaspac caondash con chidon cuesunemenushe quiaish. Aden tantiaquin Edodesën abi tsadacno Uan chuïbamenuen chomednepac caondash. Uanën chuïbansho tantiash: ¿Atotsimbi nëïd napeba? Ambi chuïbanaïd bëdambo iquec. Aidën chuïsho tantiash bëdambo iquebi, abibi qeshumbic Edodesën chomedednepac caondash chuïsho tantianuen.

²¹ Adnubien aton chido bunacpadomboen Uan cuesunemete ushë chonobi naden napac caondash: Aton bënë abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnocquido chuïquid dapabobidi chomeoapac caondash.

²² Aden aïtledi cho-chomiaish tabadnubien aton chidon champi puduedpac caondash. Puduedacsho: –Baidata –cac baidapac caondash. Adsho isash: –Bëdamboen mimbi naoc –quecuededpac caondash Edodesën chomiaïdo champi caic.

Adec onqesho tantiashien Edodes aton chidon champi caic: –Mibi bunaid mibi menenu. Ëbi chui.

²³ Abimbo caimbi. Mibi bunaid ëbi chuita. Mitsanatedi bunebi ëbi casho tantiashun dadpen mibi menembi –quepondash.

²⁴ Aden Edodesën chuïsho tantiash: –¿Atotsimbi bumpeba? –quetanec aton tita yacno puduedshun: –“Mibi bunaid mibi menenu. Ëbi chui,” Edodesën caoshi. ¿Atotsimbi chuïpe, tita? –quepac caondash ani chieç.

Adsho tantiashun anin: –Uanën mapi bunebi quequin chuita –capac caondash aton champi chuïquin.

²⁵ Aden chiaquien badedquio Edodes yacno titinquec choec puduedshun champin: –Nëbimbobi Uan acten mentoanquidën mapi maspanën nandoshon ëbi mene –capac caondash anin chuïbocpadomboen chuituidquin.

²⁶ Adsho tantiash Uan tantiec unësquio icpac caondash Edodes. Adec unësquiocquin ambi champi chiacpadomboen natiapimbo iquec ëmbi chomiaido quenushe qeshun adoembi abibi qeshun:

²⁷ —Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin

²⁸ maspanën nandoshon bëshun champi meniac bedshun champin aton tita menetuid-pac caondash.

²⁹ Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chocopac caondash.

Dada 5000ted Esusën pemaiid

(*Mat 14.13-21; Duc 9.10-17; Uan 6.1-14*)

³⁰ Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash.

³¹ Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquo iccuededpondash Esusbëd icquidon. Adnubien Esus: —Matses nibëdacno tabadec nidnu. Nid —quepondash abëd icquido caic.

³² Aden chiashic cano antabëdtoanec matses nibëdacno nidpondash aيتدtedtsëqui.

³³ Adec nidsho isash matses dadpen abi nidte yacno tantiec: —U nidanec —quiash titinque choec abia cho-chopondash. Abia titinquequid cuensho isash utsi-utsiec dadpen titinquec cho-choapondash.

³⁴ Adec aيتدtedi abia cho-choambien Esusbëd icquido choapondash. Pudundoquimbi matses dadpeshun abi cainec tabadsho isashien Esus, Abi tantiamequin Nuquin Papan chiaid chuiquid nibëdacbimboecuc matses cho-choec quequin tantiec unësquio iquebi qeshun tauain chuibampondash Esusën. Yuen chuibampondash.

³⁵ Yuen Esusën chuibanubi ushë budpondash. Ushë budsho isun abëd icquidon: —Icbo, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme.

³⁶ Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

³⁷ Adoquien Esusën: —Mimbibi nëidtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquo yoc —quepondash abëd icquido Esus caic.

³⁸ Adoquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquobi matsesën bëaid isbanash abëd icquido: —Panëmpi sincoted icnubi nuëcquid doted iquec —quepondash.

³⁹ Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin.

⁴⁰ Adoac ambi chiacted-tedquiec tabadbudpondash.

⁴¹ Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nëbi mimbi nadatiambocquin naid ismembu —qeshun cuësh-cuëshun: —Meneban —Esusën cac abëd icquidon menebampondash.

⁴² Menebanac piash: —Padi. Piombi —quecuededpondash pequido.

⁴³ Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash.

⁴⁴ Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanenquiocquin dadatedicttsëqui tambampondash 5000ted iquec quequin.

Acte bëntse Esus choaid

(*Mat 14.22-27, 34-36; Uan 6.16-21*)

⁴⁵ Aden iccuededquido pemiasic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedi nidmembu —quepondash Esus abëd icquido caic.

⁴⁶ Adoac canon potenubi matsestedi nidmianec matses nibëdacno macuësh yacno Nuquin Papa chuinuec Esus nidpondash.

⁴⁷ Adnubien inchëshbudtsëqui abëd icquido acte nënantanquio canon noadpondash. Ambobi noadnubi Esus abentsëqui mananuc tsadpondash.

⁴⁸ Ashunquio Esusën isaquien abëd icquido bëdiacttsëcquio nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadti-pimbocnoc acte bëntse choquin abëd icquido Esusën ismetuidpondash.

⁴⁹ Datantsensho isash, Mayambien nechitec, quequin ambibi tantiec sidquecuededec

⁵⁰ dacuëdcuededpondash.

Adsho isumbien: –Ëbibi nebique. Dacuëdenquoio yec tabadta –capondash Esusën.

⁵¹ Aden chuitanec cano antsadtonobi comapenec cunqueboedi ënëdpondash. Aid ënëdsho isash: –Adquidshenda nepec –quepondash abëd icquido.

⁵² Panëmpi daëdpactsëc ictsëcquid matses dadpen menebamboedën naid nec quequin tantienquiocondash. Adembidi Esus acte bëntse capusho isun, Nadatiambocquin nauquidën naidbidi nec, quequin tantienquio icoapondash pamunacbimboecquin.

⁵³ Ashunquio chian potiashic nidaid Quenesaded caid yacno choshon cano nëshpondash.

⁵⁴ Aden nëshash mananuc pudundosho isec anocquido, Aidi bëdamaianquid nec, quequin ambibi tantiaquimbi

⁵⁵ daicsaid aton ueten nandoshon Esus yacno bë-bëpondash.

⁵⁶ Adecbidi shubu dadpen yacno-yacnomboec Esus puduedcuenesho isun adembidi anocquidon, Bëdamequid nec, queshun daicsaido bë-bëpondash. Adoac –Min dashcute ëbi mishme –capondash bë-bëaidon. Aden ambi tantiacpaden Esusën dashcute mishash bëdancuededpondash.

7

Nuquin Papan paucaid

(Mat 15.1-20)

¹ Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon,

² Ëmbi mishboed mishtemaic ictsias, quesa iquec tsusedpabon chuinëdacpadquiec mëpanudabi Esusbëd icquidon pesho ispondash.

³ Padiseyobo isadaidbobidi yec tsusedpabon chuinëdacpadquiec penush mëpanudanequid nec.

⁴ Tiedën caniquid ambi piucquid menequin bedacnoësh choec adecbidi penush tsusedpabon chuinëdacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaic utsi-utsiec dadpen iquec. Ambi chuinëdacpadomboen dëshotetsen cachonouidi dapanquidquibidi nec. Adembidi matsu nacnenaic cachonouidi dapanoquidquibidi nec. Shocosh matsu cachonouidi dapanoquidquibidi neoaic. Tsusedpabon chuinëdacpadomboen nauquidquio nec.

⁵ Aden nabanquidquio padiseyobo nec. Adquibidi abipadquid utsibo isadaidbo tsusedpabon naden nata quequin chuinëdaic tantiaquid neoaic. Adec tsusedpabon chuinëdacpadquiec Esusbëd icquido mëpanudenquiocsho isash padiseyobo: –Atotsieshun mibëd icquidon tsusedpabon chuinëdacpadomboen nainquiocquin mëpanudabi pepec –quepondash Esus caic.

⁶ Adoquien Esus: –Isayasën ëndenquio dada uaquin mibitedi bëdamboen chiampidpadquid mibi nec. Ambi dada uampid nad iqueque. Tantia:

“Nuquin Papa bëdamboquid nec quequin chiacpadomboen tantiesia isadaidbo nec.

⁷ Abia Yampidënquio Nuquin Papan nadomboen nata quequin chiaid tantiesia icquin tsusedpabon nadomboen nata quequin chuinëdaic tantiaquidquio nec.”

⁸ Aden tsusedpabon chuinëdacpadomboen nabanquin Abia Yampidënquio chiaid niacquid mibi nec –quepondash Esus isadaidbo tsusiobo caic Nuquin Papan Isayas dada uamepamid tantiamenuec.

⁹ Aden chuishumbic adomboembidi chuiuoic: –Badedquio Nuquin Papan chiaid chieshënquin tsusedpabon nadomboen nata quequin chuinëdacpadomboen nabanquidquio mibi nec. ¿Aden nauquinda Nuquin Papan chiacpadomboen mimbi nape?

¹⁰ Nuquin Papan chiacpadomboen Moisesën dada uampid nad iquec: “Titan papabëdtan chiaid chieshenquocquin naban.” Adquidën chiaid utsi nad iqueque. Tantia: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec.

¹¹ Mibien tsusedpabon chuinëdaic tantiaquin adoesa nec. Papan na naimëdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuiuoic. Aden chuiquin papabëdta tita tantiaquin nashunenquiocquin Nuquin Papan chiaid niacquid mibi nec.

¹² Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoic utsibo. Adecbidi, Tita, mibi nashunquin menetiapimbo iquebi, queoic.

¹³ Aden chuiquimbi titabëdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinëdacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid

utsibo icmequin tsusedpabon chuinëdaid nata quequin mimbi chiec —quepondash Esus isadaidbo tsusiobo caic.

¹⁴ Aden Nuquin Papan chiacpadomboen niacquido chiashic: —Utsibo, tantiec cho. Mibi bëdamboen chuinu. Bëdamboec papuduedta.

¹⁵ Tsusedpabon chuinëdacpadquieic mëpanudabi mimbi piaid min tantiate icsabudtemaid nendac. Icsamboen tantiec mibi icsaic.

¹⁶ Embi chiaid tantiaquin utsi chuibanta —quepondash Esus.

¹⁷ Aden chiash iccuededquido abi tabadnubi shubun puduedash tabadpondash Esus. Tabadsho isash: —Mimbi chuiboed ëbitedi tantieme —quepondash abëd icquido.

¹⁸ Adoaquien: —Utsitedishun tantienquo icbocpadquido mibitedi neque. Tantia. Mimbi piaidën mimbi tantiaid icsabudtiapimbo iquec.

¹⁹ ¿Min tantiate yacnoda mimbi piaid nidpec? Padenquo. Mimbi piaid min pucu yacno bud-budec auëshquio chimu nëncuenash pudueneç —quepondash abëd icquido caic.

²⁰ Aden chiec onquiashic: —Mimbi tantiacpadquiequi mibi icsabudec.

²¹ Chido mimbi inacmaid isash chudtiadquio iquec quequin mimbi tantiacpadomboen chido isuidtiapimboquin mimbi chudted-chudtedec. Utsin na bedtiadquio iquebi quequin mimbi tantiacpadomboen mimbi ampec. Cuesunetiadquio iquebi quequin mimbi tantiacpadomboen mimbi cuesunepec. Utsin chido chudtiadquio iquec quequin mimbi tantiacpadomboen aidi mimbi chudpec. Dada utsin ëbi bëdaidquiosho ispec quequin mimbi tantiacpadomboen min bënëpenquo chudmequid mibi nec.

²² Utsin bedactedi bednu quequin mimbi tantiacpadomboen bedquid mibi nendac. Adecbidi utsin bedaid isash adomboebidi bednu qeshun isuidesa iquec adomboen bedbanquidquio mibi yampec. Mibibi icsambocquid nec quiaish chieshëmëñquid mibi nendac. Adquid abimbo chiacbimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bëdambo icscho isash chieshënquid mibi icpec. Utsi icsamboen chuiquid mibi nendac. Utsin chuisho, Èbentsëqui tantiaquidquio nebi, quequin mamëshunquid mibi nendac. Adembidi nasho mamëshunoquidbidi mibi nendac. Èmbia tantiaquid nebi, quequin mimbibì nabanaid icsa isash bëdambo iquec quec mibi mamëñec tsadec.

²³ Embi chuiboedtedi icsaquidën naid nec. Aden tantiaquid icsabudte nec —quepondash Esus.

Sidopenisia caid yacnoësh chido ambi tantiacpadquieic bëdanaid
(Mat 15.21-28)

²⁴ Aden chiashic isadaidbo yacnoësh puduanec nidequi isadaidpembo yacno nidpondash. Shubu dadpen icquid Tido caid anoentsëqui yacno choash shubun puduedash: —Nëmbo ëbi choaid chienda —quepondash Esus. Ambi chiacpadpenquiocnoc chuisho tantiapondash anocquidon.

²⁵ Adoac: —Esus chosh —qesho tantiahsien mayan icsa dapuduedaidën tita Esus tabadacno nidpondash. Adec nidec puduedequi Esus tauebudpondash chuiquid dapa nec quequin tantiec.

²⁶ Isadaidpembon chido nidaid Sidopenisia caid yacnocquid niondash. Aidi Esus taebudash: —Con champi mayan icsa dapuduedaid dapudueme, tsusio, —quepondash comapen chiec.

²⁷ Adoaquien Esus: —Mabi con matses isadaidboba bëdamenuc choboc. ¿Bacuëbo cubud-abicnubi opashëmpida pete menequin anin bënëpadic? Padenquo. Adembidi, ¿isadaidbotedi bëdamiabidambi matses utsibo, isadaidpembo, bëdamepadi? —quepondash Esus.

²⁸ Adsho tantiahsien chido: —Icho, mimbi bëdamboen chiec. Padnuen anin meniac bacuëbon pete sananaid cuëshëmpi paëdtsacsho opashëmpin ambibi bedshun pec. Adembidi mimbi nadatiambocquin nabanac isadaidbo dadpen bëdanubi isadaidpembo abentsëc tantiaquid yec bëdanoapec —quepondash chido.

²⁹ Aden chidon chuishobien: —Bëdamboen mimbi chiec. Aden tantiaquid mibi neque. Nidec nid shubuno. Mayan icsa dapuduedaid dapuduenaque. Isec nid —capondash Esusën isadaidpembon chido chuiquin.

³⁰ Adsho tantianec choec shubun puduedquin isaquien aton champi uebocno ënden mayan icsa niquian bëdanash abi ushaidëmbi uec.

Pashu buëd onquenziocquid Esusën bëdamiad

³¹ Adashien Tido caid anoentsëcuësh nidequi Sidon caid matambidanec chian Cadidia caid yacno choapondash Esus. Nidaid Decapodis caid shubu dadpen yacno-yacnomboec capucueniash choapondash.

³² Ambo choash tsadnubien dada icsa, pashu buëd onquenquiocquid, Esus yacno bëash tsadquin: —Nëid mishquin bédame —capondash.

³³ Adsho tantiashun iccuededquido ismenquiocnuen udictsëc dada icsa buanshun aton mëdante bushbi pashun pabiate pausuntanquin chicpondash Esusën. Adshun, min anaten mishnu quetanquin ismequin uicchun mëpidadtanquin pashun ana mishpondash.

³⁴ Aden amishec abuc isec: —Epata —quepondash. Paucud, quec adpondash Esus.

³⁵ Adec Esus cuëdnubi pashu buëd onquenquiochoedi tantiadcuenash onquiampondash.

³⁶ Aden pashuaid bédamiash: —Esusën naid nec quequin chienda —quepondash Esus. Adoboqui niacbidanquin chuibampondash.

³⁷ Aden chuisho tantiash: —Adquidshenda Esus nepec. Ambi naidtedi bédambo iquec. Pashu paucquid nec. Adembidi ana onquesa oncamequid nec —quec onqucuededpondash.

8

4000ted matses Esusën pemiaid

(Mat 15.32-39)

¹ Adashic Esus yacno matses dadpen padpidec cho-choash yuec tabadec bundocuededpondash. Adsho isun abëd icquido chomiash Esus nadpondash:

² —Matses bunec tabadsho isash unësquio iquebi. Daëdec ushec ëbëd tabadquin aton pete uesquin piac.

³ Aton pete nibëdsho isash, Pec nid, quetiapimbo iquebi padishnushe quiash. Ënapenuësh dadpen cho-choash nec —quepondash Esus abëd icquido chiech.

⁴ Adoaquien: —Pete nibëdacno nuqui tabadec. Pemenun ¿Mitsimbo nidshumbimbi pete bedpatsia? —quepondash abëd icquido.

⁵ Adsho tantiashien: —¿Tedtsi panëmpi mitsana iquec? —quepondash Esus.

Adoaquien: —Siete iquec —quepondash abëd icquido.

⁶ Adnubien: —Tabadbud —quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: —Nëid menaban —cac abëd icquidon iccuededquido menebampondash.

⁷ Adembidi nuëccuid dëmishaid daëdpactsëcbidi bedshun: —Mimbi meniaid nec quequin tantiembi, Papa —qeshun: —Nëidtsen menaban —Esusën cac menebanoapondash.

⁸ Aden menebanac piash: —Padi. Piombi —quecuededpondash. Aden piambien napi uaid tsitsanën sandoquin abëd icquidon bedaïd tsitsan sieteted icpondash.

⁹ Peboedo dada caniaid dadpen 4000ted icpondash. Chidon aton bacuëbobëdtambi pepondash.

¹⁰ Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caïd yacno potepondash.

Nadatiambocquin nata. Isnu, padiseyobo quiaid

(Mat 16.1-4; Duc 12.54-56)

¹¹ Aden potiaash tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

¹² Adsho tantiash, Ëbi tantiesa nec, quec unësquio yec tsadequi —Ëmbi naid dadpen mimbi ispaboc. ¿Adosho isboshida, Ëbi isme, queoape? Nadatiambocquin nabanquin ëbi isme caqui ismenquio iquembi. Abimbo caimbi —quepondash Esus.

¹³ Aden chïanec nidec cano antabëdtoanquin uquë cuëma utsiuc poteapondash.

Nuquin Papan chiaïdbëdta ambi chiaïd daëd uaquin chuiquid padiseyobo

(Mat 16.5-12)

¹⁴ Badedquio Esus nidnuesho tantiash cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnuc.

¹⁵ Aden potequimbi Esusën nadopondash: —Pan uanuequidën trico caïd putubëdta bidiscamete acte pistsëc cacushaqui nua yec bidisquec. Adembidi padiseyobon Nuquin Papan chiaïdbëdtabi ambibi tantiashun chiaïd daëd uaquin chuibanec. Aden chuiquidbidi Edodesbëd icquido nec quequin tantiata. Aden tantiashun padiseyobopadquid adecbidi Edodesbopadquid icmane qeshun ambi tantiacpadomboen nabanenda —capondash Esusën abëd icquido chuiquin.

¹⁶ Adsho Esusën chuiboed icsamboen tantiec abëd icquido: —¿Ëmbi panëmpi bëambo yaidta ichon chuipec? —quec onqucuededpondash.

¹⁷ Aden chiec onquecuedednubien tantiaquidquo icquin Esusën nadopondash: —¿Atotsi quiash ¿ada panëmpi bëambo yaid con Icbon chuipec? quepe, mibi? ¿Ëmbi nabamboed isenquoio yec bëshu tsadacbimboecta tsadpo?

¹⁸ Adecbidi ¿Ëmbi chuibanaid tantienquoio yec pashuacbimboecta tsadoapo?

¹⁹ ¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoquien: —Doseted iccosh —quepondash abëd icquido.

²⁰ Adoquien: —Adembidi, ¿nëbi siete panëmpi bedshun matsesën piaid napi uaid tedtsi tsitsanën sandoaid icposh? Chui —caoapondash Esusën.

Adoquien: —Siete iccosh —quepondash abëd icquido.

²¹ Adoquien Esus: —¿Nadatiambocquid Esus nec quequin ëbi tantienquioda mimi icpe? —quepondash abëd icquido caic.

Betsaida caid yacnoshon bëshu bëdamiaid

²² Adshumbic Betsaida caid yacno poteoapondash Esusbëdtambidi. Aden potiaash chosho isun bëshuaid bëpondash anocquidon. Aden bëshun ismequin: —Nëid bëshumbo neque. Mibi bëdamianquidquo icquin mishquin bëdame —capondash Esus chuiquin.

²³ Adsho Esusën bëshu mëdinanquin Betsaida caid anoetsëqui buanshun uicchun bëcuishtuatanquin bëmishec: —¿Ada mimi isequé? Èbi chui —capondash Esusën.

²⁴ Adsho tantiaash Esus isquin: —Bëdamboen isenquiocquin cuète podò inchëshquio yacbimboecnuc mibi isembi —capondash bëshuaidën.

²⁵ Aden chuishobi Esusën bëshuaid padpiden bëmishoquien bëucudquiopondash bëdamboen isec.

²⁶ Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

Quidistu mibimbo neyoc, Petedo quiaid

(Mat 16.13-20; Duc 9.18-21)

²⁷ Aden nidmiashic ancanquid Uedipo caid tabadaid nidaid Sesadeya caid yacno nidequi: —¿Atotsi Matsesën ëbi capec? —quepondash Esus abëd icquido chiec.

²⁸ Adoquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiacpadomboen chomiaidien Esus nechitec, quenubic; utsi-utsiec, Nuquin Papan chiaid ëndenquimbo chiampidpadquidien Esus nechitec, quec —quepondash abëd icquido Esus caic.

²⁹ Adsho tantiaashun: —Ma mibitedishun ¿atotsibi cai? —capondash Esusën.

Adoquien: —Quidistu, Nuquin Papan ambi tantiampicpaden abi yacnoshon chomaidquio mibi neyoc —quepondash Petedo abëd icquid utsibo onquiacbimboen chuioaic.

³⁰ Adsho: —Mimi chuiboed utsi chienda. Abentsëcquioibi chienda —capondash Esusën abëd icquido comapenen chuiquin.

Abi unës uate Esusën chiaid

(Mat 16.21-28; Duc 9.22-27)

³¹ Aden chuishun abi unës uate tantiamequin abëd icquido Esusën chuipondash. Nuquin Papan chomiaid yec matsesacsho isadaidbo tsusiobon chieshënquin ëbi mëyanendac. Aden mëyanquin unës uaqi daëdec ushash uincuenoaindabi, quequin Esusën chuipondash.

³² Abi unës uatequid chuipecshenda niondash. Aden Esusën chiaquien aibdëtsëqui uano nidshun Petedon: —Aden tantiaquin chienda —capac caondash.

³³ Aden Petedon chuisho tantiaash aucbidi biadiadquin abëd icquid utsibo isec Esus nadpondash: —Nidec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matsesën tantiacpaden mimi tantiec —quepondash Esus Petedo comapenen chushcaic. Petedo Satanasbimboecquid nec quequin Satanas capondash Esusën Petedo chuiquin.

³⁴ Aden Petedo chuibanashic abëd icnuec cho-choquid utsibo caic: —Cho —quepondash Esus. Chosho isash: —Esuspadquid icnu qeshun mibi bunaid nainquiocquin ëmbi chiaid tantiaquin nabanta. Èbi mëyanacpadembidi mibi mëyante icnuc niaquenda.

³⁵ Esus tantiaquin ambi chiacpadomboen nanu queboedi unësmanc quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmanc quenquiocquin ëbi chuibanec tabadquid Nuquin Papa yacno tabadendac.

³⁶ Aden aton na dadpen bedbanashic Esus tantiesha yec unësash Nuquin Papa yacno puduedtiapimbo iquendac. ¿Adquidta bëdambo icpadic?

³⁷ ¿Nuquin Papa mitsana menecta abi yacno puduedpatsia? Padenquio.

³⁸ Utsi icnubi dacuëdec Esus tantiaquid nebi quesa chido aton bënë bunenquio yec dada utsibéd tabadquidbimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesha caic, Con utsi nec, quequin Nuquin Papa chienquio iquendambi. Chuiquid dapa abipadquidquio con pan ëbi icmiac ëmbi abucshun uaido mayan bédabobëdi nidaidën choaindabi. Adec aidobëdi choashun ëbi chieshënquid isec, Con utsi nec, queotiapimbo iquendabi –quepondash Esus cho-choquido caic.

9

¹ Aden chiashic Esus: –Nëbimbobi tabadquid ëbi tantiaquid utsi-utsiec unësabicquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac –quepondash.

*Esus bédaidquio icmiaid
(Mat 17.1-13; Duc 9.28-36)*

² Aden chuibanashic 5ted ushash: –Nidnu. Nid –qui nec Esusbéd Petedo, Acobo, Uan, aittedi ambi chiactedi macuësh dapa yacno nidpondash. Ambo nidash tabadquimbi abi bédambo isadaid aidon ispac caondash.

³ Abi dasiuidaid dashcute ichoedi nac-nacquio yampac caondash.

⁴ Edias, Moises, aid daëd ënden yampidi Esusbéd onquesho ispac caondash Esusbéd choboedon.

⁵ Aden isequi: –Chuiquid Dapa, nuquibi nëmbo choash tabadquin mibi isec bédambo iquebi. Min shubumpi 3ted icnuc shubu uanuna mitsana, Moisesën na, Ediasën na, aittedi icnuc –quepac caondash Petedo.

⁶ ¿Atotsimbi chuipe? quetiapimbo yec dacuëdcuededquin aden chuiyac caondash Petedon.

⁷ Adec tabadshobien abu ushu choquidën ambo tabadquidtedi bëtimpac caondash. Aden bëtinacnoëshquobi Esus chiec onquiampac caondash: –Esus, con madombo con dayunquiocquid nec. Adquid icquin chuibansho bédamboen tantiata –capac caondash Nuquin Papan.

⁸ Adsho isbanquin isaquien Esusbéd choboeduidi icoapac caondash.

⁹ Adanec macuësh yacnoësh budtanequi: –Mimbi isboed nëbi chienda. Èbi Nuquin Papan mado matesacsho unësmiac ëbi uincuenan mimbi isboed chuita –capac caondash Esusën.

¹⁰ Adsho tantiasht utsi chienquio yec abi uincuemete ¿mitsipadquio icpec? quec abibi onquecuededpac caondash Esusbéd choboedo.

¹¹ Adec onquecuededash: –Nuquin Papan chomiaidquio choabicnuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ëndenquimboshë chopampic –quepondash abëd icquido Esus caic.

¹² Adoaquien: –Ai, Ediasën matses bédamboen tabadmenuen chiampidpadquidba choendac quequin Nuquin Papan chiaid nendac. Adembidi Nuquin Papan chomiaidquio yec matesash nëbi tabadsho matesën chieshënquin mëyanendac quequin chuiampid nec.

¹³ Ediasën chiampicpadquiec Uan acten mentoanquid chopondash. Aidi choacsho abi bunacpadomboen abi chieshënquidën mëyanac. Èndenquimboshë Edias chiec onquequin dada uampicpadomboen Ediaspadquid chomiaid Uan choshon, Mibi icsaid ënta, quequin chuisho abi chieshënquidën mëyanondash –quepondash Esus abëd icquido chiec.

*Mayan icsan buëd onquetiapimbo icmiaid Esusën bédamiaid
(Mat 17.14-21; Duc 9.37-43)*

¹⁴ Adec onquetanec choquin isquien matses dadpenshun abëd icquid utsibo Esusën niamboed tsusedpabon nadomboen nata quequin chiaid tantiamequidon comapenec onquecuededquin bëtimpandash.

¹⁵ Adnubien Esus chosho isash iccuededquido, Bëdamaianquid choec. ¿Atotsi aidën napat-siashe? Isnu, quetanec titinque choec: –¿Ada cho? –quepondash.

¹⁶ Adoaquien: –¿Atotsi quec ëbëd icquidbëd comapenec onquecuedede? –quepondash Esus.

¹⁷ Adshobien: –Chuiquid Dapa, mibi ismenuen con mado bëombi. Mayan icsan buëd oncamenquio yaid nec.

¹⁸ Aid Mayan icsan comapenen nebudteniac ëbcacush-ëbcacushpambo yec uedeniosh. Adecbidi, uebudash unësaneç shëta chëquëdëshcaic uiosh. Adquio yanesho, Bëombique. Bëdame, cauidombi mibëd icquido chuiquin. Adoaqui bëdamenquio iccosh –quepondash mayan icsan buëd onquetiapimbo icmiaidën papa.

¹⁹ Aden chuisho tantiasht abëd icquido caic: –Esus nadatiambocquid nec quequin ëbi tantiesha mibi nepec. ¿Tedeçtsi icshun ëmbi chiacpaden mimbi tantiabempe? Mibi tantiesha

icsho ¿mitsipadembimbi tantiampepe? –queshumbic: –Madompi bec cho –capondash Esusën.

²⁰ Adsho tantiasun bëpondash. Bëshobi Esus istanquin mayan icsan abi dapuduedaid comapenen cuididicamiampondash. Aden nac madompi uebudec ëbcacush-ëbcacushpambo yec cuididiquepondash.

²¹ Adsho isash: –¿Tedsî seta matamec ad iccondashe? Chui. Tiantianu –quepondash Esus madompin papa chiec.

Adoquien: –Bacuë ictsequi ad iccondash.

²² Cuëte dëtsiadaid nënedeniosh abi dapuduedaidën. Actetsen nënedeniosh unësmenuequin. Mibi bédamequidquo icquin ëbëda tantiaquin ëbi con mado bédameshun –quepondash madompin papa Esus caic.

²³ Adoquien: –¿Mibi bédamequidquo icquin ëbi con mado bédameshun quecta ique? Nuquin Papa nadatiambocquin naquid nec quequin tantiaquidën tantiapadomboen Nuquin Papan naindac –quepondash Esus.

²⁴ Adsho tantias: –Tantiemi. Èmbi abimbo tantienquiocsho isun ëbi tantiam, Icho –quepondash madompin papa Esus caic.

²⁵ Adsho tantiasun matses dadpen titinquec chosho isun mayan icsa chuiquin: –Matses buëd oncamentuicquid mibi nec. Adembidi tantiametiapimbo icmequidbidi mibi neque. Ambo tabadenquo yec dapuduen –capondash Esusën.

²⁶ Aden chiaquien sidquec madompi cuididiquenubi dapuduempondash. Adnubien unësacimboec madompi uesho isash: –Unësosh –quepondash isquido.

²⁷ Adnubien madompi mëdintanquin Esusën uëtsëndopondash. Adoac abembi nidtopondash.

²⁸ Adnubien shubun puduedacsho: –¿Atotsieshumbimbi mayan icsa dapuduemetiapimbo icpo? –quepondash abëd icquido Esus caic utsibon tantienquioncobi.

²⁹ Adoquien Esus: –Dapuduen quequinuidi chuibudaqui adquidquo dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa dapuduen cac dapuduenendac –quepondash.

Abi unës uate chuioaid

(Mat 17.22-23; Duc 9.43-45)

³⁰⁻³¹ Aden chianec nidaid Cadidia caid matanec nidpondash. Nidquimbi, Èbëd icquid 12tedtsëqui chuibanu, quec utsibo ismenquo yec nidpondash Esus. Aden chuibanec nidequi: –Nuquin Papan Madombo matsesacsho bedendac. Aden bedshun meniac cuesuniac uincuependac –quepondash Esus. Abi uincuentequid chiechshenda adec Esus onquepondash.

³² Aden chuisho bédamboen tantienquo yequi dacuëdec ëbi bédamboen tantiamequin chui quetiapimbo icpondash abëd icquido.

¿Mitsicquid chuiquid dapa icpec? quequin chiaid

(Mat 18.1-5; Duc 9.46-48)

³³ Adanec shubu dadpen icquid Capednaun caid yacno Esus choapondash. Adec choash shubun puduedshun: –¿Podquedën choec atotsi chiec onquecuededó? –capondash Esusën abëd icquido chuiquin.

³⁴ Adsho tantias cuëdenquiocpondash abëd icquido. ¿Esusbëd icquid mitsicquid chuiquid dapa icpeque? Tiantianu, quec onquequin ambi chiaid chienquo yec tabadpondash.

³⁵ Adec tabadnubi abi tsadacnoëshi: –Cho –quiampondash Esus abëd icquido caic. Aido choacsho isash: –Chuiquid dapa ëbentsëqui icnu quequid utsi nashunquidbidi ictiad –quepondash Esus.

³⁶ Adec onqueshumbic bacuëmpi abentsëc mëdintanquin abëd icquid tabadacno nënantanquo tsadumbudpondash. Aden tsadumbudshun bacuë icuquequi:

³⁷ –Esus tantiaquid nebi quequin ismequin bacuë yuedquin nashunquid ëbi yuedquin nashunacimboecquid nendac. Èbi yuedquin nashunquid ëbi chomiondaid Nuquin Papa yacno yuedquin nashunoacimboecquid neoaindac –quepondash Esus abëd icquido chiec.

Nuqui chieshënesa nuqui bédamboen chuibanquid nec quiaid

(Mat 10.42; Duc 9.49-50)

³⁸ Adnubien utsin naid chiec Uan onquedopondash: –Icho, mimbi chiacpadomboen utsin chuisho tantiapombi. Aidën: “Esus nadatiambocquin naquidquo nec, quequin tantiemi. Aden tantiaquin aidën chiacpadomboen mibi chiembique. Dapuduen,” cac mayan icsa dapuduemposh. Adosho isun, Esusbëd icquidpenquo mibi neque. Adenda quequin chuipompi –quepondash Uan.

³⁹ Adoaquien Esus: —Padicnuna. Nadatiambocquin naquidquo Esus nec quequin abimbo tantiaquin ëmbi nacpadomboen nabanquidën ëbi icsamboen chuitiapimbo iquec.

⁴⁰ Nuqui chieshënesa nuqui bëdamboen chuibanquid adquid nec.

⁴¹ Abimbo chiembique. Tantia. Esus tantiaquid nec quequin mibi nashunquid Nuquin Papan cuidnanquin bëdamboen naoaindac —quepondash Esus.

Icsa uanquin tantiabenicquid ismequid cuidendac quiaid

(Mat 18.6-9; Duc 17.1-2)

⁴² Abi Esusën onquequin chuibanec: —Adembidi abi icsacpadomboen bëdamboen tantiabenicquid ismequid Nuquin Papan comapenen cuidendac. Adquid abi icsacpadomboen ismiabicsho cuënote yuëmbocquidbëdta têtaneshun acte dapa nënepatecnëdan.

⁴³⁻⁴⁴ Adembidi mimbi icsamboen tantiaquin mishaid ëntiapimbocquin ismedeniad adomboembidi utsin tantiec. Bednu quenquo yec mëtaniacimboec tsad ënëdenquo yec chian anëdënquiacno nidmane quiaish.

⁴⁵⁻⁴⁶ Adecbidi capuquin mibi icsaid mimbi ismebeneque. Capunu quequin tantienquo yec tateshuniacimboec tsadta ënëdenquo yec chian anëdënquiacno nidmane quiaish. Adecc tsadnuc adquiecbidi mimbi ismiaid tantiec tsadendac.

⁴⁷ Adecbidi ëshën isec mibi icsaid ëntiapimbocquin mimbi ismedoniad adomboembidi utsin tantiec. Èshë chichshuniacimboec tsad ënëdenquo yec chian anëdënquiacno nidmane quiaish ma mibi tsadacpadec mimbi ismiaid tsadoapanu.

⁴⁸ Icsa uadenequin ënenquo yash unësash chian anëdënquiacno nidash unësenquicshobi chodquiaid pequid macun mibi pendac. Ènëdenquo yec chian anëdënquiacno mibi tabadendac. Icsadenequin ënenquiocquid comapenen cuidtequid nendac.

⁴⁹ Sa casecac pambid batambo yacimboec Esuspadquid icnu quiaish mibi icsaid ënëdnuen mëmunec mibi bëdambo yampec.

⁵⁰ Sa batambocquid bëdambo iquec. Sa batambocboedi batapenquo yec icsasho ¿mitsipadentsi batambo icmeoapec? Sa batambocquid casecac daëdash batambo yacpadec utsibëd bëdamboec tabadta —quepondash Esus.

10

Aton chido bedshun nidmequid

(Mat 19.1-12; Duc 16.18)

¹ Aden abëd icquido chuiquin nainashic Esus aidobëdi nidaid Cadidia caid yacnoësh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses dadpen cho-choapondash. Adecc chochoshos isun Nuquin Papan chiaid chuibanoapondash Esusën.

² Adecbidi cho-choquid padiseyobon Esus Nuquin Papan chiaid icsamboen chuinu qeshun: —Aton chido bedash bunenquo yanshun cuemec. ¿Aden naicta bëdambo iqueque? Tantienu. Chui —capondash Esus chuiquin.

³ Adoaquien: —¿Atotsi quequin Moisesën chuipampic? —queoapondash Esus.

⁴ Adoaquien: —Aton chido bedash bunenquo yanshun, Con chido icsambocquid nec, quequin ambi tantiacpaden aton bënëna dada uashun nidmiacsho isash, Padi, quenquiocpampic Moises —quepondash padiseyobo.

⁵ Adoaquien Esus: —Nuquin Papan chiaid tantiesa tsusedpabo yansho isash, Padi. Adenda, quenquo Moises icpampic.

⁶ Nadomboen Nuquin Papan tauapampic. Dada abentsëc uashumbic chido abentsëcbidi uashun dada menepampic.

⁷ Adomboembidi nanuic dada aton tita aton papabëd tabadenquo yec aton chido bedash abëdi ambi quënë uaidëmbi tabadec.

⁸ Aden aton chido bedash tabadequi matses abentsëc icboedi daëdec. Matses daëd icboedi abentsëc yacimboec tabadec.

⁹ Aden dada aton chidobëdta Nuquin Papan daëd uacsho ma cuëshëdmenquo icpanuna —quepondash Esus.

¹⁰ Aden chias shubun puduedacsho: —Mimbi chuiboed ëbitedi tantieme —capondash abëd icquidon.

¹¹ Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec.

¹² Adembidi chido aton bënëna bedac aton bënë nianshun dada utsi bedmequid Nuquin Papan menepampid niacquin tantiesa neoaic —quepondash Esus.

Esus yacno bacuëbo bë-beaid

(Mat 19.13-15; Duc 18.15-17)

¹³ Adnubien: Con bacuë mishquin Esusën bédambo icmetsiash, quequin Esus yacno aton bacuëbo anin bê-bépondash. Aden bê-bêsho isun: —Padi. Esusën naid utsi neque. Bacuëbo buantan —capondash Esusbéd icquidon.

¹⁴ Aden nidmesho isash nëishash: —Bacuëbo nidmenda. Ma cho-chono. Anin chiacpadomboen tantiaquidquo bacuëbo neque. Adomboembidi badedquo Nuquin Papan chiaid tantiendac. Nuquin Papan shubu abentsëquën tabadquid aido nec.

¹⁵ Abimbo chiembique. Tantia. Nuquin Papan chiaid bacuëbon badedquo tantiacpaden tantiesa Nuquin Papa yacno puduedtiapimbo iquendac —quepondash Esus.

¹⁶ Aden chuitanguin bacuëbo dayumbanquin mamishec, Nêid bacuë bédambo icme, Papa, quequin Nuquin Papa chuipondash Esusën.

*Na dadpen icquid chiaid
(Mat 19.16-30; Duc 18.18-30)*

¹⁷ Aden bacuëbo chianec auëshquio puduanec nidshobien dada abentsëc titinquec choquin bëquedtanec danëshën sebudash tsadec: —Chuibanquin tantiamianquid, bédambocquid mibi neque. ¿Nuquin Papan shubu abentsëquën tabadnuequin atotsimbi napeba? —quepondash choboed Esus chiech.

¹⁸ Adoaquien Esus: —¿Nuquin Papabêdtabidabi mibi bédambocquid nec, ëbi cape mimbi? Nuquin Papauidtsëqui bédambocquidquo nec

¹⁹ —quequin chiech abi onquec: —¿Nuquin Papan nadomboen nata quequin dada uamiampitëdi nabanquidta ne? Aidedti mimbi tantiapec. Nad iqueque. Tantia: “cuesunianenda; adembidi min chidouidi chudquid icta; adembidi, appenda; adecbidi, utsi chiech muainda; adecbidi, utsin na bedesabimboec muainda; adembidi papabêditan titan chiaid chieshënenda.” ¿Aidedti Nuquin Papan dada uamiampid nabanquidta ne? —quepondash Esus choboed caic.

²⁰ Adoaquien: —Abimbo chiembique. Tantia, Icbo. Aidedti nabanquidquo nebi. Bacuëtsëc icquimbi adquid nabanondambi ënenquiocquin —quepondash choboed.

²¹ Adsho tantiash, Aidbêd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquo menabanquin piucquid bedshun aton na nibêdquid menaban. Aden menabanash Nuquin Papan chiaid tantiaquidquo mibi iquendac. Adec Nuquin Papa tantiaquidquo yec ëbêd iquec cho —quepondash Esus.

²² Adsho tantiash choboed mamënenquo yec unësquo yec nidpondash con na menebantiapimbo iquebi quiash.

²³ Adec nidsho isun abitedi bëisbanec Esus: —Aton na dadpen icquidën, Con na tantiequi Nuquin Papan shubu abentsëquën tabadnu, quequin tantiauidtsec. Adquid Nuquin Papan shubun puduedesa nec —quepondash abêd icquido chiech.

²⁴ Aden Esusën chuisho tantiash, ¿Abimboda capec? quequin ambibi tantiec abêd icquido otacquo tabadsho isec Esus: —Abuido, Nuquin Papan shubu abentsëquën matses badedquo puduedtiapimbo iquec.

²⁵ Adembidi shëcuën puduedte nidaidën capuquid dapan badedquo tantiatiapimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid matsesën badedquo tantiatiapimbo iquec. Ambi tantiacpadequi puduedte bunec —quepondash Esus.

²⁶ Adsho tantiash abêd icquido, ¿Abimbobida capec? quetsëcquiec onquecuededpondash. Adec tabadequi: —Ambi tantiacpadequi puduedtiapimboconoc ¿tsutsi puduedquid icpeba? —quepondash abêd icquido Esus chiech.

²⁷ Adoaquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi puduedtiapimboconoc Nuquin Papambien abi yacno yuedanquid mibi tantiamendac —quepondash Esus.

²⁸ Aden chiaquien Petedo nadpondash: —Chuinu. Tantia, Icbo. Mibêd icnu, quequin abitedi nianondambi. Adembidi mibêd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chiech.

²⁹ Adoaquien: —Abimbo chiembique. Tantia. Esusbêd icnu qeshun Nuquin Papan shubu abentsëquën tabadte iquec quequin chuinuequidën aton shububêdta nianquin aton shubun icquid aton tied chedobêdta nianendac. Adquid ambi nianêdaidedtimboesho

³⁰ daêd uaquin Nuquin Papan menendac. Nêbi shubu utsin-utsinquec mibi puduedcuenec. Adecbidi Nuquin Papan shubu abentsëquën tabadquid abi tantiaquido mibêd icquid dadpen iquec. Adquid icnuc mibi chieshënquidbidi iquendac. Yuecash ënëdenquo yec Nuquin Papan shubun mibi tabadendac mibi chieshënquid nibêdacno.

³¹ Nidaidënshun chuiquid ichoedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid ichoedi Nuquin Papa yacno tabadquin chuiquid iquendac. Nashunesa yec chuiquid ichoedi Nuquin Papan shubun puduedash utsi nashunquid adquid iquendac –quepondash Esus.

Ëbi unës uaindac quequin Esusën chiaid
(Mat 20.17-19; Duc 18.31-34)

³² Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquiec abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: –Ëbëd icquidouditsëqui padpiden chuioanu –quiash Esus nidtuidshun cho-chosho isquin naden abi mëyante chuiquin tauapondash:

³³ –Chuinu. Bëdamboen tantia. Nuquibi Edusaden yacno nidec. Ambo nidacsho ëbi bedshun ëbi matsesaid Nuquin Papan madombo isadaidbo tsusiobo menendac. Aden meniac icsaquidbimboecne ëbi icsamboen chuibanec onquecuededash, Icsambocquid Esus nec. Unës uamequimbien ictiad, quendac ëbi caic. Adec onqueshun ëbi buanshun isadaidpembo ancaquid ëbi meneoaindac.

³⁴ Aden meniac bedshun aidon ëbi oncain mamënsumbededquimbi dacuishtuashumbi cuestanquin buanshun ëbi unës uaindac. Aden unës uac daëdec ushash uincuenoaindabi –quepondash Esus abi uincuenta ambibi chieci.

Ëbi daëdi nashunta Acobo Uambëd quiaid
(Mat 20.20-28)

³⁵ Aden chiaquien Acobo Uambëd Esusën dayuntsëqui choash: –Mibi chinu. Tantia. ¿Ëbi daëdshun chiapadomboen ëbi daëdi nashunenquioda mimbi icpe? –quepondash.

³⁶ Adoaquien: –¿Atotsimbi mibi nashuneque? Ëbi chui. Tantienu –capondash Esusën.

³⁷ Adoaquien: –Abuc nidoash chuiquid dapambo mibi icquin utsi ismequin min dayunquio ëquë tsadumbudcuenquin ëbi daëdi tsadunta –capondash Uanën Acobobëdta Esus chuiquin.

³⁸ Aden aid daëdshun chiaquien: –Tantienuiocquin mimbi chioc. Icsaquid matsestedi nec, quequin Nuquin Papan aido cuidenquiocquin ëbi aton madombo bëdambocquidde cuidendac. ¿Ada ëbipadquid mibi icpatsia? –capondash Esusën.

³⁹ Adoaquien: –Ai, adquid tantiembi –quepondash.

Adoaquien: –Ai, adomboembidi mimbitsen tantiendac –quepondash Esus.

⁴⁰ Aden chieci abi onquec: –Abuc nidash chuiquidquio iquec con dayunquio ëquë tsadbudcuenec tsadec cho, quetiapimbo iquebi. Nuquin Papambien ambi tantiaidquio aden chiendac. Ëmbi padenquio iquec –quepondash Esus Uambëdta Acobo chieci.

⁴¹ Aden Esusën chiaqui abëd icquidquio utsitedi Acobobëdta Uanën chuiboed tantiash nëishcuededpondash.

⁴² Adec nëishash tabadsho isash: –Cho –quepondash Esus. Aden chomish: –Utsi namequid isadaidpembo nec quequin mimbi tantieci. Aidon matses utsi yuaquin mëyanquin namebanec.

⁴³ Aden namesa mibi nec. Chuiquid dapa icnu quiash utsi nashunquid icta.

⁴⁴ Adecbidi tsusio icnu quiash yuabimboe yec utsin namiaid icta.

⁴⁵ Adquid icnuec Nuquin Papan madombo matsesash nidaidën tabadobi. Ancanquid iquenquio yec nashumënquidquio nebi. Adquid yec matses icsaid bedshunash ëbided cuidadec unësendabi –quepondash Esus.

Bëshuaid, Badtimeyo cuëmëdquid bëdamiaid
(Mat 20.29-34; Duc 18.35-43)

⁴⁶ Aden chiashec Edico caid yacno chonobi abi tsibanquid utsibo dadpen chochopondash. Ambo tabadash abitedi puduampondash. Pduanash nidquin isaquien bëshuaid, Timeyon mado, Badtimeyo cuëmëdquid podqued cuëman tsadpondash. Piucquid bednu quequin cainec podqued cuëman tsadpondash.

⁴⁷ Ambo tsadquimbi, Esus Nasaded caid yacnocquid choec, quequin utsin chiac: –Esus, Chuiquid Dapa, Dabidën madon, ëbi tantiaquin nashun –quequin chieci cuëdpondash bëshuaid.

⁴⁸ Adec cuëdsho tantiashun: –Esus cuënenquio yec otacquio tsad –cabededpondash utsibon.

Adnubien: –Chuiquid Dapa, Dabidën madon ëbi nashun –quepondash bëshuaid comapenec cuëdoaic.

⁴⁹ Adoac nidtuidshun Esusën: –Cuënquid chome –capondash.

Adoaquien: —“Chome,” queque. Nidtoash nid —capondash utsibon.

⁵⁰ Adsho tantiaish bëshuaid aton dashcute bëntsecquid chicanec badedquio nidtoanec Esus yacno chopondash.

⁵¹ Adec chosho isun: —¿Atotsimbi mibi nashumpeba? —capondash Esusën.

Adoaquien: —Iste bunebi, Icbo —quepondash bëshuaid.

⁵² Adoaquien: —Esusën ëbi bëshuaid bëuquec quequin mimbi tantiapadquiec mibi bédanoque. Nidec nid —Esus quenubi isbenquiopondash bëshuaidën. Adec bédanshun Esus nidsho isun tsibampondash.

11

Chuiquid dapabimboec yec Edusaden yacno Esus choaid

(*Mat 21.1-11; Duc 19.28-40; Uan 12.12-19*)

¹ Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidedi macuësh Odibos caid potsambo icpondash. Ambo choash ëbëd icquid daëd shubuno nidmenu quequin tantiec nadpondash Esus:

² —Në shubu dadpen yacno nidec nid. Ambo nidshun cabayobiecquidën bacuë cani-abictsëcquid tënëshac tsadsho mimbi istuidendac. Aidi matses catsadabicquid neque. Aidi istuidshun tënëshaid tëchicshun sananquin bëta.

³ Aden bedsho isun, ¿Atotsi canun aid bede? cac, Bëoaimbi. Nëid nuquin icbo bunaid nec, cata. Mimbi aden chiac, Buanec nid, quendac —quepondash Esus abëd icquid daëd chiec.

⁴ Aden Esusën chiaquien abi daëdi nidpondash. Adec nidanequimbi cabayobiecquid caniabictsëcquid shubu shëcuë cuëmano tënëshac tsadsho istuidshun tënëshaid tëchicpondash.

⁵ Aden tënëshaid tëchicsho isun: —¿Mitsipaden tantiaquin ëmbi tënëshaid mimbi tëchiqueque? Tantuanu. Chui —capondash anocquidën.

⁶ Adoaquien: —Tënëshaid tëchicshun bëta, con icbo quebocpaden naimbi —capondash tëchicquidën.

Adoaquien: —Buanec nid —queoapondash.

⁷ Adoac Esus yacno buampondash. Aden bëshun aton dashcute bëntsecquid chicshun cabayobiecquid capucpondash ma chuiquid aidën catsadtonoeshun. Adoaidën Esus catsadtopondash.

⁸ Ademibidi chuiquid Esus nec quequin ismequin utsibontsen aton dashcute bëntsecquid chicbededshun podqued ansambampondash ma chuiquid dapa bédambocquid capunueshun. Ademibidi tantiaquin utsibon budëdbiecquid podo tebededshun podqued ansambanoapondash.

⁹ Aden ansambanash matses dadpen bëyucanec nidanenubi Esus nënantanquio nidnuc aidedbidi tsyuec choquin tsibambëpondash. Adec abitedi nidanec Esus tantiec nadeccuëdëncuededepondash: —¿Adeduya! Nuquin Papan bédambo icmiaid ambi tantiapadomboen chuitanta quequin chomiaid nec. Tsusedpa chuiquid dapa, Dabid cuëmëdquidën tsyuecquid, shubu abentsëqui tabadquido chuiquid dapambo choec nec.

¹⁰ Èbi chuiquid dapa Nuquin Papan abuc tabadquidën chomiaid Esus nec. Nuquin Papa bédamboshë iquec. ¿Adeduya! —quec cuëdëncuededepondash Esusbëd nidquido.

¹¹ Adec cuëdëncuededequi Edusaden yacno cho-chopondash. Choashic Nuquin Papa tabadte shubu uashunaid quënë dadpen yacno nidash Esus puduedpondash. Adec puduedshun abitedi isbanash ushë budtsambi Betania caid yacno nidaneoapondash Esus.

Cuëte bacuësa chiaid

(*Mat 21.18-19*)

¹² Abadiadtsashi Betania yacnoësh nidanec Esus bundopondash.

¹³ Adec bundoshombi cuëte icueda caid podo buntac-buntacpambo ancuenquio nidsho istuidec Esus: —Icueda podo buntac-buntacpambo podoash nideque. Isbono. ¿Bacuëashida neque? —quianec nidpondash. Adec nidquimbi icueda podoudiquio icsho ispondash. Ushë utsin bacuëtiadquidi bacuëabi podopac.

¹⁴ Ad icsho isun Esusën: —Adequi bacuësa icsho ma matsesën chenquio icpanuna —capondash. Aden chuisho tantiapondash abëd icquidon.

Nuquin Papa tabadte shubu uashunaid yacnoshon cuemiaid

(*Mat 21.12-17; Duc 19.45-48; Uan 2.12-22*)

¹⁵ Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puduedoapondash. Adec puduedshun piucquid bedquin piucquid sanaid cuestetedi bidiacbanquin piucquid bednun nidaidën capuquidbëdta podochoquid chedo menebanquidën tsadtetsen nebudquin icbotedi pudue-mebampondash.

¹⁶ Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusën chushcaquin.

¹⁷ Aden chushcashic: —¿Ëbi tabadte shubu uashunaid matsesën ëbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabim-boecquin muaquin piucquid bedte shubu mimbi icmiayoc —quepondash Esus.

¹⁸ Aden Esusën chuisho tantias, Icsambocquid Esus neque. Ünës uatiad, quequin ambibi tantiabededec isadaidbo tsusiobo tabadcuededpondash. Utsiboen: —Chuiquid dapan chiacpadomboen Esusën chiech —quepondash. Adsho tantias, Esus bednu, quetiapimbo yec dacuëdcededec tabadpondash isadaidbo tsusiobo.

¹⁹ Adnubien inchëshbudtsëqui Edusaden yacnoësh nidoapondash Esus.

Cuëte bidiquaid

(Mat 21.20-22)

²⁰ Abadiadtsashi Edusaden yacno nidoaquimbi cuëte icueda caid bidiquiacsho istuid-pondash.

²¹ Aden istuidash Esusën icueda bacuësa chiaid tantiec Petedo: —Cuëte bacuëabicsho mimbi chuibod bidiquiaye. Is, Icho —quepondash.

²² Adoaquien Esus: —Nuquin Papa nadatiambocquin nabanquid nec, quequin tantiaquiota.

²³ Abimbo chiembique. Nuquin Papa nadatiambocquin nabanquidquo nec, quequin abimbo tantiasho isun mimbi chiacpadomboembidi naindac. Aden tantiaquin mimbi nëid macuësh cain, Mananuc tabadboedi adquiecbidi acte nantan tabadoata, mimbi cac nëid macuësh acte nantan tabadoaindac.

²⁴ Ëmbi chiacpadomboen Nuquin Papan naindac, quequin abimbo tantiaquin mimbi chuisho tantiasun Nuquin Papan adomboembidi naindac.

²⁵ Aden Nuquin Papa chuinish mibi utsin icsambocquin naid tantienquo yec bëpiscudta. Adsho abucshun isash Nuquin Papan mimbi icsa uanquin naid tantienquo yec bëpiscudendac.

²⁶ Adenquo mibi icsho isun Nuquin Papan mibi icsa uanaid bëpiscudenquocquin mimbi chiaid tantiatipimbo iquendac —quepondash Esus abëd icquido caic.

¿Mitsicquidën chuibanta caid mibi ne? quiaid

(Mat 21.23-27; Duc 20.1-8)

²⁷ Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo:

²⁸ —¿Mitsicquidën chuibanta cac chuiquid dapabimboecquin mimbi chieque? Tantienu. Chui —capondash.

²⁹⁻³⁰ Adoaquien: —Adembidi ¿Atotsi tantiaquin mimbi chuipe? Chui. Tantienu. ¿Matses mentondaidën, Uan padon Nuquin Papan chuimiapadomboen nabanquinda nadiondash? Padenquo, quequin, ¿Ambibi tantiacpadomboen Uan padon naondash, quequinda mimbi tantiapeque? En chui. Tantienu. Aden mimbi chiac ëmbitsen mibi chiembi —capondash Esusën tsusiobo chuiquin.

³¹ Aden Esusën chuisho tantiash udictsëc nidash isadaidbo tsusiobo onquec nadcuededpondash: —Nuquin Papan tantiamiacpadomboen Uan padon naondash, nuqui qesho tantias, ¿Atotsieshun aidën chiaid tantienquo icconda? qetsias Esus.

³² Naden Uan padon ambi tantiacpadomboen naondash, nuqui qesho tantiasun, ¿atotsi napatsias Uanën chuisho tantiondaidon? Aidon, Nuquin Papan chuimaid Uan pado niondash, quequin tantiabededquin nuqui cuënoten seshunetsias —quecuededpondash.

³³ Aden chiech onquecuededashic —¿Tsuntsin tantiamiacpadomboen Uan padon nabampondash? quequin tantienquo iquembi —quepondash isadaidbo tsusiobo Esus chiech.

Adoaquien: —¿Tsuntsin tantiamiacpadomboen Uan padon nabampondashba? quequin mimbi chienquo yacpadembi ëbi chuiquin tantiamequid mibi chienquo icoaimbi —quepondash Esus abi chieshënquido isadaidbo tsusiobo chiech.

12

Tied icbo nashunta quequin chiaid
(Mat 21.33-46; Duc 20.9-19)

¹ Aden chiashic, isadaidbo tsusiobon nacpadomboen naid nec quequin tantiec utsi chiacimboec Esus nadpondash: —Chuinu. Tantia. Icbon aton tiedèn uba caiduidquo nitsinshun cuate bènitsinaidèn otadnidec cuidian-cuidianec dadpen bacuèec. Sinash didiesho icbon bedec. Aid nitsinshun icbon daquènè uaic. Aden daquènè uashun yuechshun uba ènè chinun tsuc-tsucte nacnemposh. Aden nacnenshun uba ampenushe qeshun isec tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

² “Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh.

³ Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeoaposh.

⁴ Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestanquin aidtsen aton icbo yacno nidmeoaposh tied icbo nashunquidon.

⁵ “Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cuesuneposh. Adembidi, tied icbon nidmiaid utsi-utsien abi tied nashunquidon cuesosh. Aden nabanquimbi utsi-utsien cuesuneposh.

⁶ “Adsho isash tied icbo nadposh: Nèid, con madombo abentsèqui nec. Èbi cudasaid nec. Aidi tsyuec con tied yacno nidmembidi. Aidi chosho isun, Tied icbon madombo nec, qeshun bédamboen istsiash, qeshun aton madombo nidmeposh.

⁷ “Aden nidmiac ancuenquo chosho isash, Tied icbon madombo choeque. Is. Aton papa unèsan aton papa yacpadec icbo icoanushe qeshun tied icbo nuqui icnun aidi cuesunenuna, quecuededposh tied icbo nashunquido.

⁸ “Adec onquetanquin aton icbon madombotsen bedshun cuesuneshun daquènè uaid mabudacquin nebudposh.

⁹ Adoacsho tantiashun çatotsi tied icbon napec? Naden naindac. Utsibèd aton tied yacno nidshun abi nashunuidboed cuesuneshun utsibo abi nashunquido icmendac — quepondash Esus.

¹⁰ Aden chuishumbic Esusèn: —çAdomboembidi chuiquin Nuquin Papan dada uamiampid tantienquioda icco? Nad iqueque. Tantia.

“Shubu uanuequidèn buintad isuidaidi utsin abia nitsinaid icoaposh.

Adquiobidi Nuquin Papan chuimaid matsesèn tantiauidaid iquendac.

¹¹ Nuquin Papan naid bédambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidènquo tantiec”

—quepondash Esus Nuquin Papan chiampidquo chiec. Nuquin Papan shubu abentsèquèn abi tantiaquido yuedanquid nendac, quequin utsi chiacimboec abibi chiadquin Esusèn chuibampondash.

¹² Adsho tantiash, Èbitedishun isuidaidbimboecnuc chuibanec quequin tantiec isadaidbo tsusiobo Esus bedtiadquo icpondash. Adnubien Esus onqesho dadpenshun tantiabed-pondash. Dadpen icsho isash dacuècuedec Esus bednu quenquo yec nidanepondash chieshèmènkuido isadaidbo tsusiobo.

Bec cho quequin bedshunquid nec, quequin chiaid
(Mat 22.15-22; Duc 20.20-26)

¹³ Isadaidbo tsusiobo nidshun padiseyobo edodesbobèda istuidshun: —Nèidon Esus icsamboen chuimetsiash —qeshun aido Esus yacno nidmepondash.

¹⁴ Aden nidmiac Esus yacno choson abentsècshun Esus nadopondash: —Ambia tanti- aquid, matsesèn tantiamiacpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin èbi chui. Tiantianu. Shocosh piucquid bec cho quequin bedshunquid, isadaidpemo ancaquid, Sesad cuèmedquid nec. çAden meniaid bédambo iquec, quequin Nuquin Papan chiaidta nepec?

¹⁵ çAdambi menepeba? —quepondash padiseyobèd edodesbo Esus caic.

Adoquien, Èbi icsamboen chuimenuc adec onquec, quequin ambibi tantiec: —Shocosh piucquid bec cho ma isnu —quepondash Esus.

¹⁶ Adsho tantiashun bèpondash. Adoquien: —Sananquin isme. çTutsibimboecnuc dada uaid iqueque? Chui. Tiantianu —capondash Esusèn.

Adoquien: —Isadaidpemo ancaquid, Sesadbimboecnuc dada uaid nec —quepondash.

¹⁷ Adoaquien: —Ai, aidën na nec. Aid bec cho, qesho meneta. Adembidi Nuquin Papa Nuquin Icho icquin, Nata, cacpadomboen naban —capondash Esusën.

Aden bëdamboen chuisho tantiash, Bëdamboenshenda tantiapec, quequin ambibi tantiec Esus chieshënquido tabadcuededpondash.

Abuc tabadequi, ¿mitsicquidën chido neque? chui quiaid
(Mat 22.23-33; Duc 20.27-40)

¹⁸ Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aido nepondash. Aido cho-choash nadpondash:

¹⁹ —Moisesën dada uapampid nad iqueque. Tantia. chuinu. Chidochoquid bacuë tishmiabi yec unësan unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiaidbimboec ma icpanuna, quequin chuipampid nec —quepondash saduseyobo.

²⁰ Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unëspondash.

²¹ Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën

²² aton utsi unësan aid chidobidi bedshun tishmiambo yec unësoapondash bacuë nibëdquido yec. Adecbidi dadatedi unësbudnepondash. Adecbidi chidotsen unësoapondash.

²³ Adec unësash abuc tabadequi, ¿mitsicquidën chido aid icpatsiashe? Chui. Tiantianu —capondash saduseyobon Esus chuiquin.

²⁴ Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoaic.

²⁵ Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bëda unësesa yacpadquiec mases uincuenash unësesa iquec caidesa nendac.

²⁶ Adembidi unësash uincuenaid tiantianu qeshun ¿Moisesën dada uaid isenquioda ictionda? Aidën cuëtempi abibi nëdënqesho istanec nidtuidquin nadec Nuquin Papa unqesho tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiampic Moisesën.

²⁷ Nuquin Papan chiacpadpenquicoquin Moisesën dada uapampid nec quequin mimbibu muaquin chienda. Chuinu. Tantia. Unësaidën Papa nebi qesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiate icsho ambi uincuen uatequido Nuquin Papan tantiendac —quepondash Esus mases uincuenta iquec quequin saduseyobo tantiamenuc.

Naden nata quequin chiaid ¿mitsicquid adquidpadquid utsi nibëdpec? quiaid
(Mat 22.34-40)

²⁸ Adec Esusbëd saduseyobo onquecuedednubien tsusedpabon nadomboen nata quequin chiaid tantiamequid abentsëc chopondash. Bëdamboen Esusën saduseyobo chuisho tantiash Esus icsamboen chuimenuc aidtsen: —Ëmbitsen tiantianu. Chui. Nadomboen nata quequin chiaid Nuquin Papan dada uamepampid dadpen iquec. Dadpen icnuc, ¿mitsicquid aidpadquid utsi nibëdpec? —quepondash.

²⁹ Adoaquien Esus nadpondash: —Nëid chiaidpadquid utsi nibëdeque. Chuinu. Tantia. “Nuquin Icho Nuquin Papa nec. Nuquin Icho Abentsëcquiobi iquec.

³⁰ Adquid icsho ëbi tantiaquid isash bëdambo iquebi camequin Nuquin Papa tantiadoneta. Adecbidi ëbi yacpadecuidi icnu quenquido yec Nuquin Papa bunacpadquiec icnu quec bëdamboec tabadta. Adembidi ambi tantiacpaden tiantianu quequin adombota. Adembidi aid tantiaquin bëdamboen nabanquiota.

³¹ Aden nabanquin Nuquin Papa bëdambo icmequin utsibo adembidi bëdambo icmequin nabanta. Ëbi tantiaquin utsibon ëbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibëdec —quepondash Esus.

³² Adoaquien Esus icsamboen chuimenuc choboed nadpondash: —Mimbi chuiboed abimbo iquec. Nuquin Papa abentsëcquiobi iquec. Aidpadquid utsi nibëdec.

³³ Adembidi, ëbi tantiaquid isash bëdambo iquebi Nuquin Papa camequin tantiadoneta. Adecbidi mimbi tantiacpadomboen nainquido yec Nuquin Papan tantiacpadquiec icnu quec bëdamboec tabadta. Adquid icquin ambi tantiacpaden tiantianu quequin adombota. Adembidi abi tantiaquin bëdamboen nabanquiota quequin chuitequidpadquid utsi nibëdec. Aden Nuquin Papa bëdambo icmequimbi utsibo adembidi bëdambo icmequin nabanta. Ëbi nashuntiadquidi nec, mimbi cacpaden utsibo tantiaquin nashunta, quequin

chuitequidpadquid utsi nibèdec. Aden naquid Nuquin Papan bédamboen isendac. Aden naisa, Con na Nuquin Papa menenu, qesho Nuquin Papan bédamboen istiapimbo iquendac —queopondash choboed.

³⁴ Aden choboedèn bédamboen chuiosho tantiash: —Nuquin Papan shubu abentsèquèn tabadaid mimbi bédamboen tantiatsempoc —quepondash Esus.

Adoac Esus icsamboen chuimenu quetiapimbo icpondash utsibo.

¿Tsuntsin mado Quidistu nepec? quiaid

(Mat 22.42-46; Duc 20.41-44)

³⁵ Abi icsamboen chuimenuquid utsi nibèdnuc Nuquin Papa tabadte shubu uashunaidèn tabadquimbi Esusèn Nuquin Papan dada uamiampid chuibanquin nadopondash: —Nuquin Papan chomiaidquio tsusedpa Dabidèn mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tantia. Chuinu.

³⁶ Naden Nuquin Papan Mayanèn Dabid chuimiampic:

“Icbo utsi icsho mibi chiembique. Tantia, mado, quequin chiec Icbo Dapa nadpampic:

Èquè con dayun abiucquio cainec tsadec cho ma mibi chieshènquidtedi mimbi namiaid ma icpanu,”

quequin chuipampic.

³⁷ Aden Nuquin Papa icbo dapanquio aton dayunquio chomiaid chiec Dabid pado, Con icbo nec, quiaishic, ¿mitsipadquiec, Con mado nec, queopampic? Nuquin Papan chometequid, aton mado, Dabidèn icbo yec ¿mitsipadectsi Dabidèn tsyuecquid icoapec? —quepondash Esus abibi chiadequi.

Aden chiec onqesho tantiash badedquio tantiatiadquio yampondash utsibo. Bédamboen chiec, quequin comapenen tantiapondash.

Nuquin Papan chiaid tantiamequidon chuisho tantienda quiaid

(Mat 23.1-36; Duc 11.37-54; 20.45-47)

³⁸ Aden tantiamequimbi Esusèn nadopondash: —Tsusedpabon nadomboen nata quequin chiaid tantiamequidèn chuibansho tantienda. Aido nadquid iqueque. Tantia. Tsusio-bimboec isadnu quiaish abi dasiuidaid ènapen icquid dasiuidtenequid aido nec. Adecbidi tantiaquidquio yec tsusio-bimboec isadnu quiaish aton matses dadpen yacno capuquid nec.

³⁹ Adomboembidi èbi isoanu quiaish Nuquin Papan chiaid chuibante shubun puduedash tsusio-bèd tsadec. Adomboembidi ismenu quiaish isedquido dadpen yacno choash shubu icbon dayunquio tsadoaic.

⁴⁰ Aido bédamboen nashumbimboen nianten na ampequid nec. Adembidi bédambocquid nec camenuen yuen Nuquin Papa chiec. Adquid comapenen cuidtequid nendac —quepondash Esus.

Nuquin Papa tantiaquin nianten meniaid

(Duc 21.1-4)

⁴¹ Aden chiashic aton na bedtequid sandote tabècaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidèn nacentsiash quequin aton na bedtequid bè-bèquin sandobansho isec tsadpondash. Adec tsadquin isquimbi aton na dadpen icquidèn aton na bedtequid sando-sandonobi

⁴² aton na daèdpectsècquidquio niantè choquimbi aton shocosh piucquid daèdquibictscècquid sandopondash aton na utsi nibèdquiocnoc.

⁴³ Adosho isun abèd icquido chomeshun Esusèn nadopondash: —Abimbo chiembique. Tantia. Niantè aton na bedtequid dayun uanu quenquioctscècquin Nuquin Papa tantiaquiquin sandoquidquio nec utsibon aden sandoenquiocnobi.

⁴⁴ Utsibon aton na bedtequid dadpen uesenquiocquin sandobededposh. Aido daèdpectsèc icquid sandoacimboen sandoquido nec quequin tantiembi. Adquidpenquio niantè nec. ¿Bednun tedtsimbi dayunoape? quenquiocquin aton na daèdquibictscècquidi nibèdquiocnoc sandoposh nianten. Dadpen icquid sandoacimboen sandosho aid isembi —quepondash Esus.

13

Nuquin Papa tabadte shubu uashunaid chic-chicte chiaid

(Mat 24.1-2; Duc 21.5-6)

¹ Aden chianec Nuquin Papa tabadte shubu uashunaidèn puduenubien: —Nuquin Papan shubu cuènote nacnenaid bèdaidquio iqueque. Is, Icbo —quepondash abèd icquid abentsèc Esus caic.

² Adoquien: —¿Nèid shubu dapa isecta ne? Shubu uaqin cuènote dapa tsindonèdaid mimbi nèbi isaic chic-chiac nibèdquidendac —quepondash Esus.

*Abitedi naimbudte tauanun ismete chiaid**(Mat 24.3-28; Duc 21.7-24; 17.22-24)*

³ Aden chiashic auëshquio nidanec macuësh Odibos caid yacno tabadtuidpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aidted icpondash. Utsibon tantienquiocnoc aidon:

⁴—Cuënote nacenaid nebudte mimbi chuiboed ζmitsipadën nebudte icpeque? Tiantianu. Èbi chui. Adembidi aidi tauanun ismete ζatotsi icopeque? Tiantianu. Aid chuióa — capondash.

⁵ Adoaquien Esusën nadopondash: —Muaquin chiaid tantiamane qeshun Nuquin Papan chiaid isban-isbanquiota.

⁶ Nuquin Papan chomiaid nebi quec muaquid cho-choendac. Aid chosh, quequin chiac utsin-utsinquien, Abimbo caic, quequin tantiabededendac.

⁷ Adecbidi cuesnancuededec quendac. Adembidi cuesnancuededosh, quequin chuituidsho tantiaaindac. Aden chuituidsho tantiash dacuëndenda. Ad icnuc abitedi naimbudte ushë choabi iquendac.

⁸ Ai, adquio iquendac. Adashic abëd tabadquidobëdi cuesnancuededendac. Adecbidi abi ancaquid dapan, Cuestan, quequin nidmiac nidaid utsin icquidobëdi cuesnancuededoaindac. Adecbidi utsi-utsiëc yacno nidaid ishcudendac canchednuc. Adecbidi bunquiete iquendac. Aidtedi icsamboshëcquid taëyendac.

⁹ “Adquid yanubi Nuquin Papan chiacpadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpembo ancaquid dapabo yacno buanaqui mimbi tantiaid Nuquin Papan chiaid mimbi chuibanendac.

¹⁰ Nuquin Papa yacno yuedanquid iquec quequin mimbi chiendac. Nidaidtedi yacnoshon aden Nuquin Papa tantiaquidën chuitiad. Aden chiabicnuc abitedi naimbudti-apimbo iquec.

¹¹ Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ζatotsimbi cape? quequin mimbibi tantiec tsadenda. Nuquin Papan Mayanën mibi tantiamiacpadomboen mimbi chuibanendac.

¹² “Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caindac. Adembidi aton bacuëbo tantiesä icquin aton papan chiaid niacquin adembidi aton titan chiaid niacoaquin cuesunemendac.

¹³ Esus tantiaquid chieshëncuid dapen iquendac. Adquidën mëyanaqui Esus tantiaquid nebi quec niaquesa icta. Aden niaquenquio yec unësash Nuquin Papa yacno nidacsho bëdambo icmiaid mibi iquendac.

¹⁴ “Adnubien Nuquin Papa chieshënte ushë choendac. Aid chonoc Edusaden yacno abi chieshëncuid dapa choash, Nuquin Papa caid nebi, quiaish Nuquin Papa tabadte shubu uashunaidën tsadendac. Adsho isash cuesunenushë quiaish anoentsëqui icquido cuenenquiocboedi ma cuempanuna. Abimbo chiembique. Bëdamboen tantiaata caimbi.

¹⁵ Adecbidi shubu macano pada-padapambo yacno tabadquido yec umanuc decatote uaid dectandoaidën budanec can bednu quenquio yec cuenta.

¹⁶ Adecbidi aton tied nantan tabadquid yec aton dashcute bëntsecquid chicshun dectanaid bednuc bidiadenquio yec badedquio cuenta.

¹⁷ Bacuë usunquid adecbidi bacuë chishmequin buanquid badedquio cuentiapimbocsho mëyampec. Adquid tantiec utsibo unësquio icchitec. Nuquin Papa chieshënte ushë icsamboshë iquendac. Adnuc badedquio cuenta.

¹⁸ Nuquin Papa chieshënte ushë icnuc ma ue dapa sequenquiocpanuna, quequin Nuquin Papa chuided-chuidedta. Adoac ma badedquio cuempanu.

¹⁹ Comapenen Nuquin Papa chieshëncuid abi tantiaquido icsa uaquin mëyanendac. Yuen naindac. Adoaidpadquid ënden nibëdondash. Adecbidi adoaidpadquid nibëdendac.

²⁰ Nuquin Papa ëmenuen chuideneta. Nuquin Papa chuiquin, Chën, Papa, mimbi cainquiocnoc matsteddi nibëdtsiandac. Èbi tantiaquid ambi cuënaido tantiec, Chën, quequin Nuquin Papan ëmendac.

²¹ Nuquin Papa chieshënte ushë icnuc, Nëid, Quidistu, Nuquin Papan chomiaid neque. Isec cho, qesho tantienquio icta.

²² Aid ushë icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshëncuidombidi nadatiambocquid

nabanendac. Adosho isun ëbi tantiaquidëmbi utsin-utsinquier tantiauidtsendac adquid. Nuquin Papapenquio aid nec, quequin Nuquin Papambo tantiata.

²³ Ad iquendac quequin chiombique. Ad icnuc chieshenquiocquin Nuquin Papan chiaid tantiaquiota –capondash Esusèn.

Nuquin Papan madombo choaid
(*Mat 24.29-35, 42-44; Duc 21.25-36*)

²⁴ Aden chiash abi onquec: –Adnubien Nuquin Papa chieshënte ushë nidan inchëshquio yanendac. Badiadën ushëbëdtabi inchëshën chënquequid nibëdquiocnoc unës uaindac.

²⁵ Adecbidi uispa paëdted-paëdtedendac. Adecbidi abuc tabëcaid nibëdnuc ambo icquido Satanasbëd icquido çmitsimbo nuqui cuempeba? quendac.

²⁶ “Adnubien Nuquin Papan madombo matsesaid ëbi choasho matsesën isendac. Abu ushun nadatiambo yec ushumbo yec bëdaidquio iquequi ëbi choasho isendac matsesën.

²⁷ Adnubien Nuquin Papan uaido mayan bëdabo, Ëmbi nidtan, cac nidanendac. Nuquin Papan cuënaido bednuec nidaidtedi yacno nidaneshun bedbanash ëbi tsadacno choec, Bëombi, quetuidendac bedtanec choquido –quepondash Esus.

²⁸ Aden chiashic: –Abi chiembique. Tantia. Suc secduquiac nëbi cunquecuenec, quequin matsesën tantiec.

²⁹ Adomboembidi ëmbi chuibamboed tauadosho isash Nuquin Papa chieshënte ushë choeque. Ista, quec chuinanta.

³⁰ Abimbo chiembique. Tantiata. Ëmbi chuibamboed naimbudabicnuc ëmbi chuibamboed tantiaquidën tsyuecquido naimëdbudenquio iquendac.

³¹ Aden matsesën isnubien nidaidbëdi abu ënëndendac. Ëmbi chiaidtedi abimbo yec adquiouidi iquendac.

Nëid ushënquio tauadoendac, quetiapimbo matses iquec quiaid

³² “Adnuc nëid ushënquio Nuquin Papa chieshënquin tauaindac quetiapimbo matses iquec. Ambi uaido mayan bëdabo adecbidi quetiapimbo icoaic. Aton madombo yec adtiapimbo iquebi. Nuquin Papa abentsëcquiobien adquid tantiaquid nec.

³³ Aid tauadote ushë choaid tantiatiapimboquin Nuquin Papan chiaid niacmane qeshun isbanquin nabanta.

³⁴ Nad iqueque. Tantia. Chuinu. Utsibo yacno nidnun abëd tabadquido naden chuiposh. Min utsibo chieshënenquiocquin shubu isquid icta quequin chianec nidposh.

³⁵ Adec icbo nidan abi choate ushë mimbi tantienquio iqueque. Bëshunenquiocquin tantiaquiota. Inchëshbudtsëqui choapatsiash, quequin tantiata. Adembidi inchëshpotsembo chopatsiash qeshun adembidi tantiaquiota. Adembidi, cachina cuëdanubi chopatsiash, qeshun isucunshun tantiadenequiota

³⁶ ëmbi tantienquiocnoc con icbo chochitondac, qeshun.

³⁷ Adquiecbidi bëdamboec tabadquin Nuquin Papan chiaid isted-istedta Nuquin Papa chieshënquidën niacmenushe qeshun –quepondash Esus.

14

Esus cuesunete bunaid chiaid

(*Mat 26.1-5; Duc 22.1-2; Uan 11.45-53*)

¹ Adashic, bëyuc tishaid unëshmenuequid aton shubu datamenuequin Isadaidbo tsusedpabon nidaidën capuquid yuaded cuesunepampic. Aid tantiaid ushëbëdtabi pan bidisquea tantiaid ushë Pascuas caid daëdec ushash choendac. Aid chonoshe qeshun isadaidbo tsusiobon Esus nibëmbededpondash.

² Aden nibëneg: –Pascuas ushë tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedtiad. Bedsho isash, Padi. Bedenda, queuidash nëishun comapenen nuqui cuestasiashe –quepondash isadaidbo tsusiobo.

Esus unëshec qeshun nachimboen noadte machiuinte chiaid

(*Mat 26.6-13; Uan 12.1-8*)

³ Adnubien Betania caid yacno tabadquin Esusèn Simonën shubun puduedshun pepondash. Simon daushac bimboecquid, nami mishac tantiadenquiocquid icsho Esusèn bëdamaid nepondash. Adec puduedshun pec tabadnubi comapenec noadquid bëec chido puduedpondash. Piucquid dadpen menequin comapenec noadquid bedquid chido nec. Ambi bedaid sedunte postichoquid dëusunaid dëchitanquin Esus chidon machiuimpondash.

⁴ Aden machiunsho isash utsibo nëishun: –çAtotsieshun machiuiño?

⁵ Noadte menequin piucquid dadpen bedshun aton na nibëdquid dadpen menetsiandac –quec onquecuededpanëdash Esus machiuimboed chido chushcaic.

⁶ Aden chushcacho tantiashien Esus onquec nadpondash: —Chushcainda. ¿Mitsanada nediosh? Ambi noadte machiuimboed bédaidquio nec.

⁷ Badiadquidën-badiadquidënquieuc ënëdenquio yec aton na nibédquid ënabi iquec. Aidi menenu qeshun mimbi menepec. Èbien nashuntiapimbo iquendac.

⁸ Èbi unësabicnuc nëid chidon tantiaquin chococanuequin nacbimboen noadte machiuimpaboc.

⁹ Abimbo chiembique. Tantia. Nuquin Papan shubu abentsëquën tabadaid chuiquimbi ëbi machiuimboedën naidtsen tantiaquidon chuiben-chuibenendac —quepondash Esus.

Esus bedmembali, Udas quiaid

(Mat 26.14-16; Duc 22.3-6)

¹⁰ Adnubien Udas Iscadiote, Esusbéd icquid abentsëc, Esus bedmenu, quianec isadaidbo tsusiobo yacno nidpondash.

¹¹ Adec nidequi isadaidbo tsusiobo yacno choshon Esus mibi bedmembali quequin chuituidac bédambo icpac caondash aido. Adembidi: —Esus ëbi bedmesho isun piucquid mibi menembi —quecuedepac caondash. Adsho tantiash nidanec, ¿Mitsipadentsimbi bedmepe? quec tabadquin caimpac caondash Udasën.

Nidaidën capuquidded cuesuniaid abéd icquidobédtan piaid

(Mat 26.17-29; Duc 22.7-23; Uan 13.21-30; 1Cod 11.23-26)

¹² Adashien penun isadaidbo utsibon nidaidën capuquid cuesunenubien: —Cuesuniaid pambid penu qeshun, ¿mitsishunquiembi nacnempatsia? —quepondash Esusbéd icquido.

¹³ Adsho tantiash Esus abéd icquid daéd chiec nadpondash: —Edusaden yacno nidquimbi dadan acte bësho istuidash tsibananec aibdëdi nidta.

¹⁴ Aden aid tsibanec puduedash, ¿Èbi tabadte quënë mitsimbo iquec? ëbéd icquidobédtan penu, quiosh chuiquid, quequin shubu icho chuita.

¹⁵ Aden chiac buanshun dectatomesun abuc quënë dapa mibi ismendac. Ambo pete sante cueste iquendac. Ashunquio penun nacnenta —quepondash Esus ambi daéd chuimiad caic.

¹⁶ Aden chiac abéd icquid daéd Edusaden yacno nidquin Esusën chiacpadomboen bëquedshun tsibananash puduedshun penun nacnempondash.

¹⁷ Adnubien inchëshbudtsëqui aid daédtsëqui yacno Esusbéd icquid utsibo chopondash.

¹⁸ Adec choash pec tabadnubien: —Abimbo chiembique. Tantia. Èbédtan pequid abentsëcshun isadaidbo tsusiobo ëbi bedmendac —quepondash Esus.

¹⁹ Adsho tantiash, Icsambo iquec, quequin tantiec: —¿Èbida chienquio ique? —quepondash abéd icquidtedi.

²⁰ Adoaquien: —Mibéd icquid nebi, quec mibitedi. Padnuen abentsëcshun ëbédtambi pete cuëshën ënë punshun pequidën ëbi chieshënquido bédmendac.

²¹ Nuquin Papan chuimiapadomboen aton madombo chidon tishac matsesaid ëbi unës uate anoentsëqui yanec. Èbi bedmequid icsamboshë iquendac. Abi cuidte icsamboshë icnushe qeshun aidi tishenquiocpatecnëdan —quepondash Esus.

²² Adashic pebededquin pete bedshun Nuquin Papa chiec onquetanquin pete cuësh-cuëshun abéd icquido menebanquin: —Nëid pete cuëshë ëmbi piaid con dadabéd daédacpadquieuc Esus unësash abi tantiaquid ëbi icnuc Esus ëbëdi iquec quequin tantiata —capondash Esusën.

²³ Adembidi dëshote bedshun uba caid actequid icnuc Nuquin Papa padpiden chuishun abéd icquido menebanac apondash.

²⁴ —Nëid acquin Esused Nuquin Papan cuidac aton intac siebudpamboec unësposh. Aton madoded cuidshun Nuquin Papan ëbi padenquio iquec quequin nëid acquin tantiata.

²⁵ Uba caid ënë nidaidënshun padpiden aquenquiocquimbi Nuquin Papan shubunshun actequid chuca mibédtambi aquendambi —quepondash Esus abéd icquido caic.

²⁶ Aden chiasn Nuquin Papan naid chiec cuédënanec macuësh Odibos caid yacno nidoapondash.

Esus tantiesa nebi quequin Petedon chuite chiaid

(Mat 26.30-35; Duc 22.31-34; Uan 13.36-38)

²⁷ Adshumbic Esusën: —Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tantia, mibi.

“Abi tantiaquid bëyucanquin yuedquid unës uaimbi. Adosho isash abéd icquido cuenec cuëshëd-cuëshëndendac,”

quequin Nuquin Papan chuipampid nec.

²⁸ Unës uac uincuenash Cadidia yacno ëbia nidoaindabi. Mibitsen ambo nidta —capondash Esusën abéd icquido chuiquin.

²⁹ Adoquien: —Esus tantiaquid nebi quenquo utsitedi icnuc ëbien padenquo iquec — quepondash Petedo.

³⁰ Aden Petedon chuisho tantias: —Abimbo chiembique. Tantia. Nëid inchëshëmbi cachina bënë daëdec cuëdanabicnuc Esus tantiesa nebi, quequin mimbi tedesteden chiendac —quepondash Esus Petedo caic.

³¹ Adsho tantias: —Esus tantiaquid mibi icsho mibi aibdëdta unës uaimbi, cac, Esus tantiesa nebi, quenquo iquendabi —quepondash Petedo comapenec onquec. Adecbidi Esusbëd icquidtedi onquepondash.

Quetsemani caidyacno choash tabadaid chiaid
(*Mat 26.36-46; Duc 22.39-46*)

³² Adashic cuëte odibo caid dadpen icsho Quetsemani quequin cuënacno choash nidtu-idash: —Nuquin Papa chuineuc udi nidebique. Nëmbobi tabad —quepac caondash Esus abëd icquido caic.

³³ Aden chianec Petedo, Acobo, Uan nëidted cho quianec bëyucanec nidec Esus, Matsestedi icsaid cuidtequid ëmbi bedshunsho isun Nuquin Papan ëbi istiapimbo iquec, quequin tantiec unësquioshë yampondash.

³⁴ Adquo iquec: —Ëbibi unësquioshë yec udictsëc nidebi. Chieshtomane qeshun nëmbobi tabadquin Nuquin Papa chuiban —quepac caondash Esus ambi nëid 3ted, Cho, caboed chiec.

³⁵ Aden chianec udictsëc nidash Nuquin Papa chuineuc nidaidën uebudash uec onquec: —¿Adabi adquid icmenquioctsia? Papa —quepac caondash Esus Nuquin Papa chiec.

³⁶ Aden chuishumbic: —Papa, mimbi natiapimbo ictequid nibëdec. Adquid icquin matses cuidtequid bedshunquid con mado icmenquo iquembi qeshun mimbi adoenquioctsiandac, Papa. Ëbi bunacpaden nainquiocquin mibi bunacpadomboen nata, Papa —capac caondash Esusën Nuquin Papa chuiquin.

³⁷ Aden chiash choquin abëd choboed 3ted icquid usho istuidec Petedo caic: —Simon, ¿ushecta ne? ¿Ëbibi chieshmane quiash yuecpectsëc iquec ushenquo yec tabadiapimboda icco?

³⁸ Chieshmane qeshun Nuquin Papa chuita Nuquin Papan chiaid niacmenuequidën Satanas caidën chiaid tantiamane qeshun. Chieshenquo iquebi quiash dacuëdash bad-edquo mibi chieshendac —quepac caondash Esus.

³⁹ Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuioapac caondash.

⁴⁰ Adtanec choashumbic abëd choboedo adecbidi ushacsho istuidoapac caondash. Ush-casquiec tabadec, Ushenquioccobi, quequin chuitiapimbo yec otacquo tabadpac caondash.

⁴¹ Adnubien padpidec nidoashun Nuquin Papa chuioatanec choec: —¿Uimabudashta tiboquec ushec ne? Padi. Ushenquo yec isucun. Nuquin Papan madombo chidon tishac matsesaid ëbi icsho nëbimbobi ëbi chieshëngquidon bedmeque.

⁴² Nidtoash ëbëdi nid. Ënden choaye. Is —quetuidpac caondash Esus abi bednuec choquido isec.

Esus bedshun buante chiaid
(*Mat 26.47-56; Duc 22.47-53; Uan 18.2-11*)

⁴³ Aden chuinubien Esusbëd ichoedquiobi Udasbëd matses dadpen cho-chopondash. Cho-choquid utsi-utsiec chështe sanampamboec chonobi utsi cueste sanampamboec chopondash. Aidted Udasën chiac isadaidbo tsusiobon chomiaido nepondash.

⁴⁴ Esus bednuequid tantiamenuen ambiabi Udasën: —Ëmbi tanchoccaid mimbi bedtequid nendac. Aidquidi bedshun buanta. Cuenushe qeshun bëdamboen ista —capac caondash.

⁴⁵ Aden chiashic aidobëdi choquimbi: —Icho —quequin Udasën Esus tanchoccatuidpondash.

⁴⁶ Aden Udasën tanchoccasho isun Esus bedpondash.

⁴⁷ Adnubien anocquid abentsëcshun chështe sananquin isadaidbo tsusio dapan ancaidën pabiate auc abentsëc pateshunepondash.

⁴⁸ Adnubien: —¿Cuesanquid Esus nec, qeshun utsin cueste sananubi utsibon chështe sananec ëbi bedecta cho-choec ne?

⁴⁹ Badiadquidën-badiadquidënquiec Nuquin Papa tabadte shubu uashunaid umanuc daquënë uaidën tabadquin matses tantiamenuen chuibaniombi mibitedi tabadnubi. Ambo icshobi ¿atotsieshumbini mimbi bedenquiocpo? Nuquin Papan chiacpadomboen nëbi mimbi ëbi bedec, —quepondash Esus abi bedquido caic.

⁵⁰ Adec onqesho tantiashun cuenquin abëd icquidtedishun Esus niampondash.

⁵¹ Adec cuenubini nëbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanshobi Esus chieshënquidon bedpondashi.

⁵² Aden bedac dasiuidte bëdaidquio nianec dadauidquio cuempondabi.

Isadaidbo tsusiobo iccuededacno Esus buante chiaid
(*Mat 26.57-68; Duc 22.54-55, 63-71; Uan 18.12-14, 19-24*)

⁵³ Adnubien, isadaidbo tsusio dapa, matses tantiec Nuquin Papa chiec onquequido yacno Esus buampondash. Aden buanec puduednu quiacnombobi isadaidbo tsusiobo utsibo iccuededec tabadpondash.

⁵⁴ Aden Esus buanubi tsyuec choquin Petedo cuemboedën tsibananec isadaidbo tsusio dapan shubu umanuc daquënë uaidën puduedpondash. Adec puduedash Esus cuenushe quequin isquido tabadacno ambotsen cuëte cuëec tsadpondash Petedo.

⁵⁵ Adec Petedo tsadnubien Esus unës uate bunquin Esus icsambocquid nec quequin chuiquid ¿Ada icpec? quequin nibënquin adquid tsusiobon istuidabicpondash.

⁵⁶ Abimbo chiacimboen dadpëshun chuibededpondash. Aden chuiquin abentsëcshun chiacpadomboen chienquiocquin utsin chuiopondash.

⁵⁷ Adnubien, Chuinu. Tantia, qeshun Esusën chiacimboen utsi uain chuipondash utsibon.

⁵⁸ Aden chuinubien utsi onquec: —Naden Esusën chuisho tantiombique. Tantia. Chuinu. “Nëid, Nuquin Papa tabadte shubu uashunaid chicbanendambi. Aden chicban-shumbic daëdec ushquin matsesën naidpenquio isadnuc ëmbibi naindambi,” quequin Esusën chuipondash —quepondash utsi.

⁵⁹ Aden abentsëcshun chuinubi utsin aden chienquiocquin chuipondash.

⁶⁰ Aden chuisho tantiash isadaidbo tsusio dapa nënantanquio nidtoash nidquin: —¿Mimbi chiacpadomboen chiecta nec? ¿Abimbo chuiquidta nëidtedi neque? Chui. Tantanu —capondash isadaidbo tsusio dapan Esus chuiquin.

⁶¹ Adsho tantiash ëchedenquio yec otacquio nidsho isash: —¿Nuquin Papan chomiaidquio, Quidistu caid, Bëdambocquidën mado nebi, quecta mibi ique? —queopondash isadaidbo tsusio dapa Esus caic.

⁶² Adoaquien Esus: —Ai, aidi nebi. Nuquin Papan madombo matsesaid abuc nidoashic Nadatiambocquidën dayun abiucquio tsadash abu ushun ëbi chosho matsesën isendac —quepondash Esus.

⁶³ Adsho tantiash, Icsamboen chiec, quec abi daëd dasiuidaid bëntsecquid dached-dachedquish: —¿Atotsieshun Esusën icsamboen naosh, quequin chuimenuen utsi nibëmpe nuqui?

⁶⁴ Nuquin Papa icsamboen Esusën chuisho mimbi tantioc. ¿Midapaden mimbi chieque? Tantanu. Chui —capondash isadaidbo tsusio dapan tsusio utsibo chuiquin.

Adoaquien: —Icsambo iqueque. Unës uametiad —quecuededpondash.

⁶⁵ Adsho tantiashun Esus dacuishtuaquin utsibon tauapondash. Adotanquin dashcuten bëpucshun ambibi cuestanequi: —¿Tsuntsin mibi cuesposh? Comapenen tantiaquidquio mibi neque. Èbi chui. Tantanu —capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

Esus ëmbi tantiacmaidquio nec quiaid
(*Mat 26.69-75; Duc 22.56-62; Uan 18.15-18, 25-29*)

⁶⁶ Adnubien Petedo umanuc daquënë uaidën tsadnubi isadaidbo tsusio dapan yua chido chopondash.

⁶⁷ Choshon Petedo cuëte cuëec tsadsho isun: —Nasaded caid yacnocquid Esusbëd icquid mibi nec —capondash.

⁶⁸ Adoaquien, Esusbëd icquid nebi, quetiapimbo yec Petedo: —¿Atotsi mibi quepe? Tantienu yec tsadebi —quepondash.

Adtanec puduedte shëcuië anoentsëqui nidtuidash tsadnuc cachina bënë cuëdpondash.

⁶⁹ Adec Petedo ambo tsadsho chido yuaidën istuidtanquin padpiden: —Esusbëd icquidquio nëid nec —quequin anocquido chuiopondash.

⁷⁰ Adoaquien: —¿Aidbëd icquidtabi nedi? —quepondash Petedo.

Adnubien yuecpectsëc yash: —Aidbëdi Cadidia yacnocquid mibi nec —quepondash ambobidi tabadquido.

⁷¹ Adoaquien: —Èmbi tantiacmaidquio nec quequin abimbo chiemi. Èmbi abimbo chienquio icsho ma ëbi chian anëdënquiacno Nuquin Papan nënepanuna —quepondash Petedo comapenen chiec.

⁷² Adnubien cachina padpidec cuëdpondash. Adsho tantiashun, “Cachina daëdec cuëdabincuc ëmbi tantiacmaidquo Esus nec, quequin mimbi chiendac tedestedec onquequin,” quequin Esusën chioshi quequin tantiec unësquo yanec shubianquiopondash Petedo.

15

Pidato yacno nidshun Esus meniaid

(*Mat 27.1-2, 15-31; Duc 23.1-5, 13-25; Uan 18.28-19.16*)

¹ Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantinamequido. Adec iccuededash onqeshun Esus mëtaneshun buanshun isadaidpemo ancaquid Pidato caid menepondash.

² Aden meniac Pidato: —*¿Isadaidbo ancaquidta mibi neque? Èbi chui. Tiantianu — capondash Pidaton Esus chuiquin.*

Adoquien: —*Mimbibi aden chuiPAYOC — quepondash Esus.*

³ Adnubien, Esus icsaded-icsadedosh, quequin chiec isadaidbo tsusiobo onquecueded-nuc cuëdenquo yec Esus tsadpondash.

⁴ Adec tsadsho isun: —*¿Èchedanenquo yec otacquioda tsade? Mibi icsaid dadpen nëidon chuibanec — Pidaton caqui*

⁵ adquecbidi Esus tsadpondash. Adec tsadsho isash *¿Mitsipadquidquo Esus nepec? Ut-simbien, Icsapenquiocquid nebi, quequin chuipec, Aden chienquo Esusën iquec, quequin ambibi tantiec Pidato tsadpondash.*

⁶ Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidënquien, Quënën nauedmiaid abentsëc nidmenu. *¿Mitsiquidimbi nidmepeque? Chui. Tiantianu, quequin isadaidbo Pidaton chuided-chuidedpadenec. Adoquien ismequin, Nëid nidme, cac nidmedenepadenec.*

⁷ Aden chuidenequin ambi quënën nauedmiaid Badabas cuëmëdquid nepondash. Aidëmbi utsibobëdtan Domanobo bunenquiocquin cuesquin tauasho isun bedmeshun quënën nauedmepac caondash.

⁸ Adnubien Pidaton seta utsin quënën nauedmiaid abentsëc ambi nidmiondacpaden nëbi adquid utsi nidmepatsiash icnuï quequin tantiec Pidato yacno chopondash isadaidbo iccuededquido. Aden tantiec choash: —*Quënën nauedmiaid abentsëcta mimbi nidmepatsia — quecuededpondash aido Pidato caic.*

⁹ Adec onqesho tantiaish Esus nidmetiadquiocquin Pidaton: —*Mibi ancaquid caid, Esus, nidmependambi iquec. Isadaidbon, ëbi chui. Tiantianu — capondash.*

¹⁰ Esusbidi tsusio icpec mates quenushë quiaish isadaidbo tsusiobo Esus unës uate bumpec quequin tantiaquin Pidaton aden chuipondash.

¹¹ Aden tantiec, *¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash aton tsusiobon chiacpadomboen.*

¹² Aden chuibededaquien: —*Badabas nidmequimbi mibi ancaquid caid Esus ¿atotsimbi napeque? Chui. Tiantianu — capondash Pidaton.*

¹³ Adoquien: —*Cueste nitsinshun dectan — quec comapenec cuëdcuededpondash isadaidbo.*

¹⁴ Adoquien: —*¿Atotsi icsa uaosh? — quepondash Pidato.*

Adoquien: —*Cueste nitsinshun dectan — queoaic comapenec cuëdcuededpondash.*

¹⁵ Adsho tantiash Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuinushë queshun Badabas nidmepondash. Adshumbic: —*Cueshcaten Esus comapenen cuesmebededshun cuesten dectanun buanec nid — capondash Pidaton sondado chuiquid chuiquin.*

Sondadon Esus mamëns shumbededaid chiaid

¹⁶ Adoac Esus bedshun Pidaton shubu umanuc daquënë uaid yacno sondadon buampondash. Aden buanshumbien sondado utsibo 600ted icnuc chomepondash.

¹⁷ Choshon dashcute abichobicquid bëdaidquo bedshun ancanquin dasiuidac bimboecnuc dasiuiunshun pinchuc-pinchucquid mauete uashun Esus matoncashun

¹⁸ ancanquid cuënacpaden cuë nec: —*Mibi isash bëdambo iquebi. Isadaidbo ancaquid dapa caid mibi neyoc — quequin Esus oncaic onquecuededpondash sondado.*

¹⁹ Adoquimbi ancanquidën sanante cueste bëdaidquibimboecnuc sananquin sondadon abentsëcshun-abentsëcshunquien Esus macuestanquin dacuishtucabudniash Esusën taëno danëshën sebudash uepondash.

²⁰ Aden mamëns shumbededquin mëyanshun dashcute bëdambocquid ambi dasiuiamboed dachicshun aton dashcutebi dasiuiunshun cuesten dectanuequin Esus buampondash.

*Esus cuesten dectante chiaid**(Mat 27.32-44; Duc 23.26-43; Uan 19.17-27)*

²¹ Aden abi dectante cuate Esusën buantiapimboconoc nidquimbi abi datanquid cuate chiadtoetanquin buamepondash sondadon. Abi datanquid Sidene caid yacnocquid nëbi Edusaden caid dëueuacnoësh choquid nepondash. Adecandedo, Dupo chedon papa Simon cuëmëdquid niondash.

²² Aden cuate Simonën buanubi macuësh Codocota caid yacno abitedi chopondash. Macuësh mapi canitebimboecsho Codocota quequin isadaidbon aton onqueten cuëmpondash.

²³ Ambo choshon uba sicaid paëacsho paëmboquid dauë cacushtanquin meniac aquenquicopondash Esusën.

²⁴ Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmëdquidtedi dada uabanshun tēchun sandoshon cadotanequin dada uatsaidēmpi puduemiaid isbanquin Esusën dashcute bedbampondash.

²⁵ Ushë dectatoec 9 yanuc Esus cuesten dectampondash.

²⁶ Esus dectanaid mapino dada uaid cuate podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiacpaden dada uaid nepondash.

²⁷ Cuesunetanquin ampequid daëd ëquë dectambudcuenshun nënantanquio Esus dectampondash.

²⁸ “Dectanquin icsaquidbëdta dectanendac,” quequin Nuquin Papan chuimiampicpadembi napondash.

²⁹ Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamēnshumbededpondash. Adec cuenquin mamēnshunquin: —Nuquin Papa tabadte shubu uashunaid chibanshun daëdec ushqin chuca uaimbi, quequin chiec mibi onquiondaque.

³⁰ Abimbo chuiquid yec unēstiapimboquid nebi quianec mibibi budta —cabidanepondash.

³¹ Aden cuenquidën chuinubi adembidi isadaidbo tsusio dapabotedi tsusedpabon nadomboen nata quequin chiaid tantiamequid chedo onquecuedec: —Utsi-utsien bēdamequimbi utsi unēsacsho uincumeboed yec mētoccaid abembi chiquidtiapimboquid nec —quepondash isadaidbo tsusiobo Esus caic.

³² —Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantiendambi —quepondash. Aden cuenquidën mamēnshunubi abēdta dectanaidën adembidi chuiopondash.

*Esus unēs uate chiaid**(Mat 27.45-56; Duc 23.44-49; Uan 19.28-30)*

³³ Adnubien ushë cuemboconoc 12 yananc inchëshquio icboedi ushë budec 3 yanuc uëshëmbo yanoapondash.

³⁴ Ushë 3 yanuc: —Eloi, Eloi, ¿lama sabactani? —quequin aton papa chiec Esus comapenec cuëdpondash. Aton onqueten: Papa Edoen, ¿atotsieshumbini bidiadquin isenquio ique? quec adpondash Esus.

³⁵ Aden Nuquin Papa Esusën chuisho tantiaquido, Nuquin Papa cuënëc, quenquio yec: —Edias cuëneque. Tanta —quepondash.

³⁶ Aden tantianubi badedi titinqeshun sicaid mucambocquid nëcushtanquin puntanquin cuate dēdectanshun acmenuequin ëccuëscadonequi: —Chiata. Edias Esus bedec chonoshe caimbono —quepondash.

³⁷ Adnubien comapenec cuëddec Esus unësbudpondash.

³⁸ Esus unësbudnubi abi inchëshacimboecnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daëdquio yec.

³⁹ Adec Esus cuëdbud-cuëdbudec unëso isash: —Abimbo chuiquid niosh. Nuquin Papan madombo nëid nec —quepondash sondado chuiquid uquë tsadbudec.

⁴⁰ Adnubien ancuenquio isec chidobo nëidtedi tabadpondash: Madia Mactada caid yacnocquid; Madia utsi, Acobo bushcuetsëcquidën tita, aidi Osen tita nepondash. Utsibic Sadome nepondash. Aidon Esus ancuenquio diadsho isbededpondash.

⁴¹ Aidon Esus Cadidia caid yacno capusho isun abi nashumboedo nepondash. Aidobēdan isquido chido utsibo Edusaden yacno choshon Esus buansho isun tsibanquido icpondash.

*Esus chococate chiaid**(Mat 27.57-61; Duc 23.50-56; Uan 19.38-42)*

⁴² Adashic biednes ushë budtsambi: —Inchëshbudtsëqui seis icnuc chonoadtemaid ushë chonoshe Esus unēsoshe chococatanu —quianec Esus tantiaquid utsi nidpondash.

⁴³ Aidi, Ose Adimateya caid yacnoshon tishaid Pidato yacno nidpondash.

⁴⁴ Adec nidshun: —Esusën dada bedshun chococatiadquio iquebique. ¿Ada buantan mibi quepe? —caquien, ¿Ëndenda unēsaccosh? quequin tantiesa icquin sondado chuiquid Pidaton chomeshun: —¿Ada Esus unēsosh? —capondash.

⁴⁵ Adoac: —Ai —quesho tantiashun: —Ai, bedshun buanta —capondash Pidaton Ose chuiquin.

⁴⁶ Adoac nidshun unēsaid dabidiate bedshun Esusën dada imbudshun dataneshun macuësh dapa cuënote shëcuë uaqin ambi nacnenaidën nauedshun cuënote dapan bêtashpondash.

⁴⁷ Aden Osen Esus chococasho Madia Mactada caid yacnocquidbëdtambi Madia, Ose utsin titan ispondash.

16

Esus uincuente chiaid

(Mat 28.1-10; Duc 24.1-12; Uan 20.1-10)

¹ Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aitedi nidshun aton na bedtequid menequin comapenec noadte dadpen bedpondash Esus danoshcanuequin.

² Bedsash badiadtsëcnubi dominco ushë caidën Esus chococacno nidanequi:

³ —¿Tsuntsin cuënote shëcnepeba? —quec onquecuededpac caondash.

⁴ Adec onquequin ancuenquio isquien cuënote ënden shëcniac. Cuënote dapa yuëmbocquid nepondash.

⁵ Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiucquio tsadpondash. Aidi isash dacuëdcuededec tabadpac caondash chidobo.

⁶ Adec dacuëdec tabadsho isun: —Dacuëdenquio yec tabad. Esus cuesten dectanaid mimbini bënëaid tantiembi. Uincuenash nidac. Nëmbo bi nanac ueuidoshe. Is.

⁷ Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbini ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiacpaden Petedo Esusbëd icquidquio utsibobëdta chuituidec nid —quepondash nëbi caniquid chidobo chieci.

⁸ Aden chuisho tantiash uëdëquequi chococaid shëcuënuësh puduenanec titinquec dacuëdec onquenquio yec nidanepac caondash chidobo.

Esus abuc indote chiaid

(Mat 28.16-20; Duc 24.13-53; Uan 20.11-23)

⁹ Adnubien abi nibëmboed uincuenashun Madia Matcada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash.

¹⁰ Aden ismiac Esusbëd icboedo yacno nidash puduedshun aido shubisho Esusën abi ismiaid Madian chuituidpondash.

¹¹ Esus uincuenash capusho isombi, Madia quesho tantiash, Aidquio mimbini isambo iquec, quec tantienquio yec tabadcuëdedpondash.

¹² Adashic tantienquio yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën.

¹³ Aden ismiac aid daëdi aubidi Edusaden yacno nidshun ambi isboed chuiapoondash. Adembidi tantienquio icoapondash utsibon.

¹⁴ Adashic, abëd icquidquio 11ted pete sante cuesten tabadnubi Esus chopondash. Adec choshon: —Uincuenac quequin ëbi isquidon chiaid tantienquio mimbini icpoc. Chobique. Is —capondash Esusën.

¹⁵ Adashic: —Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsestedi mimbisen chuiban.

¹⁶ Aden chuisho tantiaquid, Èbi cuidenquiocquin Esused Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac. Tantiesain Nuquin Papan cuidendac abi yacno puduedtiapimboconoc.

¹⁷ Abi tantiaquid utsi-utsien Nuquin Papan nadatiambocquidin nabanquid icmendac. Adquid icmiaidën ëmbi nacpaden mayan icsa dapuduemendac. Adembidi, utsi onquiaid tantienquiocboedëmbi tantiaquid ëbi chuibanendac.

¹⁸ Adecbidi, nisinguio piaqui bidisquenuio iquendac. Adecbidi, unësmenuequin acmi-
aqui unësenquio iquendac. Adembidi, utsi unëstsensho mishac bēdanendac. Nuquin Papan
nadatiambocquin namiaidēnquio adobanendac —quepondash Esus.

¹⁹ Aden chuiquin ēnacsho Esus abuc buanaqui Nuquin Papan dayun abiucquoio Esus
tsadtuidpondash.

²⁰ Ambo tsadquimbi nadatiambocquin namiac nidaidēn tabadquimbi abēd icquido
nidaid utsi-utsiec yacno capuquin Nuquin Papan shubu abentsēquēn tabadaid
chuibenepondash nadatiambocquin nabanquimbi.

Ēmbi abimbo chuiboedquoio mimbi isec aidquoio tantianeta. Padi. Aidtedi dada uaombi.

DUCASËN DADA UAID

Mibi ismenuequin dada uaquid Ducas nebi.

¹ Utsin-utsinquier ambi naidbëdtabi Esuquidistu chuibanquin dada uaid dadpen iquec.

² Aidon Esuquidistun tauain naidbëdtabi ambi naid utsitedi isted-istedquin chuibanquin chiapaden dada uaidtedi nec.

³ Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aidtedi mibi chuibanquin dada uaimbi, chuiquid dapa, Teyopido.

⁴ Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

Uan, acten mentoanquid tishte chiaid

⁵ Nidaid Udeya caid yacno Edodes cuëmëdquid ancanquid icnubien Nuquin Papan nami-aidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquid-bidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash.

⁶ Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash.

⁷ Edisabed bacuë tishesa icpanëdash. Adquid yequi aton bënëbëdi tsusio budpanëdash.

⁸ Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash.

⁹ Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsibobëdtan abi cuëmëdquid-cuëmëdquidquien dada uashun dada uatempi tëchun sandoshon cadotaniac ambi dada uatsaidëmpi abia puduenacsho isacpader Sacadias puduedpanëdash.

¹⁰ Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiec onquecuededpanëdash.

¹¹ Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash.

¹² Adec tabadsho isash dacuëdampambo iquec, quetanec Sacadias uëdëquiampanëdash.

¹³ Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëndenda, Sacadias. Min chido Edisabedën min mado tishendac. Min mado tishacsho Uan cuënta.

¹⁴ Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiash matses dadpen bëdambo iquendac.

¹⁵ Aidi Nuquin Papan bëdamboen isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac.

¹⁶ Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid ichoedi, Con Icho Nuquin Papa nec, queoaindac.

¹⁷ Min mado Nuquin Icho bëyucanec choendac. Tsusedpa Ediasën chianpicpadquiequi dacuëndenquio icquin cuembo chuibanquidquio min mado iquendac. Aden chuibanquid Nuquin Icho bëyucanec choendac. Tsusedpabon tishmiaidën tsyuecquid dadpen tantiesabo ichoedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid naquidquio iquendac. Nuquin Icbon matses aido icmenuen min madon chuibanendac —quepanëdash Nuquin Papan uaid mayan bëda.

¹⁸ Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboed tantiapë? Con chidobëdi tsusio budpobi —capanëdash.

¹⁹ Adoaquien: —Ëbibi, Cabaded nebi. Nuquin Papan abëd tabadquin namiaidquio nebi. Nuquin Papan ambi chiacpadomboen mibi chuimenuen chomiaid nebique.

²⁰ Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquio icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

²¹ Adnubien noadte bëda tauite quënënuësh Sacadias baded puduenenquiocsho isash, Baded puduenenquiocpec, quequin cainec tabadpanëdash utsibo.

²² Aden yuen caimbudnubien puduenash onquenuequi buëd cuëdenquiocpanëdash Sacadias. Adsho isun: —Ushquin isacimboen isbenac —cabededpanëdash. Adnubien Sacadiasën iccuededquido nidmenuen mëdante uic-uiccapanëdash.

²³ Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash.

²⁴ Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash.

²⁵ Adec tabadec Nuquin Papan naid chiec nadec Edisabed onquepanëdash: —Bacuë usundoenquiocpec, cabededboedëmbi nëbi macho budshumbi ëmbi bacuë usundoacsho utsibon ëbi isec. Èbi tantiaquin Nuquin Papan usundomiaid nebi —quepanëdash Edisabed.

Esus tishendac, quequin chiaid

²⁶ Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash.

²⁷ Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash.

²⁸ Adec choshon: —Mibi tantiaquin Nuquin Papan bëdamboen icmiaidquio mibi nec. Nuquin Icho mibëdi tabadendac —capanëdash Cabadedën.

²⁹ Adoaquien Madia, ¿atotsi quepeba? quequin otacquio tantiec tsadpanëdash.

³⁰ Adec tsadsho isun Cabadedën: —Dacuëdenda. Mibi bëdamboen tantiaquin Nuquin Papan naden nanu quequin chiaid nad iqueque.

³¹ Chuinu. Tantiata. Bacuë usundoshon min mado mimbi tishendac. Tishun, Èmbi tishaid Nuquin Papa yacno yuedanquidquio nec, quequin Esus cuënta.

³² Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuededpendac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac.

³³ Adec tsusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

³⁴ Adoaquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

³⁵ Adoaquien: —Nuquin Papan Mayan mibëdi tabadnu mimbi tishendac. Aden Nadatiambocquin naidënuquo Madia usundomiaid, icsa nibëdquid, Nuquin Papan madombobi nec, utsibon cabededendac.

³⁶ Min utsi Edisabed macho icquin bacuë usundoenquiocboedëmbi nëbi bacuë usundoac. Usundoenquiocquid nec, cabededboedëmbi nëbi ushë 6ted nidan usundoac.

³⁷ Utsin natiapimbo yaid Nuquin Papan naidquio nec —quepanëdash Cabaded.

³⁸ Adoaquien Madia: —Ai, con Ichon namiaidquio nebi. Ma mimbi chiacpadquio icpanuna —quepanëdash. Aden chiaquien Cabaded nidpanëdash.

Madia Edisabed isedec nidaid

³⁹ Adashic, aton na nacenanec Madia tsusedpa Udan tsyuecquidon nidaid macuësh yacno badedi nidpanëdash.

⁴⁰ Adec nidashic Sacadias oncamenquio yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash.

⁴¹ Adsho Edisabedën tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed

⁴² Madia chiec nadec comapenec onquepanëdash: —Nuquin Papan bëdamboshë icmiaidquio mibi nec. Mimbi usundoaid adembidi bëdamboshë icmiaidquio nec.

⁴³ Nuquin Icbon tita mibi yec ¿atotsi quiash ëbi isnuec cho?

⁴⁴ Mibi isec chobi, mibi quesho ëmbi tantianubi, Cuishon, quiacbimboec con bacuë cuididiquianosh.

⁴⁵ Nuquin Icbon tantiacpadomboen chuisho tantiaquid mibi iquec mibi bëdambo icted-ictedendac —quepanëdash Edisabed Madia chiec.

Nuquin Papan naid chiec Madia cuëdënaid

⁴⁶ Adnubien Madia nadec onquec cuëdëmpanëdash: “Nuquin Papan naid chuibanu. Tantia.

⁴⁷ Èbi usundomiaid Nuquin Papa yacno Yuedanquid nec, quequin tantiec bëdambo iquebi.

⁴⁸⁻⁴⁹ Èbi ambi namiaid icsho bëdamboen isquin Nuquin Papan naosh.

Adoacsho, Nuquin Papan bëdamboshë icmiaid Madia nec, quequin abitedishunquio tantiatedendac.

Adembidi aton tsyuecquidon tantiabededoaic.

Nuquin Papa icsaisa iquec. Icsatiapimbo iquec.

⁵⁰ Ambi chiaid tantiaquin naquid icsho,

Mimbi naid icsa cuidnu, quenquiocquin abëdi shubu abentsëquën tabadac bimboecnuc adquid tabadmendac.

Adenuidi tantiaquin nampidquio abi iquec.

⁵¹ Nadatiambocquin naded-nadedquidquio Nuquin Papa nec.

Ëmbibi tantiacpadomboen naimbi, quequid icsho isun Nuquin Papan cacumiac uano tabadendac.

⁵² Ancanquid dapa icboedi utsin namiaidquio adquid iquendac.

Utsin namiaid icboedi chuiquid Nuquin Papan icmendac.

⁵³ Ambi chiaid tantiec bëdamboec tabadte comapenec bunquiacpaden naquidquio Nuquin Papan icmendac.

Con na ëmbi bedaiduidi tantiec bëdamboec tabadebi quequid unësacsho cacumiac uano tabadendac.

⁵⁴ Chuiquid Dapa Abentsëcquiobi chidon usundoendac, quequin ambi tsusedpabo chuimi-ampicpadomboen Nuquin Papan ëbi usundomiac.

⁵⁵ Tsusedpa Abadauambëdta aton tsyuecquidtedi ambi tantiampicpadomboen Nuquin Papan ëbi usundomiac.

Mimbi usundoaid ëbi yacno yuedanquid nec, quequin Nuquin Papan ambi tantiampicpadembi ëbi isec,

quec comapenec cuëdëdash Madia ënëdpanëdash.

⁵⁶ Adec ënëdash Edisabedbëd ushë daëd nidmec tabadashic ushë utsi nidbudtsëcnubi aton shubuno nidoapanëdash.

Uan tishaid

⁵⁷ Adnubien Edisabedën bacuë tishte ushë chonoc dada bacuë tishpanëdash.

⁵⁸ Bacuë tishenquicboedëmbi nëbi aton bacuë tishosh, qesho tantiash aton matses ado shubu utsinquidotedi Edisabedbëd bëdambo icpanëdash.

⁵⁹ Adashic, 8tedec ushtanquin Edisabedën madon shui dëbid dëteshunu qesho tantiash utsibo cho-chopanëdash. Choash puduedash bacuëmpi aton papa cuëmëdquid cuënu quenubi

⁶⁰ Edisabed: —Padenquio. Abi cuëmëdquid Uan nec —quepanëdash.

⁶¹ Adoaquien utsibo: —Min matses utsi Uan cuëmëdquid nibëdec —qeshun

⁶² Sacadias ismenuequin mëdante uic-uiccaquin: —Abi cuëmëdquid chui. Tiantianu —capanëdash utsibon.

⁶³ Adoaquien dada uate bedshun, Abi cuëmëdquid Uan nec, quequin dada uaquin Sacadiasën ismepanëdash.

Adoaquien: —¿Abimboda mimbi cape? —quecuededpanëdash utsibo.

⁶⁴ Adnubien Nuquin Papan oncameoac Nuquin Papan naid Sacadiasën chuibampanëdash.

⁶⁵ Aden chuibansho tantiash: —Dacuëdampambo iquec. ¿Atotsiepashun onquenquicboedëmbi nëbi onquequin Nuquin Papan naid chuibampec? —quecuededpanëdash utsibo.

Aden tantianec aton shubuno nidaneshun ambi isboedbëdtabi ambi tantiaboed utsibon chuipanëdash.

⁶⁶ Adoac: —¿Mitsipadquidquio aton mado nepec? —quecuededpanëdash Sacadiasën mado Nuquin Papan tantiamiaidquio isbededec.

Sacadias oncamiad

⁶⁷ Adnubien Uanën papa Sacadias Nuquin Papan Mayanën oncamiac nadec Esus chiech onquepanëdash:

⁶⁸ “Nuquin Papa isadaidbon Icho nec, quequin chuibanuna.

Aidën isadaidbo icsaquid icsho cuidnushe quiash abided

cuidadquid chomiac mayan icsan yuaid icboedi aidën

mënchictequidquio isadaidbo iquendac.

⁶⁹ Abi mënchicquid nadatiamboquid nendac.

Tsusedpa Dabidën tsyuecquidquio aid nendac.

⁷⁰ Ambi chuimiaidon chiampicpadembi

Nuquin Papan adquidquio icmianac.

⁷¹⁻⁷³ Nuquin tsusedpa Abadauan tantiaquin

Nuquin Papan ambi chiampicpadembi nuquin tsusedpabo

aton tsyuecquidbëdtabi abi chieshënquido

nidiapimbo yacnombo abi yacno yuedanquid

Nuquin Icho Abentsëcquiobi nec.

⁷⁴ Abi cudasquin mënchicaid yec dacuëdenquoio yec

Nuquin Papan namiaidombo iquendac.

⁷⁵ Adquid yec icsaisa abipadquio bëdamboec tabadquid icsho nuqui aidën isendac ënenquiocquin.”

Adec Esus chiec onquiashic nadec aton mado chiec Sacadias onqueoapanëdash:

⁷⁶ “Adnubien nëbi Nuquin Papan chomiaid chuibanquidquio

mibi nec, quequin utsibon mibi cuënenadac, mado.

Nuquin Icho choec, quequin utsibon tantiabincnuc bëyuc tantiaishun abi chuiquidquio mibi iquendac.

⁷⁷ Adquid icquin mibi icsaquid icsho cuidnushe quiaish

abided cuidadquid tantiaisho isash Nuquin Papa mibi icsaid tantienquoio yec bëpiscudendac, quequin chuibanquid mibi iquendac, mado.

⁷⁸ Nuquin Papan matses tantiaquin naquidquio icquin

abipadquidquio icsaisa abi yacnoshon chomiaidquio iquendac.

⁷⁹ Aidën tantiamiac unësash abi iquendac.

Adquid shubu abentsëquën tabadacpadec tabadendac, quequin mimbi chiendac, mado,”

quec Uanën papa Sacadias Nuquin Papan Mayanën oncamiac onqueapanëdash.

Matses nibëdacno Uan tabadcueniaid

⁸⁰ Adashic, Sacadiasën bacuë Uan caniacsho Nuquin Papan tantiamiaid yequi matses nibëdacno tabadcuenapanëdash ambi Esus chuibante ushë choabincnuc.

2

Esus tishaid

(Mat 1.18-25)

¹ Adnubien, Doma yacno tabadquid, isadaidbo ancaquid dapambo, empedadod caid, Aucusto cuëmëdquid icpanëdash. Aucuston, çËmbi ancaido isadaidbo aton nabëdta tedtsi iqueque? Isquin tantiata, quequin Sidenio cuëmëdquid chuibanëdash.

² Sidenio nidaid Sidia caid yacnocquido chuiquid, cobednadod caid icpanëdash.

³ Min tsusedpa tishampid yacnoshon mibi cuëmëdquid mitsanabëdtabi dada uanuec nidtan, cac abëd icquido buanec isadaidbo nidanapanëdash.

⁴ Adec utsibo nidnubien Ose aton chido Madiabëdi nidaid Cadidia caid shubu dadpen icquid Nasaded caid yacnoësh puduanec nidequi aton tsusedpa Dabid caid tishampidnom-bobi nidaid Udeya caid yacno shubu dadpen icquid Beden caid yacno chopanëdash.

⁵ Aton chido Madia bacuë nua usunquidbëdi Ose abi cuëmëdquid aton nabëdtabi dada uanuec Beden yacno chopanëdash.

⁶ Ambo choquin aton bacuë nuambo usumpanëdash.

⁷ Ambo matses dadpen cho-choash shubu abitedi puduedash tsucus-tsucustsëcquio tabadnuc nidaidën capuquid tabadacno puduedshun ambi bëyuc usundoaid Madian tishpanëdash. Tishun dashcute cuësh-cuëshun dapuchshun nidaidën capuquidën pete sanaid cuesten ambi bëyuc tishaid dada bacuë Madian nampanëdash.

Obeca pemebanquin buanquido Nuquin Papan uaidon chiaid

⁸ Aden Beden yacnoshon Esus tishnubien shubu nibëdacno obeca dadpen pemebanquin buanquido inchëshbudtsëqui choec tabadtuidpanëdash.

⁹ Inchëshbudtsëqui choash tabadnubien inchëshnuc Nuquin Papan chomiac ambi uaid mayan bëda abuc chopanëdash. Aid uëshëmbo chënquenec obeca pemebanquin buanquido dacuëdcuededpanëdash.

¹⁰ Dacuëdsho isash: —Chiaid bëda chuinuec chobique. Dacuëdenquiocquin tantiata. Chuinu. Ëmbi chuitequid bëda mibi, Cuishon, quetequid nendac.

¹¹ Nëbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh.

¹² Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuëmpi adquiec uesho istuidash, Nuquin Papan chomiaid Quidistu nec, mibi quependac.

¹³ Aden chiec Nuquin Papan uaid mayan bëda onquenubien abëdi abipadquid utsi dadpen choash Nuquin Papan naid chiec nadec cuëdëncuededpanëdash:

¹⁴ “Nuquin Papa abucquio tabadquid abitedi uaquidquio bëdamboshë iquec. Nuquin Papan bëdamboen isaido ma abëdi tabadpanuna,”

quec cuëdëmpañëdash.

¹⁵ Adec cuëdëñash Nuquin Papan uaido mayan bédabo abuc nidoapanëdash. Adec nidan obeca pemebanquin buanquido Nuquin Icbon chiaid nanuec: —Nuquin Papan nuqui tantiambeod bacuëmpi isnuec Beden yacno nidnu. Nid —quianec nidpanëdash.

¹⁶ Adec nidshun nidaidën capuquidën pete santen bacuë nanacsho istuidpanëdash.

¹⁷ Isanec nidquimbi ambi isboedbëdta ambi tantiaboed chiac

¹⁸ tantiaquidtedi: —¿Midapadquidien capec? —quecuededpanëdash.

¹⁹ Aden obeca pemebanquin buanquidon chiaid tantiash bëpiscudenquio yec Esusën tita, Madia, ¿Mitsipadquid con bacuë nepec? quequin bëpiscudenquiocquin tantiadenepañëdash.

²⁰ Adnubien Nuquin Papan chiaid chuibocpadquicoesho isash obeca yacno choash obeca pemebanquin buanquido: —Ëmbi isboed ëmbi tantiaboed Nuquin Papan naidquio nec —quequin chiec onquecuededpanëdash.

Nuquin Papa tabadte shubu uashunaid yacno Esus buanaid

²¹ Adnubien 7tedec ushtanquin aton madon shui dëbid dëtemiacsho isun, Nuquin Papan uaid mayan bédan chiacpadomboen cuëñaid Esus nec, quequin Madian aton mado cuëmpañëdash.

²² Adshumbic, bacuë tishun aid bacuën shui dëbid dëtemeshun ushë abentsëc nidan utsi chotsëcnuc Moises Nuquin Papan dada uamiacpaden nanuen Madiabëdta Osen Esus Edusaden yacno buampanëdash. Edusaden yacno choash Nuquin Papa tabadte shubu uashunaid yacno choshon, Con bacuë Nuquin Papan namiaidquio nec, quequin ismepañëdash.

²³ Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec.

²⁴ Mimbi bëyuc tishaid bedte bunquin ëbi tabadte shubu uashunaid yacno mimbi buanaid min mado cuidtequidoain dëbin daëd cuesunemeta. Dëbin nibëdnuc masën bëdamocquid daëd cuesunemeta. Aden nanuec Edusaden yacno choash aton mado niantiapimbo yec Madiabëd Ose Nuquin Papan chiacpadomboen nanuec aton madobëdi puduedpanëdash.

²⁵ Adnubien Edusaden yacnombo tabadquid Simeyon cuëmëdquid Nuquin Papan naden nata quequin chiaid tantiaquin naquidquio icpanëdash. Aidi isadaidbo chuiquid dapa abentsëcquiobi cainquidquio icpanëdash. Aidi Nuquin Papan aton Mayan meniaidquio icpanëdash.

²⁶ Aidi Nuquin Papan Mayanën tantiamiac, Chuiquid Dapa Abentsëcquiobi Nuquin Papan bëdamboen isaidquio choacsho unësabicquin isendambi, quequin tantiapanëdash.

²⁷ Adembidi Nuquin Papan Mayanën nidmiac Nuquin Papa tabadte shubu uashunaid yacno nidequi Simeyon puduedpanëdash. Ambo puduedash capunubi Nuquin Papan naden nata quequin chiaidquio nanuen aton bënëbëdtambi Madian Esus bëpanëdash.

²⁸ Esus bësho isun Simeyonën Esus bedshun icucquin Nuquin Papan naid naden chuibampanëdash:

²⁹⁻³⁰ “Abitedishun Icho icquin mimbi ëdenquio chiampid nëbi nëid isembi.

Nëid isash unësmane quenquio yec, Cuishon, quec unësebi, Papa.

³¹ Mibi yacno yuedanquid nëbi isembi.

Nëid mimbi chomiaid icsho ma abitedishunquio ispanuna.

³² Nëidëmbi mimbi tantiacpaden chuibanquin

isadaidbo bëdambo icmendac,”

quepanëdash Simeyon.

³³ Aden chuibanubi, ¿Midapadquidquien con mado capec? quequin Madian aton bënëbëdtambi tantiapanëdash.

³⁴ Esus chuibanquin naimbudshun Osebëdta Madia chiec Simeyon: —Bëdambo icmiaid mibi daëdi nec —quepanëdash. Aden chuishumbic Madiuidtsëqui naden Simeyonën chuioapanëdash: —Chuinu. Tantiata. Nëid bacuë tantiesa isadaidbo utsi-utsiec icsho Nuquin Papan uquë nësecaindac. Min mado tantiaquid utsi-utsiec icsho Nuquin Papan abi yacno puduedmiad iquec bëdambo iquendac. Min bacuë, Esus, Nuquin Papa yacno puduedmianquid nec, qesho tantiashun matses dadpenshun icsamboen chuided-chuidendac.

³⁵ Adsho ambi ompoquin naid icsabëdta ambi tantiaid icsa tantiamequid min mado iquendac. Adobanquin ismiac unës uasho isash mibibi unësquio yec, Con madon natiambo iquebi, mibi quendac —quepanëdash Simeyon Madia chiec.

³⁶ Aden Simeyonën chuinubi Nuquin Papan naden nanu quequin chiaid chuiquid chido Ana cuëmëdquid icpanëdash. Aidën papa Panued icpanëdash. Aidën tsusedpa Ashed icpampic. Aid aton bënëñ bedac abëdi seta 7ted matamiash tabadnubi

³⁷ aton bënë unëspanëdash. Aton bënë unësan Nuquin Papa tabadte shubu uashunaid yacno nidshun Anan tabadec nidenquiocquin Nuquin Papauidi tantiaquin buna mēmumbudnequin Nuquin Papa chuidenepanëdash.

³⁸ Ambo icnubi Esus bësho isun Anan Nuquin Papan naden nanu quequin chiampicpaden chuipanëdash: —Isadaidbo icsaquid icsho cuidnu caid mënchictequid nëid nec —quepanëdash Ana Esus chiec utsibon tantianubi.

³⁹ Adashic, Nuquin Papan naden nata quequin chiapaden nainash Osebëd Madia nidaid Cadidia caid yacno nidoash Nasaded caid yacno abi tabadacno choapanëdash.

⁴⁰ Ambo tabadnubi aton bacuë Esus dada bëdambo yec canicuempanëdash. Aidi comapenen tantiaquidquo Nuquin Papan bëdamboen isaidquio icpanëdash.

Canicuenash Nuquin Papa tabadte shubu uashunaidën Esus tabadaid

⁴¹ Adashic, Ęmbi bëyuc tishaid unës uamenushe qeshun intaquën aton shubu shëcuë ěcnoshcacsho isun aidon bëyuc tishaid unësmenquiocquin Nuquin Papan uaid mayan bëdan matampampid tantiate ushë yanuc Madia Osebëd Edusaden yacno nidoapanëdash. Nuquin Papan chiapadequi setan-setanquiec nidtenepanëdash.

⁴² Adecbidi, Esus abi tishaid seta 12ted yanash canicuenash anibëd Edusaden yacno nidpanëdash.

⁴³ Adec ambo nidashic nami uabicquid petequid tantiaid ushëtedi tantiec tabadtenepanëdash.

⁴⁴ Adec ambo tabadquin nainash Esus ambobi icnubi tantienquio yec Madia Osebëd auëshquio nidoapanëdash. Adec nidash inchëshbudtsëqui abëd choboedo yacno capuquin Esus nibëmbenepanëdash.

⁴⁵ Aden nibënquin istuidabi yec Edusaden yacno padpidec nidoapanëdash.

⁴⁶ Daëdec ushquin nibënshun Nuquin Papa tabadte shubu uashunaid yacno puduedshun Esus tsadsho istuidpanëdash. Ambo tsadec Nuquin Papan chiaid tantiamequin chuibanquidbëd onqueduedscho istuidpanëdash.

⁴⁷ Adec onqued tsadsho isquin, Bëdamboen tantiaquin chuibanquidquio nëid nec, quequin utsibon tantiabedepanëdash.

⁴⁸ Adnubien, ¿Mitsipadquid con mado nepec? quequin otacquio Madian tantiapanëdash. Aden tantiequi: —¿Atotsi quiash ěbi daëdi tantienquio yec nēmo choash mibi tabade, mado? Unësquiocquin papabëdtambi mibi nibëmbeniombi —capanëdash anin.

⁴⁹ Adoquien Esus: —¿Atotsieshun ěbi nibëno? Con Pa shubu uashunaidën tabadnuec chobosh nebi. ¿Tantienquioda mimbi icpe?

⁵⁰ Aden Esusën chuisho anibëdan Osen tantienquiocpanëdash.

⁵¹ Adashien: —Nidnu. Nid, mado —anin cac cacuidenquio yec Nasaded yacno anibëdi choash tabadquin Madian chiaidbëdta Osen chiaid tantiaquin Esusën nadenepanëdash. Adec tabadnubi aton titan ambi isboedbëdta ambi tantienquio yaid bēpiscudenquiocquin tantiadepanëdash.

⁵² Adnubien comapenen tantiec bëdamboec canidopanëdash. Adquid icsho Esus Nuquin Papan bëdamboen isacpadomboen adomboembidi matsesën isbededpanëdash.

3

Esus choec, quequin Uan mentoanquidën chiaid

(Mat 3.1-12; Mad 1.1-8; Uan 1.19-28)

¹ Adashic, seta 15ted matamec Tibedio Sesad cuëmëdquid, Doma yacno tabadequi abitedi ancaquid dapa, empedadod caid icpanëdash. Aidi Doma yacnocquido ancaquid dapa icnubien Ponsio Pidato cuëmëdquid, nidaid Udeya caid yacnocquido ancaquid, cobednadod caid icpanëdash. Aid daëd ancanquid icnubien Edodes cuëmëdquid, nidaid Cadidia caid yacnocquido ancaquid, cobednadod caidbidi icpanëdash. Ancanquid aitedi icnubien Edodesën utsi, Uedipe cuëmëdquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi icpanëdash. Ancanquid aitedi icnubien Disanias cuëmëdquid nidaid Abidinia caid yacnocquido ancanquid cobednadod caid icpanëdash.

² Ancanquid aitedi icnubien Anasbëdi Caipas isadaidbo tsusio dapabo icpanëdash. Aid daëdi isadaidbo tsusio icnubien Uan, Sacadiasën mado matses nibëdacnombo tabadshobi Nuquin Papan, Ęmbi chiaid chuibanta, capanëdash.

³ Adoac acte Odan caid cuëmmano capuquimbi naden chuibampanëdash. Mimbi tanti-aid icsa ěnta. Aden ěnsho isun mimbi icsambocquin naboed tantienquio yacimboen Nuquin Papan mibi bëdamboen isendac. Ęmbi tantiaid icsa nainquiocquin ěnu, mibi qesho tantiaishun mibi acten mentono, quequin cho-choquid cho-choquidquien Uanën chuidednepanëdash.

⁴ Ëndenquimbo Nuquin Papan tantiamiac Isayasën Uan chuiquin dada uampicpadequi Uan icpanëdash. Naden Isayasën Uan chuiquin dada uapampic:

“Matses nibëdacnombo tabadquidën ëcauanshun naden chiendac:

Nuquin Icbombo choeque. Aid tantianu, quequin mimbi tantiaid icsa ëmbanta.

⁵ Umbo ancuenquimo chosho isnu quequin cuembocnoc andëdshun

ambescabanachimboen abimbo chuiquidënquio chiaid tantianu, quequin mimbi tantiaid icsa ëmbanta.

⁶ Aden ënshun Nuquin Papa yacno puduedmianquid chuiquid dapa abentsëcquiobi cuembocnoc mimbi tantiabenendac,”

quequin Isayasën Uan tishabicnuc chuiquin dada uapampid nec.

⁷ Aden ënden chiampicpadequi Esus bëyucanequin acten mentomenuc cho-choquid dadpen icsho Uanën nadopanëdash: —Nisin bacuë anipadquid nec. Aidbimboecquid icsambocquid mibi neyoc. Mibi adquid icsho isun ÷tsuntsin Nuquin Papan cuidnushe qeshun ambi mënchictequid icta, quequin mibi chiosh? ÷Aidën chiaid tantiashta acten mentomenuc cho?

⁸ Mentomete bunquin mimbi tantiaid icsa ënshun bëdamboec tabadquin utsibo ismebanta. Nuquin tsusedpa Abadauan Nuquin Papan bëdamboen isaidquio icpampic. Ambi tishmiaidën tishmiaid caidaid ëbi icsho Nuquin Papan bëdamboen isaidquio nebi, quequin tantienda. Abadauampadquid ambi chiaid tantiaquid bunquin, Matses icta, Nuquin Papan cac cuënotebi matses iquendac —quepanëdash Uan.

⁹ Adequi onquebudec: —Cuëte icsatedi matenu, quequin cuëte bacuëesa dëdshun mateshun ichon nëdëncaquin tauiec. Adquiecbidi tantiaid icsambocquid cuëshëdmenu, qeshun bëdamboec tabadaid ismesa cuëshëdmeshun chian anëdënquequid Nuquin Papan nënendac —quepanëdash Uan.

¹⁰ Adoaquien: —Chian anëdënquequid Nuquin Papan nësiate ictiapimbocquin ÷atotsimbi napeba? —quepanëdash iccuededquido.

¹¹ Adoaquien: —Mibi dasiuidaid daëd icsho dashcute nibëdquid isun mitsana abentsëc meneta. Adembidi pete nibëdquid icsho isun meneta —capanëdash Uanën.

¹² Adecbidi ancanquid dapan matses utsin na bedtequid nëidted bedta caidotsen acten mentomenuc cho-chopanëdash. Choshon Uanën chuibansho tantiaish: —Chian anëdënquequid nësiate ictiapimbocquin ÷atotsimbi napeba? —quepanëdash.

¹³ Adoaquien: —Ancanquid dapan chiacstedtsëqui bedta. Muaquin mitsana daëd uanuequin bedenda —capanëdash Uanën aido chuiquin.

¹⁴ Adashic, adecbidi sondado cho-choash: —÷Atotsimbi napeba? —quepanëdash Uan caic.

Adoaquien: —Mitsana bedtequid bunquin icsamboen bedenda. Utsin naid tantiaishun mua uaquin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

¹⁵ Aden Uanën chuibansho tantiaish: —÷Tsutsi nepec? ÷Nuquin Papan chomiaidta nepec? —quecuedepanëdash cho-choquido.

¹⁶ Adsho tantiaish: —Mibi acten mentoquidquio nebi. Padnuen ëbipadquidpenquio nada-tiambocquid choendac. Aidi bëdamboshëcquid nendac. Adquid icnuc ëbi icsaquid icsho ÷atotsieshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac —quepanëdash Uan.

¹⁷ Aden chuibanec nadpanëdash: —Piacbo ëshë uashun bitsi secatanquin nëdëncashun ëshë ichon dayun uacpadomboen abi tantiesha cuëshëdmeshun chian anëdënquequid nësiashun abi tantiaquidtedi abi yacno puduedmendac aidën.

¹⁸ Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

¹⁹ Adshumbic, ancanquid Edodesën tantiaid icsatsen Uanën chuibampanëdash: —Min utsin chido, mimbi bedaid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuioapanëdash.

²⁰ Aden ambi tantiaid icsa chuibansho tantiaishun Edodesën Uan bedmeshun quënën nauedmepanëdash abitedishun tantianushe qeshun.

Esus acten mentoaid

(Mat 3.13-17; Mad 1.9-11)

²¹ Quënën nauedabicquin matses dadpen acten mentobampanëdash Uanën. Utsiboba mentoshombic Esustsen mentopanëdash. Adoaquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëncianec

²² dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec nadec aton Papa onquepanëdash: — Mibentsëquiobi icsho ëmbi tantiaidquio mibi nec, mado. Adembidi ëmbi bëdamboen isaidquio mibi nec —quepanëdash aton Papa.

Esuquidistun tsusedpabo chiaidtedi
(Mat 1.1-17)

²³ Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiashton matses nadpanëdash. Osen mado nec, quiash, Nuquin Papan mado nec, quenquio yec matses onquepanëdash. Esusën papapenquio Ose icnëdash. Madia aton tita icbo icnuc Esusën tsusedpabo nëidtedi iquec: aton buchido Edi cuëmëdquid icpanëdash.

²⁴ Aidën papabic Matac cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid,

²⁵ aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai cuëmëdquid,

²⁶ aidën papabic Mac cuëmëdquid, aidën papabic Matatias cuëmëdquid, aidën papabic Semei cuëmëdquid, aidën papabic Ose cuëmëdquid, aidën papabic Uda cuëmëdquid,

²⁷ aidën papabic Uana cuëmëdquid, aidën papabic Desa cuëmëdquid, aidën papabic Sodobabed cuëmëdquid, aidën papabic Sadatied cuëmëdquid, aidën papabic Nedi cuëmëdquid,

²⁸ aidën papabic Medqui cuëmëdquid, aidën papabic Adi cuëmëdquid, aidën papabic Cosan cuëmëdquid, aidën papabic Edmodan cuëmëdquid, aidën papabic Ed cuëmëdquid,

²⁹ aidën papabic Osue cuëmëdquid, aidën papabic Ediesed cuëmëdquid, aidën papabic Odin cuëmëdquid, aidën papabic Matac cuëmëdquid,

³⁰ aidën papabic Debi cuëmëdquid, aidën papabic Simeyon cuëmëdquid, aidën papabic Uda cuëmëdquid, aidën papabic Ose cuëmëdquid, aidën papabic Onan cuëmëdquid, aidën papabic Ediaquin cuëmëdquid,

³¹ aidën papabic Medeya cuëmëdquid, aidën papabic Menan cuëmëdquid, aidën papabic Matata cuëmëdquid, aidën papabic Natan cuëmëdquid,

³² aidën papabic Dabid cuëmëdquid, aidën papabic Isai cuëmëdquid, aidën papabic Obed cuëmëdquid, aidën papabic Bos cuëmëdquid, aidën papabic Sadomon cuëmëdquid, aidën papabic Nason cuëmëdquid,

³³ aidën papabic Aminidad cuëmëdquid, aidën papabic Adan cuëmëdquid, aidën papabic Eston cuëmëdquid, aidën papabic Pades cuëmëdquid, aidën papabic Uda cuëmëdquid,

³⁴ aidën papabic Acobo cuëmëdquid, aidën papabic Isac cuëmëdquid, aidën papabic Abadauan cuëmëdquid, aidën papabic Tade cuëmëdquid, aidën papabic Nacod cuëmëdquid,

³⁵ aidën papabic Seduc cuëmëdquid, aidën papabic Dacau cuëmëdquid, aidën papabic Pedec cuëmëdquid, aidën papabic Ebed cuëmëdquid, aidën papabic Sada cuëmëdquid,

³⁶ aidën papabic Cainan cuëmëdquid, aidën papabic Adpashad cuëmëdquid, aidën papabic Sen cuëmëdquid, aidën papabic Noe cuëmëdquid, aidën papabic Damec cuëmëdquid,

³⁷ aidën papabic Matusaden cuëmëdquid, aidën papabic Enoc cuëmëdquid, aidën papabic Aded cuëmëdquid, aidën papabic Macadaded cuëmëdquid, aidën papabic Cainan cuëmëdquid,

³⁸ aidën papabic Enos cuëmëdquid, aidën papabic Sed cuëmëdquid, aidën papa abia uampid Adan cuëmëdquid, aidën papambo Nuquin Papa abia yanampidquio nec. Abi tabadec. Aidtedi Esusën tsusedpabo nec.

4

Satanas Esus icsamete bunaid
(Mat 4.1-11; Mad 1.12-13)

¹ Adshumbic, Matses nebi, quequin Nuquin Papan chiacpaden nanuen acten mentoepanëdash Esusën. Aden Uanën acten mentoaquien Nuquin Papan Mayanën chiacpadec acte Odan caid yacnoësh puduanec matses nibëdacnombo nidash tsadpanëdash.

² Ushë utsi nidash utsi choaid abuctotsëcquiecnuc ambobi tsadpanëdash. Aidtedi ushquin penquio yash Esus bundopanëdash.

³ Bundoacsho isash Nuquin Papa chieshënquid choash Satanash nadpanëdash: —Nuquin Papan madombo icquin penun cuënotebi pete icta cata —capanëdash Satanash Esus chuiquin.

⁴ Adoaquien: —Padi: “Peteuidi pec bëdamboec tabadtemaid nec,” quequin dada uampic —quepanëdash Esus Satanash caic.

⁵ Adoshombic, macuësh dapa abucquio yacno Esus buanshun Satanash badedquio nidaidtedi ishebampanëdash.

⁶ Ismiash: —Nidaidën icquidtedishun icho icmiaidquio nebi. Abitedi con na nec. Ëmbi menenu cac aitedi mitsana iquendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibëdendac.

⁷ Nidaidën tabadquidtedi chuiquid dapa icnu quequin, Con icho mibi nec, ëbi casho adquid mibi icmeme —quepanëdash Satanas Esus caic.

⁸ Adoaquien: —Padi. Nuquin Papan chiaid dada uapampid nad iquec: “Nuquin Papa abentsëcquiobi mimbi tantiaiduidtsëqui min icbombo neque. Aidën namiaidquio icta” —quepanëdash Esus Satanas caic.

⁹ Adoshombic Edusaden yacno Esus buanshun Satanasën Nuquin Papa tabadte shubu uashunaid macano abucquio tsadumpanëdash. Aden tsadunshun: —Mibi Nuquin Papan madombo yec nëuëshquio dacuëdenquio yec pudunta.

¹⁰ Naden dada uapampid iqueque. Tantia. Chuinu. “Mibi pudunsho isun, Tsicatequin bëdamboen budmeta, quequin Nuquin Papan ambi uaido mayan bëdabo chiendac.

¹¹ Aidombi min taën tsasimbocquid tincanushe queshun uidën uaquin mibi bëdamboen budmendac.”

Aden min Papan chiaid icnuc dacuëdenquio yec pudunta —capanëdash Satanasën Esus chuiquin.

¹² Adoaquien: —Chuinu. Tantiata: “Nuquin Ichon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanëdash Esus Satanas caic.

¹³ Aden chiaquien Satanasën Esus icsamboen namenuen tanquin naimbudpanëdash. Aden naimbudequi, Padpidemboen ëmbi chiaid namenuquin Esus tanun nanuna, quequin ambibi tantianec Esus nianec Satanas nidpanëdash.

*Nasaded yacnoquido Esus bunesabo
(Mat 4.12-17; 13.53-58; Mad 1.14-15; 6.1-6)*

¹⁴ Adashic, Nuquin Papan Mayanën tantiamiaidquio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquio nec, quequin abi isquidon chiac dëuequidon tantiapänëdash.

¹⁵ Adnubic, Nuquin Papan chiaid chuibante shubu utsin-utsinquec puduedcuenequin Nuquin Papan chiaid Esusën chuibampanëdash. Aden chuisho tantiash, Nuquin Papan chiaid tantiaquidquio Esus nec, quec cuëdëncuededpanëdash.

¹⁶ Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash abi puduedteniacpadequi puduedash Nuquin Papan chiaid isec onquenush nidtopanëdash.

¹⁷ Nidtocho isun Nuquin Papan chiaid Isayas cuëmëdquidën dada uapampid anocquidën Esus menapanëdash. Aden aid meniac sananquin seccudoabanquin isbanec naded Esus onquepanëdash:

¹⁸ “Nuquin Ichon Mayanën namiaidquio nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiaid icsa ëmenuen chuibanta caidquio nebi. Aidëmbidi Satanasën yuaid Nuquin Papan bacuë icmenuequin chuibanta caidquio nebi.

¹⁹ Aidën Nuquin Ichon bëdamboen iste chuibanta caidquio nebi.”

²⁰ Adec isec onquequin nainshun dada uaid bidicashun meniash tsadpanëdash Esus. Adec tsadsho shubu nuntan icquidtedishun bëisbededpanëdash.

²¹ Adoac: —Nuquin Papan chiaid mimbi tantiaboed nëbimbobi tauadoec —quepanëdash Esus abibi chiaidequi.

²² Adoaquien: —Bëdamboen chuipec. ¿Mitsipaden tantiaid ambi chiaid nepeba? —quecuededpanëdash. Adec onqueboedobi: —¿Osen mado Esus nenquioda ictic? —queoapanëdash.

²³ Adoaquien: —Bëdamequid yequi abibi daicsambo yanash bëdamiadacsho isash, Bëdamequidquio nec, quequin matsesën tantiapec, quequin chuipampid nec. Ëmbi Capednaun yacnoshon nabambocpadomboen nëshuntsen nabansho isun, Nadatiambocquin nabanquid nec, quequin mibitedishun tantiapec.

²⁴ Abimbo chiembique. Tantiata —quiaish Esus abi onquec: —Nuquin Papan ëmbi tantiamiacpaden chuibanta caidën abi caniacnoshon chuibansho tantienquocquid icpec.

²⁵ Ëdenquimboshë adomboembidi Nuquin Papan ëmbi tantiamiacpaden chuibanta caid Edias cuëmëdquidën chuibansho tanties a icpampic. Aidi icnubien isadaidbon bënuu chidobo dadpen icpampic. Aido adquid icnubien seta abentsëc chotsëcnuc matamec aton pete nibëdquic yanubi isadaidbon bënuabo bunec tabadpampic.

²⁶ Adec bunec tabadsho isun, Isadaidbon bēnua yacno nidta, quenquiocquin isadaidpembon bēnua yacno pemenuc nidta cac Edias nidshun ambi chiacpadomboen isadaidpembon bēnua nanuc aton pete uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anoentsēqui icpampic.

²⁷ Adashic, adecbidi isadaidbo abi daushumbo yacno mishac mishadenquio yacimbocquido dadpen icpampic. Adquido incubien Nuquin Papan namiaidquio utsi Ediseyo icpampic. Aidēmbi isadaidbo daushumbocquido bēdamenquiocquin isadaidpembon abentsēc Naman cuēmēdquid Ediseyon bēdamepampic. Ēbi bēdamepec, quequin tantiec aton nidaid Sidia caid yacnoēsh choacsho Ediseyon Naman bēdamepampic –quepanēdash Esus.

²⁸ Aden Esusēn isadaidpembon nashumpampid chuisho tantiasch iccuededquido isadaidbo comapenec nēishpanēdash. Isadaidpembobēd isadaidbo ictiapimbo iquec, quec iccuededquido nēishpanēdash.

²⁹ Adec nēishash nidanec nuntanuēsh puduenanec shubu ēnēdacno nidshun acte dapa quiusudacnombo nebudnuequin Esus buampānēdash.

³⁰ Aden nidmiaquien matses dadpen icquid natsusash Esus nidpanēdash.

*Mayan icsa dapuduedaid cuemetē
(Mad 1.21-28)*

³¹ Adec abi caniacnoēsh Nasaded caid yacno nidtanashi nidaid Cadidia yacno nidequi Capednaun caid yacno Esus choapanēdash. Ambo choash chonoadtemaid ushē icnuc Nuquin Papan chiaid chuibante shubun puduedshun Nuquin Papan chiaid chuibanpanēdash.

³² Aden chuibansho tantiasch: –Ambia tantiaquidēn chiacpaden chuibanquidien Esus nechitec –quecuededpanēdash anocquido.

³³ Aden Esusēn chuibanubien Nuquin Papan chiaid chuibante shubu nuntan mayan icsa dapuduedaid icpanēdash. Aidi comapenec sidquetanec onquec:

³⁴ –¿Nasaded yacnocquid Esus caid atotsi quec mibi cho? ¿Ēbipadquidtedi naimbudmenuecta cho? Ēmbi isaid mibi nec. Nuquin Papan bēdamboen isaidquio, icsapenquiocquidquio mibi nec –mayan icsan caquien:

³⁵ –Otacquio tabad. Adec tabadec dapuduenta –Esusēn cac mayan icsan abi dapuduedaid tacpanēn nebudec icsa uainquio yec dapuduempanēdash.

³⁶ Adosho isash tantiadempambo iquequi: –¿Chuiquid dapan chuitequidta neque? Tantiabono. Nadatiambocquin chuibanac mayan icsabo dapuduenchitequien nec –quepanēdash Capednaun yacnocquido.

³⁷ Aden tantiaquin Esusēn mayan icsa dapuduemiosch, quequin isquidon chuiban chuibanac Capednaun yacno dēuequidtedishuntsen tantiapanēdash.

*Daicsambocquid dadpen Esusēn bēdamiaid
(Mat 8.14-17; Mad 1.29-34)*

³⁸ Mayan icsa dapuduemiaschic Nuquin Papan chiaid chuibante shubu yacnoēsh puduenanec Simonēn shubu yacno Esus nidpanēdash. Ambo puduedacsho isun: –Simonēn nachi chumboshē iqueque. ¿Ada aid bēdametsia? –caquien:

³⁹ Simonēn nachi yacno choash dayunquio nidtuidec: –Chumbocquid daebudta –Esus quenubi badedquio daebudpanēdash. Adec daebuddash nidtoshon codocashun Esusbēd icquido pemepanēdash Simonēn nachin.

⁴⁰ Adshumbic, inchēshbudtsēqui daicsaid utsi-utsien bē-bēpanēdash. Aden bē-bēsho isun damishquin Esusēn bēdamepanēdash.

⁴¹ Adembidi mayan icsa utsi-utsien dapuduemepanēdash. Adoac, Nuquin Papan madombobi mibi nec, quec sidquesho tantiaschun: –Nuquin Papan chomiaid nec, quequin ēbi chiec adec onquenda –Esusēn cac mayan icsa ēnēdpanēdash.

⁴² Adashic, badiadnuc matses nibēdacno Esus nidpanēdash. Esus nidacsho isun matses dadpenshun nibēnquin istuidshun: –Nidenquio yec ēbēdi tabadta –capanēdash istuidquidon.

⁴³ Adoquien: –Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuc nidendabi. Nuquin Papan chomiaid icquin chuibanun nabono –quepanēdash Esus abi nibēnquin istuidquido chiec.

⁴⁴ Aden chiashic Nuquin Papan chiaid chuibante shubu utsin-utsinquec puduedcuenequin Nuquin Papa yacno tabadte iquec quequin chuibanpanēdash. Nidaid Udeya caid yacno shubu dadpen icquid utsi-utsiec yacno choshon aden Esusēn chuibanpanēdash.

5

Abëd tabadmenuen chomiaid
(*Mat 4.18-22; Mad 1.16-20*)

¹ Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccuedquido dadpen tabadpanëdash.

² Adnubien masi yacno aton cano daëd nëshun icbon aton nëshaidtedi pambampanëdash.

³ Adsho isanec nidash Simonën cano antsadtoshon, Udictsëc ëbi buan, Esusën cac Simonën udictsëc buampanëdash. Aden buanac chian cuëman iccuededec tabadshobi cano antsadquin Esusën chuibampanëdash.

⁴ Aden chuibanquin nainshun: –Shodombo yacno nuëcquid bednuequin nëshaid nënebanta, Simon –capanëdash Esusën.

⁵ Adoaquien: –Icbo, inchëshëmbi nuëcquid bednuec nëshaid nënebenuquin ëbitedishun bedamboccombi. Mimi nëshaid nënetan cac nënetanembi –quepanëdash Simon.

⁶ Adash shodombo yacno nidshun nëshaid nënetanquin nuëcquid dadpenquioshë bedac nëshaid tèsëdec taëpanëdash.

⁷ Adsho isun abëdtan nuëcquid beduidboedo cuënquin, Cadoec cho, quequin ismiac aido cano utsin choshon cano cubu-cubutsëcquiocnoc nuëcquid sandoac cano daëd mentoatd-
sempanëdash.

⁸ Adoanec Esus yacno choequi danëshën sebudec shuebudash Simon Petedon: –Icbo, ëbëd iquenquo yec nidaneta. Icsambocquid nebique –capanëdash Esus chuiquin.

⁹ Abëd icquidobëdtan nuëcquid dadpen bedboed tantiadempambo iquéc, Esus nadati-ambocquid nec, quequin tantiec onquepanëdash Petedo.

¹⁰ Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: –Dacuëdenda. Mimi nuëcquid penun acten bedbocpaden nëbi tauain ëbi tantiaquid icmenuen nidaidën capu-
cuenequin abuc tabadaid mimi chuiban-chuibanendac –quepanëdash Esus Petedo caic.

¹¹ Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

Daushumbocquid bëdamiaid
(*Mat 8.1-4; Mad 1.40-45*)

¹² Adashic, shubu dadpen yacno Esus icnubien daushumbocquid nami mishac paëpenquiocquid chopanëdash. Aidi choash Esusën taëno shuebudec nadpanëdash: –Ëbi bëdamete bunquin ëbi mimi bëdamepec –quepanëdash daushumbocquid.

¹³ Adsho tantiashun adquid daushumbocquid mishtemaid nec, quenquiocquin damishec Esus: –Mibi bëdamete bunebique. Mibi bëdamenu –quenubi badedquid bëdampanëdash.

¹⁴ Aden bëdametanec Esus: –Ëmbi naid utsibo chienda. Adenquiocquin isadaidbo tsi-
siobo ismetanta ma bëdamiaid Nuquin Papan naid nec quequin ma aidon tantiapanu. Aido
ismeshun Nuquin Papan ambi chiaid Moises dada uamiampicpadembi bëdambo icmiaid
cuidtequidquo meneta –capanëdash Esusën ambi bëdameboed chuiquin.

¹⁵ Adnubien Esusën bëdamesho isquidon Esusën bëdamiaid chuibanac matses dadpen
Esusën chiaid tantianuec cho-chopanëdash. Adecbidi, daicsambocquido bëdanuec cho-
choacsho Esusën bëdamapanëdash.

¹⁶ Adashien matses nibëdacnombo nidash Nuquin Papa chiec onquepanëdash.

Dada shëquëquenquiocquid bëdamiaid
(*Mat 9.1-8; Mad 2.1-12*)

¹⁷ Adashic, ushë utsin Esusën chuibanuc padiseyobobëdi Nuquin Papan naden nata
quequin chiaid tantiamequid dadpen tabadpanëdash. Utsi-utsiec nidaid Cadidia yacnoësh
cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid
shubu dadpenquioshë yacnoësh cho-chopanëdash. Adec aido cho-choash tabadnubien
Nuquin Papan nadatiambocquid naquid icmiai matses bëdamenuc Esus icpanëdash.

¹⁸ Aid icnubien dada shëquëquenquiocquid aton din nandoshon aton utsibon bëpanëdash.
Aden bëquin shubu nuntan nënantanquo Esus icnubi

¹⁹ matses tsucus-tsucustsëcquiocsho isash pudedtiapimbo yec macano pada-
padapambo yacno dada shëquëquenquiocquid buanec dectatoshon macano chic-chicshun
dada shëquëquenquiocquid abi bëquidon imbudpanëdash.

²⁰ Dada shëquëquenquiocquid ëmbi bëaid Esusën bëdamec, quequin tantiaquin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquio yec bëpiscudtequidquio mibi nendac —quepanëdash Esus.

²¹ Aden chuisho tantiaish padiseyobobëd Nuquin Papan naden nata quequin chiaid tantiaquid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papanuidi tantiaid icsa cuidenquio yec bëpiscudquidquio nec —quepanëdash ambibi tantiacpadec onquec.

²² Aidon tantiaid tantiec Esus: —¿Atotsi quiash mimbibi icsamboen tantiec onquepe?

²³ ¿Mimbi tantiaid icsa cuidenquio yec bëpiscudtequidquio nendac ëmbi chiaidquid bëdantequidpenda nedic? Adecbidi, ¿Mibi icsambochoedi mibi bëdanoque. Nidtoash nidta, quequin chiaid bëdantequidpenda nedic?

²⁴ Nuquin Papan chomiaid icquimbi mimbi tantiaid icsa cuidenquio yec bëpiscudtequidquio nendac ëmbi cac ad iquendac. Nuquin Papan chuimiaidquid nec mibitedi camenun dada shëquëquenquiocquid naden chiembique Tantia. Nidtoash nidquin min di buanec nid —capanëdash Esusën dada shëquëquenquiocquid chuiquin.

²⁵ Adoac nidtoshon aton di bedanec Nuquin Papan naboad chuibanecui aton shubuno nidpanëdash.

²⁶ Adsho isash tantiadempambo yec Nuquin Papan naid chiec onquecuededec tabadpanëdash: —Aden bëdamiaid isenquiochoedëmbi nëbimbobi aid isbempombi —quecuededpanëdash.

*Debi, ëbi tsibanec cho, quequin Esusën chiaid
(Mat 9.9-13; Mad 2.13-17)*

²⁷ Adashic, capucuenequin Debi cuëmëdquid Esusën istuidpanëdash. Debi nec queshumbi Mateyo cuëmpanëdash. Ancanquid dapan utsibon na bedtequid bedshumbanta caid Debi icpanëdash. Ancanquidën chiapaden Debin utsibon na bedtequid bedbansho isun: —Ëmbi chiaid tantianush ëbi tsibanec cho —Esusën cac

²⁸ Debi nidtoanec aton natedi nianec Esus tsibananec nidpanëdash.

²⁹ Adshun aton shubuno Esus buanshun Debin pemepanëdash. Ancanquidën utsibon na bedtequid bedbanta caido abipadquido dadpembëdtabi Esus Debin pemepanëdash.

³⁰ Aden adquidobëdtan Esusën pesho isash padiseyobo: —¿Atotsieshun mibi chuiquidbëdtan mibitedishun icsambocquidbëdtan pepeba? —quepanëdash Esusbëd icquido caic.

³¹ Aden chuisho tantiaish Esus nadpanëdash: —Ëbi bëdamec cho, quenquio bëdambocquid iquec. Daicsambocquidien, Ëbi bëdamec cho, quendac.

³² Adecbidi, Nuquin Papan bëdamboen isaidquio icsho, Mimbi tantiaid icsa ënta, quequin chuinuec choenquio iccondabi. Nuquin Papan icsamboen isaidquio icsho, Mimbi tantiaid icsa ënta, quequin chuinuec chondabi —quepanëdash Esus padiseyobo caic.

*Buna mëmunaid
(Mat 9.14-17; Mad 2.18-22)*

³³ Aden Esusën chuibancho tantiaishun naden padiseyobon Esus chuipanëdash: —Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec. Adenquio mibëd icquido iquec. Aidon buna mëmunenquiocquid peshun sicaid actenec —quepanëdash padiseyobo Esus chiec.

³⁴ Adoquien: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquid isuidenquio iquec.

³⁵ Yucash chido inquid nibëdanan abëd icboedo unësquiocquid buna mëmunquin isuidpec. Adecbidi ëbi nibëdanan ëbëd icboedo unësquio yampec —quepanëdash Esus padiseyobo caic.

³⁶ Aden chuibanecui abi Esus onquec: —Dashcute chuca cuëshun dashcute shënbëdta nacenquidn bëtuscaisa matses nec. Cuëshquin dashcute chuca icsa uaic. Adecbidi shëni tuscaid bëtësëdec.

³⁷ Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic chodo shënin icsa sandoshon nequid bëenquiocquid.

³⁸ Adembidi, ëmbi ënden tantiaitudi tantianu, quequin Nuquin Papan nëbi chiaid pausudtequid bëda tantiauidquid yanec icsabudendac. Mibi adquid iquec, quequin tantiaquin utsi chiachimboen Esusën padiseyobo chuipanëdash.

³⁹ Adashic ambi ënden chiaid tantienquiochoedi nëbi Nuquin Papan chiaid utsi chuibanac tantiauidquio iquendac —quepanëdash Esus.

6

*Chonoadtemaid ushë tantiaquid**(Mat 12.1-8; Mad 2.23-28)*

¹ Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchicshun abëd icquidon bitsi tsucucashun pebededpanëdash.

² Aden pesho isquin padiseyobon: —¿Atotsieshshun chonoadtemaid ushën chonoadpeque? Tiantianu. Èbi chui —capanëdash Esusbëd icquido chuiquin.

³ Adoquien: —¿Tsusedpa Dabid caidbëd icquidon piasquin pepampid tantiamboda ique?

⁴ Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënën puduedshun Nuquin Papa tantiaquin pan meniac nanaid chuiquid dapan bedshun abëd icquido menebanshun aidobëdtambi pepampic. Aid pan Nuquin Papan namiaidënuidtsëqui petequid nepampic —quequin padiseyobo chuishun Esusën nadopanëdash:

⁵ —Èbia: Tiboquenu, quiash tsadacpadece matses: Nëid chonoadtemaid ushë nec, quequin tantiec. Adnubini aid ushë icbo yec tiedën caniquid ëshchicshun bitsi tsucucasho isash: Mímibi icsamboen naic, quetiapimbo iquebi.

*Mëuesadaid bëdamaid**(Mat 12.9-14; Mad 3.1-6)*

⁶ Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquo mëuesadaid dada icpanëdash.

⁷ Ambobidi tabadquimbi Esus chieshënnquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash.

⁸ Aden cainubien abi chieshënnquidon tantiaid tantiaquin mëuesadaid isquin: —Nënantanquio nidto —Esusën cac mëuesadaid nënantanquio nidtoash nidpanëdash.

⁹ Adsho isashien: —Tiantianu. Chui. ¿Chonoadtemaid ushën matses tantiaquindambi bëdamboen nape? ¿Adoenquicquindambi bëdametmaid ushë nëid neque? ¿Mibi nëbi bëdametiapimbo iquebi, quequindambi chuipe? ¿Adoac daicsaid utsi-utsiec unëspec? —quepanëdash Esus.

¹⁰ Aden chuishumbic iccuededquido isbanquin: —Èbi mëd —cac Esus mëdequi mëuesadaid bëdampanëdash.

¹¹ Adec mëuesadaid bëdansho isashien comapenec nëishash: —¿Mitsipadentsimbi Esus acpe? —quec onquecuededpanëdash abi chieshënnquido.

*Esusën, Èbi chuibeneta, caido**(Mat 10.1-4; Mad 3.13-19)*

¹² Adashic, ushë utsin macuësh yacno matses nibëdacno Nuquin Papa chiec onquenuec nidash inchëshën ushenquido yec Nuquin Papa chiec Esus onquepanëdash.

¹³ Badiadshun abëd icquido dadpen chomeshun, Èbi chuibeneta, quequin 12tedictsëqui chuipanëdash.

¹⁴ Nëidic, Simon, Esusën Petedo caid; utsibic, Andedes, Simonën utsibi; utsibic, Acobo; utsibic, Uan; utsibic, Uedipe; utsibic, Badtodome;

¹⁵ utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa;

¹⁶ utsibic, Udas, Acobon mado; utsibic, Udas Iscadiote, yuecshun Esus chieshënnquido Esus bedmequid. Aidtedi, Esusën, Èbi chuibeneta, caido icpanëdash.

*Nuquin Papan bëdamboen isaïdo icnuc ambi icsamboen isaïdo**(Mat 4.23-25; 5.1-12)*

¹⁷ Adashic macuësh yacnoësh abëd 12ted icquido pada-padambo yacno budash abi tsi-banquido dadpen icsho isash Esus nidtuidpanëdash. Nëidted icpanëdash: Nëidic, Edusaden yacnoësh choquido; utsibic, Acte Dapa cuëman shubu dadpen icquid Tido caid yacnoësh choquido; utsibic, Sidon caid yacnoësh choquido. Aido Esusën chuibansho tantianuec choash tabadnubi, Èbi bëdamepec, quequin tantiec utsibo choash tabadpanëdash.

¹⁸ Adec choquido mayan icsa dapuduedaid icsho isun Esusën dapuduemepanëdash.

¹⁹ Adsho isun nadatiambocquid Esus neque. Mishnu, queshun mishequi bëdancuededpanëdash.

²⁰ Adshumbic abëd icquidombo isbanquin naden Esusën chuibampanëdash:

—Nëmbo mibi icnuc mitsana nibëdtenesho isun Nuquin Papan bëdamboen isaïdo iquec abuc nidan con natedi mitsana nendac.

²¹ “Nëuëshquio bundodenesho isun Nuquin Papan bëdamboen isaïdo yec abuc ëbëd tabadec bundoesa iquendac.

“Nëuëshquio matses Nuquin Papan chiaid tantiesca icsho isash unëshquio yec shubided-nequid Nuquin Papan bédamboen isaid yec abuc nidash ëbéd tabadec bédambo iquebi quependac adquido.

²² “Esus tantiaquid icsho chieshënquin pudued cainquio yaid adembidi mua uaquin chuishunaid Nuquin Papan bédamboen isaidquio nec.

²³ “Adomboembidi ëmbi ëndenquimbo chuimiai aton matsesën icsamboen chuishundeniampic. Adomboembidi mibi min matsesën icsamboen chuishundenetsiash. Nidaidënshun adoaid iquec Nuquin Papa yacno choacsho ambi bédambo icmiaid mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

²⁴ “Padnuen, con na dadpen iquec, quequin tantiec bédamboec tabadebi, qesho Nuquin Papan icsamboen isaido mibi nec. Nidaidënshun mimbi bedteniaiduidi tantiec Nuquin Papa yacno puduedtiapimbocquid mibi iquendac. Nidaidën bédamboec tabadquin ënden bedondaiddi mibi nec.

²⁵ “Nidaidënshun abi bunaidtedi bedquido Nuquin Papan icsamboen isaido nec. Abi bunaiduidi tantiaquin Nuquin Papan chiaid tantianu qeshun tantiatipimbo iquendac.

“Mitsanauidi tantiec, Bédambo iquebi, quec mamë nec tabadquido icsho Nuquin Papan icsamboen isaido mibi nec. Adquido Nuquin Papa yacno puduedte bunsho, Padi, cac shubiquiendac.

²⁶ “Bédambocquid nec, quequin mibi dadpeshun chuisho tantienda. Adomboembidi mua uain Nuquin Papan ëndenquimbo chuimiai dpebon chui pampic. Aidon chiaid tantiashun tsusedpabon Nuquin Papan chiaid tantienquio yanampic. Adquido Nuquin Papan icsamboen isaido nec —quepanëdash Esus.

Mibi uimanënquido tantiaquin nabanta, quiaid

(Mat 5.38-48; 7.12)

²⁷ Aden chiashic abi Esus onquec: —Ëmbi chiaid tantiaquidquio nad iqueque. Chuinu. Tantiata. Mibi chieshënquido bédamboen tantiaquin nabanta.

²⁸ Adembidi mibi icsamboen chuiquid bédamboen chuita. Adembidi, ëbi icsamboen naido bédamboen tantiaquin cuidenda, Papa, quequin Nuquin Papa chuita.

²⁹ Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bédamboen nabanta. Adembidi ampequin min dashcute bedanec nidsho isun, Chiata. Dadamicquidtsen buan, cata.

³⁰ Utsibic, aton na nibédquid, Bec cho, qesho meneta. Adembidi utsin mitsana ampesho isun cuidenquiocquin bédamboen naoata.

³¹ Adembidi ëbi bédamboen nashuntiadquidi nepec quequin mimbi tantiacpadomboen utsi tantiaquin nashunta.

³² “Ëbéd tantiananquiduidi tantianu, quec ¿bédamboda mibi icpe? Padenquio. Adembidi Esus tantiesan abipadquiocquido tantiec.

³³ Adecbidi, Ëbi bédamboen tantiaquin nashunquiduidi tantiaquin nashunoanu quec ¿bédamboda mibi icpe? Padenquio. Esus tantiesan adembidi nashunquidquio nec.

³⁴ Adecbidi, Ëbi menequiduidi menenu, quec ¿bédamboda mibi icpe? Padenquio. Esus tantiesan adenuidi menec.

³⁵ Naden nata, quequin chuinu. Tantia. Mibi chieshënquid icsho aid tantiaquin bédamboen nabanta. Adembidi mibi meniantiapimbocquid, Bec cho, qesho, Yuecash cuidnanun nanuna, quenquiocquin meneta. Mimbi adoshu isun Nuquin Papan mibi bédamboen isendac. Adobanec bédambo iquebi quec mibi tabadendac. Adomboen nabanquido Nuquin Papan nacpadomboen nabanquid nendac. Adquido aton mado iquendac.

³⁶ Nuquin Papan abi chieshënquido nashundeniacpadomboen mibi chieshënquido nashundeneta —quepanëdash Esus.

Icsambocquid nec, quequin chienda, quiaid

(Mat 7.1-5)

³⁷ Aden chuibanashic Esus abi onquec: —Ëmbi tantiacpadomboen naisa icsambocquid nec, quenda. Adesa abi yacno choacsho Bédambocquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquidi Nuquin Papa nec, quenda. Adenquio icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash cuidnanenquio yec bëpiscudta. Adquid, Cuidnu, quenquio yec mimbi icsamboen tantiaquin naid Nuquin Papa bëpiscudendac.

³⁸ Aton na nibëdquid bédamboen tantiaquin meneta. Adembidi, mibi tantiaquin abi utsibëd bédamboec tabadtequid Nuquin Papan mibi menendac. Utsi tantiaquin mimi meniäcpadomboen mibi tantiaquin bédamboen tabadmetequid daëd uashun Nuquin Papan mibi meneoaindac –quepanëdash Esus.

³⁹ Aden chuishumbic utsin tantiengio ictequid abëd icquido naden Esusën chuipanëdash: –¿Podquedën nidnu quec bëshuaid utsi bëyucampecta nidtic? Nidnu, quianec nidec abi daëdi nidaid shëcuë ampäëdpatsiash.

⁴⁰ Adembidi tantianuequidën abi tantiamequid dëniätiapimbo iquec. Tantiamiac abi tantiamequidpadquid iquendac –quepanëdash Esus.

⁴¹ Adoshombic ademi tantiamequin naden Esusën chuipanëdash: –¿Atotsi quiaish utsi bëtsiadaid pistsëcquid isequi mibi bëtsiadaid dapa isadtiapimbo icpec? ¿Mibibi bëtsiadaid dapa bëbedadabicquin mitsipadentsi mimi utsi bëtsiadaid pistsëcquid bedshunuen ispe?

⁴² Adembidi, utsin tantiaid icsa abentsëc icnubien mimi tantiaid icsa utsi-utsiec icnuc çatotsieshun, Mimi tantiaid icsa ënta, quequin utsi chuipe? Mimi tantiaid icsa nibëdacimboen mimi chuipeque. Adoenda. Mimi tantiaid icsa ënshun utsin tantiaid icsa icsho isun ëmenuequin chui –capanëdash Esusën.

Cuëte abipadquid aton bacuë nec, quequin chiaid
(Mat 7.17-20; 12.34-35)

⁴³ Adoshombic, adembidi Esusën chuipanëdash: –Cuëte bédan bacuë adquiobidi bacuëec. Cuëte icsan bacuë adquiobidi bacuëoic.

⁴⁴ Chetequid isun cuëte dada matsesën tantiec. Aden tantiec nisanquidën bacuë isash, Dadain bacuë nec, quenquio matses iquec. Adecbidi, echo bacuë isash, Bata nec, quenquio matses icoaic.

⁴⁵ Adembidi bédamboen tantiaquidën ambi tantiacpadomboen utsi bédamboen tantiaquin nabanendac. Adecbidi ambi tantiacpadec bédamboec onquec. Adembidi icsamboen tantiaquidën ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec –quepanëdash Esus.

Tantiaquidquio icnuc tantiaquidquid nec, quequin chiaid
(Mat 7.24-27)

⁴⁶ Adoshombic: –¿Atotsieshun, Con Icho mibi nec, qeshumbi ëmbi chiacpadomboen naisa mibi ne?

⁴⁷ Èbi yacno choshon ëmbi chuibansho tantiaquias shidshun nadomboen naquidquio iqueque. Chuinu. Tantiata.

⁴⁸ Cunquequid dapan chimeshnushe qeshun shubu uaquidën shëcuë ëquëduc uëdëshcashun buintad nitsinquid. Adembidi, natiamianquiec cametequid yanabicnuc tantesa uainquiocnuen ëbi tantiaquidquio icquin ëmbi chiaid papudedshun adomboembidi nabanquid nec. Adquidën tantesa uainquio iquendac.

⁴⁹ Utsibic nad iqueque. Tantiata. Èquëduc uëdëshcabi nitsinaid cunquequid dapan chimeshunendac. Adecbidi, ëmbi chiaid papudeduidtsacpadomboen nabanenquio yec natiamianquid chonoc abi papudeduidtsaid bëpiscudendac. Adquid uquë nësecatequid nendac –quepanëdash Esus.

7

Sondado chuiquidën tantiaid
(Mat 8.5-13)

¹ Aden iccuededquido chuiquin nainash Capednaun caid yacno Esus nidoapanëdash.

² Capednaun caid yacno choash Esus tabadnubien isadaidpembon sondado chuiquidën yua abi cudasaïd unëstiadsëcquio icpanëdash.

³ Aton yua unëstiadsëcquio icnubien, Nënquid bédamequid Esus nëmbobi iquec, quequin utsibon chiac:

–Aidën con yua bédametsiash –quianec isadaidbo tsusiobo yacno nidshun istuidash: –¿Con yua chiec Esus yacno ada mibi nidpatsia? –quepanëdash sondado chuiquid.

⁴⁻⁵ Adoquien: –Ai –quianec Esus yacno isadaidbo tsusiobo nidshun chuituidec: –Sondado chuiquidën chuitan caido nebi. Con yua unëstiadsëcquio iqueque. Esus bédamequid neque. Chuitan, cac mibi chiec chobi. Sondado chuiquid bédambocquid nec. Nuquin Papan chiaid chuibante shubu uamiondaïdquio nioshe. Ambi chiacpadomboen aton yua bédametiäquidi mibi nec –quepanëdash isadaidbo tsusiobo Esus caic.

Adoac aidobëdi Esus nidpanëdash.

⁶ Adeç aidobëd Esus nidshobi sondado chuiquidën chomiaid utsibo choquin bëqueduidash nadpanëdash: –Sondado chuiquidën chomiaid nebi. Aidën chiaid chuinuec

chopobi. Naden chuita, caposhi: “Padicnuna, Icho. Icsambocquid nebique. Mibi bédambocquid iquec con shubun puduedenquioctiadquidi mibi nec.

⁷ Èbi icsambocquid iquec mibi bèquedec nidenquioccobi. Mibi bédamequid yec con shubun puduedenquiocquin mibi yacnoshombi, Bédanta, mimbi cac con yua bédampec.

⁸ Èbien sondado chuiquid nec. Èmbi nidta cacpadquiequi sondado nidec. Adecbidi, Cho, èmbi cacpadquiecbidi choaic. Adembidi, Nadota, cacpadomboembidi con yuan nabanec,” quequin chuitan sondado chuiquidèn cabocpadembi mibi chuipombi —quepanèdash sondado chuiquidèn chuitan caido Esus caic.

⁹ Adoquien: —¿Abimbobida cai? —queshun ambi chiaid tantiamenuequin iccuededquido Esusèn bèisbanquin nadopanèdash: —Chuinu. Tantiata. Sondado chuiquid isadaidpembo èbi tantiaquidpadquid isadaidbo nibèdec —quepanèdash Esus.

¹⁰ Aden chiaquien sondado chuiquidèn chuitan caido aubidi nidoash shubun puduedeshun sondado chuiquidèn yua bédamiaid istuidpanèdash.

Nianten mado uincuen uaid

¹¹ Adashic, ushè utsin shubu dadpen icquid Nain caid yacno Esus nidpanèdash. Aibdèdi abèd icquido nidpanèdash. Adecbidi matses utsibo dadpen nidpanèdash.

¹² Adec nidequi Nain tsasi uaid quènè shècuè anoentsèqui choquimbi unèsaid bèquido bèqueduidpanèdash. Unèsaid epa icnubi ani niante icpanèdash. Niantebèd Nain yacnoquido dadpen cho-chopanèdash.

¹³ Adec cho-choec niante shubisho isash Esus unèsquio yec: —Shubienquio yec ènèd —quepanèdash.

¹⁴ Adec, Ènèd, quetanec udictsèc nidshun unèsaid nanaid Esusèn mishnubi abi bèquido nidtuidpanèdash. Nidtuisho isun: —Abuido, uètsèdtota —cac

¹⁵ uètsèdtoash tsadec unèsboed onquepanèdash. Adsho isash ani caic: —Nè, unèsboedi min mado uincuenoshe. Abèdi nidec nid —capanèdash Esusèn.

¹⁶ Aden unèsaid uincuemesho isash cho-choquido: —Adopenshenda uincuemec —queshun Nuquin Papan naid chuibampanèdash. Aden chuibanec: —Nuquin Papan matses bédamboen isnuen ambi chomiaidquio nuquibèd icmiosh —quec isquido onquecuedepanèdash.

¹⁷ Aden isash nidshun unèsaid uincuemiaid isquidon chuibansho isadaidbon nidaid Udeya caid yacnoquidon tantiabempanèdash. Adembidi chiac dèuequidontsen tantia-panèdash.

Èbitedishun cainaid mibi nec, quequin Uanèn chiaid

(Mat 11.2-19)

¹⁸ Adnubien, acten mentoanondaid Uan cuèmedquid quènèn nauedaid icsho abèd icquidon Esusèn nabanaid chuibampanèdash. Adoquien abèd icquido daèd chomeshun Uanèn nadopanèdash:

¹⁹ —Esus yacno nidshun nadota. ¿Èbitedishun cainaid Nuquin Papan chomiaid abentsècquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanèn cac aid daèdi Esus yacno nidpanèdash.

²⁰ Adec Esus yacno choash: —Acten mentoanondaidèmbi Uanèn chomiaido nebi. Uan nadosh: “¿Èbitedishun cainaid Nuquin Papan chomiaid abentsècquiobi mibida ne? cac ¿Aidtabi nedi? mibi quenuc ¿Adambi utsi caimpe?” quiosh Uan —quepanèdash Uanèn chomiaido Esus caic.

²¹ Aden chiaquien icsambocquid bédamequinc, mayan icsa dapuduedaid dapuduemequinc, bèshuaid bédamequinc caquin Esusèn ismebampanèdash.

²² Aden nabanquin nainashic: —Mibi chuiquid Uan caid yacno nidshun èmbi nabamboedtedi mimbi isboed naden chuitanta. Bèshun isbenosh. Adecbidi canite icsaidi capuanosh. Adecbidi daushumbocquidon nami bédanosh. Adembidi pashun tantiabenos. Adembidi unèsaid uincuemiosh. Adembidi aton na nibèdquido tantiamenuen Nuquin Papan chiaid Esusèn chuibanosh, quequin Uan chuitanta.

²³ Èmbi aden nabansho isun tantesa uainquiocquin Nuquin Papan bédamboen isaidquio nendac, Esus quiosh quequin Uan chuitanta —quepanèdash Esus Uanèn chomiaid daèd chiec.

²⁴ Adashic, Uanèn chomiaido nidambi iccuededquido tantiamenuen Uan chiec Esus nadpanèdash: —¿Atotsi isnuec matses nibèdacno nidonda? ¿Cunquequidèn ishcunaid isnuecta nidtionda?

²⁵ ¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta nidtionda? Padenquio. Dashcute ushumbocquid dasiuidquido aton na dadpenquio icquido ancanquid dapan shubun tabadquido nec.

²⁶ Ad icnuc, ¿atotsi isnuec matses nibëdacno nidonda? ¿Nuquin Papan ambi chiaid chuimiaið isnuec nidenquioda ictionda? Ai, matses nibëdacno Nuquin Papan chuimiaið isnuec mibi nidondac. Uanën ëbi chuiquidëmbi ispondashi. Èbi ëndenquimbo chuiquido ëbi isesabo icpampic.

²⁷ Èbi cain naden Uan Nuquin Papan chuimiampid nec: “Mibi choec quequin chuibanquidba chomembi.

Mibi choec quequin chuibanac ambi tantiaid icsa ënshun mibi cainquidombo iquendac.” Aden ëbi cain Uan chuiquin dada uapampid nec.

²⁸ “Adembi Uan chuibanu. Tantiata. Nuquin Papan chuimiaið Uampadquid matsesën tishaid utsi nibëdec. Aidën ëbi chotequid chuibanac choshon ëmbi nabansho isenquio icposh. Isash, Nëid Nuquin Papan chomiaid nec, quetsemposh Uan. Aidi quënën nauedac ëmbi nabanaid istiapimbo yec tsadec, Nuquin Papan chomiaid, ëbitedishun cainaid mibida ne, quepec –quepanëdash Esus.

²⁹ Aden Esusën chuibancho tantiash: –Nuquin Papan naid bëdambo iquec –quepanëdash Uanën mentobanonðaido.

³⁰ Utsiboen ambi tantiaid icsa ënenquio icquin Uan Esusën chuisho tantiash, Nuquin Papan naid bëdambo iquec, quetiapimbo aido icpanëdash. Aido padiseyobobëd matsesën naden nata quequin chiaid tantiamequido icpanëdash.

³¹ Aden Uan chiash Esus: –¿Nuquin Papan chiaid nëbi chuisho tantiesa mitsipadquid nepeque?

³² Adquid chuinu. Tantia. Ambi tantiacpaden naisa icsho isash bacuëbo yachimboec nëshun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquio iquec. Adquidën Nuquin Papan chuimiaiðen nabansho icsamboen ispec.

³³ Nua cubudquin pesa Uan icsho isash, Mayan icsa dapudedaid nec, queposh Uanën chuisho tantiesa.

³⁴ Èmbi peshun acsho isec, Nua peshun tantienquioquin acquid nepec. Aidbidi icsambocquidobëd icquid nec, ëbi caposh.

³⁵ Aden tantienquiocquid, Bëdamboen tantianu, qeshun bëdamboen tantiaquidënquio chuibancho tantiash abi tantiamequidpadquid iquendac –quepanëdash Esus.

Chidon Esus tanoshcaid

³⁶ Adashic, Èbi yacno pec cho, padiseyobo abentsëcshun cac aidbëd nidash shubun puduedash pete santen cuëshnudash Esus uepanëdash.

³⁷ Adec Esus puduedash uesho isquidon chiac utsin, Icsambocquid nec, caid chido choquin noadte bëda danoshquete aton shubumpichobi bëpanëdash.

³⁸ Aden bëëqui Esus yuedacno choash puduedshun abi bëdamquid Esus istuidash, Èbi bëdamequid bëdambo iquec, quequin ambibi tantiec shubiec Esusën taëno tsadbudshun aton bëunën tapascapanëdash. Aden tapascac taë chucusho isun aton manëdaidën tauschun taë tachoccabanshun noadte bëdan chidon tanoshcapanëdash. Chidon aton na bedtequid dadpen menequen comapenec noadte bëda bedshun Esusën taë tanoshcapanëdash chidon.

³⁹ Chidon adosho isash Esus yuedquid, Simon caid, abibi onquec: “Èmbi yuedaid Nuquin Papan chuimiaið iquec, Èbi mishquid icsambocquid nec,” quequin chido mishmenquio icpec, quepanëdash Simon.

⁴⁰ Adoaquien, tantiaquidquio icquin Esusën: –Mibi tantiamequin chuinu. Tantiata, Simon –capanëdash.

Adoaquien: –Aden chuiban. Tantianu –quepanëdash Simon.

⁴¹ Aden tantiashun Esusën Simon ambi tantiaid icsa tantiamenun utsi chuiquin nadopanëdash: –Bec cho. Yuecshun menenun nanana, quepondash daëd. Abentsëcshun dadpen bedshunubi utsin daëdpactsëc bedshumpondash.

⁴² Aden bedshunshun yuecshun ambi bedshunacted abi daëdi meniantiapimbo icpondash. Adsho isun: “Padi. Mimbi bedondaid ëbi cuidenda,” quequin abi bedshunëdaidën abi daëdi chuipondash. Adoacsho, ¿Mitsiquid abi bedshunëdaid ënenquioquin tantiec bëpiscudenquio icpec? –quepanëdash Esus Simon caic.

⁴³ Adoaquien: –Ambi dadpen meneshun cuidenda caidien nechitec –quepanëdash Simon.

Aden chiaquien: –Ai, bëdamboen tantiaquin mimbi chioc –quiash

⁴⁴ Simon ismenuec Esus chido yacmi bidiadshun naden chuipanëdash: –Min shubun puduedacsho mimbi taë pante ëbi menenquioccoc. ¿Nëid chido isquindactio? Aidëmbien aton bëunën taë chucu uashun aton manëdaidën con taë bëchishaid ucposh.

⁴⁵ Min shubun ëbi puduedsho isun tanchoccanesa mibi nec. Padnueni ëbi puduedacsho isun nëid chidon ëbi tantiaquioquin yuen con taë tachoccaniosh.

⁴⁶ Bëchin manoshcanesa mibi iccoc. Padnueni nëid chidombi noadte bēdan tanoshcaniosh.

⁴⁷ Adembidi mibi chiembique. Tantiata. Mayan icsa dadpenshun tantiamiaid icsho nëid chido bēdamepombi. Aden bēdamiashic abi icsaid tantienquo yec bēpiscudpobi. Ēmbi aden nac ēbi comapenen tantiaquoin ēbi nashunquidquo nëid chido nec. Padnuen utsi icsaid daēdpactsēc mibi icsaidtedtsēcbidi icpec. Adquid icsaid bēpiscudebi ēbi quenuc ēbi bēdiactsēc tantiatsec mibi nashumēnec —quepanēdash Esus Simon caic.

⁴⁸ Aden Simon chiashic chido caic: —Icsaquid nec, quenquiocquin icsainquo yacimb-boecquid mibi isembi —quepanēdash Esus chido chuioaic.

⁴⁹ Adsho tantiaish: —Icsainquo yacimb-boecquid mibi isembi, quec ŷmitsipadquid Esus nepec? —quepanēdash iccuededquido.

⁵⁰ Aden iccuededquidon tantianubi chido caic Esus: —Ēbi tantiaquid yec Nuquin Papa yacno puduedquid mibi neyoc. Bēdamboec tabadaid tantiamiaid mibi iqueque. Dacuēdenquo yec nidta —quepanēdash chido caic.

8

Chidobo abi nashunquido

¹ Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsēqui yacimbboec nidaidēn tabadaid chuibenepanēdash. Abi bēdamequid tsibananec chidobo nidpanēdash.

² Ambi mayan icsa dadpuemaiadobēdtan ambi bēdamiadon Esus tsibanampanēdash. Madia, Macada yacnoshon tishaid chedon Esus tsibanampanēdash. Mayan icsa 7ted dadpuemaiad Madia icpanēdash.

³ Abēnidquid utsi Uana icpanēdash. Aidēn bēnē Chusa cuēmēdquid, ancanquid dapa Edodesën shubu nuntan nacnemequid icpanēdash. Abēnidquid utsibic, Susana icpanēdash. Chido utsibo dadpen Esusbēd capucuenepanēdash. Aidon aton na dadpen icnuc Esusbēd icquidon aton na nibēdsho isun menebampanēdash.

Pete ēshē sequid

(Mat 13.1-23; Mad 4.1-20)

⁴ Aden chuibenias tabadtuidtsēcnubi ambi chuiquin tantiamēboedo cho-choquin tsibanampanēdash. Cho-chosho isun, Mibibimboecnuc chiembi, quenquiocquin Esusën nadopanēdash:

⁵ —Tiedēn caniquid pete ēshē sianuec aton tied yacno nidquid icbo. Adec nidshun tiedēn caniquid pete ēshē secabanac maisec utsi-utsiec podqued nantan paēdascho matsēsēn manenubi utsi-utsien uicchunēn chec.

⁶ Utsibic, cuēnote dadpen samēdacno secac badedquido dēyucuidtsash nidaid ēquēduc tapun nidenquo iquec bidiquequid.

⁷ Utsibic, nisanquid dēyucacno secac aidbēdi dēyucash canidoidtsacsho nisanquidēn bētīnac unēsquid.

⁸ Utsibic, nidaid bēdan secac dēyucash canias dadpen ēshēendac —quepanēdash Esus.

Aden chuibanashic: —Tantiata bēdamboecquidēn ēmbi chuiboed tantiapec —quepanēdash.

⁹ Adoaquien: —ŷmitsipadquid tantiaid mimbi chuiboed icpec? Ēbiteidi tantiamequin chuioa —capanēdash abēd icquidon.

¹⁰ Adoaquien: —ŷmitsipadequini Nuquin Papa yacno tabadpe? queboedēmbi nēbi mimbi tantiabene. Padnuen utsibon tantienquo yaid aid iquec. Aden chiac:

“Ēshē bēdamboecquid icquimbi tantiesia icquin ma Nuquin Papa yacno isenquiocpanuna. Adembidi tantiate bēdamboecquid icquimbi tantiesia icquin ma abimbo chiaid tantienquiocpanuna” —quepanēdash Esus.

¹¹ Aden chiashic: —Ēmbi chuiboed nad iqueque. Tantia. Chuinu. Tiedēn caniquid pete ēshē icbon siaidbimboecquid Nuquin Papan chiaid nec. Ēshē siacno nidaidbimboecquid matsēsēn tantiate nec.

¹² Podquedēn nidaid tsasimbocquidbimboecquid nad iquec. Nuquin Papan chiaid tantias papueduetiapimboesho Satansën bēpiscudmiaid adquid nec.

¹³ Cuēnote dadpen samēdacno nidaidbimboecquid nadquid iquendac. Nuquin Papan chiaid tantias, Bēdambo iquebi, quishic natiamianquiec cametequid icnuc aid tantiec Nuquin Papan chiaid papueduidquid iquendac.

¹⁴ Nisanquid dëyucaid dadpen yacno nidaidbimboecquid nad iquec. Nuquin Papan chiaid tantiash abi bunaid, abi nënaid, ambi natequid adquid tantiaquin Nuquin Papan chiaid bëtashacbimboec icnuc bëdamboec tabadaid ismesa yampec. Aden bëdamboec tabadaid ismesa yanuc utsin Nuquin Papan chiaid tantiatiapimbo iquendac.

¹⁵ Nidaid bëdabimboecquidien nad iquec. Nuquin Papan chiaid tantiadonec bëdamboec tabadquin utsi ismequidquo nec. Adquid natiamianquid chonoc tantesa uainquiocquin ënenquiocquin ismendac. Aden ismiac Esus tantiaquid utsi dadpen yampec —quepanëdash Esus ambi chuiboed abëd icquido tantiamenuc.

Tabote nënantan nanac chënquiacbimboecquid
(*Mad 4.21-25*)

¹⁶ Aden chuishumbic naden Esusën chuiopanëdash: —Tabote taboshon matsun bëtashesa. Ademibidi tsadte tédion tabote nanesa icbo nec. Ma ëmbi yuedaidon isnueshun nënantan tabote nanquid.

¹⁷ Adomboembidi mimbi ompoquin chuibanaid Nuquin Papan ompoenquiocquin chuibanendac. Adomboembidi mimbi tantiamenquiu yaid aidëmbi chuibanendac.

¹⁸ Ad icnuc ëmbi chiaid bëdamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiacpadeq tabadquid. Adec tabadquin ompoenquiocquin utsi ismequid. Nuquin Papan chiaid tantiauidboed, Bëdamboen tantiambi, qeshun papudedmenquiocquin bëdamboen ismesa nec. Aden ambi tantiauid uesadendac —quepanëdash Esus.

Aton utsibo aton titabëd choaid
(*Mat 12.46-50; Mad 3.31-35*)

¹⁹ Adashic, Esus isec aton utsibobëd aton tita chopanëdash. Cho-choshon matses dadpen nuntan tabadsho isun, Èbi choaid chuita, cac

²⁰ shubun puduedshun: —Titabëd min utsibo choshon umanucshun mibi cainec mibëd onquete bunquin —capanëdash Esus chuiquin.

²¹ Adoquien: —Adquid chuinu. Tantia. Nuquin Papan chiaid tantiashun nabanquido ëbëd icquid nec. Adquid buchi caindambi. Adquid utsi chido chuchu caindambi. Utsibic tita caindambi —quepanëdash Esus.

Acte tècecoasquesho ënëdmiaid
(*Mat 8.23-27; Mad 4.35-41*)

²² Adashic: —Chian cuëma utsiuc nidnu. Nid —quianec abëd icquidobëd cano antsad-toanec nidpanëdash.

²³ Adec nidec cano anuequi Esus ushtopanëdash. Adec ushnubien cunquequid dapa comapenec cunquenubi acte tècecoasquequidën acte uemiac cano mentoadtsempanëdash. Adsho isash dacuëdec

²⁴ Esus ushacno nidshun tinec abëd icquido: —Nuqui mentoadeque. Isucun, Icbo —quec comapenec cuëdpanëdash abëd icquido. Adsho tantiash isucunash nidtoshon: —Mibi comapenec cunqueque. Ènëd —Esusën cac cunquequid badedquio ënëdpanëdash. Ademibidi: —Mibi comapenec tècecoasqueque. Ènëd —Esusën cac badedquio acte tècecoasquequid ënëdoapanëdash.

²⁵ Aden ënëdmetanec: —¿Atotsi quiash ëbi tantienquio yec dacuëdcuedede? —Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tècecoasquequid ënëd cacpadequi ënëdchitosh, quec abëd icquido abibi onquecuededpanëdash.

Mayan icsa dapudedaid dapuduequin bëdamiaid
(*Mat 8.28-34; Mad 5.1-20*)

²⁶ Adshumbic, acte tècecoasquec ënëdan nidaid Cadidia yacno chian cuëma utsiuc Esusbëd icquidon poteoaic nidaidëmpi Cadada caid yacno aido nidpanëdash.

²⁷ Ambo nidequi canon choash dectatosho isash mayan icsa dapudedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash.

²⁸ Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Èbi mëyanenda —quec onquenubien

²⁹ mayan icsa chuiquin: —Dapuedenta —capanëdash Esusën. Mayan icsa dapudedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquio yampanëdash. Adoac mayan icsan matses nibëdacno nidmiaid icpanëdash.

³⁰ Adquid nec, quequin tantiaquin Esusën: —¿Tsutsi cuëmëdquid mibi ne? —capanëdash.

Adoaquien: —Sinc midted dapuduedondaid nebi —quepanëdash mayan icsa dadpuuedaid onquec.

³¹ Aden chiasic: —Mibi bëdamboquid cadoque. Ënenquiocquin mëyanacno cuidnuequin ëbitedi nidmenda —quiashic

³² chanco dadpeshun pec tabadsho isash: —Ëbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dadpuuedaid.

Adoaquien: —Aido dapuduedtan —Esusën cac

³³ dapuduequei chanco mayan icsa dadpen dapuduedash acte quiusudacno chanco comapenec niquec chian pudun-pudunec mentoadbudnec nibëdqueic unësbunepanëdash.

³⁴ Adsho isash chanco pemequin isquido titinquianec shubu dadpen yacno choshon ambi isboed chuituidac

³⁵ anocquido istanu quianec Esus yacno cho-chopanëdash. Adec choshon mayan icsa dapuduequei bëdamiaid dashcute dasiuidash bëdamboen tantiec Esusën taëno tsadsho istuidpanëdash. Adec aid onquesho isash anocquido, Uinsadpambo iquec, quiash dacuëdcededpanëdash.

³⁶ Dacuëdsho isun mayan icsa dapuduequei bëdamiaid isquidon ambi isboed dacuëdquido chuipanëdash.

³⁷ Aden chiac: —Nëuëshquio nidenquio icpec —quepanëdash dacuëdquido Esus chieç. Adoac Esusbëd icquido canon antabëdtopanëdash.

³⁸ Adsho isun: —Mibëd nidtiadquio iquebi —quepanëdash ambi mayan icsa dapuduequei bëdamiaid Esus chieç.

³⁹ Adoaquien: —Padi. Min shubuno nid. Ambo tabadquin Nuquin Papan naid mayan icsa mibi dadpuuedaid dapuduequiaid anocquido chuibanta —quianec Esus canon nidpanëdash. Aid nidnubien mayan icsa dapuduequei bëdamiaid nidanec aton shubu yacno choshon anocquidtedi Esusën naid abi mayan icsa dapuduequei bëdamiaid chuibanoapanëdash.

*Chido intac budaid bëdanaid icnuc champi uincuemiaid
(Mat 9.18-26; Mad 5.21-43)*

⁴⁰ Adashic chian potiasch cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido.

⁴¹ Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash:

⁴² —Con champi abentsëc tishaid unësanëquidquio iccosh. Aton seta 12ted icquid niosh. Ëbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash.

⁴³ Adnubien, chido seta 12ted matamec intac budaid chopanëdash. Aidi dauëchoquid dadpeshun bëdametiapimbo icpanëdash.

⁴⁴ Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquio bëdampanëdash.

⁴⁵ Aden mishac: —¿Tsuntsimbini mishosh? —quepanëdash Esus. Aden chuisho tantiasch abi datsidash capuquido mishambo yec otacquo tabadcuëdcededpanëdash. Adec tabadnubien: —Matses dadpeshun tsucus-tsucustsëcquiocquin mibi cuëscabededec —capanëdash Petedon.

⁴⁶ Adoaquien: —Matses abentsëcshun ëbi mishosh. Ëmbi nadatiambocquin natequid bëuesadtsac —quepanëdash Esus.

⁴⁷ Adec Esus onquesho tantiasch chido, Ambi tantiacpadomboen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquidon tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

⁴⁸ Adoaquien: —Mimbi tantiacpadquieç mibi bëdanaye. Dacuëdenquio yec bëdamboec tabadec nid, champi —capanëdash Esusën.

⁴⁹ Aden Esusën chuinubien Aidon shubun icquid utsibo Esus yacno cho-chopanëdash. Choash: —Min champi unësoshe. Chuibanquin tantiaimequid min shubuno nidnunda —capanëdash abi yacnoësh choquidon Aido chuiquin.

⁵⁰ Aden chuisho tantiasch: —Dacuëdenda. Aden tantiequi nid. Mimbi tantiacpadquieç min champi bëdaneque —quepanëdash Esus Aido caic.

⁵¹ Aden chianec Aidon shubuno nidash cho-choquidotedi, Ëbëd puduedenda, quequin chianec Petedo, Uan, Acobo aided buanec Aido cuëmëdquidën champi yacno Esus puduedpanëdash.

⁵² Ambo puduedshun anocquido unësquio yec shubisho tantiasahun: —Mibi shubieque. Ënëdta. Champi unësenquo yec usheque —capanëdash Esusën.

⁵³ Adsho tantiasahun, Champi unësacsho isombi, quequin Esus tantienquiocquin shubiçquidon mamënshumbedepanëdash.

⁵⁴ Mamënshumbedednubi Esusën Aido cuëmëdquidën champin mëdante mëdinquin: —Nidto, champi —comapenen cac

⁵⁵ aton tiboedte unësabi yec champi badedquio nidtopanëdash. Champi nidtoshu isash: —Peme —quepanëdash Esus.

⁵⁶ Aton champi nidtoshu isash: —Adopshenda iquec —quepanëdash ani amëbëdi. Adoquien: —Mimbi isboed chuibanenda —quepanëdash Esus.

9

Esusën ëbi chuibeneta, quequin ambi nidmiaido
(Mat 10.5-15; 14.1-12; Mad 6.7-29)

¹ Adashic ambi ëbi chuibeneta caido 12tedtsëqui chometanquin Esusën nadopanëdash: —Ëmbi nadatiambocquin nabanacpaden mibitedishun nabanendac. Mayan icsa dapudue-mequinc daicsaido bédamequinc cain mibi capucueniacnoshon mimbi ismebenendac.

² Nëbi mibi nideque. Adec capucuenequin chuibenequimbi bédamebeneta.

³ Nidquin cuate uidën nidte buanenda. Shictoate buanenda. Petequid buanenda. Mitsana bedtequid buanenda. Dashcute utsi buanenda. Buanenquo yec dadauidquio nidtan.

⁴ Adec nidash mibi yuedquidën shubun puduedshun ëmbi chiacpadomboen nabanec anouidi tabadta.

⁵ Mibi nidacno mibi yuedquid nibëdsho isun naden nata. Mimbi tantiaid icsa mibibi cuidadte nec, quequin nidaid putu tasequequin ismeta —capanëdash Esusën abëd icquido chuiquin.

⁶ Aden chiac nidash abëd icquido abi yuedacno puduedash tabadquin Esusën chiacpadomboen Nuquin Papanabëd tabadaid chuibanquimbi daicsaido bédamebenepanëdash.

⁷ Adnubien Esusën nabansho isquidon Edodes chuibanpanëdash. Edodes Cadidia yacnocquido ancaquid icpanëdash. Aden Esusën nabanaid chuisho tantiasahun, ¿Tsudain nepec? Edodesën caquien,

Acten mentoanondaid, Uan cuëmëdquid uincuempash icnui, quenubien;

⁸ Edias Nuquin Papan ambi chiaid chuimiampid padpidec choapash icnui, utsi-utsiec quenubien, Nuquin Papan chuimiampid utsi uincuenoapash icnui, utsi-utsiec quecuedepanëdash, quequin chuipanëdash Esusën nabansho isun chuiquidon Edodes tantiamequin.

⁹ Adoquien: —Mambi uincuentiapimbocon Uan mapi budtemiondac. ¿Tsudain ëmbi tantiacmaidquio adobanquid icpec? —quiashic Esus iste bumpanëdash Edodes.

Mates dadpen pemiaid
(Mat 14.13-21; Mad 6.30-44; Uan 6.1-14)

¹⁰ Adashic ambi nidmeboedo Esus yacno padpidec choapanëdash. Choashumbic ambi nabamboedtedi chuibanpanëdash. Aden chuibanansho tantiasahun Esus abëd icquido bëyucanec shubu dadpen icquid Betsaida caid anoentsëqui nidpanëdash.

¹¹ Aido nidsho isun cho-choquidon tsibanampanëdash. Adsho isun Esusën Nuquin Papa yacno tabadaid chuibanquimbi daicsaido bédamepanëdash.

¹² Adashic ushë budtsan Esusbëd icquidombo Esusën dayunquo choshon: —Nëmbo shubu nibëdeque. Shubu utsi-utsiec yacno nidshun pete bedshun pec tabadta, quequin cho-choquido chuita —capanëdash Esus chuiquin.

¹³ Adoquien: —Padi. Mimbibi aido pemeban —capanëdash Esusën.

Aden chiaquien: —¿Ma nëmbobi panëmpi mëdante auc abentsëcted icnubi nuëcquid daëd iquec. Aidtedtsëqui icsa isunda cho-choquidtedi pemenequien ëbitedi bedtan, cai? —quecuedepanëdash abëd icquido.

¹⁴ Ambobi tabadsho chido bacuëbobëdtabi tambanenquo icquimbi dadauidquio, 5000ted icnuc tambampanëdash.

Adoquien: —Nëidtedi uano 50ted-50tedquien tabadme —Esusën cac

¹⁵ ambi chiacpadomboen tabadmepanëdash.

¹⁶ Aden tabadmesho isun panëmpi 5tedbëdta nuëcquid daëd sananquin abuc isec: —Mibi bédambocquid icquin mimbi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

¹⁷ Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

Chuiquid dapa abentsëcquiobi iquec, quiaid
(*Mat 16.13-19; Mad 8.27-29*)

¹⁸ Adashic, matses nibëdacno abëd icquido icnubi Nuquin Papa chiec Esus onquepanëdash. Adec onqeshumbic: —¿Tsutsi ëbi tsibanquidon ëbi capec? —capanëdash Esusën.

¹⁹ Adoaquien: —Acten mentoanondaid, Uan padoen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoaposh —quepanëdash abëd icquido.

²⁰ Adoaquien: —¿Ma, mimbi, tsutsi ëbi cape? —capanëdash Esusën.
Adoaquien Petedo: —Chuiquid dapa abentsëcquiobi, Nuquin Papan chomiaidquio yec Quidistu caid ma mibi neyoc —quepanëdash.

Abi unëste chiaid
(*Mat 16.20-28; Mad 8.30-9.1*)

²¹ Adoaquien: —Mimbi ëbi tantiaid nëbi utsi chienda —quepanëdash Esus comapenen chiec.

²² Aden comapenen chiashic Esus: —Ëbi matsesaid icsho natiambocquin mëyantequid iquendabi. Ëbi chieshënquido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiaquido yec quec aidtedi ëbi chieshënquido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquio nec, quequin ëbi cuesunemependac aidombi. Adoaquini daëdec ushacsho uincuen uaindac —quepanëdash Esus abi uincuen uate chiec.

²³ Aden chiashic: —Ëbi tantiaquid icnuequin ambibi tantiacpadomboen nainquiocquin ëmbi chiapadomboen nabantiadquidi nec. Ëbi mëyanacpaden mëyanuc unësmene quenquiocquin tantesa uainquiocquid. Ëbi tantiaquidquio iquendac adquid. Nidaidën tabadaiduidi tantiaquid iquec Nuquin Papa yacno nidenuquid iquendac.

²⁴ Cuesunenu cac unësmene quiash Esus tantiaquid nebi queboedi Esus tantiesha nebi quequid unësash Nuquin Papa yacno tabadenquio iquendac. Utsibo, Esus tantiaquid nebi, quiashic abi cuesunenuquid icnuc adecbidi Esus tantiaquid nebi, queoapec. Adquid unësash Nuquin Papa yacno tabadendac.

²⁵ ¿Atotsieshun Nuquin Papa yacno tabadaid tantienquio yec nidaidën bëdamboec tabadnuequin bedted-bedtede? Mimbi bedaidënuquio Nuquin Papa yacno puduedtiapimbo mibi iquec.

²⁶ Esusbëdtabi ambi chiaid tantiaquid nebi nidaidënuësh quetiapimbocquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi.

²⁷ Nad iquendac. Tantiacquota. Chuinu. Ëbi tantiaquid dadpen yansho ënabicquid utsinutsinquien isendac —quepanëdash Esus.

Esus bed-bedquesho istiapimbo yaid
(*Mat 17.1-8; Mad 9.2-8*)

²⁸ Aden chiashic Esus mëdante utsiuc tauadoec ushash Nuquin Papa chiec onquenuec macuësh yacno nidoapanëdash. Petedo, Uan, Acobo aidted buanec macuësh yacno Esus nidpanëdash.

²⁹ Adec macuësh yacno nidash Nuquin Papa chiec Esus onquenubi aton bësbed aton dashcutehëdi nac-nacquid ushë chënenquiacbimboec icpanëdash.

³⁰ Adsho isubien badedquio dada utsi daëd choash adquiobidi Esusbëd nidec. Nëdic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid.

³¹ Aid daëdi Esusbëd tabadquin Nuquin Papan tantiampicpadec Edusaden yacnoshon Esus unës uate ushë chiec onquecuedpanëdash.

³² Adnubien Esusbëd chochoedo abëd icquido 3ted ushacsmash tabadtuidquin Esusbëd utsi daëd nac-nacquiocquid dasiuidachimboec bed-bedquesho isbededpanëdash.

³³ Esusbëd daëd niduidsho isash Petedo nadpanëdash: —Nëmbobi iquec bëdambo iquebique. Nëmbobi mibi tabadmenun abentsëc chotsëcnuc shubumpi uanuna, Icho. Abentsëc mitsana, utsibic Moisesën na, utsibic Ediasën na, quequin shubu uanuna —quepanëdash Petedo.

³⁴ Adec Petedo onquenubien abu ushun isadenquiocnoc abitedi bëtimpanëdash. Adsho isash Esusbëd chochoedo dacuëdpanëdash.

³⁵ Adnubien abu ushunuësh onquec: —Nèidic èbèd icte bunquidquo, con madombo, èmbi bédamboen isaidquo neque. Aidèn chiaidquo tantiata —quepanèdash Nuquin Papa Esusbèd icquido tededshun isenquiocnobi.

³⁶ Adec onquiash ènèdambi Esusuidtsèqui nidsho abèd icquidon ispanèdash. Adoshombic Esusbèd icquidon ambi isboed utsibo chienquiocpanèdash.

Mayan icsa dapuduedaid madompi

(Mat 17.14-21; Mad 9.14-29)

³⁷ Adashic badiadash macuësh dapa yacnoësh Esus budsho isash bèquedec matses dadpen cho-chopanèdash.

³⁸⁻³⁹ Cho-choash abentsèc nadpanèdash: —Con mado abentsèc icquid mayan icsa dapuduedash icsambo iccoshe. Isec chota. Aidèn bedto-bedtoac badedquo sidquianesho aidèmbidi bedshun bècunedeniac con mado ècbacushaniosh. Dapuduenenquo icquin con mado aidèn uimambo icmedeniosh.

⁴⁰ Adsho isash choshon mibèd icquido chuiquin, Dapuduemeta, cauidombi. Adoac mayan icsa dapuduemenuquin aidon tanac dapuduenenquo iccosh —quepanèdash dada abentsèc Esus caic.

⁴¹ Adoquien ambi nianaïdo caic Esus nadpanèdash: —Nadatiambocquid Nuquin Papa nec, quequin tantiesamibitèdi neque. ¿Tedectsi icshun èmbi chiacpaden mimbi tantiabempe? ¿Mimbi tantienquiosho isash tedectsiashini chieshtope? —quetanquin: —Min mado bec cho —Esusèn cac aton mado aton papan bèpanèdash.

⁴² Aden bènubi mayan icsan bècuniac madompi uèdèquiampanèdash.

Adsho isun: —Padi. Chèn —capanèdash mayan icsa chuiquin. Aden madompi bèdametanquin aton papa Esusèn meneoapanèdash.

⁴³ Adsho isash: —Nuquin Papan nadatiambocquin naid uinsadpambo iquec —quecuededpanèdash isquido.

Abi unèste chuioid

(Mat 17.22-23; Mad 9.30-32)

⁴⁴ Adoquien: —Chuinu. Bèpiscudenquiocquin tantiaquiota. Matsesacsho nèbi bedmendabi —quepanèdash Esus abi unès uate chiec.

⁴⁵ Aden chuïsho abèd icquidon tantienquiocpanèdash. Aden tantienquo yec, Mimbi chiaid tantienquo iquembi, quetiapimbo yec otacquo tabadcuèdedpanèdash abèd icquido.

¿Tsutsi chuiquid dapa icpec? quequin chiaid

(Mat 18.1-5; Mad 9.33-37)

⁴⁶ Adashic: —¿Nuquin Papa yacno nidash chuiquid dapa mitsiquid icpec? —quec Esusbèd icquido onquecuededpanèdash. ¿Èbida chuiquid dapa icpe? quec ambibi tantiequi adpanèdash.

⁴⁷ Adoquien Esus tantiaquidquo icquin bacuèmpi chomeshun aton dayunquo tabècash:

⁴⁸ —Chuiquid dapa icnu, qesa icta. Èbi tantiaquid icquin nèid bacuèmpi bédamboen nashunquid iquec èbi nashunoaquid iquendac. Nuquin Papan chiacpadomboen nabanquid Esus nec, quequin tantiaquidquo iquec èbi chomiondaïd, Nuquin Papa tantiaquidquo icoaindac. Nidaïdènuësh utsi nashunquidquo icboedi aidquiobi Nuquin Papan chuiquid dapa icta caindac —quepanèdash Esus abèd icquido caic.

Abimbo tantiaquid èbèd icquid nec quiaïd

(Mad 9.38-40)

⁴⁹ Adashic, Uan Esusbèd icquid abentsèc nadpanèdash: —Mayan icsa dapuduemebanquid ispombi. Aidi mayan icsa dapuduemenuc nadposh: “Esus, nadatiambocquin naquidquo mibi cadoque. Mayan icsa dapuduemeta,” cac mayan icsa dapuduemposh. Aidi èbèd icquidpenquo icsho isun: “Padicnuna,” cauidpombi. ¿Adambi bédamboen chuipo? —quepanèdash Uan Esus caic.

⁵⁰ Adoquien: —Adquid, Padicnuna, cainda. Nadatiambocquin naquidquo Esus nec quequin abimbo tantiaquin èmbi nacpadomboen nabanquid icnuc mibipadquid èbèd icquid neque —quepanèdash Esus Uan caic.

Esus bunesebo, Samadia yacnocquido

⁵¹ Adashic Esus abi abuc indote ushè chote anoentsèqui yanan, Unèsmanc quenquo yec nidebi, quequin ambibi tantianec Edusaden yacmi Esus nidoapanèdash.

⁵² Adec nidnun ambi bèyucmiaïdo Esusèn abia nidmiac nidaïd Samadia caïd yacno shubu daèdpactsèc yacno Esusbèd icquido chopanèdash. Chosh: —Edusaden yacno Esus nideque. ¿Aïdbèd icquido ada mimbi yuedpatsia? —caquien

⁵³ Esus isadaidbo nec, quequin yuedenquiocpanëdash Samadia yacnocquidon.

⁵⁴ Adoaquien, Acobobëd Uan nadpanëdash: —¿Ënabicquido unësmenuen mimbi nëdëncatequid chome, Papa, quequindambi Nuquin Papa chuipe, Icho? —quepanëdash.

⁵⁵ Adoaquien: —Padicnuna. ¿Matses unësmenuetabi chodio? —quianec

⁵⁶ shubu daëdpactsëc yacno nidoapanëdash abëd icquidobëd.

Esus tsibante bunquidën natequid

(Mat 8.19-22)

⁵⁷ Adec podquedën Esus nidsho abi databëdquid abentsëcshun nadopanëdash: —Mimbi chuibeniacnombobi mibi tsibananec nidendabi —quepanëdash Esus databëdquid abentsëc.

⁵⁸ Adoaquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

⁵⁹ Adoshombic: —Ëbi tsibanta —Esusën caquien utsi:

—Con pa unëscasho chococashun mibi tsibanec nidendabi, Icho —quepanëdash.

⁶⁰ Adoaquien: —Nuquin Papa yacno tabadnu quequin unësaid chococaquidëmbi ma chococapanuna. Mimbi Nuquin Papa yacno tabadnuequin abi yacno tabadaid tantiaquin mimbi chuibeneta —capanëdash Esusën.

⁶¹ Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icho —caquien:

⁶² —Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

10

Abi bëyucanec nidquid 72ted icquido

(Mat 11.20-27; 13.16-17)

¹ Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash.

² Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpactsëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui.

³ Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac.

⁴ Ëbi chuibenec nidanequin mitsana buanenda. Mitsana bedtequidbëdta shictoachte buanenda. Tapucudte tapucudenguio yec nidanetan. Adec nidanequin utsi bëquedash tabadenquiocquin datambidanec shubun puduedec nidta.

⁵ Shubun puduedshun naden shubu icho chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna.

⁶ Aden chiac shubu icho bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icho ëbi chieshënquid ictsiash. Adquid yec mimbi chiaid tantianu quesa aid shubu icho icpec. Adquid icsho Nuquin Papan abi bëdamboec tabadte aid shubun icquido menenguio iquendac.

⁷ Mibi yuedacnouidtsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

⁸ “Shubu dadpen yacno mibi choacsho yuedshun pete meniac isuidec, Utsitsen bec cho, quenda.

⁹ Ambobi tabadquin daicsaid bëdameshshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita.

¹⁰ Shubu dadpen yacno choshon mibi yuedquid nibëdsho isun aton podquedën nidquin naden chuita:

¹¹ Nuquin Papan chomiaid mibi chuinuec chobi. Ëbi daëdi yuedenquiocsho mibi chuitiapimbo iquebi. Adoac abi yacno ambi chomiaidën mibitedi yuedtiapimbo iquendac. Nuquin Papan chomiaid tantiate bunesa mibi icsho isash mibi yacno capuec ëbi tabitacquiaid tabesquenu. Is, quequin ismequin adota —capanëdash Esusën ambi nidmetequid 72ted icquido chuiquin.

¹² Aden chiashic aido chiec abi Esus onquec: —Naid icsabëdtabi naid bëda chuibante ushë chonoc mibi yuedesa Nuquin Papan comapenen cuidendac. Ëbi choabicnuc Sodoma yacnocquido icpampic. Ëbi choabicnuc aidon ëbi tantiatiapimbo icpampic. Adquido Nuquin Papan bëdiactsëc cuidendac —quepanëdash Esus.

¹³ Aden ambi nidmetequad 72ted icquido chuibanshumbic utsibo isachimboen Esusën nadopanëdash: —Nëbi icquido, shubu dadpen icquid tantiec unësquioquin mibi chiem-bique. Tantiata. Shubu dadpen icquid Codasin caid yacnoshon ëmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquo mimi iccuededpec. Adembidi nadatiambocquin nabansho isted-istedboedi Betsaida yacnoquido mibi nec. Aden ëmbi nasho isash ëbi tantiesa mibi icoapec. Ënden yampido isadaidpembon ëmbi nadatiambocquin nabansho isun, Icsaquid nebi, queshun unësquiocnoc shubiquin abi icsaid ëntsempampic.

¹⁴ Aden Tido yacnoquidobëdtan Sidon yacnoquidon tantiahsun abi icsaid ëntsempampic. Adquido Nuquin Papan bëdiactsëc cuidendac. Isadaidbo Codasin yacnoquidobëd Betsaida yacnoquido ëbi isquido mibitedi nec. Ëbi tantiesa icsho Nuquin Papan mibi comapenen cuidendac.

¹⁵ Adecbidi, nëbi icquido, Capednaun yacnoquido mibi unësash ¿Nuquin Papa yacnoda mibi nidpe? Padenquo. Ëmbi nadatiambocquin nabansho isun tantiesa yec chian anëdënuaciaco mibi nidendac —quepanëdash Esus abi tantiesa chiacbimboec onquec.

¹⁶ Aden chiashic, ambi nidmenu caido 72ted icquido tantiamenuen chuibudec: —Mibitedishun ëbi chiac ëbi tantiaquido utsibo iquendac. Adquiobidi mimi ëbi chiac ëbi tantiesa icoaindac. Adomboembidi ëbi chuibansho tantienquo yash ëbi chomiondaid tantiesambo nendac —quepanëdash Esus. Aden chiac ambi nidmenu caido nidaneapanëdash.

¹⁷ Adec nidanequin Esusën chiacpaden nabeniashic, Bëdambo iquebi, quecuededec Esus yacno cho-choapanëdash. Adec cho-choash: —Mimi chiacpaden nabanombi. Aden nabanquimbic, Esusën nadatiambocquin naidënuquo dapudenta ëmbi caidtedi mayan icsa dapuduemposh, Icbo —quecuededpanëdash ambi nidmiaido 72ted icquido ambi naboad Esus chuibanec.

¹⁸ Adoaguen: —Ëmbi nadatiambocquin nabanquin tantiamiac mibitedishun mayan icsa dadpen dapudemebedednubi abi dëniacacimboecnuc bedquetanacimboec Satanas abucuesh badedquo paëdsho isec niobi.

¹⁹ Ëmbi nadatiambocquin nabanacpadquid mibitedi icmebanombi. Aden mibitedi adquid icmiacsho mibi chieshënuquidon mibi icsa uatiapimbo iquendac. Mibi chieshënuquin icsa uanuequido nisimbocquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adomboembidi catashac chichunën mibi setiapimbo icoaic. Adquidbimboec mibi chieshënuquid icsho ëmbi chiacpadomboen nabanac mibi icsa uatiapimbo iquendac.

²⁰ Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chomenuquin ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta —capanëdash Esusën ambi nidmiaido chuiquin.

²¹ Aden chuibanshumbic ambi nidmiaidon chiaid tantiahs, Bëdambo iquebi, quequin Nuquin Papa Esusën nadopanëdash: —Abu icbo nidaid icbobidi mibi nec, Papa. Adquid icquin ëmbi nidmiaido mimi tantiamiacpadomboen nadatiambocquin aidon nabededosh. Aden nabededshun chuisho tantiahs bëdambo iquebi. Dadpen tantiaquido mimi nadatiambocquin naid tantiamenquocquimbi, ëmbi namiaido, daëdpactsëc tantiaquidobien mimi tantiamioc, Papa. Mimi tantiacpaden tantiamiac ëmbi nidmiaidon nabededosh, Papa —quepanëdash Esus Nuquin Papa chiec.

²² Aden Nuquin Papa chiec onquequin nainec: —Con pa abia yampid icquin abitedi tantiaquidquo nec. Aidën abipadquid icmiaid nebi. Aid abentsëcquobi ëbi bëdamboen tantiaquidquo con pa nec. Adecbidi abëd abia yampid icquin con pa bëdamboen tantiaquidquo nebi. Adquid icquin, Con pa nad iquec, quequin ëbi tantiaquido tantiamendambi —quepanëdash Esus abi tantiec choash iccuededquido caic.

²³ Aden iccuededquido chuibanshumbic naden ambi 72ted icquido nidmian choboe-douidsëqui Esusën chuioapanëdash: —Ëbi tantiaquido icquin ëmbi tantiamiacpaden mimi nabansho isun Nuquin Papan bëdambo iquebi camiaido mibitedi nec.

²⁴ Nuquin Papan chiaid chiampidobëd ancanquid icampido mimi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon ëbi istiapimbo icoapampic —quepanëdash Esus.

Utsi tantiaquin bëdamboen naquidquo

²⁵ Adashic, ¿Tantiaquidquioda Esus neque? Tantiabono, abibi quequin dada utsin: —¿Nuquin Papa yacno tabadnuen atotsimbi napeba? chuibanquin tantiamequidën ëbi chui —capanëdash.

²⁶ Adoaquien: —Ambi Nuquin Papan naden nata quequin chiaid Moises dada uami-ampid ¿mitsipaden chuipec? ¿Aid isquin atotsi mimbi tantiape? —quepanëdash Esus abi chuimequid caic.

²⁷ Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacadpenquio yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bëdambo icmequin naban. Èbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

²⁸ Adoaquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

²⁹ Aden Esusën chiac èbi otacquio icsho isash Nuquin Papan chiacpadpenquiocquid nepec, quequin iccuededquid utsibon èbi chuitsiash quequin tantiaquin Esusën chuimeboed: —¿Mitsicquid con utsi nepec? —quepanëdash.

³⁰ Adoaquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chichshun icsa uabudtsëcquien cuestanquin niamposh.

³¹ Adoambi, cuestanquin nianaid uiacno podquedën choquin isadaidbo tsusion, Con matses nenushe. Isnu, quenquiocquiu uano datamposh.

³² Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquiu adembidi uano datanoaposh.

³³ Utsibic, Samadia yacnoësh choquid aid podquedëmbi choquin cuestanquin nianaid istuidash unësquiocquiu

³⁴ aton dayun tsadbudshun cuestanquin nia-naidën chiuëtedi aton dauëmbi bënoshcashun bëtaneshumposh. Aden bëtaneshunshun cuestanquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh.

³⁵ Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Èmbi bëboed ampequidon cuestanquin nianaid bëdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanëdash Esus.

³⁶ Aden chuishumbic: —Èmbi chuiboed utsi-utsiec icposh. ¿Mitsicquid ampequidon cuestanquin nianaidën utsibimboecquid icposh? —capanëdash Esusën.

³⁷ Adoaquien: —Ampequidon cuestanquin nianaid istuidash unësquio yanquin abi nashumboedien con utsi nec, capendac —quepanëdash Esus chuimequid.

Adoaquien: —Adembidi mimbembi èmbi chuiboedbimboecnuc utsibo tantiaquin nashunoata —quepanëdash Esus.

Madtan nabanubi Madian tantiaid

³⁸ Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash.

³⁹ Adoac ambo puduedash tsadquin Esusën chuibansho Madian Madtan chibinquo datsadbudshun tantiaapanëdash.

⁴⁰ Adec tsadquin Madian tantianubi Madtan ambi natiadquio yaidtedi tantiaquin nabampanëdash. Aden nabanequi Esus yacno choshon: —¿Con chibin ebëdtambi nainquiocsho isenquioda mimbi ique? Min utsibëdtan nabanta, cata, Icbo —capanëdash Madtan Esus chuiquin.

⁴¹ Adoaquien: —Mimbi natiadquio yaid dadpen tantiaquidquio mibi iqueque.

⁴² Èbi tantiaquidquio icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi —quepanëdash Esus Madta caic.

11

Nuquin Papa chiec onquianete (Mat 6.9-15; 7.7-11)

¹ Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: —Nuquin Papa chiec onquianeta quequin Uan padon abëd icquido tantiamapanëdash. Adembidi Nuquin Papa chiec onqueta quequin èbitedi tantiamequin chuioa, Icbo —capanëdash.

² Adoaquien: —Nuquin Papabëd onquequin naden chuïta:

“Bëdambocquidquo mibi nec, Papa.

Adquid mibi icsho matsestedishun mibi con icbo capashun, Papa.

Mibi yacnoshon mimbi uaido mayan bëdabon mimbi chiacpadomboenuidi naic.

Adomboembidi matses abitedishunquo napashun, Papa.

³Tantiaquidquo, mibi cadoque. Bumianenquiocquin badiadquidën-badiadquidënquien con pete ëbi bedmedene, Papa.

⁴Adecbidi utsin ëbi chieshënsho cuidenquo yec ëbi abi icsaid bëpiscudacpadquiequi ëbi icsasho cuidenquo yec bëpiscudoata, Papa.

Adembidi, Satanasën icsa uanushe queshun ëbi cudasquin dayun uata, Papa, quequin chuita”

—quepanëdash Esus.

⁵ Adtanequic Esus nadpanëdash: —Mibëd nashunanquid iquec. ¿Adquid icnuda inchëshpotsembo abi yacno nidshun pete mimbi bedshumpatsia?

⁶ Inchëshpotsembo pete bedshunuec mibëd nashunanquid yacno nidash: “Ëbi yacno utsi chosho pete nibëdnubi yuedombi. Con pete nibëdsho isash pemenu bedec chobi. Mimbi meniaid cuidquin adquidi mibi meneoaimbi,” quepatsiac mibi mibëd nashunanquid caic.

⁷ “Adoquien, nuntanuëshi: ‘Padi. Shëcnandombi. Con bacuë ishacunë din ictoshon mibi menetiapimbo iquebi,’ quequin mibëd nashunanquidën mibi chuitsiash.

⁸ “Aden aidën chiaqui min pete nibëdnuc chuidonetsiac mimbi. Aden chuidoniac mibi menetsiash. ¿Abëd nashunanquid icshoda mibi menepadic? Padenquo. Mimbi nidenquiocquin chuidonesho tantiashun mimbi chuiboedtedi mibi menepatsiash — quepanëdash Esus.

⁹⁻¹⁰ Aden chiech abi onquec: —Adomboembidi Nuquin Papa chuidonesho mimbi bedtiadquo yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.

¹¹ “Adembidi chuinu. Tantia. ¿Min mado, Nuëcquid bec cho, queshoda mimbi nisimbo menedi?

¹² Adembidi, ¿Cachinan bacuë bec cho, queshoda mimbi chichun menedi?

¹³ Padenquo. ¿Aden icsaquid icquin min bacuë tantiaquin bëdamboen menequid mibi icnuc Nuquin Papa icsaisa icquin mibi, Min Mayan ëbi mene, quesho tantiashun menenquioda mibi ictic? —quepanëdash Esus.

Bedtsibun namiaid Esus nec, quequin chiaid
(Mat 12.22-30; Mad 3.19-27)

¹⁴ Adashic, mayan icsa dapuduedquin eme uaid icsho Esusën istanquin: —Dapuduen — cac mayan icsa dapuduemanëdash. Adec dapuduenan ambi eme uaid onquepanëdash. Adsho isash tantiampambo yec iccuededquid dadpen tabadcuëdedpanëdash.

¹⁵ Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnu —quepanëdash Esus chieshënquido.

¹⁶ Adnubien iccuededquid utsibo: —Nuquin Papan chomiaidquo icquin Nuquin Papa mimbi chiac aidëmbi abuchshun naquin ëbi isambo yaid nadatiambocquin ismepatsiashi. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuededquid utsibo Esus caic.

¹⁷ Aden chuisho tantiash tantiaquidquo yec abi icsamboen chuimenuquido chiech Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac.

¹⁸ Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquinda abëd icquido dapuduemequid ëbi icmepadic? Adembidi, ¿ambi mayan icsa dapuduemiac abëd icquido nibëdenquioda ictic?

¹⁹ Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido quesho tantiash, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiech, quenquo mibi icpe?

²⁰ ¿Nuquin Papan tantiamiac mayan icsa dapuduemequid ëbi yec ambi chomiaidquo matses chuiquid dapa mibi yacno ënden choabida ictio? —quepanëdash Esus abi chuimequido chiech.

²¹ Aden chiashic abi onqec: —Mibitedi tantiamenuen utsi chuinu. Bëdamboen tanti-ata. Chuiquid dapa icquin abëd icquido cuëshëdnu quenquiocquin bëdamboen chuiquid namepec.

²² Aden namiac tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

²³ Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu quesa cuëshëdmianquid nec —quepanëdash Esus.

Abibi dapuduemoed mayan icsa dapuedoaid
(Mat 12.43-45)

²⁴ Aden chiashic abi onqec: —Abi dapuedaid mayan icsa abibi dapuduenanec abipadquid tabadacno icsano matses nibëdacno nidash capuquin abi dapuedebocpadquid istuidenquo icposh. Adquid istuidambo yec, Abibidi dapuedoanu, quianec anobidi nidoaposh.

²⁵ Adec nidshun abi dapuduemoed naden istuidposh. Mayan icsa nidan, Ëbibi bëdambo iquec. Adash bëdambo tabadnu, abibi quiashic, Nuquin Papa tantianu, quenquiocposh. Aden chienquicsho aton Mayan Nuquin Papan aid menetiapimbo icnuc abi dapuduemoed choshon aid abentsëcquo

²⁶ istuidashic nidoashun abipadquid chuituidac utsi 7ted abëdi choash abitedi dapueduededac dada icsamboshë yamposh —quepanëdash Esus.

²⁷ Aden Esusën chiambien iccuededquid chido: —Mibi tishacsho shuma chishmiondaid Nuquin Papan bëdamboen isaid icpec —quepanëdash Esus caic.

²⁸ Adoquien: —Aden nasho padenquo. Nuquin Papan chiaid tantiashun nabansho Nuquin Papan bëdamboen isaidquid nec —quepanëdash Esus chido caic.

Onasën ismiampicpaden ismiad
(Mat 12.38-42; Mad 8.12)

²⁹ Adnubien abi yacno cho-choash utsi dadpen iccuededsho isun Esusën nadopanëdash: —Nëbi nidaidën tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquo iquendac. Nuquin Papan Onas ismiampicpaden ismiad mimbi isendac.

³⁰ Ninibe yacno nidshun ambocquido icsaid cuidte Nuquin Papan chuimiapaden Onasën comapenen chuisho tantiash, Abimbo chuiquid nec, qeshun abi icsaid Ninibe yacnocquidon ëmbededpampic.

³¹ Utsibic, Nuquin Papan dadpen tantiamiaid, Sadomon iquec qesho tantiash chuiquid dapa chido Sadomonën chiaid tantianuec ënapenuësh choshon tantiash, Abimbo iquec, quepampic. Nuquin Papan matsesën naid icsa ambi naid bëdabëdta chuibante ushë chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquicsho Nuquin Papan mibi isendac. Nuquin Papan bëdamboen tantiaquin chuiquid dapa Sadomon icmepampic. Abitedi tantiampidquid nëmbobi iqueque. Ëmbi chiaid tantiata.

³² Adembidi, matses icsaidbëdta ambi bëdamboen naid Nuquin Papan chuibante ushë chonoc Ninibe yacnocquidon Onasën chiaid tantiacpadomboen Nuquin Papan chiaid abimbo iquec, quequin tantienquo icsho Nuquin Papan mibitedi isendac. Nuquin Papan chuimiapaden Onasën chuisho Ninibe yacnocquidon tantiabedepampic. Onas Nuquin Papan matses icsaid cuidte chuimiadquid icpampic. Padnuen mibi icsaid bedshunash abided cuidadtequid nëmbobi iqueque. Ëmbi chiaid tantiata —quepanëdash Esus abibi chiadequi.

Tabote taboshon bëtashenquo yacimboec abi bëdamboec tabadaid ismequid
(Mat 5.15; 6.22-23)

³³ Aden chuishumbic Esusën abi chuibanec: —Tabote taboshon ompoesa. Adembidi matsun bëtashesambo icho nec. Ma ëmbi yuedaidon isnueshun tabote nënantan nanquid.

³⁴ Adoaidimboec min tantiate iquec. Min tantiate bëdamboequid icquin bëdamboec tabadquin ismequid mibi nendac. Bëtashacimboec min tantiate icnuc icsamboen ismequid mibi nendac.

³⁵ Con icho ëbi bednuec choec qeshun bëpiscudenquiocquin isted-istedta.

³⁶ Min tantiate icsaisa icsho Nuquin Papan chiaicpadomboen tantiaquidquid aidi nec, quequin utsibon mibi isendac —quepanëdash Esus.

Nuquin Papan icsamboen isaidquid
(Mat 23.1-26; Mad 12.28-40; Duc 20.45-47)

³⁷ Aden Esusën chuibanshobien padiseyobo abentsëcshun: —¿Ada ëbi yacno pec nidtsia? —capanëdash. Adoac aidbëdi nidash pete sanaid cuate dayunquo Esus tsadbudpanëdash.

³⁸ Adec Esus tsadsho isash, ¿Adpecshenda iquec. Penush mëpamëdenquo Esus icpec? quec abibi onquequin padiseyobon Esus yuedquidëmbi tantiapanëdash.

³⁹ Adoaquien, tantiaquidquo iquec Esus nadpanëdash: —Ëndenquimbo padiseyobon peshun acnun dëshote cachochëdtabi pada-padaid cachoc bëdamboen dapanta quequin chuinëdacpaden mimbi naoaic. Aden dapanshun mimbi codocaidbëdtabi mimbi actequid nitsinaid anauc ampanequo mimbi icpec. Mibitedi adquo iquec. Nesquin bëchish uquec dapanudquin mimbi tantiaid icsa ënenquo mimbi icpec. Adecbidi, mibi bunaid bednuen icsamboen naquin ampequid mibi nec.

⁴⁰ Nuquin Papan chiaid tantiesabimboecquid mibitedi nec. Nuquin Papan matses uaquin dadabëdtabi tantiate uainquoda icpampic.

⁴¹ Ai. Adquid icnuc aton na nibëdquid tantiaquin mimbi pada-padaidën nitsinaidpadquid menebanta. Aden mimbi nadenesho isun Nuquin Papan min tantiatebëdta min dada bëdamboen isendac —quepanëdash Esus.

⁴² Aden chiashic padiseyobo caic Esus nadpanëdash: —Uno bedanquin dies yacno ënquin min tiedën caniquid ëshë tambanshun, Nuquin Papan chiacpaden con na 9ted icnubi abentsëc Nuquin Papan na nec, quequin aid abentsëc menenuequin mimbi dayun uaic penquiocquin. Aden nabanquin Nuquin Papan ambi matses bëdamboen tantiaquin nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiacpaden abentsëc menebanshun utsibo bëdamboen tantiaquin nabanti-adquidi mibi neyoc. Adesa icsho Nuquin Papan icsamboen isaidquo mibi nec, padiseyobo.

⁴³ Adembidi, tsusio dapabimboecsho bëdamboen isplashuni, quequin tantiec Nuquin Papan chiaid tantiate shubun puduedash tsusiobo tsadacno mibi tsadtenec. Adomboembidi tantiec matses iccuededacno nidequi, Èbi bëquedquidon ëbi tsusio dapabimboecsho isash onquequin chuiplashuni quec mibi capuec. Aden tantiaquid Nuquin Papan icsamboen isaidquo mibi nec.

⁴⁴ Adembidi, matses unësaid chococate manenushe qeshun ismequin mabiunu, quenquo yacpadomboen ëbi icsaid tantianushe quequin ompoquid mibi nec —quepanëdash Esus padiseyobo chiec.

⁴⁵ Adoaquien, Nuquin Papan naden nata quequin chiaid tantiambi, quiaish utsibo tantiamequid abentsëc: —Padiseyobo chuiquin ëbipadquido mimbi chuiopaec —quepanëdash.

⁴⁶ Adoaquien: —Nuquin Papan ëndenquimbo naden nata quequin chiaidbëdta mimbi naden nata quequin chiaid dadpen chuibanquin matses mimbi namec. Adoac aitted matsesën natiapimbo icpec. Adsho isash, Mimbi natequid dadpen iqueque. Mibi nashunu, quesa icsho Nuquin Papan icsamboen isaid mibi nec.

⁴⁷ “Adembidi, Nuquin Papan chuimiaid dadpen min tsusedpabon cuesunepampic. Tsusedpabon cuesuniampido ënenquiocquin tantianu quiacimboen mimbi shubumpi uabanec. Èmbi shubumpi uaido isun utsibon bëdamboen isplashuni, quequin aden mimbi nabanec.

⁴⁸ Aden naquin tantiec, Nuquin Papan chuimiaido cuesunequin bëdamboen tsusedpabon napampic, quiacimboen tantiaquid mibi icnuc ambi chuimiampido cuesuniampidobimboecsho Nuquin Papan mibi isec. Nuquin Papan icsamboen isaidquo mibi nec.

⁴⁹ Èmbi chiacpaden chuibanta, cabicquin naden Nuquin Papan chuipampic. Èmbi chuimiaid utsi-utsien aton matsesën mëyampec. Utsi-utsien mëyanshun cuesunepec, quec Nuquin Papan abitedi tantiaquidquo adpampic.

⁵⁰ Aden min tsusedpabo Nuquin Papan chuimiaidon chuisho tantiesa icquin aido mëyampampic. Min tsusedpabopadquid nëbi icquido icquin Nuquin Papan chuimiaid tantiesambo mibi nec. Adquido iquec ënden mëyanampidpadquido mibi neoaic. Aido cuesuniampidpadquido mibi neoaic.

⁵¹ Tsusedpan abia abed cuesunepampid icnubi ambi tsyuec Sacadias cuesunepampic. Aid Nuquin Papa tabadte shubu uashunaid dayunquobi aidon cuesunepampic. Ai, Nuquin Papan chiaid tantiesatedi ambi chuimiaido cuesuniampidpadquido nëbi icquid neoaic.

⁵² “Nuquin Papan naden nata quequin chiaid tantiambi, qeshun utsibo tantiamenquiocsho Nuquin Papan icsamboen isaïdo mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic —quepanëdash Esus Nuquin Papan naden nata quequin chiaiduidi tantiaquido chiec.

⁵³ Aden chiashic, Èbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënkuidombo padiseyobo: —Esus icsamboen chuimenu —quiampanëdash.

⁵⁴ Adquid icquin Esusën chuibanacno nidaneshun chuimeoanuequin naden padiseyobon tantiapanëdash: Èbitedishun chuimiác Nuquin Papan chiaid icsamboen Esusën chui-siash. Aden icsamboen chuisho tantiash, Nuquin Papan chomiaid nec, quec mibi muasho tantiashun, Unës uametiadquio iquebi, quequin Esus chiembi, quequin tantiaquin Esus chuimepanëdash padiseyobon.

12

Natiamiantequidbëdtabi dayacmeteuid (Mat 10.28-31)

¹ Aden padiseyobon: Esus icsamboen chuimeoanembi, quequin tantianubien matses dadpenquioshë Esus yacno cho-choash tsucus-tsucustsëcquio yec tabadpanëdash. Aido tsucus-tsucustsëcquio yec tabadnubien abëd icquido Esusën nadopanëdash: —Sicaid nami uaid cabiunac amëec bidisquedoc matsesën isenquiocnobi. Adembidi padiseyobon Nuquin Papan naden nata quequin chiaidbëdta ambibi tantiacpaden naden nata quequin dadpen chuiöaic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bëdamboen ista.

² Matsesën ompoquin naid Nuquin Papan abitedi ismendac. Matsesën ompoquin chienquio yaidbidi abitedi tantiamendac.

³ Inchëshën min nuntanuësh mibi icsamboec onquiaid Nuquin Papan matsestedi tantiamequin chuibanendac. Nuntanuësh shoshquequin mimbi chiaid Nuquin Papan matses-
tedi tantiamenuen chuiöaindac.

⁴ “Adembidi chuinu. Tantiata. Mibi cuesunenequid dacuëdënenda. Adquidën mibi cuesunequin mibi nibëdametiapimbo iquendac.

⁵ Nuquin Papauidsëqui dacuëdënta. Icsadednequid icsho aidën mibi cuesunemeshun chian anëdënquequid nësecaindac. Adoanquiduidtsëqui dacuëdënta.

⁶ Nuquin Papa tantiaquid yec dacuëdenda. Nuquin Papan ambi uaidtedi tantiec. Padichucu dadpen icquid abentsëc cueso isun aid Nuquin Papan tantiapec. ¿Adquid tantiaquinda Nuquin Papan mibi tantienquio ictic.

⁷ Ai, mibi tantiaquiec. Min manëdaidtedi ambi tambanaid nec. Aid pistscquidtedi tantiaquin Nuquin Papan mibi tantienquioda ictic? Mibi comapenen tantiec.

Esus tantiaquid nebi, quequin utsibon tantianubi chiaid (Mat 10.32-33; 12.32; 10.19-20)

⁸ “Abi chiembique. Tantiapiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nëid ëbi tantiaquid neque. Pudedme, quequin chiendambi.

⁹ Adecbidi, utsibo icnubi, Esus tantiaquid nebi, quetiapimbocquid Nuquin Papa yacno chosho isun, Nëid ëbi tantiesa neque. Pudedmenda, quequin Nuquin Papan uaido mayan bëdabo chiendambi.

¹⁰ Èbi matsesacsho matsesën icsamboen chuipac. Aden icsamboen chuiboshombic, Icsamboen chiembique. Èmbi mibi icsamboen chienquio yachimboec bëpiscudta, Papa, quesheo tantiash aidën icsamboen chienquio yachimboec Nuquin Papa bëpiscudendac. Nuquin Papan Mayanën tantiamiac nasho isash, Satanasën tantiamiaid nec, quequid icpec. Aidën chiaid bëpiscudenquiocquid Nuquin Papan abi yacno adquid yuedenquio iquendac.

¹¹ “Adembidi chuinu. Tantiapiota. Mibi chieshënquido iquendac. Adquid icquin chuiquid dapa yacno Esus tantiaquido ëmbi buanacsho aidën mëyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipac? quequin tantienda.

¹² Nuquin Papan Mayanën mimbi chuibante mibi tantiamequie —quepanëdash Esus abëd icquido caic.

Aton na dadpen icquidën tantiaid icsa

¹³ Adashic, abi datsidadquid abentsëcshun: —Con pa unësan con pan na dadpen con buchin bedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

¹⁴ Adoquien: —¿Buchibëdta mibi chuiquidtabi nepe? —quepanëdash Esus abi chuita caquid caic.

¹⁵ Aden aid chuishumbic utsibo chuiquin nadopanëdash: —Con na dadpen bednu, quesa icta. Mimbi bedaidënquio mibi Nuquin Papa yacno pudedtiapimbo iquendac.

16 “Aidpadquid chuinu. Bëdamboen tantiata. Aton na dadpen icnubi aton tiedën caniquid bacuësh dadpen icsho isash icbo nadposh:

17 “Con tiedën caniquid bacuësh dadpen iqueque. ¿Atotsimbimbi aidtedi dayun uapeba?

18 Naden naimbi. Tiedën caniquid êshê dayun uate shubu shênitedi chibanshun aidtedi nuamboshêcnic shubu uabanuna. Aden nuamboshêcnic shubu uashun aidênquio con tiedën caniquid bacuësh sandoshon dayun uanuna.

19 Aden dayun uashumbic nadopembi: Con na dadpen iquec yuecash naimêdenquio iquec. Ad icnuc nainquio yec tabadquin peshun aquendambi. Aden naic, Bëdambo iquebi, quec aton na dadpen icquid abibi onqueposh.

20 “Adec abibi onquesho tantiashun, ‘Mimbi icsamboen tantiec. Nêid inchêshêmbi mibi unêsec. Adec mibi unêsan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiquid —quepanêdash Esus.

21 Aden chiashic: —Aton na dadpenuidi tantiaquin Nuquin Papan chiapaden naisa yec aton na nianec unêsash Nuquin Papa yacno tabadiapimbo iquec —quepanêdash Esus.

¿Atotsimbi napeba? quesa icta, quequin chiaid

(Mat 6.25-34)

22 Aden iccuededquido chuishumbic Esusên abêd icquido nadopanêdash: —Aton na dadpen icquidên tantiacpaden tantienda. ¿Con na nibêdnuc atotsimbi pepeba? quec dacuêdenda. Adecbidi, ¿Atotsimbi dasiuidpeba? quec dacuêdenda.

23 Bëdamboec tabadnuequin mibi piasteuidi tantienda. Adembidi, Con dada bëdambo icmenuequin, Dashcute bedteuidi tantienda.

24 ¿Uicchunênda ambibi cuête êshê siac bacuëshacsho chepadic? Padenquio. Adecbidi, ambi dayun uatequid shubu nibêdnubi aton na nibêdec. Adquid icsho Nuquin Papan aton pete bedmec. Uicchun Nuquin Papapadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan?

25 Adecbidi, ¿mibi unêste ushê abimbo chonoc, Padi, quepecta mibi icti? Padenquio.

26 Adec mibi unêste chonoc, Padi, quetiapimbo mibi iquec ¿atotsi quiash ¿atotsimbi pepeba? quepe mibi?

27 “Adembidi, cuêtempi chuinu. Tantia. ¿Cuêtempinda aton bacuësh ictequid daêdcapec? Padenquio. Adoenquio yaid aton bacuësh ictequid bēdaidquio iquec. Cuêtempi bacuësh ictequid bēdaidquio yacpadquid chuiquid dapa Sadomonên dashcute adquio ictiapimbo icpampic.

28 Padnuen cuête bacuësh ictequid bēdaidquio icboedi badedquio sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda icpadic? Êbi bedmenquio ictsiash quequin Nuquin Papa bēdiactêc tantienda.

29 Aden tantienquio yec ¿Atotsimbi peshun aque? quec dacuêdenda.

30 Nuquin Papa tantiesan abi bunaiduidi tantianubi Nuquin Papa tantiaquidquio icquin pete actequidbêdta êbi bedmedonec, quequin tantiec tabadta.

31 Adembidi, Nuquin Papabêd tabadnu quequin tantiec tabadta. Aden tantiaquin mimbi bedtiadquio yaid mimbi bedendac.

Abi yacno choacsho meniaid

(Mat 6.19-21)

32 “Nuquin Papan abi yacno mibi chomeque. Dacuêdenda, êbi tantiaquido caimbi.

33 Ambo nidabi icquin mitsana menebanquin mitsana bedtequid bedshun aton na nibêdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidên bedtemaidquio iquendac. Capishton petemaidquio aid iquendac.

34 Mimbi tantiaidquio mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bēdamboec tabadte cudasquin mimbi dayun uaid iquendac —quepanêdash Esus.

Chieshenquiocquin caintequid

(Mat 24.45-51)

35-36 Aden chuishumbic Esusên nadopanêdash: —Aton icbo u isec nidan con icbo chonoshe quiash dasiuidacchobi ushenquiocquin tabote dēbedtonequin, Con icbo chosho puduedmeshun nashunu, quequin aton yuabon caimpec.

37 Aden abi cainquido aton icbon bēdambo icmequin nadopec: “Êmbimbo mibi pemenu. Nêmbô tabadec cho,” qeshun ambi yuaido icbonquio pemequin bēdambo icmendac.

38 Adembidi, icbo inchêshpotsembo choshon abi nashunuequin cainquido icsho icbon bēdambo icmiaido iquendac. Adembidi, cachina cuêdanabi badiadabicnuc choshon abi cainquido icbon bēdambo icmiaido iquendac.

³⁹ Adquidpenquoico ibo utsi chuinu. Tantia. Aidi abi cainquid nibëdnubi aton na icnuc isedtanec choshon isac ampequid ënden nidac. Adsho isash, Ampequid choec, quequin tantiaquid yec nidenquoico ictsenobi, quependac icbo.

⁴⁰ Adquiecbidi ampequid choacimbboec Nuquin Icbo choeque. Ad icnuc, Chosho ëmbibi tantienquiocchitomane queshun chieshenquiocquin ëbi cainta –capanëdash Esusën.

⁴¹ Aden Esusën chuisho tantiansh Petedo: –¿Utsi chuiquin mibëd icquidoudi tantiamenuenda chio? ¿Abitedi tantiamenuenda chio? Tantianu. Ëbi chui –quepanëdash Esus caic.

⁴² Adoaguinen: –¿Icbon chiac mitsipadquiocquin ambi namiaido bëdamboen napeba? Adquid chuinu: Pete tambanshun musucshun ëmbi namiaid utsitedi bëdamboen meneband, quequin ambi namiaid utsi abentsëc chianec icbo nidac.

⁴³ Adec nidashic choshon ambi chiacpaden ambi namiaidën chieshenquiocquin nabanacsho isun icbon bëdambo icmiaid nendac. Adquid naden chuipec: Ëbi nidan chieshenquiocquin mimbi nabanoque.

⁴⁴ Ëmbi namiaid utsibotedi ëbipadquiocquin chuiquid icta. Adquid icquin con natedi dayun uata, quequin chiendac icbon.

⁴⁵ Adquid icnubi adomboen naisa icbo utsin namiaid icpec. Aton icbo yuec choenquiosho isun aton icbon namiaid utsibo chieshënquin cuesbanshun ambentsëqui nua peshun tantienquoico yanquin aquec.

⁴⁶ Aden nabanquin tantienquiocnoc aton icbo choshon ambi namiaidën icsamboen cuesbanaido isun icbon comapenen cuesquin abi tantiesa utsibo ambi nidmiacnombo aidi nidmeoaindac.

⁴⁷ “Adembidi, ambi chiacpaden nabanesa icsho isun, Comapenen cuesta, icbon cac cuesendac.

⁴⁸ Aton icbo bunaid tantiacbicquidën cuesmetiadquiocquin nabansho aton icbon bëdiactsëc cuesmendac. Adembidi, Nuquin Papan dadpen tantiamiaido ambi chiacpaden nashuntiadquico iquendac. Adembidi, icbon dadpen meniaidon dadpen meneoatiadquidi nendac –quepanëdash Esus.

*Utsibëd bëdamboec tabadnu quesa icquin cuëshëdmequid
(Mat 10.34-36)*

⁴⁹ Aden chiashic abi onquec: –Ëbi tantiaquid icnuc ëbi tantiesa yec cuëshëdendac. Aido ënden cuëshëdondan ëbi tantiaquidombo bëdamboec tabadtsiandac, quec tsadebi.

⁵⁰ Adecbidi, Yuecshun ëbi unës uanun mëyantequid iquendac, quequin tantiec, Ënden mëyanondaid iquec abuc Nuquin Papabëd tabadtsiandabi, quec tsadebi.

⁵¹ ¿Nidaidënsnun abitedi bëdamboen tabadmenu quectabi chodionda? Padenquoico. Ëmbi chiaid tantiesa ëbi tantiaquidbëd icboedi cuëshëdtsiash quianec chopondabi.

⁵² Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquoico yec cuëshëdec adquid.

⁵³ Nadec cuëshëdtsiash: aton papa ëbi tantiaquid icnuc con papadquid icnu quesa aton mado cuëshëdendac. Shubu utsin aton mado ëbi tantiaquid icnuc aton papa adquid icnu quenquoico yec cuëshëdendac. Adecbidi aton tita ëbi tantiaquid icnuc con tapadquid icnu quenquoico yec aton champi cuëshëdendac. Shubu utsin, aton champi ëbi tantiaquid icnuc aton tita padenquoico yec cuëshëdendac. Shubu utsin aton chaya ëbi tantiaquid icnuc aton babanën padenquoico yec cuëshëdendac. Shubu utsin, aton babanën ëbi tantiaquid icnuc aton chaya padenquoico yec cuëshëdendac –quepanëdash Esus. Abi tantiesa cuëshëdtequid chuibanec.

*Nuquin Papan ismiente isun nad iquendac, quequin tantiaid
(Mat 16.1-4; Mad 8.11-13)*

⁵⁴ Aden abëd icquidombo chuishumbic Esusën naden iccuededquido chuioapanëdash: –Inchësh chosho isec, Ue choec, quiacpadec choec.

⁵⁵ Adecbidi, ushë chnëquec chosho isash, Chumbo yampec quiacpadec iquec.

⁵⁶ Aden isquin mimbi ëmbi nidaidënsnun ismiaidbëda abucshun ismiaid mimbi tantiec. Aden abucshun ismiaid isquin tantiaquidquico icquin ¿atotsieshun abucshun Nuquin Papan chomiaid isumbi tantienquiocquin mibi icsaid ënenquoico ique? –quepanëdash Esus iccuededquido caic.

*Utsibëd chushcananquid
(Mat 5.25-26)*

⁵⁷ Aden chiashic: –Utsibëd chushcananquido mibi nec. Adec tabadec ¿atotsi quiaish, Naden natiadquidi nebi, quequin tantiasnun mibi icsaid ënenquoico ique?

⁵⁸ Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bëdamenuen, Mimbi chiacpadomboen mibi nashunu, quequin bëdamboen chuita. Mibi adenquoio icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec.

⁵⁹ Aden nauedaqui mimbi icsamboen naboed cuidnante meniabicnu quënë yacnoësh mibi puduentiapimbo iquendac –quepanëdash Esus.

13

Utsibo unësmiacpadec unësmemane quequin mibi icsaid ënta caid

¹ Aden Esusën chuibanubien iccuededquid utsibon, Esus chuimenu, quequin caimpanëdash. Aden cainequi Esusën chuibanquin nainsho tantiashun iccuededquid utsibo: –Chuinu. Tanti. Cadidia yacnocquidon Nuquin Papan chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniadën intachëd daëdqiosh, quequin chuipanëdash. Aid chiaid tantiashun. ¿Atotsi icsamboen nasho aido cuesunemepashba? caimbi mibi –quecuededpanëdash Esus chiec.

² Adoaquien: –¿Cadidia yacnocquido utsitëdi icsaid daëdqiosh icnuc cuesunemiaido icsaid dadpen icsho aido cuesunemias, quequinda mimbi tantiape?

³ Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe qeshun.

⁴ Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacnenaid uebudquin abëd icquido 18ted cuesac unëssh, quiosh. ¿Edusaden yacnocquid utsibo icsaid daëdqiosh icnuc Sidoe yacnocquido icsaid dadpen icquid unëssh, quequinda mimbi tantiape?

⁵ Mimbi icsamboen tantieque. Utsibo unësmiacpadec unësmemane quequin mibitedishun mibi icsaid ënta –capanëdash Esusën abi chuimeboedo chuiquin.

⁶ Aden chuishumbic utsitsen chiec: –Icbon cuëte icnuc nadpec: ‘¿Con cuëte ada bacuëshe? Istanu,’ quianec icbo nidpec. Adec nidshun isquien bacuë nibëdec.

⁷ Adsho isun icbon abi neshcashunquid chuiquin nadopec: ‘Seta tedested matamias cuëte bacuë cuësnuec choudobi. Bacuëambo iqueque. ¿Bacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

⁸ “Adoaquien: ‘Cuëte bacuësa ëbi dëdshunemenda. Naden ëbi nameta, icbo. Cuëte bacuësa tacheshtatanquin seta abentsëc matamequin nidaid chëshë chodquiaid ëbi bëdamboen tasiameta. Adoac bacuëtsiash.

⁹ Aden seta abentsëc matamias choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh –quepanëdash Esus. Èmbi tantiapadec tabadenquiocboedi bëdamboen chiac bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

Cashuebudaïd bëdamiaïd

¹⁰ Adashic, chonoadtemaid ushën Nuquin Papan chiaïd chuibante shubun puduedshun Nuquin Papan chiaïd Esusën tantiamenubien

¹¹ seta dadpen 18tedi matamequin mayan icsan shuabudaïd icpanëdash.

¹² Adquid icsho isun Esusën: –Shuabudaïd icboedi nëbi cacueoaid mibi iquendac, chido –cashun

¹³ mishac cacuiash, Nuquin Papan nadatiambocquin naïd nec, quequin chiec chido onquepanëdash.

¹⁴ Aden chonoadtemaid ushën Esusën chido bëdamesho isun Nuquin Papan chiaïd chuibante shubu isquidon: –Nëid ushë chonoadtemaid ushë neque. Bëdamenu quequin nëid ushënquo bëdamenda. Chonoadtequid ushënquo bëdameta –capanëdash iccuededquido chuiquin.

¹⁵ Adoaquien Esus: –Mimbi chiacpaden naisa mibi neyoc. ¿Chonoadtemaid ushë icnuc, Con yua acte acmebono qeshun mimbi yuaïd tënëshachobi acte yacno buanenquioda mimbi icpe?

¹⁶ ¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaïd icsho mënchiquenquiodambi icpe? –quepanëdash Esus nëid ushën bëdamenda quequido tantiamequin chiec.

¹⁷ Aden Esusën chuisho tantiash, Adenda, quequin bëdamboen chiombi, quetiapimbo yec otacquo tabadcuëdednubi utsibotëdi, Esusën nadatiambocquin naïdtedi bëdambo iquec, quec bëdambo yec tabadpanëdash.

Cuëte ëshëmpi chiaid
(*Mat 13.31-32; Mad 4.30-32*)

¹⁸ Adashic: —¿Nuquin Papan shubun icquido mitsipadquidquio icpec?

¹⁹ Nadquidquio iqueque. Chuinu. Tantia. Icbon cuëte ëshë pistsëcquicoquid mostasa caid nësecaid dëyucash nuamboshë caniec. Aid cuëte caniaidën cuidin podochoquidën shubu uabededec. Adquiechidi, Nuquin Papan chiaid chuisho tantiatsëcquidën tantiabenash bëdambocquid icsho isash matses utsibo ëbi tantiaquid Nuquin Papan shubun icquido dadpen yanec —quepanëdash Esus.

Sicaid nami uaidpadquid
(*Mat 13.31-33*)

²⁰ Aden chuishumbic utsitsen chuioaic: —¿Nuquin Papan shubun icquido mitsipadquidquio icpec?

²¹ Nadquid iqueque. Tantia. Sicanun nami uatepadquid nec. Sicaid chidon nami uashun cabiunac amëec bidisquedoec. Adomboembidi ëmbi chiaid ëbi tantiaquidën chuibanac ëbi tantiaquid dadpen yanec utsibon isenquiocnobi —quepanëdash Esus.

Puded-pudedtequid shëcuë pistsëcquio chiaid
(*Mat 7.13-14, 21-23*)

²² Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daëdpactsëcquid utsi-utsiec yacnotsen isbidanoaquin anocquidotsen tantiamenuen chuibenenu, quec Esus nidpanëdash.

²³ Adec nidsho isun iccuedquid abentsëcshun nadopanëdash: —¿Nuquin Papa yacno matses daëdpactsëcta nidpec? Tantianu. Ëbi chui.

Adoaquin Esusën nadopanëdash:

²⁴ —Nuquin Papa yacno puded-pudedtequid shëcuë pistsëcquio iquendac. Esusquio tantiec aidëmpinquo mibi pudedendac. Mimi tantiaid utsi icnuc tsucusec pudedtiapimbo mibi iquendac. Adquid dadpen icnuc,

²⁵ Nuquin Icbon, Ëbi yacno pudedte ushë naimbudosh, caqui cho-choshon, Ëbi pudedme, quequin comapenen cuëmbededpec.

“Adoaquien: ‘Ëbëd icquidpenquo mibi neque. Mibi pudedmetiapimbo iquebique. Mibëd icquido yacno nidtan,’ caindac Nuquin Icbon adquid.

²⁶ “Adoaquien: ‘Mibëdtambi peshun acbededombi. Ëbi yacnoshon mimi tantiamequin chuibanshë tantiombi,’ quequin abi tantiesan Nuquin Icho chuipec.

²⁷ “Adoaquien: ‘Icsaquido mibi neque. Nëmbo pudedenda,’ quepec Icho.

²⁸ Aden chiaqui Abadauan yec Isac yec Acobo yec quec Nuquin Papan chuimiaoaid aidtedi Nuquin Icho yacno tabadsho isash abi tanties aadiapimbo yec chian anëdëmqiacao tabadec shubiquiec, Nuquin Papa icsambo iquec, quec nëshpec.

²⁹ Nuquin Papa yacno abi tanties aadiapimbocnobien nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac.

³⁰ Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac —quepanëdash Esus.

Edusaden isash anocquido Esus unësqiotequid
(*Mat 23.37-39*)

³¹ Aden Esusën chuibanquin naimbudnubien padiseyobo utsi-utsiec cho-choshon: —Ancanquid Edodes mibi cuesunemete buneque. Nëuëshquio nidec nid —capanëdash Esus chuiquin.

³² Adoaquien: —Edodes cuesunemenucimboc onquequidquio nec. Aid yacno nidshun naden chuita. Nëbi mayan icsa dapuduemequin utsibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsinutsinquin adomboembidi nabanoaimbi. Adobanquimbi naimbudembi.

³³ Adobanequi nëbi capuebi. Adobanequi badiadash capuoai. Adobanequi abadiadash capuoai. Adobanequi Edusaden yacno capuoai. Adec capuec ¿Edusaden yacno choabidabi unës uapec? quiosh, Esus quequin Edodes chuita —capanëdash Esusën.

³⁴ Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: —Nuquin Papan chuimiaoaid cuesunequido mibi nec. Adembidi, Nuquin Papan mibi yacno chomiaido cuënoten se-sequido mibi neoaic. Ëbi tantiaquid icmenu, quequin chuideniombi. Cachinan, Con bacuë chieshëncquid choec, qeshun nua shocotsëcshun aton bacuë cudasquin mabësec aton podon. Adembidi: Mibi chieshëncquid choec, qeshun mibi cudasquin chuibanombi. Aden chuisho tantiatiapimbo yec mibi tabadpec.

³⁵ Adquido yec nēbi min shubun icquido cudasquid ëbipadquid nibëdec. Nad iqueque. Tantia. Mibi chieshēnec cuesunenuequido choabincuc ëbi nidacsho yuen ëbi isenquio mimbi iquendac. Yuecash abucueš choasho isash, Ambi chomiaid Nuquin Papan bēdamboen isaidquio nec, quequin tantienquiochoedēmbi tantiendac —quepanēdash Esus Edusaden uano icnuc Edusaden yacnocquido tantiamequin chiacimboec onquec.

14

Padiseyobon shubun Esus puduedash tabadaid

¹ Adashic, chonoattemaid ushē utsin padiseyobo tsusio dapa isedec Esus puduedsho isun, Nēid ushēn natemaid icnuc Esusēn bēdamenushe queshun isnuequin padiseyobo utsibo tabadquin caimbededpanēdash.

² Aden caimbedednubien podu nidte chedo bidisquiaid uano tsadsho isun Esusēn:

³ —¿Chonoattemaid ushēn daicsambocquid bēdamenquiocte ushē nec, quequina mimbi tantiape? —caquien

⁴ abī caimbededquido otacquo tabadcuededpanēdash. Adec aido otacquo tabadcuedednubien podu nidte chedo bidisquiaid dada Esusēn bedshun bēdameshun: —Nidec nid —cac bēdambo yec nidpanēdash.

⁵ Aden aid nidmeshun abi bēdamenushe quequin caimbededquido caic: —¿Chonoattemaid ushēn nua uēdēshcaidēn min baca ampaēdacsho isun badedquio bedtanquin indoenquioda mimbi ictsia? —quepanēdash Esus.

⁶ Aden chuisho tantiash adquiobidi otacquo tabadcuededpanēdash.

⁷ Adashic, tsusiobon dayunquio tsadsho isash, Chuiquid dapa nec, utsibo quetsiash, quec padiseyobo cho-choec, quequin tantiashun Esusēn nadopanēdash:

⁸ —Pec cho, cac choshon tsadte bētinenda. Tsadte mimbi bētinambien shubu icbon ambi pec cho caid utsi mibi chuiquid tsusio chosho

⁹ isun: “Chuiquid dapa choeque. Uano tabadad,” icbon cac icsamboen naombi quiaish natiac uano tsadpec mibi.

¹⁰ Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nēmbō, chuiquidbēd tsadec cho,” capec mibi shubu icbon.

¹¹ Chuiquidimboecsho ispashunī, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanēdash Esus abēta yuedaido caic.

¹² Aden aido chuishumbic abi yuedquid Esus nadpanēdash: —Pemenu, quequin mibēd icquid min utsibo aton na dadpen icquiduidi pec cho cainda. Aido pemiac, mibi pec cho caoaic.

¹³ Pemenu, quequin aton na nibēdquido, daicsaidobēda bēshuaido pec cho cata.

¹⁴ Adquido mibi cuidquin pemetiapimbo iquec. Adquido pemias, Bēdambo iquebi, mibi quepec. Nuquin Papa yacno nidash puduedsho ambi bēdambo icmiaid mibi iquendac —quepanēdash Esus abi yuedquid caic.

Nuquin Papa yacnoshon pequido

¹⁵ Aden Esusēn chuisho tantiash abēdtan pec tsadquid abentsēc: —Nuquin Papa yacno nidshun abēdtambi pec bēdambo iquebi —quepanēdash.

¹⁶ Adoaquien aidi tantiamenuen utsi chiacimboec Esus nadpanēdash: —Yuednu, quequin nadēnquio pec chota, quequin ambi yuedtequid dadpen chuiposh.

¹⁷ Ambi chiacpadēn ushē chonoc: ‘Ēmbi chuiboedtedi pec cho quequin chuitanta,’ cac aton yua nidposh.

¹⁸ Adec nidshun chuituidaquien: ‘Nidtiapimbo iquebi,’ queposh abitedi. Abia chuituida abentsēc nadposh: ‘Ēmbi sēuēamboed dēdabi nidtiapimbo iquebi,’ queposh.

¹⁹ ‘Utsibic: ‘Baca bedshun, Bēdamboen nimbanquina buaneque. Isnu,’ queshun isedtanenquioqucin ambi bedboed nimbameposh.

²⁰ ‘Utsibic: ‘Con chido bedombique. Nidenquio iquebi,’ queposh.

²¹ ‘Aden chuisho tantiash nidshun aidon chiacpaden aton yuan icho chuioposh. Adsho tantiash nēishun icbon: ‘Ēmbi isedacmaido yacno nidshun, Pec cho, cata. Aton na nibēdquidbēda daicsaid, bēshuaid chedo chuitan,’ cac aton yua nidposh.

²² ‘Nidshun chuitanec aido bēdi choshon, ‘Mimbi chuiboedo bēombi. Aido icnubi abi tabadte iquec,’ queposh yua.

²³ ‘Adoaquien: ‘Shubu ēnēdacno nidshun ěmbi chuibocpadquido isun bēoata ma con shubun tsucus-tsucustsēcquio yec ma adquido tabadpanuna.

²⁴ Abia ěmbi pec cho caidon ēbēdtambi petiapimbo iquendac,’ queposh icho —quepanēdash Esus.

Esuspadquo ictequidquo

²⁵ Adashic, nidsho matses dadpeshun tsibanac abi choacmi bidiadshun isec Esus nadpanëdash:

²⁶ —Ëbipadquo icnuequid aton papabëduidi icquid iquec ëbipadquo ictiapimbo iquec. Adecbidi, aton titabëduidi icquid iquec ëbipadquo ictiapimbo icoaic. Adecbidi, aton chidobëduidi icquid iquec ëbipadquo ictiapimbo icoaic. Adecbidi aton bacuëbobëduidi icquid iquec ëbipadquo ictiapimbo icoaic. Adecbidi, aton utsibobëduidi icquid iquec ëbipadquo ictiapimbo icoaic.

²⁷ Unësmanc quiaish mëyanac dayactiapimboquid ëbipadquo ictiapimbo icoaindac — quepanëdash Esus.

²⁸ Aden chiec Esus abi onquec: —¿Shubu uanu, qeshun abia shubu uaid isec, Nëidtenquio nanu, qeshun aidtedquibidi bëshun toccashun shubu uainquioda icpec?

²⁹ Aden tantienquiocquidën abentse-abentsen bë-bëtsëcquin baded naintiapimbo iquec.

³⁰ Adsho isun utsibon mamëshumpec. Bëdamboen isun shubu uaquidpadquid, Esuspadquo icnu, qeshun ëmbi chiaid bëdamboen tantiabënëdash adquibidi icpec. Èbi tantiauidtsëcquid ëbipadquo ictiapimbo iquec.

³¹ “Adembi chuinu. Tantiata: ‘Mibëd icquidobëd cuesnanuec chuiquid utsi nëmbo chochoec,’ qesho tantiaishun nëmbobi icquido chuiquidën naden tantiapec: ‘Ëbëd icquido daëdpactsëc iquec. Aidtedtsëqui iquec dayacquiocquid icquin chuiquid utsi abëd icquido cuemepec, qeshun ma chobono,’ quequin caimpec.

³² Padnuen, abëd icquido dayactiapimbo icsho isun chuiquidën: Chuiquid utsi bëquedanta. Bëquedshun, Mibëdi ictsiabi. Èbëd icquido chuiquid icta, ëbi chuiquid quiosh, quequin chuita, quequin chuiposh.

³³ Adembidi ëbipadquo icnuequidon bëdamboen tantiata. ¿Èbi chuiquid Esus nec, quequin ambi chiacpadendambi nabampeba? Ai, adonona, qeshun adota. Adoesa, Esuspadquiocquid nebì, quenda —quepanëdash Esus abi tsibananquido chiec.

Sa batapentsëcquiocquid

(*Mat 5.13; Mad 9.50*)

³⁴ Aden chiashic Esus nadpanëdash: —Sa batambo iquec. Casecac utsibëd daëdash batambo iquec. ¿Sa batapentsëcquiocquid casecac batamboda icpadiç?

³⁵ Padenquo. Secatequid adquid nendac. Adecbidi Esuspadquo icnu quiaish ëbipadquo yanasa chian anëdënquequid nësiatequid nendac. Adquid ictiapimbo iquebi, quequin, Tantanu, qeshun tantiacpadamboen nabanta —quepanëdash Esus.

15*Obeca abentsëc bënëdtequid*

(*Mat 18.10-14*)

¹ Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tantanu, quiaish Esus datsidapnanëdash.

² Adsho isash padiseyobo Esus tantiamenquo yec chushquiacbimboec, Abi datsidadquido icsambocquid icsho cacumenquiocquin aidobëdtambi peshun Esusën aquec, quec abibi onquecuedepnanëdash.

³ Adoaquien, tantiaquidquo iquec Esus:

⁴ —¿Min obeca dadpen 100ted icboedi abentsëc bënëdacsho isun, Nibënu, quequin min obeca utsi dadpen 99ted nianec nibënac nidenquioda mibi icpeç?

⁵ Aidi nibënquin istuidash, Con obeca istuidbosh bëdambo iquebi, qeshun chiadquin buanec icbo nidec.

⁶ Shubuno choshon abëd icquido ambi yuedaidobëdta chomeshun: “Con obeca bënëdaid istuidshun bëbosh bëdambo iquebique. Nuquibi penuna,” quequin icbon chuippec.

⁷ Adecbidi Nuquin Papa tantiaquid dadpen icnu matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuedependac —quepanëdash Esus.

Aton na bedtequid bënëdtequid

⁸ Aden icbon aton yua bënëdaid chuishumbic utsi chiec Esus nadpanëdash: —¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec?

⁹ Ai. Aden nibënquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

¹⁰ “Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec —quepanëdash Esus.

Aton mado cuëshëdquid

¹¹ Aden chido chiashic utsi chiacbimboec Esus nadpanëdash: —Aton mado daëd icnubi

¹² tsyuec tishaid aton papa caic: ‘Tsusio budquin mimbi chiondacpaden nëbi ëbi aidedden meteta, papa,’ quepondash. Adoac aton na musucshun aton mado abi daëdi menebampondash.

¹³ “Aden meniac daëdpactsëc ushash aton mado tsyuecquid aton natedi sandoshon buanecnidaid utsi yacno nidash icsamboen nabanec tabadnuc aton natedi naimëdpondash.

¹⁴ Aden aton natedi naimëdambic tiedën caniquid unësibunian abi nidacnocquidon pete naimëdan tsusion mado chedo comapenec bundocuededpondash.

¹⁵ Adec bundoquiec abi nidacnocquid abentsëc yacno nidshun: ‘Mimbi namiaid ictiadquo iquebi,’ caquien: ‘Con chanco pemebanta,’ queshun aton chanco yacno tsusion mado nidmepondash.

¹⁶ Aden nidmiac nidquin chanco pemebanequi ambi chanco pemiaid petiadquo yec tabadshobi anocquidon menenquo icpondash.

¹⁷ “Adec natiambo bunec tabadquin aton papa ambi nianondaidbëdta abi icsaid utsitedi tantiec abibi onquec nadpondash: ‘Con pan namiaidon pete dadpen icnubi con na nibëdnuc unëspebi.

¹⁸ Nëbi con pa yacno nidshun naden con pa chiemi: Nuquin Papan chiacpaden nainquocquin mibi tantienquo yec nidshun icsamboen nabanombique.

¹⁹ Adquid icsho con mado nec, ëbi cainda, papa. Nëbi min yuapadquid ëbi icme,’ quequin chiemi,

²⁰ abibi quianec aton papa yacno nidoapondash. Adec nidec ancuenquo yacno aton mado nidondaid casenash chosho isash unësquiocnoc aton mado bëquedquin dayumbudshun shubi uatanguin aton papan tanchoccapondash.

²¹ Adoac ambibi tantibocpaden aton papa chuiquin: ‘Nuquin Papan chiacpaden nainquocquin mibi tantienquo yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,’ capondash aton madon.

²² “Aden chiaquien bëdambo yanshun ambi namiaidombo naden aton papan chuipondash: ‘Con mado ënden nidondaid choashe. Dasiuidte bëdaidquo bëshun con mado dasiuinta. Adoshombic mëusudtetsen mëusunta. Adoshombic tapucudtetsen tasiuinta.

²³ Adoshombic, bacan bacuë nuacquid dapa bedshun cuesuneta nuquitedi bëdamboec tabadquin penun.

²⁴ Con mado unësacimboecboedi nëbi ëbëdi tabadoaic. Aidi bënudacimboecboedi nëbi istu-idacimboec choash iquec,’ cac bacan bacuë cuesuneshun codocacsho pebededpondash.

²⁵ “Adnubien bëyuc tishaid tied nantan icpondash. Auëshquo nidec shubu anoentsëqui choquin tentenate cuëdëmec matses cuëdënsho tantiatuidpondash.

²⁶ Aden tantiatuidashien aton papan namiaid istuidash: ‘¿Atotsi naic nec?’ quepondash bëyuc tishaid.

²⁷ “Adoquien: ‘Min utsi ënden nidondaid choaposh. Aidi chosho isash unësquiocquin nuquitedi bëdamboec tabadquin pemenequin aton bacan bacuë nuacquid dapa papan cuesunemiosh,’ cac

²⁸ bëyuc tishaid nëishash shubun puduedenquo icpondash.

“Adsho isash, Puduedenquo iccosh, quequin chiac bëyuc tishaid yacno nidshun: ‘Min utsibobëd bëdamboe icnuec cho, mado,’ capondash aton papan.

²⁹ Adoquien: ‘Seta dadpen matamequin mimbi chiacpadomboen nabanteniombi. Adquid icsho ëbëd capuquidobëdta ëbi pemenuen yua utsin bacuë mimbi cuesunemenquiocpaboc.

³⁰ Nëbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cuesunemepaboc,’ quequin bëyuc tishaidën aton papa chushcapondash.

³¹ “Adoquien: ‘Mado, ëbëd icquid mibi nec. Adquid icnuc con natedi mitsana neyoc.

³² Min utsi unësacimboecboedi nëbi choash tabadoaic. Aidi bënudacimboecboedi nëbi istuidaid nec,’ quequin aton papan choobedën buchi chuipondash —quepanëdash Esus.

16*Icbon na icsamboen isquid*

¹ Adshumbic, abëd icquido Esusën naden chuipanëdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh.

² Adoac, ambi con na ista caid chomiash icbo nadposh: ‘Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nëbi

¿Ëmbi tambamboed abitedida iqueque? Con na daëd uata quequin ëmbi meniac mimbi daëd uabanquin dada uaid bec cho. Isnu,' queposh icbo.

³“Aden chiac icbon na isquid otacquo onquec: ‘¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibëdeque. Bec cho, quetiapimbo icoaibi.

⁴Naden natsiambi. Con icbon na meniondaid abitedi cuidmenquo yac ëbi yuedtsiash,' queposh.

⁵“Aden tantiashun ambi icbon na meniondaid abentse-abentsen chomiach bëyuc choquid chuiquin: ‘¿Tedtsi ëmbi con icbon na meniaqui mimbi cuidenquiocpaccoc?’ caquien:

⁶“Bëchi shocosh nuacquid dapan cushtoaid 15tedi bedshun cuidamboccombi,' queposh. “Adoquien: ‘Mimbi 15ted bedombi, quequin dada uaid secashun dada uatempi bedshun shocosh dapa bëchi cushtoaid 7ted bedshun cuidembi, quequin dada uata.’

⁷“Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquo mimbi icpo?’ caquien:

“‘Tsitsan dapa dadpen 1000ted tiedën caniquid ëshë bedombi,' queposh.

“Adoquien: ‘Mimbi aited bedombi quequin dada uaid secashun dada uatempi utsin tsitsan dapa dadpen 800ted tiedën caniquid ëshë bedshun cuidembi, quequin dada uata,' quequin icbon na isquidën chuiquid. Adoac ambi chiacpaden ambi bedaid cuidambocquidën dada uaposh.

⁸⁻⁹“Aden dada uabansho isun dada uatempitedi bedshun icbo yacno nidshun meniac isbanec icbo tantiaquidquo iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,' caposh icbon —quequin Esusën chuiapanëdash. Aden chuishun ambi chuiboed tantiamenuen abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meniaidotsen ëbi tantiaquid yanash unëshash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanëdash Esus.

¹⁰ Aden chuishumbic adomboembidi chuiquin Esusën nadopanëdash: —Icbon na daëdpactsëc bëdamboen isbanquin nashunquid icquin adembidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac.

¹¹ Adembidi mimbi nidaidënshun bedquin mimbi icsamboen nabansho isun, ¿Ëbi tantiaquid bëdamboen ista, quequinda Nuquin Papan mibi chuipeba? Padenquo iquec.

¹² Adembidi, ¿utsin na isquin bëdamboen nashunenquo icsho isun abi yacno chosho isun mibi menependa ictic? Padenquo.

¹³ “Adecbidi, chuiquid daëd icnuc aid daëdshun namiaidquo ictiapimbo mibi iquec. Abentsëcshun chiaiduidi tantiaquin utsin chiaid mimbi chieshënc. Adquiobidi Nuquin Papa mimbi tantiaidquo icquimbi mitsana bedtequid mimbi tantiaidquo ictiapimbo iquec —quepanëdash Esus.

¹⁴ Aden chuibanubi aton na bedtequid ambi tantiaidquo icnuc chieshec padiseyobo tabadcuededpanëdash.

¹⁵ Adec tabadsho isun Esusën: —Bëdamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bëdamboen naquidbimboecsho matsesën ispashuni, quequin tantiaquin nasho Nuquin Papan bëdamboen istiapimbo iquec.

¹⁶ “Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampidbëdta Nuquin Papan chuimiaid utsibon dada uampid mimbi ënden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquo yec ambibi tantiacpade puduede bunec.

¹⁷ Abubëd nidaid ënëdtequid icnuc Nuquin Papan naden nata quequin chiaid ënëdtiapimbo iquendac.

Aton chido nianquid

(Mat 19.1-12; Mad 10.1-12)

¹⁸ “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoac —quepanëdash Esus.

Aton na dadpen icquid icnubien aton na nibëdquid

¹⁹ Adequi onquequimbi utsi chiacbimboen Esusën naden chuipanëdash: —Dada, aton na dadpen icquid bëdaidquo dasiuidquidën badiadquidën-badiadquidënquien nua peshun acposh.

²⁰ Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë ðadpen icquid tsadpoh.

²¹ Bunquiec ambo tsadec aton na dadpen icquidën peshun secaid bedshun penuec tsadtsëcsho menenquiocpoh. Aden menenquiocnoc tsadshobi opa choquin aton chiuë bëtashuntuidpoh.

²² “Adnubien, aton na nibëdquid Dasado unëso isun Nuquin Papan uaido mayan bëdabon abuc buanshun Abadauanën dayunquio tsadumpoh. Adoambic, aton na dadpen icquidtsen unësashi

²³ chian anëdënquiacnoshon mëyanaid icquin abucquio isquien aton na nibëdquid unësboedi Dasado Abadauanën dayunquio tsadpec.

²⁴ Adec aid daëdi tsadsho isun aton na dadpen icboedën Abadauan chuiquin: ‘Ëbi antauideque. Con ana dauebudoaquin ëbi ëcpanum Dasado acte bëme, papa,’ capoh.

²⁵ “Adoaquien: ‘Chuinu. Tantia, abuido. Ënden nidaidën tabadquin mitsana dadpen bedbanec bëdambo mibi tabadnubien Dasado comapenec bunquiec tsadpoh. Nëbi aidi ënabi bëdamboec tabadnubien anchumbo yec mibi tënquebudec.

²⁶ Adboedi, uquëmbo mibi iquiec cuëma utsiuc potetemaid icnuc nëuëshquio nidtiapimbo iquiec. Adquiobidi mibi yacnocquido nëmbo chotiapimbo icoaic,’ quequin Abadauanën aton na dadpen icboed chuiquoh.

²⁷ “Adoaquien: ‘Ëbi yacno potetemaid icnuc con pan shubu yacno Dasado nidme.

²⁸ Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe qeshun Dasado aido chuimetanta, papa,’ quepoh aton na dadpen icboed.

²⁹ “Adoaquien: ‘Nuquin Papan chiaid, Moisesën dada uampidbëdta dada uaid utsi isec tsusiobo onquepayoc. Aden chiaid ma min buchi adon tantiaquioapanuna,’ quequin Abadauanën chuiquoh.

³⁰ “Adoaquien: ‘Aid tantienquioctsiash, papa. Unësboed nidshun chiac aidon tantiapatsiash,’ quequin aton na dadpen icboedën chuiquoh.

³¹ “Adoaquien: ‘Padicnuna. Nuquin Papa tantiesha icquin uincuemiaidën chiaid min utsibon tantienquio icpatsiash,’ capoh Abadauanën aton na dadpen icboed chuiquin – quepanëdash Esus.

17

*Mates icsaid chiaid, ambi Esus tantiaid chiaid, ambi natequid chiaid
(Mat 18.6-7, 21-22; Mad 9.42)*

¹ Aden chuishumbic abëd icquido Esusën nadopanëdash: —Icsa uanquid iquendac. Adquid Nuquin Papan comapenen cuidendac.

² Adquid ëbi tantiabenabicquid icsa uanabicsho cuënote yuëmbocquid têtanetanquin acte shodomboshë yacno nënepatecnëdan.

³ Aid tantiec aidpadquid icmane quequin bëdamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimbi cac: ‘Ai, icsaobique. Ënëdnuna,’ qesho tantiaid aidi icsainquio yacnimboec bëpiscudta.

⁴ Mibi icsamboen nash choec: ‘Icsaobique. Ënëdnuna,’ quenuc mibi icsamboen nacmaidbimboec yec bëpiscudta. Mibi padpiden icsamboen nash choaic: ‘Icsaobique. Ënëdnuna,’ queoanuc mibi icsamboen nacmaidbimboec yec bëpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aidtedebidi aidi icsambo yenquio yacnimboec bëpiscudoata —capanëdash Esusën abëd icquido chuiquin.

⁵ Adoaquien: —Nuquin Papa nadatiambocquin nabanquidquio nec, quequin tanti-aquidquio ictiadquio iquebique. Adquid ëbi icme, icbo —capanëdash abëd icquidon Esus chuiquin.

⁶ Adoaquien: —Cuëtëmpi ëshë mostasa caid pistëcquio iquiec. Siac dëyucash nua yanec. Adecbidi Nuquin Papa nadatiambocquin nabanquidquio iquiec quequin mimbi bëdiactëc tantiapec. Aden bëdiactëc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquio iquiec, quequin tantiabenshun nëid cuëtëmpi caic, Cuëte mananuc tabadboedi adquiecbidi acte nantan tabadoata, quequin mimbi chiacpadece acte nantantsen abi tabadacpadececbidi tabadoaindac —quepanëdash Esus.

⁷ Aden chiashic Esus abi onquec: —¿Min yua mimbi neshcata cac nidshun neshcaquin nainash shubuno chosho isun: “Nëmbo tsadquin pec cho,” caquinda mimbi icpe?

⁸ Padenquio. “Con pete codocashun ëbi pemeshun acte menetanquin mimbitsen peshun acta,” mimbi caic.

⁹ Aden mimbi chiac mimbi chuiboedtedictsëqui nabanquin mimbi yuaidën naimbudec. Aden naimbudsho isash: “¿Bëdamboen mimbi naoc,” quecta mibi icpe?

¹⁰ Padenquo. Ambembi nainquo iccosh. Mimbi chiacpaden min yuan nabanosh. Adembidi Nuquin Papan chuiboedtedtsëqui nabanash Nuquin Icho caic: “Mimbi chui-boedtedi nabampombi. Mimbi namiaid icquin ëmbi naboed ëmbi natequiduidi napombi,” quequin mimbi chuite nendac –quepanëdash Esus.

Daushumbocquido bëdamiaid

¹¹ Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec

¹² shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëqueduidpanëdash.

¹³ Adquido yec uano tabadquin: –Ëbitedi bëdamboen tantiaquin nadatiambocquin naban, icbo –cabededpanëdash comapenen cuënquin.

¹⁴ Adsho tantiaashun Esusën: –Isadaidbo tsusiobo yacno nidshun ismetanta –capanëdash. Adoac nidanequi abitedi bëdambudnepanëdash.

¹⁵ Adoac bëdamboed abentsëc dëbidiadanec Nuquin Papan naid chiec onquec choaic

¹⁶ Esusën taëno tsadbudash: –Mimbi bëdameboc bëdambo iquebi –quepanëdash Esus caic. Aidi Samadia yacnoquid isadaidpembro nepanëdash.

¹⁷ Adoquien: –¿Diestedidambi bëdamepo? –quepanëdash Esus dëbidiadanec choboed caic.

¹⁸ Aden chiashic iccuededquidtedi caic: –Nëdi isadaidpembro yequi dëbidiadanec choash Nuquin Papan naid chiec onquenubi ambi chiacpadomboen bëdameboed utsibo isadaidbo icquimbi Nuquin Papan naid chienquo icpec –quepanëdash Esus.

¹⁹ Aden chuishumbic: –Mimbi tantiacadequi mibi bëdanoque. Nidtoanec nid –capanëdash Esusën daushumbo icboedi chuiquin.

Chuiquid dapabëd bëdamboec tabadte chote ushë

(Mat 24.23-28, 36-41)

²⁰ Adshumbic: –¿Chuiquid dapa abentsëcbëd bëdamboec tabadte ushë choaid mitsipadënquo nuqui ispeque? Tantianu. Ëbi chui –capanëdash padiseyobon Esus chuiquin.

Adoquien: –Chuiquid dapabëd bëdamboec tabadte ushë chote ismete nibëdendac.

²¹ Adecbidi, nëmbobi chuiquid dapa abentsëc choeque. Is, quetiapimbo matses icpec. Adecbidi, Umbo choeque. Is, quetiapimbo matses icoaic. Chuiquid dapa abentsëcbëd tabadte nëmbobi iquec caimbi –quepanëdash Esus padiseyobo abi chuimebedo caic.

²² Aden padiseyobo chuishumbic abëd icquido Esusën nadopanëdash: –Yuecash natiamantequid icnuc abuc Esusbëd tabadte ushë chopashun, quec ëbi iste mibi bunquimbi ëbi isenquo mimbi iquendac.

²³ Adec ëbi iste bunubien: “Bëdamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda.

²⁴ Nuquin Papa yacno bëdamboec tabadte ushë chonoc abu bedquetaniachimboec uëshëmbo chënquec ëbi chosho abitedishun isbededendac.

²⁵ Aid ushë choabicnuc ëbi natiametequid iquendac. Adembidi, chuiquid dapa nec cainquiocquin ëbi isadaidbon chieshëmbededec –quepanëdash Esus.

²⁶ Aden chiec Esus abi onquec: –Ëndenquimboshë Noe tabadnuc matsesën icsamboen tantiaded-tantiadednëdacpadomboen ëbi choate ushë icnuc adembidi matsesën tantiadenepec.

²⁷ Nadec tabadpampic: Nuquin Papan chiaid tantiesa cuidte ushë choec, quenquiocquin abi bunaiduidtsëqui tantiaquin nua peshun nua acbededpampic. Adembidi tantiaquin aton chido bedpampic. Adembidi tantiaquin aton champi menepampic. Aden tantiaquin nabanubien Noebëd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic –quepanëdash Esus.

²⁸ Adec Noe tabadnuc icsamboen tantiec matses tabadaid chiashic, Esus nadpanëdash: –Adecbidi Dod caid icnuc icsamboen tantiec matses tabadpampic. Nuquin Papan chiaid tantiesa iquec abi bunaiduidtsëqui tantiaquid icoapampic. Nidaidën tabadaiduidquo tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic.

²⁹ Aden nabanquin Nuquin Papan chiaid tantienquo icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dēpesh pasquiacimboecquid nēdēnquetequid ue sequiacimboec sequequidēn Sodoma yacnocquidtedi Nuquin Papan chiaid tantiesabo unēs uabunepampic — quepanēdash Esus.

³⁰ Aden chiashic: —Ēbi choate ushē icnuc ěmbi chuibocpadquieq Nuquin Papan chiaid tantiesa yec abi bunaiduidtsēqui tantiaquid iquendac.

³¹ Shubu macano yacno dectatoash mibi tsadnuc ěbi choate ushē chosho isash budanec mitsana bednu quec shubuno puduedenquo yec cuenta. Adecbidi, tied nantan mibi icnuc aid ushē chosho isash shubu yacno mitsana bednuec nidenquo yec badedquo cuenta.

³² Mibi yacnocquidtedi unēs uanushe bidiadshun isenquo yec cuenta, cac Dod cuenubien aton na tantiec aton chido aurbidi bidiadsho unēs uampidpadquid iquenda.

³³ Unēsmane queshun ambi tantiacpadeq tabadquid unēsash mēyanacno tabadnubien unēsmane quenquiocquin Nuquin Papa yacno tabadte tantiaquin chuiquido unēsash Nuquin Papa yacnombo tabadendac.

³⁴ Ēbi choate ushē icnuc nad iquendac: Inchēshēn daēd usho Nuquin Papa yacno yuednuen abi tantiaquid bedquin abi tantiesa nianendac.

³⁵ Adembidi, chido daēdshun macuso Nuquin Papa yacno yuednuen abi tantiaquid bedquin abi tantiesa nianoaindac.

³⁶ Adembidi, dada daēd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac —quepanēdash Esus.

³⁷ Aden chuisho bēdamboen tantienquiocquin abēd icquidon: —ĵMitsimbo budpec, icbo? —capanēdash.

Adoquien: —Unēsaid yacno edeste bud-budec. Adquiecbidi Nuquin Papan chiaid tantiesa abi bunaiduidtsēqui tantiaquid yacno abi cuidtequid budendac —quepanēdash Esus abēd icquido caic.

18

Cadonequidquo chido chiaid

¹ Adashic, Ēbēd icquido chieshenquo yec Nuquin Papa chiec onquian-onquianquidquo ma icpanu quec aido tantiamenu quec Esus nadpanēdash:

² —Shubu dadpen yacno icsambocquid cuidte chuiquid icposh. Aidi Nuquin Papan chiaidbēdta utsibo tantiesa icposh.

³ Adnubien uano tabadquid niantē chido icposh. Aidi icsambocquid cuidte chuiquid yacno nidshun: ‘Ēbi icsamboen naquid ma cuidnu chuiquiota,’ quequin chuiquid. Aden chiaiqui padenquicocho isash choded-chodedquin adomboenuidi chuided-chuidedposh.

⁴ “Aden chuidoniaqui abi icsambocquin naquid cuidte chienquiochoedēmbi chido ěnēdenquo yec

⁵ choded-chodedquin adomboembidi chuiasho tantiasun: ‘Nuquin Papabēdta matses tantiesa nebi, quequimbi niantē ěnēdenquo yec chodednesho isun uimabudmane queshun abi icsamboen naquid cuidte chuiquiono,’ queshun cuidte chuiquidēn chuiquioposh.

⁶ Aden chiashic Esus: —Choded-chodedquin chidon chuiasho tantias: “Mibi icsamboen naquid cuidte chuinu,” queposh icsambocquid cuidte chuiquid.

⁷ ĵAdomboembidi ambi cuēnaidon, Ēbi chieshēnquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ĵNēbimbobida cuidpeba?

⁸ Abitedi padenquioctsiash. Utsi nēbimbobi cuidenquiocquin choshon cuidendac. Badedquo cuidenquicocho isash choquin ĵtedectsisimbimbi ěbi tantiaquin caimbudnequido istuidpendac? —quepanēdash Esus.

Padiseyobo abentsēc icnuc ancanquidēn utsin na bedtequid bedmianiaid chiaid

⁹ Adashic, bēdamocquid nebi, quiash utsitedi icsambo iquec, quequido tantiamenuen adquidēn tantiaid icsa chuiquin Esusēn nadopanēdash:

¹⁰ —Nuquin Papa tabadte shubu uashunaid yacno Nuquin Papa chiec onquenuc nidnuequid daēd icposh. Abentsēc padiseyobo icnubi ancanquidēn utsin na bedmianiaid utsi icposh.

¹¹ Nuquin Papa tabadte shubu uashunaid yacno abi daēdi choash puduedash uano nidtuidshun padiseyobon ambi tantiacpaden naden Nuquin Papa chuiquid: Bēdamocquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choboed, ancanquidēn utsin na bedtequid bedmianiaidpadquidpenquo nebi, Papa.

¹² Adembidi, chonoadtemaid ushë yambi chonoadtemaid ushë utsi choabicnuc daëdec ushquin mibi tantiaquin buna mëmundenembi. Adembidi, uno bedanquin dies yacno cuëscquin con na tambanshun 9ted dayun uaquin abentsëc mibi menedenembi, Papa, quequin padiseyobon chuiposh.

¹³ “Aden padiseyobon uanoshon chuinubien ancanquidën utsin na bedtequid bedmiani-aid puduedash nitudidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquio yec abi onquec: ‘Icsambocquid nabanquid nebique. Èbi tantiaquin pauc, Papa,’ queposh —quepanëdash Esus.

¹⁴ Aden chiashic: —Chuinu. Tantia. Ancanquidën utsin na bedtequid bedmiani-aid Nuquin Papan bëdamboen isaidquio icnubien padiseyobo ambi icsamboen isaidquio icposh. Icsaisa yacimboec, Bëdamboquid nebi, quequid yuecshun Nuquin Papan aidën icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bëdamboen naid Nuquin Papan ismequin chuiioaindac —quepanëdash Esus.

Bacuëbo Esus yacno bë-bëaid

(Mat 19.13-14; Mad 10.13-16)

¹⁵ Adshumbic, aton bacuëbo Esus mishmenuequin utsin-utsinquin bë-bësho isun: —Bacuëbo bë-bëenda. Esusën nabanaid utsi iqueque. Nidanec nid —capanëdash Esusbëd icquidon.

¹⁶ Aden chuisho tantiaash Esus nadpanëdash: —Bacuëbo nidmenquiocquin con dayunquio cho-chome. Chiac, Abimbo caic, quequin tantiaquidquio bacuëbo nec.

¹⁷ Adomboembidi, Nuquin Papa yacno tabadte iquec, quequin chiac bacuëbon badedquio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanëdash Esus.

Nëbi caniquid chuiquidën chiaid

(Mat 19.16-30; Mad 10.17-31)

¹⁸ Adshumbic, nëbi chuiquid caniquidën: —Nuquin Papa yacno nidnuequin çatotsimbi nape? Bëdamboen tantiaquidquio icquin ëbi chui. Tantanu —capanëdash Esus chuiquin.

¹⁹ Adoaquien: —çMitsipaden tantiec bëdamboquid nec, quepe mibi? Nuquin Papauidsëqui bëdamboquid nec.

²⁰ Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin nabanta,” quequin chiampid mimbi tantiapec —capanëdash Esusën nëbi chuiquid caniquid chuiquin.

²¹ Adoaquien: —Canidotsëcquimbi aden nadeniondambi —quepanëdash nëbi caniquid.

²² Aden chuisho tantiaash: —Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota —quepanëdash Esus.

²³ Aden Esusën chuisho tantiaash aton na dadpen tantiec ünësquio yanshun Esusën chiapaden natiapimbo icpanëdash.

²⁴ Adsho isun: —Aton na dadpen tantiaquin Nuquin Papan badedquio tantiatipimbo adquidën iquec. Nuquin Papa tantienquio yec abi yacno puduedtiapimboquid iquendac.

²⁵ Adquiecbidi shëcuë pistsëcquid puduedte nidaidën capuquid dapan badedquio tantiatipimbo iquec. Tantiamic puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquio tantiatipimbo icoaic. Aden aid tantiatipimboquid ambibi tantiacpadequi puduedte bunec —quepanëdash Esus.

²⁶ Aden chuisho tantiaash iccuededquido nadpanëdash: —çTsutsi Nuquin Papa yacno puduedquid icpec? —quepanëdash Esus caic.

²⁷ Adoaquien: —Matses ambibi tantiacpadeq puduedtiapimboquid Nuquin Papambien abi yacno yuedanquid matses tantiamendac —quepanëdash Esus.

²⁸ Adoaquien Petedo: —Mibëd icnu, quequin ëbëd icquidbëditan con natedi nianondambi, icbo —quepanëdash Esus caic.

²⁹ Adoaquien: —Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho

³⁰ ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdambohë icmiaid mibi iquendac —quepanëdash Esus Petedo chiec.

Èbi unës uaindac, quequin Esusën chiaid

(Mat 20.17-19; Mad 10.32-34)

³¹ Adashic, abëd icquido uano buanash: —Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquin ëbi nabanendac.

³² Anoshon bedshun buanshun isadaidbon isadaidpembro ëbi menendac. Aden meniac bedshun ëbi mamëshumbedequimbi, icsamboen chuibededquimbi, dacuishtuabededquimbi, dacuesbededtsëcquien mëyanshun ëbi cuesten dectanquin unës uaindac.

³³ Adoaqui daëdec ushtanec uincuenendabi —quepanëdash Esus abëd icquido chiec.

³⁴ Aden abi unëste Esusën chuisho abëd icquidon bëdamboen tantienquo yec tabadpanëdash.

Bëshuaid bëdamiaid

(Mat 20.29-34; Mad 10.46-52)

³⁵ Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Matses cuensho tantiash: “Mitsana bedtequid bec cho,” quepanëdash bëshuaid.

³⁶ Adec tsadquimbi matses dadpen cuen-cuensho tantiashun: —¿Atotsi quec cuen-cuene? —capanëdash.

³⁷ Adoaquien choquid abentsëc: —Nasaded yacnoësh choquid Esus cuenec nec —quepanëdash.

³⁸ Adsho tantiashun bëshuaidën: —Dabid, tsusedpan mado mibi icquin ëbi tantiaquin nata —capanëdash Esus cuënquin.

³⁹ Adshobien: —Adec cuëdenquo yec tsad —capanëdash choquidon.

Adoaquien bëdiactsëc cuëmboedëmbi comapenquien: —Tsusedpa Dabidën mado mibi icquin ëbi tantiaquin nashunta —caopanëdash bëshuaidën.

⁴⁰ Adoac nidtuidshun Esusën: —Aidi bec cho —cac abi yacno bësho isun:

⁴¹ —¿Atotsimbi mibi nashumpeba? —capanëdash Esusën bëshuaid chuiquin.

Adoaquien: —Bëshuaid nebique. Èbi bëucshune, Icho —capanëdash.

⁴² Adoaquien: —Mimbi tantiapadomboen padpidemboen is —cac

⁴³ badedquo isbenshun bëshuacboedën Esus tsibanquimbi Nuquin Papan naid chuibanquin isbanec onquec nidpanëdash. Aid bëdasho isun Esusbëd nidanequidotedishuntsen Nuquin Papan naid chuibededpanëdash.

19

Saqueyo, ancanquidën utsin na bedtequid bedmianiaid dapa

¹ Adec nidequi Edico caid yacno datambidanec Esus nidpanëdash.

² Edico yacnocquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash.

³ Adoaid icquimbi utsi, Esus cuenec, qesho tantiash, ¿Mitsipadquidquo Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuuctsëcquid icquin Esus Saqueyon isenquo icpanëdash.

⁴ Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

⁵ Adec tsadnubien aid podquedënquo choec nidtuidshun Saqueyo bushcuuctsëcquid istuidshun Esusën: —Nëbi mibi yacno nuquibi tabadec nidnu. Baded bud —cac

⁶ Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

⁷ Adec puduedsho isash Esus tsibananquido: —Icsaquidën shubun Esus puduedosh —quecuedpanëdash.

⁸ Adnubien, aton shubu nuntanuësh nidtoash Saqueyo: —Chuinu. Tantia, Icho. Nëbi con na mais uaquin aton na nibëdquid menenun nabono. Adoshombic, con matses: “Con na mimbi ampioc,” qesho tantiashun ëmbi ampiaidbëdta daëd-daëdquiecnuc daëd uaquin menebanembi —quepanëdash Esus chiec.

⁹ Adoaquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquec.

¹⁰ Icsambocquid Saqueyo icbocpadquid nibënquin istuidshun nësecanushe qeshun mënchicnuec chopobi —quepanëdash Esus Saqueyobëd icquido caic.

Aton na bedtequid 10ted icquid meniaid

¹¹ Aden Esusën chuisho tantiashun Edusaden yacno choash chuiquid dapa Esus yantsiash, quequin utsibon icsamboen tantiapanëdash.

¹² Aden tantianubi tantiaquidquico icquin utsi chiacimboen aido tantiamenuen Esusën nadopanëdash: —Chuiquid dapan mado: ‘Ënden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi.’

¹³ qeshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidan ëmbi meneboed bëdamboen nabanquin daëd uata ma choshon dadpen bedoapanuna,’ quianec chuiquid ictiadquiocquid abi chuiquid dapa yacno nidposh.

¹⁴ “Adec aid nidambic abi yacnocquidon abi chieshënquido nadposh: ‘Aidi ëbitedi chuiquid icmenushe qeshun chuiquid dapa yacno chuitanta,’ qeshun abëd icquido chuimenuen chuiquid dapa yacno nidmeposh.

¹⁵ “Adoaqui, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid ¿tedtsi daëd uapashba? abibi qeshun ambi meneboedo chomeposh.

¹⁶ “Adoac bëyuc choquid: ‘Mitsana bedtequid abentsëc icboedi utsi 10ted icnuc daëd uaombi, icbo,’ queposh.

¹⁷ “Adoaquien: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

¹⁸ “Adnubien utsi: ‘Mitsana bedtequid abentsëc icboedi utsi Sted daëd uapombi,’ queposh.

¹⁹ “Adoaquien: ‘Mimbi daëd uaidtedquiobi shubu dadpen icquid 5ted uano-uanoecquido chuiquid icta,’ caposh abi chuiquidën.

²⁰ “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo.

²¹ Mitsana bedtequid mimbi tantiaactedimbo daëd uatiapimbo ictsiabi, qeshun dayun uaombi. Utsin na utsin nitsinaidbidi bedbanquid mibi icsho isash chushcanushe quíash dacuëdec tsadteniobi,’ queposh.

²² “Adoaquien: ‘Ëmbi chiaid niacquid mibi neyoc. Mimbi mua uaquin chiaidtedimbochsho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chieç quecta icco?’

²³ ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquico icco? Aden meniac daëd uashun bedtsenombi,’ queposh abi chuiquid.

²⁴ “Aden aton na daëd uaisa chuishumbic iccuededquido chuiquin: ‘Ëbi chieshënquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

²⁵ “Adoaquien: ‘Aton na dadpen iqueque. Aid menenda, chuiquid,’ queposh iccuededquido.

²⁶ “Adoaquien: ‘Chuinu. Tantia. Ëmbi chiacpaden nabanquin daëd uacsho isun ëmbi meneboed daëd uaquin menembi. Ëmbi chiacpaden chieshquin daëd uainquiocsho isun ëmbi meneboed bedshunembi.

²⁷ Adembidi ëbi chieshëneç abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën —quepanëdash Esus.

Chuiquid dapabimboec yec Edusaden yacno Esus choaid

(Mat 21.1-11; Mad 11.1-11; Uan 12.12-19)

²⁸ Aden chuibanashic Esus Edusaden yacmi nidequi anoentsëqui choash nidtuidpanëdash.

²⁹ Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adec nidtuidash abëd icquid daëd caic:

³⁰ —Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac. Aid istuidshun tënëshaid tëchicshun nëmbo bëta.

³¹ Aden chicsho isash: “¿Atotsi canun mimbi aid chicpe?” quepec. Adsho tantiaishun: “Con Icho bunaid nec,” quequin chuita —quepanëdash Esus.

³² Adoac nidshun istuidtanquin

³³ cabayobitsecquidëmpi tënëshaid tëchicsho isash: —¿Atotsi canuen aid tëchique? —capanëdash ichon.

³⁴ Adoaquien: —Con Icho bunaid nec —qeshun Esus yacno nimbanquin abi tënëshaidën buampanëdash Esusbëd icquidon.

³⁵ Aden bëshun, Chuiquid dapa Esus nepanui, quec onqeshun Esusbëd icquidon aton dashcute bëntsecquid chictanquin cabayobitsecquid capucshun Esus catsadumpanëdash.

³⁶ Aden Esus catsadunash nidnubien iccuededquidontsen aton dashcute bëntsecquid chictanquin podqued ansambanec nidanepanëdash. Chuiquid dapa Esus nepanui, qeshun aidontsen adopanëdash.

³⁷ Adec nidanec macuësh Odibos caid budtuidequi iccuededquidtedimbo bëdambo iquec comapenen Nuquin Papan nadatiambocquin naid ambi isboed naden chiec comapenec onquecuededpanëdash:

³⁸ —Nuquin Papan chomiaid ambi chuiquid dapa icmiaid ambi bëdambo icmiaidquiobidi nec. Nuquin Papa yacno abëdi bëdamboec tabadequi icsaisatedi iquendac —quepanëdash iccuededquido comapenec cuëdcuededec.

³⁹ Adec cuëdcuededsho tantiaishun padiseyobon: —Adec onquenda, quequin mibëd icquido chuita —capanëdash Esus chuiquin.

⁴⁰ Adoquien: —Ëmbi naid chiec aitedi cuëdcuededenquiocnoc cuënote podqued cuëman samëdquido onquianendac —quepanëdash Esus padiseyobo chiec.

⁴¹ Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash:

⁴² —Ëbi bëdambo icmequid Esus nec, quec nëbi ëbi tantiaquid mibi ictsandac. Tantiesa icquin mibi chuiquid mimbi nibënacpadquid mimbi istuidtiapimbo iquendac.

⁴³ Yucash choquin uimanëmëquidon mibi cuentiapimboconoc tsicatabudcuendac.

⁴⁴ Aden mibi tsicatabudcuenshun min bacuëbobëdtabi naimbudquin mibi unës uashun nendac. Min shubutedi nibëdquendac. Nuquin Papan chomiaid ëbi tantiesa icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unësquio icnuc anocquido chiachimboec adpanëdash.

Nuquin Papa tabadte shubu uashunaid yacnoshon cuemiaid

⁴⁵ Adashic, Edusaden yacno choash Nuquin Papa tabadte shubu uashunaidën puduedshun nuntanshunquio aton na bedtequid bednun menebanquido Esusën cuemepanëdash.

⁴⁶ Cuemec: —Nuquin Papan chuiampid nad iqueque. Tantia: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuiampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aitedi cuemec.

⁴⁷ Adoshombic, badiadquidën-badiadquidënquieq Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanëdash.

⁴⁸ Aden caimbededquimbi Esusën chiaid tantianu quec dadpen Esus datsidadacsho isun ashunquio isadaidbon Esus cuesunemenuen bedtiapimbo icpanëdash.

20

¿Tsundan chuibanta caid mibi ne?

(*Mat 21.23-27; Mad 11.27-33*)

¹ Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash.

² Cho-choshon: —¿Tsundan chuibanta caid mibi neque? Tantianu. Èbitedi chui —capanëdash.

³ Adoquien: —Ëmbia tantianu. Èbi chui.

⁴ ¿Nuquin Papan ëmbi chiaid chuibanshun mentobanta caidta Uan icpondash? Padenquio mibi quenuc, ¿Matsesën nata caidta nepondash, quequina mimbi tantie? —quepanëdash Esus isadaidbo tsusiobo caic.

⁵ Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, èbitedi qesho tantiaish Esus nadpendac. ¿Atotsieshun Uanën chuisho mibitedishun tantienquio icponda?

⁶ Matsesën nata caid Uan pado niondash, èbitedi qesho tantiaishun iccuededquidon cuënoten nuquidedi se-sependac. Nuquin Papan chuimiaid, Uan icpondash, quequin iccuededquidon tantiec —quepanëdash isadaidbo tsusiobo.

⁷ Adec onquecuededash: —¿Tsuntsin nata caid Uan pado icpondash? quequin tantiambo iccombi —quepanëdash tsusiobo.

⁸ Adoquien: —Mimbi chienquio yacpadembi ëmbitsen ëbi chuita caquid mibi chienquio icoaimbi —quepanëdash Esus.

*Neshcashunquidon icsambocquin naid**(Mat 21.33-44; Mad 12.1-11)*

⁹ Aden isadaidbo tsusiobo chuishumbic, Utsi chuinu, quiacimboen Esusën nadopanêdash: –Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic:

¹⁰ Tiedën caniquid ënden bacuëpash. Ëbi neshcashunquidën musucaid con na bedmenu, qeshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoposh.

¹¹ Adoshombic, icbon aton tied yacno ambi namiaid utsi nidmeoposh. Aid chosho isun ademidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoposh.

¹² Adoshombic, ambi namiaid utsitsen icbon nidmeoposh. Aidi chosho isun chiuë-chiuëpambocno cuestanquin tied tsitsuno icbo neshcashunquidon aidi netamposh.

¹³ “Netamboedi nidoanec icbo yacno choacsho isash: ‘¿Mitsipadentsimbi napeba? Con madombobi ëbi cudasaid con tied yacno nidmembali. Aidi con tied yacno chosho bédamboen ispec,’ quequin aton mado nidmeposh.

¹⁴ “Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna.

¹⁵ Aden cuesunian icbo unësan aton natedi nuquin na ictsandac,’ quecuededshun tied tsitsuno icbon mado buanshun icbo neshcashunquidon cuesuneposh –quequin chiaشح Esus:

“ ‘Min mado cuesuniosh,’ quequin utsin chiac ¿atotsi tied icbon napec?

¹⁶ Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac –quepanêdash Esus.

Adsho tantiash: –Adoenquo icpashun –quepanêdash iccuededquido.

¹⁷ Adoaquien iccuededquido bëisequi Esus nadpanêdash: –¿Nuquin Papan dada uamidaidën naden chienquoda icpampic? Ai, aidën chuiampid nad iquec: “Shubu uanuequidën isuidaid buintad utsin ambia nitsinaid icposh.”

¹⁸ Buintad sec uebudec podquëd-podquëndendac. Adembidi buintad uebudquin matses tish-tishendac. Adembidi, abi yacno puduedmianquid tantiauidquid Nuquin Papan cuëshëdmiac comapenen cuidte yacno tabadendac –quepanêdash Esus.

¹⁹ Aden Esusën chuisho tantiash: –Nuqui naid chiacimboen chiec Esus niosh –quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanêdash.

*Sesadën shocoshëmpi neque. Mene, quequin chiaid**(Mat 21.45-46; 22.15-22; Mad 12.12-17)*

²⁰ Adec Esus bedte bunquin isadaidbo tsusiobon ambi Esus ista caido Esus yacno nidmepanêdash. Ambi ista caido, Bédambocquid nebi, quequin ismiacimboecquid icsho Esusën chuibanacno tsusiobon nidmepanêdash. Esus yacno nidshun ëmbi ista caidon chuimiac Esusën icsamboen chuishiash. Aden chuisho isadaidpembo ancaquidën Esus bedpashun, quequin tantiaquin nidmepanêdash.

²¹ Aden nidmiac choash Esus ista caid abentsëc: –Mimbi tantiamequin chuibanaid bédambo iquec, quequin tantiembi, Abitedi Nuquin Papan chiaid abimbo chuibanquid mibi nec.

²² Adquid mibi icquin ëbi chui. Tantianu. ¿Ancanquid Sesad cuëmëdquid isadaidpembo icquin ambi piucquid shocoshëmpi bec cho caid isadaidbon menetiadquidida nepec? –quepanêdash isadaidbo tsusiobon ista caid Esus caic.

²³ Aden chuisho tantiashun choeboedën icsamboen tantiaid tantiaquin Esusën nadopanêdash:

²⁴ –Piuquid shocoshëmpi ancanquidën bec cho caid sananquin abuc cadota –cac sananquin abuc cadosho isash: –¿Tsuinsin podo bitsi dada uaid aidën icpec? –quepanêdash Esus.

²⁵ Adoaquien: –Ancanquid Sesadën na nec –quepanêdash tsusiobon ista quequin chomiaid.

Adoaquien: –Ancanquid, Bec cho, qesho meneta. Nuquin Papan naden nata cac adobanta –capanêdash Esusën.

²⁶ Aden chiac, Bédamboen tantiaquidimboec onquec, quequin tantiaquin icsamboen chuimetiapimbo yec tsusiobon chomiaid otacquo tabadcuëdedpanêdash.

*Uincuen uaid chido bedesa nec, quequin chiaid**(Mat 22.23-33; Mad 12.18-27)*²⁷ Adashic, saduseyobo caido yec²⁸ unësaid uincuen uate nibëdec quequin chuiquido Esus yacno chopanëdash. Aido choash: —Unësaidën chido bedshun aidën tishmiaid unësaidën bacuëbobimboecquid iquendac, quequin Moisesën dada uapampic.²⁹ Aden Moisesën dada uaid icnuc dada 7ted iccuededposh. Aidedted dada icnuc bëyuc tishaidën aton chido bedshun bacuë tishmiabi yec unësposh.³⁰ Aton buchi unësan aidën chido bedash adecbidi bacuë tishmiabi yec unësoaposh aton utsi.³¹ Adembidi, bëyuc tishaid tsibanquidën-tsibanquidënquien chido abentsëqui bedto-bedtoec bacuë tishmiabi yec unësbuneposh.³² Yuecash chidotsen unësoaposh.³³ Adec chido abentsëcshun bënë dadpen icboedi uincuen uate ushë icnuc çmitsicquid chidon bënë icpeque? Èbi chui. Tiantianu —quepanëdash saduseyobo Esus caic.³⁴ Adoquien: —Nidaidënshun dadan aton chido bedec. Adecbidi, Min bënëbëd nidta, quequin aton papan chiac aton champi aton bënëbëd nidec.³⁵ Uincuen uate ushë choan Nuquin Papan bëdamboen isaido abëdi tabadquin chido bedenquo iquendac. Adembidi, aton champi menenquo aton papan iquendac.³⁶ Adecbidi, Nuquin Papan uaido mayan bëdabo unësesa yacpadquiequi Nuquin Papan uincuen uatequid unësenquo iquendac. Nuquin Papan uincuen uatequido aton bacuëbo nendac.³⁷ Adembidi chuinu. Tantia. Cuëtampi nëdënquiacbimboecquid isun Moisesën dada uapampid nec. Cuëte nëdënquiacbimboecsho isun Nuquin Papa chuiquin nadopampic: “Tsusedpa Abadauanën papa cain cuënaid mibi nec. Adecbidi tsusedpa Isaquën papa cain cuënaid mibi neoaic. Adecbidi tsusedpa Acobon papa cain cuënaid mibi nec,” quequin Moisesën chuipampic.³⁸ Moisesën tsusedpabo ambi chuiboed ënden unësampidën nami chodquaidën papa cain Nuquin Papa cuëntiapimbo iquec. Aton nami chodquiash abi tantiaquidquio icquïn tantiec tsadquidën papa cain Nuquin Papa cuëneg —quepanëdash Esus saduseyobo chiec.³⁹ Aden Esusën chuisho tantiash Nuquin Papan naden nata quequin chiaid tantiamequid padiseyobo utsi-utsiec nadpanëdash: —Bëdamboen mimbi chuibanoc —quepanëdash Esus chiec.⁴⁰ Aden Esusën chuisho tantiashun Esus chuimetiapimbo utsibo icpanëdash.*çTsuntsin mado Quidistu nepec? quiaid**(Mat 22.41-46; Mad 12.35-37)*⁴¹ Aden utsibon abi icsamboen chuimetiapimbo icsho isun Esusën nadopanëdash: —Èbi abia yampid icsho çmitsipadentsi tantiaquin tsusedpa, Dabidën mado Quidistu caid nec, quequin matsesën chuipec?⁴² Dabidën ambibi Sadmo caid dada uaquin naden chuipampic:

“Icho utsi yec con mado mibi chiembique. Tantia, quequin chiec icho dapa nadpampic:

‘Èquë con dayun abiucquio cainec tsadec cho

⁴³ ma mibi chieshënquidtedi mimbi namiaid ma icpanu.’”

quequin Nuquin Papan Esus chiaid Moisesën dada uapampid nec.

⁴⁴ Aden Dabid padon dada uaquin çmitsipadomboentsibi con icho cashumbi con mado ëbi caoapampic Dabidën? —quepanëdash Esus abi chieshënquido caic.*Naden nata quequin chiaid tantiamequidpadquid iquenda, quequin chiaid**(Mat 23.1-36; Mad 12.38-40; Duc 11.37-54)*⁴⁵ Aden chuishun iccuededquidon tantianubi abëd icquido Esusën nadopanëdash:⁴⁶ —Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadec dashcute ënapen icquid dasiuidcuededpec. Adomboembidi tantiec matses dadpen iccuededacno nidash capequi, Èbi bëquedquidon ëbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsadtenec. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsadtenec. Adquidpadquid iquenda.⁴⁷ Aidon bëdamboen nabanacimboen nianten natedi bedbanec. Aidombidi Nuquin Papa abimbo tantiacbimboec yuen chiec onquec. Aden bëdamboen nabanacimboecquido

Nuquin Papan compapenen cuidendac. Adoesa bëdiactsëc cuidendac –quepanëdash Esus abëd icquido chiec.

21

*Nianten piucquid shocoshëmpi meniaid
(Mad 12.41-44)*

¹ Adashic, Nuquin Papa tabadte shubu uashunaid yacno tabadtuidash tsadquin Esusën isbanpanëdash. Ambi isaïdo Nuquin Papa tabadte shubu nacnemete cuidnu, quequin menequin aid shubun shocosh tabëcaidën aton na bedtequid utsin-utsiniquien sandobed-edpanëdash. Aton na bedtequid dadpen icquidon dadpen sandobededsho isquimbi

² nianten aton na nibëdquidëmbi aton na bedtequid shocosh daëd ictsëcquid sandosho ispanëdash.

³⁻⁴ Adosho isash: –Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niantë isec. Utsibon aton na dadpen abi icnubi dadpen menesho, Daëdpactsëc menequido nec, quequin Nuquin Papan aïdo isoaic –quepanëdash Esus.

*Abitedi naimbudte ushë choec quequin chuite
(Mat 24.1-35, 42-44; Mad 13.1-37)*

⁵ Adashic, Nuquin Papa tabadte shubu uashunaidbëdtabi matsesën dectanaid didiquesho isec: –Nuquin Papa tabadte shubu bëdaïdquio iquec –quepanëdash utsibo.

⁶ Adoaquien: –Mimbi nëbi isaïd yuecash nidbëdquidendac. Matses utsibon nëid shubutedi chic-chicbudendac –quepanëdash Esus.

⁷ Adoaquien: –¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismiantë icpeque? Tiantianu. Chui –quepanëdash utsibo.

⁸ Adoaquien: –Cho-choshon muaquin chuïsho tantienquiocta. Adquid cho-choash: “Nuquin Papan Chomiaïd Quidistu nebique. Èbëd iquec cho,” queded-quededendac. Aden chuiquid tsibanenda.

⁹ Adecbidi: “Cuesnancuededec,” qesho tantiaish dacuëdenda. Nuquin Papan chiampic-padequi cuesnancuededteba iquendac. Aid icnubi abitedi naimbudte ushë badedquio choenquio iquendac –quepanëdash Esus.

¹⁰ Aden chiequi abi onquebudec: –Adecbidi, abi ancaquid dapan nidmiac nidaïd utsin icquidobëd cuesnancuededendac.

¹¹ Adecbidi, nidaïd utsi-utsiec yacno canchednuec ishucud-ishcudendac. Adecbidi, utsi-utsiec yacno bunquïote iquendac. Adecbidi, utsi-utsiec yacno daicsabudnete iquendac. Adecbidi, mibi dacuëdmetequid iquendac. Adecbidi, mimbi isacmaid abucuësh natiambo icsho mimbi isbededendac.

¹² “Aïdtedi choabicnuc ëbi tantiaquid utsi-utsien bedshun mëyanendac. Adobanshumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsien ancanquid yacno buanac

¹³ aidotsen tantiaquid yantsiash qeshun ëbi chuïbanta.

¹⁴ Aden buanaqui, ¿atotsimbi ancanquid cape? quequin tantiec tsadenda.

¹⁵ Nuquin Papan Mayanën tantiamiacpadomboen mimbi chuïbanendac. Adoac, Icsambocquid mibi nec, quetiapimbo mibi chieshënquido iquendac.

¹⁶ Adembidi, Nuquin Papan chiaïd tantiesan min shubun icquidën mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsiash. Animbi aton mado adembidi adotsiash. Utsi aton buchimbi adoatsiash. Utsi aton chuchumbi adoatsiash. Utsin abëdtan isedquidëmbi adoatsiash.

¹⁷ Èbi tantiaquid chieshënquid dadpen iquendac.

¹⁸⁻¹⁹ Aden nabanquin mibi cuesunemenu, cac chieshenquio yec, Esus tantiaquid nebi, quequid icta. Adquid iquec unëshash ënëdenquio yec Nuquin Papabëd mibi tabadendac.

²⁰ “Adecbidi shubu dadpen icquid Edusaden caïd yacno cuesanquid dadpen cho-choshon tsicatabudsho isash, Edusaden yacno naimbudte ushë choec, quequin mimbi tantëndac.

²¹ Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquio cuempanuna. Adecbidi, dëuequido Edusaden yacno ma nidenquiocpanuna.

²² Aid ushë icnuc Nuquin Papan chiacpadomboen cuidtequid iquendac.

²³ Aid ushë chonoc matses utsibon Edusaden yacno tsicatabudac pete naimbudnuc bacuë usunquidobëd bacuë chishmequido mëyadec natiaquidendac. Edusaden yacnocquido abi tantiesabo icsho Nuquin Papan natiambocquin cuidte iquendac.

²⁴ Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpambo Edusaden yacno tsiccateboedo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

²⁵ “Adec Nuquin Papa, Chën, quian badiadën ushë, inchëshën ushë uispa chedo aitedi ambi nadatiambocquin naid ismiantequid iquendac. Aid ismiantë icsho isash, Uinsad-pambo iquec, quec comapenec dacuëdec matsestedi tabadcuededendac. Acte natiambo chëuëdsho isash adquiecbidi comapenec dacuëdec matsestedi tabadcuededoaindac.

²⁶ Adecbidi, uispa utsi-utsiec paëdted-paëdtednubi utsi-utsiec tididiquendac. Adsho isash matses dacuëdec padishendac.

²⁷ Adnubini Nuquin Papan chomiaid matsesaid ëbi dasiuidaid bëchomauanquiec ushë chënquiacimboec uëshëmbo yec nadatiambocquin nabanquidquio abu ushun ëbi budsho matsestedishun isbedendac.

²⁸ Natiambocquin naid tauadoacsho isun, Nuquin Papa yacno ëbi yuedte ushë chote anoentsëqui yanec, quequin bëdambocquin abuc isteneta —quepanëdash Esus.

²⁹ Aden chuishumbic ambi chuiboeed ushë chote tantiamenuen nadopanëdash:

³⁰—Cuëtempi bacuëacsho isash, Ënden suc seccuduquiac nëbi seta taëec, quequin matsesën tantiec.

³¹ Adembidi ëmbi chuiboeed icsho isun, Nuquin Papabëd tabadte ushë choec, quequin mimbi tantiec.

³² Abimbo chiembique. Tantia. Ëmbi chuibamboed naimbudabicnuc con tan matses isadaidbo naimëdbudenquio iquendac.

³³ Abubëdta naimbudtequid nidaid nendac. Ëmbi chiaid abimbo iquendac.

³⁴⁻³⁵ “Adembidi chuinu. Tantiata. Nidaidën capuquidën, Nëbi ëbi sec, quequin tantienquio yec capusho badedquio siac cuentiapimbo iquec. Adembidi, Natiante ushë choec, quequin tantienquio yec chëshquinq badiadquidën-badiadquidënquien paëmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushë choendac. ¿Matsestedi cuidte ushë choenda ictic? Ai, aid ushë choendac, quequin caim-budec bëdamboec tabadta.

³⁶ Ënenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquio ëbi icme, Papa. Adembidi natiambocquin cuidte ushë chonoshe qeshun ëbi mënchicta, Papa. Aid ushë chonoc ëbi bedshun mimbi chomiac matsesaidën dayun tsadquidquio ëbi icmeta, Papa, quec onquedeneta —capanëdash Esusën.

³⁷ Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash. Adecbidi inchëshquidën-inchëshquidënquiec macuësh Odibos caid yacno nidash tabadtenepanëdash.

³⁸ Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

22

Esus bedmenu, quequidquio Udas

(*Mat 26.1-5, 14-16; Mad 14.1-2, 10-11; Uan 11.45-53*)

¹ Adashic, nami uabicquid pete tantiate ushë, Pascuas caid, anoentsëqui yampanëdash.

² Aid ushë choabicnuc isadaidbo tsusiobobëd Nuquin Papan naden nata quequin chiaid utsibo tantiamequido iccuedttenequin, ¿Mitsipadën Esus bedshun cuesuneque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquinq Esus bedenquio icpanëdash.

³ Adnubien Udas cashumbic Iscadiote caid Esusbëd icquid dapuduedshun Satanasën tantiamiac

⁴ Esus chieshëquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshëquid utsibo iquec quianec aido yacno Udas choash, Esus bedmete bunebi, quequin chuipañdash.

⁵ Aden chiac isadaidbo tsusiobo bëdambo iquebi quetanquin: —Esus bedmiacsho mibi piucquid menenu —capanëdash Udas chuiquin.

⁶ Adoquien: —Adonuna —quianec Esus yacno nidoash abëd capuquimbi Esus tantiec datsidquido nibëdacnoshon abi chieshëquido, isadaidbo tsusiobo, Esus bedmimbi, quequin isted-istedpanëdash Udasën.

Ënquin nidaidëshun Esusën pebanaid

(*Mat 26.17-29; Mad 14.12-25; Uan 13.21-30; 1Cod 11.23-26*)

⁷ Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe qeshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash.

⁸ Aid ushë chonoc Uambëdta Petedo chuiquin: —Matante ushë tantianuequin obeca bacuë cuesuniaid penun nacnenta —capanëdash Esusën.

⁹ Adoaquien: —¿Mitsishumbimbi aid nacnempe? —quepanëdash Uambëd Petedo.

¹⁰ Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananc shubun aid puduedacno nidshun

¹¹ shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita.

¹² Aden chiac abuc dectatoshon abuc quënëcquid mibi aidëmbi ismendac. Ashunquo penun nacnenta —capanëdash Esusën.

¹³ Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempanëdash.

¹⁴ Adashic, inchëshën choash abëd icquidobëd pete sante cueste dayun uequi Esus:

¹⁵ —Ëbi mëyante yanabicnuc bëyuc tishaid cuesunianquidën cuesunenquiocquin matanampid tantiaquin pec mibëdi tabadtiadquo yanobi.

¹⁶ Matanampid tantiaquin obeca cuesuneshun nuqui pebocpadomboen mibëdtambi nidaidëshun padpiden penquo iquendambi. Matses icsaquid icsho cuidnushe qeshun obecaded cuesuniaidpadquiocquid yanshun Nuquin Papa yacno choash tabadquidobëdtambi ashunquo pendambi —quepanëdash Esus.

¹⁷ Adoshombic dëshote sananc Nuquin Papa chiec onqeshun actanquin abëd icquido menec: —Në, aniactse-aniactsen acban mibitedishun.

¹⁸ Tiedën caniquid ënë nidaidëshun padpiden aquenquo iquendambi. Nuquin Papa yacno choash tabadquidobëdtambi ashunquo aquendambi —quepanëdash Esus.

¹⁹ Adoshombic, pete bedshun Nuquin Papa chiec onqeshun cuësh-cuështanquin menebanquin: —Mibi icsaid bedshunacsho ëbided cuidquin mëyanquin cuesuniaid tantiaquin pebeded —capanëdash Esusën.

²⁰ Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, qeshun obecaded cuesunemenuen isadaidbon menedeniac. Aden cuesuniaidën intac siquec unëso isun, Obeca cuesuneboed ëbi icsaquid icsho cuidnushe qeshun cuidtequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshunash Esusded cuidadac, quequin tantiatequidquo nendac.

²¹ Ëbi chieshënquido ëbi bedmenuequin chuiquid pete sante dayun ëbëdi uec.

²² Nuquin Papan chiampicpaden ëbi matsesacsho unës uaid iquendac. Ëbi chieshënquido bedmenuequin chuiquid comapenen cuidte iquendac —quepanëdash Esus.

²³ Aden Esusën chuisho tantiaash abëd icquido: —¿Midacquidien capec? —quecuededpanëdash.

²⁴ Adashic: —Doseted nuqui iquec. ¿Tsudain chuiquid icpec? quequin utsibon ispec —quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëishash comapenec chushcanampanëdash.

²⁵ Adec chushcanansho tantiaash Esus nadpanëdash: —Isadaidpembo ancaquidën comapenen aton matses namebanquin daëdpactsëc menebanec. Aden meneshun, Ëmbi namiaido bëdamo icmequid nebi, quequin muaquin chiec.

²⁶ Mibitedi adquid iquenda. Nadquidquo icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta.

²⁷ Abi pemequid abi nashunquid nec. Adembididi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi.

²⁸ Ëbi chieshënquido icnuc ëbi nianesa

²⁹ icsho con Pan ëbi chuiquid icmiacpadquid chuiquid mibitedi icmendambi.

³⁰ Aden chuiquid icmiac ëbëd icquin ëbëdtambi peshun aquec mibitedi tabadendac. Chuiquid icquin abuc tsadte icquidën tsadquin isadaidbon naid bëdabëdta ambi naid icsa cuidte ëbëdtambi mimbi chuibanendac —quepanëdash Esus abëd icquido caic.

*Esus ëmbi isacmaid nec, quequin Petedon chiaid
(Mat 26.31-35; Mad 14.27-31; Uan 13.36-38)*

³¹ Aden chuishumbic Esusën nadopanëdash: —Mibi chuinu. Bëdamboen tantia, Simon. Mibitedi Satanasën yuatiadquo iquec. Aden yuanuequin piacho macuesquin nainshun bitsi secacimboen mëyantanquin ëbëd icboedi mibi cuëshëdmetiadquo iquec.

³² Aden mibi Satanasën yuatiadquoio iquec, quequin tantiaquin Nuquin Papa naden chiombi. Simon ëbëd icquidquoio iqueque. Yuadnushe qeshun Satanasën niacniacmete chiaid Petedo tantienquoio icmeta, Papa, quequin chiombi. Adec ëbëd ichoedi cuëshëdtsembosh choashun comapenen ëbi tantiaquin ëbëd icquid utsibo adomboembidi comapenen ëbi tantiameta, Simon –capanëdash Esusën Petedo chuiquin.

³³ Adoquien: –Mibi caic, Quënën naudednu, quenuc mibëdi naudedabi. Adecbidi mibi caic, Unës uanu, quenuc adecbidi mibëdi unës uadebi, Icho –quepanëdash Petedo Esus caic.

³⁴ Adoquien: –Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi queded-quededendac –quepanëdash Esus.

Buanenda, queboedëmbi, Buanta, quequin chiaid

³⁵ Aden Petedo chuishumbic abëd icquidtedi chuiquin: –Mitsana bedtequid buanenquoio yec shictoade buanenquoio yec dashcute utsi buanenquoio yec quec nidaneta, ëmbi cac nidash çmibitedi bunecta tabado? –capanëdash Esusën.

Adoquien: –Padenquoio –quepanëdash abëd icquido.

³⁶ Adoquien: –Ënden adquid buanenda, queboedi, Ëbi nibëdnuc mitsana bedtequid shictoadebëdtabi buanta. Chëshete bednu, qeshun mitsana bedtequid nibëdnuc min dashcute abentsëc menequin chëshete bedshun adembidi buanta, caimbi nëbi.

³⁷ Nuquin Papan ëbi chuiquin dada uamiampid nad iqueque. Tantia. Chuinu: “Ic-sambocquidbëdta unës uaindac,” quepampic. Aden Nuquin Papan ëbi chuiquin dada uamiampicpadomboembi nëbimbobi naimbudembi –quepanëdash Esus.

³⁸ Adoquien Esusën chuiboed tantienquoio yec abëd icquido: –Në, chëshete daëd iqueque. Is, Icho –quepanëdash.

Aden abëd icquidon tantienquiocsho isash: –Ai, padi –quepanëdash Esus.

Macuësh Odibos caid yacnoshon Esusën Nuquin Papa chiaid

(Mat 26.36-46; Mad 14.32-42)

³⁹ Adashic, Edusaden caid yacnoësh macuësh Odibos caid yacno abi nidteniacpadën nidnuc abëd icquidon tsibanampanëdash.

⁴⁰ Adec nidequi abi tabadteniagno choshon Esusën: –Chieshëmënkuidën ëbi namete bunacpaden natiapimbocquid ëbi icme, Papa, quequin Nuquin Papa chuideneta –capanëdash abëd icquido chuiquin.

⁴¹ Aden chiashic abiuidsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash:

⁴² –Mëyanquin mibi unës uanu, ëbi chieshënquidon casho tantiash bunenquoio yec, Adoenda, quepatsiac mibi Papa. Adoshombic mibi bunacpadomboen nameta, Papa –capanëdash Esusën Nuquin Papa chuiquin.

⁴³ Aden Esusën baded-badedquien chuishobi Nuquin Papan uaid mayan bëda choshon Esus chieshtomenquoio icpanëdash.

⁴⁴ Aden uidën uaqi adec uëshquec Nuquin Papa chuiquiequi ichachëd intacash nidaidën siquepanëdash.

⁴⁵ Aden Nuquin Papa chiashic nidtoash abëd icquido yacno choaquimbi ambi chuisho tantiaboed tantiec uimabudash ushec uesho istuidshun:

⁴⁶ –çAtotsi quiash ushe? Nidtosshon ëbi chieshënquidën nametiadquoio yacpaden natiapimbocquid ëbi icmeta, Papa, quequin adenuidi Nuquin Papa chuideneta –capanëdash Esusën abëd icquido chuiquin.

Esus bedaid

(Mat 26.47-56; Mad 14.43-50; Uan 18.2-11)

⁴⁷ Adec Esus onquenubien Esusbëd ichoedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoccanuesho isash:

⁴⁸ –çËbi matsesaid icsho bedmenuen tanchoccaquinda ëbi chieshënquido isme, Udas? –quepanëdash Esus.

⁴⁹ Aden Udasën nac Esus bednuesho isash Esusbëd icquido: –çCho-choquido nuquida cuesten cuespe? –quec

⁵⁰ onquetanquin abentsëcshun isadaidbo tsusio dapan yuan pabiate opioc pateshunepanëdash.

⁵¹ Adosho isash: –Padi. Chën. Adoenda –quetanquin Esusën tsusio –dapan yuan pabiate patiacno mishquin bédamepanëdash.

⁵² Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: –çMatses cuëshëdmequid nec, qeshunda utsin-utsinquin chëshete sananubi utsin-utsinquin cueste sananec cho-chopec?

⁵³ Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquio mimbi icpoc. Mimbi ëbi bedte ushë nëidquio bi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac – quepanëdash Esus.

Ëmbi isacmaid nec, Petedo quiaid

(Mat 26.57-58, 69-75; Mad 14.53-54, 66-72; Uan 18.12-18, 25-27)

⁵⁴ Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash.

⁵⁵ Adec choec umanuc cuëte dëtsiadaoid cuëc utsibo tabadacno Petedo cuëte cuëc tsadpanëdash.

⁵⁶ Ambo Petedo tsadsho isash tsusion yuaid chido anoentsëqui choshon bëdamboen isec: –Nëid bëboedbëd icboedi nec –quepanëdash.

⁵⁷ Adoaquien: –Bëboed ëmbi isacmaidquio nec –quepanëdash Petedo.

⁵⁸ Adashic, yuecpectsëcshun Petedo isec utsitsen: –Ma mibi bëboedbëd icquid neyoc – quepanëdash.

Adoaquien: –Aidbëd iquenquio iccobi –quepanëdash Petedo.

⁵⁹ Adashic yuec-yuecpectsëc ictanec utsitsen: –Nëid Cadidia yacnoshon tishaid iquec. Ma bëboedbëd icquidi neyoc –queoapanëdash.

⁶⁰ Adoaquien: –Mimbi chiaidbëd icquidpenquio nebi –quepanëdash Petedo. Aden chuinubien cachina bënë cuëdampanëdash.

⁶¹ Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantias

⁶² unësquio yec umanuc nidash Petedo shubiquiopanëdash.

Esus sondadon mamënsunaid

(Mat 26.67-68; Mad 14.65)

⁶³ Adshumbic Esus cuenushe qeshun abi isquidon, sondadon, Esus mamënsumbededquin cuesbededpanëdash.

⁶⁴ Adoshombic, dashcute cuëshaidën bëpucshun cuestanquin Esus sondadon nadopanëdash: –Mibi tantiaquidquio icquin ðmidaquidën mibi nëbi cueseque. Tiantianu. Chui –capanëdash Esus chuiquin.

⁶⁵ Aden cuesbededquin Esus icsamboen chuipanëdash.

Isadaidbo tsusiobo yacno Esus buanaid

(Mat 26.59-66; Mad 14.55-64; Uan 18.19-24)

⁶⁶ Adshumbic badiadnubi isadaidbo tsusiobo iccuededacno Esus buanshun

⁶⁷ nënantanquio nidtomesho isash: –Nuquin Papan chomiaid, Quidistu caid, nebi, quecta ique? Tiantianu. Chui –quepanëdash isadaidbo tsusiobo Esus caic.

Adoaquien: –Ëmbi abimbo chuisho mibitedishun tantienquio iquendac.

⁶⁸ Adembidi, ðMitsipadquidquio Nuquin Papan chomiaid neque? Tiantianu. Ëbi chui, cac ëcbedenquio mimbi iquendac.

⁶⁹ Nad iqueque. Chuinu. Tantia. Matsesash nidaidën tabadboedi ambi nadatiambocquin naidënquio Nuquin Papan dayunquio tsadendabi –quepanëdash Esus isadaidbo tsusiobo tantiamequin chiec.

⁷⁰ Adoaquien: –ðNuquin Papan madombobi nebi, quequinda chio? –quepanëdash isadaidbo tsusiobo Esus caic.

Adoaquien: –“Esus Nuquin Papan madombobi nec,” quequin abimbo chuiquid mibi nec –quepanëdash Esus isadaidbo tsusiobo caic.

⁷¹ Adoaquien: –Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantiasun, Esus icsaosh, quequin chuitiadquiocquin chuita, cainquio iquembu utsibo chuiquin. Adquid iquec, quequin nuqui tantiec –quepanëdash isadaidbo tsusiobo.

23

Pidato yacno Esus buanaid

(Mat 27.1-2, 11-14; Mad 15.1-5; Uan 18.28-38)

¹ Aden ambibi chiec Esus muc nec, isadaidbo tsusio abentsëc qesho tantias isadaidbo tsusiobotedi nidtoshon Esus bedshun Pidato yacno buampanëdash.

² Aden Pidato yacno Esus bëec choash: –Esusën chuibansho tantias, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac

menenda quiosh. Aidbidi, isadaidbo chuiquid dapa nebi, quiosh –quepanëdash isadaidbo tsusiobo Pidato chiec.

³ Adoaquien Pidato: –¿Isadaidbo chuiquid dapada ne? –quepanëdash Esus caic.

Adoaquien: –Mimbi chiaidquio abimbo iquec –quepanëdash Esus.

⁴ Adsho tantiash: –¿Atotsi nashoembi cuidpe? Ambi icsamboen naid nibëdec –quepanëdash Pidato isadaidbo tsusiobo chiec.

⁵ Adoaquien: –Ambi tantiamiaidënquio Cadidia yacnocquido nëishmiac comapenec cuëdcuededosh. Anoshon tantiameshumbic Edusaden yacno choshon adomboembidi tantiaméaposh –quepanëdash isadaidbo tsusiobo Pidato caic.

Edodes yacno Esus buanaid

⁶ Aden chuisho tantiash: –¿Nidaid Cadidia yacnoësh choquidta Esus nec? –quepanëdash Pidato.

⁷ Adoaquien: –Ai. Cadidia yacnoësh choquid Esus nec –quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, qesho tantiashun.

⁸ Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquio nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec

⁹ Esus chuimenu quec Edodes onquepanëdash. Adoaqui Esusën ëcbedenquio icpanëdash.

¹⁰ Adnubien isadaidbo tsusiobo: –Esus icsambocquid nec –quepanëdash comapenec onquec Edodes chiec.

¹¹ Adoaq Edodesbëd sondado Esus icsamboen chuiquin mamënshumbededshumbi chuiquid dapan dashcutebimboecquid abichobicquid Esus dasiunshun Pidato yacno buameoapanëdash.

¹² Mimbi tantiacpaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoaq Edodesbëd Pidato bëdambo yampanëdash.

Esus cuesten dectameta quiaid

(*Mat 27.15-26; Mad 15.6-15; Uan 18.39-19.16*)

¹³ Adashic, isadaidbo tsusiobobëdta isadaidbo utsibo chomeshun

¹⁴ Esus ismetanquin Pidaton nadopanëdash: –Nëid dada bëash: “Cuëshëdmianquid nec,” quequin mimbi ëbi chioc. Adoaq aibbëdi onquiash, ¿Cuëshëdmianquidta nedic? quendabi.

¹⁵ Uan ëmbi tantiacpadomboen tantiaquin Edodesën ëbi yacno chomeoaposh. Esus unës uainquioctiadquidi nec.

¹⁶ Aden tantiaquin mëyanshun aidi nidmenuna –quepanëdash isadaidbo tsusiobo caic.

¹⁷ Aden chiac naden isadaidbon tantiapanëdash. Setan-setanquien icsambocquid con matses quënën naueaid adentsëc ambi nidmiacpaden nëbi adquid utsi Pidaton nidmet-siash, quequin tantiec isadaidbo nadec cuëdcuededquin:

¹⁸ –Nëid Esus caid unës uatiadquidi nec. Mimbi quënën nauednëdaid Badabas cuëmëdquid puduemeta –capanëdash comapenec cuëdcuededquin isadaidbon.

¹⁹ Ancanquid bunenquiocquin utsibo cuëdcuededmiondaid utsi cuesuniondaidbidi Badabas icsho quënën nauedmepanëdash.

²⁰ Adec isadaidbo cuëdcuededsho tantiash Esus nidmetiadquio iquec: –Esus cuidenquioc-tiadquidi nec –quepanëdash Pidato isadaidbo caic.

²¹ Adnubien: –Cuesten dectame –capanëdash isadaidbon yuec comapenec cuëdcuededquin.

²² Adec cuëdcuededsho tantiash: –¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tiantianu. Ma unës uainquioctiadquidi neyoc. Aden tantiaquin mëyameshun Esus nidmembali –quepanëdash Pidato.

²³ Adoaquien: –Cuesten dectame –quepanëdash cuëdcuededoaic isadaidbo Pidato, Ai, camenuc.

²⁴ Adoaq iccuedquidon chiacpaden namenuen

²⁵ Pidaton: –Utsi cuesuniondaid Badabas puduemeshun Esus cuesten dectameta –capanëdash Pidaton cuesten dectamënquido chuiquin.

Esus mëyanaid

(*Mat 27.32-44; Mad 15.21-32; Uan 19.17-27*)

²⁶ Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bëquedtuiddanquin Esus dectante cueste Simon buamiac Esus tsibambëpanëdash.

²⁷ Adec Esus nidsho isun matses dadpeshun shubiquin tsibanampanëdash. Adembidi abi tsibanquid chidobo icpanëdash.

²⁸ Adec chidobo abi tsibanec shubisho tantiash biadiashun isec Esus: —Ëbi tantiec shubienda, Edusaden yacnocquidon chidobo. Mibibi tantiadec min bacuëbobëdta tantiec shubicuedta.

²⁹ Yuecash mëyantequid ushë choendac. Aid ushë chonoc bacuë tishtiapimbocquid caic utsibo nadendac: “Bacuëbo nibëdquid icquin min bacuëbo natiasho isenquio mimbi iquec. Adquid yec bëdamboshë mibitedi iquec.”

³⁰ Mëyantequid ushë chonoc matses utsibon natiambocquid mëyanaqui naden mimbi Nuquin Papa chiendac:

“Natiavianquieque. Acte quiusudquid macuësh dapa catashmetabi, Papa, mibi quendac. Adecbidi, Acte quiusudquid macuësh masiametabi, Papa, utsi queoaindac.”

³¹ Ëbi buansho isec shubiequi, Ëbi mëyantequid ushë choec, quequin tantiesha mibi icpec. Nëdënquenquioctiadquidi achuëshquiocquid nëdëncasho isash: “¿Tanunquiocquid badedquid nëdënquenquio icpec,” quecta mibi icti? Adembidi: “Cuidenquioctiadquidi nec,” queboedëmbi ëbi icsaisa unës uasho isash: “¿Ëbitedi icsambocquid comapenen cuidenquio icpec,” queopecta mibi ique? Ai, quequin tantiatiad —quepanëdash Esus.

³² Adnubien Esusbëdta icsambocquid dada daëd nidmequimbi

³³ macuësh mapi canite caid yacno choshombi ëquë daëd dectambudcuentanquin nënantanquio Esus dectampanëdash.

³⁴ Dectanac diadequi Esus Nuquin Papa caic: —Ëbi unës uanuequidon tantienquiocquin unës uainquioctiadquidi cuesten dectanoshibique. Aidon icsamboen nambo yacimboc bëpiscudta, Papa —quepanëdash. Adnubic Esusën dashcute bednuequin sondadon dada uashun tëshun sandoshon cadotanequin dada uatempu puduemabanquin isquin Esusën dashcute bedbampandash.

³⁵ Adnubien matses dadpeshun isnubi Isadaidbo tsusiobo isec tabadquin mamëshshumbedec: —¿Utsi-utsien Nuquin Papa yacno yuedanquidta nec? Aidi matses mënchictequid Nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuedepanëdash.

³⁶ Adembidi sondadon mamëshshumbedequin paëmbocquid mucambocquid sananquin Esus ismequimbi:

³⁷ —Isadaidbo chuiquid dapa iquec unësenquio iquebi, quiash nëid bednush bud —capanëdash sondadon.

³⁸ Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

³⁹ Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac ëbi daëdi mibëd budebi —quepanëdash abëd diadquid.

⁴⁰ Adec Esusbëdta dectamboed abentsëc onquesho tantiash aibdëdta dectamboed utsi: —¿Aidi unës uatequid yacpadquid mibi yec, Nuquin Papan ëbi cuidendac, quec dacuëdënenquioda mimbi icpe?

⁴¹ Icsamboen nabanacsho cuidaid ëbi daëdi nec. Aidi bëdambocquin nabanquid icsho cuidenquioctiadquidi nec —quepanëdash.

⁴² Aden chiashic Esus caic: —Mibi yacno choash chuiquid dapa icquin ëbi bëdamboen tantiaquin nata —quepanëdash Esusbëdta dectamboed utsi.

⁴³ Adoquien: —Abimbo chuinu. Tantia. Nëid ushëmbi abuc ëbi bëdamboec tabadacno ëbëdi mibi iquendac —quepanëdash Esus abëdta dectamboed abentsëc chiec.

Esus unësaid

(Mat 27.45-56; Mad 15.33-41; Uan 19.28-30)

⁴⁴ Adec onquenubi ushë cuembo yanuc bëtinacimboc inchëshquio yashic ushë budtsan chëshquedoapanëdash.

⁴⁵ Inchëshquio icnubi Nuquin Papa tabadte shubu uashunaid yacno puduedtemaid quënëdashcute bitsipambocquid tsincabudquin dectanëdaid tembi daëdquio yec canchedbudcuempanëdash.

⁴⁶ Adnubien unësbudec comapenec cuëdec: —Mibi yacno ëbi yuedta, Papa —quiash Esus unësbudpanëdash.

⁴⁷ Adec Esus unëso isequi ambi isboedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bëdambocquid niosh. Aidi unësenquioctiadquidi unës uaposh —quepanëdash.

⁴⁸ Ambo tabadquin isquid utsibo Esus unëso isash unësquio yec aton shubuno nidanepanëdash.

⁴⁹ Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbededpanëdash.

Esus nauedaid

(*Mat 27.57-61; Mad 15.42, 47; Uan 19.38-42*)

⁵⁰ Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bëdambocquid icpanëdash.

⁵¹ Isadaidbo tsusio utsibo, Esus unës uatiadquidi nec, quenubi, Padi. Unës uanda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin cainquidquio icpanëdash.

⁵² Aidi Esus unëso isash Esusën dada nauedtiadquio yec Pidato yacno nidshun ambi tantiacpaden Osen chuipanëdash.

⁵³ Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaid chucanquio Esus Osen badedquio nauedpanëdash.

⁵⁴ Inchëshbudtsëqui seis yanuc chonoattemaid ushë nec, qeshun Esusën dada Osen nauedpanëdash.

⁵⁵ Adnubien: Nauednu, quequin Osen buansho isun Cadidia yacnoësh Esusbëd choboe-don chidobon tsibanshun shëcuën Esusën dada Osen nauedsho aidon isbededpanëdash.

⁵⁶ Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempanëdash. Nacnenash inchëshbudtsëqui seis icnuc Nuquin Papan chiacpadec chonoattemaid ushë nec, quiaish Esus nauedacno nidenquio yec tabadpanëdash. Nuquin Papan chiacpadec tabadpanëdash.

24

Esus uincuente

(*Mat 28.1-10; Mad 16.1-8; Uan 20.1-10*)

¹ Adashic, sabado inchëshbudtsëqui seis yanuc chonoattemaid ushë naimëdan badiadnuc danoshcanun ambi nacnemboed buanec Esus nauedbocno isec chidobo nidpanëdash.

² Ambo choshon Esus nauedshun bëtashaid cuënote shëcniacsho isashi

³ shëcuën puduedash aton Ico Esusën dada nibëdsho isec tabadpanëdash.

⁴ Adec tabadnubien dada daëd dashcute dasiuidacimboec dasiuidash chënquec chopanëdash.

⁵ Aid isash dacuëdcuededequi isenquio yec chidobo tabadpanëdash. Adsho isash dada daëd: —¿Atotsi canuen unësacsho nauedac uincuemiaid nibëne?

⁶ Nëmbo nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuisho tantienquioda icco?

⁷ Naden Esusën mibitedi chiondash: “Matsesaid ëbi icsho bedshun icsambocquid ëbi menendac. Aden meniac cuesten decnanac daëdec ushtanec uincuenoaiibi,” quequin Esusën chiondash —quepanëdash dada daëd chidobo caic.

⁸ Aden chiac chidobon Esusën chiaid abi bëpiscudaid padpiden tantiapanëdash.

⁹ Aden tantiaish Esus nauedaid shëcuë yacnoësh puduenanec Esus tantiaquid dadpen tabadacno choec puduedshun ambi isboedbëdtabi ambi tantiaboed chidobon chuibampanëdash.

¹⁰ Madia shubu dadpen icquid Mactada caid yacnoshon tishaid yec Uana yec Madia utsi Uambëdtan Acobon tita yec chido utsibo yec quec choshon Esusën Èbi chuibeneta caido chuipanëdash.

¹¹ Aden chuisho tantiaish: —Mimbi chiaid tantiatiapimbo iquebi —quecuededpanëdash iccuededquido.

¹² Adnubien Petedo nidtoanec titinquec nauedaid shëcuë yacno choash shuebudquin shëcuë anisquin dataniaid dashcuteuidi uesho ispanëdash. Aden isanec nidequi: —¿Atodain nechitec? —quepanëdash Petedo tantienquio yec.

Emaus yacmi nidte

(*Mad 16.12-13*)

¹³ Adashic abi ushëmbi Edusaden yacnoësh utsibobëd iccuededboed dada daëd shubu daëdpactsëc icquid Emaus caid yacno nidpanëdash.

¹⁴ Adec nidequi ambi Edusaden yacnoshon isboedbëdta ambi tantiaboed chiec on-quepanëdash.

¹⁵ Aden chiec onquec nidshobi Esusën aid daëdi chinunash aidobëd nidpanëdash.

¹⁶ Aden abi chinuntuidsho isac utsibimboec Esus isadpanëdash.

¹⁷ Adec nidequi Esus: —¿Atotsi chuibanec onquec nide? —quepanëdash. Adsho tantiash unësquio yec mamënenquio yec nidtuidpanëdash.

¹⁸ Adec nidtuidash Quëdeyopas cuëmëdquid: —¿Edusaden yacno tabadtuidquin anoshon naboed mimbiuidtsëqui tantiamboda icco? —quepanëdash Esus caic.

¹⁹ Adoaquien: —¿Atotsi naid chiec ne? —quepanëdash Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiaid icquin ambi chuibaniaid ambi nabanaidbidi Nuquin Papabëdta matses dadpeshun bëdamboen isaid icposh.

²⁰ Nuquin tsusio dapabobëdta nuqui chuiquid utsibon Esus bedshun: “Unës uata,” quequin isadaidpemo chuiquid meniäc cuesten dectanquin unës uaposh.

²¹ Nëbi chuiquid dapa isadaidpemo iquenquiocpashun, quequin Esus isadaidbo yec isadaidbo chuiquid dapa ictsiash quequin ëbitedishun tantiapombi. Ëmbi caboedi unës uaposh. Aidi unës uan daëdec ushobi.

²² Adec daëdec ushun dacuëdanquiecnuc chidobon naden chuibededposh: “Esusën dada nauedbocono badiadnuc nidshun isac

²³ nibëdosh. Ambobi icnubi Nuquin Papan uaido mayan bëdabo daëd icsho isac, ‘Mimbi nibënaid nibëdec. Uincuenac,’ quiosh,” quequin chidobon chuiquid.

²⁴ Aden chidobon chuisho tantiengquio yec ëbëd icquido Esusën dada nauedbocono nidshun chidobon chuibocpadembi unës uaboed nibëdsho isposh —quepanëdash ambi chinunaido Esus chiec.

²⁵ Adoaquien: —Ma bëdiactsëc tantiaquid mibi daëdi neyoc. Nuquin Papan ambi chiaid chuimiaidon dada uampid bëdiactsëc tantiatsec tantiesabidi ma mibi neyoc.

²⁶ ¿Bëdamboec tabadacno chuiquid dapa icnuec Esus mëyanaidba iquendactiosh? —quepanëdash Esus.

²⁷ Aden chuibanquin Moisesën dada uampidbëdtabi Nuquin Papan ambi yuecshun nanun chiaid chuimiaidon dada uampid tantiamequin Esusën chuibampanëdash.

²⁸ Aden chuibanec shubu daëdpactsëc icquid Emaus caid yacno anoentsëqui choshon datanshobimboecnuc Esus isun:

²⁹ —Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

³⁰ Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshun Esusën menëbampanëdash.

³¹ Aden nasho isun badedi, Esus nec, quequin tantianubi Esus nibëdqiuo yampanëdash.

³² Adsho isash: —¿Podquedën choquin Nuquin Papan chiaid dada uampid chuisho tantiash, Bëdambo yanobi, quenquiodabi ëbi daëdi ictio? —quepanëdash Esus yuedquido.

³³ Aden chuitanequi Emaus yacno choboed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi utsibo iccuededacno puduedacsho isash:

³⁴ —Abimbo iquec. Nuquin Icho uincuempaccosh. Uincuenanec choquin aidëmbi Simon ismetuidposh —quepanëdash iccuededquido.

³⁵ Aden iccuededquidon chuisho tantiashun Emaus yacnoësh choaboed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

Abëd icboedo yacno Esus chote

(Mat 28.16-20; Mad 16.14-18; Uan 20.19-23)

³⁶ Adec onquecuedednubi nënantanquio choshon Esusën: —Nuquin Papan bëdamboen isaido yec dacuëdenquio yec tabad —capanëdash.

³⁷ Adec aid chosho isash: Podo bitsi nec, quec dacuëdequi abëd icquido tabadpanëdash.

³⁸ Adsho isashien Esus: —¿Atotsi quiash, ¿Esusida nepec? mibitedi quepe?

³⁹ Con mëdantebëdta con taë is. Ëbibi nebique. ¿Mëtoccaid taëbëd chiuë nibëdecta ye? Mishec cho. Ëbi yacpadquid canitebëd nami icquid podobitsi nibëdec —quepanëdash Esus abëd icquido chiec.

⁴⁰ Aden chuitanquin abi bëchun shuin mëtoccaid chiuë aton mëdantebëdta aton taë Esusën ismepanëdash.

⁴¹ Aden ismiac, Aidquiobi nec, quenquio yec abëd icquido mamëncuededquin isec bëdambo yanec, Adec uincuentequidshenda dectampaccosh, quequin tantiec tabadpanëdash. Adec tabadsho isun: —¿Ada pete iquec? —Esusën caquien

⁴² nuëcquid shëaid cuëshë menepanëdash.

⁴³ Aden meniäc bedshun Esusën pepanëdash abëd icquidon isnubi.

⁴⁴ Aden piash: —Mibéd icquimbi naden chuiquimbi: “Nuquin Papan ëbi chuiquin ambi naden nata quequin Moises dada uamiampidbêdta ambi yuecshun nanun chiaid dada uamiampid naimbudtenendac,” quequin chuiabanombi —quepanêdash abéd icquido tantiamenuc.

⁴⁵ Aden chuishumbic abéd icquido tantiamequiquin:

⁴⁶ —Nuquin Papan dada uamiampid nad iquec: “Nuquin Papan chomiaid, Quidistu caid, matsesën mëyanquin unës uaqui daêdec ushash uincuenendac.

⁴⁷ Aid tantiashun mibi icsaid mimbi ênsho isash, Icsaquid nec, quenquo yec mibi icsaid Nuquin Papa bēpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoinadac.

⁴⁸ Mëyanquin unës uaqui ëbi uincuenacsho mibitedishun isproc.

⁴⁹ Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” —capanêdash Esusën.

Esus abuc indote

(Mad 16.19-20)

⁵⁰ Adashic, bëyucanec nidequi Betania yacno anoentsëqui choash nidtuidshun aton mëdante abuc sananquin ismec: —Nëidtedi bēdamboen ista, Papa —quepanêdash Esus.

⁵¹ Aden chiacsho abéd capucuenequido niamequin Esus aton Papan abuc indopanêdash.

⁵² Aden indosho isash, Èbitedishun icbo nec, quequin ismec shuebudash: —Bēdambo icquebi —quianec Edusaden yacno nidanepanêdash.

⁵³ Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquieic nidted-nidtedquin Nuquin Papan naid chuidenepanêdash. Padi. Aidedtada uaombi, Teyopido.

UANËN DADA UAID

Nuquin Papa tantiamanquid chiaid

¹ Èndenquimboshë matses uabi yec abitedimbo uabi yequi Nuquin Papabëd Esus icpampic. Nuquin Papapadquidquibidi yec: —Nadquio Nuquin Papa iquec —quec tantiamanquidquid nec.

² Aidëmbi Nuquin Papabëd icquin

³ abitedimbo uapampic. Abubëdta nidaid uashun aidën icquidtedi uapampic. Ambi uacmaid utsi nibëdec.

⁴ Aidquio Nuquin Papa yacno tabadmianquid nec. Nuquin Papapadquidquibidi yec: —Nadquio Nuquin Papa iquec —quequin paposhquiabcimboecnuc tantiamanquidbidi Esus nec.

⁵ Adembidi matses ambi icsamboen naid tantiamequid nec. Adquid icquin: —Con Pamboen bëdamboshë icquidquid nendac. Aidën chiaid niac-niaquec mibi icsamboec tabadec —quequin chuisho tantiatipimbo icquin matsesën Esus chieshëmpondash.

⁶ Aden Esusën chuibenabi icnuc con shënisio acten mentoanquidëmba Nuquin Papan chiapadomboen ambi chiaid chuibampondash.

⁷ —“Nuquin Papa yacnuësh abi tantiamequidquid choendac,” quequin Uanën chuiban-sho tantiasun ma dadpeshun ambi chuiboed tantianu —quequin Nuquin Papan con shënisio abi chuibanquid icmepanëdash.

⁸ Nuquin Papa yacnuësh choacmaidëmbi con shënisio: —Nuquin Papan chomiaid Esus nec —quequin chuibampondash.

⁹ Aden ambi chuiboedquid Nuquin Papa tantiamenuc matespanëdash Esus.

¹⁰ Adash matsesbëd tabadsho ambi matses uaidombi tantienquid icquin chieshëmpondash.

¹¹ Aden con matses isadaidbon Esus tantienquid iccondash. —Isadaidbo con matses nec —Nuquin Papa quenëdacpadquie: —Isadaidbo con matses nec —queoapondash Esus. Adsho ambi con matses caidonquibi dadpeshun Esus tantienquid icpondash.

¹² Utsibombien daëdpactsëcshun: —Nuquin Papan Madombo Esus nec —quequin tantiasun Nuquin Papan: —Con mado nec. Con champi nec —cabempanëdash.

¹³ —Con matsesuidien Nuquin Papan: “Con mado nec. Con champi nec,” capec —¿quequidta adopanëdash? Padenquid. —Nuquin Papan mado nebi —quequin ¿ambembi chuiquidta con mado capanëdash? Padenquid. Nuquin Papan Mayanën tantiamiacpadomboen aton Madombo Esus tantiasun dada con mado caquin chido con champi capanëdash. Adembidi Esus tantiasun adoendac.

¹⁴ Adec Nuquin Papa tantiamequidquid Esus matespanëdash. Nuquin Papan Mado abentsëqui yec bëdamboshë icpondash. Èbëd tabadquin nadatiambo icquin nabanquin matses bëdamboen nashumbampondash. Aden Nuquin Papambo tantiamepondash Esusën.

¹⁵ Aid con shënisio chuipondash. —Èmbi chuiboedquid nec. “Èbi icsaquid icnuc bëdamboshë icquidquid choec,” ëmbi caboedquid nec. “Èmbia Nuquin Papan chiaid chuibambon aidëntsen tsyuec choshon chuibanendac. Èbi bëyuc tishaidi tishabi icnubi aid ènden icpampic,” ëmbi caboedquibi Esus nec —quepondash con shënisio.

¹⁶ Con shënisio chiapadquidquid icquin abi tantiaquid Nuquin Papan bëdamboen isaido icmeshun adenuidi Nuquin Papa nuqui bëdamboen ismec.

¹⁷ Èndenquimboshë Nuquin Papan chiaid dada uaquin Moisesën Nuquin Papan matses icsaido cuidte tantiamepampic. Padnuen Esuquidistun Nuquin Papan bëdamboen iste tantiamequin: —Nadquid Nuquin Papa iquec —quequin matses bëdamboen tantiamepondash.

¹⁸ Ambi isacmaidquid icsho matsesën Nuquin Papa bëdamboen tantiatipimbo iquec. Padnuen aton Mado abentsëcshunquid aton dayun tsadquidënguibi matsesun Nuquin Papa bëdamboen tantiamepondash. Aidquid chuinu. Tanta.

Tsusiobon chuimiac Uan acten mentoanquidën chiaid

(Mat 3.11-12; Mad 1.7-8; Duc 3.15-17)

¹⁹ Con shënisio Nuquin Papa tantiabenuid acten mentobenequid niondash. Aden acten mentobenesho isash Moisesën chiampid namequid aid chuimenuc cho-chopondash. Edusaden yacnocquid isadaidbo tsusiobon: —Chuimetan —cac cho-choquin con shënisio chuituidpondash.

²⁰—¿Tsumtsin chiac nai? ¿Mimbembida nai? “Bèdamboshè icquidquo Nuquin Papan chome-ndac,” quequin nuquin tsusedpan ¿dada uapampidta ne? —caatuidpondash. Adoaquien: —Padenquo. Aidpenquo nebi —quepondash.

²¹ Adshobien: —¿Tsumints ne? ¿“Naden naindami,” quequin Nuquin Papan chiaid chuibanquidquo unèspampid Edias uincuenaidta ne? —caquien: —Padenquo. Aidpenquo nebi —queoapondash. Adshobien padpiden: ¿Tsumintsimbo ne? “Moisespadquidquo choendac,” ¿capampidta ne? —caquien: —Padenquo. Aidpenquo nebi —queoapondash con shènisio.

²² Adshobien padpidemboen: —¿Tsumintsimbo ne? ¿Mimbenquiobienda nao? Èbi: “Chuimetan,” caboed chiec nidnu. Baded èbi chui —caquien:

²³—Nuquin Papan tantiamicac nuquin tsusedpa Isayasèn naden chuipampid nebi. “Nuquin Papan bèdamboshè icquid chomiabi icnuc aid bèyuec utsiba choendac. Aidèn shubu nibèdacno capucuenequin chuibanendac naden.

‘Chuiquid dapambo choeque. Podquec andèdbanshunta,’ quiacimboen chuiquin: ‘Nuquin Icho choeque. Icsaid ènash bèdamboec tabadta,’ quequin chiendac bèyuc choshon,’ quequin chuipampid nebi —quepondash con shènisio.

²⁴ Adnubien con tsusedpabon chiampid namequidon padiseyobo caidontsen aton chuiquid dapan chiacpadomboen con shènisio chuituidpondash.

²⁵ —Tusibon: “¿Adquidta ne?” cac: “Adquidpenquo nebi,” queuidequi mibi iccoc. “¿Mitsipadquidquo icquin acten mentobano?” mibi caimbi —caquien:

²⁶—Nuquin Papan chiacpadomboen abi tantiabenquido acten mentobenec nebi. Èmbi aden bèdamboen nanuc utsimbien bèdamboenshè naindac. Aidi mibèdi tabadshobi ma mibi tantienquo icboc.

²⁷ Èmbia Nuquin Papan chiaid chuibanombi. Aidèntsen tsyuec choshon comapenen tantiaquin Nuquin Papan chiaidquo chuiquin Nuquin Papambo tantiamendac. “Aidi bèdamboshè icquid icnuc èbi icsaquid icsho ¿atotsieshun: ‘Aid choec,’ quequin chuiquidquo Nuquin Papan icmioso?” quec tsadebi —quepondash con shènisio padiseyobo chiec.

²⁸ Acte Odan caid uquè cuèmatsiucueh shubu dadpen icquid Betania caid yacnuèsh adpondash.

Abided cuidadtequid nendac, Esus caid

²⁹ Badiadshun padpiden con shènision matses acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquo obeca bacuèbimboecquid choeque. Aidi isadaidbon obeca bacuèdèd cuidquin unès uacimboec matses icsaid bedshunec abided cuidadec unèsendac.

³⁰ Èmbi chianeboedquo nec. “Èbi bèyuc tishaidi tishabi icnubi aidi ènden icpampic,” quiash: “Èbi bèdapabi icnuc bèdamboshè icquidquo choendac,” quepobi.

³¹ Aid chosho con matses isadaidbo tantiamenuen Nuquin Papan acten mentobenequid icmiondashi. Adondaidèmbi èmbibi badedquo tantienquo iccombi. “Nuquin Papan chomiaid nec,” quequin tantienquo iccombi —quepondash con shènisio.

Esus mentoaid

(Mat 3.16-17; Mad 1.9-11; Duc 3.21-22)

³² Adashic abi onquec: —Nuquin Papan naden ismiac tantiabenombi. Aton Mayan aton dada nibèdquiec dèbimbimboec budec: “Matsadtoendac,” quebocpadequi Esus matsadtosho ispombi.

³³ Adsho isash: “Adquidshenda caposh Nuquin Papan: ‘Acten mentoanquid icta,’ èbi caboedèn. ‘Con Mayan dèbimbimboec budec matsadtobedèn abi tantiaquidobèd con Mayan tabadmendac,’ Nuquin Papan caboedshenda nepec,” quiobi Esus caic. Èmbembi tantienquo ictsenombi.

³⁴ Aden ismiac: “Nuquin Papan Madombo Esus nec,” quequin tantiombi. Aden tantiashun: “Nuqui caimboed Nuquin Papan chomiaidquo Esus nec,” quequin mibi chiec nebi —quepondash con shènisio.

Nèid dada uaquid Uan Esusbèd yanaid

³⁵ Adashic badiadash ambi acten mentobambocono con shènisio nidoapondash. Aid tsibanequi nidoapondabi.

³⁶ Adec nidquin isquien Esus cuempec. Cuensho isashien con shènisio: —Is. “Nuquin Papan namiaidquo obeca bacuèbimboecquid nec,” èmbi caboed cueneque —quepondash.

³⁷ Adsho tantiatanequini con shènisioèd iccondaid utsibèd Esus chinunec nidpondac.

³⁸ Nidquin chinunac bidadquin istanequien: —¿Atotsi quec ne? —quepondash Esus. Adshobimbi: —Mibi isec nebi, Dabi. ¿Mitsimbo mibi ushaque? Isnu —capondambi. —Chuiquidquo nec —quequin con onquetembi Dabi caondambi.

³⁹ Adoac: —En isec cho —cac abi ushacno isec nidondabi. Ushë abucquo icnu puduedash yuec tabadec onquetaniash inchështsëcnubi chondabi.

⁴⁰ Èbëdtan Esus chinunoidaid Andedes niondash. Shubu dadpen icquid Betsaida caid yacnuësh caniquid niondash. Aton buchi Petedo niondash. Petedobidi Simon capondash.

⁴¹ Adnubien Andedes aton buchi chiec nidpondash. Adec nidquin Petedo istuidash: —Nuquin tsusedpabon chuiampid Nuquin Papa yacnuësh choquid Mesias caid istuidombique. En isec cho, buchi —capac caondash. Nuquin Papa yacnuësh choquid Quidistu cashumbic con onqueten Mesias caic.

⁴² Aden chiaquien aton buchi Esus isec chopondash. Chosho isash Esus: —Uanën mado mibi nec. Mibi Simon nec. “Nidaid moco utsi uatiapimbo yacbimboec mibi chieshtoenquo icquid yanendac,” quequin mibi nidaid moco cuënendambi —quepondash Esus Petedo caic. Con onqueten nidaid moco cain Sepas capondash Esusën. Quidieco matsesën onqueten Petedo capondash.

Esusën Uedipebëdta Natanaid istuidaid

⁴³ Badiadash: —Con nidaid Cadidia caid yacno nidnu —quianec nidpondash Esus. Adec nidquimbi Uedipe istuidpondash. Istuidshun: —Nuquibi icnu. Cho —caquien Uedipe chopondash.

⁴⁴ Betsaida yacnuësh caniquidbidi nepondash aid.

⁴⁵ Esushëd icquid yanashic dada utsitsen Natanaid caid chiec nidpondash Uedipe. Adec nidquin istuidshumbien: —Isec cho. Moisesën chiampicpadomboen chuiquin nuquin tsusedpabo utsibon: “Bëdamboshë icquid choendac,” quequin dada uapampicpadequi choshe. En isec cho. Shubu dadpen icquid Nasaded caid yacnuësh caniquid neque. Osen mado nec —quepac caondash.

⁴⁶ Adsho tantiasht: —¿Nasaded yacnuështa dada bëdambo icquid chopatsiash? Auëshquio dada bëdambo icquid chotiapimbo iquendac —quepac caondash Natanaid. Adsho tantiasht: —En isquiec cho —quepac caondash Uedipe.

⁴⁷ Adoac choshobien Esusën: —Is. Isadaidbombo neque. Muesambo nec —caquien

⁴⁸ Natanaidën: —¿Mitsipaden ëbi tantie? Mabi mimbi isacmaidquo nepayoc —capondash. Adoquien: —Uedipen bedtanabi icnubi mibi cuëte icueda caid tayun tsadsho tantiombi —capondash Esusën.

⁴⁹ Adsho tantiashtumbien: —Nuquin Papan Madombobien mibi nec. Comapenen tantiaquid yec nuquin matses isadaidbo chuiquid dapambo mibi nendac —capondash Natanaidën: —Istiapimbo yacno chiosh —quequin tantiashtun.

⁵⁰ Adoquien Esusën: —“Cuëte icueda caid tayun tsadsho mibi tantiombi,” ëbi quesho ¿tantiashta: “Nuquin Papan Madombobien nec,” badedduico que? Padpiden comapenen tantiaquin nabansho isun mimbi ëbi tantiaquiotsiandac.

⁵¹ Tantia. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bëdabo Nuquin Papa yacno dectatonesho isash: “Aidbëd tabadte Nuquin Papan ëbi tantiametiadquo iquec,” quequin tantiapampicpadomboen mimbi ëbi tantiendac. “Matsesun Nuquin Papan Madon matses abëd tabadte tantiamec,” quequin mimbi ëbi tantiendac —quepondash Esus abëd icquido chiec.

2

Esusën ambembi actequid uaid

¹ Aden Natanaid chiasht aton nidaid Cadidia caid yacnobi Esus tabadpondash. Ambo tabadec daëdec ushtsambi shubu dadpen icquid Cana caid yacnocquidën isadaidbon aton chido bedquin ismequin pemenuen aton shubuno matses dadpen cho-chomepondash. Adoac cho-chomiaidobëd Esusën tita puduedpondash.

² Esustsen puduedpondash.

³ Adec puduedash tabadquin uba chinaid actequid uesquin acbededpondash. Adsho isumbien anin Esus chuipondash. —Actequid naimëdoshe. Comapenen tantiaquid icquin mimbi tantiacpadomboen nata, mado —capondash.

⁴ Adoquien: —¿Atotsi quequin mimbi ëbi chuipe, tita? Chiata. Con Pan tantiacpadënquo naimbique —quepondash Esus.

⁵ Adsho tantiatanquin anin yuabo actequid cushtobanquido chuipondash. —Con madon chiacpadomboen nata —capondash.

⁶ Ambobi tëchu dapa 6tedi tabëcaid icpondash. Mëpamëdtembo acte nua 120 ditedos cactembi anidboedi acte naimëdaid icpondash.

⁷ Adnubien Esusèn: —Në tabadquidèn acte cushtoban —cac cubu-cubuctsëcquio icnuc acte cushtobampondash yuabon.

⁸ Cushtobanacsho isun Esusèn: —Ueshun buanshun mihi ancaquid acmetan —cac acmetampondash.

⁹ Adoac acquin tanauquin actequid bédamboshë icquid icpac caondash acte icboedi. —Nibëda damboedquio ¿mitsimbo bedpash? —quepac caondash yuabo ancaquid. Adsho tantiaquin yuabon: —Esusènquobien naccosh —quequin tantiapac caondash. Adnubien yuabo ancaquidèn chido bednuequid chuipondash: —Aidèn actequid bēpash —queshun.

¹⁰ —Nuquin matsesën actequid bédambo icquidba isedanquido acmequid nendac. Adquid acmiac matses nua cubudacsho isash: “Actequid icsactsëcquidtsen acmenu,” quequid yendac. Aden mimbi nambo. Bédambo icquidquio ma mimbi nëbi acmianeyoc —quepondash yuabo ancaquid chido bednuequid chiec. Adnubien yuabon actequid bédamboshë icquid abitedi acmebampondash.

¹¹ Aden comapenen tantiaquin icquin ambembi actequid uauquin Esusèn tauamboen ismebepompondash. —Nuquin Papa yacnuësh choquid yec comapenen tantiaquidquio nebi —quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquio. Adosho isun: —Con matsesën chiampid Nuquin Papan chomiaidien nec —quequin tantiaabenondambi.

Esusèn chushcaquin cuemiaid

(Mat 21.12-13; Mad 11.15-18; Duc 19.45-46)

¹² Aden ambembi actequid uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abèd icquido yec ëbi yec quec Esusbèd nidaniandabi. Ambo daëdpacksec ushec tabadondash.

¹³ Ambo ushcuidanec nidequid shubu dadpen icquid Edusaden yacnotsen Esus nidaniandash. —Nuquin matses tsusedpabo unès uainquio icquin Nuquin Papan matamiampid inchësh tantiaquin obeca bacuë pec nëbi tabadeque. Isec nidnu. Nid —quianec nidanepondash.

¹⁴ Nidashic Nuquin Papa tabadte shubu uashunaid dapa daquënë uaidèn puduedondash nuntanquio puduedabi. Puduedshun isquien matses dadpen nëish yua chedobèd tabadpec. Baca bënë yec obeca yec dëbimbimboecquid quënëmpin sauedaid yec quec tabadpondash. Aton yua menequin piucquid bednuec utsibo tabadnubi utsibo ambi tabëcaid dayun tabadpondash. Aido nidaid utsi yacnuësh choquido aton piucquid dadpen bedshun ampeshunquin daëdpacksëc mequido niondash.

¹⁵ Adec tabadsho istanquimbien Esusèn cueshcate badedquio nacentanquin cuesquin niacumpondash umanic abitedimbo. Aden umanic niacuntanquin tabëcaidtsen bidiacbanquin piucquid siabudshumbampondash.

¹⁶ Adotanquimbic dëbimbimboecquid yuaquidotsen chushcapondash. —Baded mitsana buanec nid. ¿Piucquid bednuec shubu uaidta nedic? Ma con Pa tantiate shubu neyoc —quequin chushcapondash.

¹⁷ Adsho isun naden tantiondambi. —Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquio nendac,” quequin Esusèn nate chuiquin dada uapampic —quequin tantiondambi.

¹⁸ Aden nicascho isumbien con matses chuiquidon: —¿Tsuentsin chiac nao? “Nuquin Papan chomiaid icquin naombi,” quequin comapenen tantiaquin nabanquin ëbi isme —caquien

¹⁹ ismenquio icquin ompoachimboen Esusèn chuipondash. Abibi cadequi: —Mimbi nëid shubu icsa uabocsho padpiden nacnenoaindambi bédambo icnuc. Daëdec ushqin nacnenquin nainendambi —quepondash Esus.

²⁰ Adsho tantiañ Nuquin Papa tabadte shubu uashunaid dapa ca danec: —¿Badedquioda nacnempatsia? Nëid nacnenquin seta dadpenquioshë 46tedquiobi matamiac cadenec —quepondash con matses chuiquido.

²¹⁻²² Yuecquio ictaneshun Esusèn aden chiaid tantiondambi. Unès uacsho chococac daëdec ushah Esus uincuenaccondash. Uincuenacsho isash: —Abibi cadecshenda Esus nepondash. Abibi cadec: “Daëdec ushqin nacnenquin nainendambi,” quecshenda nepondash. Aden chuiquinshenda con tsusedpabon dada uapampic —quequin tantiondambi.

Dadpeshun Esus tantiauidaid

²³ Nuquin Papa tabadte shubu uashunaid daquënë uacnoshon cuemeshumbic Edusaden yacnoshontsen comapenen tantiaquin nabanquin Esusèn ismepondash. Adsho isun matses dadpeshun: —Nuquin tsusedpabon chiampid Nuquin Papan chomiaidien Esus nechitec —queshun Esus bëdiactsëc tantiatsëccondash.

²⁴ Aden tantiatsëcsho ambembi tantiash: —Ai, ëbi tantiaquidquo nec —quenquo icquin: —Ëbi bëdiactsec —quequin tantiapanëdash.

²⁵ Utsin chiambobi ambembi tantianëdash. Aden matses abitedishun otacquo tantiaid ambembi tantiaquidquo Esus niondash.

3

Esusën Nicodemo caid chiaid

¹ Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobëdtan aton matses namequid niondash.

² Inchëshën Esusbëd onquenuc chopondash. Choshombic aidëmbi: —“Nuquin Papan icmiacpadquid chuiquidquo mibi nec,” quequin tantiembi. Mimbi comapenen tanti-aquin nabansho isun: “Nuquin Papan namiaidënuidtsëquien adotsiash,” mibi caombi —quepondash.

³ Adsho tantiashun: —Ai, adquid nebi —quenquo icquin Esusën ompoacbimboen chuipondash naden. —Tantia. Mibi bëdamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquo ictsiac

⁴ —quesho tantiashien: —¿Mitsipaden tsusiobi chuca uapatsiash? Chidon padpiden usundoshon tishtiapimboen iquec —quepondash Nicodemo.

⁵ Adsho tantiashun Esusën: —Nuquin Papan Mayanën tantiamiac: “Nuquin Papa tantiaquin ëbi icsaid ëntiadquo iquebi,” quiaish bëdamboec tabadquid Nuquin Papabëd tabadtequid nendac. Adquid chuca uaid caimbi. Chuca uabi icquid Nuquin Papa yacno tabadtiapimbo iquendac.

⁶ Chidon tishaiduidtsëqui yec Nuquin Papabëd tabadtiapimbo iquendac. Nuquin Papan Mayanën chuca uaid Nuquin Papabëd tabadendac.

⁷ “Chuca uaiduidtsëqui Nuquin Papabëd tabadendac,” ëbi quesho tantiash: “¿Midapaden chie?” quepequien mibi iquec.

⁸ Tantia. Mibi chuinu. Cunquequid isadenquo icquid nec. Isadenquo icquimbi cuncac cuëte ishucdsho isash: “Abi cunquec,” mibi quepec. Adquibidi isadenquo Nuquin Papan Mayan iquec. Isadenquo icquimbi aidën chuca uaid bëdamboec tabadsho isun: “Nuquin Papan Mayanën nac,” quequin mimbi tantiatsiac. “Nëid utsitsen natsiash,” quequin mimbi tantienquo icnubi Nuquin Papan tantiacpadomboen aton Mayanën utsitsen chuca uatsiandac —quepondash Esus.

⁹ Adsho tantiash: —¿Midapadec? —quepondash Nicodemo.

¹⁰ Adoaquien: —¿Tantienquioda ique? Ma isadaidbo Nuquin Papan chiaid chuibanquid mibi neyoc.

¹¹ Ënden ushë utsin mibi chedo chiombi. Ëmbi isondaidquo chuiquinc ëmbi tantiondaidquo chuiquinc caombi. Adsho tantiash: “Tantiadenquo iquec,” ma mibi quebec.

¹² ¿Ëmbi chuibod tantiadenquo icnubi padpiden chuiquin ëmbi Nuquin Papan abi yacnoshon naid chuishomenda tantiatsia?

¹³ Nuquin Papa yacno matses nidtanambo iquec. “Istanombi. Nadquo iquec,” quequin chuitiapimbo matses iquec. Ëmbien Nuquin Papa yacnuësh chondaidënquo: “Nadquo iquec,” quequin Nuquin Papa tantiamendac.

¹⁴ ¿Atotsi canuen nuquin tsusedpa Moisesën nisibimboecnuc shocosh nacnenaid dec-tampampic? “Nuquin Papan chiacpadec ma aid isec nisin piaid bëdanu,” quequin cuesten dectampampic. Adomboembidi matses cuidmenquo icnuec cuesten dectamëdendabi ëbided cuidadec unësec.

¹⁵ Ëbi tantiaquido unësacsho cuidenquo icquin Nuquin Papa yacno ëbëd tabadmenuec adendabi —quepondash Esus Nicodemo chiec.

Nuquin Papan matses abitedi tantiaquin naid

¹⁶ Aden Esusën abided cuidadec unëste chuipondash. Nuquin Papan: —Ma adec abided cuidadec unësnu —quequin Esus chomepanëdash. —Unësquo iquec —quequin matses abitedi tantiaquidquo icquin Nuquin Papan cudasenquo icquin matsesmeshun aton Mado abentsëcquiobi abided cuidpanëdash. —Ëmbi adoaid con Mado tantiaquid unësacsho icsaido cuidacno nidmenquo icquin ëbëdi tabadmendambi —quequin aton Madoded cuidpanëdash.

¹⁷ ¿Matses cuidnuenda Nuquin Papan Esus matsesmepanëdash? Padenquo. Matses cuidenquo icnuen napanëdash.

¹⁸ Aden aton Mado Esus tantiaquido cuidenquo icquin Esus tantiesabo cuidendac: —Con Mado chieshëmpec —queshun.

¹⁹ Nuquin Papan matsesmiadèn Esusèn abi icsaid chuisho matses icsambo icquidon tantiatiapimbo iquec. Ambi icsamboen naid èntiapimbo icquin Esus tantiatiapimbo iquec.

²⁰ Adquidon: —Èbi icsaid Esusèn utsibo tantiamenushe. “Icsambo iquec,” èbi canushe — qeshun Esus chieshèmpec.

²¹ Nuquin Papan chiacpadec tabadquidombien Esus chieshènenquoio iquec. —Nuquin Papan namiacpadec tabadquid nebique. Ma Esusèn èmbi bédamboen naid chuibampanuna —quiash Esus tantiate bumpec.

Uan acten mentoanquidèn Esus chuioaid

²² Adec Nicodemobèd onqueboshien Esus nidpondash. Edusaden yacnuèsh nidec aid nidaidèmbi Udeya caidèn capucueniondash. Abèd nidshobini Nuquin Papan chiaid Esusèn chuibampondash. Adec nidshun Nuquin Papa tantiabenquido acten mentobeniondambi.

²³ Adnubien adomboembidi con shènisiontsen acten mentobeniac caondash. Enon caid yacnoshon Sadin caid aonoetsèqui chunguen diadacnoshon matses dadpen acten mentoac caondash con shènision.

²⁴ Chieshèmènkuidon quènèn nauedabi adoac caondash.

²⁵ Adnubien con shènisiobèd icquido con matses utsibèd: —Mimbi icsamboen chiec —quec chushcananac caondash. Con shènisiobèd icquido: —Uanèn Nuquin Papa tantiabenquido bédamboen acten mentobamposh —quesho tantiash: —Padenquoio. Esusèmbien bédamboen acten mentobaniosh —quepac caondash.

²⁶ Adshumbien con shènisiobèd icquidon: —Nuqui chuiquid chiec nidnu. Nid —quianec nidquin con shènision chuituidpac caondash. —Acte Odan caid uquè cuèmatsiucshun ¿mitsicquid: “Nuquin Papan chomiaid nec,” mimbi cadio? Aidèn mimbi naid dèniacquin matses dadpenquoio acten mentobeniac caosh. ¿Ada bèda icpec? —caquien:

²⁷ —“Nuquin Papan chiacpadomboen Esusèn nash. Adomboembimbi naic,” qeshun Esus chieshèntiapimbo iquendabi.

²⁸ “Nuquin Papan chomiaidpenquieni nec,” quequin mibi chiondambi. “Nuquin Papan chomiac bédamboshè icquid choendac,’ quequin bèyuc choshon aid chiec nebi,” quiondabi mibi chiec.

²⁹ “Èmbi chuiboed nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiacbimboec cuishonquepobi. ¿Aden chido bedmequidèn: “Min bènèbèd nidenda,” caquinda ictiosh? Padenquoio. Bènèbèd nidmiash bédambo yacimboc Esusbèd nidanesho isash bédambo iquebi.

³⁰ Èmbibi Nuquin Papan chiacpadomboen Esus tantiaequin ènquin chuibanuc èmbi acten mentoaido daèdpactsèc yanendac. Èmbi chuiboedquoio Esus tantiaquidoen dadpenquoio yanendac. Aidquoio bédamboshè iquec —quepac caondash con shènision abèd icquido chiec.

Nuquin Papa yacnuèsh choquid chiaid

³¹ Adshumbic con shènision naden chuipac caondash. —Esusquoio bédamboshè iquec. Nuquin Papa yacnuèsh choquid abipadquid utsi nibèdec. Padnueni matses yec: “Nuquin Papa isondambi. Nadquoio iccondash” quequin chuitiapimbo iquebi. Esusèmbien

³² ambi isondaidbèdta ambi tantiondaidquoio chuipec. Aden chiaqui matses dadpen: “Abimbo caic,” quenquoio icpec.

³³ Esus tantiaquidon: “Nuquin Papa muesambo nec. Ambi: ‘Bédamboshè icquid choendac,’ quequin dada uamepampidquoio Esus nec,” capec.

³⁴ Nuquin Papan chomiaidquoio icquin Nuquin Papan chiaidquoio Esusèn chuibanec. Nuquin Papan aton Mayan abèd tabadmiaid icquin comapenen tantiaquin ismèbanquin chuibanec.

³⁵ Ambi tantiaidquoio icsho aton Papan abitedishun Icbombo icmiac.

³⁶ Adnuc: “Abitedishun Icbombo Esus nec,” quequin aton Mado tantiaquido unèsacsho Nuquin Papan abèdi tabadmendac padpidec unèsenquoio icnuc. Esus chieshènquidoen Nuquin Papa yacno isenquoio yec icsaido cuidquiacono nidendac —quequin con shènision chuipac caondash.

4

Acte uequid chido Esusèn chiaid

¹ Esusbèd icquin Nuquin Papa tantiabenquido acten mentobanondambi. Adnubien con matses chuiquido padiseyo caidon: —“Uan acten mentoanquidèn naid dèniacquin Esusèn matses dadpenquoio acten mentobanosh,” quiosh —qeshun Esus chieshèmpec caondash.

² Esusèn nainquoio icnuc èmbimbo nasho isun chiaqui aden Esus chieshènac caondash.

³—Mibi adosh —cac: —Con nidaidën nidnu —quianec nidondash Esus. Aid nidaid Udeya caid yacnuësh nidec aton nidaid Cadidia caid yacno nidondash.

⁴Aid podquedën nidequi nidaid utsi yacno Samadia caid yacno nidpondash.

⁵⁻⁶Adec nidquin ushë cuembo icnuc shubu dadpen icquid Sicad caid yacno istuidpondash. Aid anoentsëqui con tsusedpa Acobon tied uampid icpondash. Aid tied caic: —Ëbi unësan nêid tied: “Con na nec,” cata, mado —quequin aton mado Ose chiampid tied niondash. Ambo aidën uêdëshcampid acte uete icpondash. Aid dayunquiobi: —Tiboquenu —quec Esus tsadtuidpondash.

⁷⁻⁸Adec tsadtuidnubini: —Pete bedtanu —quianec shubuno nidanepondac. Esus abentsëqui nianec nidaniondabi. Adec nidan Samadia yacnocquid chido acte uec choquin Esus tsadsho istuidpaccondash. Choshobien Esusën: —Acte beccho. Acnu, champi —caquien:

⁹—“Acte beccho,” ¿caquindabi ique? Ma isadaidbo mibi nepayoc. ¿Isadaidbo icquindabi: “Acte beccho,” cai? capac caondash acte uequid chidon. —Samadia yacnocquidbêd onquesambo isadaidbo nec —quequin tantiec adac caondash.

¹⁰Adshobien Esusën badedquo cuembo chienquo icquin chuipac caondash. —Nuquin Papan bédamboen isquin naidbêdta ëbi tantiaquin: “Acte beccho,” mimbi ëbi catsiac. Adsho acte bédambo icmianquid mibi acrnetsiambi —quepac caondash Esus.

¹¹Adoaquien acte uequid chidon actembo ca danquin: —¿Mitsipaden acte ueshun ëbi menetsia? Ma min tēchu nibēdpayoc. ¿Midapaden mimbi uetiapimboen acte uquēducquid iquec? ¿Mitsimbo acte bédambo icmianquid ueshun ëbi acrnetsia?

¹²Nêid acte nuquin tsusedpa Acobon uêdëshcapampid nec. Aton yuabobēdan aton bacuēbon acpampid nec. Nuquin tsusedpa bédambo icquin nampid icnuc ¿mitsipadquidquo icquin nai? ¿Bêdamboshë icquid icquinda mimbi acte bédamboshë icquid ëbi acrnetsia? —capondash acte uequid chidon.

¹³Adoaquien: —Nêid acash mibi bundoaic.

¹⁴Ëmbi acmiac mibi bundoenquo ictsiac. Acte bédambo icmianquid acmiac ënēdenquo yec tabadquid mibi yantsiac —quepac caondash Esus badedi cuembo chienquo yec. —Ëbi tantiaquidobêd con Mayan tabadmiac bédambo yanec unēsacsho ëbēdi tabadmendambi —quequin tantiec adac caondash.

¹⁵Adsho tantiaquin padpiden acte ca danquin: —Adquidquo ëbi acme. Bundoenquo yec nēmo acte uec choenquo ictsiabique —caquien:

¹⁶—Min bēnē bedtan —capac caondash Esusën. —Nuquin Papan chomiaidquo yec comapenen tantiaquid mibi nec —camenuen adoac caondash.

¹⁷—Min bēnē bedtan —caquien acte uequid chido: —Con bēnē nibēdec —quepac caondash. Adshobien Esusën: —Abimbo mimbi caic. Min bēnē nibēdec.

¹⁸Dada mēdante auc abentsēctedquiobi min bēnē icpadenec. Aidon mibi niambudnian nēbi mibêd icquid min bēnēpenquo nec. Abimbo mimbi caic —quepac caondash Esus.

¹⁹Adsho tantiaquin: —Isambobi comapenen tantiaquidien mibi nechitec. Mibi-padquidquo chiec: “Nuquin Papan chomiaidquo nendac,” quepec con matses. Adquid icquin en ëbi chui. ¿Mitsishunquiemi Nuquin Papa bédamboen tantiape?

²⁰Con matses: “Nēmboen Nuquin Papa iquec. Nêid macuësh dapanshunuidtsëqui Nuquin Papa tantiac bédambo ictsiash,” quepec. Min matsesien: “Edusaden yacnoshonuidtsëqui Nuquin Papa tantiac bédambo ictsiash,” quepec —quepac caondash acte uequid chido.

²¹Adsho tantiaquin Esusën: —Tantia. Mibi bédamboen chuinu. Nēbi nêid macuësh dapanshunuidtsëqui Nuquin Papa tantienquo icquin Edusaden yacnoshonuidtsëqui tantienquo icquin nidaid utsi-utsiec yacnoshon adembidi Nuquin Papa tantiabedendac.

²²Min matsesën Nuquin Papan chiaid daêdpactsëc tantiatsëcshun Nuquin Papa bêdiactsëc tantiatsec. Con matses isadaidbombien Nuquin Papan chiaid dadpen tantiaquin: “Nuquin Papan chomiaid nuquin matses bédambo icmianquid nuquin matsesën tishendac,” quequin bédamboen tantiec.

²³Nēbien utsin-utsinquin muainquo icquin: “Con Icbo nec,” quequin Nuquin Papa tantiadendac. Ambi chiapadec bédamboec tabadsho isash: “Adquid ëbi tantiaquidquo nec,” quetsiash Nuquin Papa.

²⁴“Nuquin Papa tantiaquid ictiadquo iquebi,” quequidën Nuquin Papan Mayanën tantiamiacpadomboen abi tantiaquin ambi chiapadomboen naquid nendac —quepac caondash Esus acte uequid chido chiec.

²⁵Adsho tantiaquin chido: —“Nuquin Papan matses bédambo icmequid chuiquid dapa chomendac,” quequin chuisho tantiondambi. Aid mesias caidi utsibon quidistu caposh. Aidëmbi nuqui tantienquo yaidtedi tantiametsiash. Aidbimboecquidien mibi nechitec —caquien:

26 –Mimbi chiaidquiobini nec –quepac caondash Esus chido chiec.

Esus Samadia yacnocquido chiec tabadaid

27 Adnubini pete bedtanec chopondac. Adshun isquien chidobèd onquepec. Adsho isash: –¿Atotsi chiec chidobèd onquepec? –quepondabi utsibèd otacquio onquec. –¿Atotsi chiec chidobèd onquio? –cainquio iccondambi Esus.

28 Adec èbi chonobi tèchu nianec acte uec choquid chido nidpondash aton matses chiec shubuno nidec.

29 –Isec cho. Èmbi isacmaid dadan èmbi naid abitedi chioshi. ¿Nuquin Papa yacnuèsh choquid Quidistu caidta nioshe? En isec cho –catuidac:

30 –En isnu. Nid. Aidien nechitashe. Isnu –quianec matses dadpen cho-chopondash.

31 Aido choabi icnubi: –Nè pete, Icho –èmbi caquien:

32 –Padi. Mimbi tantienquio yaid con na utsi iquec –quepondash Esus petepenquio chiequi.

33 Adsho tantiashini pete ca danec: –¿Utsibonda pete bèshumpash? –quecuededpondac èbitedi.

34 Adsho tantiash Esus: –Èbi cuishoncamete utsi iquec. Èbi chomiondaid Nuquin Papan chiacpadomboen naic bèdambo iquebi pete piacimboec. Ambi chiaidtedi nainuec dayacquio iquebi –quepondash.

35 Adashic padpidec: –“Ushè daèd-daèdquiecnuc nidmeshun nadquid adosbiecquid èshèacsho bedembi,” quepec nuquin matses. Adosbiecquid èshèacpaden ¿yuecshunda nèmbi icquidon èbi tantiabempec? Padenquio. “Nèidon Esus tantiendac,” mimbi cacmaidobi chochoeque. Is.

36 Acte uequid chido èmbi chuibodèn chiac matses dadpen cho-choeque. Chuibanuna. Èbi tantiash Nuquin Papabèd tabadtequid yanendac. Adsho isash nuqui cuishonquendac piucquid bedashimboec.

37 Tied icbon: “Con na peta,” cac ambi nidtsinacmaid matsesèn bedec.

38 Aden ambi nitsinacmaid bedachimboen mimbi naic. Utsibomba Nuquin Papan chiaid chuibanèdaido nèmbi icquido mimbitsen chuibanec. Adoac nèmbi icquidon Nuquin Papabèda èbi tantiabenecc. Cho-choeque. Is. En chuiban –capondash Esusèn abèd icquido chuiquin.

39 Adnubien Esusbèd onqueboed chidon chuitanaido cho-chopondash. –“Comapenen tantiaquin èmbi naid abitedi chioshi,” quioshe. Nuquin Papa yacnuèsh choquidien nechitashe. Isnu. Nid –quianec cho-chopac caondash.

40 Cho-choquimbi badedi: –Èbi yacno ushquin chiec cho –quequin beduanac Samadia yacno tabadquin chuibampondash Esusèn. Aid matses chiec ambo daèdec ushpondash.

41 Aden Esusèn chuisho tantiashien: –Nuquin Papa yacnuèsh choquid Esus nec –quiampondash anocquido dadpen.

42 Adashic acte uequid chido chiec: –Mimbi chuishouidi tantiaboedèmbi nèmbi aidènquio chuisho bèdamboen tantiaquioc. “Nuquin Papa matses bèdamboen ismequid nec,” quequin tantiembi –quiampondash Samadia yacnocquido dadpen.

Chuiquid dapan mado Esusèn bèdamiaid

43 Daèdec ushanec Samadia yacnuèsh Esus nidondash. Abi caniondacno nidaid Cadidia caid yacno nidpondash.

44 –Èmbi chiapaden abi caniondacnoshon Nuquin Papan chiaid chuibanquidèn chuisho aton matsesèn tantienquio iquec. Con nidaidèn nidsho con matsesèn abi chuiquid dapa icmetiapimbo icpebi –quianec aton nidaidèn chopondash.

45 Adsho isun: –Tantiesha nendac –Esusèn caboedombi abi bèdiactsèc tantiatsèccondash. –¿Choecta icco? Nuquin Papan nuquin tsusedpabo unès uainquio icquin matamiampid inchèsh tantianuec Èdusaden yacno nidshun mimbi nadatiambo icquin nabansho ison-dambi –quepondash abi bèdiactsèc tantiatsècquido Esus chiec.

46 Adec aton nidaidèn nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caid yacno con matses chuiquid dapa icpac caondash. Aidèn mado unès-tiadtsècquio yampac caondash.

47 Adashic: –Esus Udeya yacnuèsh choac caoshe. Istanu –quianec chopac caondash unèstiadtsècquio icquidèn papa. Adec Esus yacno choshombien: –Con mado unèstiadtsècquio iccoshe. Bèdamec cho –caqui

48 nidenquio yec abi datsidadquido chiec: –Èbimbo mimbi tantienquio iquec. Èmbi bèdameteuidtsèqui mimbi tantiec. Èmbi comapenen tantiaquin nabansho isunuidtsèqui: “Nuquin Papan chomiaidien nechitec,” quequin mimbi tantiec –quepondash Esus.

⁴⁹ Adec onqueshobien abi niachidanquin padpiden: —Baded cho. Con mado unëstiadsëcquio iccoshe —capondash.

⁵⁰ Adoaquien Esus: —Padi. Min mado unësenquio ye. Nidec nid —quesho tantiash: —Abimbo caic —quianec nidpondash.

⁵¹ Adec nidquimbi abi chiuuec cho-chosho aton yuabo bëquedac caondash. Aden bëquedaquian yuan: —Min mado bëdanosh —quesho tantiashun:

⁵² —¿Mitsimbo ushë icnuc con mado bëdanosh? —cac: —Ënden ushë yaquëduidsëcnubi da una yantsëcnubi bëdanosh —quepac caondash aton yuabo.

⁵³ Adsho tantiash: —Adënuquioshendabi: “Min mado unësenquio ye. Nidec nid,” caposh Esusën —quepac caondash unëstsemboedën papa. Adshun: —Nuquin Papan chomiaidquio yec comapenen tantiaquin nabanquidquio Esus nec —quequin aton shubun icquidobëdtambi Esus tantiapac caondash.

⁵⁴ Adec Udeya yacnuësh choash Cadidia yacnobidi ambi uba chinaid actequid uaquin ismequin tauaondacnobidi tabadquin bëdamequintsen Esusën ismepondash.

5

Esusën dada icsatsaid bëdamiaid

¹ Yuecquio ictanec Esus: —Edusaden yacno cuëdënuec nuquin matses cho-choeque. Nuquitsen nidnu. Nid —quianec nidanepondash.

² Shubu dadpen icquid Edusaden caid dacuenadquin daquënë uaid puduedte shëcuë dadpen icnuc abentsëc obeca puduedte caid icpondash. Aid anoentsëqui acte tiquidimbo icquid icpondash. Aid con onqueten Betesada capondash. Ambobi daicsaido tabadte shubumpi mëdantetedi icpondash.

³ Acte nënantanquio icnuc dacuenadquiec shubumpi tabadquidën matses dadpen tabadpondash daicsaidouidquio. Bëshuaido yec capuenuquio icquido yec canite tsasiaido yec quec tabadpondash.

⁴ —“Nuquin Papan abi yacnoshon uaid mayan bëdan tèccuascaid acten abia mentoadquid bëdanquid,” quedeneque. Tëccuascaic ma chobono —quiash cainec tabadpondash.

⁵ Adnubien Esusën ënden caniaidquio ambobi uesho istuidpondash. Ëndenquimboshë aton dada icsabudash seta dadpen 38tedquio bi matamec capuenuquio yec icsabudtsaidquio nepondash.

⁶ Adsho istuidshun: —Ëdenquio daicsabudaid nec —quequin tantiashun: —¿Bëdanteda bune? —catuidpondash Esusën.

⁷ Adoaquien: —Ai ¿mitsipadequini bëdampe? Ëbi bëdiactsëcquio nidnuc utsiba badedquio mentoadteniosh. Ëbi buanquin mentoquid nibëdec —quepondash daicsatsaid.

⁸ Adshobien Esusën: —Min ushte nacnentanquin buanec nid —cac

⁹ badedquio aton dada bëdantanquin aton ushte buanec nidpondash. Aid ushë chonoadenquio icte ushë niondash.

¹⁰ Aden buanshobien con matses chuiquidon: —¿Chonoadenquio icte ushënda ushte buampaid? Chonoadte ushëmbien ushte buanquid. Tsusedpabon dada uapampid ma mimi niacpayoc —quequin chushcapac caondash.

¹¹ Adoaquien: —Ëbi bëdameboedën: “Buanec nid,” cac mambi naiyoc —quepac caondash Esusën bëdameboed.

¹² Adsho tantiashun: —¿Tsuntsin naosh? —caquien:

¹³ —Tsaudi. Ëmbi isacmaid ëmbi isquiambobi badedquio nidaccosh matses dadpen icnuc —quepac caondash bëdameboed.

¹⁴ Adshumbic Nuquin Papa tabadte shubu uashunaid daquënë uacno puduedshun ambi bëdameboed daicsacboed Esusën istuidpondash. Istuidshumbien: —Tantia. Mibi chuinu. Ëmbi bëdameboedquio mibi neque. Mimi icsamboen naid ënash bëdambo icta. “Nuquin Papan cuidquiac bëdanenquio yec daicsabudquiochitomane,” quiash adta —capondash Esusën.

¹⁵ Adoaquien bëdameboed abi: “¿Tsuntsin naosh?” caboedo chiec nidpac caondash. Nidshumbic: —Ëbi bëdameboed Esus niosh —quequin chuituidpac caondash.

¹⁶ Aden chuisho tantiatanequien: —Chonoadenquio icte ushënuidi bëdamepac caosh. Icsambo iquec —quequin con matses chuiquidon Esus chieshëmpac caondash.

¹⁷ Adnubien: —Mibi adosh —quesho tantiashun abi chieshënuquido istuidshun Esusën naden chuipondash. —Mimi Nuquin Papa caid con Pa ënenquio icquin matses nashunquidquio nec. Adecbidi ënenquio icquin matses nashunquidquio nebi. Chonoadenquio icte ushëmbidi con Pabëdtan adouid nebi —quepondash Esus.

¹⁸ Adsho tantiatanequien: —“Chonoadenquo icte ushën naquid icsambo iquec,” nuqui caboedquo: “Nuquin Papambo con pa nec,” quiosh. Adquid icsamboshë iquec. “Nuquin Papapadquidquo nebi,” quechitequien nioshe. Cuesunequimbien ictiad —quepac caondash con matses chuiquido.

Nuquin Papan Mado nebi, quiaid

¹⁹ Adec abi chieshënquido abi cuesunete bunshobien padpiden istuidshun chuipondash Esusën. —¿Ëmbimbo naidtambi nadio? Padenquo. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Ëmbentsëqui natiapimbo iquebi.

²⁰ Ëbi tantiaquin Con Pan ambi naidtedimbo ëbi tantiamec. Ambentsëqui nainquo iquec. Aidën tantiamiacpadomboen bēdiactsēc naquin nēid capuenquo icquid bēdamiombi. Adem-bidi ambi tantiamiacpadomboen naquin dacuēdampamboecnuc naindambi ma isquionoeshun.

²¹ Con Papadquidquo yec unēsaid uincuemequidquo nebi. Matses ëmbi tantiaidotedi ëbēdi tabadmenuen uincuemendambi.

²² ¿Ëbi tantiesabo cuidnuen ambiuidtsëqui chuiquidta con Pa nedic? Padenquo. Ëmbien ambi chiacpadomboen naden chiendac. “Nēid nuqui tantiaquid neque. Nuquibēdi tabadmenuna. Nēid ëbi tantiesa icsambo icsho cuidnuna,” caindambi con Pa.

²³ Aidëmbi: “Ëbi tantiacpaden ma con Madotsen bēdamboen tantianu,” qeshun aden matses cuidte chuiquid icmiondashi. Ëbi adquid icmiondaid icsho ëbi tantiatiapimbo icquidon ëbi chomiondaid Nuquin Papatsen tantienquo iquec.

²⁴ ¿Muectabi nedi? Abimbo chuinu. Tantia. Ëbi chomiondaid con Pabēdtan ëbi tantiaquid unēsacsho cuidenquo icquin ëbēdi tabadmendambi. Cuidtequid ichoedi ëbi tantiasch ëbēdi tabadtequid yanendac —quepondash Esus.

²⁵ Adashic padpidec onquec: —Tantia. Mibi padpiden chuinu. Unēsaidën tantienquo yachimboen ëbi tantienquo ichoedombi ëbi tantiabensho bēdamboen tantiamequin bēdamboec tabadquid icmendambi. Adshun aido unēsacsho uincuemeshun ëbēdi tabadmendambi.

²⁶ Con Pan icmiacpadequi unēsaid uincuemequid nebi. Abibi unēstiapimbo icquid icquin unēsaid uincuemequidquo con Pa nec. Ambi icmiacpadquiequi abi yacpadquidquo iquebi.

²⁷ Adec unēstiapimbo iccondaiddi matsesash icsaisambo icsho Con Pan matses icsaido cuidquid icmiondashi.

²⁸ Ëbi adsho tantiasahun: “¿Abimbobida capeba? Muequien nechitec,” ëbi cainda. ¿Muectabi nedi? Padenquo. Con Pan tantiacpadenquo ëmbi cuēnac unēsaidotedi uincuenendac.

²⁹ Adec uincuenacsho ëbi tantiaquido ëbēdi tabadmequin ëbi tantiesabo icsaido cuidacno nidmendambi.

³⁰ Ëmbentsëqui nainquo iquembi. Con Pan chiacpadomboen naquin matses cuidte chiendambi. Matsesën naidtedi tantiaquid icquin adoendambi. Ëmbi naid nainquo icquin Con Pa bēdambo icmenuen aidën chiacpadomboen naimbi —quepondash Esus abi chieshënquido chieç.

Utsintsen ëbi chieç, quequin Esusën chiaid

³¹ Adshumbic Esusën abi chieshënquido chuiopondash. —Nuquin matsesën naden chieç. “Abentsēcshun chiaid icsambo iquec. Daēdshun chiaid abimbo iquec,” quequin chieç. Aden chiaid tantieç ëbiuidtsëqui: “Nuquin Papan Mado nebi,” qesho tantiasahun: “Abimbo mimbi caic,” mimbi ëbi catiapimbo iquec.

³² Ëbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac.

³³ Aden ëbi chuiquid utsi acten mentoanquid Uan pado icpadenec. Aidëmbi ëbi abimbo capadenec. “¿Nuquin Papa yacnuësh choquidta ne?” quequin mimbi chuitanac: “Padenquo. Esusuidi Nuquin Papa yacnuësh choquid nec,” quepadenec Uan pado.

³⁴⁻³⁵ Aden chieshtoenuquo icquin bēdamboen chuipadenec. Chuisho tantiatsash mibi bēdambo icuidtsēccondac. “Ëmbi Uan padon naid chuisho tantiasahun: ‘Abimbo mimbi caic,’ ëbi capashun. Ëbi adosho bēdamboen istsiambi,” quequin mimbi tantiondaid Uan caombi. Matses icquimbi Uanën ëbi bēdiactsēc tantiamequin chuipadenec. ¿Adquid matsesënuidsëquidabi abimbo chupeç?

³⁶ Con Pambien: “Con Mado neque. Matses ismenu,” qeshun comapenen tantiaquidquo icnepondashi. Ambi adomiaid icquin comapenen tantiaquin nabanquin ëmbi ismesho isash: “Ai, adquid nec,” quetiadquidi mibi nec.

³⁷ Ēbi chiecbidi onquequin Nuquin Papan nuquin tsusedpabo dada uamepampic. Adecbidi Nuquin Papa onqusho ¿ada mimbi tantiapadio? ¿Nuquin Papada istio? Padambo mimbi iquec.

³⁸ Adembidi ambi dada uamequin chiampidquio ma mimbi bēdamboen tantienquio yoc. Aid bēdamboen tantiašumbien Nuquin Papan chomiondaid ēbitsen mimbi tantiatsiac.

³⁹ Mibi nadpec. “Nuquin Papan chiaid nuquin tsusedpabon dada uampid tantiaquidquio nebi. Aid isbanquid yec Nuquin Papabēd tabadtequid nebi,” mibi quepec. Ma ēbimbo chuiquin Nuquin Papan dada uamepampid neyoc.

⁴⁰ Aden dada uamepampid isbanquidombi mimbi ēbi tantienquio iquec. Ēbi tantiashoembi mibi Nuquin Papa yacno ēbēd tabadmetsiandac.

⁴¹ “Ēbi adsho tantiashun ma matsesēn ēbi: ‘Bēdambo mibi iquec,’ canu,” ¿quectabi ique? Padenquio. Con Pan chiacpadomboen nanuembimbi aden chioc.

⁴² Ēbi tantienquio icsho isun: “Nuquin Papa tantiesabo nec,” quequin mibi tantiembi.

⁴³ Ēmbien Nuquin Papan chiacpadomboen naic. Aden nasho mimbi ēbi tantienquio iquec. Utsi: “Nuquin Papa yacnuēš choquid nebi,” quec muaquidien mimbi badedi tantiatsiac.

⁴⁴ Mibibi tantiadec: “Mibi bēdambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi bēdambo iquec,” cametiapimbo iquec –quepondash Esus abi chieshēnquido chiec.

⁴⁵ Adashic padpidec: –¿Ēmbentsēquidambi: “Ēbi tantiesabo neque. Cuidnuna,” quequin mimbi naid Nuquin Papa chuipe? Padenquio. Mimbi tantiaidēnquio Moisesēntsen: “Nēido icsambo iquec,” mibi caindac.

⁴⁶ Aidēn chiampid bēdamboen tantiaquimbien mimbi ēbi tantiatsiac. Aidēn chiampidi mabi neyoc.

⁴⁷ Aden Moisesēn chiampid tantienquio icquin ēmbi chuiboedtsen mimbi tantiatiapimbo iquec –quequin Esusēn abi chieshēnquido chuipondash: –Moisesēn chiampid tanti-aquidquio nebi –quequido chuiquin.

6

Esusēn pete uatanquin 5000tedi pemiad (Mat 14.13-21; Mad 6.30-44; Duc 9.10-17)

¹ Yuecquio ictaniash Edusaden yacnuēš nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabēdtoshon potiacpondash. Aid chiambidi matses utsibon Tibedias capondash.

²⁻³ Poteshun nandoash pudundoanec macuēš dapa dectatoash macuēš poctsebi tabad-tuidpondash. Ambo tabadquin ēbi chedo chuipondash. Adnubien Esusēn matses dadpen bēdamesho isboedo Esus isnuec chochopondash.

⁴ Nuquin Papan isadaidbo unēs uainquio icquin matamiampid inchēš tantianuec pec tabadte ushē nēbi yanuc niondash.

⁵ Aido cho-chosho istanequin Esus: –Uedipe, piucquid buanshun ¿mitsimbo pete bedtane nēido pemenun? –quepondash Uedipe chiec.

⁶ –¿Atoda queque? Tantianu –quiash adpondash Esus. –Pete bedabi icnuc ēmbibi pete uanu –quequin otacquo tantiequi adondash.

⁷ Adoquin Uedipe: –Ma aidtedquio pemetiapimbo yoc. Inchēšhēn ushē 8tedquiobi nidmec chonoadshun bedaidtedimbo piucquid mēnequin pete bedshun: “Pemenu,” cac aidtedquio pemiadenquio ictsiash –quepondash Uedipe.

⁸ Adnubien Andedesēn Petedon utsin:

⁹ –Ma nē madompin panēmpi 5tedtsēc icpayoc, Icho. Nuēcquidēmpi daēdquiobi ictsec. Matses dadpenquio iquec. Aidtedtsēcquid pemetiapimbo iquec –caquin

¹⁰ Esusēn: –Padi. Aidi bēdambo iquec. Abitedi: “Nēmbo tabad,” caban –cac: –Nēmbo tabad –cabanac sebad-sebadpambo icquidēn uasinēn matses dadpenquioshē tabadbudpondash. Dadauidsēqui tambanac 5000ted icpondash. Chido bacuēbōbēdta tambanambo icpondambi.

¹¹ Adshumbien Esusēn madompin pete pamba bedtanquin Nuquin Papa chuipondash. –Pete uaquid yec mibi bēdamboshē iquec. Mimbi uaid nēid pete bēdambo iquec, Papa –quec onquetanquin: –Meneban –cac abēd icquidon tabadquido abitedi menebampondash. Adotanquimbic nuēcquidēmpitsen bedtanquin adembidi Nuquin Papa chuitanquin menebanoapondash. Adoac utsibon ambi piactembi pebedednubi utsibon ambi piactembi pebededpondash.

¹² Aden ambi piactembi pebededacshobien Esusēn: –Napi uaid secainda. Sandoshon dayun ua –cac

¹³ tsitsan dapan napiuaid sandoshon dayun uapondambi tsitsan 12tedquiobi sandoaid icnuc.

¹⁴ Aden pemiaquien pemiaido: —Comapenen tantiaquin Esusèn pete dadpenquo icmiac. Moisesèn chuiampidshenda nepec. “Nuquin Papan bédamboshè icquid chomendac,” capampidshenda nepec. Aidien nuqui chuiquid dapa icmetiad —quepac caondash Esus tantiamenquo yec.

¹⁵ Adsho ambembì tantiachien: —Abi chuiquid icmenuen èbi “Bednu,” caique. Nèbi abi chuiquid ictiapimbo iquebique. Cuenu —quianec abentsèqui cuempac caondash Esus macuèsh dapa dectatoec nidec.

Esus acte bèntse choaid
(*Mat 14.22-27; Mad 6.45-52*)

¹⁶ Esus cuembon inchèshbudtsèqui chian budondabi èbitedi.

¹⁷ —Capednaun yacno nidnu —quec cano antabèdtoshon potenubi inchèshpondash Esus acte bèntse chopanushta.

¹⁸ Adnubien cunquequid dapa cunquetuidpondash. Acte comapenec tèccuasquenuc

¹⁹ uncadenquo yampondash. Ènapen nidabi nèbi 6 quidometedos cactiontsèqui nidshun isquien matsesbimboec acte bèntse chopec. Adsho istanec dacuèdquiondabi.

²⁰ Adshobini: —Èbi neque. Dacuèdenda —capondash.

²¹ Adoac: —Esus nec —quetanquin badedi antsadtomiondambi. Aid antsadtometanquin badedquo potepondambi. Nandoash ambobi ushondabi Capednaun yacno.

Pemiaidon Esus istuidoaid

²² Adnubien abi pemebocnobi matses ushpac caondash. Badiadnuc isucunshun isaquien Esus nibèdec. Nibèdsho isashien: —Ma cano abentsècquidèmbi abèd icquidon potepaboc. Ma aiddèd nidenquo icpaboc. ¿Mitsimbo nidpash? —quepac caondash pemiaido.

²³ Adnubien shubu dadpen icquid Tibedias caid yacnocquidon cano dadpen bè-bèpac caondash. Pete pemebocno anoentsèqui nando-nandosho isash:

²⁴ —Potequimbien Esusèn yashe. Nèid canobi antabèdtoshon potenuna —quetanec antabèdtoshon potiac-potiacpac caondash.

Potiac-potiacash Capednaun yacno pudundoshon

²⁵ Nuquin Papan chiaid chuibante shubun abitedi puduedshun Esus istuidpondash. Istuidshun: —¿Mitsipaden potio, tsusio? —caquien: —Naden —quenquo yec:

²⁶ —Tantia. Mibitedi chuinu. ¿Èbimbo tantianuecta chodio? Padenquo. Èmbi pete uasho isash: “Nuquin Papan namiaidèn naoshe. Istanu,” ¿quecta ictio? Peteuidtsèqui tantiaquin ma mimbì èbi nibèneyoc.

²⁷ Peteuidtsèqui tantiaquin pete bednuen naquidquo ma mibi neyoc. Aidquo chod-quetequid nendac. Chodquetiapimbo icquid tantiaquin bédamboen nata. Aden nash èmbi icmiacpadquieq Nuquin Papabèd tabadtequid mibi yanendac. Nuquin Papan: “Con Mado neque. Ismenu,” quequin namiacpadamboen comapenen tantiaquid icquin mibi adquid icmetsiambi —quepondash Esus.

²⁸ Adsho tantiaien: —“Nuquin Papan chiapadamboen nata,” quepequien mibi iquec. Adamboen natiadquo icquìn ¿atotsimbi nape? —caquien:

²⁹ —Nuquin Papan chiapadamboen natiadquo icquìn ambi chomiondaidquo tantiaita —quepondash Esus ambi pemiaido chieq.

³⁰ Adoquien: —¿Mimbi aden chuishouididambi: “Adquid nec,” quequin tantiapè? ¿Atotsi utsi comapenen tantiaquin mimbì èbi ismepatsia?

³¹ “Èndenquimboshè pete nibèdacnoshon Moisesèn con tsusedpabo nibedbèdi sequiaid pete pemianepampic,” quequin dada uapampid isombique. Adquid nacnenquin èbi isme —quepondash pemiaido peteuidtsèqui tantieq.

³² Adoquien Esus: —Nuquin tsusedpa Moisesèn nainquien icpampic. Con Pambien aden pemepampic. Nèbi ambi chomiondaid petebimboecquid utsien Nuquin Papan mibi tantiametiadquo iquec.

³³ Aid petebimboecquidèn matses bédambo icmetsiashe pete piacbimboecnuc —quepondash Esus abibi cadequi.

³⁴ Adsho tantiashe petembo ca danec: —Ènenquo icquìn adquid èbi pemeta —quepondash pemiaido ambi peboeuidtsèqui tantieq.

³⁵ Adshobien Esusèn: —“Èbiuidtsèqui petebimboecquid icquìn matses bédambo icmequid nebi,” caimbi. Èbi tantiaquid ènenquo icquìn bédambo icmendambi petebèdi acte bundoenquo yachimboecnuc.

³⁶ Ĕmbi chuibocpadomboen ma mimbı ĩbi tantienquıo icboc. Ĕmbi comapenen tanti-aquin nabansho isumbı ma mimbı ĩbi tantienquıo icboc.

³⁷ Utsibombien ĩbi tantiendac. Nuquin Papan tantiamiaıdtedishun ĩbi tantiasho bėdamboen isquin cacumenquıo iquendambi.

³⁸ Ĕmbi tantiacpadomboen naquıdtabı nedı? Padenquıo. Nuquin Papan chiacpadomboen nanuec mabi abi yacnuėsh chondac.

³⁹ Aden aidėn chiacpadomboen nanuen ĩbi tantiaquıdo unėsacsho uincuemeshun cuıdenquıo icquin ĩbėdı tabadmendambi. Unėsaid abıtedı uincuemete ushėn adoendambi.

⁴⁰ Nuquin Papa bunacpaden ĩbi tantiaquıdo uincuemeshun Nuquin Papa yacno ĩbi tabadacnombo tabadmendambi –quepondash Esus ambi pemeboedo chıec.

⁴¹ Adec: –Nuquin Papa yacnuėsh chondaid yec petebimboecquıd nebi –quesho tantiashıen con matses chuiquıdo:

⁴² –ĔAdquıdıda nepec? Ma ıcsamboen chuıpayoc. ĔNuquin Papa yacnuėsh choaidta nedıc? ĔNuquı isacmaidta nedıc? Ma Esus cuėmėdquıd neyoc. Ma Osen mado neyoc. Anısen tantiambi. Matsesėn tıshaid Nuquin Papa yacnuėsh choquıd ıctıapımbı iquec –quecuededpondash.

⁴³ Adshobıen Esusėn: –Shoshquetsėcquin ĩbi ıcsamboen chienda. Abımbımbı caoc.

⁴⁴ Ĕbi chomıondaidėn Nuquin Papan tantıamıabı yaıdo icquin mimbı ĩbi tantıatıapımbıo iquendac. Nuquin Papan tantıamıaid icquin mimbı ĩbi tantıatsıac. Aden Nuquin Papan ĩbi tantıamıaidıo unėsacsho unėsaid uincuemete ushėn uıncuemendambi.

⁴⁵ Aden Nuquin Papan tantıamete chuıquin nuquin tsusedpan dada uapampıc. “Nuquin Papambıen ambi bėdamboen iste matses tantıamendac,” quequin chuıpampıc. Aden Nuquin Papan tantıamıaidıo ĩbi tantıaquıdo yantsıash.

⁴⁶ “Ambı tantıamıaidėn matsesėn Nuquin Papa ıspash,” quenquıo iquebi. Ĕmbııdıtėquı abėd icquin Nuquin Papa ısondambi. Aden abėd icquin abi ısondaıdı matsesonadı –quepondash Esus: –Matsesı nec –abi caquıdo chıec.

⁴⁷ Adashıc padpıdec: –Abımbı caombı. Ĕbi tantıaquıdo Nuquin Papa yacnombo ĩbėdı tabadmendambi.

⁴⁸ Petebimboecquıd icquin aden tabadmendambi. Adecbıdı bėdamboec tabadmıanquıd nebi.

⁴⁹ Nuquin tsusedpabon pete utıı nıbėdacnoshon mana caıd pepampıc. Aid pequıdı tsusıobudash unėspampıc unėstıapımbıo icquıd yanabi.

⁵⁰ Petebimboecquıd utııen Nuquin Papa yacnuėsh chondaid nėmbıbı iquec. Aid pıash ĩmbı chıacpadquıec padpıdec unėsenquıo yec Nuquin Papabėd tabadtequıd yanendac.

⁵¹ Adquıdquıo nebi. Con namı pıash matses unėstıapımbıo icquıd yanendac. Adquıdquıo matses ıcmıenuec ĩbıded cuıdadquın con namı menendambi –quepondash Esus om-poacbımbıen chıec. –Ĕbi tantıaquıdo nėbı bėdamboen tabadmıeshun unėsacsho Nuquin Papa yacno ĩbėdı tabadmendambi padpıdec unėstıapımbıo ıcnuc –quequin tantıec: –Petebimboecquıd ıcsho ĩbi pıash matses unėstıapımbıo icquıd yanendac –quepondash Esus. –Ĕbi tantıaquıdo cuıdmenquıo ıcnuec ĩbıded cuıdadec unėsendabi –quequin tantıec: –Con namı menendambi –quepondash Esus.

⁵² Adec: –Con namı pıash matses unėstıapımbıo icquıd yanendac –quesho tantiashıen namımbı ca danec con matses chuıquıdo onquecuededpondash. Utsı-utsıec: –ĔMıtsıpaden Esusėn aton namı nuquı pemepatsıash? Aidquıo tantıatıapımbıo iquebi –quecuedednubı utıı-utsıec: –ĔAtotı chııtıadquıo yec nıosh? Chuısho tantıanu –quecuededpondash.

⁵³⁻⁵⁴ Adsho tantıashun Esusėn ambi chıacpadomboembıdı chuıoapındash. –Tantıa. Mıbı chuınu. Matses tantıaquıdquıo nebi. Aden tantıaquec ıbıded cuıdadec unėsendabi. Ĕbi adec unėso ısun con namı pequınc con ıntac acquınc cash nıdaıdėnuėsh bėdamboec tabadquıd yanash Nuquin Papabėd tabadtequıd mıbı yanendac. Adquıd ıcsho unėsaıdo uıncuemete ushėnquıo uıncuemendambi ĩbėdı tabadmıenuen. Ĕmbı chıacpadomboen nainquıo yash Nuquin Papabėd tabadıapımbıo mıbı iquendac.

⁵⁵ Aı, con namı petebimboecquıd nec. Con ıntac acıebımbıoecquıd nec. ĔPetebėdı acıe naimėdanda mıbı bėdambo ıcpatsıa? Adecbıdı con ıntac chıdıdıquec con namı ıcsabıdec ıbıded cuıdadec unėsaid tantıenquıo yec mıbı bėdamboec tabadıapımbıo iquendac.

⁵⁶ Aden ĩmbı namıbėdta ıntac chuısho bėdamboen tantıashun ĩmbı chıacpadomboen matsesėn natıadquıo yanendac. Adsho ısun aıdbėd tėshnanenquıo icquin bėdamboec tabadquıd ıcmıendambi.

⁵⁷ Nuquin Papa unėstıapımbıo icquıd yec matses uıncuemıquıdquıo nec. Aidėn chı-mıac ambi namıacpadomboenıdı naquın ĩbi tantıec tabadquıd unėsacsho uıncuemıquın unėstıapımbıo icquıd ıcmıendambi.

⁵⁸ Aden èmbi naid tantiamenuc: “Nuquin Papa yacnuësh chondaid petebimboecquid utsi iquec,” quiobi. Èbi adquid icsho isash èbi tantiaquid Nuquin Papabèd tabadtequid yantsiash. Nuquin tsusedpabon pepampidpadquidpenquoio nebi. Adquid pequidi tsusiobudash unèspampic. Èbi tantiaquidien padpidec unèstiapimbo icquid yanendac

⁵⁹ —quepondash Esus Nuquin Papan chiaid chuibante shubunuësh Capednaun yacnuësh.

Abi tantiauidquidon Esus nianonaid

⁶⁰ Adec: —Con nami pequinc con intac acquinc cash mibi bédambo ictsiac —Esus qesho tantianshien abèd icquido utsi-utsiec: —Aidèn chiacpadamboen natiapimbo iquebi. Icsamboen chiech —quepondash Esus tantiamenquoio yec.

⁶¹ Adec onqesho ambembi tantiansh Esus onqueoapondash. —¿Èmbi chuiboed tantiansh chieshtotiadquioda iquec?

⁶² Nuquin Papan matsesmiaid yequi unèsash èbi iccondacno èbi nidacsho isash ¿atoda mibi quendac? Abimbo caombi. Nuquin Papa yacnuësh chondaidini nec.

⁶³ Namimbo intacquiobèdta ca danequien mibi nec. ¿Namimbo pequinc intacquoio acquinc cashta mibi bédambo icpatsia? Padenquoio. Nuquin Papan Mayanèn èmbi chuiboedbèdta èbi tantiamenquin matses bédamboec tabadquid icmetsiash. Adoaid unèsash Nuquin Papa yacno èbèdi tabadtsiash —quepondash Esus cuembo chiech.

⁶⁴ Adashic padpidec: —Èmbi aden bédamboen chiaqui utsin-utsinquien mimbi èbi tantienquoio yanendac —quepondash abi tantiauidquido chiech. Aido tauamboec abèdi nidnuc: —Nèidèn èbi tantienquoio yanendac. Nèid utsin èbi chieshènquido èbi bedmendac —quequin ambembi Esusèn tantiapandash.

⁶⁵ Adashic padpidec: —Èbi tantiauidquido tantiaquin naden chiombi. “Nuquin Papan tantiamiabi yaidèn èbi tantiatiapimbo iquendac. Nuquin Papan tantiamiaidènquien èbi tantiansiash,” quequin chiombi —quepondash Esus.

⁶⁶ Adsho tantianshun dadpeshun Esus nianondash.

⁶⁷ Aden nianaquien Esusèn abèd icquido 12ted icquid chuipondash. —¿Mimbisendabi niampe? —caquien

⁶⁸ Petedo: —Padenquoio. ¿Tsudabèd icnuendambi mibi nianuc? Mibipadquid utsi nibèdec. Mimbuidtsèquien: “Èbi tantiaquid bédamboen isquin unèsacsho uincuemeshun èbèdi tabadmendambi,” quequin chuipoc.

⁶⁹ “Abimboen caosh,” quequin mibi tantiembi. “Nuquin Papa yacnuësh chonèdaid yec bédamboshè icquidquien nec,” caombi mibi. Mibi niantiapimbo iquebi —quepondash Petedo Esus caic.

⁷⁰ Adoquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Èmbi adonaid abentsèc Satanasèn namiaidquio yec icsamboshè iquendac —quepondash Esus.

⁷¹ —Simon Iscadioten mado Udasèn èbi chieshènquido èbi bedmendac —quequin ambe-mbi tantiansh adondash Esus.

7

Aton utsibon Esus tantienquoio yaid

¹ Abi tantiauidquidon nianac Cadidia yacnouidi yuec Esus capucuenepondash. —Nidaid Udeya caid yacnocquido con matses chuiquidon èbi cuesunetiadquio iquec —quiash Udeya yacno nidenquoio icpondash.

² Adnubien con matses abitedi: —Edusaden yacnuësh cuèdèntanu —quiampondash. Adanec nidaid utsi Udeya caidèn nidec 7tedec ushec cuèdènuec matses dadpen nidacno Edusaden yacno nidanepondash. Cuèdènuec Esus nidenquoio icpondash.

³ Adec nidenquoio icsho isumbien aton utsibon: —Edusaden yacno nidec nid. Mibèd ictiadquio icquid ano icnushe. Comapenen tantiaquin nabanquin aido ismec nid.

⁴ ¿“Ma matses dadpeshun èbi tantianu,” quequinda matses daèdpactsèc yacnoshonuidi napec? Matses dadpen yacno nidshun comapenen tantiaquin nabanquin ismec nid —capondash aton utsibon.

⁵ —Nuquin Papan chomenèdaidquio nec —quequin tantienquoio icquimbi adopondash aton utsibon.

⁶ Adoquien Esus: —Matses dadpen nidnuc nidtiadquio yec mibia nidta. Abitedishun isnuc nèbi nidtiapimbo iquebique.

⁷ Mibien anocquidon chieshèntiapimbo ye. Mibia nidta. “Nuquin Papan chiaid niacniaquec mibi icsaic,” èmbi cac chieshènondashibique.

⁸ “Cuesunenushe,” quiash nëbi nidtiapimbo iquebique. Mibia nidta. Nuquin Papan tantiapadec nidendabi

⁹ —quiash anobi Cadidia yacno Esus tabadpondash.

Esustsen Edusaden yacnuësh cuëdëneuc nidaid

¹⁰ Aden aton utsibo nidanemiashe yuec-yuecpectsëc ictanec abitsen Esus nidpondash Edusaden yacnuësh cuëdëneuc nidec. Abitedi ismenquoio yec tsyuec Esus nidpondash.

¹¹ Adnubien con matses cuëdëneucdedacnoshon abi chieshënquidon Esus nibëmpac caondash. —¿Mitsimbo icpec? ¿Ada nëmbo chosh? —quequin chuibenepac caondash.

¹²⁻¹³ Adsho tantiash con matses Esus chieshënquido dacuëdëneuc utsibo tantiamenquoio yec sho-shoshquetsëcqueic onquepac caondash. Utsi-utsiec: —Esus bédamboshë icquid nec —quenubien utsi-utsiec: —Ma icsambo icquid neyoc. “Nuquin Papa yacnuësh chondaidini nec,” quec ma muequi neyoc —quec onquecuededpac caondash.

¹⁴ Adnubien con matses cuëdëneuc taëbon abentsëc choec ushash Nuquin Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash.

¹⁵ Adsho tantiash: —¿Mitsipaden tantiashun chuipen naic? Nuquibëdëtan Nuquin Papan chiaid isbanambo aidën iquec —quepondash con matses chuiquido.

¹⁶ Adsho tantiash Esus: —Èmbembi chienquoio icquin ëbi chomiondaidën chiaidquoio chiec nebi.

¹⁷ Nuquin Papan chiapadomboen natiadquoio icquidën bédamboen tantiatsiash. Èmbi Nuquin Papan chiaid chuisho tantiash: “Nuquin Papan chiaidquoio chiec nec,” quequin tantiatsiash. Èmbembi chuisho tantiash: “Ambembi chiaid nec. Nuquin Papan chiaidpenquien nec,” quequin tantiatsiash Nuquin Papa tantiaquidën.

¹⁸ Ambembi chuiquidën: “Mabi matsesën bédambo canu,” quequinuidtsëqui chuibantsiash. Adquidpenquieni nec. Èmbien: “Èbi chomiondaidquoio ma matsesën tantianu,” quequin ambi chiaidquoio chiendac.

¹⁹ Mimbien adoenquoio iquec. Mimbi tantiaid nuquin tsusedpa Moisesën: “Cuesunenda,” quequin Nuquin Papan chiaidquoio dada uapampic. Èbi: “Cuesunenu,” caquin aidën chiaid ma mimbi niac-niaqueyoc —quepondash Esus abi chieshënquido chiec.

²⁰ —Mimbi ëbi: “Cuesunenu,” caoc —Esus qesho tantiashumbien ano tabadquidon: —Podobitsi icsa dapuduedash mibi tantiadenquoio yec onquepec. ¿Tsuntsin mibi cuesunepatsiash? —capondash.

²¹ Adoquien Esus: —Nëidën ëbi cuesunetsiash —quequin chienquoio yec: —Chonoadenquoio icte ushën comapenen tantiaquin dada bédamepondambi. Aden bédamecsho isash: “Adopshenda naic. Chonoadenquoio icte ushën daicsatsaid bédamequin Nuquin Papan chiaid niac-niacposh,” ma mibi quepondac.

²² ¿Èmbentsëquidambi chonoadenquoio icte ushën nadi? Ma min matsesën adoapaboc. Mimbi tantiaid Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi icnubien Nuquin Papan chiapadomboen naquin: “Nuquin Papan yuambo nebique. Ismenu,” qeshun Abadauanëmbien shui dëbid dëteshunequin tauapampic. Yuecquoio ictaneshun adembi Moisesëntsen adopampic. Nëbi adembi naic chonoadenquoio icte ushëmbi chonoadquimbi ma mimbi shui dëbid dëteshuneyoc.

²³ Aden Moisesën chiampid niaquenquoio icquin shui nacnenquin mimbi bédamboen naic. Èmbitsen daicsatsaid dada abichobi bédamequin mambi bédamboen naondac. ¿Atotsi quequin ëbi chushcai?

²⁴ Chonoadenquoio icte ushën dada bédamequid icsho: “Icsambo mibi iquec,” mimbi ëbi capec. Aden ëbi bédamboen tantienquoio icquin mimbi icsamboen chiec. Èbi bédamboen tantiaquoshon ëmbi naboed bédamboen chui —quepondash Esus abi chieshënquido chiec.

Esus bedshun cuesunetiad, cauidaid

²⁵ Adec Esus: —Chonoadenquoio icte ushën naondambi —qesho tantiashien anocquido Edusaden yacnocquido nadec onquecuededpac caondash. —Nuqui chuiquidon: “Cuesunetiad,” caboediën nëid nechitec.

²⁶ En is. Abi chieshënquidobëdi tabadquin chieque. Chuisho ma chuiquidon chushcainquoio icboc. “Nuquin Papa yacnuësh choquid Quidistu caid Esus nec,” quequin tantiashumbien nachitec —quetanequin

²⁷ aidobidi: —Nuquin Papa yacnuësh choquid ictiapimboen aid iquec. Abi caniacno tantiembi. Nuquin Papa yacnuësh choquid abi caniacno tantiadenquoio ictsiash —quepondash ano tabadquido.

²⁸ Adsho tantiashun Esusën Nuquin Papa tabadte shubu uashunaid daquënë uacnoshon chuibanquin abitedi tantiamenuen naden chuipondash. —“Èmbi isonaid nec. Aton nidaid Cadidia caid yacnuësh caniquid nec,” ¿quequindabi bédamboen tantiapadi? Ma mimbipadenquo yoc. Èbembichondaidpenquo nebi. Èbi chomiondaid abi iquec. Ma mimbaidquobi tantienquo yoc.

²⁹ Èmbien aidquo tantiendac. Aidbéd tabadondaidquo nebi. Adsho aidën: “Nid,” cac chondaid nebi —cauquin

³⁰ —“Con pa Nuquin Papambo nec,” quechitequien nec —queshun abi chieshënquidon: —Cuesunemenuembien bedtiad —quetanquin: —Bednu —caqui bedadenquo icpondash. —Nëbi ma Esus unës uainquo icnu —Nuquin Papa quenuc bedmenquo icquin Esusën mètampanëdash.

³¹ Esus cunesunetiadquo icnubien utsibon dadpeshun Esus tantiabempondash. —Nëidpadquid utsi nibédtsiandac. Nuquin Papan chiaid chuiquin nuquin tsusedpabon dada uapampicpadomboen comapenen tantiaquin Esusën matses bédamebamposh. Nuquin Papa yacnuësh choaid Quidistu caid Esus nec —quequin dadpeshun Esus tantiabempondash.

Èbi istuidenquo iquendac, quequin chiaid

³² Aden Esus chiec sho-shoshquetsëcquec onqueshobien Esus chieshënquidon padiseyo caidon tantiapac caondash. Adshun abédtan chuiquid utsibo chuipac caondash. —Èmbi chuibocpaden Esusien bedtiad. Icsamboec onquioshe —cac: —Ai, adembien ictiad —quepac caondash. Adshumbic abéd icquido sondado chuiquin: —Baded bedtan —capac caondash.

³³ Adoac nidanequin tantiatuidaquien nadec Esus onquepondash. —Yuec-yuecpactsec mibéd icashic èbi chomiondaidbédtsen tabadoaic nidendabi.

³⁴ Èbi nibënquin èbi istuidenquo mimbiquendac. Èbi nidacno mibi nidtiapimbo iquec —quepondash Esus.

³⁵ Adsho tantiash abi chieshënquido: —Nuqui istuidmenquo icnuec ¿mitsimbo nidpanuec nec? Matses utsi yacno tabadnuec con matses utsi-utsiec nidequi nidaniondacno nidshun ¿anocquidoda chuipatsiash?

³⁶ Tantiadenquo yec onquepec. ¿Atotsi quepec? “Èbi nibënquin mimbiquendac. Èbi nidacno mibi nidtiapimbo iquec,” quepequien iccosh. ¿Atotsi quepash niosh? —quepac caondash Esus chieshënquido.

Aton Mayan abi tantiaquidbéd tabadmete chiaid

³⁷ Adnubien cuëdë nec ènëdte ushënquobi con matses abitedimbo cuëdë nec chochopondash. Chochoash tabadbudnubien nidtoash comapenec onquequin Esusën chuipondash. —Acte natia bunacimboec Nuquin Papa tantiate bunquin èbi bédamboen tantiata.

³⁸ Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi èbi tantiaquidobéd tabadmendambi. Adoac mibéd tabadquin mibi bédamboen tabadmequin utsibotsen Nuquin Papa tantiate bumetsiash —quepondash Esus.

³⁹ —Nuquin Papabédta èbi tantiamequidquo Nuquin Papan Mayan nec —quequin tantiec adondash. Adquid abi tantiaquidobéd tabadmequin chomiabi aden chuipondash Esusën. Nuquin Papa yacno nidambien abi tantiaquidobéd Nuquin Papan Mayan tabadcuenondash.

¿Nuquin Papan chomiaidta nepeba? Esus caid

⁴⁰ —Nuquin Papa tantiate bunquin èbi tantiata —Esus qesho tantiashien Esus chiec ano tabadquido onquecuedepac caondash. Utsi-utsiec: —“Nuquin Papan chiaid chuiquidquo choendac,” quequin nuquin tsusedpa Moisesën chiampidien Esus nechitec —quenubien

⁴¹ utsi-utsiec: —Nuquin Papa yacnuësh choquid Quidistu caidien Esus nechitec —quenubien utsi-utsiec: —¿Cadidia yacnuështa Nuquin Papa yacnuësh choquid chopadic?

⁴² Padenquo. Nuquin Papan chiaidquo naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid caniampicnoshon shubu daédpactsëcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquo nec —quepac caondash.

⁴³ Adec dadpen: —Bédambo icquid nec —quenubi aiteddbidi: —Icsambo iquec —quepac caondash.

⁴⁴ Adnubien: —Icsambo iqueque. Cuesunemenuembien bedtiad —queuidpac caondash. Adshun Esus bedabi icpondash.

Isadaidbo chuiquid dapabon Esus chieshënaid

⁴⁵ Adnubien: —Esus bedtan —caboedo sondado bedabi Esus chieshënquido chiec chopac caondash. Chosho: —¿Atotsi quiash bedabi cho? —caquien:

⁴⁶ —Ma bédamboenshë chuiboc. “Adomboen chuibanquid utsi nibëdec,” qeshun bedti-apimbo iccobi —qesho

⁴⁷ tantiashien: —Aid muasho tantiashun: “Abimbo caic,” ¿cainda icco?

⁴⁸ ¿Adambi Esus muasho tantiadio? ¿Ada tsusiobon tantiadiosh? Padenquo iccosh.

⁴⁹ Utsibombien tantiash. Adquidon ëmbi bédamboen tantiapadomboen Nuquin Papan chiampid tantienquo iquec. Icsambo aido iquec. Aido cuidchitoshon. Esus icsambo iquec —quepac caondash con matses chuiquido padiseyobo Esus chieshë nec.

⁵⁰ Adnubien inchëshën puduedash Esusbëd onquiondadi Nicodemo caid abitsen chuiquid yec nadpac caondash.

⁵¹ —¿Abibi chuimiabida cuidpec? Nuquin Papan chuipampid nad iquec. “‘Icsambo iquec,’ caidi abibi chuimequin: ‘¿Atotsi nao?’ cac chuisho tantiashun cuidquid yendac,” quepampic. Adoac bédambo ictsiash. Chuimiabi cuidac icsambo ictsiash —quepac caondash Nicodemo abëdtan chuiquid utsibo chiec.

⁵² Adoquien chuiquido: —Esus yacpadec Cadidia yacnuësh caniquid mibi nepanui. Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquo choenquo iquendac,” quequin mimbi tantiatsiac. Ma Esus muequi neyoc —quepac caondash chuiquido Nicodemo chushcaic.

⁵³ —¿Chuimiabida cuidpec? —quetsëcsho aden Nicodemo chushcanec abitedi nidaniac caondash aton shubuno ushec nidec.

8

Bënëpenquo chudmequid cuënoten seshunetsenaid

¹ Nicodemo chushcabon Esus macuësh dapa Odibos caid yacno ushec nidondash.

² Adtanec choashic Nuquin Papa tabadte shubu uashunaid daquënë uaidën puduedpondash. Puduedsho isash matses dadpen cho-choec abi datsidadsho Esusën chuipondash.

³ Aden chuinubien con matses tsusiobon aton bënëpenquo chudmesho istuidshun chido bëpondash. Moisesën dada uampid chuibanquidobëdtan tsusedpabon chiampid namequido padiseyobon Esus yacno bëshun chido nënantanquo nitsimpondash.

⁴ Adshumbien Esus chuipondash. —Aton bënëpenquo chudmesho istuidshun nëid bëombi.

⁵ Nuquin Papan chiaid Moisesën naden dada uapampic. “Aton bënëpenquo chudmesho istuidshun cuënoten seshunequin unës uaquid,” quepampic. ¿Adembidida mimbi tantie? —quepondash chido bëquido.

⁶ —¿Atotsi Esus quepatsiash? Nuquin Papan chiampidquo chienquo icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusën ëcbedenquo icquin shuebudshun mëdanten nidaid dada uapondash.

⁷ Adshobien padpiden: —¿Adembidida tantie? —cado-cadoac nidtotanec: —Nuquin Papan chiaid niaquesambo icquin en mimbria cuënoten se —quetanec

⁸ padpidec shuebudshun mëdanten nidaid dada uaoapondash.

⁹ Adnubien: —Nuquin Papan chiaid niaquesambo icquin en mimbria cuënoten se —cac: —Nuquin Papan chiaid niaquesamboen nibëdchitec. Setiapimbo iquec —quetanec nidanepondash. Tsusioboba nidanebon caniabotsen tsyuec nidanepondash chidouditsëqui Esusbëd icnuc.

¹⁰ Adec nidanian Esusën nidtoquin isquien nibëdec. Nidaniac. Abi bëboedo nidaniacsho istanquin: —¿Mitsimbo nidosh, champi? ¿Mibi cuënoten sequidta nibëdosh? —Esusën cac:

¹¹ —Ai, nibëdosh —qesho tantiashien: —Ëmbimbo mibi cuënoten senquo iquembique. Mibi icsaid ënash bédamboec tabadec nid, champi —capondash Esusën. Adoac chido nidondash.

Pabiate cuembo icnuc tantiamequid

¹² Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshënquido tantiamequin padpiden chuioapondash. —Pabiate cuembo icnuc con Pan bédamboen iste matses tantiamequidquo nebi. Ëmbi tantiamiac ëbi tantiaquido icsateuidi bunenquo yanec bédamboec tabadte buncuenendac. Adec ëbëd tabadtequid yanendac —quepondash Esus.

¹³ Adsho tantiash abi chieshënquido: —Mibentsëqui: “Adquid nebi,” qesho tantiatiapimbo iquebi. Muequien mibi nechitec. Matses daëdshun chiac bédambo ictsiash —quepondash.

¹⁴ Adsho tantiash Esus: —Èbibi abimbo cadebi. “Con Pa yacnuësh chondash anobidi nidendabi,” quec muainquo iquebi. “Aton papa yacnuësh choash anobidi Esus nidoaindac,” quequin ma mimbi èbi tantienquo icboc.

¹⁵ Cadidia yacnuësh choquid matsesuidien mimbi èbi danec. Adquid danquin mimbi icsamboen chiec. Èmbien abimbo chiec. Abimbo chuiquid icquin: “Nèid icsambo iqueque. Cuidnuna. Nèid bédambo iqueque. Cuidenquo icnuna,” quequin nèbi chienquo iquembi.

¹⁶ Aden chuiquin abimbo chuistsiambi. Èmbentsèqui chienquo icquin èbi chomiondaid Nuquin Papabèdtambi chuiquin abimboshè chuistsiambi.

¹⁷ Nuquin Papan chiaidquo Moisesèn naden dada uapampic. “‘Icsaosh,’ quequin daèdshun chuisho tantiash: ‘Abimbo chiec,’ quequid yendac. Adecbidi: ‘Bédambo iquec,’ quequin daèdshumbidi chuisho tantiash: ‘Abimbo chiec,’ quequid yendac. Abentsècshun chuishoen mua caquid yendac,” quequin Nuquin Papan chiaidquo Moisesèn dada uapampic.

¹⁸ Aden Moisesèn dada uampid tantiashun èmbentsèqui chienquo iquembi. Èbi chomiondaid con Pabèdtantsèqui chiemi —quepondash Esus.

¹⁹ Adsho tantiashun abi chieshènquidon: —¿Mitsimbo papa icpec? —capondash. Adoaquien: —Con Pa èbèda ma mimbi tantienquo icboc. Èbi tantiaquimbien mimbi con Patsen tantiatsiac —quepondash Esus abi chieshènquido chiec.

²⁰ Abi chieshènquido onquecuededec quènèn tabadnubi aid quènè cachoctsèqui Nuquin Papa tantiaquin piucquid menequin nauedte tabècacoshon Esusèn chuipondash. Adec Esus anoentsèqui tabadsho abi chieshènquidon bedabi icpondash. Nuquin Papa: —Ma èmbi tantiapadènquo matsesèn unès uanu —quenec Esus bedabi icpondash.

Utsibon Esus tantiauida

²¹ Adnubien Esusèn abi chieshènquido padpiden chuiopondash. —Nidendabi. Èbi nidan èbi nibènquin mimbi èbi istuidenquo iquendac. Ambi chiaid niac-niacquido icsho Nuquin Papan bédamboen isambobi mibi unèsendac. Adash èbi nidacno mibi nidtiapimbo iquendac —quequin chuipondash Esusèn.

²² Adsho tantiash Esus chieshènquido: —¿Abibida Esus cuesuniadpec? Abibi cuesuniadash Nuquin Papan icsaido cuidacno nidtsiash. Ambo nuqui nidtiapimbo iquec. ¿Aden chiecta: “Èbi nidacno mibi nidtiapimbo iquec,” quepec? —quepondash abi chieshènquido.

²³ Adsho tantiash Esus: —Mibi matses nec. Èbien con Pa yacnuësh chondaidquo nec.

²⁴ “Adquid icsho èbi tantienquo icquid unèsacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bédamboen isabi mibi unèsendac,” mibi caombi —quepondash Esus.

²⁵ Adsho tantiash abi chieshènquido: —¿Mitsipadquid icquin èbi aden chie? —quepondash Esus caic. Adoaquien: —Èmbi chianeboedequiobi mabi neyoc —queoapondash Esus.

²⁶ Adashic padpidec: —Mimbi naid dadpen chuiquin mibi cuidte chiendambi. Èmbembi chienquo icquin èbi chomiondaid muesanquo chiaidquo chiendambi. Aidèn chiaiduidi matses abitedi chiendambi —quenubien

²⁷ Esus chieshènquidon: —Abi chomiondaid Nuquin Papambo nec —quequin tantienquo icpondash.

²⁸ Aden tantienquo icsho isun Esusèn padpiden chuiopondash. —Matsesmaidquo icshobi èbi cuesten dectanshumbic mimbi èbi tantiaibenendac. “Ambi chiacpadquidshenda nepadene. Ambembi chiaid chienquo icquin aton Papan chiaidquo chuiquin aidèn chiacpadomboenshenda napadene,” quequin èbimbo mimbi tantienquo —quepondash Esus.

²⁹ Adashic padpidec: —Nèbi èbi chomiondaid èbèd iquec. Aid bédambo icmenuen ambi chiacpadomboen nasho isun èbi nianenquo iquec —quepondash Esus.

³⁰ Adsho tantiashun: —Abimboen Esusèn caic. Nuquin Papa yacnuësh choquidien nec —qeshun Esus tantiauidtsèccondash dadpeshun.

Satanasèn yuabo nec, quequin Esusèn chiaid

³¹ Adsho isumbien Esusèn abi bèdiactsèc tantiauidtsècboedo chuipondash. —Èbi tantiaquidèn èmbi chiacpadomboen natiadquo iquendac.

³² Nuquin Papabèda èbi aden tantiasho icsamianquidèn yua icboedi aidèn yuapenquo mibi icmetsiambi —quepondash Esus abi tantiauidtsècboedo chiec.

³³ Adec Esus: —Yua —qesho tantiashien: —Abadauan yampidèn tsyuecquido yec utsin yuacmaido nebi. Tantienquo icquin mimbi icsamboen chiec. ¿Atotsieshun: “Mibi yuapenquo icmetsiambi,” quequin èbi chio? —capondash abi tantiauidtsècboedon Esus chuiquin.

³⁴ Adoaquien: —Tantia. Mibi abimbo chuinu. Uidën uachimboen icsambo icquidën ambembi abi icsaid ëntiapimbo iquec. Abembi bédambo ictiapimbo iquec.

³⁵ ¿Mitsipadquid nuquin matsesën yuaid icpec? Aton madopen yec icsambo icsho ichon cuemequid. Aton madombo bédamboen isquid.

³⁶ Aden con Pan aton Madombo icsho ëbi bédamboen isquin ëbi tantiaquidotsen bédamboen isendac. Aden ëbi tantiaquido bédamboen isquin bédamboec tabadte bumequin abi yacno ëbéd tabadtequido icmendac —quepondash Esus.

Satanasën madobimboecquido chiaid

³⁷ Adshumbic Esusën abi chieshënquido chuioapondash. —“Con tsusedpa Abadauan icpampic,” quequin mimbi abimbo chioic. Adboedëmbi ëbi cuesunetiadquio mibi iquec. Ëmbi abimbo chuisho tantiate bunenquio icquin ëbi cuesunetiadquio mibi icpec.

³⁸ “Con Pabéd tabadquin isondambi,” quequin ëmbi bédamboen chuisho tantienquio icquin min papabimboecquidën chiacpadomboen mimbi naindac —quepondash Esus abi chieshënquido chiech.

³⁹ —Min papabimboecquidën chiacpadomboen mimbi naindac —queshobien: —Con tsusedpa Abadauanën nacpadomboen mambi napaboc —capondash Esus chieshënquidon. Adoaquien Esus: —Ma mimbi adoenuquo yoc. Abadauanën nacpadomboen naquin mimbi bédamboen natsiac.

⁴⁰ Bédamboen natiapimbo icquin mimbi ëbi cuesunetiadquio iquec. Nuquin Papan chiaidquio abimbo chuisho mimbi adotiadquio iquec. Nuquin Papan chiaid tantiec ma Abadauan cuesuniantiapimbo icpampiyoc.

⁴¹ Min papabimboecquidën namiacpadomboen naquidien mibi nec —capondash Esusën abi chieshënquido chuiquin. Adoaquien: —Mambi Nuquin Papauidsëqui tantieyoc. Utsi tantiatiapimbo icquin Nuquin Papauidsëqui con pa caimbi —quepondash Esus chieshënquido.

⁴² Adsho tantiasien Esus: —Nuquin Papambo tantiaquimbien mimbi ëbitsen tantiasiac. Ëbemi choenquio iccondabi. Nuquin Papan: “Matsesbéd tabadec nid,” caquini chondac. Adoaic icsho Nuquin Papa tantiaquidën ëbitsen tantiasias.

⁴³ ¿Mitsipadquid yec ëmbi chiaid tantias: “Tantiadenquien icpec,” quepe mibi? Ëmbi abimbo chuisho tantiate bunenquio yec pamumédacimboec mibi iquec.

⁴⁴ Min papabimboecquid Satanac nec. Aid bunacpadenuidi mimbi natiadquio iquec. Ëndenquimboshë Nuquin Papan tauamboen matses uanubi min papabimboecquid cuesunianquidquio nepampic. Aton padibi nec. Nuquin Papan chiacpadomboen namenquio yec chieshë nec muaquidquio nec. Aton padibi icquid yec matses muamequidquio nec. Aidën madobimboecquin mimbi ëbi tantiatiapimbo icpec.

⁴⁵ Ëmbi Nuquin Papan chiaidquio abimbo chuisho mimbi tantiatiapimbo iquec. Icsambo icquidën ambembi chuisho mimbi tantienquio yaquien bédambo ictsiash. Mabi icsambo icquidpenquio neyoc.

⁴⁶ ¿Tsuntsimbini: “Mibi icsaac,” capatsias? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquio mimbi mibi?

⁴⁷ Nuquin Papa tantianuequidën Nuquin Papan chiaidquio chuisho tantiasias. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec —quepondash Esus abi chieshënquido chushcaic.

Esus chieshënquido cuënoten siantiapambo yanaid

⁴⁸ —Nuquin Papa tantiesabombo ma mibi neyoc —Esus quesho tantiasien abi chieshënquido: —Ma mibi podobitsi icsa dapuduedash neyoc. Tantiadenquio yec mibi onquec. Samadia yacnocquidobimboec icsamboshë ma mibi iqueyoc —caquien

⁴⁹ Esus: —Mabi podobitsi icsa dapuduedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquio abimbo mimbi chiech,” catiadquidi mimbi ëbi: “Muec nec,” capec.

⁵⁰ “Mabi: ‘Bédambo iquec,’ canu,” quenquio iccobi. Con Pambien: “Ma matsesën con Mado: ‘Bédambo iquec,’ canu,” ëbi caindac. “Bédambo iquec,” canesabotedi aidëmbi cuidendac.

⁵¹ Tantia. Mibi bédamboen chuinu. Ëmbi chiacpadomboen naquidquio unësenquio ictsiash —quepondash Esus ompoachimboen chiech. —Ëbi tantiaquido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc —quequin tantiec adondash.

⁵²—Unësenquo ictsiash —quesho tantiash Esus chieshënquido: —Ma mimbi tantiadenquo icnuc chuipayoc. Adsho: “Mayan icsa dapuedashien nec,” mibi caombi. “Ëmbi chiacpadomboen naquidquo unësenquo ictsiash,” quequeuien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bédamboen isaidombo abitedi unëspampic.

⁵³ ¿Aido Nuquin Papan namiampidombo icnuc Nuquin Papan namequiaidquida ne? ¿Mitsipadquid mibi nepe? Muequeuien mibi nechitec —quepondash.

⁵⁴ Adoquien Esus: —Ëmbemi: “Mabi: ‘Bédambo iquec,’ canu,” quequin ëmbi nac icsambo ictsiash. Mimbi: “Aiduidtsëqui tantiembi,” caboedëmbini: “Nëid con Mado Esus bédambo iquec,” quequin ëbi comapenen tantiaquin namec.

⁵⁵ “Tantiembi,” mimbi caboed Nuquin Papa ma mimbi tantienquo yoc. Ëmbien Nuquin Papa tantiaquiec. “Aid tantienquo iquembi,” quec mibi yacpadec muatsiabi. Mambi con Pa tantiaquin ambi chiacpadomboen nayoc.

⁵⁶ Mimbi: “Con tsusedpan nacpadomboen naimbi,” caboed Abadauan: “Nuquin Papa yacnuësh chonash bédambo icmianquidquo matsesbëdi tabadendac,” quequin tantiec cuis-honquepadenec. Nuquin Papan tantiamiac ëbi aden tantiapadenec —quepondash Esus.

⁵⁷ Adsho tantiashun Esus chieshënquidon: —Ma mimbi min seta 50tedi matamiambo yoc. Adash ma mibi tsusiobudabi iqueyoc. Abadauanën mibi tantiatipimbo icpampic —caquien

⁵⁸ Esus: —Abimbo caimbique. Tantiata. Abadauan tishabi icnubi ëndenquimboshë ictenebi. Nuquin Papapadquidquo nebi —quepondash Esus.

⁵⁹ Adsho tantiash nëishtanequien: —¿Icsamboenda chuipec? ¿Nuquin Papada muauapebac? —quetanquin cuënote dapa bedtanequin: —Seshunenu —cac siadenquo yec ompodanec cuempondash Esus.

9

Esusën bëshuaid bédamiaid

¹ Yuecquo ictaniash chonoadenquo icte ushën capucuenequin Esusën dada bëshuaid istuidpondash. Anin bëshuacshobi tishnëdaid niøndash.

²⁻³ Aid istuidshumbimbi: —En chui, Icho. Tantianu. ¿Atotsieshun Nuquin Papan bëshu uapanëdash? ¿Aton papabëd ani icsasho isun Nuquin Papan cuidquin bëshu uanëdaida nepec? —caquien: —Padenquo. Utsi icsasho isun Nuquin Papan nambo icpanëdash —quepondash Esus. Adsho tantiashun padpiden: —¿Tishabi icnubi: “Abibi icsaindac,” quequin tantiashun Nuquin Papan bëshu uanëdaida nepec? —caondambi. Adoquien: —Padenquo. “Abibi icsaindac,” quequin tantiashun Nuquin Papan bëshu uambo icpanëdash. “Ma con Madon comapenen tantiaquin ismenu,” quequin ambi tantiacpaden Nuquin Papan bëshu uapanëdash. Adoacsho anin tishnëdaid nec.

⁴ Nëbi ambi chiacpadomboen nanuna. “Nainabi inchëshmane,” quiaish comapenec chonoadnuna. Inchëshën matses chonoadesa —quepondash Esus. —“Con Pan tantiaidtedi nainabi unëshmane,” qeshun unëshabi icquin con Pan chiaidtedi nainandambi —quequin tantiec: —“Nainabi inchëshmane,” quiaish comapenec chonoadnuna —quiondash Esus.

⁵ Adashic: —Matsesbëd icquin Nuquin Papa bédamboen tantiamequidquido nebique. Nëidtsen tantiamenu

⁶ —quetanquin nidaidën uicchun cuishtucatanquin nidaidbëdta uicchun cabiuntsëcshun bëshuaid bëbitaccapondash.

⁷ Adotanquimbic: —Acte tiquidimbo icquid Sidoe caidën bëpamëdec nid —cac nidash bëpamëdtanec bédamboen isec aton shubuno nidpac caondash. Aid acte con onqueten Sidoe quequin buanaid caic.

⁸ Aton shubuno nidshobi aton shubu anoentsëcquidon bëshuacboed istuidpac caondash. Adembidi utsibon: —Bëshuaid nebique. Piucquid beccho —quedonetsec tsadtsëcsho isboedontsen istuidpac caondash. Istuidshun: —¿Nuqui isboedquiobida nepec? “Beccho,” ¿quedoneboedquiobida nepec? —cabededpac caondash.

⁹ Utsi-utsiec: —Ai, aidquiobi nec —quenubi utsibo: —Padenquo. Aidbimboecquidien nec —quesho tantiash: —Aidi nebi —quepac caondash bëshuacboed.

¹⁰ Adsho tantiashun: —¿Mitsipadec bédano? —caquien:

¹¹ —Esus caidën bédamioshi. Nidaidën uicchun cuishtucashun nidaidbëdta uicchun cabiunshun bëbitaccashun: “Acte tiquidimbo icquid Sidoe caidën bëpamëdec nid,” cac nidash bëpamëdec bédanobi. Nëbi bédamboen isembi —quepac caondash bëshuacboed.

¹² Adsho tantiashun: —Mibi bédamequid ¿mitsimbo iquec? —cac: —Tsaudi —quepac caondash bëshuacboed.

Bëshuaid bédameboed chuimiai

¹³ —Bëdamioshi —quesho tantiashun: —¿Abimboda capec? Ma con chuiquidon chuimenu —quequin padiseyobo yacno bëshuacboed buampac caondash.

¹⁴ Buanacshobien padiseyobon: —Chonoadenquoio icte ushën nac caosh —quequin tanti-aquin:

¹⁵ —¿Mitsipadec bëdano? —caquien: —Esusën nidaidbëda uicchun cabiunshun bëbitaccac bëpamëdec bëdänshun nëbi bëdamboen isembi —quepac caondash bëshuacboed.

¹⁶ —Bëpamëdec bëdanobi —quesho tantiashien chuiquido onquecuededpac caondash. Utsi-utsiec: —Nuquin Papa tantiaquid icquin Nuquin Papan chiaid niac-niaquenquoio ictsi-ash. Chonoadenquoio icte ushën nëid bëdamequin ma Nuquin Papan chiaid niac-niacpayoc —quenubien utsibo: —¿Nuquin Papa tantiesanda aden bëdamepatsiash? Ma comapenen tantiaquin nacnempaboc —quepac caondash. Adshumbic abitedishun: —Esus icsambo iquec —cainquoio icquin

¹⁷ bëshuacboed chuipac caondash. —Mibi bëdamequid ¿tsutsi mimbi cape? —caquien: —Nuquin Papan: “Yuecshun naden naindambi,” quequin chiaidquoio chuiquidien nec,” caimbi —quetanec bëshuacboed nidpac caondash.

¹⁸ Aid nidnubien Esus chieshënquido: —Bëshupenquien niash. Muequien niashe. Anibëdta amë chuimenun chomenuna —quetanquin

¹⁹⁻²⁰ chomeshun bëshuacboed cain: —¿Min madoda niosh? —capac caondash. Adoac: —Ai, con mado niosh —qeshobien: —¿Bëshuacshobida tishonda? —capac caondash. Adoquien: —Ai, bëshuacshobi tishonda nec —ani qeshobien: —Bëshuaid ¿mitsipadec bëdanosh? —capac caondash.

²¹ Adoquien: —Tsaudi. Bëdänsho isambo iccombi. ¿Tsundambien bëdamechitash? Dada ënden caniaid neque. Aidi chuime —quepac caondash bëshuacboedën tita amëbëdi.

²² —“Nuquin Papa yacnuësh choquid Esus nec,” quequido Nuquin Papan chiaid chuibante shubun puduedmenquien ictiad —quequin chuiquidon chiaid tantiash dacuëdec:

²³ —Dada ënden caniaid neque. Aidi chuime —quepac caondash.

²⁴ Adoac padpiden bëshuacboed chomeopac caondash padiseyobon. Chomish: —“Nuquin Papan bëdamioshi. Nuquin Papa bëdambo iquec,” ¿quecta icco? Ma Esus Nuquin Papan chiaid niac-niacquid neyoc. Ma icsamboshë icquid neyoc —quepac caondash.

²⁵ Adsho tantiash bëshuacboed: —Icsamboshë icquidien Esus nechitec. Aden tantienquoio iquembi. Mabi bëdameboc. Isenquoio icboedëmbi mambi nëbi bëdamboen iseyoc. Adenuidtsëqui tantiembi —quepac caondash.

²⁶ Adsho tantiashun: —¿Mitsipaden mibi bëdamiosh? —caquien:

²⁷ —Mambi mibi chuiapoboc. Ma mimbimbobi tantienquoio icboc. ¿Atotsi quequin padpiden: “Èbi chui,” cai? ¿Esus tantiatiadquioda icti? —capac caondash bëshuacboedën.

²⁸ Adsho tantiash nëishtanquin chushcapac caondash. —Mibi Esus tantiaquidquoio nec. Mibi icsambo iquec. Èbien nuquin tsusedpa Moises tantiacquidquoio nec.

²⁹ “Moisesien Nuquin Papan chuiquin namepampic,” quequin tantiembi. ¿Tsuntsin chiac mibi bëdamequidën napash? Ma mibi bëdamequid ëmbi tantiacmaidquoio neyoc —quepac caondash chuiquido.

³⁰ Adoquien bëshuacboed: —¿Abida cai? “Dadpenquoio tantiembi,” ma mibi quepacoboc. Adboedi: “Èmbi tantiacmaidquoio nec,” ¿quecta ique? Mimbi tantiacmaidëmbini bëdamiosh. Ma bëdambo yoc.

³¹ Abi icsaid ënabi icquidën chianesho Nuquin Papan tantienquoio ictsiash. Abi tantiaquin ambi chiacpadomboen naquidën chianiac tantiashun Nuquin Papan nashuntsiash.

³² Anin bëshuacshobi tishaid bëdamenquoio ictenec. Adquid bëdamequid nibëdpadenecc.

³³ Nuquin Papa tantienquoio icquin Esusën ëbi bëdamenquoio ictsenosh. Nuquin Papa tantiaquimbini bëdamiosh. Ma Esus bëdambo icquid neyoc —quepac caondash bëshuacboed.

³⁴ Adsho tantiash nëishquiashon: —Bëshuacsho tishaid yec mibi icsamboshë iquec. Icsactsëcquidën chuitiapimbo iquebique. Baded nidec nid. Nëmbo padpidec puduedenda —quequin cuemepac caondash. Aden Esus chieshënquidon bëshuacboed Nuquin Papan chiaid chuibante shubun padpiden puduedmenquoio icpac caondash.

Ambi bëdameboed istuidoashun Esusën chiaid

³⁵ Adnubien: —Mimbi bëdameboed cuemiac caosh —quesho tantiashun Esusën ambi bëdameboed istuidpondash. Istuidshumbic: —Nuquin Papan matsesmaidquoio caic: “Nuquin Papa yacnuësh choquid nec,” ¿quequina mimbi tantiape? —capondash Esusën ambi bëshuaid bëdameboed chuiquin.

³⁶ Adoquien: —¿Tsutsi neque? Isnu —cac:

³⁷ —Èbi nec. Mibi bëdameboedi nëbi —caquien:

³⁸ —Ai, Nuquin Papa yacnuësh choquid Quidistu caidien mibi nec. Comapenen tanti-aquin nabanquidquo yec mibi bédamboshê iquec —quetanec ismenuec danêshên tinquebudpondash.

³⁹ Adsho isumbic Esusên matses abi datsidadsho chuipondash. —Nuquin Papa matses bédamboen ismequid nebi —quiash matsesbêd tabadec Nuquin Papa yacnuësh chondabi. Êmbi bëshuaid bédamiac tantiesa icboedêmbi êbi tantiasho Nuquin Papan bédamboen isec. Utsibo: “Nuquin Papa tantiaquiemi,” quec muaquidon êbi tantiatipimbo icquin Nuquin Papa tantienquo iquec —quepondash Esus.

⁴⁰ Adsho tantiasnêishtanec: —¿Nuquin Papa tantiesabodabi nedi? —quepondash Padis-yobo.

⁴¹ Adsho tantiasnien: —Nuquin Papa tantiesambo icsho êmbi tantiamiac Nuquin Papabêdta êbi tantiasho Nuquin Papan mibi bédamboen istiasn. “Nuquin Papa tantiaquiemi,” quec muaquin ambi chiaid bédamboen tantienquo icsho Nuquin Papan mibi bédamboen istiapimbo iquec —quepondash Esus abi chieshênquido chiec.

10

Obecabimboecquido chiaid

¹⁻² Adshumbic abi chieshênquido Esusên padpiden chuioapondash ompoachimboen chuiquin. —Tantia. Mibitedi chuinu. ¿Mitsipaden nuquin matsesên aton yua obeca dadpen dayun uaquin napec? Obeca daquênê uaidên puduedte shêcuênquido obeca icbo puduedquid. Daquênê uaid mayadec puduedquidien ampequid nendac.

³ Obeca icbon: “Puduednu. Shêcne,” cac ambi: “Con yua ista,” caidên shêcnequid. Adshumbic puduedtanquin ambi aton yua cuêmabanacpaden cuêmabanquin: “Cho,” caquid icbon. Adoac icbo tsibanquid obecan.

⁴ Adshobic icbon daquênê uaidên tabadquid abitedi niecumesnun abi buanec bëyuc nidsho aton yuan tsibanquid. “Con icbon êbi cuêmocpadamboen cuênec. Con icbo nec,” quequin icbo tsibanquid obecan.

⁵ Utsibon cuênaquien tsibanenquo yec dacuêdec cuenquid obeca. Icbouidtsêqui tsibanquid obeca nec —Esus qesho tantiasnien:

⁶ —Tantiadenquo yec mibi onquec —quepondash Esus chieshênquido.

⁷ Adsho tantiasnun Esusên chuipondash. —Tantia. Mibi bédamboen chuinu. Obeca daquênê uaid puduedte shêcuêbimboecquid nebi.

⁸⁻¹⁰ Shêcuênuidi obeca puduedquid. Adecbidi êbiuidtsêqui tantiasn Nuquin Papa yacno matses puduedtsiasn. Êbi tantiesain Nuquin Papa yacno puduedtiapimbo iquendac. Êbi tantiaquido cain obeca caombi. Aido bédamboen dayun uaquin bédamboec tabadquid icmendambi. Aido unêsacsho uincumeshun Nuquin Papa yacno êbêdi tabadmendambi. Adecec êbi bédambo icnuc ampebimboecquid abi iquec. Êbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid tantiaquidon Nuquin Papa tantienquo iquec. Aido Nuquin Papan cuidtequidombo nendac. Padnuen êbi tantiaquidon mimbi chiaid tantienquo icquimbi êmbi chiaiduidtsêqui tantiendac —quepondash Esus abi chieshênquido chiec.

Êbi tantiaquido dayun uaimbi, quequin chiaid

¹¹ Adashic Esus padpidec onqueoapondash. —Obeca icbobimboecquid nebi. Icho cudasacimboec êbi tantiaquido cudasnuec êbided cuidadec unêsendabi.

¹²⁻¹³ Utsiboen adenquido ictsiasn. Piucquid bednuen obeca isquidbimboec iquec. ¿Mitsipadopaid obeca isquidên? Bêdi dapa chosho isun: “Con napenquo nec,” quetanquin badedi obeca nianquid. Obeca nianacsho bêdin acshun siaquid. Aden utsi acsho isash acshun secabi icquid niquequid obeca. Obeca isquidên icbonpenquo nianacimboen ma mimbi icsamboen napayoc. Nuquin Papa tantiate bunquido ma mimbi Nuquin Papambo tantiamenquo iqueyoc —quepondash Esus abi chieshênquido chiec.

¹⁴⁻¹⁵ Adashic abi onquec: —Êmbien matses bédamboen tantiamenquin êbi tantiaquido dayun uaindac. Nuquin Papabêd êbi tantianacpadquiec êbi tantiaquidobêdtsen tantiananquiebi. Aden êbi tantiaquido tantiec Nuquin Papa cuidmenquo icnuec êbided cuidadec unêsendabi.

¹⁶ ¿Nêid matses isadaidboudidtsêqui tantiectabi adec unêspadi? Padenquo. Matses utsibontsen Nuquin Papan tantiamiaido icquin êbi tantiendac. Aidobêdta nêid matses con matses caquin abitedi bédamboen dayun uaindami.

¹⁷ Con Pan tantiamiacpadec êbided cuidadec unêsendabi. Aden ambi chiacpadamboen êmbi nasho con Pan êbi tantiaquiec. Unêsash êbemi uincuenendabi.

¹⁸ Matsesën ambembi ëbi unës uatiapimbo ictsiash. Ëmbi tantiacpadqueiqui matsesën unës uadendabi. Adecbidi uincuentiadquio yec ëbembi uincuenendabi. Aden con Pan naniacpadomboen naindambi –quepondash Esus.

¹⁹ Adsho tantias con matses chuiquido nadec onquecuededpac caondash.

²⁰ Esus chieshënquido: –Podobitsi icsa dapudedash tantiadempambo yec onquepec. ¿Atotsi quequin aid tantie? Aidquio tantiatiapimbo iquendabi –quenubien

²¹ utsibo: –Podobitsi icsa dapudedashita ¿adec onquepatsiash? Bëdamboequien onquiosh. ¿Podobitsi icsa dapudedaidënda aden bëshuaid bëdamepatsiash? Bëdambo icquidëmbien adotsiash –quepac caondash.

¿Quidistu caidta ne? quequin chiaid

²² Yuec ictanec con matses cuëdënuec Edusaden yacno cho-chopondash. “Nuquin Papa tabadte shubu uashunaidnoshon tsusedpabon icsa uaquido cuemenëdaid ushë tantiec cuëdëntanu,” quianec cho-chopondash. Ambo iquenuampamboec icpondash aton padibi.

²³ Iquenuampamboec icnubien Esus Nuquin Papa tabadte shubu uashunaid daquënë uaidën puduedash shubunquio puduedabi quënë cachoqui capupondash. Aid quënë cachoc: “Sadomonën nacenaid nec,” caondash.

²⁴ Ambo Esus capusho isashien con matses chuiquido Esus natia datsidadshun: –En sebadënuquo chui. Tantienuquo yec tsadiapiambo iquebique. Mimi cuembo chuisho tantiatiadquio iquebi. ¿Nuquin Papan chomiaid Quidistu caidta ne? –capondash con matses chuiquidon.

²⁵ Adoaquien Esus: –Mambi mibi chuiapaboc. Ma mimimbobi ëbi tantienquo icboc. Con Pan: “Adota,” cac comapenen tantiaquin nabandeniombi. Mibi bëdamboen tantiamenuen adodeniombi.

²⁶ Adosho isash mibi: “Ai, Nuquin Papa yacnuësh choquidien nec,” quetiadquidëmbi mimi ëbi tantienquo iccoc. Nuquin Papan tantiamiabi yaico icquin mimi ëbi tantiatiapimbo iquec.

²⁷ Con Pan tantiamiaidien ëbi tantiaquid yanendac. Adshun obecan aton icbo tsi-banacimboen ëmbi chiacpadomboen natiadquio yanendac.

²⁸ Aido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc. Unësabi icsho: “Con na nec,” queshun bëdamboen dayun uaindambi. Ëmbi adoacsho bedshunacimboen icsambo icquidën yuaquin Nuquin Papan cuidtequido icmeoatiapimbo iquendac.

²⁹ Con Pansen ëbi tantiaquido dayun uaindac. Abipadquid utsi nibëdquiecnuc con Pan ëbi tantiaquido dayun uasho adembidi mënchictiapimbo iquendac.

³⁰ Aden ëbi bedshuntiapimbo icquin con Patsen bedshuntiapimbo iquendac. Con Papadquidquio nebi –quepondash Esus.

Cuënoten seshunetiadpambo yanoaid

³¹ –Nuquin Papapadquidquio nebi –Esus qesho tantias nëishtanquin cuënote dapa bedshun abi chieshënquidon Esus seshunetiadquio icoapondash.

³² Adsho isash: –Sianenda. Con Pan naniacpadomboen comapenen tantiaquin nabanombi. ¿Ëmbi adobansho isboedëmbidabi seshunepe? –quepondash Esus.

³³ Adoaquien: –¿Bëdamboen nabanshodambi: “Mibi seshunenu,” cadì? Padenquio. “Con Papadquidquio nebi,” quequin Nuquin Papa muauasho mambi mibi nayoc. Matses icquin mimi aden icsamboen chuisho tantiasumbimbi mibi seshunec –quepondash abi chieshënquido.

³⁴ Adshobien Esusën: –Nuquin Papan chiaidquio nuquin tsusedpan naden dada uapampic. “Nuquin Papa nadec onquec: ‘Min matsesën ëmbi chiacpadomboen nasho: Ëbipadquid nec, caombi,’ queposh Nuquin Papa,” quequin dada uapampic.

³⁵ Matses caic: “Ëbipadquid mibi nec,” quequin Nuquin Papan chuiampid isun mimi: “Nuquin Papan icsamboen chiac,” quequin chiambo iquec. “Muesambo icquin Nuquin Papan icsamboen chuitiapimbo iquec,” queshun mimi chushcambio iquec. Nuquin Papa adoambobi ¿ëbida chushcai?

³⁶ Nuquin Papan naniacpadec abi yacnuësh chonaid nebi. Adquid yec: “Nuquin Papan Madombo nebi,” quiobi. Ëbi adsho tantiasshun ¿atotsi quequin ëbi chushcai? ¿Nuquin Papadambi muauadio? Mambi abimbo caboc.

³⁷ Ëmbi chiaidquio tantiatiapimbo icquimbi ëmbi naidquio tantiatia. Ëmbi Nuquin Papan naniacpadomboen comapenen tantiaquin nabanenquio icsho isun mimi ëbi mua cat-siac.

³⁸ Con Pan namiacpadomboen nasho isun: “Ai, ambi chuibocpadquidshenda nepec,” èbi cata. Èmbi chiaiduidtsèqui tantiatiapimbo icquin adota. Adshun: “Ai, Nuquin Papa-padquidquibidien Esus nec,” quequin mimbi tantiabentsiac –quepondash Esus.

³⁹ Adsho tantiash padpidec nëishtanquin abi chieshènquidon: –Bedchitono –caqui bedadenuo icpondash.

⁴⁰ Adashic acte Odan caid potias con shënision tauaquin matses acten mentodenecono Esus nidoapondash. Ambo èbi chedobèdi tabadpondash.

⁴¹ Adshumbic Esusèn comapenen tantiaquin ismequin ambo icquido chuibampondash. Adsho tantiashun: –Uan padon chuidenedshenda nëid nepec. Ambibi comapenen tantiaquin ismiambobi comapenen tantiaquin nabanquid chuipadenec. Esusèn adobansho isun: “Nëid chuiquinshenda Uan padon abimbo capadenec,” caimbi –cabededpondash anocquidon.

⁴² Adshumbic: –Nuquin Papa yacnuësh choquidien Esus nec –quequin Esus tantiabempondash.

11

Dasado caid unèsaid

¹ Udeya yacnuësh Esus cuembon Dasado Esusèn utsibimboecquid unèstiadsècquio yanac caondash. Shubu dadpen icquid Betania caid yacnocquid niondash. Aibdèd icquid aton chuchu daèd icpondash. Abentsèc Madta icnuc utsi Madia icpondash.

² Madian aton manèdaidèn ucbanquin Esus tanoshcabi icnuc adec aton utsi unèstiadsècquio yanac caondash.

³ Adnubien aton chuchun: –Esus chuitan –cac aton matsesèn Esus chuituidpondash. –Mimbi con utsi caidquio unèstiadsècquio yanoshe. En isec cho –catuidpondash.

⁴ Adoaquien Esus: –Chiata. ¿Unèsash chodquequionoshida Dasado nepadiash? Padenquien iquec. “Ma matses: ‘Nuquin Papa bèdambo iquec. Ambi chomiondaid aton Madambotsen bèdambo iquec,’ quenu,” qeshun naindambi –quepondash.

⁵ Adbosh Dasado aton chuchubèdta tantiaquidquio yequi

⁶ badedquio nidenquio yec anobi daèdec ushpondash Esus.

⁷ Daèdec ushumbic Esusèn: –Nuqui icbocno Udeya caidèn padpidec nidnu. Nid –capondashi.

⁸ Adoaquimbi: –Icho, ma mibi anoshon cuènoten seshunetsempondac. ¿Anobidida nidtiad? ¿Ada: “Seshunequionoshe,” cadec? –capondambi.

⁹⁻¹⁰ Adoaquien cuembo chienquio icquimbi: –Badiadèn capuec tocoshquetanec uebudesa. Inchèshèmbien tocoshquetanec uebudquid –quequin Esusèn chuipondashi. –Nèbi èbi unès uatiapimbo iquec. Badiadèn nidacimboben con Pan tantiaidtedi nainabi icsho èbi unès uatiapimbo iquec. Inchèshèn uebudacimboben ambi tantiaidtedi nainshobini ambi tantiapadènquibi matsesèn èbi unès uaindac –quequin tantiec adondash Esus.

¹¹ Adshumbic Esusèn padpiden ompoacimboben chuoapondash. –Èmbi con utsi caid Dasado ushtoaccoshe. Isucumec nidnu. Nid –quesho

¹² tantiashini: –Ma ushnu. Ushash isucunquid –quepondac.

¹³ Esusèn Dasado unèsaid chuinubi Dasado ushe dantsèccondambi.

¹⁴ Adnubien Esusèn seabèdènquio chuipondash. –Dasado unèsacchosh.

¹⁵ “Bèdamec nidtiadquidi niobi” ¿quepectabi ique? Padenquio. Mibi caic: “Ma nëidon èbi bèdamboen tantianu,” qeshun Dasado unèsò istanambo iccombique. Nèbi mibi ismec nidnu. Nid

¹⁶ –caquien: –Ai, abèdquibi unèsac nidnu. Nid –quiampondash Tomas anin abi ushèmbi daèdpambo tishaid. Adanec abitedi nidondash.

Unèsaid uincuemquidquio nebi, quiaid

¹⁷ Adashic unèsacno anoentsèqui Esus chopondash. Choshon: –Unèsacsho chococash daèd-daèdquiec ushobi –quetsècquiec onquecuededsho tantiatuidpondash.

¹⁸⁻¹⁹ Esus choabi icnuc con matses chuiquido Dasado unèsacnuësh sedenquenuc Edusaden yacnuësh cho-chopac caondash. Unèsaid nèbi ictscnuc tedes quidometedos tiontsècquidèn badedquio cho-chopac caondash. Cho-choash unèsaidèn chuchubèd sedenquec tabadpac caondash.

²⁰ Adnubien: –Esus choec –quesho tantiash Madta bèquedec chopondash aton chibi Madia shubuno sedenquec tsadnubi.

²¹ Choquien Esus bèquedec: –Mibi icnuc con utsi unèsenquio ictsenosh, Icho. Con utsi unèsosh.

²² Mimbi chiacpadomboen Nuquin Papan nèbi natsiash –quepondash Madta: –¿Ada con utsi uincuemetsia? –quequin chuitiadquio yequi.

²³ Adoaquien Esusën: —Min utsi uincuenendac —capondash.

²⁴ Adsho tantiash: —“Ai, yuecash unësaido abitedimbo uincuemete ushën con utsi uincuenendac,” quequin tantiemi —quepondash Madta.

²⁵ Adsho tantiashun Esusën: —Ëbibi matses unësaid uincuemequidquo nebi. Ëmbi tantiapadënquo uincuenendac. Aden ëbi tantiakuido unësacsho uincuemendambi.

²⁶ Ëmbi adoac Nuquin Papa yacno ëbëdi tabadendac padpidec unëstiapimbo yec. Ëmbi aden chuisho tantiash: “Ai, abimbo mimbi caindac,” ¿quequina tantie? —capondash Esusën.

²⁷ Adoaquien Madta: —Ai, adembi tantiemi. “Nuquin Papa yacnuësh choquid Quidistu caidien mibi nec. Nuquin Papan Madombo mibi nec. Con tsusedpabon dada uaquin chuipampidquien nec,” mibi caombi —quetanec

²⁸ nidpondash aton chibi chiec. Nidshun: —Nëmbo cho, chibi. Chuinu —cac aton chibi choshobien: —Esus chosh. Mibi iste bunoshe. En isec cho, chibi —caquien

²⁹ Esus bëquednuec badedi choquin istuidpondash.

³⁰ Shubu dadpen yacnombo choabi icsho Madtan bëquedacnobi Esus tabadsho Madiantsen istuidpondash.

³¹ Adec Madia nidsho isun chococacnobi sedencaic nide danquin abëd sedenquenuequidon tsibanampac caondash.

³² Adnubien Madia Esus istuidtanec dayumbudec sedenquiampondash aton utsi tantiec. Adec shubitanec ënëdash: —Mibi unësquo iccoc, Icbo. Bëdambo icquid mibi nec. Mibi icnuc con utsi unësenquo ictsenosh —quepondash Madia Esus caic.

³³ Adnubien Madia tsibanec cho-choec con matses chuiquido sedenquetuidpondash. Madiabëd sedenquecuededsho istanec: —Ai, unësquo icnuc nec —quias Esus abitsen shubiantiadtsëcquo icpondash.

³⁴ Adec shubiantiadtsëcquo tsadacnuëshien Esus: —¿Mitsimbo mimbi chococaye? En isnu. Nid —quepondash. Adoac: —En isec cho —quianec nidnubien

³⁵ shubinidequi nidpondash Esus.

³⁶ Adec shubinidsho isumbien: —Ma Dasado unësquo icnuc shubieyoc —cabampondash con matses chuiquidon.

³⁷ Adnubien utsibo: —¿Atotsieshun bëshuaid bëdamiondaidëmbi Dasado unëso bëdamenquo icpsh? —quepondash.

Esusën Dasado uincuemiaid

³⁸ Nidquimbi chococacno istuidequi Esus shubiantiadtsëcquo yanoapondash. Nidaid cuënoteuidpambo icquid macuësh tsimpiduc shëcuë uaidën unësaid nauedshun cuënote dapan bëtinacnuësh shubiantiadtsëcquo iccondash.

³⁹ Adashien Esus: —Cuënote bidiacquin shëcuë shëcne —quepondash. Adsho tantiash unësaidën chuchu Madta: —Padi. Ènden pisenashe. Chococash mabi daëd-daëdquiec ushboc —quepondash.

⁴⁰ Adoaquien Esus: —Dacuëndenda. Mambi mibi chuiboc. Mimbi: “Nuquin Papan Madombobien mibi nec,” ëbi casho: “Ëmbi comapenen tantiaquin nabansho mimbi isendac,” mambi mibi capaboc. En na. Baded bëcune —cac

⁴¹ cuënote shëcuë bëtinacid shëcnequin bëcunepondash.

Adsho istanquimbien Esusën abuc isquin Nuquin Papa chuipondash comapenec onquequin. —Papa, ëmbi nëbi chuisho mimbi tantiec. Ëmbi chuibocpadomboen mimbi naindac. Mibi bëdambo iquec, Papa.

⁴² Ëmbi otacquio chianiaid mimbi tantioc. Ëbi datsidadaido tantiamenuen nëbi comapenec onquequin mibi chiemi. “Mibi chuitanquin ëmbi comapenen tantiaquin nabansho isun: ‘Nuquin Papan chomiaidien nec,’ quequin ma nëidon ëbi tantianu,” qeshun comapenec onquequin mibi chiemi, Papa. Padi, aiddtedtsëqui mibi chiombi, Papa —quepondash Esus.

⁴³ Adtanquimbien comapenen cuënquin: —Dasado, puduenec cho —capondash.

⁴⁴ Adoaquien Dasado badedquo puduenanec chopondash abi dashcute dataniacchobi. Unësacsho uesquin dashcuten datanetanquin dashcuten abi bëpucacchobi chopondash. Adec chosho istanquin: —Baded dashcute dachic. Ma nidnu —capondash Esusën.

Nëbien Esus unës uametiaid, quiaid

(Mat 26.1-5; Mad 14.1-2; Duc 22.1-2)

⁴⁵ Aden Esusën ënden unësaidquiobi uincuemesho isashien Madia tsibanec sedenquec cho-chobedo abentse-abentsec: —Nuquin Papan chomiaidien Esus nec —quiampondash.

⁴⁶ Adnubien utsin Edusaden yacno nidshun Esus chieshënquido padiseyobo chuituidpac caondash. —Esusën unësaid uincuemiosh —quepondash.

⁴⁷ Adsho tantiatanquimbien chuiquid dapan abèdtan chuiquid utsibo cho-chomepac caondash padiseyobo yec tsusio dapabo yec quenuc. Aden cho-chomiash tabadec onquepac caondash. —¿Mitsipadotiad? Nuquin matses ismequin comapenen tantiaquin dadpen nabampac caosh.

⁴⁸ Aden Esusèn nabansho isun nuqui èmiabi icsho nuquin matsesèn abitedishun abi chuiquid dapa Esus icmetsiash. Adnubien nuqui yuaquido Doma yacnoquidon ambi chuiquid icmiacmaidquo chuiquid yansho isun nèishun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictsiash. ¿Mitsipadotiad Esus? —quepac caondash chieshèmènkuido.

⁴⁹ Adnubien abèdtan chuiquido chuiquid dapambo aid setan icquin Caipas caidèntsen chuipac caondash. —¿Midapadotsècquien mimbi chiendac? Tantiadentsècquio icnuc ma mimbi chuipaboc.

⁵⁰ Tantia. Mibi bédamboen chuinu. ¿Atotsi quec: “Abitedi unès uaindac,” mibi quepe? Ma nuquin matses abitedi unès uainquo icnueshun Esusded unès uamenuna —quepac caondash chuiquid dapambo abèdtan chuiquido chiech.

⁵¹ Aden chuiquin ambembi chiambo Nuquin Papan oncamiac Nuquin Papan chiaidquio aden chuipac caondash. —Nèid setan abèdtan chuiquido chuiquid dapambo nec —qeshun Nuquin Papan aden oncamiaqui Caipas onquepanèdash. —Matses cuidmenquo icnuec con Madoded cuidadec unèsendac —qeshun Nuquin Papan Caipas aden oncamepanèdash.

⁵² Aden Caipasèn chuinèdaid tantiaquin èmbitsen chuinu. Tantia. ¿Isadaidbouidtsèqui cuidmenquo icnuec Esus abided cuidadec unèstiondash? Padenquo. —Matses utsitsen abi tantiaquid yansho isun abèdi tabadmenuec Esusded cuidadec unèspondash —quequin tantiembi. Nèbi Caipasèn chuisho tantiashun tsusiobon chiaid chuinu.

⁵³ Aden Caipasèn Esus unès uamete chuisho tantiashien Esus chieshènkuido: —Nèbimbobien Esus unès uametiad —quecuededpac caondash.

⁵⁴ —Tsusiobon mibi adosh —qesho tantiatanequien chieshèmènkuido ismenquo yec Esus cuempondash. Cuenequi nidaid utsin nidash masi dapa yacno anoentsèqui shubu dadpen icquid Epadain caid yacno nidpondash. Ambo tabadquin èbi chedo Esusèn chuibampondash.

⁵⁵ Epadain caid yacno tabadnubien Nuquin Papan con tsusedpabo unès uainquo icquin matamiampid inchèsh tantiec cuèdènucc Edusaden yacno con matses nidanepac caondash. Cuèdènc taèabi icnuc mishtemaid mishquidoba Edusaden yacno nidanepac caondash. —Mabi tsusion nesmenu. “Mishtemaid mishquid tsusion nesmiabi icquid cuèdèntemaid,” quedeneque —quianec nidanepac caondash.

⁵⁶⁻⁵⁷ Adshumbien Edusaden yacnoshon Nuquin Papa tabadte shubu uashunaid daquènè uaidèn puduedtanquin Esus iste bunquin nibèntuidpac caondash mishtemaid mishquidon. Nibèntuidshobien: —Nuqui chuiquido nadpac caosh. “Esus istuidshun èbi chuita. Bedshun unès uamechitono,” quepac caosh —qesho tantiashien: —¿Ada Esus chopeba? “Unès uamenushe,” quiaish choenquien icchitec —quecuededpac caondash.

12

Madia Dasadon chuchun Esus tanoshcaid

(Mat 26.6-13; Mad 14.3-9)

¹ Aden mishtemaid mishquidon abi nibènubien Edusaden anoentsèqui ambi Dasado uincuemiondacno Betania yacno Esus chopondash. Seistedec ushash Nuquin Papan matamiampid inchèsh tantiec cuèdènc taènushi niondash.

² Ambo chosho isash: —Esus bédambo iqueque. Pemenu —qeshun: —Pec cho —cac puduedash tabadpondash nèidtedi. Nèidic Esus. Nèidic Dasado. Nèidic shubu icbo. Nèidic Esusbèd icquid èbi chedobi. Nèidic Dasadon chuchu daèd. Aidtedi icpondash. Adec penuec tabadsho Madtan pete menebampondash.

³ Adnubien Madian: —Esus bédamboshè iquec. Ismenu —quetanquin bédamboshè nuadquidèn Esus tanoshcapondash. Tanoshcatanquin aton manèdaidèn taupondash. Aden tanoshcaid shubu anauestsècquiec comapenec nuadpondash. Piucquid dadpenquo menequin bedaid niondash. Sedunten cushtoaid bédambo nuadquid nado caid niondash.

⁴ Adsho isun Esus bedmequidèn Udasèn Madia chushcapondash.

⁵ —Padi. Mimbi uesqueque. Utsi uain nata. Nèid danoshcate meneshun piucquid dadpenquo seta abentsèc matamec chonoadaidtedquobien bedtiad. Adoshombien piucquid nibèdquido aid piucquid menetiad —capondash Udasèn.

⁶ Adomboen chuisho tantiashun Udas bédambo icquidquo danondambi. Esusbéd icquido èbitedishun piucquid bedshun sauedten sauedshun dayun uauquidquiemi danondac. Piucquid bédamboec dayun uashumënenquo yequi abibi ampeshumënashi adondash Udas. Aden ambi ampiaid tantiequi: —Piucquid nibédquidoen menetiad —quequin muauquin Madia chushcapondash.

⁷ Adshobien Esusën: —Padi. Chushcainda. Ma nanu. Ma nuquin matsesën unësaid bédambo nuadnuc danoshcapaid yoc. “Nëbi con Mado unësendac,” quequin Nuquin Papan tantiamiacpadomboen èbi unëso chococate tantiaquin Madian èbi tanoshcaquin naic.

⁸ Piucquid nibédquido dadpen iquec. Nibëdenquo iquendac. Èbien mibéd icboedi nëbi nibédquido yanendac. Èbi tantiec Madia bédambo iquec —quepondash Esus Udas chiec aidi: —Abi chieshënquido Esus bedmenu —quepanuda.

Dasadotsen cuesunetiadquo yaid

⁹ Adnubien: —Betania yacno Esus choaccosh —cac Edusaden yacnuësh matses dadpen Esus isec cho-chopondash. Ambobidi Dasado Esusën uincuemiondaic icsho aidtsen isnuec cho-chopondash.

¹⁰⁻¹¹ Cho-choshon Dasado uincuemiondaic isumbien abentsëcshun abentsëcshunquien: —Comapenen tantiaquin nabanquidquo yec Nuquin Papapadquidquibidien Esus nec. Nuquin Papan chomiaidien nec —quequin Esus tantiabempondash. Esus tantiabenshumbic abi chuiquidon chiaid tantienquo yampondash. Adsho isash nëishtanequien chuiquid dapabo: —“Uincuemiaid Dasado isun Esus tantiabenosh,” quioshe. Dasadotsembien unës uatiad —quianac caondash chieshëmënuic.

Chuiquid dapa ismiacimboben Esus ismiaid

(Mat 21.1-11; Mad 11.1-11; Duc 19.28-40)

¹² Madian tanoshcaboc ushash Esus Edusaden yacno puduanec nidondash. Nidshobien Edusaden yacnuësh cuëdënuëc cho-choboedon: —Esus choec —quesho tantiatanquin

¹³ niste podobiequid bedbëtsenec Esus bëquedec cho-chopondash. Esus bëquedeshumbien: —Chuiquid dapa nec —quequin ismequin ambi bedbëtsemboed uic-uiccabededpondash. Aden uic-uiccai qui:

“Mibi bédamboshë iqueque. Èbi bédamboen ista. Nuquin Papan chomiaid yec mibi bédamboshë iquec. Con matses isadaidbo chuiquid dapambo mibi nendac,” quecuededpondash Esus caic.

¹⁴ Ambi podquedën choquin bedbëtsemboed cabayobitsecquidëmpi catsadtoanec Esus chosho isash adcuededpondash. Adec aid catsadte Nuquin Papan tantiamiacpadomboen con tsusedpan dada uauquin naden chuiampic.

¹⁵ “Edusaden yacnoquido chiec:

‘Dacuëndenda, Edusaden yacnoquido.

Is. Cabayobitsecquidëmpi catsadtoanec mibi chuiquid dapambo choeque,’ quepec,” quequin Nuquin Papan chiaid dada uapampic.

¹⁶ Adec Esus catsadtoanec chosho isun aden chuiampid tantienquo iccondambi. Esus abuc nidambimbi èbitedishun tantiabenondac. —Esus chuiquishenda nuquin tsusedpan dada uapampic. Aidën chiapadomboen niste podò uic-uiccaquin: “Bédambo iquec,” quequin nuquin matsesën Esus ismebededpondash —quequin tantiabenondambi.

¹⁷ Esus cabayobitsecquidëmpi catsadtoanec choabi icnuc Esusën Dasado uincuemesho isboedon: —Uincuemesho isombi —quequin matses dadpen chuibenepanëdash.

¹⁸ Adsho tantiashun: —Unësaid uincuemequid Nuquin Papan chomiaidien neque. Istanu —quianec Esus bëquedec cho-choshon aden niste podò uic-uiccaquin ismepondash.

¹⁹ —Esus bédamboshë iquec. Nuqui chuiquid dapa nendac —quecuedesho tantiashien Esus chieshënquido padiseyobo: —¿Midapadoendac nuqui? Tanta. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? —quepac caondash.

Matses utsibo: Esus isnu, quiaid

²⁰ Edusaden yacno cuëdënecc cho-choboedo matses utsibo isadaidpembotsen icpondash.

²¹ Adnubien adquido matses utsibon Esus iste bunquin shubu dadpen icquid Betsaida caid yacnuësh caniquid Esusbéd icquid Uedipe chuituidpac caondash. —Esus istiadquido iquebi —quesho tantiashien: —Chiata. Chuitambono —quianec nidshun

²² Esusbéd icquid utsi Andedesba chuibëtsenec Andedesbéd choequi Uedipe Esus chiec chopondash. —Matses utsibon mibi istiadquido iquec —caquien

²³ aid matses utsibo isadaidpembro tantiamenuëc Esus comapenec onquepondash. —Nuquin Papan matsesmiiondaicquid icquin nëbimbobimbi ambi chiaidtedi nainendac. Èmbi

adoacsho Nuquin Papan: “Mibi bédambo iquec,” èbi caindac —quepondash Esus abi unès uate chiequi.

²⁴ Adshumbien ompoacbimboen chuipondash. —Tantia. Mibi chuinu. ¿Mitsipadquoio pete èshè chococaid icpec? Chococac caniasch bacuèec bédambo icpaïd yoc. Chococabi bédambo ictiapimbo iquec. Adoacbimboen chococabi yac matses bédambo icmetiapimbo iquendabi. Unèsascho chococac matses bédambo icmequid nendabi —quepondash Esus.

²⁵ Adashic padpidec: —Ambi naiduidi naquin èmbi chiaïd niacquido Nuquin Papan cuidtequido nendac. Ambi naiduidi nainquoio icquin èmbi chiacpadomboen naquido èbèdi tabadtequido yanendac.

²⁶ Adquid èmbi chiacpadomboen natiadquido yec èbi yacpadec chieshtoenquoio ictsiash. Adquidquido unèsash uincuenash èbèdi tabadsho Nuquin Papan: “Nèid con Mado tantiaquid bédambo iquec,” capendac —quepondash Esus.

Esusèn abi unès uate chiaïd

²⁷ Adashic abi unès uate tantiec Esus nadpondash. —Unèsquioshè yanuc: “Mimbi tantiacpadomboen natiapimbo iquebi, Papa,” ¿quectabi icti? Mabi con Pan chiacpadomboen nanuec chondac. Aden nanuec nebi —quepondash Esus.

²⁸ Adtanequien Nuquin Papa chiec: —Nuqui tantiacpadomboen nèbi nainembi, Papa. Èmbi aden nainacsho: “Nuquin Papa bédambo iquec,” matses cameta, Papa —quenubien abucuèshquoio Nuquin Papa comapenec onquepondash. —Ai, èmbi namiaïd mibi icsho: “Nuquin Papan namiaïd nec. Nuquin Papa bédambo iquec,” matses camepombi. Nèbi padpiden adomeoaindambi —quepondash Nuquin Papa.

²⁹ Abucuèsh onquesho bédamboen tantiabi yec utsibo: —Abu cuèdtoec nec —quenubien utsibo: —Nuquin Papan abi yacnoshon uaid mayan bédan Esus chuipash —quecuededpondash.

³⁰ Adsho tantiasch Esus: —Èbi tantiamenuecta onquediosh? Padenquoio. Mibi tantiamenuequien niosh. Aden tantiaschun èmbi bédamboen chuisho tantiaita.

³¹ Nuquin Papa chieshènquid Satanasèn yuaido matses dadpenquioshè iquec. Nèbi Nuquin Papan tantiacpadomboen aido utsi-utsien Satanas bedshunendambi: “Chèn. Con na neque,” quequin.

³² Èbi abuc dectanac aden matses èbi tantiaquid icmendambi —quepondash Esus.

³³ —Èbi cuesten dectanquin unès uaindac —quequin tantiec: —Èbi abuc dectanendac —quepondash Esus.

³⁴ Adsho tantiasch abi datsidadquido: —“Èbi dectanendac,” quiosh. “Unèsebi,” quepequien iccosh —quiashien Esus chiec: —“Nuquin Papa yacnuèsh choquid Quidistu caïd unèsesambo nendac,” quequin Nuquin Papan chiaïd nuquin matsesèn chuïnubi: “Unèsebi,” ¿quecta icco? “Unèsebi,” quequid Nuquin Papa yacnuèsh choquid ictiapimbo mibi iquec. “Nuquin Papan matsesmiaïd nebi,” quequid ¿tsutsi mibi nepe? —quepondash Esus datsidadquido.

³⁵ Adoacshien Esusèn: —Nadquid nebi —quenquoio icquin ompoacbimboen naden chuipondash. —Mibi bédamboen tantiamequid nèbi isadenquoio iquendac. Aid nibèdnuc bédamboen mimbi tantienquoio iquendac. Nidabi aidèn chuisho bédamboen tantiaita.

³⁶ Nuquin Papan cuidtiamboen iste tantiamequid tantiaita. Adsho bédambo icmequin Nuquin Papan cuidtiapimbo icquid mibi icmendac —quepondash Esus abibi cadequi. Adtanec nidpondash aidon istiapimbo icnuc.

Isadaïdbon Esus tantienquoio yaid

³⁷ Èmbi dadpen chuiquin dada uabanacpadomboembi Esusèn comapenen tantiaquin dadpen nabansho isun con matses isadaïdbon Esus tantiatadquidi Esus tantienquoio icpondash.

³⁸ Aden Esus tantienquoio icte con tsusedpa Isayasèn Nuquin Papan tantiamiacpadomboen chuiquin dada uapampic.

“Nuquin Papa yacnuèsh choash nadec onquendac.

‘Mimbi chiaïdquio chuïbansho tantiaschun: Muequien mibi nec, èbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuèsh choquidien nec. quetiadquidi adenquoio iquendac, Papa,’ quependac,”

quequin Esusèn chuite Isayasèn dada uapampic.

³⁹ Nuquin Papan pamumèdacbimboecnuc icmiac con matsesèn Esus tantienquoio icpondash. Aden chuiquin Isayasèn padpiden dada uapampic.

⁴⁰ “Isadaïdbon èbi tantiatiapimbo icsho isun

‘Ma adembi tantienquoio icpanuna,’ caimbi.

Ma adequi pabiate shècuè nibèdacbimboec icchitono.

Èbi tantiasch abi icsaid bèpiscudquin bédamboen ismane,”

quequin Nuquin Papan ambi con matses caido nĕishĕnshun chushcaid Isayasĕn dada uapampic.

⁴¹ Nuquin Papambo Esusbĕd uinsadpambo yec tabadsho isondaid icquin Isayasĕn aden Esus tantienquo icte chuiampic.

⁴² Con matses dadpeshun Esus tantienquo icnubi con matses chuiquidon abentsĕcshun abentsĕcshunquien Esus tantiauidpac caondash. Adoboedi: —“Nuquin Papan chiaid chuibante shubun puduedenda,” canushe —quiash dacuĕdquin: —Esus tantiaquid nebi —quequin chuitiadquidi utsibo chienquo icpac caondash.

⁴³ —Ma con matsesĕmbi ĕbi bĕdamboen isnu —quequinnuidtsĕqui tantiaquin aton matses chuitiapimbo icpac caondash. —Ma Nuquin Papan ĕbi bĕdamboen isnu. Aton Mado tantiaquid nebiqec —quetiadquidi adenquo yac caondash.

Cuidenquo icte chiec nebi, quiaid

⁴⁴ Abi tantiauidboedo Nuquin Papan chiaid isbanquido cho-choash abi datsidadacsho chuinuec Esus padpidec comapenec onquepondash. —Ĕĕbi tantianuequidĕn ĕbiuidtsĕquida tantiapadic? Padenquo. Ĕĕbi tantiaquidĕn ĕbi chomiondaidsen tantiatsiash.

⁴⁵ Adembidi con Papadquibidi ĕbi icsho isun: “Ai, adquibidien Nuquin Papa iquec,” quequin tantiatsiash.

⁴⁶ Nuquin Papan matses bĕdamboen iste tantiamenuec matsesbĕd tabadec chondabi. Adec matsesash: “Ĕĕbi tantiaquido ma Nuquin Papan bĕdamboen isquin bĕdamboen tabadmenu,” quiash nebi.

⁴⁷ “Ĕĕmbi aden chuisho tantiatiapimbo icquido nĕbi cuidnu,” Ĕquetacti icti? Padenquo. Nĕbi Nuquin Papan bĕdamboen isquin cuidenquo icte chuinuequini nec.

⁴⁸ Nuquin Papan cuidte ushĕmbien ĕbi tantiesabon: “Nuquin Papan chiaidshenda chuipadenec. Aid tantienquo yec icsabudquiopobi,” quequin ambibi tantiendac. Adsho Nuquin Papan cuidendac.

⁴⁹ Ĕĕmbemi chuiquindambi nadi? Padenquo. Ĕĕbi chomiondaid con Pan chiaidquo chiequini nec.

⁵⁰ “Ĕĕbi tantiaquid ĕbĕdi tabadendac padpidec unĕsenquo yec,” queshun Nuquin Papan chiauidtsĕqui chiequini nec —quepondash Esus.

13

Esusĕn abĕd icquido tapanaid

¹⁻² Esusĕn comapenen tantiaquin nabanaid chuiquin aidtedi chiombi. Nĕbi abi tantiaquido tantiaquiec abided ciudadec unĕsaid chuiquin unĕsash abi uincuenaidtsen chuinu. Tanta. Nuquin Papan con tsusedpabo unĕs uainquo icquin matamiampid inchĕsh tantiaquin pec tabadte ushĕ nĕbi yanuc inchĕshĕn Esusbĕd pec bĕdamboec tabadondabi. Padnuen Udas Simon Iscadioten mado Satanasĕn tantiamiacpadomboen Esus bedmete tantiec tsadpanĕdash. Adnubien Esus: —Nĕbi con Pa yacno nidebi nĕido nianec.

³ Con Pabĕd tabadec ambi tantiapadec abĕdi abitedishun Icbombo iccondaidi nĕbi anobidi nidoash adquibidi icoaindabi. Adquid icquin nĕido bĕdamboec tantianante ismenu —quequin tantiaquin

⁴ yuan nacimboen nadopondash. Uequin peboedi nidtotanec dashcute bĕntse icquid dachiquidtanec daucudte tsibidiquepondash.

⁵ Tsibidiquetanquin pada-padaid dapan acte cushtotanquin abĕd icquido tapambanpondash. Daucudten taubanquin tapambanondash.

⁶ Aden tapambanquimbi: —Mibitsen tapanu —cac Petedon: —ĔIcbonda yua tapampaid? Ĕĕbi tapanenda, Ico. Padi —capondash.

⁷ Adoquien Esusĕn: —Ĕĕmbi nasho nĕbi mimbi tantienquo iquec. Yuecshun mimbi tantiendac. En tapanu —caquien:

⁸ —Padi. Mibi bĕdamboshĕ icquid nec. Ĕĕbien icsaquid nec. Yua namiacimboen mibi tapametiapimbo iquebique. Padi —caoapondash Petedon. Adoquien: —Ĕĕmbi tapanabi yac con yuambo mibi ictiapimbo ictsiac —capondash Esusĕn.

⁹ Adsho tantianshun Petedon: —En na, Ico. Tapantanquimbi mapinobĕdtabi ĕbi mĕpanta —caquien:

¹⁰ —Padi. Nesboed mibi nec. Taĕnoidtsĕqui bĕchishacsho tapanembi. Ĕĕmbi bĕchish ucac mibi bĕdambo iquec. Abentsĕc icsambo iquec —quepondash Esus. —Bĕchish ucacimboen ĕmbi nasho Nuquin Papan mibi bĕdamboen isendac icsaid ucudacimboecnuc —quequin tantiec: —Ĕĕmbi bĕchish ucac mibi bĕdambo iquec —quepondash Esus.

11 —Udasèn èbi unès uamenuen bedmendac —quequin tantiec: —Abentsèc icsambo iquec —quepondash Esus.

12 Aden tapambanash dasiuidash samèdquin pebededquin abèd icquido Esusèn chuipondash. —Èmbi naboed ¿ada tantie? Tantia. Mibi chuinu.

13 “Èbi chuiquidquio mibi nec,” mimi èbi capec. Adembidi: “Con Icho mibi nec,” mimi èbi capec. Bèdamboen mimi chiec. Adquid nebique.

14 Èmbi nabocpadomboen mimbitsen nata. “Èbèd icquid tantiaquiquin tapanquin nashunu,” qeshun naombique. Adecbidi nashunanta. Naden tantiashun nata. “Esus tantiaquido tantiaquiemi. Con buchibimboecnuc nashunu,” quiaish nashunanta.

15 Èmbi nabocpadomboen namenuen adombique. Mimbitsen nata.

16 En chuinu. Tantia. ¿Icbon chiacta chieshpadic? ¿“Nid,” cacta nidenquio icpadi? Icbon chiacpadomboen yuan naquid yendac. Adomboen tantiaquin èmbi chiacpadomboen nata.

17 Èmbi aden chuisho tantiashun èmbi chiacpadomboen naic mibi bèdambo iquendac —quepondash Esus.

18 Adashic padpidec: —Mibitedi caic: “Bèdambo iquec,” quetiapimbo iquendabi. Tauamboen: “Nuquibi icnu. Cho,” èmbi caondaido con yuabotedi tantiemi. Abentsèc icsambo iquec. “Aid con yuapenquio nec,” quequin èmbi tantiaidi nec. Nuquin Papan tantiamiac aidèn icsamboen nate chuiquin nuquin tsusedpan dada uapampic naden. “Èbèdtan planeboedèmbi èbi unès uamenuen bedmendac,” quequin dada uapampic.

19 “‘Abi unès uametebi chiosi. Nuquin Papapadquidquio icquimbien naosh,’ quequin ma tantianu,” qeshun mibi chiombi.

20 Mibipadquidèn nate mibi chuinu. Tantia. Mibipadquidèn èbi chuibansho tantiash: “Ai, abimbo caic,” qeshun utsibon èbi tantiatsiash. Adembidi èbi tantiashun èbi chomiondaid Nuquin Papatsen tantiatsiash —quepondash Esus.

Abi bedmequid Esusèn chiaid

(Mat 26.20-25; Mad 14.17-21; Duc 22.21-23)

21 Adshumbien abi bedmequid Udas tantia unèsquio icnuc Esusèn chuipondash. —Tantia. Mibitedi chuinu. Èbèd icquidèmbi èbi chieshènquido èbi bedmendac —quesho

22 tantiash abèd icquidobèd bèisnanc: —¿Tsutsi capec? Nèidien cachitec —quecuededpondabi otacquo tantiec.

23 Èbi tantiaquidquio yec con cachochsèqui Esus uepondash.

24 Adec Esusèn dayuntsèqui ueshobini: —“¿Tsutsi cai?” ca —capondash Petedon mèdquin onquenquio icquin.

25 Adoquimbi cachoc isquin: —¿Tsutsi cai, Icho? —capondac.

26 Adoquien Esus: —En istac. Pete cuèshèn ènè puntanquin menequin mibi ismenu —quetanquin pete cuèshèn ènè puntanquin Udas Simon Iscadioten mado menepondash.

27 Adoac penubi Satanascuio Udas dapuedequiopanèdash ambi tantiaidquio namenuc. Adshobien Esusèn: —Mimbi tantiacpadomboen baded nèbimbobi naic nid, Udas —capondash.

28 Adsho tantiashini èbitedi: —Tantiadenquio yec onquepec. ¿Atotsi quiaish: “Baded naic nid,” quepec? —quepondac.

29 Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien iccosh —quenubien utsi: —“Piucquid nibèdquido piucquid menetan,” quepequien iccosh —quecuededpondash.

30 Pete cuèshèmpi pesho: —Nèbimbobi baded naic nid —caquien Udas nidpondash. Inchèshèmbi nidpondash Esus bedmenuen chiec nidec.

Tantiananquiota, quequin chiaid

31 Abi bedmenuen chiec Udas nidbombien Esus: —Nuquin Papan matsesmiadquio icquin ambi tantiaidtedi nèbimbobimbi nainendac. Èmbi nainsho isash con Pa bèdambo iquendac.

32 Èbitsen bèdambo icmenuen con Pan comapenen tantiaquin ismendac. ¿Yuecshun quectabi icti? Nèbimbobimbi caindac —quepondash Esus. Abi unès uatebèda abi unèsash uincuenash Nuquin Papa yacno nidte chiec adpondash.

33 Adashic èbi chedo padpiden chiec: —Nèbimbobi nidebique. Chuiquid dapabo èmbi chiondacadpadomboen mibi chuioanu. Tantia, mado. Èbi nidacsho mimi èbi istuidenquio iquendac. Èbi nidacno mibi nidtiapimbo iquendac.

34 Aden tantiaquin Nuquin Papan chiaid utsi mibi chuinu. Èbi nidan èmbi chiacpadomboen nata. Èmbi mibi tantiaquiacpadquiec tantiananquiota.

³⁵ Ēbi tantiaquido tantianansho isun: “Adec tantiananquido Esus tantiaquidombo nec,” quequin utsibon tantiatsiash –quepondash Esus.

*Petedo: Ēmbi isacmaid nec, quete chiaid
(Mat 26.31-35; Mad 14.27-31; Duc 22.31-34)*

³⁶ Adec –Nidebi –quesho tantiashun Petedon: –¿Mitsimbo nide, Icho? –capondash. Adoquien Esus: –Nēbi mibi nidtiapimbo yacno nidebi. Yuecash ambo mibitsen nidendac –quepondash Esus.

³⁷ Adsho tantiash Petedo: –¿Atotsi quetiadquio yec: “Nēbi ēbēdi nidtiapimbo mibi iquec,” quepo mibi? Mibēd nidec dacuēdenquio ictsiabi. Mibi chieshēnquidon: “Unēs uanu,” mibi casho tantiash: “Ēbien natiad,” quetsiandabi –quepondash Petedo.

³⁸ Adsho tantiashien Esus: –“Ēbien natiad,” ¿quecta icpatsia? Padenquio mibi ictsiac. Cachina bēnē cuēdanabi icnuc mibi chieshtouidendac. “Ēmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bēnē cuēdanabi icnuc mibi adendac –quepondash Esus. Adsho tantiashini Esusbēd icquido ēbitedi dacuēdcuededpondac.

14

Nuquin Papabēd tabadmendambi, quiaid

¹ Ēbitedi dacuēdcuededsho isashien Esus: –Dacuēdenda. “Ēbi dayun uaquid nec,” quequin mimbi Nuquin Papa tantiacpadomboen ēbitsen tantiaquiota.

² Mimbi tantiacpadquio Nuquin Papan shubu iquec. Quēnē dadpenquioshē iquec. Tsucustiapimbo iquec. Adpenquio icsho mibi aden chienquio ictsiambi. Adquid tantiaquin: “Ēbi tantiaquido ēbēdi tabadmendambi,” quequin chiombi.

³ “Adquid iquec,” quiaish ēbia nidshun con Pa chiendambi. “Ēbi tantiaquido neque. Nuquibēdi tabadmenuna,” quequin chiendambi. Adashic ēbi yacno mibi buanuec choaindabi.

⁴ Ēbi nidan ēbi nidacno nidte mimbi tantiec –quepondash Esus.

⁵ Adsho tantiashun Tomasēnsen: –¿Mitsimbo nide, Icho? Tantiambo iccombi. Podqued tantienquio iquembique. Ēbi chui –caquien

⁶ Esus: –Nuquin Papa yacno nidte tantiamequidquio nebi. Nuquin Papan chaiduidtsēqui chiec muesambo nebi. Adquid icquin ēbi tantiaquid Nuquin Papabēd tabadmendambi. Ēbi tantiesan Nuquin Papa tantiatiapimbo ictsiash. Ēbi tantiaquidēnuidtsēqui Nuquin Papa tantiatsiash.

⁷ Ēbi caic: “Nuquin Papan Mado nec,” quequin mimbi Nuquin Papatsen tantiendac. Nēbi abipadquid ēbi icsho isun Nuquin Papambo isacnimboen mimbi tantiendac –quepondash Esus.

⁸ Adshobien Uedipentsen: –Nuquin Papa ēbi isme, Icho. Nuquin Papa iste bunebique. Aid isash bēdamo ictsiabi –caquien

⁹ aidtsen Esusēn: –¿Tantienquioda ique, Uedipe? Yuec mibēdi tabadobi. ¿Mimbi isacmaidtabi nedi? ¿Mibi chianenquiodambi ictio? Nuquin Papapadquidquibidini nec. Ēbi adquid icsho isun: “ ‘Adquidquibidi Nuquin Papa iquec,’ quequin Nuquin Papatsen mimbi tantiendac,” quequin mibi chiombi. ¿Atotsi quequimbini: “Nuquin Papa ēbi isme,” cai?

¹⁰ “Nuquin Papapadquidquio nebi,” ēbi quesho tantiash: “Ai, abimbo caic,” ¿quenquioda icco? Ēmbembi chienquio iccombi. Con Pan chiaidquio chiequini nec. Adembidi ēmbembi nabanenquio iccombi. Ēbēd tēshnanenquio icquin con Pan namiaquimbi naoc. Ēmbembi nainquio iccombi.

¹¹ “Con Papadquidquio nebi,” ēbi quesho tantiashun: “Ai, abimbo caic,” cata. Ēmbi chiaid tantiatiapimbo icquin ēmbi comapenen tantiaquin dadpen nabamboedquio tantiatia. Aden ēmbi nabamboed tantiaquin: “Nuquin Papan chomiaidēnuidtsēquien adotsiash,” quequin tantiatia.

¹² Tantia. Mibi chuinu. Ēmbi nacpadomboen ēbi tantiaquidontsen comapenen tantiaquin nabanendac. Ēmbi chuiabanac daēdpactsēcshun ēbi tantiabentsēccosh. Con Pa yacno nidshun ēmbi chomiaidēn con Mayanēn namiac mibipadquidēn ēbi chuiabanac dadpenshun ēbi tantiabendac.

¹³ Ēmbi chiacpadomboen naquidēn: “Ēbi nashunta, Icho,” quesho tantiashun ambi chiacpadomboen nashunendambi. “Nuquin Papa bēdamboshē iquec,” camenuen

¹⁴ Ēbi tantiaquidēn chiacpadomboen nashunendambi –quepondash Esus abēd icquido chiec.

Nuquin Papan Mayan tabadte chiaid

¹⁵ Adashic abéd icquido padpiden chiec Esus: —Èbi abimbo tantiaquidèn èmbi chiapadomboen natiadquio iquendac.

¹⁶ Adotiadquio icsho isun con Pabéd icquin con Pa chiendambi naden. “Nuqui tantiaquido bédamboen tantiamenuen nuquin Mayan aidobéd tabadmenuna, Papa,” èmbi cac Nuquin Papan con Mayan mibédi tabadmendac.

¹⁷ Adoac mibi nianenquio yec mibédi tēshnanenquio iquendac. Mibéd icquin èbi chuiquin mibi abimbo tantiamendac. Aid isadenquio icsho èbi tantiesabon aid tantiatipimbo iquec. Mimbien aid tantiec. Con Pan èbéd icmiaidquio nec. Ambi namiaid èbi icsho aid tantiasumbimboen mimbi tantiec. Èbi nidan choash mibédi tēshnanenquio yec tabadendac con Mayan.

¹⁸ ḡShiadimpi mèyadacbitsec icnudambi mibi niampe? Padenquio. Nuquin Papan Mayan con Mayambi nec. Mibéd aid icnuc èbéd yacimboc equi con Mayan tantiadendac.

¹⁹ Nèbi èbi nidacsho èbi tantiesabon èbi isenquio icnuc mimbi èbi isendac uincuenacsho. Adec uincuenaid icquin con Mayan mibéd tabadmequin mibi unēsacsho uincuemeshun èbédi tabadmendambi.

²⁰ Èbi uincuenaid ushèmbi mimbi naden tantierendac. “Esusèn Nuquin Papa tantiaquieic aibéd tēshnanenquio icquin aidèn chiapadomboenuidi naindac. Adecbidi Esusbéd tantiananquieic aibéd tēshnanenquio icquin aidèn chiapadomboen natiadquio yec tabadebi,” quequin mimbi tantierendac.

²¹ Èmbi chiapadomboen naquid èbi tantiaquidquio nec. Èbi tantiaquidquio mibi icsho con Pabédtan mibi tantiaquioquin: “Adquio aton Papabéd Esus iquec,” camequin mibi bédamboen tantiamendambi —quepondash Esus.

²² Adsho tantiasun Udas utsin abi bedmequidēnpenquio: —“Nuquin Papa yacnuēsh choash con matses chuiquidquio yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuēsh choquid icquin ḡatotsieshun èbiuidtsēqui tantiamē, Icbo? —caquien

²³ Esus padpidec: —Èbi tantiaquiduidtsēqui naden tantiamendambi. Èbi tantiaquid èmbi chiapadomboen naquid nec. Aden nasho con Pabédtan tantiaquioquin aibédi con Mayan tabadmendambi. Adoac con Mayanèn tantiamiac èbéd iquec con Pabéd iquec quiacimboc tantiadendac.

²⁴ Èbi tantienquio icquidoen èmbi chiaid niac-niacquido nendac. ḡÈmbiuidtsēqui chiaidta adquidèn niac-niacpadic? Mambi Nuquin Papan chiaidquio chuiboc. Aidèn chiaidquio adquidèn niac-niaquec —quepondash Esus abéd icquido chiec.

²⁵ Adashic padpidec Esus onquiondash. —Mibi bèdiactsēc tantiamequin mibéd icquin con Pan chiaid chuibanombi.

²⁶ Con Pa yacno nidshun èmbi: “Nuquin Mayan aidobédi tabadmenuna, Papa,” cac con Pan con Mayan matsesbéd tabadmendac. Adoac èmbi naidbèdta èmbi chiondaidtedimbo mibi bédamboen tantiamendac.

²⁷ Con Pa yacno nidshun con Mayan mibédi tabadmequin dacuēdenquio icquid mibi icmendambi. Adoac dacuēdenquio yec bédamboec tabadta. Èbi tantiesabo dacuēdacimboc dacuēdenda. Comapenec dacuēdtanec uinte paēdtanec aido tabadnubi mibi dacuēdenquio yec bédamboec tabadta.

²⁸ “Nèbimbobini con Pa yacno nidendac. Adtanequic choaindabi,” quepobi mibi chiec. Èbi adsho tantias èbi tantiaquidombo cuishonquetsias. “Esus abi namequid aton Papabéd tabadec nidec,” quias èbi tantiec cuishonquetsias.

²⁹ Nidnumbi mibi chiec nebi. “Unēsash uincuenendabi. Adashic con Pa yacno nidendabi,” quiobi. “Èmbi chiapadec èbi adsho isun ma nèidon: ‘Esusèn abimboshenda capondash. Ambi chiondacadquid Nuquin Papan Madombo nec,’ quequin tantianu,” quias adobi.

³⁰ Nèbi ènquimbi chuinu. Èbi tantiesabon icbo Satanas èbi unēs uamenuec choec. Ambe-mbi aidèn èbi unēs uametiapimbo iquec.

³¹ Con Pan tantiacpadequini unēsendac. Èbi adec unēsō isash: “‘Nuquin Papa tantiaquin ambi chiapadomboen naic abided ciudadec Esus unēsac,’ quequin ma matses abitedishun tantianu,” quias adebi. Nèbimbobimbi naique. Nidec nidnu. Nid —quepondash Esus.

¹ —Nidec nidnu. Nid —quetanquimbi padpiden chuipondashi ompoacbimboen chuiquin. —¿Mitsipadquio shancuinbiecquid uba caid icpec? Mapictsĕc ictsequi cuidi-cuidipambo yanquid. Adquidic shancuin bacuĕbimboec didiquequid. Uba dadan aton cuidi canimequin bĕdambo icmequid. Adomboembidi ĕbi tantiaquido bĕdambo icmendambi. Nuquin Papan uba icbobimboecquid nec.

² Uba aton icbon cuidi utsiuc bacuĕesa icsho pateshunepaid yoc. Adoacbimboen ĕbi tantiauidtsĕcboedon ambi icsamboen naid ĕntiapimbo icsho con Pan ambi icsaido cuidacno nĕnendac. Uba icbombidi bĕdamboen bacuĕmenuen dadpen cuidi icquid cuidi dadpen pateshun siaquid. Adomboembidi ĕbi tantiaquido bĕdamboshĕ icmenuen Nuquin Papan aidon icsamboen naid ĕmetsiash.

³ Ĕmbi chiacpadomboen naic mibi bĕdambo iquec. Aden ĕbi tantiaquo Nuquin Papan mibi bĕdamboen isec.

⁴ Ĕbi ademibidi tantiaquin ĕmbi chiacpadomboen nata. Adsho isash mibi bĕdamboen tabadmec mibĕduquidabi. Uba cuidi padquĕdaid bacuĕtiapimbo iquendac.

⁵ Adecbidi ĕbĕdi tĕshnanash matses bĕdambo ictiapimbo iqueque. Ĕbĕd tĕshnanenquio yec bĕdamboec tabadta. Bĕdamboec tabadquin mimbi utsibo ĕbi tantiametsiac.

⁶ Uba icbon cuidi utsiuc bacuĕesa icsho pateshun tsindoshon nĕdĕncapaid yoc. Adoacbimboen ĕbi tantiesabo unĕsacsho Nuquin Papan ambi icsaido cuidacno nĕsecaindac — quepondash Esus.

⁷ Adshumbic Esusĕn padpiden chuipondash. —Ĕbi tantiaquin ĕmbi chiacpadomboen naquidĕn: “Ĕbi nashunta, Papa,” cac ambi chiacpadomboen Nuquin Papan nashuntsiash.

⁸ Nuquin Papan adoshonac: “Nuquin Papa bĕdambo iquec,” mimbi catsiac. Ademibidi utsibotsen: “Nuquin Papa bĕdambo iquec,” camenuen bĕdamboec tabadquin ĕbi tantiameta. Mimbi adosh: “Ai, ĕbi tantiaquidquio nec,” caindambi.

⁹ Con Pan ĕbi tantiaquiapadomboembi mibi tantiaquiembi. Adoaid icquin ĕbitsen tantiaquioquin ĕmbi chiacpadomboen nata.

¹⁰ Abi tantiaquioquin ambi chiacpadomboen nashobini con Pan tantiaquiec. Ademibidi ĕbi tantiaquidĕn ĕmbi chiacpadomboen nasho ĕmbitsen aid tantiaquiendambi.

¹¹ “Ĕbi cuishonquiapadquiecbidi ma ĕbi tantiaquiec cuishonquequiono,” queshun aden mibi chiembi —quepondash Esus abĕd icquido chiec.

Tantiananta, quequin Esusĕn chiaid

¹² Adashic abĕd icquido padpiden chiec Esus: —Ĕmbi mibi tantiaquiapadquiec tantiananta.

¹³ Nadquiec caimbi. “Min utsi cuesnu,” cashunac: “Ĕbien natiad,” quiacbimboec tantiananta. Aden mibi tantiec ĕbided cuidadec unĕsendabi.

¹⁴ Ĕmbi chiacpadomboen nasho mibi con utsi caimbi.

¹⁵ Ĕmbi con yua caboedobi mibi con utsi caimbi. Icbon: “Tantia. Chuinu. Nadono. ¿Ada bĕda icpec?” quequin aton yua chienquio icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi.

¹⁶ “Esusbĕd iquec nidnu,” ¿quequinda mimbembi tantiadionda? Ĕmbien mibi: “Nuquibi icnu. Cho,” caondac. “Utsibo tantiamequin ma nĕidon ĕbi chuibenenu. Adoac utsibotsen ĕbĕd tabadtequid yanendac,” queshun mibi cho caondambi. Aden ĕmbi chiacpadomboen naquidĕn Nuquin Papa chuiquin: “Min Mado Esus tantiaquid ĕbi icsho ĕmbi chiacpadomboen ĕbi nashunta, Papa,” mimbi cac mimbi chiacpadomboen Nuquin Papan mibi nashuntsiash.

¹⁷ Ĕbi adsho tantiaquo ĕmbi chiacpadquiec tantiananta —quepondash Esus.

Esus tantiaquido chieshĕnte chiaid

¹⁸ Adashic padpidec Esus onquepondash. —Ĕbi tantienquio icquidon chieshĕnac: “Aden Esusba chieshĕnondash,” quequin tantiaquo.

¹⁹ Ĕbi tantiesabo icsho ĕbi chieshĕnquidon mibi bĕdamboen istsiandac. Adquid iccondaidi ĕmbi: “Cho,” cac ĕbi tantiaquid mibi yanondac. Adec ĕbi tantiaquid icsho mibitsen chieshĕnoaindac.

²⁰ “Yuan icbon chiacpadomboen napaid yoc,” quequin ĕmbi ¿chuiboedta tantie? Aden ĕmbi chiacpadomboen nasho ĕbi chieshĕnquidon mibitsen chieshĕnoaindac. Ademibidi ĕmbi chiaid tantiatiapimbo icquidĕn mimbi chiaidtsen tantiatiapimbo icoaindac. Padnuen ĕmbi chiaid tantiaquidĕn mimbi chiaidtsen tantiendac.

²¹ Ĕbi chieshĕnquidombi ĕbi chomiondaidquio tantiaquin ĕbi chieshĕnenquio ictsias. Ma ĕbi chomiondaid Nuquin Papa tantienquio icquin aidon ĕbi chieshĕmpayoc. Adomboembidi ĕbi tantiaquidotsen chieshĕnoaindac.

22-23 ¿Ëbi chieshênquidon ëbiuidtsëquida chieshêmpadic? Ma ëbi chieshênquin Nuquin Papatsen chieshêneyoc. Adquid icsamboshê iquec. Nuquin Papa yacnuêsh choshon ambi chiaid ëmbi chiaibi icnuc ëbi chieshênquido ëbi chieshê nec icsainquio ictsenash. Nuquin Papa yacnuêsh choshon mambi Nuquin Papan chiaidquio chuibamboc. Adnuc Nuquin Papan ëbi chieshênquido: “Mibi icsamboshê iquec,” caindac.

24 Adembidi Nuquin Papa yacnuêsh choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshê nec mibi icsambo iquec,” cainquio ictsenosh. Utsibon nabanacmaidquio comapenen tantiaquin mambi nabamboc. Adosho isash ëbi chieshênquido: “Icsapenquio iquebi,” quetiapimbo iquendac. Ëmbi nabansho isun ëbi chieshênquin con Patsen chieshê nec.

25 “Aden matsesën ambembi ëbi chieshêmpac,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshênquidon isbanaidi nec — quepondash Esus.

26 Adashic padpidec: —Ëmbi con Pa yacno nidshun: “Nuquin Mayan ëbi tantiaquidobêd tabadmenuna, Papa,” cac: “Ai,” qeshun Nuquin Papan chomiac mibêdi tabadquin abimbo chuiquin ëbi tantiamequindac.

27 Adoac mimbitsen ëbi chuibanendac. “Yuec aidbêd tabadondashun Esus tantiembi,” qeshun mimbi ëbi chuibanendac. Aden mimbi chuisho ëbi chieshênquidon mibitsen chieshênendac. Adoac dacuëndenda.

16

1 “Chieshtonoshe,” qeshun mibi aden chiombi. Mibitsen chieshê nac dacuëndenda. Mibêd con Mayan tabadmembique.

2 Ëbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yacnuêsh adendac. Adomboembidi mibi chieshênquin utsi-utsien cuesun secash: “Nuquin Papa tantiaquidquio icquin Esus tantiaquido cuesun secaombi,” quependac.

3 Aden Nuquin Papa ëbêdta tantienquio icquidon ëbi tantiaquidotsen chieshênendac.

4 Mibi chieshê nac: “ ‘Ai, adenshenda Esusën chuipondash. Ëbi tantiaquido cuesun secaindac, quepondash,’ ma nêido quenu,” qeshun nêbi mibi chiembi. “Ëbi icnuc ëbi tantiaquido cuesun secadenquio iquec. Ëbi nidambien aido cuesun secabenendac,” quequin tantiaquin ênden aden mibi chienquio iccondambi. “Nêbi nidebi,” qeshun nêbi mibi chiembi — quepondash Esus.

Nuquin Papan Mayan chote chiaid

5 Adashic: —Nêbi ëbi chomiondaibêd tabadec nidendabi — quepondash Esus. Adsho tantiasch padequimbo tabadpondabi. Adec ëbi padequimbo tabadsho isash Esus padpidec onquepondash. —“¿Mitsimbo nide?” ¿quenquioda ique?

6 Ai, ëmbi chuiboed tantiac unêsquio icnuc mimbibi ëbi chienquio icchitec.

7 Ëbi nibêdnuc mibi bêdambo iquendac. Ëbi nidenquio icnuc con Mayan mibi bêdamboen tantiamenuc choenquio ictsiash. Nidshumbimbi mibêdi tabadmenuen chomendac.

8 Adoac matses ambi icsamboen naid tantiamequin ëbitsen tantiamendac. Adomboembidi Nuquin Papan cuidtetsen tantiamendac.

9 Aden Nuquin Papan Mayanên tantiamiac: “Esus tantienquio yec icsambo icchitebi,” quendac matses.

10 Adembidi ëbi bêdamboshê icquid tantiamiac: “Nuquin Papan Madombo yec Esus bêdamboshê icquid nec. Aid abentsëqui tantiashoeni Nuquin Papan bêdamboen istsiash,” quendac matses. Ëbi isadenquio yec con Pa yacno nidan con Mayanên tantiamiac matses adendac.

11 Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquio icquidobêdta Nuquin Papan cuidendac,” quendac matses. Con Mayanên tantiamiac adec matses onquendac — quepondash Esus.

12 Adashic abêd icquido chiec Esus: —Mibi dadpenquio chuitiadquio icquimbi nêbi dadpen chienquio iquembi. Nêbi ëmbi chuisho mimbi tantiatiapimbo iquec.

13 Nuquin Papan Mayan choshombien mibi abimbo chuiquin ëbi tantiamendac. Amembi chienquio icquin Nuquin Papan chiaiduidi chiendac. “Nadquio iquendac. Adecbidi nadquid choendac,” quequin mibi dadpen tantiamendac.

14 Adembidi ëmbi naidbêdta ëmbi chiaidtedi tantiamequin: “Esus bêdamboshê iquec,” camendac.

15 ¿Ëbiuidtsëqui tantiamenuenda con Mayanên adopec? Padenquio. Ëmbembi chiaid mambi chambo yoc. Nuquin Papan chiacpadomboenuidi naquin ambi chiaiduidtsëquimbi

chuibandenioc. “Con Mayanën ëbëdta con Pa tantiamendac,” quequin tantiec: “Ëmbi naidbëdta ëmbi chiaidtedi tantiamendac,” quioibi –quepondash Esus abëd icquido chieci.

Abi nidte Esusën chiaid

¹⁶ Adashic padpidec: –Nëbi isadenquoio yanebi. Adashic yuecpectsëc yash isadcuenendabi –quepondash Esus. –Nëbi unësash uincuenash padpidec isadebi –quequin tantiec adondash.

¹⁷ Adsho tantiashini ëbitedi: –¿Atotsi quepec? Tantiadenquoio yec onquepec. “Con Pa yacno nidash ëbi nibëdnuc mibi tabadendac,” ma quepaboc. ¿Atotsi chuitiadquoio yec: “Nëbi isadenquoio ictanec yuecpectsëc yash isadcuenendabi,” queposh?

¹⁸ ¿Atotsi quepec nec? –quepondabi Esusbëd icquidobëd onquec. Esus tantiamenquoio yec sho-shoshquetsëcquiec onquepondabi.

¹⁹ Adsho ambembi tantiash: –Ëbëd icquidon ëbi chuitiadquoio iquec –queshun Esusën: –“¿Atotsi chuitiadquoio yec nio?” quequin ëbi chuite mibi buneque.

²⁰ Tantia. Mibi Chuinu. Ëbi unëso isash mibi sedenquenubi ëbi tantienquoio icquido cuishonquendac. Adec sedenqueboedobi mibitsen cuishonquianendac.

²¹ ¿Mitsipadquoio bacuë tishac chido icpec? Bacuë cuididiquenuc natiamboshë ichoedi bacuë tishash cuishonquepaid yoc.

²² Adecbidi nëbimbobi ëbi unëso isash mibi natiaquiendac. Adboedi yuecpectsëcshun ëbi padpiden isash mibi cuishonquendac ënëdenquoio yec.

²³ Adnubini con Pa yacno nidendac. Ëbi adnuc mibi bëdambo iquendac. Ëbi nidan: “Ëbi nashunta,” ëbi catiapimbo icquimbi Nuquin Papa mimbi chianendac. Ëbi tantiaquidën: “Min Mado Esus tantiaquiembique. Ëbi nashunta, Papa,” cac ëbi tantiaquin con Pan mibi nashunendac.

²⁴ Aden mimbi Nuquin Papa chianenquoio iccoc. Nëbi adomboen chianeta. “Min Mado Esus tantiaquid icsho ëbi nashunta, Papa,” quequin chianeta. Mimbi adoac mimbi chiacpadomboen mibi nashunquin Nuquin Papan mibi cuishoncamendac –quepondash Esus abëd icquido chieci.

Esusën abëd icquido ënquimbi chiaid

²⁵ Adashic abëd icquido padpiden chieci: –Ompoacbimboen dadpen chuibanionibi. Yuecpectsëcshun: “Con Pa nadquoio iquec,” quequin mibi sebadënquoio chiendambi –quepondash Esus. –Uincuenshun aden chiendambi –quequin tantiec adondash Esus.

²⁶ Adashic padpidec: –Con Pa yacno ëbi nidan mimbi: “Min Mado Esus tantiaquid nebique. Ëbi nashunta, Papa,” quequin Nuquin Papa mimbibi chianendac. “Ëmbiuidtsëqui: ‘Ëbi tantiaquid nashunta, Papa,’ cac ëbiuidtsëqui tantiaquin Nuquin Papan mibi nashuntsiash,” ¿quectabi ique? Padenquoio.

²⁷ Mibitsen tantiaquin Nuquin Papan mimbi chianiac mibi nashunendac. “Nuquin Papa yacnuësh choquid Esus nec,” quequin ëbi tantiaquid mibi icsho con Pan mibitsen tantiaquioquin mibi nashunendac.

²⁸ Matsesbëdi tabadec Nuquin Papa yacnuësh chondash nëbi con Pa yacnobidi nidendabi –quepondash Esus.

²⁹ Adsho tantiashini ëbitedi: –Adquidshenda mibi nepec. Ma nëbi mimbi sebadënquoio chieyoc.

³⁰ Mibi: “Nëbi isadenquoio yanebi,” quioc. Adashic: “Yuecpectsëc yash isadcuenendabi,” mibi qesho tantiash mibi tantiamenquoio yec sho-shoshquetsëcquiec: “¿Atotsi quepec?” quecuededpobi. Mibi chuimetiadquoio iccobi. Ëmbi chiambobi ma mimbibi tantiapaboc. Comapenen tantiaquidquoio icquin ma mimbi abitedimbo tantiapayoc. Aden tantiaquid yec Nuquin Papa yacnuësh choquid mibi nec –quepondabi ëbitedi.

³¹ Adsho tantiash Esus: –Ai, nëbi mimbi ëbi tantiaquiec.

³² Aden ëbi tantiaquidquioibi ëbi chieshënquin bedsho isanec mibi niquendac ëbi nianec. Mimbi niamënubi con Pan ëbi nianenquoio iquendac.

³³ “Ëbi nidan Nuquin Papan Mayan mibëd tabadendac. Ëbi tantiaquid Con Pan tantiaquiec,” quequin dadpen chuibanombi. “Ëbi tantiec dacuëdenquoio yec ma tabadnu,” qeshun mibi aden chuibanombi. Ëmbi chiaid tantiashun chieshëmënquido dacuëdënenda. Satanasën: “Icsamenu,” cac icsainquoio iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuëdenda –quepondash Esus abëd icquido chieci.

¹ —Dacuèdenda —queshumbic èbi tantiamenuen abuc isquin Esusèn Nuquin Papa chuipondash. —Nuqui tantiactedi èbi naimeta, Papa. Èbi naimetanquin comapenen tantiaquin èbi bédambo icmeta. Aden mimbi bédambo icmiac mibitsen bédambo icmendambi, Papa.

² Èndenquimboshè mimbi èbi chiondac naden chuiquin. “Nuqui matses uaidon abitedishun Icbo mibi nec, Mado,” quequin mimbi èbi chiondac. Mimbi adondaic icquin mimbi tantiactedi matses nuquibéd tabadtequido icmendambi, Papa.

³ Matsesèn nadosho adoendambi. “Abipadquid utsi nibèdnuc Nuquin Papa iquec. Ambi chomiondaicquido Esus nec,” quequin tantiasho nuquibéd tabadtequido icmendambi, Papa.

⁴ Mimbi chiacpadomboen naquin nèbimbobimbi nainec. Èmbi adoacsho isash matses: “Ambi chomiaid tantiasho Nuquin Papan nuqui bédamboen isec. Nuquin Papa bédamboshè iquec,” quependac, Papa.

⁵ Nuqui tantiactedi èmbi nainacsho mibi yacno nidmeshun mibèdi èbi tabadmeoata nuqui matses uabi tabadtenecpadembi. “Nuquibi abitedimbo namenuna,” èbi cata, Papa —quepondash Esus Nuquin Papa chiec.

Esusèn abèd icquido Nuquin Papa chiaid

⁶ Adshumbic Esusèn abèd icquido èbitedi chuiquin aton Papa chuiopondash. —Mimbi tantiactedi mimbi èbi tantiaquid icmiacsho mimbi bédamboen iste chuibanombi. Aden mimbi chiaidquido chiac: “Ai, adotiadquido iquebi,” quiosh, Papa.

⁷ Adembidi aidon: “Nuquin Papan namiaidquido nec. Ambembi nainquido iquec,” quequin èbi tantiaposh.

⁸ Mimbi chiaid èmbi chuisho tantiashun mimbi comapenen tantiaquin nabamiaid nasho isun: “Ma Nuquin Papan chomiaidquido nepayoc,” caposhi èbèd icquidon, Papa.

⁹ Èbi tantienquido icquido mibi chienquido iquembi, Papa. Èbi tantiaquidouditsèqui mibi chiec nebi. Mibi tantiaquido icsho mimbi tantiamiac èbitsen tantiec aidon.

¹⁰ Adsho isun: “Nuqui tantiaquido nec,” caimbi, Papa. Aidon: “Mibi bédambo iqueque. Con Icbo mibi canu. Mimbi chiacpadec bédamboec tabadtiadquido iquebi,” quequin bédambo icmioshi, Papa.

¹¹ Mibi bédamboshè iqueque. Èbi mibi yacno nidan èbi tantiaquido dayun uata, Papa. Èbi chieshènquidon chieshtomenushe. Nèido bédamboen dayun uata. Mimbi èbi icmiacpadquidbidi comapenen tantiaquid mibi neque. Ma nuqui tantiananquiacpadquiec ma èbi tantiaquido tantiananu. Nèido bédamboen dayun uata, Papa.

¹² Aidobèd icquin mimbi chiaidquido bédamboen chuibanquin chieshtomiambo iccombi. Aden bédamboen dayun uaquin èbi tantiaquido cudasènquin Satanas yuamiambo iccombi. Udas abentsèquien Satanasèn yuatsaccosh. Mimbi chiaid matsesèn dada uapampicpadomboen èbi bedmenuen Satanasèn Udas yuaccosh. Adoac èbi bedmequid yanash mimbi cuidtequid iquendac.

¹³ Nèbi mibi yacno nidendabi, Papa. “Èbi nidan dacuèdec èbi tantiaquido chieshtonoshe,” qeshun mibi otacquo chienquido iquembi. “Èmbi abi dayun uate chuisho tantiash èbi yacpadec ma cuishonquenu,” quequin mibi otacquo chienquido iquembi, Papa.

¹⁴ Mimbi chiaidquido nèido chuibanombi. Adoac èbi tantiaquido yansho èbi chieshènquidon nèidotsen chieshèmpec. Èbi yacpadec mimbi chiaid niac-niacte bunenquido icshobidi nèido chieshènquiec, Papa.

¹⁵ Aden tantiash: “Èbi tantienquido icquidobèdi èbi tantiaquido tabadmenda,” ¿quectabi ique? Padenquido. “Èbi tantiaquido chieshtomenda,” caimbi, Papa. Satanasèn yuanushe. Bédamboen dayun uaquin chieshtomenda, Papa.

¹⁶ Èbi tantiesabo tabadacpadec tabadenquido icquin èmbi nabocpadomboen natiadquido iqueque.

¹⁷ Mimbi chiaidquido pausunquiquin bédamboen tabadme, Papa.

¹⁸ Mimbi èbi: “Matses chiec nid,” caondacpadomboen aido: “Èbi chuibeneta,” caindambi. Adoac nèidon èbi chuibenendac, Papa.

¹⁹ Nèido tantiaquiec nèbimbobini mimbi chiacpadec èbided cuidadec unèsendac. “Adomboembidi èbi tantiaquidon ma Nuquin Papan chiacpadomboen nanu,” quiashe èbi tantiaquido min yuabombo icmenuec adebi, Papa —quepondash Esus aton Papa chiec.

Esusèn abi tantiaquid utsibo Nuquin Papa chiaid

²⁰ Adashic padpiden Nuquin Papa chiec Esus: —Èbèd icquido mibi chuishumbic nèbi aidobèdta èbi tantiaquid utsibotsen mibi chuinu, Papa. Èmbi chiaidbèdta èmbi naidtedi

ëbéd icquidon utsibo chuibanac aidotsen ëbi tantiaquido yanendac. Adec ëbi tantiaquido dadpenquo yanendac. Ëbi tantiaquidotedi tantiaquin mibi chiec nebi, Papa.

²¹ Nuqui tëshnanenquo yacpadequi nuquibéd tëshnanenquo icquid icmeta, Papa. Nuqui tantiananquiacpadeq ëbi tantiaquidotedi shubu abentsëquën tabadacimboecnuc tantianameta, Papa. Adsho isash nuqui tantienquo icquido nadtsiash. “Esus tantiec bédambo iquec. Aden Nuquin Papanuidtsëqui bédambo icmetsiash. Nuquin Papan chomiaidquien Esus nechitec,” quetsiash.

²² “Mibéd ëbi tantiananquiacpadquiec ma ëbi tantiaquido tantiananquiono. Ma chieshënanenquo icnu,” quequin mimbi ëbi namiacpadomboen ëbi tantiaquido namiombi, Papa.

²³ Nuqui tëshnanenquo yacpadeq aidobéd tëshnanenquo iquendabi. “Chieshënanenquo yec tantiananquiec ma bédamboec tabadnu,” quec aidobéd tëshnanenquo iquendabi, Papa. Adec ëbi tantiaquido bédamboec tantianansho isun matsesën naden tantiatsiash. “Ambi chiacpadquid Nuquin Papan chomenëdaid icquin Esusën abi tantiaquido aden bédamboen tabadmec. Ambi chomenëdaid aton Mado tantiaquiacpadomboen Nuquin Papan aid tantiaquido tantiaquiec,” quequin matsesën tantiatsiash, Papa.

²⁴ Mimbi ëbi tantiaquido icmiaido nuqui tabadacnombo tabadmeta. “Nuqui matses uabi icquin mimbi: ‘Ëmbi tantiaidquido mibi neque. Nuquibi nanuna, Mado,’ cac nuqui bédamboshë yec tabadtenecpadequi nuqui tabadsho ma ëbi tantiaquidon isnu,” qeshun mibi: “Nuqui yacno tabadmeta, Papa,” caimbi.

²⁵ Icsaisambo mibi icsho icsambo icquidon mibi tantiatiapimbo icnubimbi mibi tantiaquiec. Mibi yacnuësh choquid icshobini ëbéd icquidon: “Ai, Nuquin Papa yacnuësh choquidien nec,” quequin tantiaposh, Papa.

²⁶ Aden tantiamenuen yuec ëbéd icquidobéd tabadquin mimbi naid chuibanombi. Ëbi nidan ëmbi chomiaidën con Mayanën adembidi ëbéd icquido tantiamendac. “Mimbi ëbi tantiaquiacpadomboen ma nuqui daëdi tantiaquiash ma tantiananquiono,” qeshun con Mayan aidobéd tabadmendambi. Adoac ëbéd icacimboec con Mayan tantiadendac, Papa —quepondash Esus Nuquin Papa chiec.

18

Esus bedmiaid

(*Mat 26.47-56; Mad 14.43-50; Duc 22.47-53*)

¹ Aden Nuquin Papa yuen chianec Esus nidpondash. Ëbi chedobéd nidquin acte Sededon caid potiaash tiedno cuête odibos caid nitsinacno ëbitedi chiec tabadteneböcnombo chopondash.

² Ambo tabadnubien Udas: —Ëbi abéd tabadtenebocno tiednoen nidchitash —quianec Esus bedmenuec

³ chopondash. Aden chieshëmënquido chuiquid dapabo chuitanshun matses dadpen bëpondash nëidtedi. Nëidic con matses chuiquid dapabobëdta padiseyobon namiaido sondado chedo. Nëidic con matses yuaquido Doma yacnocquido sondado dadpen. Nëidic aid sondado chuiquid. Aidtedi Udasën bëpondash. Tabotebëdta cuate sanambededtsëcquiec cho-chopondash. Utsibombic chështe.

⁴ Adec cho-chosho isash bëquedbanec nidquin: —Ëbi unës uamec —quequin tantiaquin Esusën: —¿Atotsi quec ne? ¿Tsutsi nibëne? —cac

⁵ —Nasaded yacnuësh caniquid Esus bednuec nebi —quepondash sondado chuiquid. Adshun isac aibéd Esus bedmequid Udas icpondash.

⁶ Adshobien Esusën: —Në iquebi —capondash. Nuquin Papapadquidquibi icquin adoac dacuëdec: —Auchidi cuenu —quec uebudcuededpondash bednuequidotedi.

⁷ Adshobien padpiden Esusën: —¿Tsutsi nibëne? —cac: —Nasaded yacnuësh caniquid Esus bednuec nebi —queoasho tantiashun:

⁸ —“Në iquebi,” caombi. Ëbiuidtsëqui bedta. Ëbéd icquido bedenda —capondash Esusën.

⁹ —“Mimbi ëbi tantiaquid icmiaido Satanas chieshtomiambic iccombi, Papa,” quequin ëmbi Nuquin Papa chuibocpadomboen nëido chieshtomiapiambo iquebi —quequin tantiec: —Nëid bedenda —quepondash Esus.

¹⁰ Adnubien Petedon abi tsidiadaid chështe chictanquin chuiquid dapan yua abiucquo pateshunepondash. Aid yua Madco niondash.

¹¹ Adosho isashien Esus: —Padi. Chën. Min chështe naued. Nuquin Papan chiacpadeq paëmbo icnuc unësendabi —quepondash Esus.

Anasën shubuno Esus buanaid

(*Mat 26.57-58; Mad 14.53-54; Duc 22.54*)

¹² Adshobien sondado chedon Esus bedpondash. Aden bedshun: —Cuidmenun chuiquid dapa yacno mibi buanu —catanquin catanepondash.

¹³⁻¹⁴ Aden cataneshun buanquin con matses chuiquid dapambo Caipas caidën cucun shubunoba buanondash. Aid setambi chuiquid dapambo Caipas iccondash. Esus chieshë nec: —Nuquin matsestedi unës uamenquo icnuen Esusded unës uamenuna —queboed Caipas niondash. Aton cucu chuiquid dapabidi niondash. Aidi Anas niondash. Anasën shubunoba Esus buampondash. Ashunquo Caipas ismenuen buampondash.

Petedon: Ëmbi isacmaid Esus nec, quequin chiaid
(Mat 26.69-70; Mad 14.66-68; Duc 22.55-57)

¹⁵ Esus buansho isun Petedobëdtan chinunondambi. Chinuntuidash nidequi Caipasën shubuno choash daquënë uaidën puduednuesho tantiashun shëcuë isquid chidon puduedmiondashi. Ambi isonaid icsho aden puduedmiondashi.

¹⁶ Ëbi puduedmequin Petedo ambi isacmaid icsho puduedmenquo icpondash. Adsho istanquin: —Ëbëd icquid neque. Shëcneshun. Ma puduednu —capondambi.

¹⁷ Adoac puduedmeshun shëcuë isquid chidon: —¿Në bedboed Esusbëd icquidta mibi ne? —capondash Petedo chuiquin. Adoaquien Petedo dacuëdec: —Padenquo —quepondash muequi.

¹⁸ Adnubien iquendoshon daquënë uacnoshon cuëte dëtsiadoshon sondado chedobëd anocquido yuabo cuëte cuëec tabadpondash. Adsho isashien Petedotsen cuëte cuënuac nidpondash ëbi shubunquo puduednuc.

Caipasën Esus chuimiai
(Mat 26.59-66; Mad 14.55-64; Duc 22.66-71)

¹⁹ Adec ëbi puduednubien Caipasën Esus chuimepondash. —Mibëd icquid ¿tëdtsi iquec? ¿Ëbëd icquido dëniaquecta icpec? Mibëd icquido ¿mitsipaden chuibano? —capondash.

²⁰ Adoaquien Esusën chuipondash. —¿Ompoquindambi chuibandio? Nuquin Papa tabadte shubu uashunaid daquënë uaidën puduedshun mambi chuibandeneboc. Nuquin Papan chiaid chuibante shubun-shubunquiecu puduedcuenequin mambi chuibeneboc. Ompoquin chiambo iccombi.

²¹ Mimb: “Icsamboen naosh,” caid ëbiuidtsëqui chuimenda. Ëbëd icboedotsen chuime. Ëmbi chiaid abitedi tantiashun aidombi mibi chuitsiashe. Aidotsen chuime —quepondash Esus.

²² Adsho tantiashun: —¿Chuiquid dapada adopaid? —quetanquin sondado chuiquidën mëdanten bëcuespondash Esus.

²³ Adoaquien: —¿Icsamboendambi chuidio? ¿Atotsimbi icsa uaoque? En chui. Mambi abimbo chuiboc. ¿Abimbo chuiquidta cuespaid? —quepondash Esus.

²⁴ Adondash Esus Anasën abi cataniacchobi Caipasën shubuno bëac.

Petedon: Ëmbi isacmaid Esus nec, quequin chuioaid
(Mat 26.71-75; Mad 14.69-72; Duc 22.58-62)

²⁵ Adnubien Petedo abi cuëte cuëec tsadsho abëdtan cuëte cuëec tabadquidon: —Esusbëd icquidien mibi nechitec —capondash. Adoaquien Petedo: —Padenquo. Mabi aidbëd icambo yoc —quepac caondash.

²⁶ Adshobien chuiquid dapan yua utsin Petedon pateshuneboedën matsesën: —Esus bedacnobimbi mibi ischitoc —caquien

²⁷ padpidec: —Padenquo. Mabi ano nidambo yoc. Ëmbi isacmaidquo ma Esus neyoc —quenubien Esusën chuiboedquo cachina bënë cuëdampac caondash.

Pidato caidën shubuno Esus buanaid
(Mat 27.1-2; Mad 15.1-5; Duc 23.1-5)

²⁸ Adnubien Caipas aton chuiquid utsibobëd: —Nuquin matses yuaquido ancaquid Pidato caid ismenuembien Esus buantiad. Aid Esus unës uamenuembien natiad —quecuededpondash. Badiadnubi Pidaton shubuno Esus buampondash. Buanashic: —Matses utsin shubun puduedshun mishtemaid mishash Nuquin Papan matamiampid inchësh tantiec con matsesbëd pec tabadtiapimbo icchitomanë —quiash Pidaton shubun puduedenquo icpondash.

²⁹ Adnubien Pidaton aton shubunuësh puduantanquin Esus bëquido chuipondash. —¿Atotsi quequin nëid bëo? ¿Icsamboen naquidta nepec? —caquien

³⁰ —¿Bëdambo icquidtambi mibi ismenuen bëdio? Con matses chuiquid dapa ictiadquo icquien icsamboen naoshe. Cuidquiota —quepondash chieshëmënnquido.

³¹ Adoaquien Pidaton: —Mimbi cuidta. Min matsesën: “Icsamboshë icquid naden cuidquid yendac,” cacpadomboen nata —caquien: —Padi. Ëmbi cuidquin unës uacsho isash

min matses chieshtonoshe. Min matsesèn: “Con matsesènuidtsèqui unès uaquin cuidaquien bédambo ictsiash,” qeshun èbitedi chieshènushe —quepondash Esus chieshènquido Pidatombo Esus unès uametiadquio yec.

³² Ènden abi chieshènquidon bedabi icnuc: —Èbi cuesten dectanquin unès uaindac —quequin Esusèn chiapadomboen namenuc adpondash.

³³ Adnubien aton shubun puduetanquin Pidaton Esus chuimeoapondash. —Cho. Chuinu. ¿Min matses isadaidbo chuiquid dapada ne? —caquien

³⁴ Esusèn: —¿Mitsipadquid chuiquid cai? ¿Utsibon tantiapadquidta cai? ¿Mibipadquidta cai? —capondash.

³⁵ Adoaquien Pidaton: —¿Isadaidbodabi nedi? Padenquio. Èmbi tantiapadquid caimbi. ¿Atotsieshun min matses chuiquid dapabon mibi bèosh? ¿Atotsi icsa uasho naosh? —caquien

³⁶ Esusèn Pidaton bèyuc chuiboed tantiaquin: —Mibipadquid chuiquid dapapenquio nebi. Nidaidèn con yua sondado nibèdec. Nidaidènuèsh mibipadquid icquin con yuabo èbi bedquido cuesun siametsenombi. Aden èbi bedenquio ictsenosh. Mibipadquidpenquio nebi. Abuschun chuiquid dapambo nebi —quepondash Esus.

³⁷ Adsho tantiashun Pidaton: —Chuiquid dapambo nebi ¿quecta ique? —caquien: —Ai, adquid nebi. Chuiquid dapambo icnuc matsespondabi. Chuiquid icquin matses uaquid tantiamenuen abimbo chuibanombi. Adoac abimbo chuisho tantiate bunquidon èbi tantiatsiandac —quepondash Esus.

³⁸ Adsho tantiash Pidato: —¿Tsuentsin matses uaquid quequin abimbo chuipatsiash? —quetanec pduenshun Esus chieshènquido chuiopondash. —¿Icsambo icquidta Esus nedic? Ma icsapenquio icquid neyoc.

³⁹ Nèid cuidtiapimbo icquin chuinu. Nuquin Papan matamiampid inchèsh tantiate ushèn min matses quènèn nauedaid abentsèc cuemedeniøndambi. Adembidi abentsèc cuemembi. ¿Mitsicquidimbi cueme? ¿Nèid mibi chuiquid dapa Esustambi cuemepe? —caquien:

⁴⁰ —Padenquio. Esus nainda. Utsibi cuemeta. Badabas caid cuemeta —quecuededpondash. Badabas caid Doma yacnocquido cuesun siaquin cuemete bunquidquio icnuc adcuededpondash Esus chieshènquido Esus unès uamete bunquie.

19

Esus cueshcaid

(*Mat 27.27-31; Mad 15.16-20*)

¹ —Badabasquio cuemeta —quesho tantiatanquin Pidaton: —Nè Esus cueshcanuen buan —capondash. Adoaquien buanshun sondadon canite cuèshè dèdectanquin nacnenaid cueshcanten Esus comapenen cueshcacac caondash.

² Cueshcatanquin pinchuc-pinchucpambo icquid mauete nacnenaid Esus mauemepac caondash. Adotanquimbic chuiquid dapan dashcutebimboecquid umucquid dasiuintanquin:

³ —Adec dasiuidquid chuiquid dapambo nec —quequin sondadon Esus mamènshumpac caondash. Aden mamènshunquimbi: —Isadaidbo matses chuiquid dapambo Esus neque. Is —quetanquin mèdanten bècuesbanepac caondash. Adotanquin Pidato yacnobidi buanoapac caondash.

Esus unès ua, quiaid

(*Mat 27.15-26; Mad 15.6-15; Duc 23.13-25*)

⁴ Buanoacsho istanequien Pidato padpidec puduenoash Esus bèquido chiec: —Mimbi bèboed Esus icsapenquio iquec. Icsambo icquid icsho: “Unès uata,” catsiambi badedi. Icsapenquio icquid icsho adotiapimbo iquebi. Padi. Cueshcaquin cuidombique —quepondash Pidato. Adnubien

⁵ Esus puduempondash. Pinchuc-pinchucpambo icquid mauemetanquin dashcute umucquid dasiuinac dasiuidpamboec pduenshobien Pidaton: —Is. Mimbi bèboed choeque —cac

⁶ chosho istanequien: —Cuesten dectanquin unès uata. Cuesten dectanquin unès uata —quecuededpondash Esus chieshènquido comapenec cuèdec. Adoaquien Pidaton: —Mimbi cuesten dectanquin unès uatan. Èmbimbo adotiapimbo iquebi. Icsapenquio icquid icsho Esus unès uatiapimbo iquebi —capondash Pidaton.

⁷ Adoaquien Esus chieshènquidon: —Con matsesèn: “Nuquin Papa muauaquid unès uaquid yendac,” cacpadomboen natiadquio iquebi. Esusèn: “Nuquin Papan Madombo nebi,” quequin Nuquin Papa muauaoshe. Unès uaquimbien ictiad —quepondash.

⁸ —“Nuquin Papan Madombo nebi,” quiosh —quesho tantiashien Pidato dacuèdquie yampac caondash.

⁹ Adash aton shubun Esusbëdi puduedoashun Pidaton Esus chuiuoapondash. —¿Tsutsimbo ne? ¿Mitsiüeshquico chonda? —caqui Esusèn ëcbedenquico icpondash.

¹⁰ Aden ëcbedenquico yac nëishashien Pidato: —¿Chuitiapimboda ique? ¿Tantienquioda ique? Ëmbi: “Cueme,” cac mibi cuemetsiash. Ëmbi: “Cuesten dectanquin unës ua,” cac mibi adotsiashe. En chui —caquien Esus:

¹¹ —¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquico icquin mimbi ëbi cuesten dectanquin unës uametiapimbo ictsiac. Ëbi cuesten dectanquin unës uamenuec mibi icsambo icnuc ëbi bëboedo chuiquid dapabo icsamboshë iquec —quepondash Esus.

¹² Adsho tantiasien Pidato: —Esus unës uatiapimbo icchitebi. Cuemetiadquico iquebi —quetanquin padpiden Esus chieshënquido chuitanoapondash. —Esus cuemenu —caquien: —Icsambo iquec. Min matses abitedimbo chuiquid dapambo Sesad caid: “Ëbentsëqui chuiquid dapambo nebi,” quiac caosh. Aid dëniaguec Esus chuiquid dapa icte bunquiec. Esus cuemequin mibi chuiquid dapambo mimbi nëishmeque. Esus cuesten dectanquin unës ua —quecuededpondash.

¹³ Adsho tantiashun Esus puduemooatane cuënote nacnenaid abuc tsadunaidën cuidte chuinec tsadten tsadtopondash Pidato. Aid cuënote nacnenaid con onqueten Cabata capondash.

¹⁴ Nuquin Papan matamiampid inchësh tantiate ushë badiadash icnuc niondash. Aid tsadten tsadtoshon Pidaton: —Në mibi chuiquid dapa iquec —capondash iccuededquido chuiquin.

¹⁵ Adoaquien: —Cuesten dectanquin unës ua. Nëbimbobi buanshun cuesten dectanquin unës ua —quecuededpondash Esus chieshënquido. Adoaquien: —¿Mibi chuiquid dapadambi cuesten dectanquin unës uape? —Pidaton caquien Esus chieshënquido: —Mibi chuiquid dapambo Sesad caid aiduidtsëqui chuiquid dapa caimbique. Esus cuesten dectanquin unës ua —quecuededpondash Esus chieshënquido. —Nuquin Papa yacnuësh choshon nuqui yuaquido cuemepashun —queboedobi adondash abi yuaquidi chiequi.

¹⁶ Adoaquien Esus chieshënquidon chiacpadomboen: —Esus cuesten dectanquin unës uatan —capondash Pidaton aton sondado chuiquin.

Cuesten dectanquin Esus unës uaid

(*Mat 27.32-56; Mad 15.21-41; Duc 23.26-49*)

¹⁷ Adoac buanquin: —Nëidën dectanu —qeshun sondadon cuate daëd napotiaid Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caid yacno buampondash. Aid macuësh mapi canite cain con onqueten Cocata capondash.

¹⁸ Ambo nidshun aton dashcute dachictanquin bëchun shuin mëtoccoquinc tatoccoquinc catanquin cuate daëd napotiaid ambi bëboedëmbi Esus dectampondash. Icsambo icquid daëdpambo cuesten dectanaid uquë diadbudcuenec diadnuc Esusquico nënantanquico dectampondash.

¹⁹⁻²⁰ Adnubien Pidaton: —Nasaded yacnuësh caniquid yec Esus isadaidbo chuiquid dapa nec —quequin cuate pada uaidën dada uapac caondash. Aton matses Doma yacnocquidon onqueten dada uaquinc con onqueten dada uaquinc matses utsi Quidieco matsesën onqueten dada uaquinc catanquin Esus dectanaid cuesten dectampac caondash. —Ëmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —qeshun Pidaton adopac caondash. Aden dada uashun dectanaid isashien Esus chieshënquido nëishquiopac caondash. —Shubu dadpen icquid Edusaden caid anoentsëqui Esus dectanaid icnuc matses utsin onqueten-onquetenquien dada uaid matses dadpeshun isnushe —quias

²¹ Pidato chiec nidpac caondash. —Icsamboen chuiquin ma mimbi dada uapac. ¿Con matses chuiquid dapada Esus nedic? Adquidpenquico nec. Utsi uain dada uata. “Isadaidbo matses chuiquid dapa nebi,” quequid Esus nec,” quequin cuate cuëshë utsin dada uata —caquien

²² —Padi. Mambi ëmbi tantiaboedquico dada uaboc. Utsi uain dada uaoatiapimbo iquebi —quepac caondash Pidato.

²³ Adnubien Esus dectanquido sondado daëd-daëdquiec icpondash. Esusën dashcute 5ted icsho sondadon bedbanquin abentse-abentsen bedbededpondash abentsëc abi icnuc. Aid abucshun bedanquin abichobi daëdcaid tuscabi icquid niondash.

²⁴ Adquid icsho isun: —Canchenquico icquin ¿tsundanquico bedequo? Isnuna —qeshun abi cuëmëdquidtedi dada uabanshun tëchun sandoshon cadotanequin dada uaidëmpi abia puduemaiad isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “Abentse-abentsen con dashcute bedosh. Con dashcute

utsi bednu, quequin dada uaidëmpi abia puduemiaid isnuen naosh,' quependac," quequin dada uapampic.

²⁵ Adnubien Esus dectanaid cuate tayun nëidtedi icpondash. Nëidic Esusën tita. Nëidic Esusën tita utsi. Nëidic Madia Codopasën chido. Nëidic Madia utsi Mactada yacnuësh choquid. Aidtedi chido icpondash.

²⁶ Nè chido tabadnuc ambobi uquëtsëc tabadondabi. Adec ambi tantiaidquio ëbi icsho isun Esusën aniba chuipondash. —Nëid con mado cata, tita. Ma mibi bédamboen dayun uanu —capondash Esusën.

²⁷ Adshumbic ëbitsen chuiquin: —Con ta tita cata. Adshun bédamboen ëbi dayun uashunta —cac con shubunobi buanondambi bédamboen Esus dayun uashunuen.

²⁸ Adboshien unësquionoshi Esus: —Con Pan chiacpadomboen nainembi. Matses tantiec ëbided cuidadec unësebi —quequin tantiec con tsusedpan dada uaquin chuipampicpadec: —Acte bundobi —quepondash Esus.

²⁹ Adsho tantiaishun matsun acte mucambo icquid anidquid shapu-shapupactsëcquidën punshun cuate dëdectanshun abuc sananquin ëccuëscadonetsëcquin chishmepondash.

³⁰ Adoac acte mucambo icquid chishtanequien: —Con Pan chiacpadomboen nain-quiombi —quepondash. Adtanequi tédquëdbudpondash Esus unësequi.

Esus uinte masiaid

³¹ Adnubien Esus chieshënkuido: —Badiadash Nuquin Papan matamiampid inchësh tantiate ushë iquec. Chonoadenquio icte ushë nec. Aidën cuesten dectanquin unës uaid chococac icsambo ictsiashë. Nëbimbobi chococamenu —qeshun Pidato chuitampac caondash. —Baded nitde podquënquin unës uame. Inchësheque —cac

³² Pidaton aden chiac sondadon nitde podquëntanondash. Esusbëdta dectanaid ëquë diadquidba nitde podquënshumbic utsiuc diadquidtsen.

³³ Adotanquin isquien Esus ënden unëfac. Adshobien nitde podquënquio icpondash.

³⁴ Adotanquimbic: —Unësebi icnushe —qeshun: —Unës uaquio bono —quetanquin sondadon cudan podo ansequin Esus uinte masepondash. Adoac nua intac chididiquiondash actebëdi.

³⁵ —Adosho ëmbimbo isondambi —caimbi. —Ëmbi dada uaid isun ma Esus tantianu —qeshun abimbo chuiquin dada uaombi nëid dada uaquin.

³⁶ Nuquin Papan tantiamiac con tsusedpan: “Canite podquënquio iquendac,” quequin dada uapampicpadomboen canite podquënquio icpondash Esus.

³⁷ Adembidi podo ansete dada uapampic. “Ambi podo anseboed isec tabadendac,” quequin dada uapampic.

Esus unëfacsho chococaid

(*Mat 27.57-61; Mad 15.42-47; Duc 23.50-56*)

³⁸ Adnubien shubu dadpen icquid Adimateya yacnocquid Ose chopondash. Esus tantiaquid aid niondash. Esus chieshënkuido dacuëdënquin: —Esus tantiaquid nebi —quequin utsibo chienquio icboedëmbi Pidato chuitampac caondash. —Esus chococanun buanendambi —cac: —Ai —cac Esus buampondash.

³⁹ Aidbëdi Nicodemo inchëshën Esusbëd onquiondaid nidpac caondash. Bëdambo nuadquid mida adoebëdta cabiunaid unësaid dabiunte bëac caondash. Nuamboshë. Yuëmbo icnuc 35 quidostembi icnuc bëac caondash.

⁴⁰ Adshumbien Osebëdtambi Esus nua dabiunquin uesquin dataniac caondash dashcuten. Adshumbic padpiden dabiunoaquin. Adshumbic padpiden dataneoquid. Adshumbic padpiden dabiunoaquin. Adshumbic dataneoquid. Chococanun con matsesën adoquid.

⁴¹⁻⁴² Adashic: —Badiadash Nuquin Papan matamiampid inchësh tantiate ushën unësaid chococac icsambo ictsiashë. Badedquio chococanu —qeshun tied nëbi ictsëcquidën Esus buampac caondash. Buanshumbic cuënote dapa shëcuë uaid chucan matses chococabi icquidën Esus nauedpac caondash. Shëcuën nauedtanquin bëtimpac caondash cuënote dapambidi.

20

Esus uincuenaid

(*Mat 28.1-10; Mad 16.1-8; Duc 24.1-12*)

¹ Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bëtinaid cuënote dapa bëcunepamboen shëcniac.

² Cuënote dapa bëcunepamboen shëcniacsho istanec titinquianec choquin chuituidpondashi. —Esus padoen buanchitaccosh. ¿Mitsimbo buampash? —quepondash Madia Petedobëdta ëbi chuituidec.

³ Adoquinini: —Istanu —quianec

⁴ titinquianec chococacno Petedobëdi nidpondac. Petedo nianec ëbia nidpondabi.

⁵ Adshumbimbi puduedenquo icquin shëcuë anshuebudshun anispondac. Adshun isquien dashcute dataniaiduidtsëqui uec.

⁶ Aden ëmbi anisnubien Petedo choequi badedi shëcuën puduedpondash. Aidëntsen dashcute dataniaiduidtsëqui istuidondash. Esus nibëdondash.

⁷ Në dataniaid uenubi udictsëc dashcutempi bëpucaid bëdamboen shëbunaid uiondash.

⁸ Aid puduedsho istanec tsyuec puduedshun ëmbitsen isondambi. Adash: —Uincuenac. Nuquin Papan Madombobi nec —quepondabi Petedobëdtsëqui onquec.

⁹ —Nuquin Papan tantiamiac con tsusedpabon aden Esus uincuenta chuiquin dada uapampic —quequin tantienquo icboedi adondabi.

¹⁰ Aden istanec ëbi ushbocnobidi chiec choapondabi.

Esusën Madia Mactada yacnocquid ismiaid

(Mad 16.9-11)

¹¹ Adnubien ëbi chuiamboed Madia chococacnobidi isec nidoapac caondash. Nidash shëcuë cuëmano tsadec sedenquetuidpac caondash. Adec shëcuë cuëmano tsadec sedenquetanec shëcuë anshuebudshun isaquien

¹² Nuquin Papan abi yacnoshon uaido mayan bëda daëd ushumbo icquid dasiuidquid Esus uebocno tabadpec. Esus nibëdec. Mapi icbocno abentsëc tsadnuc utsi taë icbocno tsadpac caondash.

¹³ Adshumbic aidën: —¿Atotsi quiash sedenque, champi? —caquien: —Con Icbo pado ¿midambo buanac? Istiadquio iquebi. ¿Mitsimbo buampashba? Unësquio iquec —quetanec

¹⁴ aubidi nidnuec bidiadshun isquien Esusquio icpec. Utsi dansho

¹⁵ Esusëntsen: —¿Atotsi quiash sedenque, champi? ¿Tsutsi nibëne? —caquien Madian tied neshcaquid danquin: —¿Con Icbo padoda buano? ¿Mitsimbo buano? Èbi isme. Shëcuë utsin chococanun buanu —capac caondash Madian Esusquioibi chuiquimbi.

¹⁶ Abi adoshobien Esusën: —Èbi nebi, Madia —cac bëisquotanequien: —Esus nec. Èbi chuiquidquio nec —quetanquin con onqueten cuënquin: —Dabi —capac caondash. Adotanquimbien Esus dayumbudpac caondash unësquio icsho.

¹⁷ Aden abi dayumbudshobien Esusën: —Èbi dayunenda. Padpidec nidenquio icte danquin ëbi dayunenda. Èmbi chuibocpadec con Pa yacno nidabi yuec-yuecpactsec tabadtanec nidebique. Èbëd icboedo ëmbi con utsibo caboedo ëmbi chuibodquio chuitan. “Nuquin Papan yacno nidendabi, quiosh,” catan —quepac caondash Esus.

¹⁸ Adoquien ëbi chiec Madia chopondash. —Nuquin Icbo Esus isombi. Uincuenaccosh. Ambi chuibod chuinu. Tantia —quequin Esusën abi chiaidquio chuituidpondashi Madian Mactada yacnocquidën.

Uincuenshun Esusën abëd icquido ismiaid

(Mat 28.16-20; Mad 16.14-18; Duc 24.36-49)

¹⁹ Madian aden chuituidboed inchëshbudtsëqui shubun tabadpondabi Esusbëd icboedobëdi. Esus chieshënquido dacuëdënquin umanucüesh utsi puduedtiapimbo icnuc bëdamboen bëtashash tabadnubien shëcuënuësh puduedenquo icboedi nuntanquioibi Esus isadcuempondash. Adtanequien: —Dacuëdenda —quepondash.

²⁰ Adtanquin abi bëchun shuin mëtoaccaid abi podo ansiaidbëdta ismiaquini cuishonquiampondac: —Nuquin Icbo uincuenac —quiash.

²¹ Adec cuishonquesho isashien ambi chuibocpadechbidi: —Dacuëdenda —quetanec: —Tantia. Mibi chuinu. Con Pan: “Mates chiec nid,” ëbi caondacpadomboembidi: “Èbi chuibeneta,” mibi caimbi —quepondash Esus.

²² Adtanquin ëbi chedo dabushcabampondash. Dabushcabanashic: —Nuquin Papan Mayan mibëd tabadendac.

²³ Mibëd icquin Nuquin Papan tantiaidquio tantiamequin Nuquin Papan Mayanën mibi utsibo chuibamendac. Adoac mimbi aden chuibanaido caic: “Nuquin Papan chiaid niaquec icsambo icboedi Esus tantiaquid yansho Nuquin Papan nëid bëdamboen isec,” quequin mimbi chiacpadomboen Nuquin Papan bëdamboen istsiash. Utsien: “Nuquin Papan chiaid niaquec icsauidequi icsho nëid Nuquin Papan bëdamboen istiapimbo iquec,” quequin mimbi chiacpadomboembidi Nuquin Papan bëdamboen istiapimbo ictsiash —quepondash Esus ëbi chedo chiec. Adtanequi isadenquo yanooandash.

Esusën Tomas ismiaid

²⁴ Adec Esus isadenquo yanoanubien Esusbëd ichoed utsi Tomas abi ushëmbi anin daëd tishaid chopondash.

²⁵ Choshobi: —Esus isombi —cac: —¿Aidquibida nepash? Utsien nechitash. Bëchun shuin mëtoçcaid shëcuë isun aid shëcuë mëdanten bëmishquinc podo ansiad bëmishquinc caquioshombimbi: “Ai, nuquin Icho uincuenac,” quequin tantiatsiac. Padambobi: “Con Icbobien niash,” quetiapimbo iquebi —quepondash Tomas.

²⁶ Tomas adbon 7tedec ushash shubu nuntambidi tabadoapondabi. Tomas chedobëdi tabadondabi. Puduedtiapimbo icnuc padpiden bëtashoash tabadnubien shëcuë shëcniabi Esus isadcuenoapondash. Adashic: —Dacuëdenda —queoapondash.

²⁷ Adtanequien: —Is con mëdante, Tomas. Shëcuë bëmishec cho. Në podo ansiad iqueque. Aidsen bëmishec cho. Adshun: “Uincuenabien icchitash,” queboedëmbi: “Uincuenaccosh,” quequin tantiata —caquien

²⁸ mishenquo yec badedi: —Tso. Con Icbombo ma mibi neyoc. Nuquin Papapadquidquibidi ma mibi neyoc —quepondash Tomas.

²⁹ Adsho tantiashien Esus: —Ëbi isun: “Nuquin Papapadquidquibidi mibi nec,” quequin mimbi ëbi tantiec. Utsibombien ëbi isabi: “Ai, Esus Nuquin Papapadquidquibidien nec,” quequin ëbi tantiasho Nuquin Papan bëdambo icmendac —quepondash Esus Tomas chiec. Adtanec isadenquo yanoapondash.

³⁰ Comapenen tantiaquidquo yec abembi uincuenash Esus adpondash. Ënden unësbabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiamo iccombi.

³¹ Padi, aitedi chiombi. —“Nuquin Papan chomiaidquo yec Nuquin Papan Madombobien Esus nec,” quequin aid tantiash ma Nuquin Papa yacno abëd tabadtequido icpanu —quequin aitedi dada uaombi.

21

Chian cuëmanuësh Esus isadoaid

¹ Tantia. —Edusaden yacnuësh isadboshic chian Tibedias caid cuëmanuështsen Esus isadpondash —quequin mibi chuinu.

² Esus uincuenash daëdec isadan con nidaid Cadidia caid yacno nidanepondabi. Nidanish nëidtedi tabadpondabi. Nëidic Petedo. Nëidic Tomas anin abi ushëmbi daëd tishaid ëmbi caboed. Nëidic Cana yacnocquid Natanaid. Nëidic ëbëdta tishaidquo. Nëidic ëbi. Nëidic Esusbëd ichoed utsi daëd. Aitedi icpondabi.

³ Adnubien Petedo: —Ëmbi bedtenecpaden nëshaidën nuëcquid bedtanu —quepondash. Adshobimbi: —Nid. Nuquitedi nanu —capondac. Adash chian yacno nidash cano antabëdtoanec nënantan nidpondabi. Adshun nëshaid dapa nëneshun yuecshun cadoshon isac nibëdec. Adshumbic padpiden nëneoashun cadoshon isac nibëdoaic. Inchëshbudtsëc tauash nuëcquid bedambobi ambi badiadpondabi.

⁴ Badiadquionobi acte cuëman masi dapan Esus nidsho istuidpondambi. Utsiembi dampondac.

⁵ Adshobini Esusën cuëmpondash. —Con utsibo ¿tedtsi bedo? —cac: —Padambo. Nibëdosh —capondambi.

⁶ Adsho tantiashun: —Mimbi nëniauc nënenquo icquin cano utsiuc nëshaid nëne. Adoac nuëcquid bedadec —cac ambi chiauc nëshaid nënetanquin: —Indono —cac nëshaid indotiapimbo yuëmboshë icpondash. Nuëcquid dadpen bedac.

⁷ Adsho isumbimbi: —Ma Esus neyoc, Petedo. Nuquin Icho nec —capondac. Adoquien aton tsitsumi icquiduidtsëqui icnuc abi dachiquidboed aton dashcute utsi dasiuidtanec acte nëpudunash Petedo tan-tanidec nidpondash Esus isnuec.

⁸ Ëbien utsibobëd canombi tsyuec nidondac nëshaid shoyombanec. Cuëma anoentsëqui nuëcquid bedash 100 metedos cactiotsëc nidondabi.

⁹ Tsyuec choash pudundoshon isquien pambëdi nuëcquid cuëten shëadtsec.

¹⁰ Adnubien Esusën: —Mimbi bedboed daëdpactsëc beccho. Penu —cac

¹¹ Petedo: —Ai, bedtanu —quianec nidash cano anidtoashon nëshaid cubu-cubuctsëcquio icquid indopondash. Acte cuëmano tsindoshon isac dadpenquioshë 153tedi nuëcquid icpondash. Nua-nuaic tsadquido icpondash. Nëshaid tësëdiadttsëcquio icnuc indondambi.

¹²⁻¹³ Adshumbic ambi: —Pec cho —¿Tutsi ne? —quenquo icquin: —Esus nec. Comapenen tantiaquin nuëcquid nuqui bedmiosh —quequin tantiondambi ëbitedishun.

¹⁴ Adec uincuenash shubu nuntan tabadnuc daëdec isadondashic chian cuëmanuështsen isadoapondash Esus.

Esusën Petedo chiaid

¹⁵ Aden chian dapa cuëmashun Esusbëdtan piondambi. Adshumbic Onas caidën mado Petedo Esusën chuipondash. —Tantia. Mibi chuinu, Petedo. Nëidon ëbi bëdiactsëc tantianuc çada ëbi tantiaquie? —caquien: —Ai, mibi tantiambi. Aden ëmbi tantiaid mimbiantieci —quepondash Petedo. Adsho tantiash: —Ëbi tantiaquin con obecabimboecquido ëbi dayun uashunta —quepondash Esus. —Obeca icbon aton yua dayun uacimboen ëbi tantiaquido ëbi dayun uashunquin ëmbi chiaidbëdta ëmbi naidtedi chuibanta —quequin tantieci adpondash.

¹⁶ Adshumbic padpiden: —çAda ëbi tantiaquie, Petedo? —cac: —Ai, mambi mibi tantieci —quesho tantiashien padpideci: —Ëbi tantiaquin con obecabimboecquido ëbi dayun uashunta —queoapondash Esus.

¹⁷ Aden daëden chuishumbic padpiden Esusën: —çAda ëbi tantiaquie, Petedo? —cac shubiantiadtsëcquio yanondash Petedo. —Unës uabi icnu: “Ëmbi isacmaid Esus nec,” quequin ëmbi chuiboctedembidi Esusën chiebi —quiash shubiantiadtsëcquio yanondash. Adashic: —Mibi con Icho nec. Ma mibi abitedimbo tantieci. “Petedon ëbi tantiaquieci,” quequin ma mimbiantieci —quepondash Petedo. Adsho tantiash Esus padpideci: —Ëbi tantiaquin con obecabimboecquido ëbi dayun uashunta —queoapondash Esus.

¹⁸ Adashic Petedobidi chuioaic: —Tantia. Utsien chuinu. Cania yec mibibi tsiuidondac. Adanec mibi bunacno mibi nidtednondac. Tsusiobudtsacshoen tsiimeshun utsibon ëquë mëdimbudcuentsëcshun mibi nidte bunacmanombo mibi buanendac —quepondash Esus.

¹⁹ —Aden mimbitsen Nuquin Papan chiacpadomboenuidi nabansho ëbi chieshënkuidon mibi unës uaindac —quequin tantieci adpondash Esus. Adashic: —Ënenquio icquin ëbi tantia —quetanquimbic: —Cho. Nidnu —cac ëbitedi puduanec nidondabi.

²⁰ Tsyuec nidshobini Petedon bidiadquin ispondash. Adshumbic: —Nëid Esusën tantiaidquio nec. Esus bedmiaid inchëshën Esus aton cachochtsëqui uestho aidën: “çTutsi cao, Icho?” capondash.

²¹ çMitsipadec aid unëspatsiash? —queshun: —Ma nëid. çMitsipadec unëspec? —capondash Petedon ëbi unëste Esus chuimequin.

²² Adoquien Esus: —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquio icnu,” ëbi quiacpadec unësenquio ictsiash. Adecbidi: “Ëbi choabi icnu ma unëspanu,” ëbi quiacpadec unëstsiash. “Nadec unësendac,” quequin mibi chienquio iquembique. Ënenquio icquin ëbi tantia —quepondash Esus.

²³ Adec: —Unësenquio ictsiash —Esus quesho tantiash ëbi caic: —Esusën tantiaidquio yec Uan unësenquio iquendac —quecuededpondash Esus tantiaquido. çAdenda Esusën chuidiondash? Ma padenquio iccondac. —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquio icnu,” ëbi quiacpadequien unësenquio ictsiash. “Adecbidi ëbi choabi icnu ma unësnu,” ëbi quiacpadec unëstsiash —quequien iccondash.

²⁴ Aden Esusën nabanondaid ënquin chiombi. Ëmbi isondaidquio chuiquin abimbo chuiquin aidtedi dada uaombi.

²⁵ Esusën naidtedimbo chuiquin dada uambo iccombi. Ëmbi tantiaidtedi naombi. Ambi naidtedimbo ambi chuibanaidtedimbo chuiquin dada uaqin dada uate dadpenquioshë naimbudnetsiambi. Padi. Aidtedi dada uaombi.

ESUS CHUIBENEQUIDON NAID

Esus aton Papan abuc indote

¹⁻² Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuipanëdash aton Mayanën tantianubi.

³ Cuesten dectanac unësash uincuenshun: “Uincuenobique. Is,” quequin Esusën utsitsien ismebampanëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choauqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash.

⁴ Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta.

⁵ Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitedi menendac —quepanëdash Esus.

⁶ Adshumbic, padpidec Esusbëd icquin abëd icquidon: —Yuen matses utsibon namiaido nuquin matses nec. ¿Nëbimbobida mibi nuquin matses chuiquid dapa icpeque? Tantanu. Chui —capanëdash Esus chuiquin.

⁷ Adoquien: —Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iquendac —quepanëdash Esus abëd icquido chiec.

⁸ Aden chuishumbic: —Aton Mayan Nuquin Papan meniac aidënquio tantiamequin pausunac ëbi chuibenequidquio mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, ademidi nidaid utsi-utsiec yacnoshontsen ademidi ëbi chuibanendac —quepanëdash Esus abëd icquido chiec.

⁹ Aden chuibanquin Esusën nabanquin nainanec macuësh yacno choacsho aton Papan Esus abuc indopanëdash abëd icquidobëdtan abi tantiaquid utsibon isbedednubi. Aden isec tabadnubi abu ushun Esus bëtimpnanëdash.

¹⁰ Adec Esusbëd choboedo isec tabadnubien dashcute ushumbocquid dasiuidquid daëd choash tabadec:

¹¹ —Nidaid Cadidia caid yacnoësh choquido, ¿atotsi quiash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanëdash ushumbocquid dasiuidquid abuc isbededquido chiec.

Matias Esus chuibeneta quequin iccuededquidon chiaid

¹² Aden Esus abuc indosho isash abëd macuësh Odibos caid yacno choboedo Edusaden caid yacno nidoapanëdash. Chonoattemaid ushë nec, quec aidtïontsëqui capunëdash. Aido Edusaden yacno choash abuc quënë yacno abi tabadnoc dectatoash tabadoapanëdash.

¹³ Aid quënë nuntan Esusën ëbi chuibeneta caido nëidted icpanëdash: nëidic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaidpembo namequin chuiquid bunesa, Simon cuëmëdquid, utsibic Acobo utsin mado Udas cuëmëdquid. Aidtedi Esusën ëbi chuibeneta caido aid quënë nuntan tabadnubi

¹⁴ utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiachimboec onquecuededpanëdash.

¹⁵ Adashic Esus tantiaquid 120ted iccuedednubi nënantanquo nidtoshon Esusën ëbi chuibeneta caid abentsëcshun Petedon naden chuipanëdash:

¹⁶⁻¹⁷ —Udas pado chuibanu. Tantiata. Esusbëd icquin piucquid dayun uaquid icquimbi Esus chieshënquido Udasën Esus bedmepondash.

¹⁸ Aden Esus bedmeshun ambi piucquid bedboed menequin aton tiedëmpi bedashic aid tied nantanuësh tëtaniadash pobidisquiash paëdec aton pucu tishidpac caondash.

¹⁹ Pucu tishidec intac chiuidaid tied icsho tantiaquin Edusaden yacnocquidtedishun Aqedama cain aton onqueten cuëmbededpondash.

²⁰ Ademidi ëdenquimboshë Udas pado tishabicnuc chuiquin Nuquin Papan Mayanën tantiamiacpadomboen tsusedpa Dabid caidën Udas cuidte tantiec cuëdënte Sadmo caid naden dada uapampic:

“Ma adequi aton shubu mosadpanuna ma aidbidi aton matses nibëdquid shubu icpanuna.” Aden Udas pado cuidte chuiquin cuëdënte Sadmo caid utsitsen naden Dabid Padon dada uaoapampic:

“Aidën icsain nacpaden tanenquiocquin ma utsin bédamboen napanuna,”

quequin Dabid padon dada uapampic –quepanédash Petedo.

²¹ Aden chiashic abi onquec: –Udas pado nibédnuc Esus chuibeneta quequin abentséc nuquitedishun chuinuna. Nèid quènè nuntan nuquibéd capuquido dada dadpen iquec. Nuqui Esus chuibeneta caid nadquid ictiad. Chuinu. Tantia.

²² Esus Uan padon acten mentosho isash niamèdenquo yec Esusbéd capucueneshun Esus indosho isquidquo icsho, Esus chuibeneta, quequin nuqui chuitiad. Adoac Esusèn èbi chuibeneta caidobédtan Esus uincuemiaid chuibantiad –quepanédash Petedo iccuededquido chiech.

²³ Aden Petedon chuibanac daéd istuidash Petedobéd iccuededquido, Petedon chuibocpadquid nèid daéd iquec, quequin chuipanédash aidon. Ambi istuidaid abentséc Ose cashun Badsabas cashumbic Ústus, quequin cuènaid nepanédash. Utsibic, Matias cuèmedquid icpanédash. Nèid daéd Petedon chuibocpadquid nec, qesho tantiaashun: –Nènantanquo tabadec cho –cac abi daédi choash tabadsho isash

²⁴ Nuquin Papa chiech nadecc iccuededquido onquepanédash: –Nènantanquo chomeboed nèid daéd iqueque. Is, Papa. ¿Mitsicquidimbi Esus chuibeneta, cape? Èbitedi tantieme, Papa.

²⁵ Udas pado taidtiadpambo chian anèdènquiacono nidboedèn nauidaid namenu, quequin mimbi bédamboen isaid abentséc èbi isme. Papa. Aden mimbi ismiac ma aidèntsen Esus chuibenepanuna –quepanédash Nuquin Papa chiech.

²⁶ Aden chuitanquimbic aid daéd abi cuèmedquid abentse-abentsen dada uatempin dada uashumbic tèchun sandoshon cadotaniac dada uatempi abia puduenaid istanquin, Matias cuèmedquid nec, quequin isbededboshic, Esusèn èbi chuibeneta caido onseted icboedi nèbi Matiasbéd doseted yanosh, quequin chuibededpanédash nuntan iccuededquidtedishumbi.

2

Aton Mayan Esus tantiaquidtedi menebanaid

¹ Adashic isadaidbon ambi aton tiedèn caniquid abia èshèaid bedaid tantiaid ushè chotsècnubi Esus tantiaquidtedi shubunuèshi iccuededoapanédash.

² Ambo iccuededquimbi badedquio shubu nuntan cunquequid dapa choec natiambo cunquiacbimboecsho abitedishun isbededpanédash.

³ Aden aid isbedednubi cuète dètsisidacimbocquid budec mais-maisec Nuquin Papan Mayan matsadtocuededpanédash abi isquidtedi.

⁴ Nuquin Papan ma aidobéd tabadnueshun aton Mayan Esus tantiaquidtedi menebanac matses utsi-utsiec onquetenquo onquecuededpanédash ambi matsadtomiaidodeti.

⁵ Aden Nuquin Papan aton Mayan menubien isadaidbo utsibo Edusaden yacno chochoash dadpen tabadpanédash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoèsh Edusaden yacno cho-chopanédash.

⁶ Ambo cho-choash tabadnubi Nuquin Papan aton Mayan meniaid-meniaidquiecc nèmbobi choquidon onqueten-onquetenquiecc onqesho tantiaash nèbi cho-choboedo utsi-utsiec:

⁷ –¡Padtec! Dacuèdanquiopaic. Èbipadquieccshenda onquepec. ¿Onquequidodeti nidaid Cadidia yacnocquidoda nepec?

⁸ ¿Mitsipaden con onquete bedash onquecuededpec nec?

⁹ Èbitedi nidaid utsi-utsiec yacnoèsh cho-choquido nebi. Padtia yacnoèsh choquido; utsibic, Media yacnoèsh choquido; utsibic, Edan yacnoèsh choquido; utsibic, Mesopotamia yacnoèsh choquido; utsibic, Udeya yacnoèsh choquido; utsibic, Capadosia yacnoèsh choquido; utsibic, Ponto yacnoèsh choquido; utsibic, Asia yacnoèsh choquido;

¹⁰⁻¹¹ utsibic, Pidiquia yacnoèsh choquido; utsibic, Pampidia yacnoèsh choquido; utsibic, Equipito yacnoèsh choquido; utsibic, Dibia Sidene udictsècuèsh choquido; utsibic, shubu dadpen icquid Doma caid yacnoèsh choquido; utsibic, acte nènantan nidaid nacrédquid Quideta caid yacnoèsh choquido; utsibic, Adabia caid yacnoèsh choquido. Isadaidbobéd isadaidbopadquio icnuequido Edusaden caid yacno tsusedpabon chiampicpaden nanuec cho-choboedo èbitedi nèbi. Èbibimboec onquequidtedishun Nuquin Papan naid chuibansho tantiembi.

¹² ¿Mitsipaden tantiaquin oncamiaquien adec onquepec? –quepanédash Edusaden yacno cho-choquid.

¹³ Adnubien: –¿Bédamboec onquepequida onquec? Paèmbocquid cubudquin acshun tantienquiocquido nepanui –queoapanédash utsibo.

Iccuededquido Petedon chuibanaid

¹⁴ Adec onquesho tantiashun Esusën ëbi chuibeneta caido cho-choquin Petedon nid-toshon tantiamentu quequin naden cho-chobedo compapenec onquequin chuiapanëdash: — Mimbi icsamboen tantiaid chiembique. Tantiata.

¹⁵ Ushë abuctotsëcnubi ëbitedishun paëmbocquid acamboccombi.

¹⁶ Utsin-utsinquec onqueten onquesho mimbi tantiaid Nuquin Papan ëndenquimboshë chiampicpadec onquec nebi. Tsusedpa Oedëmbi Nuquin Papan ma matsesbëd tabad-nueshun aton Mayan menenun chiaid naden aidën dada uampic:

¹⁷ 'Nëid nidaid naimbudnubi

Con Mayan matses utsi-utsien menendambi.

Aidon madobëdtan aidon champibontsen ëmbi yuecquio icshun nanun chiaid chuibanendac.

Adembidi caniabontsen ushquin ëmbi chiacpaden isendac.

Adembidi tsusiobontsen ushquin ëmbi chiacpaden isendac.

¹⁸ Aden con Mayan meniac ambi tantiacpadomboembidi ëmbi chuiquin namiaidon dadan chidobëdtan

ëmbi yuecquio icshun nanun chiaidquiobidi chuibanoaindac.

¹⁹ Adembidi, con Mayanën tantiamiac ëmbi yuecquio icshun nanun chiaid matsesën chuibanubien abucuësh uinsadpamboctequid icnubi

nidaidëshun ismete intacimboectequidbëdtabi nëdënquetequid cuëte pushudquidbimboectequid abembi pushudquidbëdta adquidtedi mibi ismendambi.

²⁰ Adquid icnuc badiadën ushë chënquenuiocnoc

inchëshacimboectequid inchëshën ushë piu-piupambo yec intacimboecsho mimbi isbedendac.

Ëmbi ismiaidtedi icambi matses cuidte ushë choendac.

²¹ Ismequimbi con Icbombo nec ëbi caquidquio mënchiuendambi,'

quequin Nuquin Papan chuimiapaden Oedën dada uampic.

²² "Adembidi Nuquin Papan chomiaid chiembique. Tantiata, isadaidbo. Nasaded caid yacnoësh choquid, Esus, Nuquin Papan chomiaid icquin nadatiambocquin nabanquin ismebansho mimbi isondac.

²³ Aidi Nuquin Papan tantiampicpaden Esus bedshun mimbi isadaidpembo chuiquid menequin, Unës uata, cac cuesten dectanquin Esus unës uapanëdash.

²⁴ Aden mimbi nac unësacsho icsaisa chococacno yuec ictiapimbo iquec, qeshun Nuquin Papan Esus uincuemapanëdash.

²⁵ Adembidi ëndenquimboshë tsusedpa Dabid padon Esus chuibanquin naden dada uampic:

'Con Icbo abuc nidec bëyucanquid ëbëd tsadacimboecsho isec nebi.

Aidi con dayun tsadquid icscho isquin natiaic cametequid dacuëdënenquio iquendambi.

²⁶⁻²⁷ Aid unësash uincuenta tantiec ëbitsen uincuenendabi, Papa, quec cuëdënecc bëdambo iquebi.

²⁸ Nuquin Papa yacno tabadacpadec nidaidën tabadquin ismiac

mibi yacno nidash mibëdi tabadec bëdamboshë iquebi mimbi camiaid iquendabi,'

quequin Esus tantiaquin Dabid padon dada uapampic.

²⁹ "Adomboen tantiaquin dada uash Dabid unësacsho chococapampid nëbi shëcuë iquec.

³⁰ Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshë yash mibi ëndenquimbo unësampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon.

³¹ Aden Nuquin Papan nanun chiaid tantiaquin Esus uincuenta isachimboen dada uaquin, Nuquin Papan Chomiaid unësacsho chococacqui aton nami chodquenuio yec uincuenendac, quequin chuiquid Dabid padon.

³² Ai, Dabid padon chiampicpadembi Nuquin Papan Esus uincuemapanëdash. Aid uincuemiacsho isondaid icquin mibitedi chuibanec nebi.

³³ Aid uincuenash Nuquin Papan dayunquio tabadendac nëbi. Ambo choacsho matses tantiaquin Nuquin Mayan ma aïbëd tabadnueshun matses mimbi meneta, aton Papan cacpaden abi tantiaquidtedi menebanquiac onquete utsin-utsinquec onquesho nëbi mibitedishun tantiec.

³⁴ Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquio icshun nanun chiaid naden Dabid padon chuibampampic:

'Nuquin Papa Icbo Dapa icquin abipadquid icbo cain: Nëbi ëbëdi tsadec cho.

³⁵ Mibi chieshënquido dëniacquidquio mibi icmenun nabono. Chiata,' quequin Nuquin Papan nanun chiaid Dabid padon dada uapampic.

³⁶ “Aden tantiaquin Dabid padon chuipampid Esus mimbi cuesten dectanquin unēs uaid uincuemequin matses icsaid bedshunash abided cuidadquid Nuquin Papan icmepondash. Adoac ěmbi chiaid abimbo iqueque. Esus tantiaquidquio icta, isadaidbo —quepanēdash Petedo.

³⁷ Aden Petedon chuisho tantiaash iccuededquido abi icsaid tantiec unēsquio yec: — Esus tantianuequin ¿atotsi nuqi nape? —quepanēdash utsi-utsiec Petedobēda Esusēn ěbi chuibeneta caid utsibo chiec.

³⁸ Adoaquien Petedo: —Mibi icsaid ěnshun, Esus con Icbombo nec, quequin abimbo tantiaquin acten mentometa ma ěbi icsaid Nuquin Papa bēpiscudnu queshun. Adoacsho aton Mayan mibi menendac.

³⁹ Adembidi tantiaasho isun min tsyuecquidtsen menendac. Adembidi nidaidtedi yacnoccquidēn tantiaasho isun aton Mayan meneoaindac ambi chiampicpaden —quepanēdash Petedo Esus isquidquio.

⁴⁰ Aden chuibanequi: —Mimbi icsamboen tantiaid ěnta. Aden ěnash Esus tantiaquidquio icta —quequin chuibudquin Petedon ěmpanēdash.

⁴¹ Aden chuisho tantiaash, Tantiaquiemi, quepanēdash utsi-utiec. Aid ushēmbi dadpenquioshē tedes midted Esus tantiaquid yampanēdash. Adquid icsho isun acten mentobampanēdash.

Esus tantiaquido iccuededaid

⁴² Adashic, Esus tantiemi, queboedo tantiabeni iquec Esusēn ěbi chuibeneta caidon Esus chuibanasho tantiec tabadequi Nuquin Papa chiec onquedenepanēdash.

⁴³ Adec tabadcuededsho isash: —¡Padtembo! Dacuēdampambo iquec —quec utsibo tabadpanēdash. Adnubien Esusēn ěbi chuibeneta caidon nadatiambocquin nabampanēdash.

⁴⁴ Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na cudasenquiocpanēdash.

⁴⁵ Aton na menequin piucquid bedshun utsin na nibēdsho isun menepanēdash.

⁴⁶ Adecbidi badiadquidēn-badiadquidēnquiec Nuquin Papa tabadte shubu uashunaid yacno nidash iccuededpanēdash. Adecbidi shubu utsi-utsiec yacno nidash iccuededquin Esus unēsaid tantiaquin panēmpi cuēsh-cuēshun peded-pededpanēdash. Adembidi bundoshon pebededoapanēdash. Adobanequi ěbi icsaid bedshunash Esus cuidadaid tantiec bēdamo iquebi, quec

⁴⁷ Nuquin Papan naid chiec cuēdēncuededpanēdash. Adec tabadsho isash, Bēdamocquido nec, quec utsibotsen Esus tantiaquid yanash abi tantiaquid utsitedibēd iccuededpanēdash.

3

Caputiapimbo icquid bēdamiaid

¹ Adnubien abi nidteniapcadēn ushē budec 3 yanuc Petedo Uambēd Nuquin Papa tabadte shubu uashunaid yacno Nuquin Papa chiec nidpanēdash.

² Ambo nidnubien caputiapimboquid aid shubu shēcuē Bēdaidquio caid yacno utsibon buampanēdash. Anin tishachobi yec caputiapimboquid icpanēdash. Aidi badiadquidēn-badiadquidēnquien buandenequin aid shēcuē cuēmano nanded-nandedac uequimbi choshosho isun: —¿Adabi piucquid menetsia? —cabampanēdash.

³ Ambo Petedobēd Uan chosho isquin: —¿Adabi piucquid menetsia? —capanēdash caputiapimboquidēn uequin.

⁴ Adoaquien Uambēd nidtuidash nidquin Petedon: —Ěbi daēdi is —capanēdash caputiapimboquid bēisquin.

⁵ Adoaquien, Ěbi menepashun, quequin abi daēdi isobien,

⁶ Petedon: —Piucquid con na nibēdec. Ěmbi tantiaidēn ěbi tantiamebocpaden naimbique. Nasaded yacno iccondaidēn Esusēn bēdamiacpader bēdanash nidtoash nidec nid —capanēdash.

⁷ Aden chuiquin caputiapimboquidēn mēdante abiucquio bedtanquin Petedon nidtomiac badedquio nidtopanēdash caputiapimbochoedi.

⁸ Bēdambo yec nidtoash capupanēdash. Adec bēdanash Petedobēd Uan chedobēd capuashic Nuquin Papa tabadte shubu uashunaidēn puduedash, Nuquin Papan bēdamioshi, quec pudundotan-pudundotanec: —Cuishon —quepanēdash.

⁹ Adec capusho isquidon nadobededpanēdash:

¹⁰ —Nuquin Papa tabadte shubu uashunaid shēcuē, Bēdaidquio caid yacno uetsequi, Piucquid ěbi menepashun, queboedi capueque. En is. ¡Adpaidie. Is! Tantiadempamboctequid nec —quequin isbededpanēdash.

¹¹ Adec capuequi Petedobēda Uan mēdinec Sadomonēn tacpan quēnē uabicquid yacno puduednubien iccuededquid tsibanash anotsen tantiadempambo yec tabadoapanēdash.

¹² Adec tabadsho isun Petedon naden chuibampanēdash: —¿Atotsi quiash padtec quequin ēbi daēdi comapenen bēise? ¿Ēbi daēdshun nacta nēid capupadic? ¿Ēbi bēdambocquid icquindambi nadio? Padenquio. Nuquin tsusedpabon Papa caidēn bēdamiaid nec.

¹³ Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidēmbi ambi nidaidēn chomiaid Esus nēbi aton Papabēd tabadoaic. Aton Papa yacno nidoabicsho Esus bedshun Pidato meniaquien, Nēid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unēs uaquimbien ictiad, quequin mibitedishun chuipondac.

¹⁴ Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac.

¹⁵ Abia uincuentequid mibi chuiquid dapa mimbi unēs uacshobien Nuquin Papan aidi uincuemepondash. Aid uincuenacsho ēbitedishun isondambi.

¹⁶ Esusēn ēbi bēdamepec, quequin tantiaash nēid taē icsacboedēn Esus tantiaash capusho mibitedishun isec.

¹⁷ “Utsibo, Nuquin Papan chomiaid nec, quequin tantienquiocquin mibi chuiquidobēdtan mimbi Esus unēs uamiondac.

¹⁸ Ēmbi matses chuiquid dapa icmenu caid matsesēn mēyanaid iquendac, quequin ambi chuimiaidtedi Nuquin Papan dada uamiampicpaden mimbi naondac.

¹⁹ Nēbi mimbi icsamboen tantiaid ēnquin Nuquin Papa tantiaa ma mibi icsaid bēpiscudpanuna; adecbidi ma abēdi tabadebi, quequin tantiec mibi bēdambo icpanuna;

²⁰ adecbidi ma ambi chuiquid dapa icmiaid Esus mibi bedmenuen chomepanuna.

²¹ Nuquin Papan abitedi icsaisa icmete ushē choabicnuc ambi chiampicpadequi nēbi Esus abuc aton Papabēd tabadec.

²² Ademebidi chuiquin Moisesēn dada uampid nad iqueque. Tantiata:

‘Chuiquid Dapa ēbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiaashun bēdamboen nabanta.

²³ Ambia chiaid tanties Nuquin Papan nēsecaindac,’ quequin Moisesēn dada uampic.

²⁴ “Adomboebidi Samuedēn chuibampampic. Adomboebidi Nuquin Papan chuimaid utsibon chuibanoampic.

²⁵ Nuquin Papan chuimiaidon tsyuecquido mibitedi nec. Tsusedpa Abadauanēn tsyuecquidobidi mibitedi neoaic. Aidon tsyuecquido icsho Nuquin Papan Abadauan chiampicpaden chuioaid mibitedi nec. Naden Abadauan Nuquin Papan chuipampic:

‘Mibi ēndenquimbo unēsampin aton matsesbēda matses utsi-utsien min tsyuecquidēn bēdambo icmendac.’

²⁶ Nuquin Papan Abadauan chiampicpadec aton tsyuecquid choacsho mimbi unēs uapondac. Aidi Nuquin Papan uincuemiac ma isadaidbomba abi icsaid ēnsho ma ambi bēdambo icmiaid icpanuna —quepanēdash Petedobēd Uan.

4

Ambi naid Petedobēda Uan isadaidbo tsusiobon chuibamiaid

¹ Aden Petedobēdtan Uanēn chuibanubien isadaidbo tsusiobo cho-chopanēdash. Utsi-utsiec Nuquin Papa tabadte shubu uashunaid yacno cho-choquid bēdamboen tabadmequidquio icnubi utsi-utsiec saduseyobo icpanēdash.

² Esus unēs uacsho Nuquin Papan uincuemiacpadembi matsesēn unēsacsho uincuemioaindac, quequin Esus chuibenequidon chuibanubi chopanēdash aido.

³ Choshon Petedo Uambēda bedash: —Inchēsheque. Badiadshun nēidēn chiaid tantianush nidnu. Nid —quianec puduanquimbi Petedobēda Uan quēnēn nauedmepanēdash isadaidbo tsusiobon.

⁴ Aid daēdi bedabicnuc Petedobēdtan Uanēn chuibansho tantiaquido Esus tantiaquid dada dadpen sinco midted yampanēdash.

⁵ Adashic, badiadash isadaidbo chuiquid yec tsusio utsibo yec abi ancaquido yec quec Edusaden yacnoēsh iccuededpanēdash.

⁶ Nēidtedi icpanēdash: ancanquid dapa daēd Anasbēdi Caipas icpanēdash. Nēidic aton shubun icquido abipadquido: nēidic Uan, utsibic Adecandedo, aitedi cho-choash iccuededpanēdash.

⁷ Iccuededshumbic Petedobēda Uan bēmeshun nēnantanquo nidtomesun: —¿Tsuitsi chuiquin caputiapimbocquid bēdamio? —capanēdash tsusiobon.

⁸ Adoquien Petedo Nuquin Papan Mayanēn comapenen tantiamiac nadpanēdash:

⁹ —Caputiapimbocquid tantiaquin bēdamiaid isec ¿mitsipaden nao, quecta mibitedi tabadpe? Ancanquidbēdtabi chuiquid utsibo isadaidbo utsibo mibitedi chiembique. Tantiata.

¹⁰ Caputiapimbocquid Esuquidistu Nasaded yacno iccondaidēn bēdamiaid niosh. Mimi unēs uacsho Nuquin Papan uincuemiaidēn nac nēid caputiapimbochoedi nēbi nidtoash capusho mimi isec.

¹¹ Aid bēdamequid mimi tantienquoio yaid Nuquin Papa yacno yuedanquidquoio nec.

¹² Nuquin Papa yacno yuedanquid utsi nibēdec. Nuquin Papa yacno tabadte bunec aid tantiaquid icta —quepanēdash Petedobēd Uan.

¹³ Adec Petedobēd Uan dacuēdenquoio yec comapenec onquesho tantiash tsusiobo: —Aid daēdi tsusiopenquoio iquequi adecbidi Nuquin Papan chiampid tantiabenabicquid iquequi Esusbēd icquid aid daēd icquin ¿mitsipadomboen caputiapimbocquid bēdamepashba? —quec tantiadempanbo yec tsusiobo tabadpanēdash.

¹⁴ Aden ambi bēdameboed aibdēdi icsho isash, Icsamboen mimi naoc, quetiapimbo tsusiobo tabadpanēdash.

¹⁵ Adshun Petedo Uambēdta nidmiash, Tiantianu, quec onquecuededec tsusiobo:

¹⁶ —¿Mitsipadomboen aid daēd nuqui napeba? Nadatiambocquin nasho Edusaden yacnocquidtedishun isbededpash. Ad icnuc, Caputiapimbocquid bēdanambo iquec, ēbitedi quetiapimbo iquebi.

¹⁷ Dadpenshun tantianushe queshun, Esus padpiden chuibanoaında, quequin aid daēdi chuinuna —quecuededpanēdash tsusiobo.

¹⁸ Adshun Petedobēdta Uan chomeoashun: —Padpiden Esus chuibanoaında. Aidēn chiaid chuiquin tantiamenda —capanēdash tsusiobon.

¹⁹ Adoaquien: —¿Mitsicquidēn chiaid ėmbi natequid icpec? ¿Nuquin Papan chiaid niacquin-dambi mimi chiacpaden nadi?

²⁰ Nuqui isoed nuqui tantiaboedbidi chuitequidquoio iquendac —quepanēdash Petedo.

²¹⁻²² Adoaquien: —Ėmbi chiacpaden nainquiocsho isun mibi daēdi mēyantsiambique. Baded nid cueschitomane —capanēdash tsusiobon. Abi tishaid seta 40ted icquid caputiapimbocsho bēdamepanēdash. Aid Nuquin Papan bēdamiacsho isash utsibo cuēdēncuededpanēdash. Adsho tantiash Petedobēdta Uan mēyantiadquicochoedi adotiapimbo yec tabadpanēdash tsusiobo.

Isadaidbo tsusiobon chiaid Esus tantiaquidon chuioaid Nuquin Papa chiaid

²³ Tsusiobon nidmiac nidash iccuededbocnombo choash puduedshun tsusiobon chui-boed Petedobēdtan Uanēn chuioapanēdash.

²⁴ Adoac abentsēc onquiabcimboen naden Nuquin Papa chuipanēdash: —Con Icbombo mibi nec. Abubēdta nidaid acte chedo uashun aidēnquoio icquidtedimbo mimi uabampampic.

²⁵ Adembidi ėndenquimboshē mimi tantiacpaden min Mayanēn tantiamiac mimi chuimiaid, Dabid padon naden dada uapampic:

“¿Atotsieshumbini ėbi dēniactiapimbo icquidombi isadaidpembo comapenec nēishash ėbi dēniacte buncuededpec? Adquiecbidi ¿Atotsi quiash ėmbi chomiaid icsamboen nanushimboec isadaidbo onqueuidoapec?

²⁶ Ancanquidobēd chuiquid utsibo ėmbi chomiaid aton Icbobi mēyanuec iccuededec.”

²⁷ Ai, mimi Dabid pado dada uamiampicpadembi ėnabi Edusaden yacno isadaidpembo ancaquid daēd Edodesbēd Ponsio Pidato icnubi isadaidbo chedo iccuededquin mimi Chomiaid icsaisa Esus icsa uanuec onquecuededpondash.

²⁸ Mimi tantiampicpadembi unēs uapondash, Papa.

²⁹ Adquidēn Petedobēdta Uan chushcasha mimi tantioc. Cuesambocquid ėbitedi icmequin mimi chiaid ėbi chuibame, Papa.

³⁰ Icsaisan Esusēn bēdamiacpaden nadatiambocquin naban, Icho —quepanēdash Esus tanti-aquido Nuquin Papa caic.

³¹ Adoac abi iccuededacno ishcuđpanēdash. Adec ishcuđnuc ambocquid Nuquin Papan Mayanēn comapenen pausunac dacuēdenquicoquin Nuquin Papan chiaid chuibampānēdash.

Abentsēc yacximboec tabadaid

³² Aden chuibanequi abentsēc onquiabcimboec tabadec Esus tantiaquido, Con na nec, quenquoio yec, Nuquin Papan na nec, quec tabadcuēnenpanēdash.

³³ Adequi tabadcuēnequimbi dacuēdenquicoquin, Esuquidistu uincuenacsho isombi, quequin chuibenepānēdash. Adec Esus tantiaquido tabadsho utsibon bēdamboen isbededquin aidēn chuibansho bēdamboen tantiapanēdash.

³⁴⁻³⁵ Adembidi nidaid icho utsin-utsinquier aton nidaid menequin piucquid bedshun Esus chuibenequido menepanēdash. Adembidi, shubu icho utsin-utsinquier aton shubu menequin piucquid bedshun meneoapanēdash. Aden meni ac aton na nibēdquid icscho isun Esus chuibenequidon menebanac bunenquio tabadpanēdash.

³⁶ Adecbidi ambo acte nēnantanquio nidaid nacnēdquid shubu uaidēnshun Chipide caid yacnoshon tishaid Edusaden yacno choash Ose tabadpanēdash. Aidi, Bēdamboen mimbi naoque. Adobanta, quedenesho Bednabe cuēmpañdash.

³⁷ Aidēmbi aton nidaid menequin piucquid ambi bedaidtedimbo Esus chuibenequido meneoapanēdash.

5

Ananiasbēd aton chido Sapida muaid

¹ Adnubien dada utsi Ananias cuēmēdquid aton chido Sapidabēdtan aton nidaid menequin piucquid bedpanēdash.

² Bedshun aton chidon isnubi musuchanshun ambi musucaid utsi dayun uash Esus chuibenequido yacno nidshun abitedi meni ac bimboen menepanēdash Ananiasēn.

³ Adnubien, Piucquid abitedi meni ac bimboen Ananiasēn mua uaposh, quequin Nuquin Papan Mayanēn tantiamiac naden Petedon Ananias chuipanēdash: —Satanasēn tantiamiaid icquin ħmitsipaden tantiaquin Nuquin Papan Mayanēn isnubi mua uaquin ēbi menio?

⁴ ħMin nidaid meniabi icnu mitsanapenquioda nediosh? Mitsana niosh. Adecbidi, ħaidi menequin piucquid bedaid mitsanapenquioda nediosh? Aidedi mitsana niosh. ħMitsipaden tantiaquin piucquid abitedi meni ac bimboen meniano? Aden bēquin abimbo chienquiocquin Nuquin Papambobi mimbi mua uaboc

⁵ —Petedo qesho tantianec Ananias unēsequi uebudpanēdash. Adsho isash Esus tantiaquidtedi dacuēdpanēdash.

⁶ Unēsacsho isun dashcute cuēshēn dataneshun buanshun caniabon chococatampanēdash.

⁷ Bēnē chococambic ushē abuctoan unēsboedēn chido aton bēnē unēsaid tantienquio yec choapanēdash.

⁸ Choasho isumbien: —ħAda min nidaid menequin nēidtedi piucquid bedo? —Petedo qesho tantiasien:

—Ai, aidtedi bedombi —quepanēdash Sapida.

⁹ Adoquien Petedo: —ħNuquin Papan Mayanēn ēbi muasho tantiapec, quequin tantienquiocquinda min bēnēbēdtambi min piucquid abitedi meni ac bimboen meniano? Nēbi min bēnē chococaboedon mibitsen buanendac —Petedo quenubic

¹⁰ Petedon tayumbi uebudec Sapida unēsapanēdash. Aidtsen unēsacsho buanshun aton bēnēbēdtabi chococatampanēdash.

¹¹ Adoac aid daēdi unēsaid tantiasien Esus tantiasatedi Esus tantiaquidobēd comapenec dacuēdcuededpanēdash.

Bē-bēaidtedi bēdanaid

¹² Adashic Sadomonēn tacpan caid yacnoēsh Esus tantiaquido iccuedednubi Esus chuibenequidon nadatiambocquin nabampanēdash.

¹³ Adomboen nabansho isash Esus tantiasabo dacuēdec tacpan yacno chotiapimbo yequi: —Esus tantiaquido bēdamboshē iquec —quecuededpanēdash.

¹⁴ Adec tabadequi utsi-utsiec dadpen dadabēdi chido Esus tantiaquido yampanēdash.

¹⁵ Adec Esus tantiaquid yanshun, Daicsaido Petedon bēdamepec, quequin tantiaquin daicsaido bē-bēshun Petedo capuacno nambededpanēdash.

¹⁶ Adembidi dēuequidon Edusaden yacno daicsaid bē-bēnubi mayan icsan mēyanaido bē-bēoapanēdash. Aden bē-bēaidtedi bēdampanēdash.

Esus chuibenequido tsusiobon quēnēn nauedmiaid

¹⁷ Adnubien isadaidbo ancaquidbēd tsusio dapa utsibo saduseyobo caid isec otacquo tabadboedi matses dadpen Esus chuibenequido yacno cho-chosho isash nēishcuededpanēdash.

¹⁸ Adec nēishcuededshun Esus chuibenequido bedmeshun quēnēn nauedmepañdash.

¹⁹ Aid inchēshēmbi Nuquin Papan uaid mayan bēda choshon quēnē shēcuē bētashaid bēcadoquin abitedi puduemec:

²⁰ —Mibi puduemiombique. Nuquin Papa tabadte shubu uashunaid yacno nidtan. Ambo puduedshun Esus tantiaquid uincuentequid chuibanoata —quepanēdash Nuquin Papan uaid mayan bēda.

²¹ Badiadnuc Nuquin Papa tabadte shubu uashunaidën puduedshun Esus tantiaquid abi uincuentequid chuibanoaic tabadoapanëdash aidtedi. Chuibanubien isadaidbo tsusio dapana abëd icquidobëdtambi tsusio utsibotedi cho-chomeshun: —Esus chuibanquido bedtan —cac

²² quënën nauedaid puduenushe quequin isquido chuiquid nidshun isquien Esus chuibenequido nibëdec.

²³ Adsho isash choaquin: —Quënë shëcuë bëdamboen bëtashquin quënën nauedaid puduenushe quequin isquido shëcuë cuëmano capusho isombi. Shëcuë bëcadoash puduedshun isaquien ënden puduen-puduenac —quepanëdash quënën nauedaid puduenushe quequin isquido chuiquid.

²⁴ Aden chuisho tantiaish isadaidbo tsusiobo: —¿Atodain nechitec? —quepanëdash Nuquin Papa tabadte shubu uashunaid isquido chuiquid chiec.

²⁵ Adnubien dada utsi choshon: —Mimbi quënën nauedboedon Nuquin Papa tabadte shubu uashunaid yacnoshon chuibanooasho tantiombi. ¿Ada tantio? —capanëdash.

²⁶ Adoaquien quënën nauedaid puduenushe quequin isquido chuiquid capitan caidën ambi namiaidobëdtan tantiec nidshun bedtanquin bëoapanëdash. Matsesën cuënoten ëbi senushe qeshun mëyanenquiocquin Esus chuibenequido bëoapanëdash.

²⁷ Aden bëquin Nuquin Papa tabadte shubu uashunaid nuntan tsusiobo iccuededacno yuedpanëdash. Bësho isash tsusio dapambo:

²⁸ —Esus chuibenenda, quequin chiambocquidëmbimboen Esus chuibanquin Edusaden yacnocquidtedi mimbi tantiamebanoc. Adoquimbic, Esus unës uaid tsusiobon naid nec, quequin mimbi chuibanoc —quepanëdash tsusiobo.

²⁹ Adsho Esus chuibenequido utsibon tantianubi Petedonuidi: —¿Matsesën nata caidodabi nedi? Nuquin Papan nata caid icquin nabanembi.

³⁰ Mimbi cuesten dectanquin unës uaondaid Esuquidistu Nuquin Papan padpiden uincuemapanëdash. Nuquin Papa caid tsusedpabon Papa caidquio nec.

³¹ Esus uincuemeshun aton dayunquio tsadmequin matses bëyucanquin Chuiquid abi yacno matses Puduedmequidquio icnepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bëpiscudpanuna.

³² Esuquidistun nabansho isbempondambi. Adembidi abi unësash uincuenacsho ispondambi. Nuquin Papan Mayan icsaisan Esuquidistu tantiaquidobëd icquidëmbi adomboen ëbitedi tantiameoaic —quepanëdash Petedo.

³³ Aden Petedon chuisho tantiaish tsusiobo: —Icsambo iquec —quiash Esus chuibenequido cuesunete bupanëdash.

³⁴ Adnubien isadaidbo utsi padiseyobo, Nuquin Papan Moises dada uamiampid chuibanquin tantiamequid utsibon bëdamboen isaid, Camadied cuëmëdquidën: —Chiata. Bëboedtedi buantan —cac

³⁵ buanambic: —Icsamboen nanushe qeshun bëdamboen tantiaquiota. Aido cuesunete mibi buneque. Cuesunenushë chiata.

³⁶ Èdenquio utsi Teyudas cuëmëdquid icpondash. Aidi tsusio dapa icnuequin chuisho tantiaish dada dadpen 400ted abëdi capupanëdash. Teyudas cuesuniacsho isash abëd icboedtedi udi nidaniacsho padpiden isenquio icpanëdash.

³⁷ Adashien matses tambanta caid ushëmbi utsi Udas cuëmëdquid Cadidia yacno icnëdaidbëd matses dadpen capupanëdash. Udstsen cuesuniac abëd icnëdaidtedi padpidec choenquio yec adechidi udimbo nidaneapanëdash.

³⁸ Adec umanuc buamboedo chuiquid nibëdanaque. Aidbëd icboedo mishenda. Cuesunemenda. Aidën chuibanaidbëdtabi ambi naid matsesën naiduidtsëqui icnuc badedquio ënëndendac.

³⁹ Aido Nuquin Papan namiac chuisho mimbi ëmetiapimbo iquendac. Nuquin Papa chieshënushe qeshun aido nidmeta.

⁴⁰ Aden Camadiedën chiac: —Adonona —qeshun: —Buamboedo bëoata —cac bëacsho cueshcanten cuesmepanëdash. Aden cuestanquin: —Esus chuibanooainquio yec nidtan —qeshun puduemapanëdash.

⁴¹ Puduemiac Esus mëyanaid tantiec nidequi abi chuibanusho mëyanaid yec bëdambo iquebi, quec tabadpanëdash.

⁴² Adshumbic badiadquidën-badiadquidënquien Nuquin Papa tabadte shubu uashunaid yacnoshon matses bëyucanquin chuiquid, Nuquin Papan bëdamboen isaidquio Esus nec, quequin chuibanpanëdash aidon. Shubu utsi-utsiec yacno nidshun adomboembidi chuibenepanëdash.

6

Niante chidobo pete menebanquid icta caid

¹ Adashic badiadquidēn-badiadquidēnquieq Esuquidistu tantiaquid dadpen-dadpenquieq yanubi isadaidbo quidiēcon onqueten onquequido comapenec onquec: —Niantebo menenquiocquin pete mimbi uesquin pepaboc —quepanēdash.

² Adoquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaid chuibanquin ēntiapimbo iquebique.

³ Niantebo meneta canuen nadquidquido istuidshun chuita. Nuquin Papan aton Mayan meniac tantiamiac bēdamboec tabadsho mimbi bēdamboen isaidquido istuidta. Adquid 7ted istuidshun, Niante chidobo pete menebanquid icta, cata.

⁴ Aidtedshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanēdash Esus chuibenequido.

⁵ Adoquien: —Mimbi bēdamboen chioc —quepanēdash Esuquidistu tantiaquid utsibo. Aidēn chuibocpadembi aidtedi istuidpanēdash. Nēidic, Nuquin Papan Mayanēn pausunaid, ambi chiacpadomboen Nuquin Papan naindac, quequin tantiaquidquido Esteban cuēmēquid; utsibic, Uedipe; utsibic, Pēdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuēmēquid.

⁶ Aidtedi istuidshun Esuquidistu tantiaquid utsibon aido bēdamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nēidted bēdamboen nameta, Papa, quequin Esus chuibenequidon chuipanēdash.

⁷ Adashic Edusaden yacnoshon Esus chuibenequidon Nuquin Papan chiaid chuiban-chuibanosh tantiaquid utsi-utsieq Esuquidistu tantiaquid dadpen yampanēdash. Adecbidi isadaidbo tsusiobo dadpen bēdamboen tantiaquid Esuquidistu tantiaquido yampanēdash.

Esteban bedaid

⁸ Adnubien Nuquin Papan Mayan meniaidēnquio. ambi comapenen tantiamiaidēnquio, Estebanēn nadatiambocquin ismēbampanēdash.

⁹ Aden nadatiambocquin ismenuc bēdamboen tantienquio yec utsibo comapenec onquecuedpanēdash. Nēidic, Sidene yacnoēsh choquido; utsibic, Adecandedia caid yacnoēsh choquido; utsibic, Sidisia caid yacnoēsh choquido; utsibic, nidaid Asia caid yacnoēsh choquido aidtedi Edusaden yacno cho-choash tabadec Estebambēd comapenec onquepanēdash.

¹⁰ Comapenec onquequin Esteban Nuquin Papan aton Mayan meniaid icsho aidēn comapenen tantiamiac onquesho dēniaquec utsibo onquetiapimbo icpanēdash.

¹¹ Onquequin dēniactiapimbo icquin utsibo naden aidon chuipanēdash: —Tsusiobo naden chiec nidtan: Estebanēn nuquin tsusedpa Moises caidēn dada uampidbēda Nuquin Papan chiampid chuca uain nuisho tantiombi, quequin muaquin chuita. Aden chiacsho mibi piucquid menembi —cac chiec nidpanēdash.

¹² Aden chiac tsusiobobēd Moisesēn dada uapampid paquiacquidobēd isadaidbo utsibotedi nēishcuededshun Esteban bedshun tsusiobo iccuededacno buanquin yuedshun ismēpanēdash.

¹³ Ambo abi dēniactiapimbocquidon Esteban muaquin chuita caboedon naden chuibededpanēdash: —Nēid dada Nuquin Papa tabadte shubu uashunaidbēda Nuquin Papan Moises dada uamepampid ēnenquiocquin muaquin chuibanec.

¹⁴ Naden Estebanēn chioshe. Tantia: Nasaded yacno iccondaidēn, Esuquidistu caidēn Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidēn dada uampid naden nata quequin chiaid natiapimboctequid nec, quequin Estebanēn chuibanosh, quequin muaquin chuipanēdash Esteban dēniactiapimbocquidon chomiaidon.

¹⁵ Aden Estebanēn chiaid muaquin chuiquin naimbudquimbi tsusiobobēdtambi comapenen Esteban bēisquin Estebanēn bētantiante ushēbimboec ushumbo yec chēnquesho isbededpanēdash.

7

Estebanēn chuibanaid

¹ Adec Estebanēn bētantiante ushēbimboec chēnquesho isec tsusio dapambo Esteban chuiquin: —¿Abimboda mimbi naid chuiposh?

² —caquien yuecquido onquequin Estebanēn naden chuipanēdash: —Chiembique. Tantiatiota. Tsusedpa Abadauan nidaid Adan caid yacno nidabi yec nidaid Mesopotamia

caid yacno tabadsho Nuquin Papan abi uëshëmbo yec dasiuidteniaid matsesën istemaid bëshomaoanquiec icquid Abadauan ismepampic.

³ Aden ismec nadec onquepampic: “Min utsitedi nianec nidaid utsi yacno mibi ëmbi ismenu caid yacno nidta.”

⁴ Adsho tantiash Candeyabon nidaid yacnoësh nidashic nidaid Adan caid yacno choash Abadauan tabadpampic. Ambo tabadashien aton papa unësan Adan yacno nëbi nuqui tabadbocono Nuquin Papan nuquin tsusedpa Abadauan chomepampic.

⁵ Aden chomeshun Nuquin Papan naden Abadauan chuiampic: “Nëid nidaidën mibi capuacno mitsanapenquio nec. Yuecshun mibi menenun nanuna. Mimi tishmi-ambochoedi min chidon tishaid abentsëc min madombo nëid nidaid menendambi.

⁶ Nëid nidaid bedabi yec mimi tishmiaidën tishmiaid caidaido matses utsibon nidaidën tabadendac. Ambo tabadshobi anocquidën aido yuashun seta dadpen 400ted matamequin mëyanendac.

⁷ Adoacsho aidotsen cuidquin mëyanoaindambi,” quepampic Nuquin Papa. Adashic abi Nuquin Papa onquec: “Min madon tishmiaid caidaido abi mëyanacnoësh nidashic nëid macuësh yacno choshon ëmbi chiapadomboen nabanendac.”

⁸ Aden chuishumbic, Nidaid menenun nanuna, quequin Nuquin Papan naden Abadauan chuiampic: “Dada bacuëbëdta dada caniaidtedi shui dëbid dëtemeta. Adobansho isun, Èmbi chiaid bëdamboen naquidquio aitedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanën ambia dëtemeshun dadatedi aidëmbidi shui dëbid dëtemeoapampic. Adoshombic yuecquio icshun Abadauanën aton mado tishmeshun Isac cuënquin 7tedec ushun Isaquën shui dëbid dëtemeoapampic. Adoshombic adembi Isaquën aton mado tishacsho Acobo cuënquin aidtedecbidi ushun Isaquënsen Acobon shui dëbid dëtemeoapampic. Adoshombic, canishun Acobon tishmiaido 12ted icpampic. Abentse-abentsen tishmeshun aidtedecbidi ushun aton madon shui dëbid dëtemeoapampic. Adoaiquen yuecash Acobon madotedi tsusiobudnepampic —quepanëdash Esteban isadaidbo tantiamenu quequin chiech.

⁹ Aden chiech abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa cudasaidquio icsho isash nëishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoquin Equipito yacnoquid Ose meneoapampic.

¹⁰ Adoac, Yuanu, qeshun natiamiaid Ose icsho isun Nuquin Papan aidi dayun uaqin dacuëdenquio icmequin comapenen tantiaquidquio bëdamboen chuiquidquio Ose Nuquin Papan icmepampic. Adquidquio icsho isun Equipito yacnoquido ancaquidën Padaon caidën Equipito yacnoquido chuiquidquio Ose icmepampic.

¹¹ “Yuecash Equipito yacnoquido chuiquid, Ose, icnubi nidaid Equipito caid yacnoquidbëd nidaid Canan caid yacnoquido natiambo buncuededpampic. Adnubi nidaid Canan yacno nuquin tsusedpabo Isadaidbon pete nibëdquiec yampampic.

¹² Adshumbic, Equipito yacno quënë uashun dayun uaid pete iquec, qesho tantiashun Osen papan Acobon ambi tishmiaido nuquin tsusedpabo chuiquin: ‘Equipito yacno pete iquec, qesho tantiambique. Bedtan,’ cac Osen utsibo aton papan chiapadec pete bedec nidaneampic.

¹³ Adanec Acobon madotedi aton utsibo Equipito yacno choacsho isun, Min utsi nebi, quequin chienquiocpampic Osen. Aton utsibon pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnoquido ancaquid Padaon yacno buanshun: ‘Con matses isadaidbo nec,’ Ose qesho tantienquiochoedëmbi Padaonën tantiebampic.

¹⁴ Aton utsibo Padaon chuibanshumbic Osen aton utsibo chuiquin: ‘Nuquin pabëdta nuquin matses bedtan,’ capampic. Adoac bedoanec Equipito yacno choapampic. Abëd icquido 75ted icpampic.

¹⁵ Adashic, Equipito yacno yuec tabadashi tsusio budashi Acobo unëshpampic. Auëshquibidi nuquin tsusedpabo Acobon madotedi adecbidi unëshoapampic. Unëshacsho Equipito yacno chococapampic.

¹⁶ Adashic, yuecquio yash Equipito yacnoësh nidquin unëshaidon tishmiaid caidaidon aton mëdimbon canite buampampic. Canite buanshumbic Siquen caid yacno nidshun ëndenquimbo matses utsi, Amod caid, piucquid menequin tsusedpa Abadauanën tied bedshunëdacno chococapampic.

¹⁷ Aden chuishumbic Estebanën nadopanëdash: —Equipito yacnoësh tsusedpabo nidabi icnuc Nuquin Papan, Nidaid menenun nanuna, quequin chuiampid ushë chote anoentsëc yanuc nuquin tsusedpabo dadpen yanec caidpampic.

¹⁸ Dadpen caidsho isun Equipito yacnocquido ancaquid utsin Ose pado tantienquo icpampic.

¹⁹ Aidëmbi mua uaquin chuiquin natiamequin nuquin tsusedpabon dada bacuë tishachsho bedtemaid nec, quequin nemepampic.

²⁰ Adnubien dada bacuë Moises tishachsho Nuquin Papan, Aid bëdaidquo iquec, quequin ispampic. Aidi icucshun ushë abentsëc choaid nidmequin Equipito yacnocquido ismenquiocquin aton mado Moises anin omopampic.

²¹ Ompoaqui Moises shubisho tantiashun tsitsan ambi danoshcaidën aton mado acte nantan anin nuntampampic. Aden nuntanambien Equipito yacnocquido ancaquidën champi nesec budquin tsitsanën Moises noadtsëcsho istuidshun bedash, Con mado caimbi, quepampic ancanquidën champi.

²² Bedsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito yacnocquidon naidtedi naquin aidën chiaidtedi Moisesën tantiabenquiopampic.

²³ “Adashic, Equipito yacnocquidobëd tabadquin abi tishaid seta 40ted matamiashic isadaidbon tishmiaido con matses isnu, quianec aton matses chonoadacno nidquin Moisesën istuidpampic.

²⁴ Istuidnubi Equipito yacnocquid dada abentsëcshun isadaidbo dada abentsëc mëyanquin cuesunesho isun Equipito yacnocquid cuidnuequin Moisesën cuesuneopampic.

²⁵ Ëmbi adoshho isun, Equipito yacnoësh nuqui bëyucanquin buanquid Moises nendac, quequin con matsesën tantiapatsiash, abibi quetsëcquiec nidnubi aton matsesën tantienquo icpampic.

²⁶ Badiadash aton matses yacno padpidec nidquin aton matses daëd cuesnansho istuidshun, Ëmenu, abibi quec choquimbi: ‘¿Atotsi quec min matsesbëd cuesnane?’ Moisesën catuidpampic.

²⁷ Adoaquien Moises cuëscatanec: ‘¿Ëmbi nasho cuidquin ëbi chuiquid tsuntsin mibi icmioshe? Chui. Tantianu,’ quetanequi:

²⁸ ‘¿Equipito yacnocquid mimbi cuesunebocpadenda ëbitsen cuesune?’ quepampic cuesnanquid Moises caic.

²⁹ Aden chuisho tantiashien, Equipito yacnocquido ancaquidën tantianushe quianec dacuëdec Equipito yacnoësh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuë daëd tishmepampic Moisesën.

³⁰ “Adashic, seta dadpen 40tedbidi matamec nidaid Madian caidën tabadec cuëtampiuidquo yacno matses nibëdquiec yacno macuësh dapa Sinai caid anoentsëqui Moises chopampic. Ambobi tabadquimbi cuëtampi nëdënquiacbimboecquid nënantanquo Nuquin Icbon Chomiaid tabadsho Moisesën ispampic.

³¹ Aid istanequin tantiadempamboctequid nepanushe. Isbono, quianec anoentsëqui Moises chosho Nuquin Icbon naden chuipampic:

³² ‘Min tsusedpa Abadauanën Papa cain cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,’ quesho tantiash dacuëdec uëdëquec istiapimbo yec Moises nidtuidpampic.

³³ Nidtuisho isec Nuquin Icbo Moises chiec nadpampic: ‘Nëmba ëbi icsapenquo icquid icnuc caputemaid nidaid iqueque. Min tapucudte chicshun tantiata.

³⁴ Min matses ëbi cudasaido Equipito yacnocquidon mëyanac uëshquec shubiquiosho tantiashun aido Equipito yacnoshon buanta mibi canuec chobi. Nëbi Equipito yacno mibi nidmeoaimbi,’ quepampic Nuquin Icbo Moises chiec.

³⁵ “Aden cuëtampi nëdënquiacbimboecquid nënantanquo icboedën Nuquin Papan Chomiaidën isadaidbo bëyucanquin buanquid icta cac: ‘¿Ëmbi naid icsho cuidquin ëbi chuiquid tsuntsin mibi icmioshe? Chui. Tantianu,’ abi caondaad bëyucanquin buanquid Moises icpampic.

³⁶ Adquid Nuquin Papan icmiac Equipito yacnoshon aton matses bëyucanquin buanquin Moisesën nadatiambocquin ismepampic. Adoshombic, isadaidbo buanquin Acte Piu yacnoshontsen nadatiambocquin ismeopampic. Adoshombic, matses nibëdquiec yacno seta dadpen 40tedbidi matamec abi tabadcuenuiacnoshontsen nadatiambocquin nabanquin isadaidbo Moisesën ismeopampic.

³⁷ Aidëmbi naden chuipampic: ‘Yuecquo icshun ëbipadquid mimbi tishmiaidën tishmiaidon caidaid Nuquin Papan chuiquidquo icmendac,’ quequin Moisesën chuipampic.

³⁸ Isadaidbo bëyucanquin chuiquid Moises matses nibëdacno isadaidbobëd macuësh dapa Sinai caid yacno choash Nuquin Papan chomiaidobëd Moises tabadpampic. Ashunquio Nuquin Papan abëdi tabadte tantiamenuequin cuënote pada-padambocquidën ambi naden nata quequin dada uaid Moises menepampic.

³⁹ Aden aid dada uaid bedshun bëyucanquin chuisho tantiesa yanec nuquin tsusedpabo Moises bunenquio yec Equipito yacno nidoate bumpampic.

⁴⁰ Adashic, Moises macuësh yacno yuecquio tabadnubi Moisesën utsimbo Adon cuëmëdquid aton matses utsibon naden chuibededpampic: '¿Moises nuqui Equipito yacnoshon bëyucanquin bëboed mitsi nidpash nec? Nibëdpequien iquec. ¿Atotsi quec nidpash? Nuquin Papan uacpadquiocnoc nacnenta. Nacnenash bëyucanquin chuiquid aid iquendac,' tsusedpabon cac

⁴¹ bacan bacuëmbimboecnuc Adonën nacnempampic. Ambi nacnenaid tantiaquin isadaidbon nidaidën capuquid yua cuesuneshun cuëdënëmbededpampic.

⁴² Adquid cuëdënësho tantiaish isadaidbobëd ictiapimbo iquec Nuquin Papa, Padi. Adenda, quenquio icpampic. Adquido Nuquin Papan ëndenquimbo tantiaquin naden chuiampic: 'Adomboen mimbi nacnenaid tantiec tabad.' Adembidi Nuquin Papan yuecquio icshun nanun chiaid isadaidbo chuiquin naden dada uamepampic:

'¿Matses utsi nibëdquio yacnoshon seta dadpen 40ted matamequin ëbi tantiaquinda nidaidën capuquid yua cuesuneshun pambid tauidenio? Padenquio.

⁴³ Ëmbi uaid badiadën ushë, ëbitedishun bëyucamembi, qeshun aidpadquid nacneshun Modoc cuënquin aton shubumpi nuntan namposh.

Aidbëdtabi uspa dapatsen ëbitedishun bëyucamembi, qeshun aidpadquidbidi nacneshun Dempan cuë nec danëshën sebudec shuebudshun, Mibi tantiaquid nebi, quequin adquid mimbi chuipoc.

Aden nasho isun ëmbi menenu caid nidaid yacno mibi nidmenquio icquin nidaid utsi, Babidonia caid udi mibitedi nidmeoaindambi.'

Aden ambi chiaid niacquido isadaidbo tantienquio icquidobi Nuquin Papan chuipampic —quepanëdash Esteban isadaidbo chiec.

⁴⁴ Aden chiec yuec onquebudec: —Matses utsi nibëdacnombo nidanequin tsusedpabon Nuquin Papa tabadte chichanshun buampampic. Aidëmbi Moises ismiacpadembi isadaidbon Nuquin Papa tabadte shubu uashumpampic.

⁴⁵ Adashic, tsusedpabo aid shubu uaquidotedi unësan ambi tishmiaidontsen aid shububidi adomboembidi chichanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chichanaid bëshun bëyucanquid Osue cuëmëdquidbëdtan nuquin tsusedpabon aid nidaid nënantquio shubu uaoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic.

⁴⁶ Aidi Nuquin Papan bëdamboen isaidquio aid nidaidën tabadquin Nuquin Papa tabadte buantiapimboquid shubu uashuntiadquiocquin shubu uate bë¹-bëmepampic.

⁴⁷ Aid shubu uabi Dabid unësam bic ambi tishmiaidën, Sadomon cuëmëdquidën, Nuquin Papa tabadte nainquin shubu uashumpampic.

⁴⁸ Aden matsesën shubu uaidën Nuquin Papa tabadenquio iquec. Adembidi Nuquin Papan chuimianiaidën naden chuipampic:

⁴⁹ "Abutenquiobi con tsadte dapa iquec. Adecbidi nidaidtenquiobi ëmbi tincatequid nendac.

¿Adquid icnubidabi matsesën nidaidën shubu uashun tabadmepadic? ¿Nidaidënuidi tsadpectabi tiboquendac?

⁵⁰ ¿Tauaquioquimbi abitedi uambodambi ictionda?"

quequin Nuquin Papan chuimiaidën dada uapampic —quequin chiashic Esteban abi onquec:

⁵¹ —Pacuëndacimboen Nuquin Papan chiaid tantiaish icsaquin ënesa mibitedi nec. Aton Mayanën tantiamenu cac tsusedpabotedishun chieshëmpampicpadembi mibitedishun chieshënoaic.

⁵² ¿Nuquin Papan ambi yuecquio icshun naden nanuna quequin chiaid ambi chuimiaidtedi min tsusedpabon mëyanenquioda icpampic? Adembidi, Nuquin Papan chomiaid choendac, quequin chuiquido tsusedpabon cuesunepampic. Aidon nacpaden Nuquin Papan chomiaid mibitedishun unësam iondac.

⁵³ Nuquin Papan chiaid ambi uaidon mayan bëdabon meniaqui Nuquin Papa chieshënuquido mibi nec —quepanëdash Esteban isadaidbo chuiquin ënec.

Esteban se-siaid

⁵⁴ Adec Esteban onquesho tantiaishun nëshënhshun Esteban iccuededquidon chushcapanëdash.

⁵⁵ Adoaquien Nuquin Papan Mayan meniaidquo icquin Estebanën abuc isquin Nuquin Papa uëshëmbo yec matsesën istiapimbo bëchomaoanquie ictequid abichobi dasiuidteniaid chënquenubi Nuquin Papabëd tancandaëdquie Esuquidistu nidtuidsho ispanëdash.

⁵⁶ Aden isequi: —Abuc shëcuë uaid shëcniaye. Is. Umbo Esuquidistu, matsesondaid, Nuquin Papabëd tancandaëdquie tsadsho isembi —quepanëdash Esteban.

⁵⁷ Adsho tantiash tsusiobo comapenec sidquianec pamumëdanec titinquequin Esteban bedshun

⁵⁸ cuënoten se-senuen shubu nibëdacno udi buampanëdash. Aden Esteban buanshun aton dashcute Saudo cuëmëdqidën taëno sampanëdash Esteban se-senuequidon.

⁵⁹ Sanshun se-siaquic Estebanën Esuquidistu cuënquin naden chuiapanëdash: —Ëbi yued, Icho —quiashic,

⁶⁰ danëshën sebudash comapenec nadec onquec: —Ëbi se-sequido icsaid cuidenquo yec bëpiscudta, Icho —quepanëdash. Adec onquetanec Esteban unëshpanëdash.

8

Saudon Esus tantiaquido mëyanaid

¹ Esteban se-senu caquien, Ai, adota, quiash isec uano Saudo tsadpanëdash. Esteban se-siaid ushëmbi Edusaden yacnoshon Saudon Esus tantiaquid utsi-utsien comapenen mëyanquin tauadopanëdash. Adosho isash Esus chuibenequido ambobi tabadnubien Esus tantiaquid utsibo nidanec uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanëdash.

² Adnubien Nuquin Papan chiacpadomboen naquin Esteban chococaic comapenec sedenquec shubipanëdash.

³ Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabëdtabi chido chedo bedmeshun quënën nauedmepanëdash.

Samadia yacnoshon Esus chuibanaid

⁴ Adashic Edusaden yacnoësh nidanec shubu dadpen icquid utsi-utsiec yacno choshon abi tantiaquidon Esus chuibenapanëdash.

⁵ Adëmbidi niante chidobo aton na nibëdsho menequid, Uedipe cuëmëdqid nidaid Samadia caid yacno choshon adëmbidi Esus chuibanoapanëdash.

⁶ Aidën nadatiambocquin nabanquin Esus chuibansho ambocquido iccuededquin bëdamboen tantiapanëdash.

⁷ Aidëmbi nadatiambocquin nabanac mayan icsa dapudedaid icboedi mayan icsa sidquianec cuempanëdash. Adecbidi canite icsaidbëdta caputiapimboquid dadpen bëdampanëdash.

⁸ Adsho isash Samadia yacnocquido, Bëdambo iquebi, quec tabadpanëdash.

⁹ Adnubien Samadia yacno ënden chondaid, Nadatiambocquin nabanquid dapa nebi, quequin mayan icsan tantiamiacpaden Simon cuëmëdqidën nabampanëdash.

¹⁰ Adosho isash: “|Eee! Abimboshenda caposh. Nëid dada Nuquin Papan ambi nadatiambocquin nabante tantiamiaid nec,” quequin anocquidobëdtan abi chuiquidon comapenen tantiapanëdash.

¹¹ Aden yuen Simonën ismiac, Isnuequid dadpen badiadquidën-badiadquidënquiec abi yacno choash iccuededpanëdash.

¹² Adnubien, Nuquin Papa yacno puduedmianquid Esus nec, quequin Uedipen chuibansho tantiaquid yampanëdash dadabëdi chido chedo. Adsho aitedi acten mentomepanëdash.

¹³ Simontsen: —Esus tantiaquid nebi —quesho acten mentoauqui Simon Uedipebëd capuquimbi Uedipen nadatiambocquin nabansho isun, Adopenshenda nabanec, quequin ispanëdash Simonën.

¹⁴ Adashic yuecash Samadia yacnocquido Edusaden yacno nidash nadpanëdash: —Nuquin Papan chiaid Samadia yacnocquidon tantiabedec. Aden chuisho Esus chuibenequidon tantiashun Uambëdta Petedo Edusaden caid yacnoësh nidaid Samadia caid yacnoshon nidmepanëdash.

¹⁵⁻¹⁶ Adec aid daëd nidaneshun: —Esus tantiaquid acten mentoaidouidi nëidtedi nec —anocquido quesho tantiashun: —Nëidtedi min Mayan mene, Papa —quec onquequin

¹⁷ Petedobëdtan Uanën mëdanten Esus tantiaquido mamishbampañdash. Aden mamishbanubi aitedi Nuquin Papan aton Mayan menepañdash.

¹⁸ Aden Petedon nasho isash Simon: —Ma adquiec mëquiadnueshun mibi piucquid menenu.

¹⁹ Mimbi matses mamishacpadembi ëmbi mamishaidtedi ma Nuquin Papan Mayan meniaid icpanuna —quepanëdash.

²⁰ Adoquien Petedo: —¿Piuquid menecta mibi mëquiadpe? Adoquin mimbi tantianuc tauiantiadpambo chian anëdënquiacno ma mibëdi min piucquid icpanu.

²¹ Mimbi Nuquin Papan chiaid icsamboen tantiaquin ëmbi nacpadomboen natiapimbo mibi iquendac.

²² Mimbi icsamboen tantiaid ënta. Aden icsaid ënsho isash Nuquin Papa mibi icsaid bëpiscudendac.

²³ Mayan icsan yua icquin tactau tishidaid mishaid mucambo yacpadec icsamboen mimbi muaquin chuibanaido icsaindac.

²⁴ Adoquien: —Ëbi tauiantiadpambo chian anëdënquequid nënenushe quiash mibi Uambëd Nuquin Papa chiec bëdamboec onquebudneta —quepanëdash Simon.

²⁵ Adec Samadia yacno tabadquin Petedobëdtan Uanën: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsiec yacnoshonsen chuiopanëdash aidëmbidi.

Uedipe Etiopia caid yacnoquidbëd icaid

²⁶ Adoshombic, Samadia yacno Uedipe icsho Nuquin Papan uaid mayan bëdan nadopanëdash: —Nëuëshquio puduanec nidec Edusaden datambidanec acte dapa yacno shubu dadpen icquid Casa caid yacmi matses nibëdacno podquedën nidash nidtuidtanec chotan.

²⁷ Adoac nidtoanec nidquimbi Nuquin Papan uaidën mayan bëdan chuibocno choquin Etiopia caid yacnoësh choquid Uedipen bëqueduidpanëdash. Ancanquid chido Candase cuëmëdquid aton na dayun uashunquid aid dada napanëdash. Aidi Edusaden yacno nidash tabadquin Nuquin Papa chianec

²⁸ padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanëdash.

²⁹ Adnubien Nuquin Papan Mayanën: —Nidaid cano chinunta —cac

³⁰ Uedipen titinquequin chinumpanëdash.

Aden Etiopia yacnoësh choquid dada uaid isec onquesho isash: —¿Isbanec onquequina tantiaque? —quepanëdash Uedipe.

³¹ Adoquien: —Tantiamequid nibëdnuc ¿mitsipadentsimbi tantiap? Èbëdi antsadtoec cho —cac Uedipe abëdi antsadtopanëdash.

³² Aidbëdi antsadtoshon Etiopia yacnoësh choquid Nuquin Papan dada uamiampid isec onquesho Uedipen naden tantiapanëdash:

“Obeca cuesunenuen nimbambocpadomboembidi mëtaneshun nimbanoaposh Nuquin Papan chomiaid unës uanuequin.

Adecbidi obeca bacuë abi datasnuequid icnuc cuëdenquio yacpadec abi unës uanuequid icnuc cuëdenquio icoaposh Nuquin Papan Chomiaid.

³³ Aidi Icsaisa icsho mëyansho isec, Icsambocquidta neque. Isnu, quenquiocposh aton matses.

Aidi chido inesa yec ambi tishmiaid nibëdnuc ¿Tsuntsin ambi naid chuipadic?”

³⁴ Aidtedtsëqui abi isec onqueboed Uedipe ismeshun Etiopia yacnoësh choquidën: — Èbi isec onqueboed ¿mitsicquid chiequini onquepo? ¿Abibi chiadaidtabi isec onquepo? ¿Utsida chuibanec? Èbi chui. Tantanu —capanëdash Etiopia yacnoësh choquidën Uedipe chuiquin.

³⁵ Adoquien, Matsestedi icsaid bedshunash abided cuidadec Esus unësaid Nuquin Papa yacno puduedmianquid nec, quequin dada uapampidën chiec, quequin Etiopia yacnoësh choquid tantiamenuen chuibampanëdash Uedipen.

³⁶ Adoanec nidquimbi Etiopia yacnoësh choquid Esus tantiaquid yanshun actempi istuidshun: —Actempi iqueque. Is. ¿Adabi mentoe? —capanëdash.

³⁷ Adoquien Uedipe: —Esus tantiaquidquo nebi, qesho mibi acten mentono —capanëdash.

Adoquien: —Nuquin Papan mado Esuquidistu nec, quequin aid tantiaquid nebi —qeshun Etiopia yacnoësh choquidën:

³⁸ —Nidtuid —cac nidaid cano nidmequidën cabayo nidtuidmian acte budshun Etiopia yacnoësh choquid Uedipen mentopanëdash.

³⁹ Adashic, acte nantanuësh abi daëdi dectatosho Nuquin Papan Mayanën Uedipe buampanëdash. Adoac Uedipe padpiden isenquio yequi, Esus tantiec bëdambo iquebi, quec Etiopia yacno nidoapanëdash.

⁴⁰ Adnubien Uedipe Nuquin Papan Mayanën nidaid utsi Asoto caid yacno buampanëdash. Ambo capucuenequin shubu dadpen icquid yacno-yacnomboen Esus chuibëec onquec choequi shubu dadpen icquid Sesadeya caid yacnotsen choapanëdash.

9

Saudon tantiate paucaid

¹ Adnubien Edusaden yacnoësh Esus tantiaquid utsi-utsiec nidanenubien Saudo Edusaden yacno tabadpanëdash. Ambo tabadec chushquec Esus tantiaquidtedi cuesunemetiadquio yec isadaidbo chuiquid dapabo yacno Saudo choash

² shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caid yacnoshontsen adote bunebi. ¿Ada mimbi adota quequin dada uashun ëbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon isadaidbo chuiquido chuipanëdash Saudon.

³ Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucuësh bed-bedquequin Saudo dëcatepanëdash.

⁴ Aden dëcatiac Saudo paëdash uesho isun nadec abucuësh onquec: –Saudo, ¿atotsieshun ëbi tantiaquido mimbi mëyampeba? Ëbitsen mëyantiadpambocquin mimbi aido mëyanec –quepanëdash.

⁵ Adoaquien: –Icbo, ¿Tsutsi mibi ne?

⁶ Adoaquien: –Mimbi mëyanaid Esus nebi. Ëmbi chiaid chieshë nec mibi tabadeque. Nidtoash Damasco yacno nidtan. Anoshon ëmbi nata capadomboen anocquid mibi chuimembique. Nidtan.

⁷ Adec abucuësh onquenubi Saudobëd cho-choquido nidtuidshun tantiequi onquequid isenquio yec tabadtuidpanëdash.

⁸ Onquec ënëdan nidtoash Saudo istiadquio iquequi bëshupanëdash. Adsho isun mëdinanquin Damasco yacno buampanëdash.

⁹ Adequi Damasco yacno choash 3tedec ushec isenquio yec buna mëmunquiec Saudo tsadpanëdash.

¹⁰ Adashic, Saudo puduedash tabadacno ëdibictsëc tabadquid Esus tantiaquid Ananias cuëmëdquid icpanëdash. Aid usho Esusën: –Chuinu. Tantia –caquien:

–¿Atoda? Nëbi uebi, Icbo –quepanëdash Ananias.

¹¹ Adoaquien: –Nidtoash podqued cuembocquid caid yacno nidtan. Ambo choash Udasën shubun puduedshun shubu dadpen icquid Tadsocaid yacnoshon tishaid Saudocuemëdquid Nuquin Papa chiec onquec tsadsho mimi istuidendac.

¹² Adec aid ushachimboec tsadsho mibi choshon aidi padpiden ismenuen mimbi mëdanten mamishac isoshe. Aidi istan –capanëdash Esusën.

¹³ Adoaquien: –Con mates dadpeshun Saudon naid icsa chuibansho tantiombi, Icbo. Aidëmbi Edusaden yacnoshon mibi tantiaquido mëyamepac caoshe.

¹⁴ Aidbidi Edusaden yacnocquido chuiquid dapanquio dada uaid sananquin nëmbotsen mibi tantiaquido bedmeshun tanemenu ec aidi chopac caosh –quepanëdash Ananias Esus chiec.

¹⁵ Adoaquien: –Aidi ëbi chuibeneta caidquio icmeshun ëmbi bëdamboen isaid neque. Aid dacuëdënenquio yec nidshun istanta. Aidën isadaidbo abi chuiquidobëdta isadaidpembo abi chuiquidobëdtabidi ëbi chuiben-chuibenec capuendac.

¹⁶ Ëbi chuibenesho mibi mëyantequid iquendac, quequin Saudo tantiamembi –quepanëdash Esus.

¹⁷ Adsho tantianec Ananias nidash Udasën shubun puduedshun Saudo mamishec: –Con utsi, mibi podquedën chosho chuiquidën Nuquin Icbonquio, Esusën mibi padpiden ismenuen Nuquin Papan Mayan mibi menenuembidi chomiaid nebi –quepanëdash Ananias Saudo chiec.

¹⁸ Aden Ananiasën chuinubi nuëcquid bitsibimboecquid ëshënuësh paëdnubi bëshuachboedëmbi, Saudon, bëdamboen ispanëdash. Aden isec capusho isun acten mentopanëdash.

¹⁹ Adecbidi Saudo penquio yec padishachboedi piash padpidec uidëncuenoapanëdash.

Damasco yacnoshon Saudon Esus chiaid

²⁰ Adec uidëncuenash Saudo Esus tantiaquidobëd tabadpanëdash. Ambo tabadec Nuquin Papan chiaid chuibante shubu yacno nidshun: –Esuquidistu Nuquin Papan madombo nec –quequin chuipanëdash Saudon.

²¹ Aden chuisho tantiash tantiadempambo yec tabadec: –¿Edusaden yacnoshon Esus tantiaquido mëyameboeida nec? ¿Adecbidi nëmbo choshon tanemeshun isadaidbo Edusaden yacnocquido chuiquid dapabo yacno buamenu ec choabida ictic? –quepanëdash Damasco yacnocquido.

²² Aden anocquidon tantianubi Nuquin Papan Mayanën oncamiac Pabadon, Nuquin Papan Chomiaidquio Esuquidistu nec, quequin isadaidbo tantiamenuen Nuquin Papan chiampid Saudon comapenen chuided-chuidedpanëdash.

Isadaidbo Esus tantiesa abi cuesunete bunsho isash Saudo cuenaid

²³ Adembidi yuec ushquin Saudon ënenquiocquin chuibansho tantiash, Icsamboen chiec, quiash isadaidbo utsibo yec abi cuesunete bunsho isun tantiaquidën chuisho Saudon tantipanëdash.

²⁴ Adnubien Saudo cuesunenuen shubu dadpen icquid abichobi tsicatequin daquënë uaidën shëcuë cuëmanoshon abi chieshënquidon caimpanëdash Saudo puduensho bednu quequin.

²⁵ Aden cainsho isun Saudo cuesunenushe qeshun chiac inchëshëmbi onquenquiocquin tsitsan dapan Saudo antsaduntanquin tsicatiaid quënë cachoc Saudo budmepanëdash.

²⁶ Budanec Saudo Edusaden yacno nidoash Esus tantiaquidobëd tabadnuesho isash, Saudon mua uaquin ëbi bednushe quiash dacuëdcuededpanëdash aido.

²⁷ Adnubien, Saudobëd Esus tantiaquid utsiedi yacno choshon Bednaben yuedpanëdash. Aden yuedshun: —Saudon Damascó yacno nidquin Nuquin Icho ispac caosh. Nuquin Icho Saudobëd onquepac caosh. Adanec Damascó yacno choshon dacuëdenquiocquin Esus chuibampac caosh, quequin Saudon naid Bednaben chuibampanëdash.

²⁸ Aden Bednaben chuibanac Esus tantiaquido Saudo dacuëdenquiocnobi aidobëdi capuquin Saudon anoshombidi Esus chuibanoapanëdash.

²⁹ Ambo capuquin isadaidbo quidiecon onqueten onquequido istuidshun Saudon adembidi Esus chuibanacsho tantiashun aid cuesunenuequin aidontsen cainoapanëdash.

³⁰ Aden Saudo cuesunenuen, cainec qesho tantiashun Sesadeya caid yacnoshon Esus tantiaquidon Saudo buanshun abi tishondacno Tadsó caid yacno Saudouidtsëqui nidmepanëdash.

³¹ Adashic Saudo nidmian cuesunenushe quenquio yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuëdenquio yec tabadpanëdash. Adec tabadquin, Nuquin Papan chiaid tantiabenu, qesho Nuquin Papan Mayanën adomboembidi tantiamiac bëdamboec tabadpanëdash. Adec tabadquin Esus chuisho tantiesa icboedi Esus tantiaquid dadpenquio yampanëdash.

Petedon Ananias Dodcastsën bëdamiaid

³² Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanëdash.

³³ Ambo choshon dada, Eneyas cuëmëdquid, seta dadpen 8ted matamec canite tsasiaid Petedon istuidshun:

³⁴ —Esusën mibi bëdamiaque. Nidtosshon min uete buanun nacnenta, Eneyas —Petedon cac Eneyas badedquio nidtoash capupanëdash.

³⁵ Eneyas capusho isash Dida yacnocquidobëdi nidaid Sadon caid yacnocquido Esus tantiaquid yampanëdash.

³⁶ Adnubien Dida uditsec shubu dadpen icquid Ope caid yacnocquid, Esus tantiaquid utsi, chido, Tabita cuënshumbi quidiecon onqueten Dodcas cain cuënaid tabadpanëdash. Aidi bëdamboequid icquin badiadquidën-badiadquidënquien pete nibëdquido mendedenepanëdash. Adembidi aton na nibëdquido Dodcasën mendedenepanëdash.

³⁷ Aidi Petedo Dida yacno icnubi icsabudec unëso isun abëd icquidon dapanshun shubu abuc quënë icquidën nampanëdash.

³⁸ Aden nanshun, Petedo Dida yacno tabadec, qesho tantiaashun aid chomenuequin dada daëd Petedo tabadacno nidmiac aid daëdi Petedo tabadacno choshon Dodcas unëshoed chuishun: —Nidtuidenquio yec badedquio ëbëdi cho —cac

³⁹ abëdi badedquio Ope yacno Petedo nidpanëdash. Adec nidec Ope yacno chosho isun abuc quënë icquidën puduedmepanëdash. Ambo puduedsho isun shubiquimbi niantebon Dodcasën tuscaboed dashcute dadpen Petedo ismepanëdash.

⁴⁰ Adosho isun abitedi puduemiassh danëshën sebudash Nuquin Papa chiec onquetanec nidtosshon unëshoed isquin: —Nidto, Dodcas —Petedon cac uincuenequi Petedo isec Dodcas badedi uëtsëdtopanëdash.

⁴¹ Uëtsëdtosho isun mëdinquin nidtomeshun niantebobëdta Esus tantiaquid utsibo cuëshun cho-chomeshun uincuenboed ismepanëdash.

⁴² Aden Dodcas ismesho isash aton shubuno nidanequin Dodcas uincuenaid chiac Ope yacnocquido dadpen Esus tantiaquid yampanëdash.

⁴³ Adnubien Petedo Ope yacnocquid nidaidën capuquid bitsi uashun chodcashun nacnenquid Simombëd yuec Petedo tabadpanëdash.

10

Petedo Codnedion chomiaid

¹ Adnubien shubu dadpen icquid Sesadeya caid yacno Codnedio cuëmëdquid isadaid-pembo nidaid Itadia caid yacnoësh Sesadeya caid yacno choash tabadpanëdash. Aidi sondado dadpen 100tedi chuiquid icpanëdash.

² Aidi aton shubun icquidobëdi Nuquin Papa tantiaquid icquin isadaidbo aton na nibëdquid icsho isun menebanquid icpanëdash. Adecbidî Nuquin Papa chiec onquiane-denepanëdash.

³ Adquid yec ushë budtsambi tedes yanuc Nuquin Papa chiec onquequimbi ushacimb-boecquin Nuquin Papan uaid mayan bëda Codnedion ispanëdash. Nuquin Papan uaid mayan bëda choshon: —Codnedio —capanëdash.

⁴ Adsho tantiaash dachuëdquid comapenen isec: —¿Atotsibi name, Icho? —quepanëdash Codnedio.

Adoaquien: —Abi chiec mibi onquedenesho Nuquin Papan tantiec. Adembidi aton na nibëdquid tantiaquid menedenequid mibi icsho Nuquin Papan bëdamboen isaïd mibi neque. Chuinu. Tantiata.

⁵ Nëbi Simon cuënshumbic Petedo cuënoaid ma bednu mimbi namiaido Ope yacno nid-metan.

⁶ Simon utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec —quepanëdash Nuquin Papan uaid mayan bëda Codnedio chiec.

⁷ Aden chianec Nuquin Papan uaid mayan bëda nidambi Codnedion aton yua daëbëdëta sondado abentsëc chomeshun

⁸ Nuquin Papan uaid mayan bëdan chuibocpaden Petedo bedmenuen ambi namiaido Codnedion nidmepanëdash.

Petodon ushacimboec tsadquin isaïd

⁹ Adashic, ushë cuembocnoc Ope anoentsëqui Codnedion nidmiaido chonobi Petedo Nuquin Papa chiec onquenuc shubu macano pada-padapambocquid yacno dec-tatopanëdash.

¹⁰ Adecdectatoash shubu icbon codocanubi Petedo bundoec ushacimboec tsadquimbic

¹¹ abu posonianec abi yacmi dabidiete dapabiecquid bucun dënëshbudcuenaid budsho Petedon ispanëdash.

¹² Aidënquio ambi petequid ambi petemaid chedo nidaidën capuquid tacbidën capuquidbëd podochoquid chedo antabëdpanëdash.

¹³ Adnubien: —Nidtoson cuesuneshun pe, Petedo —capanëdash abucuësh onquequin.

¹⁴ Adoaquien: —¿Abida cai? Ëmbi petemaid tauishun mibi shëdmetemaidquio antabëdquid nec. Adquid piamboccombi, Icho —quepanëdash Petedo.

¹⁵ Adoaquien padpidec abucuësh onquec: —Nuquin Papan bëdambo icmiaïd icsambo iquec cainda —quepanëdash.

¹⁶ Adotanquimbic antabëdquid abuc buanshun adomboembidi abentsëc chotsëcnuc budmequin adembidi Petedo chuishun abuc shëcuë uaid yacno badedquio buanshun puduedmeoapanëdash.

¹⁷ Adosho isash Petedo ambi isboed tantiec tsadnubi Codnedion chomiaïdo Simonën shubu istuidash shëcuë cuëmmano choec nidtuidpanëdash.

¹⁸ Choec nidtuidash: —¿Nëmboda Simon Petedo tabadec? —quetuidpanëdash.

¹⁹ Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibë nec.

²⁰ Ëmbi chomiaïdo neque. Budash cacuidenquio yec aidobëdi nidan —capanëdash.

²¹ Aden chiac budshun Codnedion chomiaïdo isash: —Mimbi nibënaïd nebi. ¿Atotsi quec cho? —quepanëdash Petedo.

²² Adoaquien: —Codnedio cuëmëdquidën chomiaïd nebi. Aidi sondado dadpen chuiquid bëdamboequidquio nec. Adquid icquin Nuquin Papan chiacpaden nabansho isun isadaidbon bëdamboen isaïdquio nec. Aidi Nuquin Papan chomiaïd mayan bëdan naden chuipac caosh. “Simon cuënshumbic Petedo cuënoaid bedmetan. Bëac chuibansho tantiata,” quequin Nuquin Papan uaid mayan bëdan ëbi chuiposh quequin Codnedion ëbitedi chuioaposh —quepanëdash Codnedion chomiaïdo Petedo chiec.

²³ Adoaquien: —Pudued —quepanëdash Petedo.

Adashic badiadanec Codnedion chomiaïdobëd Petedo nidsho isash Esuquidistu tanti-aquid Ope yacnocquid utsin-utsinquien tsibanampanëdash.

²⁴ Adecdnidanec Sesadeya caid yacno chopanëdash. Adnubien, Nëid ushëmbien chochitec, quequin tantiaashun Codnedion aton shubun icquido abi isedquid chedo Petedon chuiban-sho tantiamenuen aton shubu nuntan iccuededmeapanëdash.

²⁵ Aden iccuededmiac tabadnubi utsibobëd choec Petedo chedo puduedsho isash, Mibi bëdamboquid icnubi adesa nebi, quequin Petedo ismec danëshën sebudec shuebudash Petedo bëisenquoio yec Codnedio uepanëdash.

²⁶ Adec uesho isash Petedo: —Mibipadquid nebi que. Nid tota —quepanëdash Codnedio caic.

²⁷ Adtanec Codnediobëd onquetanec quënë utsin puduedshun isadaidpembo dadpen Petedon istuidpanëdash.

²⁸ Aden aido isec: —Isadaidbo nebi. Adquid yec isadaidpembobëd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses utsibo ëmbi bëdamboen isaid icsambo iquec cainda, quequin ismequin ëbi tantiamiac

²⁹ mimbï ëbi bedmiaido choacsho isash, Mibëd capuesa nebi, quenquoio yec chobi. Adecbidi nëmbo choash isadaidpembon shubu nec. Nëmbo puduedtiapimbo iquebi, quenquoio yec puduednobi. Nëbi Tantianu. Chui. ¿Atotsieshun ëbi chomio? —quepanëdash Petedo Codnedio chiec.

³⁰ Adoaguien Codnedio: —Abentsëc choec ushanec ushë budec tedes yanubi Nuquin Papa tantiec huna mëmunec con shubu nuntanuësh Nuquin Papa chiec onquec tsadobi. Adnubien dashcute shocosh bed-bedquiaccimboec dasiuidquid ëbi yacmi Nuquin Papan budmiac onquec:

³¹ “Codnedio, mibi Nuquin Papa chiec onquesho Nuquin Papan tantiec. Adembidi aton na nibëdquido mimbï menebansho aidëmbi bëpiscudenquoio icquin tantiec.

³² Nuquin Papa bëdamboen tantianuen Simon cashumbic Petedo caid Ope yacnocquidbëd tabadquid ma chono qeshun mimbï namiaido nidmeta. Aidi Simon cuëmëdquid utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec,” quec Nuquin Papan uaid mayan bëda onqueposh.

³³ Aden chiac: “Petedo bedtan,” quequin ëmbi namiaido nidmiombi. Adoac bëdamboquid yec caucidanenquoio yec badedquio mibi choc. Adec mibi choacsho isash bëdambo iquebi. Nuquin Papan nuqui isnubi ambi mibi tantiamiacpaden chuibansho tantiec tabadnuna —quepanëdash Codnedio Petedo chiec.

Codnedion shubu nuntanshun Petedon chuibanaid

³⁴ Aden Codnedion chuiban cac Petedon naden chuipanëdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nëbi abimbo tantiëmbi.

³⁵ Nuquin Papan chiaid tantianshun matses utsin-utsinquien chieshënenquiocquin bëdamboen nabansho isun, Aidedi Nuquin Papan abi yacno yuedendac, quequin tantiëmbi.

³⁶ Èndenquimboshë Nuquin Papan dada uamequin con tsusedpabo isadaidbon tishmiaido caidaido naden chuipampic: Esuquidistu abentsëqui matsestedi chuiquid icnubi utsibëd bëdamboec tabadendac.

³⁷ Nidaid Cadidia yacnoshon Uan padon chuibanquin acten mentoaguien Esuquidistun ambi naid tauapondash. Mibitedishun aid tantiondac.

³⁸ Ma abëd tabadnueshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaid yec capuquin bëdamboen nabanquin abi chieshënenquidën Satanas caidën mëyanaido Esuquidistun bëdamebampondash. Adosho mibitedishun isbampondac.

³⁹ Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuesten dectanquin isadaidbon unës uaqi

⁴⁰ uincuenash, Uincuenobi, quequin Esuquidistun ismebempondashi.

⁴¹ Aidi uincuenshun matsestedi ismenquiocquin aibdëdtan peshun acquidotedictisëqui Esuquidistun ismepondashi.

⁴² Abëdi icshobi, Èbi chuibanquin matses icsaid cuidte chuibante ushë choec quequin chui, cac nebi.

⁴³ Adembidi Nuquin Papan chuibanacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ënsho isash abi icsaid Nuquin Papa bëpiscudendac. Esuquidistu chuiquin aden dada uapampic —quepanëdash Petedo Codnedion shubun iccuedquido tantiamequin chiec.

Isadaidpembo Nuquin Papan aton Mayan meniaid

⁴⁴ Aden Petedon chuibanshobi abitedi tantiaquid icsho isun Nuquin Papan ma abëd tabadnueshun aton Mayan menepanëdash.

⁴⁵⁻⁴⁶ Aden meniac isadaidpembo nëbi Esuquidistu tantiaquido yanshun abi onquiacmaidënenquoio utsin onqueten onquequin Nuquin Papa chiec cuëdëmpanëdash. Adsho tantias

Petedobēd cho-choboedo isadaidbo aton tsusedpabon nacpaden shui dēbid dētemequido: —jPadtec! Tantiadempaboctequid nec. Isadaidpembotsen Nuquin Papan aton Mayan meniac —quepanēdash isadaidbo Petedobēd cho-choboedo.

⁴⁷ Adoaquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic?

⁴⁸ Aid, acten mentometa —capanēdash Petedon.

Aden acten mentoqui: —Nuquibi tabadnuna —cac Petedobēd cho-choboedo acten mentoaidobēd daēdpactsēc ushec tabadpanēdash.

11

Isadaidbo Petedon ambi naid chiaid

¹ Adnubien utsibo Sesadeya caid yacnoēsh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bēdamboen tantiaish Esuquidistu tantiaquido yanosh, quequin chuipanēdash. Anoshon chuibētšene Edusaden yacnotsen choshon adomboembidi chuiopanēdash.

² Aden chuisho anocquidon Esuquidistu tantiaquid utsibon tantiaish tsusedpabon chiacpadomboen shui dēbid dētemequido yec Petedo nēmbō choacsho isun, Aidi ambi nabanaid chuimenu, quequin caimpanēdash. Aden cainubic Petedo choacsho isash

³ comapenec onquecuedec: —Isadaidpembō shui dēbid dētemesabo icnuc aton shubun puduedtemaidquio nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tantianu —quepanēdash Edusaden yacno tabadquido.

⁴ Adoaquien Petedon nadopanēdash: —Aidobēd ēbi tabadboed chuibanu. Tantiata.

⁵ Ope yacnoēsh Nuquin Papa chieq onquequin ushachimboen naden ispombi. Abuc psonianec ēbi yacmi dabidiete dapabieccquid dēnēshbudcuenaid budposh.

⁶ Aidēnquo nidaidēn capuquid tacbidēn capuquidbēd podochoquid chedo antabēdsho ispombi. Aidēn antabēdquid nuqui petequidbēd nuqui petemaid icposh.

⁷ Adquid icsho isnubi: ‘Nidtošon cuesuneshun pe,’ caposhi.

⁸ Adsho tantiašun: ‘Aidtedi ēmbi petemaid tauiquin mibi shēdmetemaidquio nec. Adquid pesambo nebi, Icho,’ capombi.

⁹ Adoaquien abucūēsh padpidec onquequin: ‘Nuquin Papan bēdambo icmiaid icsambo iquec cainda,’ caposhi.

¹⁰ Adomboembidi abentsēc chotsēc nuc tabēcaido abuc buanshun padpiden budmeshun adembidi chuishun buanshun abitedi abuc puduedmeoaposh.

¹¹ Abuc buanoabombic dada abentsēc chotsec Sesadeya caid yacnoēsh choquido shubu shēcuē cuēmano nidtuidash nidpac caosh.

¹² Aidtedi isnubi Nuquin Papan Mayan: ‘Aidobēdi cacuidenquo yec nidtan,’ qesho tantiaish aidobēdi nidpobi. Aidobēd Ope yacnocquido dada 6ted Esuquidistu tantiaquido puduanec nidec Codnedion shubun ēbēdi puduedposh.

¹³ Puduedacsho isash Codnedio: ‘Nuquin Papan chomiaidēn ambi uaid mayan bēdan naden chuiposhi: Simon cuēnshubic Petedo caid Ope yacno tabadeque. Aid bedmenuen mimbi namiaido nidmeta.

¹⁴ Aidēmbi mibēd icquidtedi Nuquin Papa yacno puduedmianquid chuibanendac, quequin Nuquin Papan uaid mayan bēdan chuiposhi,’ quequin Codnedion chuioaposhi.

¹⁵ ‘Adoac Esuquidistu chiombi. Aden chuinubi aton Mayan ēbitedi Nuquin Papan meniacpadembi aidotsen meneoaposh.

¹⁶ Aden meniacsho isun Nuquin Icho Esuquidistun chiondaid ēmbembi tantiašēcquieq tsadpobi. Nad icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Icho Esuquidistun.

¹⁷ ¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? —quepanēdash Petedo shui dēbid dētemequid utsibo chieq.

¹⁸ Aden Petedon nainquin chuibanac tantiadempambo yec tabadec isadaidbo shui dēbid dētemequido: —Isadaidpembō abi icsaid ēnsho isun Nuquin Papan aidotsen abēd icquid icmeoapac —quepanēdash Nuquin Papan naid chieq.

Antioquiya yacnoshomba Esus tantiaquido iccuededaid

¹⁹ Esteban cuēnoten seshuniash: “Esuquidistu tantiaquido cuesunenu,” qesho tantiaish ēbitsen cuesunenushe quianec Edusaden caid yacnoēsh Esuquidistu tantiaquid utsi-utsiec

nidanepanēdash. Nidequi nidaid Penisia caid yacno choash utsi-utiec tabadnubi utsi-utsiec acte nēnantanquio nidaid nacnēdquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidboudi Esuquidistu chuibanpanēdash.

²⁰ Adshumbic, utsibo Chipide caid yacnoēsh Antioquiya yacno cho-choquidobēdtan nidaid Sidene yacnoēsh Antioquiya yacno cho-choquidon isadaidpembo Esuquidistu tantiamenuen chuibanpanēdash.

²¹ Aden chuibanu, qesho Nuquin Papan bēdamboen tantiamiac aidon chuibanaid tantiahsun isadaidpembon: Ēbi icsaid ėnu, quequin ėnash Esuquidistu tantiaquid dadpen yampanēdash.

²² Adec isadaidpembo Esuquidistu tantiaquid dadpen yanosh, qesho tantiahsun Esuquidistu tantiaquid utsibon Edusaden yacnocquidon Antioquiya yacno Bednabe nidmepanēdash.

²³ Aidi Edusaden yacnoēsh puduanec nidequi Antioquiya yacno choshon anocquido Esuquidistu tantiaquido Nuquin Papan bēdambo icmiaid icsho isash: —Cuishon. Bēdambo iquec. Adembi tantiaquin chieshenquiocquin Esuquidistu tantiata —quepanēdash Bednabe.

²⁴ Bednabe bēdambocquid icsho Nuquin Papan aton Mayan meniac Esuquidistu bēdamboen tantiaquidquio icquin Esuquidistu chuibanac Esuquidistu tantiaquid utsi-utsiec dadpen yampanēdash.

²⁵ Adashic Antioquiya yacnoēsh puduanec Saudo bednuec nidequi shubu dadpen icquid Tado caid yacno choshon

²⁶ Saudo istuidash Antioquiya yacno aibdēdi Bednabe choapanēdash. Ambo choash seta abentsēc matamec anocquid Esuquidistu tantiaquidobēd iccuededquin Esuquidistu chuibanquin aid daēdshun tantiamepanēdash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuēmpanēdash.

²⁷ Bednabebēd Saudo Antioquiya yacno tabadnubien Edusaden yacnoēsh Antioquiya yacno Nuquin Papan yuecquio icshun nanun chiaid chuiquido cho-chopanēdash.

²⁸ Cho-choshon abentsēqui Accabo cuēmēdquid Nuquin Papan Mayanēn oncamiac: —Yuec-yuecpectsēc yash nidaidtedi yacnocquidon pete nibēdendac —quepanēdash. Aden chimbic shubu dadpenquioshē icquid Doma yacnocquido ancaquid Quēdaudio cuēmēdquid icnubi pete nibēdquieq yampanēdash.

²⁹ Adnubic, Udeya yacnocquidon pete nibēdec, qesho tantiahsun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanēdash.

³⁰ Esuquidistu tantiaquido Edusaden yacnocquido chuiquido nēid piucquid menetanta ma pete bunquido menenueshun, quequin ambi dayun uaidtedi Bednabebēdta Saudo menequin Edusaden yacno buamepanēdash Antioquiya yacno tabadquin Esus tantiaquidon.

12

Acobo cuesuniaidbēdta Petedo quēnēn nauedaid Nuquin Papan puduemaiid

¹ Adnubien Edusaden caid yacno tabadquid domanobo ancaquid Edodes cuēmēdquidēmbi Esuquidistu tantiec iccuededquido utsi-utsien comapenen mēyanuequin bedmeshun quēnēn nauedmepanēdash.

² Aido quēnēn nauedmeshun Esuquidistun ėbi chuibeneta caid abēd capucueboed Acobo cuēmēdquid chēshen cuesunemepanēdash. Acobon utsimbo Esuquidistun ėbi chuibeneta caid abēd capucueboed utsi Uan nepanēdash.

³ Adoac, Acobo cuesuniosh, qesho tantiahs isadaidbo utsibo, Esuquidistu tantiesabo: —Bēdamboen Edodesēn naosh —quepanēdash aido. Adec onqesho tantiahs Edodes: Isadaidbon pan bidisquesa tantiaid ushē choec, quequin Esuquidistun ėbi chuibeneta caid utsi, Petedo cuēmēdquid, bedmeshun quēnēn nauedmepanēdash.

⁴ Aden quēnēn nauedmeshun Petedo cuenushe qeshun sondado 4ted quēnē nuntan tabadmeshun pan nami uambocquid petequid tantiaid ushētedi naimēdami ambi naid icsa Petedo chuimenuquin Edodesēn caimpanēdash. Adnubien quēnē nuntanshun Petedobēdta mētaniaid sondado daēd uenubi utsi daēdshun shēcūē ėctabēdquin Petedo isec tabadpanēdash. Aid isquidotedi badiadnuc puduedshun isanec ushē abuctotsan nidnubi utsibotsen 4tedbidi choshon isanec ushē cuembocnoc nidoanubi utsibotsen 4tedbidi choshon isanec ushē budtsan nidnubi utsibotsen 4tedbidi choshon isanec inchēshtsēcnubi

badiadnuc isboedo choapanēdash. Adecbidi isboed utsibo inchēshēmbi padpiden isec choapanēdash.

⁵ Adnubien Esuquidistu tantiaquido iccuededash Nuquin Papa Petedo quēnēn nauedaid chiec yuec onquepanēdash.

⁶ Adshumbic, Badiadshun Petedo bēmembī, quequin Edodesēn tantianubi aid inchēshēmbi Petedo bucn mētaniacchobi ushnubi

⁷ Nuquin Icbon chomiaid, ambi uaid mayan bēda, nibēdquico boedi Petedon dayun choan quēnē nuntan comapenec chēnquepanēdash. Aidēn Petedon dayun choshon shictodo macuesquin: –Baded nidto –cac nidtonobi seccuduquēc shocosh bucu mētaniaid mēchiqidpanēdash.

⁸ Adtanquimbien Nuquin Papan uaid mayan bēdan: –Chinēshēdtanec tapucudta –cac Petedo chinēshēdtanec tapucudpanēdash.

Adsho isash: –Mīn dashcute bēntsecquid dasiuidshun ēbi tsiban –quianec nidsho

⁹ Nuquin Papan uaid mayan bēda nidsho isacimboecquin abimbo tantienquicoquin Petedon tsibanampanēdash.

¹⁰ Adec nidquimbi sondado abēdta mētaniaidēn tantienquio icnubi datanshun shēcuē isquid daēdshumbidi tantienquio icnubi aidotsen datanoashumbic umanuc puduenenubi shocosh shēcuē abembi shēcniadpanēdash. Adsho isash puduenash podqued abentsēcquidēn nidquimbic Nuquin Papan uaid mayan bēda abēd ichoedi badedquio nidquin Petedo niampanēdash.

¹¹ Abēd ichoed nibēdnubien Petedo padpiden tantiaquiec: –Edodesbēd isadaidbo, Esuquidistu tantiesabo, ēbi cuesunete bunsho isun Nuquin Papan ēbi puduemenuen ambi uaid mayan bēda chomiosh. Abimbo iccosh –quianec Petedo nidpanēdash.

¹² Adec nidequi Nuquin Papan abi pudumeboed tantiequi Uan cashumbic Madcos caidēn titan shubu yacno Petedo chopanēdash. Aidēn tita Madia cuēmēdquid icpanēdash. Ambobi Esuquidistu tantiaquid dadpen iccuededec Nuquin Papa chiec onquepanēdash.

¹³ Adnubien choshon Petedon shēcuē tosh-toshcasha tantiash chīdo yua Doda cuēmēdquid isnuec nidtopanēdash.

¹⁴ Aid shubu shēcuē yacno choshon Petedon cuēnsho tantiash bēdamboshē iquequi shēcnenquio yec aubidi titinguec: –Petedo shēcuē yacno choash nidec –quequin iccuededquido chuituidpanēdash.

¹⁵ Adsho Nuquin Papa chiec iccuededquidon abimbo tantienquicoquin: –Muequi mibi nec. Aidida ispash nebā –quepanēdash iccuededquido.

Adoaquien: –Ma aidquiobi neboc. ¿Utsida neque? Mimbimbo mua quenun istan.

Caquien: –Petedo dayun uaquin isquid, Nuquin Papan uaid mayan bēda ischitashien nec –quepanēdash tantiesā.

¹⁶ Adnubi padpiden Petedon tosh-toshcasha shēcnequin isash: –¡Tso! Abimbo caic –quecuededpanēdash.

¹⁷ Adnubien mēdante uic-uiccaic Petedo: –Onquenquio yec tabadquin tantiata. Ēbi nashunquin Nuquin Icbon naboed chuibanu –quepanēdash Petedo abi quēnēn nauedacnoshon Nuquin Papan puduemaiad chuibanec. Aden chias: –Ēbi puduemaiad Esuquidistun utsi, Acobobēdta Esus tantiaquid utsibo chuitanta –quianec puduenanec utsi yacno Petedo nidpanēdash.

¹⁸ Adashic, badiadnubi quēnē nuntan Petedobēd ichoed sondadotedi: –¿Mitsimbo nuquibēdta mētaneboed icpec? Nibēdeque. Is –quec dacuēdpanēdash.

Adashic, Petedo nibēdec, quequin sondadon chiac

¹⁹ Edodesēn: –Nibēntan –cac nidshun sondadon istuidenquicocho isun quēnē nuntanshun Petedo isquido ambi quēnēn tabadquin nabamboed chuimeshumbi aidotedi Edodesēn cuesunemepanēdash.

Edodes unēsaid

Adashic, Edodes nidaid Udeya caid yacno abi tabadacnoēsh puduanec shubu dadpen icquid Sesadeya caid yacno choash tabadpanēdash.

²⁰ Sesadeya caid yacno anoentsēcbidi shubu dadpen icquid utsi Sidon caid icpanēdash. Tido caid yacnocquidbēd Sidon caid yacnocquid Edodesbēd chushcananquido ichoedi padenquio yanec tabadpanēdash. Adec chushcananquio yec tabadquin, Sesadeya yacno Edodes choash tabadosh, qesho tantiash Edodesēn yua Bēdasto cuēmēdquidbēd onquenuc cho-chopanēdash. Cho-choshon, Ēmbi pete nibēdsho isun Edodesēn menioshi. Nēbi aid chushcainquio iquembi, quiosh, quequin cho-choquidon chuituidpanēdash. Aden chiac adomboembidi Bēdaston Edodes chuioapanēdash.

²¹ Aden adomboembidi Bēdaston chuiasho tantiashun Edodesēn: —Ēmbi chiacpadēn cho-choata, quiosh Edodes, quequin chuita —cac cho-choquido Bēdaston chuiopanēdash. Aden chiac Edodes onquesho tantianuec ambi chiatedec ushash dashcute naccuicquid dasiuidash abembi onquenuc tsadten abuc tsadtoash onquec taēpanēdash.

²² Aid onquesho tantiash: —Nidaidēnshun tishaid onquaidpenquo nec. Abuc tabadquid nuquin papa caidien Edodes nechitec —quec iccuededquido comapenec cuēdcuededpanēdash.

²³ Aden chuisho tantiash, Mimbi Nuquin Papa caidpenquo nebique. Aidi abia yampid abentsēcquiobi iqueque. Aiduidi tantiata, quequin chuitiadquidēmbi chienquo icsho tantiashun Nuquin Papan chomiaidēn ambi uaid mayan bēdan daicsa uac chichan dadpen yanec Edodes badedi unēspanēdash.

²⁴ Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanēdash.

²⁵ Adnubic Antioquiya yacnocquidon Esuquidistu tantiaquidon aton piucquid ambi menunen dayun uaid Bednabebēdta Saudo meniac buanec Edusaden yacno choshon anocquido Esuquidistu tantiaquido menetanashic auēshquo puduanec Antioquiya yacno nidoapanēdash. Aidobēdi Uan cashumbic Madcos caid nidpanēdash.

13

Saudobēdtabi Bednabe nidmiaid

¹ Adashic, Esuquidistu tantiaquid utsi-utsiec Nuquin Papan yuecquo icshun nanun chiaid chuiquido Antioquiya caid yacno tabadnubi Esuquidistu tantiamenuen chuibanquido tabadoapanēdash. Nēdic, Bednabe; utsibic, Simon, Dada Chēshē caid; utsibic, Sidene yacnoēsh choquid, Dusio cuēmēdquid; utsibic, Cadidia yacnoēsh choquid, tsusio dapa, Edodesēn shubun icquid icboedi, Manain cuēmēdquid; utsibic, Saudo cuēmēdquid.

² Aidedishun Esuquidistuidi tantianuen buna mēmunsho Nuquin Papan Mayanēn: —Saudobēdtan Bednaben aid daēdshun ēmbi chuibocpaden ma napanuna —capanēdash.

³ Adoaquien, buna mēmunquin nainash Nuquin Papa chiec onqueshun abēd icquid utsibon mēdanten Saudo Bednabebēdta mamishquin nadopanēdash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanēdash abēd icquidon.

Chipide yacnoshon Esuquidistu chuibanaid

⁴⁻⁵ Esus tantiaquidon mamishquin chiaquien Nuquin Papan Mayanēn nidmiac Saudobēd Bednabe Antioquiya yacnoēsh puduanec nidpanēdash. Aid daēd nidsho isash Uan cashumbic Madcos cain cuēnaid nidpanēdash dada uate buanshunec. Aidedi nidanec acte cuēman shubu dadpen icquid Sedusia caid yacno choash cano antabēdtoanec acte nēnantanquo nidaid naccnēdquid Chipide caid yacno nidtampanēdash. Chipide yacno choash nidequi shubu dadpen icquid Sadamina caid yacno choapanēdash. Adec choash tabadec aton matses isadaidbo iccuededacno choash puduedshun Nuquin Papan chiaid dada uamiampid Saudon Bednabebēdtan chuibanpanēdash.

⁶ Adoshombic, Sadamina yacnoēsh nidquin chuibidanec Chipide cuēma utsiuc shubu dadpen icquid Pabos caid yacnotsen choash tabadoapanēdash. Ambo tabadquin isadaidbo Badesus istuidpanēdash Pabodobēd icquidon. Satanasēn tantiamiaid icquin abimbo chiacchimboec, Nuquin Papan yuecquo icshun nanun chiaid chuiquidquō nebi, quequin muaquin chuipanēdash Badesusēn.

⁷ Aidi Pabos yacnocquido tsusion shubun tabadpanēdash. Anocquido tsusio cobednadod caid Sedquo Paudo cuēmēdquid icpanēdash. Aidi tantiaquiono, quec tabadquin, Isedquido chosh, qesho tantiash, Aidon chuibanaid tantianu, qeshun Saudobēdta Bednabe chomeshun tsusion yuedpanēdash.

⁸ Yuedac Pabodon Esuquidistu chuibanpanēdash. Saudo quequin isadaidbon cuēnubi Pabado quequin isadaidpembon cuēmpañēdash. Aden Pabodon Esuquidistu chuibancho tantiec tsusio tsadsho isun Badesusēn tantiamenquocnuen utsi uain chuiopanēdash. Ambi ompoaid ismianesa Badesus icsho Edimus cuēmpañēdash.

⁹ Aden utsi uain chuisho tantiashun Nuquin Papan Mayanēn tantiamiac Edimus bēisequi Pabado:

¹⁰ —Satanasēn bacuē yec bēdamboen naidbēdta bēdamboen chiaid tantiesa mibi nec. Nuquin Papan namiaid nebi, quequin ompoaid ismenquicquimbi Nuquin Papan chiaid utsi uaqin muaquin mimbi adenuidi chuibanecque. Tantia.

¹¹ Nēbi con Icbon mibi mēyanquin bēshu uaindac. Ushē chēnquesho mimbi yuen isenquo iquendac —quepanēdash Pabado Edimus chiec.

Aden chuiben Edimusën ëshë cuen-cuempambo yec inchëshbudacimboc yanash: — ¿Tsuntsimbini mëdinshun buampeba? — quequin nibëdacno mishquin uëmbampanëdash.

¹² Aden Edimus bëshu uacsho isec: —Nuquin Icbon chiaid abimbo iquec —quiash tsusio Sedquio Paudu cuëmëdquid Esuquidistu tantiaquid yampanëdash.

Nidaid utsi, Pisidia caidën shubu dadpen icquid Antioquiya caid utsi yacno Bednabe Pabadobëdi choash tabadoaid

¹³ Adashic, Chipide yacnoësh puduanec nidaid Pampidia caid yacno Pabadobëd icquido canon potepanëdash. Aden potiash nidaid Pampidia caid yacno choash Pabadobëd Bednabe pudundonobi Uan cashumbic Madcos caidbidi Edusaden yacno nidoaic cuëshëdpanëdash. Adec Pabadobëd Bednabe pudundoanec nidquin shubu dadpen icquid Pedque caid

¹⁴ isbidanec nidaid Pisidia caid yacno shubu dadpen icquid Antioquiya yacno chopanëdash.

¹⁵ Ambobi tabadequi chonoadtemaid ushën Nuquin Papan chiaid chuibante shubun puduedash tabadpanëdash. Ambo tabadnubien Nuquin Papan Moises dada uamiampid isec onquequin chuibanshumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: —Isedquido iqueque. Aid daëdi tabadacno nidshun, ¿Ëbitedi bëdambo icmenuen chuibanquin tantiametiadquio ada mibi icpe? cata —tsusion cac ambi namiaid nidshun tsusion chiacpaden Pabadobëdta Bednabe chuituidpanëdash.

¹⁶ Adoquien abi tsadacnoëshi nidtoashi Pabado: —Nuquin Papan naid mibi chiembique. Tantiaquiota.

¹⁷ Nidaid Equipito caid yacno nuquin tsusedpabo tabadshobi Nuquin Papan bëdamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënquo bëyucanquin tsusedpabon tishmiaidën tishmiaid caidaido Equipito yacnoshon buanubi

¹⁸ tsusedpabon Nuquin Papan chiaid chieshëmpampic. Adoquien matses nibëdacno seta dadpen 40ted matamec tabadquin, Nuquin Papan tsusedpabon ëbi chieshënaid cuidnu, quenquiocquin buampampic.

¹⁹ Aden buanquin nidaid Canan caid yacno buanshun anocquido isadaidpembo is-tuidmeshun matses utsibo utsi-utsiectsëcquiec 7tedi icquido naimbudmeshun aidon nidaidtedi nuquin tsusedpabo menepampic.

²⁰ Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquio icshun nanun chianiaid chuiquid Samued cuëmëdquid tsusedpabo chuiquid icmepampic.

²¹ Aidi isadaidbo chuiquid icnubic, Matses utsibo ancaquidpadquid bunebi, quequin tantianshun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudo cuëmëdquid, isadaidbo ancaquid icmepampic.

²² Adashic, yuecash Saudo, con shënisio, Nuquin Papan chiaid tantesa uasho isun utsitsen Dabid cuëmëdquid tsusedpabo ancaquid icmeopampic. Aidi Nuquin Papan chiacpadom-boen nabanquidquio icsho isash Nuquin Papa: ‘Dabid, Isain mado, ëbi bëdamboshë icmequid, ëbi bunacpaden nabanquidquio mibi nec,’ quepampic Nuquin Papa —quepanëdash Pabado aton matses Antioquiya yacnocquido tantiamenuen chiech.

²³ Aden chiech abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanëdash.

²⁴ Aidën nadatiambocquin nabanquin ambi nabanaid tauabicnuc Uan padon, acten mentoanquidën: ‘Mimbi tantiaid icsa ënshun acten mentome,’ capanëdash.

²⁵ Adec onquetanequic matses acten mentobudquin nainec: ‘¿Mitsipaden ëbi isquin cuëmpatsia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun: ¿Ëbi icsambocquid icsho atotsieshun mibi choec? quequin chuiquidquio Nuquin Papan icmioshi, caindambi,’ quepanëdash Uan acten mentoanquid —quepanëdash Pabado.

²⁶ Aden Uan padon chiacpaden chuibanashic: —Abadauanën tishmiaidën tishmiaid caidaido nuqui icsho nuquitedi icsaid bedshunash abided cuidadec Esuquidistu unëspanëdash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanëdash.

²⁷ Padnuen, Aton madombo Nuquin Papan chomiaid Esus nec, quenquiocquin Edu-saden yacnocquidobëd aton tsusio dapabo, Icsambocquid neque. Unës ua, quequin

chuipanēdash. Aden chuiquin utsibēd iccuededte ushēn-ushēnquien abi isec onquaiid Nuquin Papan dada uamiampicpadembi aidon napanēdash.

²⁸ Esuquidistu icsaid nibēdquidquio caiqui, Icsambocquid neque. Aid unēs uatiadquidi mibi nec, quepanēdash Isadaidbo Pidato caic.

²⁹ Adoquien Nuquin Papan dada uamiampicpaden nabanambien Esuquidistu cuesten dectanquin unēs uacsho chicshun, Ēbi unēsacsho nēidēn ēbi nauedec, quequin ambi shēcuē uain nacenaid chucanquio Osen Esus nauedpanēdash.

³⁰ Adoacsho Nuquin Papan Esuquidistu uincuemiac

³¹ capusho Cadidia yacnoēsh Edusaden yacno abēd capucueboedon aidi isbemanēdash. Aden isun aidombi Esuquidistu chuibedec. Adembidi aid isboedobēdtambi abimbo chuibanquidquio nebi –quepanēdash Pabado.

³² Aden chiashic: –Abi chiembique. Tantia. Nuquin Papan chometequid ambi chuiampid tsusedpabon isenquiocnobi

³³ Nuquin Papan uincuemiasho nuqui isonaid aidi nec. Aidi chuiquin Nuquin Papan dada uamiampid nad iqueque. Tantia. Chuinu.

‘Con madombo mibi nec.

Nēbi ěmbi uincuemiaqui ěmbi chiactedi mimbi naimbudoc.

Adosho isun ěbipadquiocnoc chuiquid dapa mibi icmemb.’

Aden ěndenquimboshē aton mado tantiaquin Nuquin Papan chiampic.

³⁴ Adechidi ambi uincuemetequid Esuquidistun nami chodquesa icpanēdash. Aid chuiquin dada uamiampid nad iqueque. Tantiata. Chuinu.

‘Dabid chiampicpadembi mibi icsaisa icsho ěmbi bēdamboen isaid mibi nec, mado,’

quequin Nuquin Papan dada uamepampic.

³⁵ Ambi dada uamiampid utsi nad iquec:

‘Icsaisa icsho aton nami chodquesa icmenuna,’

quequin Nuquin Papan chiampic.

³⁶ “ĚAden dada uamequin Dabid pado chiecta onquepampic? Padenquio. Aidi Nuquin Papa bunacpadamboen naimbudquin nabanash Dabid unēsacsho isun aton mēdimbon nami chodquiacno Dabid chococac aidēn namitsen chodquepampic.

³⁷ Nuquin Papan uincuemetequidēn namien chodquesa icpanēdash.

³⁸ Aidi icsainquiocquid yec ěbitedi icsaid bedshunash abided cuidadpanēdash.

³⁹ Adoac abi tantiaquidquiotzen icsaisabidi Nuquin Papan isec. Nuquin Papan naden nata quequin dada uamiampidtedi matsesēn natiapimbo iquec. Aden ambi chiacpaden natiapimbo yec, Nuquin Papan bēdamboen isaid nebi, quetiapimbo icboedēmbi, Matses icsaquid icsho cuidnushe quish abided cuidadec Esus unēsapanēdash, quequin tantiasho, Esuspadquid icsaisa Nuquin Papan nuqui isec.

⁴⁰ Nuquin Papan chomiaid choec, quequin tsusedpabon tantienquio icampidpadquid iquenda. Aido chuiquin Nuquin Papan dada uamiampid nad iqueque. Tantia.

⁴¹ ěmbi ěndenquimboshē dada uamiampicpadembi adquid chomembi.

ěmbi chomiaid isquidon chiac mimbi tantienquio icpec.

Adquid yec, Tantiadempambo iquec, quec mamēnshumēnquid ěbēdi tabadtiapimbo iquendac.

Adquid icmane qeshun tantiaquiota’

–quepanēdash Pabado iccuededquido chiec.

⁴² Aden chuibudashic Pabado Nuquin Papan chiaid chuibante shubu yacnoēsh abēd choboedobēd puduenanec nidsho isash: –ĚIccuededte badiad utsi chonoc iccuededquin chuinuecta mibi choape? –quepanēdash iccuededquid utsibo Pabado chiec.

⁴³ Aden chianec Pabodobēd Bednabe nidsho isun isadaidbo utsin-utsinquiembēdtan isadaidpembo isadaidbopadquid icnuequid utsin-utsinquin tsibanampanēdash. Aden abi tsibanansho isash: –Nuquin Papan bēdamboen isaid yec bēdamboec tabadta –quepanēdash Pabado Bednabebēd.

⁴⁴ Adashic, chonoattemaid ushē icnuc Nuquin Papan chiaid tantianuec Antioquiya yacnocquid dadpen iccuededoapanēdash.

⁴⁵ Dadpen iccuededsho isash isadaidbo tsusiobo: ěmbi chuibansho tantianuec aidtedi choenquio iccosh, quequin tantiec nēishpanēdash. Adec nēishash: –Mimbi Nuquin Papan chiaid icsamboen chuibanec –quepanēdash Pabado caic.

⁴⁶ Adoquien, dacuēdenquio yec Pabodobēd Bednabe: –Mibitedi con matses icsho, Nuquin Papan dada uamiampid chuibanu, queboedēmbi tantiesha icsho isun mibi chuibanenquio iquembi. Mibi tantiesha yec Nuquin Papabēd tabadte bunesabidi icnuc isadaidpembo Esuquidistu chuibanendambi.

⁴⁷ Nuquin Icbon naden tantiamioshibique. Tantia. Chuinu.

“Isadaidpembo ëmbi chiaid chuibanquid mibi icmembi ma nidaidtedi yacno ëbi tantiaquido ëbi yacno puduedquid ma icpanuna,” quequin chioshi –quepanëdash Pabado abi chieshënuquido isadaidbo Nuquin Papan dada uamiampicpaden chiec.

⁴⁸ Adsho tantiash isadaidpembo: –¡Padtec! Nuquin Papan chiaid bédamboshë iquec –quecuededpanëdash. Adoquien, Nuquin Papan ëbëdi mibi tabadmendambi, quequin chiaid ambi tantiamiactëda Esuquidistu tantiaquid yampanëdash.

⁴⁹ Adec Esuquidistu tantiaquid yanash auëshquio dadpen nidequi nidaid dëuequid utsi-utsiec yacno choash tabadquin aidontsen Esuquidistu chuibanoapanëdash.

⁵⁰ Adosho tantiash, Pabado icsambocquid nec, quequin isadaidbo tsusiobon Antioquiya yacnocquidon chidobobëda anocquido chuiquid dapa nëishmeshun Pabadobëda Bednabe mëyantangun ashunquio nidmepanëdash.

⁵¹ Aden nidaa cac puduanec nidtuidash, Esuquidistu ëmbi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanëdash.

⁵² Pabadobëd Bednabe Antioquiya yacnoësh nidan Antioquiya yacnocquid Esuquidistu tantiaquido: –Bëdambo iquebë –quecuededpanëdash. Adembidi aitedi aton Mayan Nuquin Papan menepanëdash.

14

Iconio yacno

¹ Adashic, Pabadobëd icquido Iconio yacno choash tabadpanëdash. Ambo tabadec Nuquin Papan chiaid chuibante shubu yacno nidash puduedpanëdash. Ambo puduedshun Esuquidistu chuibanac isadaidbobëd isadaidpembo dadpen Esuquidistu tantiaquid yampanëdash.

² Aido Esuquidistu tantiaquid yanubi isadaidbo utsibo Pabadon chuibanaid tantiatipimbo icquin Esuquidistu tantiaquido muaquin chuiquin isadaidpembo utsibo nëishmepanëdash.

³ Aido nëishmiambi Iconio yacno yuec tabadquin Pabadon Bednabebëdtan dacuëdenquiocquin Esuquidistu chuibampanëdash. Aden chuibansho isun Nuquin Papan ambi nadatiambocquin tantiadempamboctequid ismequid Pabadobëda Bednabe icmepanëdash.

⁴ Aden icmiaid aid daëdshun nadatiambocquin nasho isash, Isadaidbo tsusiobon chuibocpadec Pabadobëd Bednabe icsambocquid nec, utsi-utsiec quenubien, Ambi chiaid abimbo iquec, utsibo quepanëdash.

⁵ Aden chuishumbic, Pabadobëda Bednabe cuestanquin cuënoten se-senuequin Esus tantiesabo isadaidpembon aton tsusio dapabobëdtan cainubi adembidi isadaidbon aton tsusio dapabobëdtan cainoapanëdash.

⁶⁻⁷ Aden caimbededosh, quequin tantiaquidën chiac cuenec nidequi nidaid Dicaonia caid yacno Pabadobëd Bednabe choash shubu dadpen icquid Disteda caid yacno choash tabadquin Pabadobëdtan Bednaben Esuquidistu chuibampanëdash. Adtanec auëshquio puduanec nidec shubu dadpen icquid Dedbe caid yacnotsen choash tabadquin adombobëdi Esuquidistu chuibampanëdash. Adtanec auëshquio puduanec nidshun dëuequiec shubu dadpen icquid utsi-utsiec yacnocquidotsen chuibampanëdash.

Disteda yacno

⁸ Disteda yacno tabadnubien anocquid taicsaidi anin tishaid caputiapimbo icpanëdash.

⁹ Aidi Pabadon Esuquidistu chuibansho tantiec, Esuquidistun ëbi bédamepatsiash, quec otacquo tsadpanëdash. Aden caputiapimbocquidën tantiacpadomboen Nuquin Papan Pabadotsen tantiamiac

¹⁰ caputiapimbocquid comapenen bëisquin: –Nidto –Pabadon cac badedi nidtoash taicsaid bédanash capupanëdash.

¹¹ Aden taicsaid bédamiac capusho isash anocquido aton onqueten cuëdcuedequin: –Disteda yacnocquidon tantiaid matsesbimboec yanash abucuësh budoshe. Nëid daëdi isec cho –capanëdash.

¹² Adtanequi Bednabe otacquo tsadquid icsho isash ambi tantiaid abentsëc Upited icnuc Upited cain Bednabe cuënuquimbi Pabado chuiquidquico icsho isun ambi tantiaid utsi Medcudio icnuc Medcudio cain Pabado cuëmpanëdash Disteda yacnocquidon.

¹³ Aden cuësho tantiashun baca bënë daëd bëec: Mibi daëdi tantiaquido Disteda yacnocquido nec, quequin, Ismenu, quequin ambibi tantiacbimboecnuc nacnenaid Upited caid dayun uaquido baca cuesunenu, quepanëdash.

¹⁴ Aden baca cuesunenuen bēsho isun abi dasiuidaid aton dashcute bēntsecquid shoyonquin cancheuidashic iccuededquidon nēnantanquio nidash Pabadobēd Bednabe comapenec nadpanēdash:

¹⁵ —Ēbi daēdi mibipadquid matesquio nebi. Mimbi tantiacmaid nebique. Baca cuesunenda. Chiaid bēda mibitedi naden chuinuac chobi. Nuquin Papa caid abentsēcquiobi iquec. Aidēmbi abubēda nidaid uashumbic aidēnquicquidtedi uabanampidquio neque. Aiduidtsēqui tantiaquin ambi uaidimboecnuac matesēn nacnaina tantiesa icta.

¹⁶ Ēndenquimbo Nuquin Papan, Adoenda, cainquiocnoc matesēn ambi tantiacpaden nabampampic.

¹⁷ Aden, Adoenda, cainquiocquimbi, Abitedishun icbo icquin bēdamboquid nebi, quequin ismequin ue secamedenequinc, cuēte bacuēmequinc, nuqui penun tiedēn nitsimbeniaid canimequinc caquin Nuquin Papan nac bēdamboen nuquitedi pebededec. Aden nabanquin Nuquin Papan, Bēdambo iquebi. Cuishon, camiaido nuquitedi nec —quepanēdash Pabadobēd Bednabe Disteda yacnoquido chiech.

¹⁸ Aden chuido-chuidoquai baca cuesunenquio icpanēdash Disteda yacnoquidon.

¹⁹ Adnubien Antioquiya caid yacnoquidobēd Iconio yacnoquido Disteda yacno cho-choshon, Pabado icsambocquid nec, quequin chiac Disteda caid yacnoquido nēishcuededpanēdash. Adec nēishcuededshun Pabado cuēnoten se-siash, Unēsosh, qeshun nimbanquin buanshun shubu nibēdacno Pabado netampanēdash.

²⁰ Ambo netanambic, Esuquidistu tantiaquido cho-choshon tsicatenubi Pabado nidtoash Esuquidistu tantiaquidobēd Disteda yacno choec shubun puduedpanēdash. Badiadash puduanec shubu dadpen icquid Dedbe caid yacno Pabadobēd Bednabe nidoapanēdash.

Nidaid Sidia caid shubu dadpen icquid Antioquiya yacno choaid

²¹ Adec Dedbe yacno choash tabadquimbi Pabadobēdan Bednaben chuibanac Esuquidistu tantiaquid dadpen yampanēdash. Auēshquio puduanec nidoaic padpidec Disteda caid yacno choash tabadquin, Dadpen tantiamequiono, quequin chuibampanēdash.

²²⁻²⁴ Aden chuibanshumbic: —Natiavianquid iquendac. Adquid icnuac Nuquin Papa yacno puduedash Esuquidistu tantiaquid yec ambo nuquitedi tabadendac, quec nēbi dayacquo yec tabad —capanēdash Pabadon. Adotanquin ambia Esus tantiaquid utsi-utsien Pabadobēdan Bednaben: —Bēdamboec tabadquin ismequin Esuquidistu tantiaquid utsibo chuiban —capanēdash. Adotanec, ambi chuiboedobēd Pabado Bednabe chedo Nuquin Papauidi tantiec buna mēmnuquin chiech onquepanēdash. Aden Nuquin Papa chuiquin naimbudquin, Nēmbocquid mibi tantiaquido bēdamboen dayun uata, Papa, quequin chianec Pabadobēd Bednabe chedo Disteda yacnoēsh nidoapanēdash. Adecbidi Iconio yacno choashun adomboembidi chuibanoapanēdash. Adecbidi Antioquiya yacno choashun adomboembidi chuibanoapanēdash. Antioquiya yacnoēsh puduanec nidec nidaid Pisidia caid datambēsenec nidaid Pampidia caid yacno choash nidec

²⁵ shubu dadpen icquid Atadia caid yacnosen chopanēdash.

²⁶ Auēshquio cano antabēdtoanec nidec shubu dadpen icquid Antioquiya caid yacno, Nuquin Papan Mayanēn nidta, quequin chiondacnombo choapanēdash.

²⁷ Ambo choash tabadquin anocquido Esuquidistu tantiaquid utsibobēd iccuededshun Nuquin Papan tantiamiacpaden abi capucueniacnoshon ambi nabanaidtedi Pabadobēdan Bednaben chuibampanēdash. Isadaidpembro dadpen Esuquidistu tantiaquid yamposh, quequin chuipanēdash.

²⁸ Adtanequi yuec Antioquiya yacno Esuquidistu tantiaquid utsibobēdi Pabado Bednabe chedo tabadpanēdash.

15

Edusaden yacnoquido iccuededec tantianu quiaid

¹ Pabadobēd Bednabe Antioquiya yacno choabincubien nidaid Udeya caid yacnoēsh choquido Esuquidistu tantiaquid utsibo Antioquiya yacno choash tabadquin, Nuquin Papan naden nata quequin chiaid Moises dada uamiampicpaden shui dēbid dētemesa abi yacno Esuquidistun yuedtemaid nendac, quequin chuipanēdash.

² Adnubic Pabadobēd Bednabe Antioquiya yacno choash tabadquin aidon chiaid tantiaquid: —Nuquin Papan aden chiambo iqueque. Aden chienda —quepanēdash.

Adsho comapenec cuēdquin chushcapanēdash. Adsho tantiaquid shui chuibampanēdash, Edusaden yacno nidshun chushcanamboed chuitanta, quequin Pabadobēda Bednabe chuishumbic Esuquidistu tantiaquid utsibo chuioaquin aido nidmepanēdash.

³ Adoac Antioquiya yacnoēsh puduanec nidec nidaid Penisia caid yacno choash tabadquin, Isadaidpembotsen Esuquidistu tantiaquid yamposh, quequin chuipanēdash.

Adsho tantiaash: —Aid tantiec bēdambo iquebi —quepanēdash anocquid Esuquidistu tantiaquido. Adtanec auēshquio nidequi nidaid Samadia caid yacno choash tabadquin adomboembidi chiac adquiecbidi, Bēdambo iquebi, quepanēdash anocquido.

⁴ Auēshquio puđuanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobēđtan Bednaben chuibanopanēdash.

⁵ Aden chiac Esuquidistu tantiaquido, Nuquin Papan naden nata quequin chiaid tantiaquido: —Nuquin Papan naden nata quequin chiacpaden isadaidpembotsen shui dēbid dētemetiadquidi nec. Nuquin Papan naden nata quequin Moises dada uamiampid nabantiadquid neoaic —quepanēdash.

⁶ Adoaquien Esuquidistu ambia tantiaquido tsusiobobēd Esuquidistun ēbi chuibeneta caido: Tantiabono, quiash onquecuededpanēdash.

⁷ Adec yuec onquecuededash nidtoash Petedo nadec onquepanēdash: —Chuinu. Tantiata. Ēnden Nuquin Papan naden chuipondashi: “Isadaidpembo Esuquidistu tantiaquid icmete bunebique. Aidotsen chuibanta,” quequin chuipondashi. Aden ēmbi chuiasho mibitedishun tantiondac.

⁸ Ēmbi isadaidpembo Esuquidistu chiac abi tantiaquid aido yampondash. Matsesēn tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniāpadembi isadaidpembo meneoapondash.

⁹ Utsibo nec, quenquiocquin aidotsen tantiaquid paucoapondash.

¹⁰ Aden Nuquin Papan nasho isun, ĩAtotsieshun Nuquin Papan naid icsambo iquec quiacpaden tsusedpabon natiāpimboctequid nuquitsen natiāpimboctequid isadaidpembon nabanta cate nuqui bumpe?

¹¹ Padenquo icnuna. Matsestedi icsaquid icsho cuidnushe quiash abided cuidadac, quequin tantiaquiec unēsash abēdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec —quepanēdash Petedo.

¹² Aden Petedon chuiquin ēnambic Pabadotsen Nuquin Papan tantiamiac ambi natiāmbocquin naquin isadaidpembo ismebanaid chuipanēdash. Adembidi Bednaben chuiopanēdash.

¹³ Aid daēdshun chuibanquin nainan Esusēn utsi Acobo, Esus tantiaquido tsusio dapa, nadpanēdash: —Ēmbitsen chuinu. Tantiata.

¹⁴ Isadaidpembo tantiaquid aido Esus chuibanta, quequin Nuquin Papan chiacpaden Simon Petedon chiac isadaidpembo Esus tantiaquid yansho Nuquin Papan aidtedi nuquibēđta aton matses icmiac.

¹⁵ Adomboembidi Nuquin Papan chuimiāidēn dada uampid nad iqueque. Tantiata. Chuinu:

¹⁶ “Isadaidbobēd yuec tabadenquiochoedi padpidec choash aidobēd icoaindabi.

Dabid padon tsyuecquido isadenquiochoedi isadcuenendac

¹⁷ ma aton Icbo matsestedishun istuidpanuna;

ma adembidi isadaidpembon ēmbi cuēnaidon aidbidi istuidpanuna,

¹⁸ quec Nuquin Icbo ambi ēnden tantiampicpadomboen chiaid nec”

—quiashic abi Acobo onquec:

¹⁹ —Nuquin Papan chiampid tantiaquin nuquin tsusedpabon naden nata quequin chiacpaden nata isadaidpembo cainquo ictiad.

²⁰ Nēiduidtsēqui dada uaquin isadaidpembo chuibanuna nuquibi: Nuquin Papan uaidbimboecnuc nacnenaid tantiaquin pete sanaid penda; adembidi, min chidouditsēqui chudta; adembidi, min bēnēuidtsēqui chudmeta; adembidi, Nēish tētaniaid intacchobi codocaid penda, quequin isadaidpembo chuibanuna.

²¹ Adec Moisesēn dada uaid iccuededquin isec nuqui onquedenec. Aid icnuc, Adomboembidi nata, quequin isadaidpembo chuinuna —quepanēdash Acobo iccuededquido chiec.

²² Adashic Esuquidistu tantiaquido iccuededec onquec ēnēdshun ēmbi dada uaid Antioquiya yacno buanuec Edusaden yacnocquid daēd nidta, quequin Pabadobēđta Bednabe nidmepanēdash. Abentsēc Udas cashumbic Badsabas cuēnaid; utsibic, Sidas cuēmēdquid. Aid daēdi Nuquin Papan chiaid comapenen tantiaquidquo icpanēdash.

²³ Isadaidpembo chuiquin Edusaden yacnoshon Esuquidistu tantiaquidon naden dada uapanēdash:

“Esuquidistun ēbi chuibeneta caidobēdi ambia Esuquidistu tantiaquido Edusaden yacnocquido yec min utsibimboecquido nebi. Isadaidpembo Esuquidistu tantiaquido Antioquiya yacno tabadquidobēđta nidaid Sidia yacno tabadquido, nidaid utsi Sidisia yacno tabadquido chedo mibitedi chuiquin dada uaombique. Isec onqueta.

²⁴ Ēbēd icquido nēuēshquio nidash mibi yacno choash puduedshun, Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi.

²⁵ Aden chuisho tantiashun nēmboquidobēd iccuededec onquequin abentsēcshun tanti-acimboen dada uaombi. Aidi nēmboquid daēdi Pabado Bednabebēdta buantan, quequin chiembi.

²⁶ Unēsmane, quenquo yec capucuenequin Esuquidistu chuibanquido Pabadobēd Bednabe nec.

²⁷ Adquid aid daēd icsho isun aid chedobēdta Udas Sidas chedo mibi yacno nidmembi. Adoac ěmbi dada uacpaden ma mibitedi chuiopanuna abimbo iquec camenuen.

²⁸ Nuquin Papan Mayanēn ěbitedi tantiamiacpaden isadaidbon naden nata quequin chiapaden nata mibi caisa nebi.

²⁹ Nēidtedtsēqui ěbitedishun nata caid nec: Nuquin Papan uaidbimboecnuc nacnenaid tantiaquin utsibon abi yacnoshon sanaid penda; adembidi, min chidoidtsēqui chudta; adembidi, min bēnēuidtsēqui chudmeta; adembidi, mimbi nēish cuesuniaid intacchobi codocashun penda. Adoac ěmbi chiapaden nabanec mibi bēdambo icpec. Padi aiddtedtsēqui chiembi.”

³⁰ Aden dada uaqin nainshun ambi nidtan caboed meniac Antioquiya yacno nidoapanēdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menapanēdash.

³¹ Aden meniac isbanash: —Mimbi bēboed dada uaid isash bēdambo iquebi —quepanēdash isadaidpemo Antioquiya yacnocquido.

³² Adnubic Udasēn Nuquin Papan chiaid chuibanquin Esuquidistu tantiaquido Antioquiya yacno tabadquido bēdamboen tantiamapanēdash. Adomboembidi chuibanquin Sidasēn tantiameoapanēdash.

³³ Aden dadpen ushquin chuibanshun: —Edusaden yacno nidoaibi —caquien: —Ai, mibi nidsho isash unēsquio icquimbi mibi chomequido yacno nidtan, mibi caimbi —quepanēdash Esuquidistu tantiaquido Antioquiya yacno tabadquido.

³⁴ Adec aido Edusaden yacno nidnubien

³⁵ Pabado Bednabe chedobēd tan Antioquiya yacno tabadquin Esuquidistu tantiaquid utsibo Nuquin Papan chiaid bēdamboen tantiamenuen chuibanpanēdash.

Pabadobēd Bednabe cuēshēdaid

³⁶ Adashic, yuecash Pabado Bednabe caic: —ĚMidapadec nuqui capucuenequin Nuquin Papan chiaid chuibeneboedo tabadeque? Isec nuquibi nidnu. Nid —quepanēdash.

³⁷ Adoquien: —Ma Madcosbidi nidoanu. Chuita —quepanēdash Bednabe.

³⁸ Adoquien: —Chieshec aidi cuēshēdondashe. Padi. Nuqui daēdtsēqui nidnu. Nid —quepanēdash Pabado.

³⁹ Adoquien Bednabe aden tantienquo yec Pabadobēd comapenec onquiash Madcosbēd cano antabēdtoanec Chipide yacno nidoapanēdash.

⁴⁰ Adnubien Pabado Sidas abēd Edusaden yacnoēsh choaed caic: —Nuquibi nidnuna —quepanēdash.

Adec aid daēd nidnuesho isash anocquid Esuquidistu tantiaquido: —Ma Nuquin Papan mibi daēd bēdamboen nidmequin ma mibi bēdamboen namepanuna —cac Pabadobēd Sidas nidpanēdash.

⁴¹ Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bēdamboen tantiamenuen chuibanpanēdash. Aden chuibeneshumbic nidaid Sidisia yacno choshon Esuquidistu tantiaquido shubu utsinshubu utsinquec iccuededacnomboec puduedcuenequin Pabado chuibanapanēdash.

16

Pabadobēd Timoteyo nidaid

¹ Adec nidec shubu dadpen icquid Dedbe caid yacno choash tabadquin adomboembidi chuibanash nidequi shubu dadpen icquid Disteda caid yacno Pabadobēd Sidas choapanēdash. Ambo Esuquidistu tantiaquid Timoteyo cuēmēdquid tabadpanēdash. Aidēn tita isadaidbo Esuquidistu tantiaquid icnubi aidēn papa isadaidpemo quidieco matses icpanēdash.

² Timoteyo bēdambocquid nec, quequin Disteda yacnocquidon Pabado chuipanēdash. Adomboembidi shubu dadpen icquid Iconio yacnocquidon chuiopanēdash.

³ Aden dadpenshun chuisho tantiash Timoteyo buante bumpanēdash Pabado. Adec, Timoteyo buanu, qeshun ěbi capucueniacno isadaidbo dadpen iqueque. Aidon Timoteyo

isash, Aidën papa quidieco matses icnuc aton madobidi isadaidpembo nec, aido quenushe qeshun Pabado Timoteyon shui dëbid dëtemepanëdash.

⁴ Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada uaquin chiaid Pabado chuiopanëdash.

⁵ Adembidi Nuquin Papan chiaid chiac ënden Esuquidistu tantiaquidon tantiabenquiconobi utsi dadpen Esus tantiaquid yanoapanëdash.

Ushquin Masedonia yacnocquid Pabado isaid

⁶ Adanec nidaid Sidisia caid yacnoësh nidsho Nuquin Papan Mayanën: —Nidaid Asia caid yacno Esuquidistu chuibanuec nidenda —cac Pabado bëd icquido nidaid Pidiquia caidtsen datambidanec nidaid Cadasia caidbidi datambidanec

⁷ nidaid Misia caid yacno chopanëdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanën aido tantiameoapanëdash.

⁸ Adoac nidaid Misia datambidanec shubu dadpen icquid Todoas caid yacno ëbi tabadacnobi chopondash.

⁹ Ambo choash tabadec inchëshnuc ushquin nidaid Masedonia caid yacnocquido Pabado ispondash. Adec ushquin isquin nidaid Masedonia yacnocquido: —Ëbitedi Esuquidistu chuibanec cho —quec onguesho Pabado tantiapondash.

¹⁰ Aden tantiash: —Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabado cac buanun nacnempondash. Esuquidistu tantiaquid yanash ëbitsen Pabado bëd nidpondabi.

Didia cuëmëdquid Esuquidistu tantiaquid yanaid

¹¹ Adanec Todoas yacnoësh puduanec cano antabëdtoanec cuebi nidequi acte nënantanquio nidaid nacnëdquid Samotodasia caid yacno choash Pabado bëd icquido tabadtuidpondash. Badiadash auëshquio puduanec cano antabëdtoanec nidquimbi potebidanec nidaid Masedonia caid yacno ëbitedi chopondabi. Aid nidaidën acte cuëmambi shubu dadpen icquid Niapodis caid yacno pudundoanec

¹² nidequi shubu dadpenquio icquid Pidipos caid yacno domanobo dadpenquioshë tabadacno yuec ushec tabadpondash.

¹³ Pidipos yacno tabadashic isadaidbo iccuededte badiadën Nuquin Papa chiec utsibo onquedeniacno istuidnuec puduanec shubu nibëdacno nidequi acte utsi cuëmambi choapondash. Ambo choshon iccuededquido chidobo istuidshun Esuquidistu Pabado chuibampondash.

¹⁴ Pabado chuibanacno chido Didia cuëmëdquid shubu dadpen icquid Tiatida caid yacnoësh choquid icpondash. Aidën piucquid bednuec dashcute cuëshaid umu-umumbocquid menebenepondash. Aidi Nuquin Papa tantiaquid icquin Pabado chuibanubi Nuquin Icbon tantiamiac Esuquidistu tantiaquid Didia yampondash.

¹⁵ Aidbëd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian: —Esuquidistu tantiaquid mibipadquid nebique. Con shubuno ushec cho —cac nidash Didian shubun puduedash Pabado bëd icquido tabadpondash.

Pabado bëdta Sidas quënën nauedaid

¹⁶ Adashic padpidec Nuquin Papa chiec onquedeniacno Pabado bëd icquido nidoasho chido yuaidën bëquetuidpondash. Aidën mayan icsan tantiamiacpaden yuecash nad iquendac, quequin chuisho piucquid dadpen aid chido matsesën meniac aid chidon ambi bedaidtedi abi yuaquid meneoapanëdash.

¹⁷ Pabado bëd icquido bëquetuidshun tsibambëec choec aid chido: —Nëid dadatedi Nuquin Papan namiaidquio nec. Abi yacno puduedmianquid iquec, quequin chuibanquid nëid dadatedi nec —quec

¹⁸ badiadquidën-badiadquidënquiec comapenec cuëdpondash.

Adec cuëdtonesho tantiate bunenquio yec amibidi bidiadquin mayan icsa dapuduedaid chido chuiquin comapenen Pabado: —Esuquidistun nadatiambocquin naidënquio dapuduenta —cac badedquio mayan icsa dapuduempondash.

¹⁹ Aden dapuduemiac chido bëdanacsho isun abi yuaquidon: —Nëbi nadquio iquendac, quequin chuitiapimbo nuquin yua iquec. Aden chienquiocquin piucquid bedtiapimbocquin nuqui meneotiapimbo iquec, quequin tantiash nëishun Pabado bëdta Sidas bedshun nimbanquin abi chuiquido yacno chido yuaquidon buampondash. Piucquid bednuequin aton na bëshun utsibon sambanaid anoentsëqui abi chuiquido icsa isun chido yuaquidon Pabado bëdta Sidas ambo buampondash.

²⁰⁻²¹ Aden abi chuiquid tsadacno bëash: —Nëid dada daëd isadaidbo nec. Nëmbo choshon abi chuiquidon naden nata quequin chiaid chuibanec. Èbitedi domanobo icquin ambi chiaid èbitedishun natemaïd icnuc matsestedi chushquecuededosh —quepondash chido yuaquido abi chuiquido chiec.

²² Aden chuïsho tantiaquidon chiac dadpen cho-choash iccuededquin Pabado bëquidon chiacpadomboen aidontsen chuioac abi chuiquido: —Bëboedon dashcute chicshun cueshcaten cuesta —cac sondaden cuespondash.

²³ Aden comapenen cuesmeshun buameshun quënën nauedmeshun ambi quënën nauedaid ista caïd chuïquin Pidipos yacnocquido chuiquidon: —Puduenanec cuenushe qeshun nëid daëdi bëdamboen isquiota —capondash.

²⁴ Adsho tantiaashun ambi ista caïdën Pabadoëdta Sidas nënantanquio quënën nauedquin tsadunshun cueste shëcuë uaidën tausunash puduantanquin quënë bëdamboen bëtashpanëdash.

²⁵ Aden bëtashash aton shubu dayunquiocquidën puduedambic inchëshpotsembo Pabadoëd Sidas Nuquin Papa chiec onquepanëdash. Adecbidi Nuquin Papan naid chiec cuëdëmpañëdash. Adec cuëdënsho utsibon tantianubi

²⁶ comapenec nidaïd ishcutdnubi mëtaniaïdtedi mëchiquidpanëdash.

²⁷ Adnubien ista caïd isec tsadboedi ushtanec isucunquin isac shëcuë bëtashaid ënden shëcniac. Adsho isash ista caïd: —Quënën nauedaido puduen-puduepacnui —quetanec: —Chuiquid dapabon ëbi cuesunemetsiash —qeshun siadnuequin chështe abi tsiusudaïd chicsho

²⁸ istanquin Pabado: —Quënën nauedaidtedi nëmbo iquebique. Seshuniadenda —quequin comapenen cuëmpañëdash.

²⁹ Adoaquien, seshuniadtsemboedën: —Tabote bec cho —cac ambi namiaïdën tabote bedtanquin meniac tabote bedshun sananec badedi quënën puduedash dacuëdec uëdëquec Pabadoëd Sidas tabadacno choash danëshën sebudec shuebudpanëdash. Mibi daëdi bëdamboquid icnubi adquidpenquio nebi, quequin tantiaquin isempanëdash.

³⁰ Adsho isun Pabado nïdtomiaqui seshuniadtsemboed bëyucanec nidquin aton shubun Pabadoëdta Sidas yuedash: —¿Nuquin Icho yacno puduednush mitsipadequibi ëbi icsaïd cuidadpeque? Chui. Tantiãnu —quepanëdash seshuniadtsemboed.

³¹ Adoaquien Pabado: —Mibibi cuidadtiapimbo iquec. Mibëdta min shubun icquido icsaquid icsho cuidnushe quïash abided cuidadec unëshash Esuquidistu aton Papa yacno puduedash abi tantiaquido yuedquid neque. Mibi icsaïd ënash, Esuquidistu con Icho nec, quequin abimbo tantiaita

³² —qeshumbic seshuniadtsemboedbëd icquido Esus tantiamenuen Nuquin Icbon chiaïd Pabado chuïpanëdash.

³³ Adoaqui Pabadoëdta Sidas cuesaïd chiuë acten bëpanshunquin nainacsho aton shubun icquido Esuquidistu tantiaquido yansho isun aïdtedi Pabadoëdta Sidasën acten mentobampanëdash.

³⁴ Aden mentobanaqui aton shubun yuedshun pemepañëdash. Adashic, Nuquin Papan chiaïd abimbo tantiaquid yec ambi bëdambo icmiaïdo seshuniadtsemboedbëd icquido icpanëdash.

³⁵ Adashic, badiadash Pidipos yacnocquido chuiquidon: —Nauedaid shubu yacno nidshun quënën nauedboed daëd pudueme, quequin chuitanta —cac quënë yacno nidshun ista caïd adomboembidi chuioapanëdash.

³⁶ Aden chiac ista caïdën: —Quënën nauedboed daëd pudueme, quequin chuiquid dapabon chiosh, quequin aidon chomiaïdën chioshibique. Dacuëdenquio yec nid —capañëdash Pabadoëdta Sidas chuïquin.

³⁷ Adoaquien Pabado: —Èmbi naid chuïmenquiocquin ëbi daëdi domanobo icsho utsibon isnubi cuesmeposhi. ¿Nëbi puduemenuen utsibo isenquiocnobida ëbi daëdi nidmepec? Padenquio caïmbi. Èbi daëdi puduemenuc ma chuiquid dapabo abibi chopanuna —quepanëdash.

³⁸ Aden chiac puduenanec nidequi abi chuiquido yacno choshon, Mïmbi quënën nauedmeboed daëd domanobo nec, quequin chuïsho tantiaish chuiquid dapabo comapenec dacuëdcuededpanëdash.

³⁹ Adec dacuëdec nidequi nauedaid shubuno choash: —Domanobo nec, quequin tantienquiocquin mibi quënën nauedmiombi —qeshun puduemetanec: —Pidipos yacnoësh nidtan —capañëdash Pabadoëdta Sidas chuïquin.

⁴⁰ Adoaquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bëdamboen tabadmenuequin Pabado chuïbampanëdash. Aïdo chuïbidanec Pabadoëd icquido nidoapanëdash.

17

Tesadonica caid yacnoquido isadaidbo nēishcuedaid

¹ Pidipos yacnoēsh puduanec nidequi Pabadobēd icquido shubu dadpen icquid Ampipodis caid datambidanec shubu dadpen icquid Apodonia caidtsen datambidanec shubu dadpen icquid Tesadonica caid yacno choash, Nuquin Papan chiaid chuibante shubu iquec, qesho tantiash Tesadonica caid yacno Pabadobēd icquido tabadpanēdash.

²⁻³ Ambo tabadec isadaidbo iccuededte badiadēn abi nidteniacpadec Nuquin Papan chiaid chuibante shubu yacno choshon Pabadon Esus tantiamenuen Nuquin Papan ēnden chiampid chuibampanēdash. Nuqui icsaid bedshunash abided cuidadec Esuquidistu unēsaid ambi uincuemetequid Nuquin Papan Chomiaidquio nec. Aidi nuqui Quidistu caid neoaic, quequin chuipanēdash Pabadon. Sabado 3ted matamequin adomboen chuibampanēdash.

⁴ Aden chuibanaqui Esus tantiaquid utsi-utiec yampanēdash. Nēidic, isadaidbo utsi-utsiec; utsibic, Nuquin Papa tantiaquido quidieco matses dadpen; utsibic, anocquido chuiquid dapabon chido utsi-utsiec aido Esus tantiaquid yampanēdash.

⁵ Aden Pabadon chuibanac Esus tantiaquid dadpen yansho isash isadaidbo ut-sibo nēishun utsibon piucquid bednuequin aton na sambanshun ismiacno nidshun tantiesabo, icsambocquid dadpen, iccuededmeshun aidotsen nēishmiac natia chushquecuededpanēdash. Adec chushquec nidequi Pabadobēdta Sidas bednuec Ason cuēmēdquidēn shubuno puduedec nidpanēdash.

⁶ Ambo choshon Pabadobēd Sidas nibēdsho isun Esuquidistu tantiaquido Asombēd icquido bedshun abi chuiquid dapabo yacno Pabado chieshēnquidon buanec abi chuiquid dapabo yacno choash: —Nidaid utsi-utsiec yacno capucuenequin chuitemaidd chuibanquido nēmbo

⁷ choacsho Asonēn aid daēd yuedaccosh. Nuqui ancaquid Sesadēn chiaid niacquin ancanquid utsi Esus cuēmēdquid iquec, quequin chuibanec —quepanēdash Pabado chieshēnquido abi chuiquid chiec.

⁸ Aden, Ancanquid utsi iquec, quequin Pabadobēdta Sidasēn chiec, qesho tantiash chuiquid dapabo iccuedquidobēd comapenec chushquecuededpanēdash.

⁹ Adtanec abi chuiquid Asombēd icquido caic: —Nēbi, ¿Atotsi tantiaquin Pabadobēdta Sidas yuedo? quequin mihi chuimetiapimbo iquembi. Yuecshun mihi chomeshun chuimembi. Ēmbi chuimiabi Tesadonica yacnoēsh nidenda. Ēmbi chiacpaden nanuequin piucquid ēbi mene —capanēdash Tesadonica yacnoquido chuiquid dapabon Asombēd icquido chuiquin. Adoaquien piucquid meniac bedshun: —Miñ shubuno nidtan —cac nidanepanēdash Asombēd icquido.

Bedeya yacnotsen tabadaid

¹⁰ Adshumbic bednushe qeshun aid inchēshēmbi Tesadonica yacnoquido Esuquidistu tantiaquidon Pabadobēdta Sidas shubu dadpen icquid Bedeya caid yacno nidmepanēdash. Aden nidmiac Bedeya yacno choash tabadec Nuquin Papan chiaid chuibante shubu yacno Pabado nidpanēdash.

¹¹ Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ēnden dada uamiampid Pabadon chuibanoasho tantiashun bēdambocquid icquin, Abimbobida chuibanoshe. Isbono, quequin Nuquin Papan chiampid isbanisbampanēdash Bedeya yacnoquidon.

¹² Aden isbanec, Abimbo caic, quiash Esuquidistu tantiaquid dadpen isadaidbobēd isadaidpembo Esuquidistu tantiaquido yampanēdash. Adecbidi isadaidpembo chuiquid dapabo quidieco matses utsi-utsiec aton chido chedobēd Esuquidistu tantiaquid yampanēdash.

¹³ Adnubien, Bedeya yacnoshontsen Pabadon chuibanec, qesho tantiash Tesadonica caid yacnoquido, isadaidbo, Asombēd icquido bedmeboedo, Bedeya yacno choshon anocquidotsen nēishmiac comapenec chushquecuededpanēdash.

¹⁴ Adsho tantiashun Esuquidistu tantiaquidon Bedeya yacnoquidon acte dapa cuēmāno Pabado nidmepanēdash. Adnubi Sidasbēd Timoteyo nidenquio yec Bedeya yacno tabadnubien

¹⁵ Bedeya caid yacnoshon utsibon bēyucanquin Pabado buampanēdash. Aden buanec nidequi shubu dadpen icquid Atenas caid yacno chopanēdash. Ambo choash abia bēyucanquido: —Ēbi chobocnobidi Bedeya yacno nidoaibi —qesho tantiashun Pabadon:

—Mibi yacno choash, Badedquio Atenas yacno chota, quiosh Pabado, quequin Sidasbēdta Timoteyo chuita —capanēdash. Aden Pabadon chiaquien Bedeya yacnoquido abi yacno nidoapanēdash.

Atenas yacnotsen Pabado tabadaid

¹⁶ Abia bëyucanquido Bedeya yacno nidambi Atenas yacno Pabado tabadquin, Sidasbëd Timoteyo choec, qeshun cainec capuquimbi Atenas yacnocquidon nacnenaïd isbampañëdash. Aidon Nuquin Papan uaidbimboecnuc nacnenaïd dadpen tabëcaïd papa cain cuënaïd ambi tantiaïdo icsho isash, Nuquin Papa Abentsëcquiobi iquec, quequin tantiesa Atenas yacnocquido nec, quequin tantiec Pabado unësquïo yampanëdash.

¹⁷ Adec unësquïo yec Nuquin Papan chiaïd chuïbante shubu yacno nidshun Esuquïdistu tantiamenuen Nuquin Papan chiampïd Pabadon chuïbampanëdash. Adem-bïdi anocquïdon piucquïd bednuen aton na sambanshun ismiacno nidshun adom-boembïdi Pabadon chuïbanoapanëdash. Isadaïdbobëd onquequin Esuquïdistu Pabadon chuïpanëdash. Adembïdi isadaïdpembobëd onquequin Esuquïdistu chuïoapanëdash.

¹⁸ Anoshon chuïbansho tantïash epicudeyo cuëmëdquïdën chuinëdacpaden tantiaquïdo Pabadobëd onquepanëdash. Adembïdi tantïash estoïco cuëmëdquïdën chuinëdacpaden tantiaquïdo Pabadobëd onquepanëdash. Aïdo Pabadobëd onquequin Pabadon Esus chuïsho tantienquïo yec: —¿Atodain comapenec onquequin nëïd dadan chuïpash? —quepanëdash. Adnubien utsi: —Matses utsïbon papa cain cuënaïd chuïbanec nepanui —quepanëdash. Pabadon Esuquïdistu unësash uincuenaid chuïsho tantïash adpanëdash.

¹⁹⁻²⁰ Adec onqeshumbic, Utsin tantiaïd tantïanu, quec Adeyopaco caïd yacno iccued-ednuequïdon bëyucanquin bëash Pabado: —Mimbi chiaïd ëmbi tantïacmaïd nec. ¿Mïda-padquïdquïo mimbi chuïbaneque? Tantïanu. Chuïban —quepanëdash abi bëquïdo caïc.

²¹ Abi bëquïdo Adeyopaco caïd yacno nidash Atenas yacnocquïdo dadpen utsi-utsïec yacnoësh cho-choquïdo badiadquïdën-badiadquïdënquïec utsin-utsinquïen ambi tantïacpaden chuïbansho tantïanuec iccuededpanëdash.

²² Aden mimbi tantïacpaden chuïbanta caquïen nënantanquïo nidtoshon naden Pabadon chuïbampanëdash: —Chuïbanu. Tantïata. Mïmbi papa cain cuënaïd mimbi tantiaïd iquec, quequin tantïembi.

²³ Capucuenequin mimbi tantiaïdbimboecnuc nacnenaïd dadpen isombi. Mïmbi papa cain cuënaïd dadpen tabëcaïd icnubi mimbi cuënacmaïd abentsëc iccosh. Aïd mimbi cuënacmaïd icnuc abïbimboecnuc nacnenaïd nibëdosh. Aton shubumpiuidtsëqui iccosh. Mïmbi cuënacmaïd mimbi tantïacmaïd mïbi chuïbanu. Tantïata.

²⁴ “Ëmbi Nuquin Papa cain cuënaïd nidaidbëdtabi abu uashumbic aïdënquïocquïdtedi uaquïdquïo nec. Abïtedi uaquïdquïo yec abïtedishun icombo aïdi nec. Aïdi tabadmenuëquin matsesën shubu uashunaïdën tabadesa nec.

²⁵ Aïdi abïtedishun Icho icnuc abïtedi aton na nec. Adquïd icsho, Con na mïbi menenu, matsesën aïd catïapimbo iquec. Aïdën tantïacpadec ëbïtedi nëmbobi tabadebi. Aïdën tantïacpadec ëbïtedi tïboquebi. Aïdën tantïacpaden ëbïtedishun bedbanoaimbi.

²⁶ Aïdëmbi bëyuc dada uampïdën tsyuecquïdo ëbïtedi nec. Aïd bëyuc dadan tsyuecquïdo dadpen yanash matses utsi-utsïmboec dadpen iquec. Adquïd yec nidaid utsi-utsïec yacno tabadquïdo nec. Nuquin Papan tantïacpadequï seta taënuëc ue yanendac. Adecbïdi, ïchështanec badiadoaïc. Adecbïdi, ushë nidash choaïc.

²⁷ Aïdëmbi naden tantïec: Matses tantïaquin abïtedi uaquin nashundenembi. Aden ambi matses abi tantïaquin nabanaïd isash matses, ¿Tsuntsin nabanaïd nepec? qeshun ëbi tantïaquin Icho ëbi capec, quequin tantïaquin Nuquin Papan nuqui nashunec. Aden nashunquin Nuquin Papan nadatïambocquïn nabanaïd nuqui ismedenec.

²⁸ Aïdën nac tïboquequïd ëbïtedi nebi. Aïdën nac capuquïdbïdi ëbïtedi nebi. Adem-bïdi min matsesën dada uampïd adomboen chiaïd nad iqueque. Tantïa. Chuïnu: Nuquin Papan bacuëbo ëbïtedi nebi, quequin min mëdimbon chuïpanëdash.

²⁹ “Nuquin Papan bacuëbo ëbïtedi iquec tïboquequïd icquin matsesën nacnenaïd tïboquesa papa cain cuënenquïoctïadquïdi matses nec.

³⁰ Ënden matsesën ambi nacnenaïd aden cuënscho tantïash Nuquin Papa, Chën. Adoenda, quenquïocboedi nëbi, Mïmbi icsamboen tantiaïd ënta, quequin chïec.

³¹ Matsesën naïd chuïbante ushë chonoc matses icsaïdbëdta ambi bëdamboen naïd chuïbanquin Nuquin Papan chomeshun matses icmïaïdën cuïdبانendac. Ambï abï-padquïd matses icmïaïd, Nuquin Papan matsesën naïd chuïbanquïd icmenu caïd unësacsho isun ambi chiampïcpaden nanuequin Nuquin Papan uincuemepondash —quepanëdash Pabado Adeyopaco yacno iccuededquïdo Esus tantïamenuëc.

³² Adec aïdi unësacsho Nuquin Papan uincuemepondash, quequin Pabadon chuïsho tantïash utsi-utsïec mamënsnumënubi utsi-utsïec: —Aïdën chuïboed padpïden tantïanuna —quepanëdash.

³³ Adoauquïen, Pabado Adeyopaco caïd yacnoësh nidpanëdash.

³⁴ Adec nidshun yuec ushquin chuisho tantianu quec Pabado bēd iccuededquin utsinquin padpiden-padpidemboen tantiabededpanēdash. Aden Pabado chuibanac utsi-utsiec Esuquidistu tantiaquid yampanēdash: Nēidic, Dionisio cuēmēdquid Adeyopaco caid yacno iccuededquido chuiquid nepanēdash. Utsibic, chido Damadis cuēmēdquid adecbidi Esuquidistu tantiaquid yampanēdash. Aidobēd utsi-utsiec Esus tantiaquid yampanēdash.

18

Codinto yacno Pabado tabadaid

¹ Adec Atenas caid yacno tabadash auēshquio puduanec nidec shubu dadpen icquid Codinto caid yacno Pabado chopanēdash.

² Ambo isadaidbo Aquida cuēmēdquid nidaid Ponto caid yacnoshon tishaid Pabado istuidpanēdash. Isadaidbotedi nidaid Itadia yacnoēsh nidtan, ancanquidēn cac aton chido Pidisida cuēmēdquid bēd Codinto yacno choash Aquida icpanēdash.

³ Nidaidēn capuquid yua bitsi shubumpi nacnenquid abipadquid Aquidabēd aton chido icsho isun aidobēd tabadquin Pabado shubumpi nacnēpanēdash.

⁴ Codinto yacno tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabado chuibanpanēdash.

⁵ Ambo tabadnubi Sidasbēd Timoteyo nidaid Masedonia yacnoēsh choambic shubumpi nacnenenquiocquin isadaidbo Esuquidistu tantiamenuen Pabado chuibanpanēdash.

⁶ Adsho, Aid tantiatipi, quequin isadaidbon Esuquidistu icsamboen chuisho tantiaash abi daēd dasiuidaid bēntsecquid chicshun ishcunec Pabado: —Esuquidistu mibitedi chiombi. Aid tantiesa yec unēsash Nuquin Papa yacno puduedenquio mibitedi iquendac. Adquid Nuquin Papan cuidquin nēsecatequid nendac. Nēbi padpiden mibi chienquio iquembi. Isadaidpembon tantiatias, quequin aido chuibanembi —quepanēdash Pabado isadaidbo tantiesa chiec.

⁷ Aden chiasic Nuquin Papan chiaid chuibante shubu yacnoēsh puduenanec aid dayuntsēqui shubu icquidēn Pabado puduedpanēdash. Aid shubu icbo Usto cuēmēdquid Nuquin Papa tantiaquid icpanēdash.

⁸ Uston shubunoshon Esuquidistu Pabado chuibanac Quidispo cuēmēdquid Esuquidistu tantiaquid yampanēdash. Aidi Nuquin Papan chiaid chuibante shubun iccuededquido chuiquid dapa icpanēdash. Aidbēd aton shubun icquidtedi Esuquidistu tantiaquid yampanēdash. Adecbidi Codinto yacnocquid dadpen Esuquidistu tantiaquid yampanēdash. Adsho adquidtedi acten mentobampanēdash.

⁹⁻¹⁰ Adashic, yuecash inchēshēn Pabado usho Nuquin Papa: —Codinto yacnocquid dadpen Esuquidistu tantiaquid yanendac. Aden ěbi chiac dacuēdenquiocquin comapenen chuideneta. Mibi dayun uaquidquio nebi. Aden dayun uasho ěbi tantiesabon mibi natiametiapimbo iquendac —quepanēdash Pabado caic.

¹¹ Aden chiac Codinto caid yacno seta abentsēc matamias ushē 6ted nidmec tabadquin Nuquin Papan chiaid Pabado chuidonepanēdash.

¹² Adnubien nidaid Acaya caid yacnocquidon chushcaid chuisho tantias, matses icsambocsho cuidte chuiquid Cadion cuēmēdquid icnubi isadaidbon Pabado bedshun abi chushcaid Cadion chuinen buampanēdash.

¹³ Ambo bēquin puduedmiash: —Ancanquidēn chiaid niacquin matsesēn tantiatemaid nēid dadan chiōsh —quepanēdash Pabado chieshēnquido Cadion caic.

¹⁴ Adoaquien Pabado onquetsenubi Cadiomba onquedopanēdash: —Tantia, isadaidbo. Mibi chuinu. Nēidēn icsamboen nabanaid mibitedishun ěbi chuisho tantiatiambi.

¹⁵ Aden chienquio yec, Nēidi mibi onquiaidbēdta min matsesēn Nuquin Papa cain cuēnaid icsamboen chuiquid nec, mibi quepec. Adecbidi, Mimbi natemaid chuiquidquio nēid dada nec, mibi queoapēc. Aden mimbi chuisho tantias, ěbi chienda caimbi. Domanobo chuiquidēn naden nata quequin chiaid niaquesa nēid nec, quequin isembi. Aden ěbi isac mibi chushquiaid mibi chuiquid yacno nidshun chuitanta.

¹⁶ Aden chuishumbic Cadionēn: —Aidtedi umanuc puduemeta —cac isadaidbo Pabado bēboedo Cadionēn namiaidon puduempanēdash.

¹⁷ Adoac puduenshumbic Nuquin Papan chiaid chuibante shubun iccuededquido chuiquid utsi Sostenes cuēmēdquid bedshun isadaidbon comapenen cuespanēdash. Adoshō isun chiac Cadion, icsamboen naic, quenquio yec otacquio tsadpanēdash.

¹⁸ Adnubien Codinto caid yacno yuec tabdashic Esuquidistu tantiaquido nianec nidaid Sidia yacno nidoaic Pabado puduampanēdash. Abēdi Aquida aton chido chedobēd Codinto yacnoēsh nidec shubu dadpen icquid Senquedeya caid yacno chopanēdash. Ambo

tabadquin, Nuquin Papan ěbi dayun uaid cuidquin Edusaden yacno choshon piucquid menembi, quequin ismenuequin aton manědaid Pabado matasmepeanědash.

¹⁹ Ambo ushě abentsěc nidmec tabadash cano antabědtoanec acte dapa potiash Epeso yacno choshon Aquida aton chido chedoběd, Němbobi tabadnu, quepanědash. Adsho tantiaishun aid daědi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibampanědash Pabado.

²⁰ Aden chuibansho tantiaishun: —Adomboembidi chuibanuec ĵada ěběd yuec tabadtsia? —iccuededquidon caquien: —Něbi padenquio iquebi.

²¹ Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auěshquio puduanec nidequi cano antabědtopanědash Pabado.

²² Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanědash.

²³ Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auěshquio nidequi nidaid Pidiquia caid yacno choash tabadquin Esuquidistu tantiec iccuededquid dadpen bědamboen tantiamenuen chuibanopanědash Pabado.

²⁴ Adnubien isadaidbo Apodos cuěmědquid shubu dadpen icquid Adecañdedia caid yacnoěsh Epeso yacno chopanědash. Aidi dadpen tantiaquid yec Nuquin Papan chiampid tantiaquid nepanědash.

²⁵ Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanědash.

²⁶ Aidi Nuquin Papan chiaid chuibante shubu yacno nidshun dacuědenquiocquin ambi tantiaid chuibampanědash. Aden chuisho tantiaish, ěbi yacno isec cho, qeshun Aquidan aton shubu yacno buanshun Esuquidistu choaid ambi nadatiambocquin naidbědtabi abi uněshas uincuenaid chuibampanědash Aquidabědtan aton chidon Apodos tantiamequin.

²⁷ Aden Esuquidistu bědamboen tantiaish Epeso yacno yuec tabadquin Esuquidistu Apodosěn chuibampanědash. Adece yuec tabadquin chuibanashic, Nidaid Acaya caid yacno nidnu, quepanědash. Adece nidnuesho tantiaishun, naden dada uashun Apodos menepanědash Epeso yacnocquidon: Něid dada uaid sananquid Apodos cuěmědquid Esuquidistu tantiaquid nec. ěměbi isaid neque. Yuedta, quequin dada uashun, Apodos Epeso yacnocquidon menepanědash ma nidaid Acaya caid yacnocquido Esuquidistu tantiaquido Apodosěn menenu, qeshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bědamboen tantiamenuen chuibampanědash.

²⁸ Aden chuibanquimbic isadaidbo Esuquidistu tantiesabo icsho isun aběd onquequin, Esuquidistu Nuquin Papan Chomiaid nec, quequin Nuquin Papan chiampid Apodosěn chuibampanědash.

19

Epeso yacno Pabado aběd icquido tabadaid

¹ Codinto yacno Apodos icnubi Pabado nidaid Pidiquia caid yacnoěsh puduanec podquěděn choec macuěsh dapa decatocuětsenec shubu dadpen icquid Epeso caid yacno choapanědash. Ambo choshon Esuquidistu tantiaquido istuidshun:

² —ĵEsuquidistu tantiaquido icshoda Nuquin Papan aton Mayan mibitedi menepanědash? —capanědash Pabado.

Adoquien: —Nuquin Papan Mayan iquec, quequin tantiamboccombi —quepanědash Epeso yacnocquido.

³ Adoquien Pabado: —ĵAtotsi canuen mibi acten mentobampanědash? —quepanědash.

Adoquien: —Uan padon chiaid tantiaquid icsho acten mentondashi —quepanědash Epeso yacnocquido Pabado chiec.

⁴ Adoquien: —Mibi icsaid ěnta, qeshun abimbo tantiaquidtedi acten mentobanquin, ěbi tsibanec choquid Esus tantiaquid icta, quequin Uan padon chuipanědash —quepanědash Pabado Epeso yacnocquido chiec.

⁵ Aden chiac, Esuquidistu tantiaquid nebi, quequin Epeso yacnocquidon chuisho tantiaishun padpiden acten mentomepanědash.

⁶⁻⁷ Aden aidtedi acten mentoacsho mědanten Pabado mamishbanac aid doseted Nuquin Papan aton Mayan menepanědash. Aden meniac abi onquiaicmaiděnquio onquec Nuquin Papan chiec cuěděmpanědash Epeso yacnocquido.

⁸ Adashic Nuquin Papan chiaid chuibante shubun puduedshun Pabado Nuquin Pababêd tabadaid chuibampanêdash. Cuembo tantiamenuquin ushê choaid 3ted nidmequin badiadquidên-badiadquidênquien dacuêdenquiocquin Nuquin Papan chiaid Pabado chuibampanêdash.

⁹ Aden chuisho tantiash pamumêdacimboec tabadquin, Tantiatiapibi, quequin utsinutsinquien chieshêmênquioquin Esuquidistu icsamboen chuipanêdash. Aden chiac Esuquidistu tantiaquidobêd Pabado, Nidnu, quianec Nuquin Papan chiaid chuibante shubu yacnoêsh puduanec nidec Tidano cuêmêdquidên chuibante shubu yacno choshon adomboembidi tantiamenuen matsesbêd onquequin Nuquin Papan chiaid chuibampanêdash.

¹⁰ Seta daêd matamequin adomboembi chuibampanêdash Pabado. Aden chuibansho tantiash nidaneshun chiac nidaid Asia caid yacnocquidon tantiapanêdash. Adoac isadaidbobêd isadaidpembo Esus tantiaquido yampanêdash.

¹¹ Epeso yacno Pabado tabadsho Nuquin Papan nadatiambocquid icmiacscho

¹² Pabado dada cuêscashun dashcute cuêshê buanshun daicsaid mishbanac bêdampanêdash. Adembidi Pabado dada cuêscabanaidên nênquid mishac bêdampanêdash. Adembidi pashuaidtsen pamishac bêdanoapanêdash. Adembidi mishac mayan icsa dapuduempañêdash.

¹³ Adnubien mayan icsa dapuduenuen Pabado chiapaden tanquin isadaidbo utsi-bon: —Esus Pabado chuiboedênquio dapuduen —capanêdash.

¹⁴ Pabado tanuequido isadaidbo chuiquid Esqueba cuêmêdquidên mado 7ted icpanêdash.

¹⁵ Aden chiaquien mayan icsa: —Esus iquec, quequin êmbi tantiaid aidi nec. Pabado iquec, quequin êmbi tantiaidbidi aidi nec. ¿Mibitedi tsutsi neque? Tantienu. Chui

¹⁶ —qeshun nebduquin dashcute ched-chedcapamboen mayan icsan cuesactaniaqui shubu nuntanuêsh puduanec cuempañêdash Esqueban mado.

¹⁷ Adec cuensho isquidon chiac Epeso yacnocquid isadaidbobêd isadaidpembo dacuêdcuededpanêdash. Adec dacuêdquin, Dacuêdampambo iquec. Esuquidistu bêdambocquid nec, quequin tantiabededpanêdash.

¹⁸ Esuquidistu tantiesha icboedi Esuquidistu tantiaquid yanec dacuêdenquio yec Esuquidistu tantiaquido iccuededacno nidshun abi icsaid chuibampanêdash.

¹⁹ Adquid dadpeshun icsamenuen ambi ompoquin naid ismenquiocboedombi, Nêbi adquid ictiapibi, quequin cuête dêtsiadotanquin ambi ompoquin tantiamiaid dada uatetedi tantianuen bedash utsitsen icsabudnushê qeshun abitedi tauipanêdash. Aden tauiboed menequin piucquid dadpen bedtsindac, quepanêdash.

²⁰ Aden abi icsaid dada uate tauisho isquidon chuibanac Esuquidistu tantiaquid dadpen yampanêdash.

²¹ Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpen icquid Doma caid yacnotsen nidtiadquio iquebi —quepanêdash Pabado.

²² Aden chiash Asia caid yacno abi tabadquin Masedonia caid yacno abia Timoteyobêdta Edasto nidmepañêdash Pabado.

²³ Aid daêdi nidan Epeso yacno tabadquin Esuquidistu Pabado chuibanaquien tantiesabo nêishpanêdash.

²⁴ Adquid Demetedio cuêmêdquid Diana caidbimboecnuc nacnemequid icpanêdash. Aidêmbi ambi nacnemaiid menequin piucquid dadpen bedbampanêdash.

²⁵ Aden Esuquidistu tantianu quesa icquin ambi Dianabimboecnuc nacnenta caidobêdta abipadquid Diana nacnemequid utsibo iccuededmeshun Demetediôn nadopanêdash: —Nuqui tantiaid Dianabimboecnuc nacneshun menequin piucquid dadpen nuqui bedbanec.

²⁶ Aden nanubi nidaid utsi yacnoêsh Pabado cuêmêdquid nêmbô choshon utsi comapenen chuibanac Epeso yacnocquid dadpembêdta nidaid Asia caid yacnocquid dadpeshun tantiec. Dianabimboecnuc nacnenaid tiboquesa iquec. Adquid matsesên tantiaid abimbo ictiapimbo iquec, quequin Pabado chiec.

²⁷ Aden chiac matses dadpeshun tantiash Dianabimboecnuc nacnenquido icsambo iquec, quetsiash êbitedi caic. Adecbidi, Dianabimboecnuc nacnenaiddêd abi tabadê shubu uashunaid icsambo iquec, queoapec. Adecbidi Dianabimboecnuc nacnenaid tiboquesa icsho matsesên tantienquio ictiadquidi nec, queoapec Pabado. Aden chiac nidaid Asia yacnocquidon dadpeshun Diana tantiaboedombi padenquio yampec. Aidêmbi tantienquio yanshun aidbimboecnuc nuqui nacnenaiddêd bedênquio iquendac —quepanêdash Demetedio.

²⁸ Aden chiac ambi chomeboedtedi, Piucquid ëbi menequin ëmbi nacnenaïd matsesën padpiden bedenquïo ictsiash, quec nëishash: —Epeso yacnocquïdon tantiaïd Diana bédambo iquec —quec comapenec cuëdcuededpanëdash.

²⁹ Adec comapenec cuëdcuededsho tantiaish Epeso yacnocquïd utsibo aidobëd cuëdcuededpanëdash. Adec cuëdcuededquin nidaïd Masedonia caïd yacnoësh Pabadobëd choboeð Cayobëdta Adistadico bedshun iccuededte shubu yacno cuëdcuededquïdon buampanëdash.

³⁰ Aden aid daëd bedshun buansho isquïdën chiac Pabado, Iccuededte shubu yacno nidnu, quesho tantiaishun: —Padi. Ambo nidenda —capanëdash Esuquïdistu tantiaquïdon. ³¹ Adembidi, anocquïdo chuiquïd utsin-utsinquien Pabado chuiopanëdash.

³² Adnubien cuëdcuededquïdon Cayobëdta Adistadico bedshun buansho isash matses dadpen. ¿Atotsieshun aid daëdi bëo? quequin tantienquïo yec tabadpanëdash.

³³ Adnubien, Nuquï tantiacpadomboen chuitan, quequin isadaïdbon Adecandedo cuëmëdquïd nënantanquïo tsicunepanëdash. Aden tsicunequien nidtoash: —Tantia. Chuïnu —quequin

³⁴ daëdpactsëc chiec onquesho tantiaish onqueboedi ënëdash tabadnubi: —Isadaïdbo aid nec —quesho tantiaish: —Epeso yacnocquïdon Diana caïn ambi tantiaïdbimboecnuc nacnenaïd bédambo iquec —quec baded-badedquïec cuëdcuededpanëdash.

³⁵ Adec cuëdcuededshobien Epeso yacnocquïdon naden nata quequin chiaïd dada uaquïdën ënëdmenequin nadopanëdash: —Epeso yacnocquïdon tantiaata. Chuïnu. Diana caïdbimboecquïd abucuešh paëdaïdbimboecnuc nacnenaïd nuquï comapenen tantiaïdbëdta abi tabadte isquïdo nuquï nec. Adquïd Epeso yacnocquïdo nec, quequin nidaïd utsi yacnocquïdon tantiec.

³⁶ Aden utsibon tantiec, quequin tantiaquin icsamboen nainda.

³⁷ Dada daëd mimbï nëmbo bëboed Diana caïdën shubun puduedamboccosh. Adembidi ampiambo iccosh. Adecbidi, Diana caïd chiec icsamboec onquenquïoccosh.

³⁸ Adenquïo icnuc Demetediobëd icquïdo abi chushquiaïd chuïnuec Epeso yacnocquïdon naden nata quequin chiaïd tantiaquïd yacno nidshun

³⁹ mimbï tantiacpaden chuita cuëdcuededenquïocquin.

⁴⁰ Comapenec cuëdcuededec quesho tantiaish ancanquïd dapan Epeso yacnocquïdo bédamboen tabadmeta caïd yacno nidshun chiac, Ancanquïd dapan chiacpadec Epeso yacnocquïdo tabadenquïo iqueque. Cuëdcuededquïdo chome, nuquï catsiash. Aden chomiaç ¿atotsi nuquï chuïpe?

⁴¹ Aidën nuquï chomenushe quïash min shubuno nidaneta —capanëdash Epeso yacnocquïdon naden nata quequin chiaïd dada uaquïdën. Aden chiac Demetediobëd iccuededquïdo nidanepanëdash.

20

Masedonia yacnocquïdo isbidanec nidequï Quedesia yacnocquïdo isbidanec nidaïd

¹ Natia cuëdcuededboedo nidanian Esuquïdistu tantiaquïdo chomiaç Pabado: —Nidaïd Masedonia caïd yacno nidoaïbique. Bédamboec tabadta —quianec Epeso yacnoësh puduanuc abëdi nidondabi.

² Auëshquïo puduanec nidquin nidaïd Asia caïd yacnocquïd utsi-utsien chuïbidanec nidaïd Quedesia caïd yacno choapondash Pabado.

³ Ambo choash ushë abentsëc chotsëcnuc nidmec tabadash: —Nidaïd Sidia caïd yacno nidnu —quepondash. Adsho tantiaishun: —Ambo nidaçsho mibi cuesunenuequin isadaïdbon cainec —cac nidaïd Masedonia caïd yacno Pabado nidoapondash.

⁴ Nidaïd Masedonia caïd yacno choash Pabado tabadnubien abëd capuquïdo bëyucanec nidaïd Asia caïd yacno nidpondash. Abëd capuquïdo nëïdted icpondash. Nëïdic, shubu dadpen icquïd Bedeya yacnoësh choquïd Sopated cuëmëdquïd; utsibo shubu dadpen icquïd Tesadonica yacnoësh choquïdo Adistadico cuëmëdquïdbëd Secundo cuëmëdquïd; utsibic, shubu dadpen icquïd Dedbe caïd yacnoësh choquïd, Cayo cuëmëdquïd; utsibobi, nidaïd Asia yacnoësh choquïdo: nëïdic, Timoteyo cuëmëdquïd, utsibic Tiquico cuëmëdquïd, utsibic Tedopimo cuëmëdquïd. Aïdtedi icpondash.

⁵ Aïdtedi bëyucanec Asia yacno nidec shubu dadpen icquïd Todoas caïd yacno choash tabadquin Pabado caïmpondash.

⁶ Aïdtedi nidan pan nami uainquïoctequïd pete ushëtedi tantiec tabadanec Pabadobëd cano antabëdtoanec nidec 5tedec ushun bëyucamboed istuïdpondash. Ambo shubu dadpen icquïd Todoas caïd yacno 7tedec ushec Pabadobëd icquïdo tabadoapondash.

⁷ Todoas caid yacno tabadequi dominco ushën Esuquidistu tantiaquidobëd iccuédquín Pabadobëd icquidon Esuquidistu unës uate tantiaquin pan cuësh-cuëshun pebededpondash. Aden piashic Pabado, Badiadash nidebi, quíash yuec onquepondash inchëshpotsambo yantsëcquiec.

⁸ Aid onquiaco shubu abentsëquën tacpan uaid 3tedi icpondash. Abuc tacpan yacno dectatoash quënën tabadnubi tabote dadpen chënquepondash.

⁹ Pabado onquenubi nëbi caniaid, Eyutico cuëmëdquid, iste shëcuë yacno tsadec ush-casmash ushtotanec abucucësh paëdpondash. Adece paëdsho isash bud-budshun unësacsho isbedednubien

¹⁰ Pabadotsen budquin dayumbudec: —Unësboedi abi tiboquianeque. Shubicuededenda —quepondash.

¹¹ Aden chiash abuc quënë yacno padpidec dectatoashun abitedishun pebededpondash. Aden piash tabadec Pabado utsibëd onquecuededpondash badiadbudtsëcquiec. Adece badiadbudbon Pabadobëd icquido shubu nuntanucësh puduem-puduenubien

¹² paëdboed aton shubuno utsibobëd nidpondash bëdambo yec.

Todoas yacnoësh puduanec Mideto yacno chote

¹³ Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh abëd capuquid utsibobëd puduanec nidequi cano antabëdtoanec Ason yacno nidoapondabi.

¹⁴ Adece nidequi Ason yacno choshon istuidac Pabado ëbëdi cano antabëdtoanquin potiash shubu dadpen icquid Mitidene caid yacno choapondash.

¹⁵ Auëshquio puduanec nidece badiadash acte nënantan nidaid nactëdquid Quo caid datambidanec nidash badiadash acte nënantan nidaid nactëdquid utsi Samos caid datambidanec shubu dadpen icquid Mideto caid yacno choapondash.

¹⁶ Ambo choash: —Edusaden yacno badedquio nidebi. Adece ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaid-bon chidon bëyuc tishampid dada bacuë unësmenquiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

Epeso yacnocquido tsusiobo Pabado chuibanaid

¹⁷ Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabado chomepondash.

¹⁸ Aden chomeshun naden aido chuipondash: —Chiembique. Tantiata. Èbi ënden nidaid Asia caid yacno choash mibëd yuec tabadquin nabanaid mibitedishun istenepondac.

¹⁹ Isadaidbo utsibon Esuquidistu tantiesia icquin cuesunete bunquin mëyampondashi. Aden mëyanaqui Nuquin Icbon ëbi chuibeneta cacpaden ëbi bunaid tantienquiocquin ambi chiaid mibitedi chuibanondambi. Tantiesia icsho isash shubiquiondabi.

²⁰ Esuquidistu mibitedi bëdamboen tantiamenuen matses dadpen iccuededacnoshon chuibanondambi. Adembidi shubu utsin-utsinquec puduedcuenequin chuibanondambi.

²¹ Nuquin Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëdta isadaidpembu chuibanondambi.

²² “Aden chuibanshobi Nuquin Icbon Mayanën: Edusaden yacno nidta, quequin chuioaposhi. Aden aidën chuibocpadequi nidebi. ¿Atotsi ëbi capatsiash Edusaden yacnocquidon? quec dacuëdenquio yec nidebi.

²³ Shubu dadpen yacnoshon-yacnoshonquien Nuquin Papan Mayanën ëbi naden chuided-chuidedec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioshi.

²⁴ Aden Nuquin Papan Mayanën chuisho tantiasi, Èbi cuesunepanundac, quenquio yec Edusaden yacno nidoaibi. Esuquidistun ëbi chuibeneta cacpaden naimbudquin utsi-utsiec yacno nidshun Esuquidistu abimbo tantiaquid Nuquin Papabëd tabadte iquec, quequin chuibanembi.

²⁵ “Nëshunquio Nuquin Papan chiaid ëmbi chuibansho mibitedishun tantiabendonaidon nëuëshquio ëbi nidacsho mimbi isoainquio iquendac.

²⁶ Èmbi nëshunquio Esuquidistu mibitedi chuibanac, Esuquidistu chiambo iccoshi, queti-apimbo mibitedi iquendac.

²⁷ Tantienuoctsiash, quenquiocquin Nuquin Papan tantiacpaden chuibanombi.

²⁸ Aden chuibanash nëbi nidebi. Èbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bëdamboen isban icsamboen nabanec tabadnushe queshun.

Nuquin Papan Mayanën aido isbanquin chuiquid mibi icmioshe. Adota. Aido Nuquin Papa yacno tabadmenuec Esuquidistu unëshpanëdash.

²⁹ Èbi nidan abimbo chiacimboen chuiquid Esuquidistu tantiaquido chuiquid icnuec choendac.

³⁰ Adembidi mibëdi iccuededquin utsin-utsinquien Nuquin Papan chiaid abimbo chiacimboen muaquin chiendac. Esuquidistu tantiaquid chuiquidquio icnuequin adoendac.

³¹ Adquid Esuquidistu tantiec iccuededquido cuëshëdmequid neque. Ista. Adquid iquendac, quequin mibëdi tabadquin ênenquiocquin chuibanondambi. Adquid choec, quequin mibitedi chiec shubiondabi.

³² “Bëdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bëdambo icmeshun abëdi tabadmendac.

³³ Mibëd tabadec, Min piucquid bec cho, quesa niondabi. Adecbidi, Min dashcute bec cho, quesa niondabi.

³⁴ Èmbibi shubumpi nacenashun menequin piucquid bedshun con na bedondambi. Adembidi nacenashun bedshun ëbëd capuquido menebanondambi.

³⁵ Adembidi chonoadshun aton na bedshun natiapimbocquid meneta, quequin mibitedi ismabanondambi. Nuquin Icho Esuquidistu nidaidën tabadec nadpanëdash: ‘Utsin natiapimbocsho menequid Nuquin Papan bëdambo iquebi camiaid nendac. Nabanengpio yec bedshumënquidquio icsho Nuquin Papan bëdambo iquebi camenquio iquendac,’ –quequin Esuquidistun chiacpaden Epeso yacnocquido tsusiobo chuipondash Pabardon.

³⁶ Aden chiashic Pabado Nuquin Papa chuinuec utsibobëd danëshën sebudcuededash onquecuededpondash.

³⁷ Aden Nuquin Papa chiec onqueshumbic nidtocuededshun abitedishun Pabardon chuiboed tantiaquin Pabado dayumbededquin shubi uabededpondash.

³⁸ Èbi padpiden mimbi isoainquio iquendac, Pabado qesho tantiash shubicuededpondash. Adec shubiquin dayumbudash unëshquio yec Epeso yacnocquido tsusiobo Pabodobëd cano yacno nidanepondash.

21

Edusaden yacno Pabado nidoaid

¹ Epeso yacnocquido tsusiobo acte cuëman tabadnubi cano antabëdtoanec Pabodobëd capuquido nidquimbi cuebi potiaash acte nënantan nidaid nacrëdquid Cos caid yacno choapondash. Badiadnuc auëshquio puduanec nidec acte nënantan nidaid nacrëdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash.

² Ambo choashic nidaid Penisia caid yacno cano dapa utsin nidnuequid istuidash antabëdtoanec Pabodobëd capuquido nidoapondash.

³ Adec nidquimbi acte nënantan nidaid nacrëdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bëaid icho yacno buamepondash.

⁴ Aden buan-buanubi Esuquidistu tantiaquido yacno nidane puduedash 7tedec ushec Pabodobëd capuquido tabadpondash. Ambo tabadnubi, Edusaden yacno Pabado cuesunenuquid iquec, quequin Nuquin Papan Mayanën tantiamiac aidon, Edusaden yacno nidenda, quequin Pabado chuipondash.

⁵ Aden chiaqui cano icho nidnuesho isash padpidec cano antabëdtoanec, Nidnu, quepondash Pabado. Aid nidnuesho isash Esuquidistu tantiaquido bënëbëdi aton chido aton bacuëbo chedo Pabodobëd acte cuëmano choash Nuquin Papa chiec onquecuededpondash.

⁶ Adec Nuquin Papa chiec onqueshun, Nidec nid, cac Pabodobëd icquido cano antabëdtoanubien Tido yacnoësh acte cuëmano chobedo aton shubuno nidaneaopondash.

⁷ Adec cano antabëdtoanec auëshquio nidec shubu dadpen icquid Todemaia yacno choash Pabodobëd capuquido tabadtuidpondash.

⁸ Adec anocquidobëd tabadec badiadash cano antabëdtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niante meneta caid utsi 6tedibëd Uedipe icpondash.

⁹ Aidën champibo 4tedi aton bënënen bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

¹⁰ Adec Uedipebëd yuec tabadnubi Nuquin Papan naden nanun chiaid chuiquid utsi Accabo cuëmëdquid nidaid Udeya yacnoësh chopondash.

¹¹ Adec choshon Pabodon tsiute bedash tanaiadash mëtanadash Accabo nadpondash: –Nuquin Papan Mayanën naden ëbi chioshe. Tantiata. Chuinu. Ëmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mëtaneshun buanshun, Unës uata, quequin isadaidpembo menendac –quepondash Accabo Pabado chiec.

¹² Aden Accabon chuisho tantiash shubiquin Pabodobëd choboedon Uedipen shubun icquidobëdtan, Edusaden yacno nidenda, quequin Pabado chuiopondash.

¹³ Adoquien: –¿Atotsi canuen shubiquin ëbi icsambo icme? Edusaden yacno nidshun Nuquin Icbo Esuquidistu chuibansho ëbi taneshun unës uatsiash, quequin tantiaquin abi Esuquidistu chuibanuna –quepondash Pabado.

¹⁴ Adoquien, Nidenda, caqui niacbidanec, Edusaden yacno nidebi, queopondash Pabado.

Adec, Nidebi, qesho tantiashun: –Ma Nuquin Icbo bunacpadecec nidpanuna –capondash.

¹⁵ Aden chiashe Sesadeya yacnoësh puduanec Edusaden yacno Pabodobëd capuquido nidoapondash.

¹⁶ Adec nidsho isash Sesadeya yacnocquid Esuquidistu tantiaquid utsi-utsieci Pabodobëd nidquin Menason cuëmëdquidën shubu yacno buanac puduedpondash. Aid shubu icbo Chipide yacnoësh choash Edusaden yacno tabadquid Esuquidistu tantiabenquidbidi nepondash.

Pabodon Acobo isaid

¹⁷ Adec Edusaden yacno choacsho Esuquidistu tantiaquidon Pabodobëd capuquidtedi Pabodobëdtabi yuedpondash.

¹⁸ Aden yuedac tabadash badiadash Acobo isec nidoapondash. Acobobëd Esuquidistu tantiaquido tsusiobotedi icpondash.

¹⁹ Adec nidec ambo puduedshun, Mibi isec chobi, quequin, Ëmbi Esuquidistu chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabodon chuiopondash.

²⁰ Aden chuibanac Nuquin Papan naid bëdambo iquec, quiash Pabado caic nadpondash: –Nëmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec.

²¹ Adquidombo icquin, Min bacuëbon shui dëbid dëtemenda, quequin isadaidpembo Pabodon chiec, qesho tantiash, Nuquin Papan, Naden nata, quequin chiaid niacmequid Pabado nec, quequin icsamboen tantieci aido tabadec.

²² Aden chiec tabadquin mibi nëmbo choaid tantiash mibi cuesunete buntsiash. Mibi cuesunete bumenquio icmenuequin ¿Atotsi nuqui napeba?

²³ Naden nac bëdambo ictsiashe. Tantiata. Chuinu, Pabado. Nëmbo ëbëd icquido Nuquin Papauidi tantieci tabadnuequid daëd-daëdquieci iquec.

²⁴ Nuquin Papan ëbi bëdamboen dayun uadenesho ismenu, quiash nidaid Quedesia yacnoësh, Ëbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacnenuequid piucquid menembi,” quepondac. Nëbimbobi Edusaden yacno mibi choac. Nëid dadatedibëd Nuquin Papa tabadte shubu uashunaid yacno nidshun mimbi ënden chiondacted piucquid meniac, Pabado icsambo iquec, quequin chuiboedombi, Nuquin Papan, Naden nata, quequin chiacpaden naquidquido Pabado nec, quequin tantiatsiash.

²⁵ Embi isadaidpembo Esuquidistu tantiaquid utsibo dada uaquin naden chuioaombi: “Nuquin Papan, Naden nata, quequin chiaid dada uamiampid nëidtedictisëqui mimbi natequid nendac. Nëidic, Nuquin Papan uaidbimboecnuc nacnenuaid tantiaquidon pete sanaid penda; adembidi, min chidouidtsëqui chudta; adembidi chidon min bënëuidi chudmeta; adembidi, nëish cuesaid intacchobi codocaid penda.” Aden dada uabanquin isadaidpembo chiombi –quepondash Acobo Pabado chiec.

²⁶ Aden chiaquien badiadash Nuquin Papa tabadte shubu uashunaid yacno dada 4tedbëd choash Pabado, Nëidted dadabëdtambi ëmbi Nuquin Papan chiacsted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

Pabado bedaid

²⁷ Adashic 7tedec ushquin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoësh choquidon isadaidbon ispondash. Aden isash Pabado bedmete bunec, Isadaidbo utsibo nëishmenu, quec:

²⁸ —Isadaidbotedishun tantiata. Nèidëmbi Nuquin Papa tabadte shubu uashunaidën puduedtemaid isadaidpembo yuedquin nèid shubu bëda icsa uameboed neque. Bednu. Uidën uaic cho —quequin abimbo chiacbimboec onquecuededpondash.

²⁹ Epeso yacnoësh choquid isadaidpembo Tëdöpimo Pabadobëd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

³⁰ Aden chiac, Icsambocquid bednu, quianec titinquec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shëcuë bêtashpondash.

³¹ Aden Pabado buanec, Cuesunenu, quec cuëdcuededsho tantiashun chuitanac

³² abi chuiquidbëd sondado cho-chosho isun Pabado cuesbededquin isadaidbon ëmpondash.

³³ Adec choshon sondado chuiquidën bedtan cac Pabado bedshun shocosh bucin mëtanemepondash. Aden mëtanemiash: —¿Tsutsi nèid nepec? ¿Atotsi icsamboen naosh? — quepondash sondado chuiquid.

³⁴ Adoquien iccuededquid utsi-utsitsëcquien chiec onquecuedednubi utsi-utsitsëcquien utsi uain chiec cuëdcuededpondash. Adec dadpen cuëdcuededsho: —Tantiatiapibi ye. Quënën nauedmenu. Buanec nid —quepondash sondado chuiquid sondado chiec.

³⁵ Aden Pabado buanec nidec nauedte shubun dectatonobi cuëdcuededquidon tsucuscuededtsëcquien Pabado bednuesho isun Pabado abuc cadoanquin sondadon buampondash.

³⁶ Aden cadoanquin buansho isash cuëdcuededquido: —Aidien cuesunetiad —quepondash sondado chuiquid chiec.

Ambi nabanaid iccuededquido Pabadon chiaid

³⁷ Adec abi buanec shubun puduedtsenubi Pabado: —¿Ada ëbi onquesho tantiatsia? — quepondash Quidieco matsesën onqueten Pabado sondado chuiquid chiec.

Adoquien: —¿Quidieco matsesën onqueten onquequidta mibi ne?

³⁸ Chuiquid dapa icnuequin Equipito yacnocquid matses dadpen cuëte nibëdacno buanaccondaidien nechitec, qeshun mibi bedombi.

³⁹ Adoquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

⁴⁰ Adoquien: —Ai, onqueta —capondash sondado chuiquidën.

Adoac abuc dectatoten nidtoash nidec, Otacquoio tabad, quequin ismequin Pabadon mëdante uic-uiccapondash. Aden nasho isash isadaidbo otacquoio tantiec tabadsho isash: —Ebedeyon, nuquin onqueten mibi chuinu —quec nadec Pabado onquedopondash:

22

¹ —Ëmbi naid mibitedi chiembique. Isadaidbo tsusiobobëdtan isadaidbo utsibon tantiata.

² Adec aton onqueten Pabado onquesho tantiash isadaidbo otacquoio tantiec tabadpondash.

³ Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquoio tishaqui Edusaden yacno choash canipondabi. Adec nëmbo Edusaden yacnoësh canidosho nuqui tantimequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi.

⁴ Aden nabanquin Esuquidistu tantiaquido Nuquin Papan chiaid niacquido nec, quequin dadabëdta aton chido chedo bedmeshun mëyamequin quënën nauedmeshun unës uamepondambi.

⁵ Ëmbi adobanquin naondaid tsusio dapatedishun tantiec. Adondash, quequin chuitiadquo icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bëmenu, qesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

⁶ “Adash, ushë abuctoan Damasco caid anoentsëqui choshobi abucuësh shocosh tabote dapa bed-bedquiabimboec chënquequin dëcatepondashi.

⁷ Adec chënquequin dëcatiac nidaidën paëdshun nadec abucuësh onquesho tantiapon-dambi. ‘¿Atotsieshun ëbi mëyane, Saudo? Ëbi chui. Tiantianu,’ capondashi.

⁸ “Adoquimbi: ‘¿Con Icbomboda mibi ne?’ capondac.

“Adoquien: ‘Nasaded yacno iccondaid mimbi mëyanaid Esus nebi,’ capondashi.

⁹ “Adnubic ëbëd icquidon shocosh bed-bedquiabimboec chënquesho isequi con Icbon chuisho tantienquoio yec tabadpondash.

¹⁰ “Aden dëcatiac uequin ëmbentsëqui tantiec: ‘¿Atotsimbi nape, Icho?’ quepondabi.

“Adoaquien: ‘Nidtoash Damasco yacno nidtan. Anoshon ëmbi nata quequin chiaid utsin mibi chiendac,’ capondashi Nuquin Icbon.

¹¹ Adoaquini nidtoquin shocosh bed-bedquiacbimboec chënquequidën bëshuacsho isun ëbëd icquidon mëdinaquin Damasco yacno buampondashi.

¹² “Adec Damasco yacno choash bëshuash ëbi tsadnubi Ananias cuëmëdquid ëbi isec chopondash. Aidi isadaidbon naden nata quequin chiaid naquidquio icsho isadaidbo utsibon bëdamboen isaidquio icpondash.

¹³ Ëbi yacno choshon aidën: ‘Saudo, abuc is,’ cac cuedoquimbi Ananias ispondambi.

¹⁴ “Adsho isash Ananias: ‘Nuquin tsusedpabon Papa cain cuënaidën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaid, Icsa Nibëdquid mibi ismendac. Aidën chuisho mimbi tantiadac.

¹⁵ Aden aid isquin tantiaishun utsi-utsien dadpen mimbi isaidbëdta mimbi tantiaid mimi chuibenendac,’ quequin

¹⁶ chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaid ma paucpanuna. mibi paucacbimboen utsibo ismenuen acten mentometa,’ capondashi Ananiasën.

¹⁷ “Adoaqui, Edusaden yacno nidoash Nuquin Papa tabadte shubu uashunaid yacno nidec pudedash Nuquin Papa chiec onquec ushacbimboec tsadpondabi.

¹⁸ Adec tsadquimbi Nuquin Icho ëbi chiec onquesho isnubi nadpondash: Mimbi ëbi chuibansho tantienquocquid yec nëmbocquido mibi cuesunete buntsiashe. Edusaden yacnoësh badedquio nidtan, quequin Nuquin Icbon chuipondashi.

¹⁹ “Adoaquimbi: ‘Aidon isnubi mibi tantiaquid dadpen bedmeshun quënën nauedmiondambi. Adembidi, aidon isoanubi mibi tantiaquid utsi-utsien comapenen mëyamiondambi.

²⁰ Adembidi, mibi chuibanquid Esteban cuëmëdquid utsibon cuënoten se-sequin unës uanubi se-sequidon dashcute chicshun sanacno tsadquimbi, Unës uata, capondambi. Isadaidbo tsusiobon ambobidi icquin ëbi onquesho tantiapondash. ¿Adondacshobi cuesunependabi iquec?’ quepondabi Nuquin Icho chiec.

²¹ “Adoaquini Nuquin Icbon: ‘Isadaidpembo yacno mibi nidmembique. Nidtan,’ capondash –quepondash Pabado ambi nabanaid iccuededquido chiec.

Pabado cuestsenaid

²² Pabadon ambi nabanaid chuibansho tantiec iccuededquido otacquo tabadboed, Isadaidpembo, quec Pabado onquesho tantiaish: –Tantiaiapibi. Adec onquequid isadaidbo utsibëd tabadenquio ictiadquidi nec. Aid unës uata –quec cuëdcuededpondash iccuededquido.

²³ Adec cuëdcuededec aton dashcute bëntsecquid canchepamboec dachiquidshun nidaid putu bedtanquin abuc secapondash Pabadon chuiboed tantiatemaid nec, quequin ismequin.

²⁴ Adnubien, Cuesunenushe shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaidbo nëid cuesunete bumpeba? Ambi naid icsa chuimenuen comapenen paëmbocnoc cuesta, quequin sondado chuiquidën chuipondash.

²⁵ Adoaquien cuate nidtsinacno Pabado buanshun cuestebëdta tanenuen podon bedshun shoyonaqui Pabado: –¿Atotsi canumbini shoyonquin nai? ¿Domanobon nidaidëshun tishaid icsho ëmbi naid chuimiabida ëbi cuese? –quepondash Pabado sondado chuiquid chiec.

²⁶ Adsho tantiaish sondado chuiquid puduanec nidec abi chuiquid comandante caid yacno choash: –¿Atotsi natseno? Bëboed: “Domanobon nidaidëshun tishaid nebi,” quiosh –quepondash sondado chuiquid comandante chiec.

²⁷ Adoaquien Pabado yacno nidshun comandanten: –¿Domanobon nidaidëshun tishaidta mibi nepe? –capondash Pabado chuiquin.

Adoaquien: –Ai, domanobon nidaidëshun tishaidquio nebi –quepondash Pabado.

²⁸ Adoaquien: –Domanobon nidaidëshun tishaidpenquo ëbi icsho, ¿ada adquid ëbi icmetsia? quequin piucquid meniondambi –quepondash comandante Pabado chiec.

Adoaquien: –Con tan tishaid yec domanobo nebi –quepondash Pabado comandante chiec.

²⁹ Aden Pabadon chuisho tantiaish ambi naid chuimenuen cuestsemboedo nidanepondash. Aden chuisho tantiaish Domanobobi Pabado shocosh bucun mëtanemehitombi, quequin tantiec comandante dacuëdpondash.

Isadaidbo tsusiobo iccuededacno Pabado buanaid

³⁰ Adshumbic, badiadshun ambi mëtanemeboed chicmeshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nëid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno puduedmeshun nënantanquio Pabado nidtomepondash.

23

¹ Aden nidtomiaquien isadaidbo tsusiouidi comapenen isec: —Utsibo, ëmbi naid chuibanu. Tantiata. Nuquin Papan isnubi ambi naden nata quequin chiaid nabanquidquio icteniobi —quepondash Pabado.

² Aden chuisho tantiashun: —Muaquin chieque. Èccues —Isadaidbo tsusio dapan Anani-asën cac Pabado dayunquio icquidën Pabado èccuespondash.

³ Aden èccuesaquien Pabado: —Mibi icsaid nibëdacbimboec mibibi tsadsho Nuquin Papan mibi èccuesmendac. Nuquin Papan naden nata quequin chiaid tantiembi, quequimbi ëbi èccuesmequin Nuquin Papan chiaid ma mimbi niacpaboc —quepondash Pabado isadaidbo tsusio dapa caic.

⁴ Aden Pabado chuisho tantiash aton dayunquiocquidquio: —¿Aden Nuquin Papan isadaidbo tsusio dapa icta caid chiash dacuëdenquioda ique? —quepondash.

⁵ Adoaquien: —Èmbi chuiboed Nuquin Papan isadaidbo tsusio dapa icta caid nec, quequin tantiamboccombi. Aidi Nuquin Papan isadaidbo tsusio dapa icta caidquio icsho ëmbi chuibocpaden chienquio ictsenombi. Mímibi abimbo chioc. Èmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

⁶ Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Èbibí padiseyobon tishmiaid nebi. Adquid yec, Unësash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ëbi mimbi chiec —quepondash Pabado iccuededquido caic.

⁷ Aden Pabado chiaquien saduseyobo, Uincuenta nibëdendac, quequin ëmbi tantiacpaden Pabado tantienquio iquec, quec comapenec onquecuedednubi padiseyobo, Uincuenta iquendac, quequin ëmbi tantiacpaden Pabado tantiec, quec comapenec onquecuededpondash.

⁸ Unësash uincuentequid nibëdec, quec saduseyobo. Adecbidi, Nuquin Papan uaid mayan bëdabëd ambi uaid utsi mayan nibëdec, queoac saduseyobo. Padiseyoboen, Uincuentequid iquec, quec. Adecbidi Nuquin Papan uaid mayan bëda, ambi uaid utsi mayambidi iquec, queoac.

⁹ Aden ambi tantiacpaden chuibanec comapenec onquec saduseyobobëd padiseyobo natiambo cuëdcuededpondash. Adec onquec cuëdcuedednubi padiseyobo, Nëid dada bëdamboquid nec. ¿Mayanën chioshi, queshodambi muc nec capadi? Adecbidi, ¿Nuquin Papan uaid mayan bëdan chioshi, queshodambi muc nec caoapadi? Padenquio iquembi. Pabado chuiboed abimbo iquec, quepondash padiseyobo saduseyobo caic.

¹⁰ Adec comapenec onquec natiambo chushcanansho tantiashun comandanten: —Podon shoyonquin canite dëchicnushë queshun mënchicshun shubu nuntan bëoata —cac sondadon Pabado mënchicpondash.

¹¹ Aden mënchicshun shubu nuntan sondadon yuedaquien Pabado ushash badiadash padpidec inchëshën Pabado ushnuibi Nuquin Icho chopondash: —Mimbi Edusaden yacnoshon ëbi chuibanacpaden shubu dadpen icquid Doma caid yacnoshontsen mibi chuibamembique. Dacuëdenquio yec dayacquio icta —capondash Nuquin Icho Pabado chuiquin.

Pabado cuesunenu quequin ompoquin cainaid

¹²⁻¹³ Adec Pabado bëd Nuquin Icho onquebombien badiadash isadaidbo 40ted Pabado cuesuniabi icquin buna mëmunembi, quequin abimbo chiembi, quepondash.

¹⁴ Aden nanu quiash isadaidbo tsusiobo yacno nidash: —Pabado cuesuniabi icquin buna mëmunembi, quequin muenquiocquin chuibanombi.

¹⁵ Èbitedishun ompoquin Pabado cuesunenuquin cainubien mimbi comandante chuitanta caid naden chuimeta: Pabado naid bëdamboen tantianuna. ¿Ada padpiden isadaidbo tsusiobo iccuededte shubuno bëmeoatsia? quequin chuitan Pabado bëmeoatsiashe. Aden Pabado sondadon bësho Pabado cuesunenuna —quepondash Pabado cuesunenuquido isadaidbo tsusiobo caic.

¹⁶ Aden aidon chuishobien Pabado piaquën tantiashun Pabado yacno nidshun chuiopondash aton piaquën.

¹⁷ Adoquien Pabado sondado 100ted chuiquid cho, cata cac nidshun aton piaquën chiac Pabado yacno sondado chuiquid chopondash. Adec chosho isun: —Nëid con piac nec. Aidi comandante chuite buneque. Aid yacno buanta —Pabado cac

¹⁸ buampondash.

Aden Pabado piac comandante yacno buanash sondado 100ted chuiquid: —Quënën nauedboed Pabado cuëmëdquidën ëbi chomeshun: “Con piac comandante chuite buneque. Aid yacno buanta,” cac bëombi —quepondash sondado 100ted chuiquid comandante chiec.

¹⁹ Aden chiaquien Pabado piac mëdinanquin udictsëc buanash comandante: —¿Atotsi ëbi chuinec cho? —quepondash comandante.

²⁰ Adoquien Pabado piac: —Badiadshun isadaidbon ambi namiaid mibi yacno chomec. Aden chomiac nëmbo choshon naden chiec: “¿Ada isadaidbo tsusiobo iccuedete shubuno Pabado mimi bëoapatsia? Aidën naid chuibansho bëdamboen tantianuna,” quiosh cata, quequin chomiosi, quequin mibi chiendac isadaidbo tsusiobon chomiaid.

²¹ Isadaidbon muaquin chiendac. Con cu Pabado buamenuen mibi aden chiendac. Comandanten Pabado bëmetsiash, quequin tantiaquin Pabado con cu cuesunuequin caineque. Nidmenda. Con cu cuesunuequid: “Pabado cuesuniabi icquin buna mëmunembi,” quiosh. Con cu cuesunuenen nëbimbobi podqued cuëmanshun ompodshon cainec —quepondash Pabado piac comandante chiec.

²² Adoquien comandanten: —Isadaidbon chiaid mimi chuiboed utsi chienquo yec nidec nid —capondash Pabado piac chuiquin.

²³ Aden Pabado piac nidmeshun sondado 100ted icquido chuiquid daëd chomiash comandante nadpondash: —Ënden inchëshan Sesadeya yacno ma mibëdi mimi namiaid sondado 200ted nidnu mitsana buanuequin nacnenta cata. Adomboembidi, cabayo catsadquid 70ted icquido chuiquin nacnenta, quequin chuiyoata. Adomboembidi shocosh sianten senuequin sananquid 200ted icquido chuiquin mitsana nacnenta, quequin chuiyoata.

²⁴ Adembidi Pabado bëd icquido cobednadod Pediques yacno buanun cabayo nacnenta —capondash comandanten sondado 100ted chuiquid daëd chuiquin.

²⁵ Aden chuishumbic naden comandanten dada uapondash Pediques cobednadod caid chuiquin:

²⁶ “Quëdaudio Disias nebi. Chuiquid dapa cobednadod caid, Pediques, mibi bëdambocquid icsho chuinu. Pabado ëmbi bedboed mibi yacno buamenuen dada uaimbique. Ëmbi dada uaid isec onqueta.

²⁷ Nadquo iccoshe. Tanta. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiacpaden tantiaishun sondado dadpembëd choquin mënichcombi.

²⁸ Aden mënichshumbic, ¿Atotsieshun Pabado cuesunete bumpec? quequin tantianuen isadaidbo tsusiobo iccuededacno Pabado buamiombi.

²⁹ Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambi nabanaid Pabado chuisho tantiaishun quënën nauedenquiociadquidi nauedmepondash, quequin tantiaishumbi quënën nauedmeopombi.

³⁰ Aden Pabado quënën nauedmeoashumbic, Podqued cuëmanshun Pabado cuesunuequin isadaidbon cainec, qesho tantiaishun badedquo mibi yacno buamiombi. Adembidi, Pabado icsambocquid nec, quequin aid cuesunuequido mibi yacno nidmëmbi. Adoac ma ambi Pabado naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: —Pabado bëdta nëid cobednadod Pediques menenuen buanta —capondash comandanten.

³¹ Aden comandanten dada uashun meniac aidën chiacpaden Pabado buanec sondado aid inchëshëmbi shubu dadpen icquid Antipatidis caid yacno chopondash.

³² Ambo choash badiadshun sondado cabayo catsadquidonquido Pabado buanec nidnubi sondado utsitedi aubidi nidaneoapondash.

³³ Adec Pabado buanec nidequi Sesadeya yacno choshon abi chuiquid comandanten Quëdaudio Disiasën dada uaidbëdta Pabado Pediques menepondash cabayo catsadquidon.

³⁴ Aden meniaquien dada uaid isbanash: —¿Mitsicquid nidaidën icquid mibi ne? —capondash Pediquesën Pabado chuimenuen.

Adoquien Pabado: —Nidaid Sidisia caid yacnoshon tishaid nebi —quepondash.

³⁵ Adoquien: —Mibi icsambocquid nec, quequin chuiquido isadaidbo choacsho mimi nabanaid chuimëmbi —quepondash Pediques Pabado chiec. Aden chiec onqueshumbic ënden chuiquid dapa Edodes cuëmëdquidën, utsibo abi chushquiaid chuimiondaid shubuno

Pediquesën buamiac ashunquio Pabado nauedsho isun: —Puduenanec cuenushe ista — capondash sondado chuiquin.

24

Pediquesën tantianubi Pabado ambi naid chiaid

¹ Adashic, 5tedec ushash isadaidbo tsusio dapa Ananiashbëd tsusio utsibo Pabado icsaid Pediques chiuuec Sesadeya caid yacno chopondash ambi tantiacpaden chiuuequid Tedtudo cuëmëdquid bëquin.

² Aido chosho isun Pediquesën Pabado chomiacsho isun isadaidbo tsusiobon tantiacpaden chiuuequidën Tedtuden naden Pediques chuipondash: —Mibi chuinu. Tantia. Chuiquid bëdamboequid icquin mimbi bëdamboen nabanac isadaidbo bëdamboec tabadec.

³ Mimbi aden nabansho isun, Bëdamboequid mibi nec, quequin mibi chiembi.

⁴ Aden chuishun mibi chieshmenquiocnequid isadaidbon chushcaboed badedquio chuinu. Tantiata.

⁵ “Nëid mimbi bëmeboed Pabado caidbëd ictiapimbo iquebi. Nëid Nasaded yacno iccondaid tantiaquido tsusio nec. Aidëmbi nidaidtedi yacno nidshun ambi tantiaid chuibanquin isadaidbo comapenen chushcamequin cuëdcuededmiac cuëshëd-cuëshëdposh.

⁶ Aidëmbi Nuquin Papa tabadte shubu uashunaidën puduedtemaid matses puduedmesho isun Pabado bedpombi. Bedash Nuquin Papan naden nata quequin chiampicpadembi cuidte bumpobi.

⁷ Aden cuidnu quenubien comandante Disias cuëmëdquid choshon Pabado mënchicanquin buamposh.

⁸ Pabado ambi naid chuisho mimbibi tantiaishun, Isadaidbo tsusiobon abimbo chiosh. Icsambocquid nec, quequin mimbi chuiopatsiac —quepondash isadaidbo tsusiobon tantiacpaden chiuuequid Pabado icsambocquid nec, Pediques camenuc.

⁹ Aden Tedtuden chuiquin nainan isadaidbotedi, Ai, Tedtuden chiacpadec iccosh, quequin chuibededpondash.

¹⁰ Adsho tantiaishun, Onqueta, quequin mëdante uiccaquin Pediquesën ismiac Pabado nadec onquepondash: —Chuiquid dapan tantiata. Èmbitsen chuinu. Dadpen seta matamequin con matses isadaidbo abi chushquiaid tantiaishun mimbi bëdamboen tantiacpaden namedenioc. Adquid mibi nec, quequin tantiaquin, Èmbi naid chuibanec bëdambo iquebi, quec dacuëdenquio yec onquebique. Tantiata.

¹¹ Edusaden yacno choash ambobi 12tedec ushobi. Èbi anoshon isboedon, Abimbo iquec, quequin nëmbo choshon mibi chuitsiash. Edusaden yacno choash Nuquin Papa shubu uashunaidën puduedec Nuquin Papa tantianuec choapobi.

¹² Ambo puduedash utsibëd chushcananenquio yec tabadsho istuidash, Icsambocquid nec, queposh. Adembidi chuibanquin utsibo nëishmequin chushcamenquio iccombi. Pabado icsambocquid nec, quequido Pabado chiaid abimbo iquec, quietiadquidi nec.

¹³ Èmbi naid Tedtuden chuibamboed, Abimbo iquec, quietiapimbo iquec tsusiobo.

¹⁴ Nëiduidtsëqui abimbo iqueque. Chuinu. Tantiata. Nuquin tsusedpabo chuimiapaden Nuquin Papan chomiaid tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquio nebi.

¹⁵ Adembidi, matses unësacsho Nuquin Papan uincuemiab abi tantiaquid abëdi tabadnubi abi tantiesa chian anëdënquequid nësecaïndac, quequin tantiembi isadaidbo tsusiobon tantiacpadembi.

¹⁶ Aden tantiaquin Nuquin Papan, Bëdamboen mimbi naoc, capashuni, quequin bëdamboen nabanec tabadec nebi. Adembidi, matsestedishun, Bëdamboen mimbi naoc, capashuni, quequin adomboembidi bëdamboen nabanec tabadec nebi.

¹⁷ “Adequi nidaid utsi-utsiec yacno capueneac tabadcuenequin, Edusaden yacnocquid isadaidbo bunec tabadec, qesho tantiaish piucquid menenuc choapobi. Adembidi, Nuquin Papan bëdamboen dayun uabenioshi, quequin piucquid menenuc choapobi.

¹⁸ Aden menenuc abi tabadte shubu uashunaidën puduedash ëbentsëqui capusho ëbi chushcaboedon istuidposhi. Bëdamboec tabadsho istuidposhi.

¹⁹ Èbi capusho istuidquido isadaidbo nidaid Asia caid yacnoësh choquido niosh. Aido, Pabado icsamboec tabadsho isombi, quepac caosh. Ambì chiaid abimbo icnuc nëshuntsen adomboembidi chuitiadquidi nec.

²⁰ Adembidi isadaidbo tsusiobon: ‘Padiseyobo yec bëdamboequid nec,’ quequin ëbi anoshon chiacpadembidi nëshuntsen adomboembidi chuiotiadquidi nechitec.

²¹ Anoshon nëiduidtsëqui chiec comapenec cuëdobi: ‘Unësash uincuentequid iquec,’ quequin chuisho tantiashun, Icsambocquid nec, quequin isadaidbo tsusiobon ëbi mibi chiec caimbi —quepondash Pabado Pediques chiec.

²² Aden Pabado chuisho tantiash Pediques tantiauidquid iquec: —Nëbi mimi aidtedquio chuibansho tantiembi. Comandante Disias nëmbo choan mibi padpiden chuimembi —quepondash Pediques Pabado chiec.

²³ Aden chuishumbic naden Pediquesën sondado chuipondash: —Shubuno Pabado buanshun puduednushe queshun ista. Abi menuequid abi isnequid chedo chosho isun yuedta —quepondash Pediques ambi Pabado ista caid chiec.

²⁴ Adashic, daëdpactsëc ushash Pediquesbëd aton chido, Dusidia cuëmëdquid chopondash. Aton chido isadaidbo icpondash. Adec aton chidobëdi choshon abi yacno Pediquesën bëmiacsho ambi tantiaid Esuquidistu Pabado chuibanac Pediquesën tantiauidpondash.

²⁵ Aden chuibanquin Pediques Pabado nadopondash: Utsin abi utsibëd chushcananaid chuibanacsho Nuquin Papan chiacpaden aido nametiad, quequin chuipondash. Adem-bidi, Icsamane quequin Nuquin Papan chiacpadenuidi nabanta, quequin Pediques chuiopondash Pabado. Adem-bidi, Esuquidistu tantienquo icsho chian anëdënequid Nuquin Papan nësecanushe quequin Esuquidistu tantiata, quequin Pabado chuiopondash. Aden Pabado chuisho tantiash: —Padi. Ëmbi naid nibëdsho isun padpiden chuimenun mibi bëmeoaambique. Nëbi nidec nid —cac Pabado nidpondash.

²⁶ Adshumbic, adem-bidi abi yacno Pabado Pediquesën bëmeded-bëmededpondash. Nid-tiadquio icquin piucquid Pabado ëbi menetsiash, quequin tantiaquin Pabado bëmiash aibëd Pediques onquepondash.

²⁷ Adashic, seta daëd matamiash Podsio Pesto cuëmëdquid cobednadod yampondash. Aidi cobednadod yanuc nidnuequin, Nidta, cainquiocquin Pediquesën Pabado shubu nuntan niampondash naden tantiaquin: Pabado shubun nauedshun ëmbi niansho isash, Bëdambocquid nec, quequin isadaidbon ëbi cain chuibededpec, quequin Pediquesën Pabado shubun nauedshun niampondash.

25

Pabado ambi naid Peston chuimiai

¹ Pesto cobednadod yanash Sesadeya yacno choash 3tedec ushanec Edusaden yacno nidpondash.

² Adec Pesto Edusaden yacno choash tabadsho isadaidbo tsusiobo, Pabado chush-caquido:

³ —¿Ëbitedi bëdambo icmenuequin Pabado Edusaden yacno ada bëmeoatsia? —quepondash Pesto chiec. Pabado bësho cuesunenuequidon cainshun cuesunepec, quequin tantiaquin isadaidbo tsusiobon aden Pesto chuipondash.

⁴ Aden chuisho tantiash Pesto: —Sesadeya yacnoshon nauedaid Pabado iquec. Ambo nidebi.

⁵ Pabado icsamboen naosh, quec utsi-utsiec ëbëdi nidshun anoshon Pabado naid icsa ëbi chuita —quepondash isadaidbo tsusiobo caic.

⁶ Adashic, 10tedec ushash Edusaden yacnoësh puduanec nidec Pesto Sesadeya yacno choash ushash badiadash mates chushquiaid tantiec tsadte dapan tsadtoshon Peston Pabado bëmepondash isadaidbo tabadnubi.

⁷ Aden bëmiacsho isash Pabado dëcatec isadaidbo Edusaden yacnoësh chobedo Pabado naid chiec abimbo chiacbimboec onquecuededpondash.

⁸ Aden isadaidbon chiaquien: —Ëmbimbo isadaidbon naden nata quequin chiaid niacamboccombidi. Adem-bidi, Nuquin Papa tabadte shubu uashunaid yacno nidash aid shubun puduedtemaid isadaidpembobëd puduedamboccombidi. Adem-bidi, empedadod Doma yacno tabadquid, Sesad cuëmëdquidën chiaid niacamboccombidi —quepondash Pabado.

⁹ Adoquien: —¿Edusaden yacno buanac anoshon adomboembidida isadaidbo tsusiobo chuiotsia? —quepondash Pesto Pabado chiec. ¿Edusaden yacno Pabado ada bëmeoatsia? quequin isadaidbon chiacpaden nanuec Pesto adpondash.

¹⁰ Adoquien Pabado: —Domanobo ancaquidën empedadod caidën, Sesad cuëmëdquidën, Mibi yacnocquido bëdamboen tabadmequid icta, caid icquin mimbimbo chushcananquid bëdamboen tabadmeta. Isadaidbo icsamboen tantiaquin nainquioccombidi. Abimbo Pabado chiec, quequin mimi tantiec.

¹¹ Icsambocquidquido iquec Pabado unës uame, quesho tantiash, Adoanenda, quenquioctsiabi. Isadaidbon abimbo chiacbimboen chuisho tantiash, Pabado buanshun cuidta, quetiapimbo mibi iquec. Isadaidbo yacno buanta, mibi quenuec, empedadod ëmbi naid chuite bunebi, quequin dada uaindami —quepondash Pabado Pesto chiec.

¹² Aden Pabadon chuisho tantiash Pesto udictsëc nidash abipadquidbëd onquiah choash: —Sesad ëmbi naid chuite bunebi, mibi qesho aid yacno mibi buamenuna — quepondash Pesto Pabado chiec.

¿Atotsimbi Pabado napatsia? quequin Peston Aquidipa caid

¹³ Adashic daëdpactsëc ushash ancanquid utsi Aquidipa cuëmëdquidbëd aton chuchu Bedenise cuëmëdquid Pesto isedec chopondash. Sesadeya yacnocquido cobednadod Pesto yanosh, quequin chiac aid isec chopondash.

¹⁴ Adec isedec choash dadpen ushec tabadsho isash Pabado chiec Pesto nadpondash: — Pediquesën quënën nauedmiaid Pabado cuëmëdquid chuinu. Tantiata. Aidi abi iquec shubu nuntan.

¹⁵ Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unës uata, quequin isadaidbo tsusiobon chuiposhi.

¹⁶ “Adoaquien, Mibi abëdi chushquiaid Pabadontsen chiamboconoc unës uata queti-apimbo iquebi. Domanobon naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi.

¹⁷ Aden chiac nëmbo choshon abi chushquiaid aidon chuisho tantiec tsadnuen Pabado bëmiombi.

¹⁸ Aden Pabado bëmiacsho ëmbi tantiapaden abi chushcaquidon Pabadon naid chien-quiocposh.

¹⁹ Ëmbi tantiaidpenquio Esuquidistu unësash uincuenaid Pabadon tantiaid icsambo quequin chuiposhi isadaidbo tsusiobon.

²⁰ Aden ambi tantiaidquio bëdamboen tantienquio yec nadpobi Pabado caic. Min matsesën naden nata quequin chiaid tantienquio iquembique. Edusaden yacno buamiac mimi naid anoshon chiac bëdambo ictsiash, quequin chiombi.

²¹ Adoaquien: ‘Empedadod, Sesad yacno nidshun ëmbi naid chuitiadquio iquebi,’ queposh Pabado. Aden chiac quënë yacnoshon aid puduedmetiapimbo iccobi. Nëmbo Pabado quënën tabadec —quepondash Pesto Pabado chiec Aquidipa tantiamenuequin.

²² Adoaquien Aquidipa: —Ëbi aidën chuibansho tantiate bunebi —quepondash.

Adoaquien Pesto: —Badiadshun aidëmbi chuisho mimbi tantiendac —quepondash.

Aquidipa ambi naid Pabadon chiaid

²³ Aden Peston chiaquien badiadash bëdaidquio dasiuidash Aquidipabëd aton chuchu choash iccuedede quënën puduedash sondado chuiquid chuiquid utsibobëd aid daëdi tabadpondash. Aido tabadsho isun Peston Pabado bëmepondash.

²⁴ Bëmiac Pabado nënantanquio nidtonobi Pesto nadpondash: —Ancanquid Aquidipan mibëd iccuededquidon ëmbi bëmeboed mibitedishun isec. Aidi chuinu. Tantiata. Isadaidbon, Nëid dada icsambocquid neque. Unës uame, quequin chiohi. Ëbi Edusaden yacno choacsho isun adoposh. Adomboembidi nëshun Sesadeya yacnoshontsen aidombidi chuioposhi.

²⁵ Aden chuisho tantiashun nëid ambi naid chuimeoapombi. Aden Pabadon chiaidtsen tantiashun, Nëid unës uatiapimbo iquebi, quequin tantiapombi. Aden ëmbi tantianubi, Empedadod yacno nidshun ëmbi naid chuite bunebi, quequin Pabadon chuiposhi. Adoac Doma yacno aidi buamenuna.

²⁶ Aden buamenuen *¿atotsimbi dada uaquin empedadod chuiipatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiashun, Naden dada uata, mimi cac dada uatsiambi.*

²⁷ Ambi icsamboen naid nibëdnuc Doma yacno buametiapimbo iquebi —quepondash Pesto ancanquid Aquidipabëd iccuededquido chiec.

26

¹ Aden Peston chiaquien: —Mibibi onquequin mimbi naid chui. Tantienu —quepondash Aquidipa Pabado caic.

² Adoaquien Pabado nadpondash: —Ancanquid dapa Aquidipa mibi tabadnubi isadaidbon ëbi chushcaid chuibanec bëdambo iquebi.

³ Isadaidbon naden nata quequin chiaidbëdta abi onquiaid mimbi tantiec. Aden tanti-aquid mibi icsho ëmbi nabanaid ëmbi chuibansho tantiata. Chuinu.

⁴ “Ëbi tishondacnoësh canidosho con matsesën isadaidbon istenepondashi. Nëbi caniquid iquec Edusaden yacno choash tabadsho adembidi aidon istenepondashi.

⁵ Ëbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquidi nec.

⁶ Unēsash uincuenta iqueque. Aid cainec tabad, quequin Nuquin Papan nuquin tsused-pabo chiampicpaden chuiquin dada uamiaid tantiaquid ëbi icsho isash, Icsambocquid nec, quec isadaidbo.

⁷ Nuquin tsusedpa Acobo isadaid caidën madobon tsyuecquidon, Unēsasho Nuquin Papan uincuemete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon.

⁸ Nuquin Papan nadatiambocquin uincuemete chiaid mimbi tantienquo icpe.

⁹ “Ënden ëmbitsen tantiauidquin shubu dadpen icquid Nasaded yacno ictened, Esus cuëmëdquid tantiaquid icsambocquid nec, quequin unēs uamembi, qeshun adobampondambi.

¹⁰ Edusaden yacnoshon adquid dadpen mëyamepondambi. Isadaidbo tsusiobon, Adota, cac ëmbibi Esus tantiaquid bëdamocquid icsho bedshun quënën nauedmepondambi. Unēs uanu, qesho tantias. Ai, unēs uatiadquo iqueque. Adota, quepondabi.

¹¹ Nuquin Papan chiaid chuibante shubu utsi-utsiec yacno nidted-nidtedondabi aid mëyamenuc. Esus, Nuquin Papan madopenquo nec, aid camenuen mëyamepondambi. Adembidi nidaid utsi yacnoshontsen adquid istuidshun mëyameoapondambi.

¹² “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi.

¹³ Adec nidquimbi ushë cuembo yanec ushë comapenec chënquequidën ëbëd icquidobëdta ëbi dëcatesho isondambi. Abimbo iquec, quequin mibi chuinu. Ancanquid dapan tantia.

¹⁴ Aidën dëcatiac ëbitedi nidaidën uebudcuededondabi. Adec uequimbi con matsesën onqueten ebeyon onqueten abucüesh onquesho naden tantiondambi: Saudo, çatotsieshun ëbi tantiaquido mimbi mëyampe? Ëbitsen mëyantiadpambocquin mimbi aid mëyanec, quec onquequin chiondashi.

¹⁵ “Adoquimbi: ‘çTsutsi mibi ne, Icbo?’ caondac.

“Adoquien, Mimbi mëyanaid Esus nebi.

¹⁶ Ëmbi namiaid mibi icmenuc chobi. Esus isombi, quequin çëbi chuibeneta caid nëbi mibi yanec? Ëbi chuibenequin mimbi isaibëdta ëmbi yuecshun ismetequid chuibeneta.

¹⁷ Aden ëbi chuisho mibi cuesunete bunquid isadaidbobëd Isadaidpembo icsho mibi mënchiquendambi. Adquid chuibanta, quequin mibi nidmembali.

¹⁸ Aden chuibanac utsin-utsinquien pashuac bimboe boedëmbi tantiendac. Icsambocquid nebi, quequin tantienquicoeodi, Icsaobique. Ëbi pauc, Papa, quependac adquid. Mayan icsan yua icboedi Nuquin Papan bacuë iquendac. Adquid yanash abi icsaid paucac Nuquin Papan bëdambo icmiaid ëbi tantiaquid utsibëd iquendac, quequin Esusën chuipondashi.

¹⁹ “Aid abucüesh onquesho tantiasun chieshenquiocquin chuibeniombi caimbi, mibi chuiquin Aquidipa.

²⁰ Damasco yacnoshomba chuibanondambi. Anoshomba chuibanshumbic Edusaden yacnoshontsen chuibanoandambi. Anoshon chuibanshumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ënquin Nuquin Papa abimbo tantiaquin ambi chiacpaden nabanta, quequin chiombi.

²¹ Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi.

²² Padnuen ëbi dayun uaquid Nuquin Papa icquin isadaidbon cuesunenushe qeshun cudasëmposhi. Adoac nëid ushënquo mibëdtabi mimbi namiaido mibi chuibanec nebi, ancanquid Aquidipa. Moisesën, Nadquo iquendac, quequin dada uampicpaden chuiquid nebi. Nuquin Papan chuimiaid utsibon, Nadquo iquendac, quequin chiampicpaden chuiquidbidi nebi. Aidon chuipampid nadquo iqueque. Tantia.

²³ Nuquin Papan Chomiaid, Quidistu, mëyanac unēsash uincuenaid yec ëbi tantiaquid ëbëdi tabadendac, quequin aton matsesbëdta isadaidpembo Quidistun chiendac, quequin chiampicpadec chopanëdash —quepondash Pabado iccuededquido chiec.

²⁴ Adec Pabado onquesho tantias: —Min tantiate icsabudash mibi onquec. Mimbi tantiaid dadpen iquec tantienquo yec onquechitequien mibi nec —quepondash Pesto Pabado caic.

²⁵ Adoquien Pabado: —Bëdamboen tantiec onquebi. Ëmbi chiaid abimbo iquec, caimbi mibi ancaquid Pesto.

²⁶ Ancanquid Aquidipan ëmbi chuibamboed abimbo iquec quequin tantiec. Aden aidën tantiasho dacuëdenquiocquin aid chiembi. Ëmbi chuibamboed ompoenquiocquin isquidon chuisho aidëmbi tantiapondash.

²⁷ Nuquin Papan ambi naden nanun chiaid dada uamiampidon chiaid chuisho mimbi tantioc —capondash Pabado Aquidipa chuiquin.

²⁸ Adoquien Aquidipa: —¿Mimbi chuibodtedtsëqui tantiashtabi Esuquidistu tantiaquid yampe? —quepondash Aquidipa Pabado chiec.

²⁹ Adoquien Pabado: —Esuquidistu tantiaquid ëbipadquid mibëd iccuededquidtedibi Nuquin Papan icmepashun. Nëid ushënquio daëdpactsëc chiombi. Aidtedtsëqui chiac tantiatiapimbochsho isun yuen chuibantsiambi ma Esuquidistu tantiaquid mibitedi yanueshun. Padnuen ma mëtaniaid ëbipadquid ma mibitedi iquenquiocpanuna —quepondash Pabado.

³⁰ Aden Pabado chuibanaquien ancanquid Aquidipa nidtopondash. Nidtocho isash Pestobëd Bedenise iccuededquid utsibo chedo nidtocuededpondash.

³¹ Adec nidtocuededash puduenash onquecuedec: —Chuibamboec icsamboen nainquioccosh. Adoenquiocsho unës uainquioctiad. Adembidi ënden quënën nauedenquiocpatecnëdan —quepondash ancanquido.

³² Aden chiash: —Empedadod chuite bunebi Pabado quiambocsho quënën nauedacnoshon aidi mimbi nidmetsenosh —quepondash Aquidipa Pesto chiec.

27

Doma yacno Pabado buanaid

¹ Adashic, Nëbi mëtaniaido nidaid Itadia caid yacno buanac bëdambo iqueque. Pabado bëda mëtaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100ted bëdi abi chuiquid abibi cuëmëdpondash.

² Aden buanta cac Pabado bëda utsibo bedshun acte cuëmano buanshun cano dapa Adadamitio cain cuënaid istuidpondash. Aid cano dapa istuidashien, Icho, nidaid Asia caid cuëman shubu dadpen icquid utsi-utsiec yacno nidtuidebi, quequin chuisho tantias Pabado bëd antabëdtopondabi. Adec antabëdtocho isash puduampondash. Pabado bëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoësh choquid icpondash.

³ Adec cano antabëdtoanec nidquin shubu dadpen icquid Sidon caid yacno buampondash. Ambo choash, Mitsana nibëdeque. Mibi yuedquid yacno nid. Aidon mibi menetsiash, quequin Pabado bëdamboen tantiaquin sondado chuiquidën, Udion, chuipondash.

⁴ Adshumbic Sidon caid yacnoësh puduanec nidquin potesho cunquequidën bëquedtuicac ushë choacmi cuenadtanquin acte nënantan nidaid nacrëdquid Chipide caid datampondash.

⁵ Adembi nidaid Sidisia caid ëquë datanash nidaid Pampidia caid ëquëtsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash.

⁶ Ambo choshombic sondado chuiquidën cano utsin nidnuequin nibënquin istuidpondash. Nidaid Equipito caid yacno shubu dadpen icquid Adecandedia caid yacnoësh choboedi nidaid Itadia caid yacno buanu caid istuidpondash. Aden aid istuidshun Pabado bëd icquido aid canontsen antabëdtomepondash.

⁷ Adec Mida yacnoësh puduanash nidquin potec dadpen ushacsho cunquequidën cano bëquedtuicpondash. Aden bëquedac bëdiactsëc nidquimbi shubu dadpen icquid Nido caid ëquëbitsen datamidanec acte nënantan nidaid nacrëdquid Quideta caid yacno buanoapondash. Uquë cuëma utsiuc Sadmon caid icpondash.

⁸ Ushë choacmi Quideta yauc cuenadtanec choquin shubu dadpen icquid Buenos Puetos caid yacno buampondash. Udicsëc shubu dadpen icquid Dasia caid iccondash.

⁹ Cunquequidën bëquedac yuenquio potiactanetsëcquien buampondash. Comapenec cunquequidën nuqui bëquedendac, quequin tantiaquin Pabado nadopondash:

¹⁰ —Chuinu. Tantiata. Nëuëshquio puduanquin potesho cunquequid dapan bëquedshun cano chic-chictsiash. Acten mentoadmane quequin potenquio iquembi, quequin chuita —capondash Pabado sondado chuiquid chuiquin.

¹¹ Aden Pabado chiaqui sondado chuiquidën niachidanquin cano icbobëdtan cano nidmequidën nidnu quequin chiaid tantiapondash.

¹² Cunquequid dapa cunquenubi Buenos Puetos yacno tabadec iquen uanquid dapanquio nuqui iquenendac, quish shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

Acte dapa potesho cunquequid dapanquio cano bëquedte

¹³ Nuqui iquenendac, quequin tantiaquin bëdiactsëc cunquesho isun abi bunacpaden nanuequin cano uidën uate shocosh yuëmbocquid indoash puduanquin Quideta cuëma anoentsëqui buampondash.

¹⁴ Adec nidequi uiditsëc yanshobi ushë cho-choaid ëquëctscshun Quideta caid nidaid mananucush cunquequid dapa choquin bëquedtuidquin

¹⁵ ichno cano nidmetiapimbo nobi cano buampondash.

¹⁶ Aden cunquequidën buanaqui acte nënantan nidaid nactnedquid utsimpi Quëdauda caid ëquëbictscëc cuenadquimbi canompi cano dapan nëshun buanaid buanushe qeshun anandopondash.

¹⁷ Aden canompi anandoshon cano dapa canchednushe qeshun uidën uaquin datanebanshumbic cano buante dashcute abi dectante cuestebëdtabi imbudshun dashcute chicacsho cunquequidën cano comapenen buampondash.

¹⁸ Aden cano cunquequid dapan buanubi badiadnuc acte natiambo tēccoasquesho isun ambi ansandoshon bëboed acte nësiapondash.

¹⁹ Adshumbic 3tedec ushun bucu dënëshun cano dashcute indotetedi nësiaoapondash.

²⁰ Aden nësecanec nidquimbi inchëshën ushëbëdta uispa abu chëshën bëtinacsho isenquio iccondambi. Adem bidi badiadën ushë isenquio iccondambi. Dadpen ushquin aitedi isenquiocondambi. Aided isenquiocnobi acte comapenen tēccoascapondash. Ad icsho isash, Bënudchitequien nuqui iquec, abitedimbo quecuededpondash.

²¹ Adequi nuqui iquec, qeshun buna mëmumbededequi abitedi nidanepondabi. Adec canon nidnubi Pabado nidtoash nadpondash: —Chuinu. Tantiata. Quideta caid yacnoësh puduanenda caombi. Adsho tantiaboshi tantienquio yec mibi puduampoc. Ëmbi chiacpaden nabanuc mimbi ansandoaidtedi abi ictsiandac. Adecbidi, Unësebi, quenquio nuqui ictsiandac.

²² Padnuen acte tēccoasquenubi nuquitedi unëshenquio iqueque. Dacuëdenquio yec dayacquio icta. Canouidi canched-canchedendac.

²³ Nuquin Papan namiaidquio nebi. Adquid icsho inchëshën ambi uaidën mayan bëdan ambi chomiaidën naden chioishi:

²⁴ “Ancanquid dapa, empedadod caid matses chushquiaid tantiec tsadte yacno mibi nidtoendac. Mibi ambo nidmequin canon mibëd icquidtedi acte yacnoshon mënichiquembique. Dacuëdenquio yec tabad,” caposhi Nuquin Papan uaid mayan bëdan.

²⁵ Aden aidën chiac dayacquio icta. Nuquin Papa ambi chiacpaden nabanquid nec, quequin tantiembi.

²⁶ Adem bidi, acte tēccoasquequidën nuqui acte nënantan nidaid nactnedquid cuëmano buanshun cano cancheshunendac, quequin tantiombi —quepondash Pabado canon antabëdtoaido chiec.

Cano canched-canchedaid

²⁷ Adashic, Buenos Puedtos caid yacnoësh ënden nidboshi 14tedec ushec acte Adidia caid yacnoshon cunquequidën buampondash. Aden acte tēccoasquequin buanubi inchëshpotsembo yanuc, Cuëma anoentsëquien nuqui choendac, quequin cano nidmequidon tantiapondash.

²⁸ Aden tantiaquin, ¿Tionda iqueque? Tanu, qeshun yuëmbocquid shocosh bucu dēdectanshun pumbudquin tampondash. Aden tanshun, Aidtiompenquio iquec, quequin chuipondash.

²⁹ Nidaid cuënote dapa cunquequidën buanquin cano semenushe qeshun cano uidën uate dapa yuëmbocquid tsitsumi tsidectanshun acte nënequin uidën uash ma badiadbono quiaish tabadpondash.

³⁰ Adec tabadnubi cano nidmequido cueneshun dëbiate yacnoshontsen cano uidën uate yuëmbocquid dēdectanuequin abimbo chiachimboen canompi anando boed nënetsẽmpondash. Cano dapa mentoadtsiash, qeshun cuenuequin adopondash.

³¹ Adec aido nidtsenubien Pabado: —Cuenuequido canompin nidnuc cano dapan nidquido nuqui mentoadendac —quepondash sondado chuiquid caic.

³² Aden Pabado chiaquien abi dectante bucutedi sēnac canompi nëpaëdpondash cuenuequido nidtiapimbo yec.

³³ Adashic, badiadte anoentsëc yanubi Pabado nadpondash: —Catodtseted ushec, Mentoadtsiabi, quequin tantiaded-tantiadedtsëcquin mimbi piambococ.

³⁴ Mibi mentoadenquio iqueque. Min manëdaid abentsëc paëdenquio iqueque. Penquiochoedi unëshitomane quenquiocquin peta —quepondash Pabado.

³⁵ Aden chuishumbic utsitedi ismequin pan bedshun Nuquin Papa chuishun pan cuëshun Pabado pepondash.

³⁶ Aden Pabado pesho isun, Nuquitsen penuna, qeshun abitedishun pebededpondash.

³⁷ Cano antabêdtoquido 276ted icpondash.

³⁸ Aidtedshun peshumbic, Cuêmano nidec, quequin ambi sandoaid utsitedi tiedên caniq-uid êshê acte nêsiapondash, Cano yuêmo iquec, qeshun.

³⁹ Adshumbic, badiadnuc ambi isacmaid nidaid istuidpondash. Acte cuidiantanquid cuêmambi masi icsho isun ambo cano nidmenueshun

⁴⁰ uidên uaid tebanac acte nêpaêdpondash. Adembidi, cano dêbiadiamete bucutedi secudoashun cano dêbiateno buanquin dashcute shoyontanquimbi cadoapondash, Cunquequidên acte daêd naccuêscananacno buampashuni, quequin.

⁴¹ Aden cano nidmenubi cano dêbiaten masi setuidec dêchiquidtiapimbo yec cano dapa dêtoquepondash. Adec dêchiadash acte têccoasquequidên cano dapa canche-canchequin tauapondash.

⁴² Adsho isash sondado, Mêtaniaidtedi cuentsiashe. Cuesunenu, qesho

⁴³ tantiaash Pabado cuesunenushê qeshun: —jChên! —capondash sondado chuiquidên. Aden chuishumbic, Acten tantanec mêtiquiadquido tantanec nidanenubi

⁴⁴ tantiantiapimbocquido cano cuêsh-cuêshêdaid bedbanash noadec tantanquido tsibanec nidta, quequin chuipondash sondado chuiquidên canon antabêdtoquido chuiquin. Aden ambi chiaapadquiec nidanec mentoadenquo yec abitedi nidaid yacno choash dectatocuededpondash abitedi.

28

Madta caid yacno Pabadobêd icquido choaid

¹ Adec nidaid yacno choash dectatoneshun, Nêid acte nênantan nidaid nactnêdquid Madta caid nec, qesho tantiabededpondash.

² Ambo tabadquidon abitedi bédamboen yuedpondash. Iquen uampamboec ue sequenubi Madta caid yacno chosho isun cuête dêtsiadoshon, Cuêec cho, quequin chuipondash.

³ Adnubic Pabadontsen cuête tanunquiocquid bedtanquin tsindoquin masandopondash. Aden masandoaid nêdênquiacnoêsh puduenquin nisin Pabado mêpepondash.

⁴ Aden mêpiash êchiquidenquo yec mêdiadsho isashien anocquido: —Nisin piad cuesunianquid nepanui. Mentoadenquo yec actenuêsh dectatoacsho nisin piac unêschitequien iquec. Abi icsaid cuidtequidien nechitec.

⁵ Adec onquecuedednubien Pabado comapenen uicac nisi cuête dêtsiadaidên nêpaêdpondash. Adnubien Pabado abi bédambo icpondash.

⁶ Aden Pabado uicac nisi paêdsho isun Pabado mêdante mêbidisquetsiashe. Isnu, quequin isbededpondash. Aden tantiaquin yuen cainquin mêbidisquencocsho isash, Nisin mêpeboed utsibon papa cain cuênaid nepanui, quecuededpondash Madta caid yacnocquido.

⁷ Madta caid yacnocquido tsusio dapan shubu anoentsêqui icpondash. Tsusio dapa Pudio cuêmêdquid icpondash. Aidêmbi aton shubu yacno canon choboedotedi yuedshun abentsêc chotsêcnuc ushquin êbitedi bédambo icmepondash.

⁸ Adnubien Pudion papa chumbo yec pienec aton madon shubu nuntan uepondash. Adec Pudion papa uec qesho tantiaash Pabado aid isec nidshun ashunquibi Nuqin Papa chuishumbic Pudion papa damishquin bédamepondash Pabado.

⁹ Pudion papa bédanacsho isash Madta caid yacnocquido nênquidbêd daicsaid chedo chopondash. Êbitsen bédametsiashe, quiash cho-chosho aidotsen bédamepondash Pabado.

¹⁰ Adosho isun canon choquido bédamboen tabadmepondash anocquidon. Nidnuesho tantiaashun menbampondash mitsana nibêdec quequin.

Doma yacno Pabado choash tabadaid

¹¹ Adashic ushê 3ted nidmiashe Madta caid yacnoêsh puduampondash. Madta caid yacno choash cano icbo, Iquenoampamboec icnuc nêmo tabadnuna, quiash tabadash: —Nidnu. Nid —quianec aton cano antabêdtoshon isun Pabadobêd icquido sondado chuiquidên antabêdtomepondash. Aid cano shubu dadpen icquid Adecandedia caid yacnoêsh chopondash. Cano ichon papa cain cuênaid daêd ambi tantiaidbimboecnuc cano dêdectanquin nacenaid icpondash. Ambi papa cain cuênaid abentsêc Castod icnuc utsi Podus icpondash. Adembidi aton cano cuêmpondash ichon.

¹² Aidên puduanec nidequi acte nênantan nidaid nactnêdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash.

¹³ Ambo tabadash puduanquin aid acte nênantan nidaid nactnêdquid cuêma anoentsêqui potequi nidaid Itadia caid cuêmano choashun shubu dadpen icquid Dequo caid yacno buampondash. Ambo choash ushash badiadash puduanec nidec cano tsitsumishun cunquequidên buanac badiad utsin shubu dadpen icquid Puteyodi caid yacno chopondash.

¹⁴ Ambo choshon Pabado**ëd** icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidob**ëd** tabadashic auëshquio utsibo uanec podqued**ën** nidequi shubu dadpenquio icquid Doma caid yacno chopondash Pabado**ëd** icquido.

¹⁵ Podqued Apio caid**ën** choec, quequin chuituidac Esuquidistu tantiaquid Doma yacnoquid utsi-utsiec Pabado b**ë**quedec nidanepondash. Adecbidi Esuquidistu tantiaquid utsibo shubu dadpen icquid Tabednas Abents**ëc** chotsec quequin cu**ën**aid yacnoquido Pabado b**ë**quedoaic nidaneoapondash. Aido cho-chosho isashien, **Ë**bi dayacquo icmenuen n**ë**idtedi mimbi chomioc, Papa, quec dayacquo iquebi, quiampondash Pabado.

¹⁶ Adec aido b**ë**quedec choash aucbidi nidec Pabado**ëd** Doma yacno choapondash. Doma yacno choacshobien Pabado qu**ën**ën nauedenquocquin shubun tabadmepondash sondado abents**ëc**shun ab**ëd** tabadquin isubi.

*Doma yacnoshon Pabado*n* Esuquidistu chuibante*

¹⁷ Adec aton shubun tabadec 3tedec ushun isadaidbo tsusiobo chuinuequin, Aido chome, capondash. Aido chomiachso isun Pabado nadopondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin chiaid niacambo iccombi. Adoenquiocshobi Edusaden yacnoshon nuquin matses**ën** bedshun domanobo chuiquid meniondashi.

¹⁸ Aden meniac domanobo chuiquid**ën**, Mimbi naid chuiban, cac chuibanondambi. Aden chuibansho tantiash, Un**ës** uainquioctiadquidi mimbi naic, quepondash domanobo chuiquid **ë**bi caic.

¹⁹ Aden domanobo chuiquid**ën** tantianubi nuquin matses tsusiobon, Un**ës** uatiad, quequin chiac, Empedadod, Sesad yacno nidshun **ë**mbi naid chuite bunebi, quequin chuipondambi, Con matses icsambo iquec, quenquiocquin.

²⁰ **Ë**mbi chuiboed mibi chuinuequin mibitedi chomiombi. Un**ës**ash uincuenta nec, quequin tantiaquin nuquin matses**ën** cainacpaden cainquid icsho m**ët**aniaid nebi — quepondash Pabado isadaidbo tsusiobo chiec.

²¹ Adoacquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacno**ë**sh choquido, Pabado icsambocquid nec, quequin chienquioccosh.

²² Padnueni mimbi tantiaid chuisho tantiate bunec. Utsi dadpen Quidistubo icsambocquid nec, quec — quepondash isadaidbo Doma yacnoquido tsusiobo Pabado caic.

²³ Aden Pabado*n* tantiaid tantianuec, N**ë**idted ushash padpidec choaindabi, quianec nidanepondash tsusiobo. Adec nidaniash ambi chiac**t**edec ushash Pabado tabadacno choapondash isadaidbo tsusiobob**ëd** utsibo dadpen. Adec cho-choash tabadsho isun: —Matses icsaquid icsho Nuquin Papan cuidnushe qu**i**ash abided cuidadec Esuquidistu un**ës**pan**ë**dash. Aid tantiaquid yec Nuquin Papab**ëd** tabadendac, quequin Pabado*n* chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidb**ëd**tabi Nuquin Papan naden nanun chiaid ambi utsibo dada uamiampid chuibampondash Pabado*n*. Ambi dada uamiampid**ën** chiaid Nuquin Papan madombo Esuquidistu nec, quequin badiadnubi chuiquin tauashun in**ch**ëshbudts**ë**qui chuiquin **ëm**pondash Pabado*n*.

²⁴ Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash.

²⁵ Aden abents**ëc** tantiachimboen tantiatiapimbo yec comapenec onquesho tantiashien Pabado nadpondash. —Nuquin Papan Mayan**ën** Isayas dada uamequin nuquin tsusedpabo naden chuipampic:

²⁶ “Isadaidbo caid yacno nidshun naden chuita. Mibitedishun tantiad**ed**-tantiad**ed**quimbi abimbo tantienquio iquendac; Adembidi **Ë**mbi nadatiambocquin nabanaid isted-istedquimbi abimbo isenquio iquendac.

²⁷ B**ë**damboen tantiaboedobi n**ë**bi min matses pamum**ëd**ac**im**boec tabadec; pashuac**im**-boen tantiec tabadoaic; ushac**im**boecbidi tabadoaic.

Adec tabadenquiocquin **ë**mbi nabansho mimbi istsiac. Adembidi **ë**mbi chiaid mimbi tantiatsiac. Aden tantiashun mibi icsaid mimbi **ën**tsiac.

Adquiduidi **ë**mbi b**ë**dambo ic**im**aid nendac.”

²⁸ Adesa mibi icnuc isadaidp**em**bo Esuquidistu chuimembi. Aden aidi chuisho aidon tantiendac —quepondash Pabado

²⁹ Nuquin Papan dada uamiampicpaden chuiquin isadaidbo Doma yacnoquido tantiamenuec. Aden chuisho tantiash isadaidbo nidanepondash.

³⁰ Adembidi seta da**ëd** matamec tabadquin Pabado*n* Esuquidistu chuibampondash. Aton shubun tabadquin abi isedec choquid**t**edi Pabado*n* yuedpondash.

³¹Utsi, Chën, quenquiocnobi dacuëdenquiocquin, Nuquin Papabëd tabadte iquec, quequin huibampondash. Adembidi Esuquidistu tantiamenuen chuibampondash Pabadon.

Padi. Esuquidistun, Ëbi chuibeneta, caidon naid chuibanquin aidtedi dada uaombi, Teyopido.

DOMA YACNOCQUIDON ISTE

Tauamboen chiaid

¹ Esuquidistun yuambo Pabado nebi. Aidën: —Ëbi chuibeneta —caidquio nebi. Adembidi Nuquin Papantsen: —Con Mado chuibeneta —caidquio nebi.

² Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë.

³ Aden Nuquin Papan chiampicpadquid chidon tishaid yec isadaidbo chuiquid dapa Dabid icpampidën tsyuecquid Esus nec.

⁴ Aid abipadquid icsaisa icsho Nuquin Papan: —Con Mado yec abitedishun Icho neque. Matses tantiamenu —quequin uincuemepac caondash. Aidquibi Nuquin Icho Esuquidistu nec.

⁵ Aidën: —Pabaton chuibeniatic isadaidpembon matses utsibontsen ma ëbi tantiaquin ëmbi chiacpadoamboen nanu —quequin ambi naid chuibenequidquio Esusën icmepondashi.

⁶ Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiatic.

⁷ Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuededquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

Doma yacnocquido iste Pabado bunaid

⁸ Tantia. Mibi chuinu. Esuquidistun tantiacpaden Nuquin Papa mibi chianembi. —Mibi bëdamboshë iquec, Papa. “‘Doma yacnocquido Esus tantiec tabadosh,’ quequin nidaid utsi-utsiec yacno chiac caosh,” quiosh. Mimbi nac aido bëdambo iquec, Papa —quequin Nuquin Papa chianembi.

⁹ Aden mibi bëshunenquio icquin Nuquin Papa chianembi. ¿Muectabi nepe? Padenquio. —Pabaton abimbo chiosh —quetsiash Nuquin Papa abi tantiaquidquio icquin ëmbi aton Madon naid chuibenenec.

¹⁰ Nadembidi Nuquin Papa chianembi. —Doma yacnocquido istantiadquio iquebi. Mimi nidmiatic nëbi nidtsiabi, Papa —quequin chianembi.

¹¹ Aden mibi istantiadquio iquebi. Mibëd icquin Nuquin Papan chiaid chuibantsiambi. —Nuquin Papan Mayanën tantiamiacpadoamboen chieshtoenquio icquin Esus tantiaquionona —quequin mibi chuibantsiambi.

¹² —“Chieshtoenquio icquin Esus tantianuna,” quec chuinanec bëdamboec tabadec aidobëd bëdambo ictsiabi —quiash mibi iste bunebi.

¹³ Tantia, con utsibo. Mibi yacno ëbi nidtsemboed mimbi tantiabien icchiteque. Mibi chuinu. —Shubu dadpen icquid Doma yacnocquido istanu —queuid-queuidobi. —Nidnu —queshobi Nuquin Papan nac nidenquio iccobi. —Ëmbi Esusën naid chuibanac matses utsibon dadpeshun Esus tantiabencapadoamboen ma Doma yacnocquidon utsibontsen Esus tantianu —quiash mibi yacno nidtiadquio iquebi.

¹⁴ Esuquidistun chiacpadoamboen ambi naid matses abitedi chuibantiadquio iquebi. —Dadpen tantiaquidobëdtabi tantienquio icquidotsen chuibenenu. Adembidi dada uaquidobëdtabi dada uainquio icquidotsen chuibenenu —quiash nebi.

¹⁵ Aden chuibenequi shubu dadpen icquid Doma yacno nidshun mibitsen Esusën naid chuibantiadquio iquebi.

¹⁶ Esusën naid chuibenec bëdambo iquebi naden tantias. —Nuquin Papan tantiacpadecc matses cuidmenquio icnuec Esus abided cuidadec unëzac caondash. Aid tantias. Nuquin Papan matses cuidenquio iquec. Abia chiaidon isadaidbon Esus tantias. Nuquin Papan cuidenquio icquin isadaidpembon matses utsibontsen Esus tantias. Nuquin Papan cuidenquio iquendac —quiash Esusën naid chuibenec bëdambo iquebi.

¹⁷ Esusën naid chuisho tantias nuqui naden tantiec. —Nuquin Papan chiaid niacniachoedombi Esus tantias. Nuquin Papan nuqui bëdamboen isbenec ambi chiaid niacniacacmaidbimboecnuc —quequin nuqui tantiapec. Adembidi chuiquin Nuquin Papan isadaidbo tsusedpa dada uamepampic. “‘Nuquin Papa ambi chiacpadoamboen naquidquio nec,’ quequin abi tantiec tabadquid Nuquin Papan bëdamboen isec,” quequin dada uamepampic.

Matses utsibo icsamboec tabadaid

¹⁸ —Abi tantiesia cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecuidi tabadte bunquin matses dadpeshun Nuquin Papan cuidte tantiatiapimbo iquec.

¹⁹ Abi tantiametequid ambi uaid isun Nuquin Papa tantiatadquidi Nuquin Papa tantiate bunenquio matses icpec. —Adquidshenda Nuquin Papa nepc —matses camenuen Nuquin Papan abitedi uapampic.

²⁰ Nidaid uaquinc cuëte uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nëid uaquidien nadquio icchitec. Nibëdantiapimbo icquidien nechitec. Abipadquid utsi nibëdnuc comapenen tantiaquin nabanquidquio yec abitedishun Ichoen nechitec —quetiadquidi adenquio matses iquec. Adquid Nuquin Papan cuidendac.

²¹ Ambi uaid isash: —Nëid uaquid bëdambo iquec. Aidëmbien ëbi nashunchitec —quetiadquidi pamumëdacbimboecquin Nuquin Papa tantiatiapimbo matses iquec.

²² —Dapen bëdamboen tantiëmbi —quequimbi tantienquio matsesën iquec.

²³ Aden unëstiapimbo icquid Nuquin Papambo tantiatiapimbo icquimbi unësquid-uidquio tantiaquin aidbimboecnuc nacnenshun papa quequin chianec. Utsibon matsesbimboecnuc nacnenshun: —Ëbi bëdamboen ista, papa —quequin ambi nacnenaïd chiec. Utsibombic aben icquid nidaidëñ capuquidbimboecnuc nacnenshun adembidi chiec. Utsibombic uicchnu podochoquidbimboecnuc nacnenshun adembidi chiec. Utsibombic aben icquid tacbidëñ siuidquidbimboecnuc nacnenshun adembidi ambi nacnenaïd chiec. Ënden adquio matses yampicpadomboembidi nëbi adomboembidi matsesën naic.

²⁴ Adsho isash Nuquin Papa: —Ma bëdamboec tabadnu —queuidboedi icsamboecuidi matses tabadsho isash: —Ma ambi tantiacpadequi icsamboec tabadpanu —quiampampic. Adnëdambic nëbi abi bunacpadec icsamboec tabadec utsin chido chudteuidi bunquiec dada. Adecbidi aton bënëpenquio chudmeteuidi bunquiec chido.

²⁵ —Abitedi uaquidquio Nuquin Papa nec —quequin abimbo tantiatadquidombi Nuquin Papan uaidobi utsi-utsien chuiquin papa cabededpec. —Nuquin Papambobien bëdambohë iquec —quequin ënenquio icquin chuitiadquidi aidon padenquio icpec.

²⁶ Adsho isash: —Ma abi bunacpadec icsamboec tabadpanu —quiampampic Nuquin Papa. Adnëdambic nëbi icsabudquiec dada bunenquio yequi chido daëdi dachudnanec.

²⁷ Adecbidi chido bunenquio yequi dada daëdi chichudnante natia bunquiopec. Aden ambi chiaid niac-niaquec icsamboec tabadsho Nuquin Papan cuidendac.

²⁸ Adec abi tantiate bunenquio icsho isash: —Ma bëdamboec tabadnu —queuidboedi Nuquin Papa: —Ma abi icsate bunacpadequi tabadpanu —quiampampic. Adnëdambic nëbi pabiate shëcuë nibëdacbimboecquin Nuquin Papan chiaid niac-niaquec icsamboec tabadpec bëdambo ictiadquidobi.

²⁹ Nadquido icsamboec tabadquido nec. Nëidic aton chidopenquio chudquido. Nëidic aton bënëpenquio chudmequido. Nëidic icsamboshë icquido. Nëidic aton na dadpen bedteuidi bunquido. Nëidic chieshquido. Nëidic matses utsibobimboec icte bunec chieshëmëñquido. Nëidic cuesunianquido. Nëidic chieshëmëñquido. Nëidic muaquido. Nëidic icsa uate bunquido. Nëidic utsibo icsaiduidi chuiquido.

³⁰ Nëidic ambenquidobi chuishunquin chieshënquin muauaquido. Nëidic Nuquin Papa chieshënquido. Nëidic mamënshumënquido. Nëidic utsibo nashunenquio icquin aton nauidi naquido. Nëidic: —Ëbiuidtsëqui bëdambo iquebi —quequido. Nëidic: —ËIcsaquin atotsimbi utsi nape? —quec icsate bunquido. Nëidic anibëdtan amën chiaid niac-niacquido.

³¹ Nëidic piushbimboecquin Nuquin Papan chiaid tantienquio icquido. Nëidic aton matses tantienquio icquido. Nëidic nëishash baded nëish bëdanenquio icquido. Nëidic utsibo bëdamboen istiapimbo icquido. Adquidtedi Nuquin Papan chiaid niac-niacquiec icsamboec tabadquid nendac.

³² —Abi icsaid ëntiapimbo icquido Nuquin Papan cuidquin chian anëdënquiacno nësecaïndac —quequin tantiequi ënëdenquio yec icsaded-icsadedquiec. Utsibotsen icsasho isash cuishonquec. —Bëdambo iquec. Ëbipadquidquio nec —quepec.

2

Matsesën naid Nuquin Papan abimbo chuite

¹ Aden icsamboec tabadaïd ëmbi chuisho tantiash: —Adquid icsamboshë iquec —Ëquecta ique? —Aden naic aid icsaic —queboedi mibitsen adecbidi icsapec. —Icsaquidpenquio nebi —quec mibi muaic.

² Nuquin Papambien matsesën naidtedi tantiaquid icquin: —Nëido icsambo iqueque. Icsano nidmenu —quequin abimbo chiendac.

³ —Matses utsibo icsambo iquec —queboedombi mimbitsen Nuquin Papan chiaid niac-niacpec. Adash: —Nuquin Papan nuqui cuidenquoio iquec —¿quec? Mibitsen Nuquin Papan cuidendac.

⁴ Ambi uaido matses abitedi icsambo icsho isash unēsquoio icquin matses bēdamboen iste bunquin icsaidobi Nuquin Papan baded cuidenquoio iquec. —“Icsaboedi nēbi Nuquin Papan chiacpadec bēdamboec tabadtiadquoio iquebi,” quequin ma matsesēn ēbi tantianu —queshun Nuquin Papan matses baded cuidenquoio iquec. Abi icsaid ēnenquoio icsho isun cuidendac. ¿Adsho tantiashta mibi nadpe? —Mua. Nuquin Papan ēbi cuidtiapimbo iquec. Ambi chiaid niaquesambo nebi —¿quec? Adec onquec mibi muapec.

⁵ —Nuquin Papan chiaid niacboedēmbi ēnta —caqui: —Padi. Ēmbi naiduidi naic bēdambo iquebi —quequin ēnenquoio icquin Nuquin Papan chiaid niac-niacbudec icsamboecuidi mibi tabadec. Aden mimbi Nuquin Papa cuidmendac. Nuquin Papan matsesēn naidtedi chuite ushēmbi mimbi icsamboen naidtedi chuishun Nuquin Papan mibi cuidendac.

⁶ Matsesēn naidtedi tantiaquin matses cuidendac. Bēdambo icquido abēdi tabadmequin icsaido icsano nidmendac Nuquin Papan.

⁷ Abi tantiec bēdambo icquido: —“Mibi bēdambo iquec,” mabi Nuquin Papan canu —quiash abēd tabadte bunec Nuquin Papan chiacpadec bēdamboec tabadec nec. Aido unēsacsho Nuquin Papan abēdi tabadmendac padpidec unēstiapimbo icnuc.

⁸ Icsaquidoen Nuquin Papan chiaid chiaqui tantiate bunenquoio icquin aton nauidi naic icsamboecuidi tabadsho Nuquin Papan comapenen cuidendac.

⁹ Adoac icsamboec tabadquido abitedi natiacuededec tabadendac. Shubiquiendac. Con matses isadaidbo Nuquin Papan chiaid ambia tantiampidi icsasho cuidquin matses utsibosen icsasho Nuquin Papan cuidendac.

¹⁰ Abi tantiec bēdamboec tabadquido unēsacsho abi yacno tabadmehun: —Nēid bēdamboec tabadquid niondash —quequin utsibo tantiamequin Nuquin Papan bēdambo icmendac. Ambia Nuquin Papan chiaid tantiondaido Isadaidbo abi tantiaquid icsho abēdi tabadmequimbi matses utsibosen abi tantiaquid icsho Nuquin Papan abēdi tabadmendac.

¹¹ Icsamboec tabadquido icsano nidmequin bēdamboec tabadquido abēdi tabadmendac. —Isadaidboudtsēqui bēdamboen isembi —quenquoio icquin adoendac.

¹² Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiashi aidēn chiaid niac-niacquec icsamboec tabadsho adembiti cuidendac.

¹³ Ambi: —Naden nata —quequin chiaid tantiashumbic adomboen naisa bēdamboen istiapimbo icquin ambi chiacpadec tabadquid Nuquin Papan bēdamboen istsiash.

¹⁴ ¿Ada Nuquin Papan chiaid tantiacmaidon matses utsibon bēdamboec tabadte tantienquoio iccuedep? Ma bēdamboec tabadte abentse-abentsen ambembi tantietoc. Aden tantiaquin Nuquin Papan chiacpadomboen abentse-abentsen bēdamboen naic Nuquin Papan chiaid tantiashumbimboen.

¹⁵ Adec bēdamboec tabadec: —Bēdambo iquebi —quequin ambembi tantiec. Icsamboec tabadec: —Icsachitobi —quequin adembiti ambembi tantiec.

¹⁶ —Adec matses abitedi bēdamboec tabadte tantiequi adquec tabadenquoio iquec —queshun Nuquin Papan chiacpadēn Esuquidistun matses cuidendac. Matsesēn otacquoio tantiaidbēdta matsesēn ompoquin naidtedi ambembi tantiashun Esusēn matses cuidendac. Esus chuibanquin aden aidēn cuidte chiombi.

Isadaidbon Nuquin Papan chiaid niac-niacaid

¹⁷ Tanta, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidēn tsyuecquid icsho Nuquin Papan ēbi bēdamboen isec. Utsibon Nuquin Papa tantienquoio icnubi Nuquin Papambo con matsesbēdtambi bēdamboen tantiembi. Bēdambo iquebi —mibi quepec. Adboedi mibi icsaic.

¹⁸ Nuquin matses tsusiobon chuibanac Nuquin Papan ambi chiaid Moises dada uamepampid mimbi tantiec. Nuquin Papan chiacpadec utsibo bēdamboec tabadsho isash: —Aido bēdamboec tabadec —queboedi mibi bēdamboec tabadenquoio icpec.

¹⁹ Adecbiti: —Nuquin Papan chiaid tantiacmaido Nuquin Papan chiaidquoio chuibanquid nebi. Paposhquiachimboecnuc tantiamequidquoio nebi —mibi quepec. Adboedi aidēn chiaid niaquec mibi icsaic.

²⁰ —Chuisho tantiaibi icquido nēbi tantiabentsēcquidobēdta Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquoio chuibanquid nebi —mibi quepec.

²¹ Adec: —Nuquin Papan chiaid niac-niaquenda —queboedēmbi aidēn chiaid mimbi niac-niacquec. —Ampenda —queboedēmbi mimbitsen ampepec.

²²—Utsin chido chudenda —queboedëmbi utsin chido mimbítsen chudpec. Papa quequin matsesbimboecnuc matses utsibon nacnenaid isash: —Nuquin Papa tantienquo yec nëid nacnenquid icsambo iquec —queboedëmbi aidën nacnenaid tantiate shubun puduedshun mimbi ampepec.

²³—Nuquin Papan ambi chiaid con tsusedpa Moises dada uamepampid bedshun con matses isadaidbonuidtsëqui Nuquin Papa tantiec —queboedëmbi ambi chiaid niac-niaquec mibi icsamboec tabadec.

²⁴ Adec mibi icsamboec tabadte chuiquin Nuquin Papan naden dada uamepampic. “Isadaidbo icsamboec tabadsho isun matses utsibon: ‘Ambi Nuquin Papa caidtsëmbien icsambo icchitec,’ capendac,” quequin dada uamepampicpadquiec mibi icsamboec tabadsho isun matses utsibon Nuquin Papa bëdamboen tantienquo iquec.

Nuquin Papa tantiaquidquo icte chiaid

²⁵—Nuquin Papan matses nebi —quequin Isadaidbon Nuquin Papan aton tsusedpa chiampicpadomboen aton bacuëbo shui dëbid dëteshun secaic. Adonëdaid ambi chiaid niac-niaquenquo yec bëdamboec tabadsho Nuquin Papan bëdamboen istsiash. Isadaidbo utsibon ambi chiaid niac-niacsho Nuquin Papan bëdamboen istiapimbo iquec ambi con matses cacmaidobimboecnuc.

²⁶ Nuquin Papan con matses cainquo icpampido matses utsiboen ambi chiacpadec bëdamboec tabadsho Nuquin Papan bëdamboen istsiash ambi: —Con matses nec —caidobimboecnuc.

²⁷ Adec matses utsibo Nuquin Papan chiacpadec bëdamboec tabadsho isash isadaidbo nadec chiadpec. —Matses utsibo bëdamboec tabadnubi Nuquin Papan Moises dada uamepampid isban-isbanshumbi isadaidbon Nuquin Papan chiaid niac-niacpec. Isadaidbo matses dadpen icsambo iquec —cadpec.

²⁸ ¿Shui dëbid dëteshun secaquido isadaidbotedi Nuquin Papa tantiaquidomboda nedic? Padenquo. ¿Matses ismënen Nuquin Papan chiacpadomboen nashumbic ompoquin icsamboen naquido Nuquin Papa tantiaquidquioda nedic? Padenquo.

²⁹ ¿Ambi Moises dada uamepampiduidi ëmbimbo nanuequid Nuquin Papa tantiaquidquioda nedic? Padenquo. Nuquin Papa tantiaquidquien aton Mayanën tantiamiacpadec bëdamboec tabadec. Adquid: —Mibi bëdambo iquec. Con matses mibi canu —capec Nuquin Papan matsesën adoenuo icnubi.

3

Nuquin Papan isadaidbo tantiec, quequin chiaid

¹ Aden: —Abi tantiec bëdamboec tabadquid Nuquin Papan con matses catsiash —quequin ëmbi chuisho tantias: —¿Isadaidbo yecta icsambo icpec? —¿quecta ique? —Padenquo iquec —caimbi. —¿Ada aido ambi con matses caido Nuquin Papan nashunac? —¿quecta ique?

² Ai, aido nashunquiac. —Ëmbi chiaid dada uaid ma aidomba tantianu —quequin con matses isadaidbo tsusedpabo ambi chiaid Nuquin Papan dada uamepampic.

³ Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsinquien nainquo icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquo icpatsiash?

⁴ Padenquo. Ma ambi chiacpadomboen naquidquo Nuquin Papa neyoc. Muesambo nec. Matses abitedimbo muaquidquo icnuc Nuquin Papan abimbo chuiquidquo nendac. Aden chuiquin Nuquin Papan con tsusedpa dada uamepampic.

“Nuquin Papa abimbo chuiquidquo nec.
‘Nëid bëdambo iquec. Nëid icsambo iquec, quequin Nuquin Papan abimbo chuibanendac, quequin ma matsesën tantianu,’ quequin
Nuquin Papan: ‘Mibi icsaoc,’ quequin ëbi chuiboed chiombi,”
quequin dada uapampic.

⁵ Ëbi adsho bëdamboen tantiatia. Icsamboen tantienda. —Nuquin Papan chiaid niac-niaquec ëbi icsasho isash: “Adquidpenquo Nuquin Papa nec. Icsaisambo nec,” quetsiash con matses. Adec icsaquimbi ëmbi con matses Nuquin Papa bëdambo icte tantiameshobi Nuquin Papan ëbi cuidac icsambo ictsiash —quequin icsamboen tantienda.

⁶ Matsesën naid chiec Nuquin Papa muatiapimbo iquec. Abimbo chuibanendac. Icsaido chiec: —Mibi bëdambo iquec. Mibi cuidenquo iquëmbi —quetiapimbo Nuquin Papa iquec. Muesambo nec.

⁷ Nadëmbidi icsamboen tantienda. —Ëbi muaquidquo icnubi: “Adquidpenquo Nuquin Papa nec. Bëdambohë iquec. Muesambo nec,” quetsiash con matses. Adec muaquimbi

Nuquin Papa muainquo icte con matses tantiametsiambi. Aden ëmbi abi tantiameshobi Nuquin Papan ëbi cuidac icsambo ictsiash –quequin icsamboen tantienda.

⁸ Aden icsamboen chiec nuqui nadtsiac. –Nuquin Papa tantiamenuequi icsaquionona –nuqui quetsiac. ¿Adendambi chuidio? Padenquo. –Pabado chedo: “ ‘Nuquin Papa tantiamenuequi icsaquionona,’ quiosh,” quequin mibi muauaosh –quequin chuituidoshi. Ëbi muauaquido Nuquin Papan cuidchitoshon.

Matses abitedi icsaquido nec, quiaid

⁹ Tantia, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niac-niacnubida nuquiuidi Nuquin Papan chiaid niac-niaquesa icpe? Padenquo. Nuquin Papan chiaid niaquesamboen nibëdec. Matses utsibo con matses isadaidbobëd abembi bëdamboec tabadtiapimbo iquec. Abitedimbo icsamboec tabadquido nec. Aden mibi chiombi.

¹⁰ Aden chuiquin Nuquin Papan dada uamepampic naden.

“Nuquin Papan chiaid niaquesambo nibëdec.

Abitedimbo icsaquido nec.

¹¹ Nuquin Papa tantiaquin ambi chiacpadomboenuidi naquidquo nibëdec.

Nuquin Papa tantiate bunquidquo nibëdec.

¹² Bënudshun podqued tantienquo yacimboen Nuquin Papa tantienquo icquin matses abitedishun ambi chiaid niac-niaquec.

Adsho isun Nuquin Papan: ‘Abitedimbo icsambo iquec,’ capec.

Ambi chiaid niaquesambo nibëdec.

Abitedimbo icsapec.

¹³ Nadquo iquec. Nëid icsamboec chuishumënquido. Unësaid ënden chococacno shëdec: ‘Pisenac,’ quequin tantiacimboen adquido onquesho tantias: ‘Icsambo icquido nec,’ quequin matsesën tantiec.

Nëidic muaquido.

Nëidic nisin pequin icsa uacimboen icsa uate bunec icsamboec onquequido.

¹⁴ Nëidic nëishash chieshëmëdec: ‘Unëschitoshon,’ quequin icsamboenuidi chuiquido.

¹⁵ Nëidic intac mëyamec badedquo cuesunianquido.

¹⁶ Nëidic abëd icquido natiamec chieshëmënquido.

¹⁷ Adquidtedi cuesnante bunec bëdamboec tabadtiapimbo iquec.

¹⁸ ‘Nuquin Papan cuidnushe,’ quenquo icquid Nuquin Papa tantiesabo nec,”

quequin dada uamepampic.

¹⁹ Aden ambi: –Abitedi icsambo iquec –quequin chiaid Nuquin Papan con matses isadaidboba tantiamenuen con tsusedpa dada uamepampic. Aden dada uamiampid tantiasun: –Icsaquidpenquo nebi –quequin isadaidbon Nuquin Papa chuitiapimbo iquec. –Icsaquido abitedi nec –quequin Nuquin Papan matses utsibo abitedibëdtabi isadaidbotsen chiac: –Abimbo chiec –quiash dacuëdec ëcbedanenquo tabadendac matses abitedi.

²⁰ Aden ambi chiaid niaquesambo nibëdnuc: –Ambi chiaid niaquesa icsho Nuquin Papan nuqui bëdamboen isec –quequin nuqui abimbo chuitiapimbo iquec. Nuquin Papan chiaid isash: –Ambi chiaid niac-niaquec icsamboequien nuqui tabadchitec –quequin nuqui tantiapec.

Nuquin Papa matses bëdamboen ismete chiaid

²¹ Aden ambi chiacledi natiapimbo yec matses icsasho isun Nuquin Papan abi matses bëdamboen ismete chuiquin isadaidbo tsusedpa Moisesbëda tsusedpabo utsibo dada uamepampic ëndenquimbo. Aden ambi dada uamepampicpadomboen nëbi Nuquin Papan abi matses bëdamboen ismequid matsesmepac caondash.

²² Adoac Nuquin Papa abi tantiaquido bëdamboen ismenuec Esuquidistu abided cuidadec unëspac caondash. Nëbi aidquo tantiasho Nuquin Papan matses bëdamboen isec. Isadaidbobëdtambi matses utsibotsen Esus tantiasho adoendac.

²³ Adec matses abitedi Nuquin Papan chiaid niac-niaquec icsaquido yec Nuquin Papan padquid icsaisambo nibëdec.

²⁴ Adquid bëdamboen istiapimbo icquin matses bëdamboen iste bunquin aton Mado Esuquidistu abided unës uamequin Nuquin Papan cuidpac caondash. Nëbi abided cuidadaid Esus tantiasho nuqui bëdamboen isec icsaisabimboecnuc.

²⁵ –Icsaido cuidquid icquimbi nuqui cuidenquo icnuen Nuquin Papan nac –nuqui camenuen Nuquin Papan nuqui icsaid bedshumequin Esuseded unës uamequin cuidpac caondash. Esus tishabi icnuc Nuquin Papan abi tantiaquido cuidenquo icpampic: –Yuecshun con Madoded cuidendambi –quequin tantiaquin.

²⁶ Nēbi adecbidi: —Icsaido cuidquid nebi —quequimbi Nuquin Papan ambi chiacpadec nuqui icsaid bedshunec abided cuidadaid Esus tantiasho adembidi nuqui bēdamboen isquin cuidenquo iquendac.

²⁷ Ēmbi aden chuisho tantiash: —Ambi chiacpadomboenuidi nasho Nuquin Papan bēdamboen isebe —quequin mimbi abimbo chuítiapimbo iquec. Matsesēn Nuquin Papan chiacpadomboenuidi natiapimbo icsho bēdamboen istiapiimbo icboedi nēbi Esus tantiasho Nuquin Papan nuqui bēdamboen isec.

²⁸ Aden matsesēn ambembi naquin Nuquin Papa bēdamboen ismetiapimbo iquec. Paden nuen utsin: —Matsesash ēbi icsaid bedshunec abided cuidadaid tantiasho Nuquin Papan ēbi bēdamboen isec —quequin Esus tantiasho Nuquin Papan bēdamboen isec.

²⁹ ¿Isadaidbouidida Nuquin Papan bēdamboen ispatsiash? Padenquo. Matses utsibo isadaidpembobi Nuquin Papan bēdamboen istsiash.

³⁰ Matses abitedi uaquid icquin ambi chiacpadomboen isadaidbon Esus tantiasho Nuquin Papan bēdamboen isec. Adembidi matses utsibon Esus tantiasho Nuquin Papan bēdamboen isec.

³¹ Adoaido: —Nuquin Papan chiaid niac-niaquec icsamboec tabadnuna —¿quecta icpec? Padenquo. Esus tantiaquido icquin Nuquin Papan chiacpadomboen natiadquo nuqui yanec.

4

Nuquin Papan Abadauan bēdamboen isaid

¹ Tantia. Aden Nuquin Papan bēdamboen iste chuiquin isadaidbo tsusedpa Abadauan caid ėnden icpampidtsen mibi chuinu. ¿Atotsieshun Nuquin Papan Abadauan bēdamboen isbempampic?

² Bēdamboecuidi tabadsho Nuquin Papan bēdamboen isaid yec Abadauan: —Bēdamboecuidi tabadquin Nuquin Papa bēdamboen ismembī —quetsempampic. Abadauan bēdamboecuidi tabadambo. Adsho: —Bēdamboecuidi tabadsho Abadauan bēdamboen isembi —quenquo icpampic Nuquin Papa.

³ Nuquin Papan tantiamic naden Abadauanēn nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bēdamboen isendambi,’ qeshun Nuquin Papan bēdamboen isbempampic icsaisabimboecnuc,” quequin chuiampic.

⁴ Matsesien adenquo iquec. —Ambi chiacpadomboen nasho icbon yua bēdamboen isquid —nuqui quepec.

⁵ Nuquin Papambien nadotsiash. Matses icsaboedi: —Bēdambo icquid icquin ambi chiacpadomboen Nuquin Papan naindac —quequin abi tantiasho Nuquin Papan bēdamboen isbentsiash icsaisabimboecnuc.

⁶ Adembidi Nuquin Papan tantiamic ambi bēdamboen iste chuiquin con tsusedpa Dabidēn dada uapampic naden.

⁷ “Ambi chiaid niac-niacboedēmbi: Bēdambo icquid icquin Nuquin Papan ambi chiacpadomboen naindac,

quequin abi tantiasho Nuquin Papan ēbi bēdamboen isec ēbi icsaid bēpiscudacimboen. Icsaisabimboecnuc ēbi bēdamboen isquin ēbi cuidenquo iquendac,’ quiash matses bēdambo yec cuishonquec.

⁸ ‘Abi tantiaquid icsho isash ēbi icsaid bēpiscudash:

Ēmbi chiaid mimbi niac-niaccoque. Mibi cuidnu, Nuquin Papan ēbi cainquo iquendac,’ quiash matses bēdambo iquec,”

quequin Dabidēn chuiampic ėndenquimbo.

⁹ ¿Shui dēbid dēteshun secaido isadaidbouidida Nuquin Papan bēdamboen ispec? Padenquo. Matses utsibotsen bēdamboen istsiash. Tantia. Ēmbi chuiboedbidi chuioanu. Abi tantiaquid icsho Nuquin Papan Abadauan bēdamboen isbempampic ambi chiaid niac-niacmaidbimboecnuc.

¹⁰ ¿Ambi chiacpadomboen shui dēbid dēteshun secacshoda Nuquin Papan Abadauan bēdamboen isbempampic? Padenquo. Shui dēbid dēteshun secabi icsho Nuquin Papan Abadauan bēdamboen isbempampic.

¹¹ Bēdamboen isbenshumbic: —Abadauan, ēmbi chiacpadomboen nabenta. “Nuquin Papan bēdamboen isaído nebi. Aid bēshunchitomane,” qeshun min matsestedi shui dēbid dēteshun secabanta —capampic Nuquin Papan. Adoac Abadauanēn nabempampic. Aden shui dēbid dētiacmaid icquin Abadauanēn Nuquin Papa tantiacpadomboen nēbi shui dēbid dētiacmaidon Esus tantiasho Nuquin Papan bēdamboen isendac ambi chiaid niac-niacmaidbimboecnuc.

¹² Abadauanën tsyuecquido isadaidbo Abadauambimboecquido Nuquin Papa tanti-
aquido abi iquec. —Shui dëbid dëtemenëdaid icsho Nuquin Papan bëdamboen ise-
ben quenuo icquin Nuquin Papabëdta Esus tantiasho isadaidbo Nuquin Papan bëdamboen
isaido abi iquec.

Nuquin Papan Abadauan chiaid

¹³ Èndenquimboshë Nuquin Papan Abadauan naden chuipampic. —Abadauan, mibi
nibëdanan yuecshun min tsyuecquid abentsëcshun utsibo bëdambo icmendac. Nidaid
utsi-utsiec yacno tabadquido adoendac —quepampic Nuquin Papa. —Min tsyuecquid
abentsëqui tantiasho matses bëdamboen isendambi —quequin otacquo tantiaquin Nuquin
Papan adopampic. ¿Ambi chiacpadomboenuidi Abadauanën nashoda Nuquin Papan aden
chuipampic? Padenquo. Nuquin Papan chiaic: —Ai, abimbo caic —queshoen Abadauan
bëdamboen isbenshun Nuquin Papan adopampic.

¹⁴ ¿Nëbi: —Moisesën chiaid niaquesa icsho Nuquin Papan bëdamboen ise-
ben muaquidoda Nuquin Papan bëdamboen ispadic? Padenquo. Adec muaquidobi bëdamboen
isquin ambi Abadauan chiaid niactsiash. Adotiapimbo icquin ambi chiacpadomboen
Abadauanën tsyuecquid tantiaquidoen bëdamboen isec.

¹⁵ —Moisesën chiaid niaquesambo nebi —queboedombi aidën chiaid niac-niacsho isun
Nuquin Papan cuidendac. Ambi chiaid niaquesambo nibëdec. Nuquin Papan: —Bëdamboec
tabadta —quequin chiaid nibëdnuc ambi aden chiaid matsesën niactiapimbo ictsiash.
Ambi: —Bëdamboec tabadta —quequin chiaid abi iquec. Aid niaquesambo nibëdec.

¹⁶ Nuquin Papan naden Abadauan chuipampic. —Abadauan, ëmbi chuisho tantiash:
“Mimbi abimbo caic,” quesho mibi bëdamboen isquin min tsyuecquido bëdambo icmen-
dambi —quequin chuipampic. Nëbi ambi chuipampicpadomboen naquin Esus tanti-
aquido Nuquin Papan bëdamboen isec. Nuquin Papan ambi chiaid dada uamepampidën Moisesën
tsyuecquido isadaidbon Esus tantiasho Nuquin Papan bëdamboen isec. Abadauanën
Nuquin Papa tantiacpadomboen matses utsibontsen Esus tantiasho adembidi bëdamboen
isec. Esus tantiaquidtedishun papabimboecquid Abadauan nec. Ambi Nuquin Papa
tantiacpadomboen nuqui tantiec.

¹⁷ Ambi aden Abadauan chiampid chuiquin Nuquin Papan isadaidbo tsusedpa naden
dada uamepampic. “Mibi unësan yuectaneshun min tsyuecquido nidaid utsi-utsiec yacno
tabadquido icmendambi. Aton papabimboecquid mibi iquendac,” quepampic Nuquin
Papa. Adoaquien: —Abimbo mimbi caic —quequin Nuquin Papa Abadauanën tantia-
pampic. —Comapenen tantiaquin unësaid uincuemequidquo icquin ambi chiacpadom-
boen ëbi bacuë tishmendac —quequin Abadauanën Nuquin Papa tantiapampic. Nëbi ambi
Nuquin Papa tantiacpadomboen Esus tantiaquido: —Nuquin papabimboecquid Abadauan
nec —quepec.

¹⁸ Nuquin Papan: —Min tsyuecquido dadpenquo iquendac —cac: —¿Mitsipadoac aidtedi
con tsyuecquido icpec? Ma con bacuëbo nibëdpayoc. Tsusiombo icquin bacuë tish-
metiapimbo iquebi —queuidboedi Abadauan nadpampic. —Ai, abimbo mimbi caic —
quepampic aton mado nibëdnubi. Adshun tsusioctscquo icquimbi aton mado tish-
nepampic. Nëbi aton tsyuecquido dadpenquo iquec Nuquin Papan chiampicpadequi.

¹⁹ —Con seta dadpenquo 100tedi icnuc tsusiobudtsëcshun ëmbimbo bacuë tishme-
tiapimbo iquebi. Con chido èndenquo machobudtsëccondaid icquin bacuë usundoti-
apictscquo iquec —quequin tantiequi: —Nuquin Papan abimboen caosh —quepampic.

²⁰⁻²¹ —Nuquin Papa mue nec —quenquo yec: —Nadatiambo icquid icquin ambi
chiacpadomboen Nuquin Papan naic —queshun Nuquin Papa tantiatsëcboedëmbi aid
tantiaquiopampic. Adshun: —Mibi bëdamboshë iquec, Papa —quequin Nuquin Papa
chuipampic.

²² Adsho tantiashun Nuquin Papan bëdamboen isbempampic icsaisabimboecnuc.

²³ Aden Nuquin Papan ambi Abadauan bëdamboen isaid isadaidbo tsusedpa dada
uamepampic. ¿Abadauanën naiduidi tantiamenuenda aden dada uamepampic?

²⁴ Padenquo. Nuquitsen Nuquin Papan ambi bëdamboen iste tantiamenuen aden dada
uamepampic. Nuquin Icho Esusbëdta abi uincuemequid Nuquin Papa tantiasho nuquitsen
bëdamboen isec.

²⁵ Nuquin Papan tantiacpadec nuqui cuidmenquo icnuc nuqui icsaid bedshunec
abided cuidadec Esus unëspanëdash. Aden Nuquin Papa abi tantiaquido bëdamboen is-
menuec unëdash uincuepanëdash Esus.

5

¹ Aden Esus tantiasho Nuquin Papan bédamboen isaido yec abi cuidte dacuëdënenquo yec abëdi nuqui bédamboec tantiananec.

² Èmbi chuibocpaden abi tantiaquido nuqui cuidmenquo icnuec abided unësquin Esusën Nuquin Papa nuqui bédamboen ismepec. Adoac nuqui nadpec. —Nuqui bédamboen isquin unësacsho nuqui abipadquid icsaisa icmequin Nuquin Papan abëdi nuqui tabadmendac — quec nuqui cuishonquec.

³ Nadectsen nuqui cuishonquec. —Esus tantiaquid icsho utsibon chieshënaqui Esus tantiatsëcboedi chieshtoenquo icquin Esus tantiaquidquo yanebi —quectsen nuqui cuisnonquec.

⁴ Aden chieshtoenquo icquin Esus tantiasho Nuquin Papan nuqui bédambo capec. Adoac: —Esus tantiaquid icsho Nuquin Papan ëbi bédambo icmec. Unësacsho abi yacno ëbi tabadmendac ambi chiacpadomboen —quepec nuqui.

⁵ Adec: —Abi yacno ëbi tabadmendac —quequin Esus tantiaquid çada Nuquin Papan cacumepec? Padenquo. Aton Mayan nuquibëd icmiac paposhquiacbimboen nuqui naden tantiec. —Nuquin Papan ëbi bédamboen tantiaquin abi yacno ëbi puduedmendac —quequin nuqui tantiec.

⁶ Aden matses tantiaquiec Nuquin Papan tantiacpadec Esus nadpanëdash. Matses abitedi abembi bédamboec tabadtiapimbo icsho isun Nuquin Papan uesquin cuidtsenubi abi tantiaquido cuidmenquo icnuec abided ciudadec Esus unësapanëdash.

⁷ ÇAda adquid matses icpadic? Padenquo. ÇCuesanquidën matses bédambo icquid caic: —Cuesnu —quesho tantiashunda dadpeshun: —Aid cuesenda. Èbiquien cuesta —capatsiash? Padenquo. Bédamboshë icquid cuesmenquo icnuen: —Nëid cuesenda. Èbiquien cuesta —cachitembien ictsiash abentsëcshun. Icsambo icquid icshoen aden chienquo ictsiash.

⁸ Padnuen matses abitedi icsamboecuidi tabadnuc nuqui cuidmenquo icnuec Esuquidistu abided ciudadec unësapanëdash. —Nuquin Papan ëbi tantiaquiec —matses camenuen Nuquin Papan aden Esus namepanëdash.

⁹ Nëbi abided cuidadaidquo Esus tantiasho Nuquin Papan nuqui bédamboen isec icsaisabimboecnuc. Aden bédamboen isquin Nuquin Papan nuqui cuidtiapimbo iquendac.

¹⁰ Matsesën abi chieshësho isun aido cuidte bunenquo icquin Nuquin Papan aton Madoded cuidpanëdash. Aden aton Madoded cuidash nëish bédanshun Nuquin Papan aton Mado tantiaquid bédamboen isec. Nëbi Nuquin Papan uincumenëdaid icquin Esusën nuqui bédamboen tabadmec.

¹¹ Adembidi aidën tantiamiacpadomboen nuqui: —Èbi cuidenquo icnuen aton Madoded cuidquid bédamboshë iquec —quequin Nuquin Papa tantiec nuqui cuishonquec.

Adanën naidbëda Esusën naid chiaid

¹² Nuqui bédamboen ismequid Esus tishabi icnuc abia matses uaidën Adanëmba Nuquin Papan chiaid niac-niaquec icsho cuidquin aidba Nuquin Papan unësquid icmepampic. Adembidi Adanën tsyuecquido matses abitedi Adan icsacpadebidi icsate tantiaquimbi Nuquin Papan unësquidquidquo matses icmepampic.

¹³ Nuquin Papan: —Adec icsainda —quequin ambi chiaid Moises dada uamiabi icnubi matses abitedi icsapampic. —Èmbi Moises chuimiai mimbi niac-niaquec —Nuquin Papa quetiapimbo icnubi matses icsapampic.

¹⁴ Nuquin Papan chuiboedquiobi niaquec Adamba icsasho Nuquin Papan cuidac unësec taëpampic. Adan unësambic aidën nacpadomboen nabi icsa utsi naiqui matses abitedi icsasho adembidi unësquidquidquo Nuquin Papan icmepampic. —Naden nata —quequin Moises dada uamequin Nuquin Papan chiabi icnubi aidën chiaid niactiapimbo yec utsi naic icsashobi adopampic. Ambia Nuquin Papan chiaid niacampid Adampadquidpenquo Esuquidistu nec.

¹⁵ Matses abentsëcshun Adanëmba Nuquin Papan chiaid niacsho cuidquin aidba unësquid icmeshun aton tsyuecquido matses unësquidquidquo Nuquin Papan icmepampic. Adecbidi Nuquin Papa matses bédamboen ismequid abentsëc iquec. Esusuidtsëqui abi tantiaquidotedi cuidmenquo icnuec abided ciudadec unësac caondash. Nëbi aid tantiasho Nuquin Papan nuqui bédamboen isec.

¹⁶ Adanën nacbimboen Nuquin Papa matses bédamboen ismequidën nambo. Adan abentsëqui icsaquin Nuquin Papa cuidmiac abi unësacpadquiec matses abitedi unësquidombo yanac. Nuquin Papa bédamboen ismequidëmbien matses icsaid bedshunec abided cuidadquin Nuquin Papa abi tantiaquidotedi bédamboen ismec icsaisabimboecnuc.

¹⁷ Ambi chuiboedi niacquin Adanën Nuquin Papa cuidmiash unësquid yanacpadec matses unësquidquidquo iquec. Esuquidistunuidtsëqui nac Nuquin Papan matses bédamboen

isendac. Nēbi aid tantiasho Nuquin Papan nuqui bēdamboen isquin bēdamboec tabadquid icmendac. Adec bēdamboec tabadec unēsash Esusbēdtan Nuquin Papan namiacno bēdamboshē yacnombo nuqui tabadendac.

¹⁸ Adec matses abentsēqui icsasho aidbēda aton tsyuecquido matses abitedimbo cuidquin Nuquin Papan unēsquidoidquio icmepampic. Padnuen Nuquin Papan chiacpadec abentsēqui abided cuidadaidēn Nuquin Papa abi tantiaquido bēdamboen ismequin Nuquin Papa yacno tabadmendac.

¹⁹ Nuquin Papan chiaid niac-niaquec Adan icsaic taēambic aton tsyuecquido abitedimbo icsaquidoidquio yanac. Padnuen Nuquin Papan chiaid niaquesambo icquin Esusēn Nuquin Papa nuqui bēdamboen ismec.

²⁰ ¿Matses bēdamboen isnuenda Nuquin Papan ambi: —Bēdamboec tabadta —quequin chiaid Moises dada uamepampic? Padenquio. Matses abi icsaid tantiamenuen ambi chiaid Moises dada uamepampic. Aden chiaid chuisho tantiahs: —Icsaobi —quequin tantiaquin abided cuidadaid tantiasho Nuquin Papan matses bēdamboen isec.

²¹ Taēc matses icsasho cuidac unēsquidoidquio yanac. Adsho isun matses bēdamboen isnuen Nuquin Papan ambi chiaid niaquesambo Esusded cuidac. Nēbi Nuquin Icho Esuquidistu tantiasho Nuquin Papan nuqui bēdamboen isec icsaisabimboecnuc. Nuqui unēsacsho abēdi tabadmendac padpidec unēstiapimbo icnuc.

6

Esus tantiaquid bēdamboec tabadquid, quiaid

¹ Nuquin Papan bēdamboen iste ěmbi chuisho tantiahsun naden tantienda. —Icsaido cuidmenquo icnuec abided Esus cuidadec unēsapanēdash. Aid tantiasho Nuquin Papan bēdamboen isquin nuqui cuidtiapimbo iqueque. Aden bēdamboen isaqui icsaquionona —quequin tantienda.

² Esus tantiaquido adesambo nec. Esus tantiec icsateuidi nuqui bunenquio yanec.

³ ¿Tantienuoda ique? Naden chuiquin mimbi acten mentomiac. —Ěbi cuidmenquo icnuec abided cuidadec unēsaid Esus tantiaquid nebique. Ambi chiacpadec tabadtiadquio iquebique. Utsibo ismenu —quequin mimbi acten mentomiac. Adec Esus unēsaid tantiequi icsaboedobi icsate bunenquio nuqui yanec.

⁴ Aden Esus abided cuidadec unēsaid tantiasho Nuquin Papan utsiacbimboecnuc nuqui icmec. Esus unēsacsho comapenen tantiaquin Nuquin Papan uincuemepac caondash. Adembidi comapenen tantiaquin Nuquin Papan utsiacbimboecnuc nuqui icmec. Adoac icsateuidi bumboedobi adte bunenquio yanec Nuquin Papan chiacpadequi nuqui bēdamboec tabadcuene.

⁵ Adec abided cuidadec unēsaid tantiec icsate bunenquio yanquid yec Esus uincuemiacbimboen comapenen tantiaquin Nuquin Papan utsiacbimboecnuc icmiaidtsen nuqui nec.

⁶⁻⁷ Esus tantiabi yec icsaquido icboedi matses icsaid bedshunec Esus unēsaid tantiec nuqui icsate bunenquio yanec. Mētaniaid abibi mēnchiquidtiapimbo yachimboec matses abembi icsaic ěnēdtiapimbo iquec. Adboedi Esus tantiec nuqui icsate bunenquio yanec.

⁸ Adec Esus unēsaid tantiec icsainquio yanec nuqui nadpec. —Nuquin Papan uincuemiaidēn Esusēn nuqui bēdamboen tabadmec. Unēsacsho Nuquin Papa yacno abēdi nuqui tabadmendac —nuqui quepec.

⁹ Nuquin Papan uincuemiac Esus padpidec unēstiapimbo iquendac. Aton dada unēsquid icboedi unēstiapimbo icquid yanac.

¹⁰ Matses icsaido cuidmenquo icnuec abided abentsequi cuidadec Esus unēsac caondash padpidec unēsenuio yec. Adsho uincuemiac Nuquin Papan chiacpadomboen nabanec aidbēd tēshnanenquio yec tabadec.

¹¹ Ěbi adsho tantiash nadta. —Ěbi cuidmenquo icnuec abided cuidadec unēsacsho uincuemiaid Esus ěbēdi iquec. Aid tantiec icsainquio yanebi. Ambi nacpadec tabadtiadquio iquebi —queta.

¹² Icsamboec tabadenquio icnuna. Nuqui icsate bunaid nainquio icnuna.

¹³ —Icsaquionona —quesho tantiahs: —Padi —quenuna. Unēsacbimboen Nuquin Papa tantienquio ictenedēmbi uincuenacbimboen Nuquin Papa nuqui tantiahenondaque. Ambi chiacpadec bēdamboequien tabadtiad.

¹⁴ —Nuquin Papan ambi: “Bēdamboec tabadta,” quequin chiaid Moises dada uamiactedi naquin ěmbimbo Nuquin Papa bēdamboen ismembī —quenquio icquin Esus tantiasho Nuquin Papan nuqui bēdamboen isec. Ambi bēdamboen isaido yec nuqui icsate bunenquio nuqui yanec. Bēdamboec tabadnuna.

¿Tsuntsin yuabo Esus tantiaquido icpec? quequin chiaid

¹⁵ —Aden Nuquin Papan nuqui bēdamboen isec —quequin ěmbi chuisho tantiaashun naden icsamboen tantienda. —Nēbi abided cuidadaid Esus tantiasho ěbi bēdamboen isec. ěbi cuidtiapimbo iqueque. Ambi chiaid niac-niaquec icsabudquionona —quequin tantienda. Esus tantiaquid adesambo nec.

¹⁶ ¿Tantienuioda ique? Icbon chiacpadomboen yuan naquid. Icsamequidēn tantiacpadomboen icsamboen naquid aton yua nendac. Aidēn yua icquin icsaid ěntiapimbo yec unēsash icsano nidendac. Nuquin Papan yuain ambi chiacpadec bēdamboec tabadcuenedac.

¹⁷ Mibi adec tabadsho isun: —Esus chuibanac icsaid ěntiapimbo icboedi Esus tantiabenash Doma yacnocquido bēdamboec tabadcuenedac. Aden namec mibi bēdambo iquec, Papa —quequin Nuquin Papa chiombi.

¹⁸ Satanasēn yua icquin mimbimbo mibi icsaid ěntiapimbo icsho Nuquin Papan nac ambi chiacpadquiec mibi bēdamboec tabadcuenedac.

¹⁹ —Mates icquin: “Nuquin Papan chiaid tantiaadenquo iquec,” canushe —quequin bēdamboen tantiamenuen mimi tantiaid yuan naid mibi chiombi. Satanasēn yua yec icsateuidi bunquiec mibi icsaded-icsadedondac. Adec icsamboshē iccondaidi nēbi Nuquin Papan chiacpadequien bēdamboec tabadtiad.

²⁰ Satanasēn yua yec icsaquiec Nuquin Papan chiacpadec bēdamboec tabadtiapimbo mibi iccondac.

²¹ ¿Ada bēdamboec tabadonda? Ma mibi chieshēmēnquiec tabadteneyoc. —Ěbi chieshēmēnquiec tabadondaid tantiashun: “Mibi icsambo iquec,” ěbi canushe —queshun mimi naondaid ma mimi chienquo iccondac. Icsaid ěnabi yec unēsash icsano mibi nidtsenac. Adecbidi icsaid ěnenquo icquido unēsash icsano nidendac.

²² Nēbi nuqui Esus tantiasho Nuquin Papan aton yuabo nuqui icmiac. Adoac icsaid ěntiapimbo icboedi nēbi nuqui bēdamboec tabadcuenedac. Adquid unēsasho Nuquin Papan abēdi tabadmendac.

²³ Icsaido cuidquin Nuquin Papan icsano nidmendac. Abided cuidadec unēsaid Esuquidistu Nuquin Icho tantiasho Nuquin Papan nuqui bēdamboen isquin unēsasho abēdi tabadmendac.

7

Bēdamboec tabadte chuinen chido bēnēchoquid Pabodon chiaid

¹ Con utsibobimboecquido mibi neque. Tantiā. Padpiden mibi chuinu. Naden chiaid mimi tantianēdac. —Nuquin Papan dada uamiac Moisesēn chiampicpadomboen matesēn naquid. Unēsun aidēn chiaid natiapimbo iquec —quequin mimi tantianēdac.

² Nuquin Papan chiacpadomboen inaidēn aton bēnē nianesa. Dada utsi chudmesa chidon. Bēnē unēsambien niantē dada utsin bedadquid.

³ Bēnē unēsabi icnubi aton bēnē nianquin dada utsi bedanec cuenedacsho: —Icsambo iquec. Nuquin Papan cuidtequid nec —cabededsias. Bēnē unēsambien dada utsin bedadquid chido. Aden bedacsho Nuquin Papan: —Mibi cuidnu —cainquo ictsias.

⁴ Adecbidi ambi chiaid niac-niacsho Nuquin Papan cuidtsenaido nuqui iccondac. Adondaidi abided cuidadec unēsaid Esus tantiasho Nuquin Papan: —Mibi cuidnu —nuqui cainquo iquendac. Aden Nuquin Papan uincuemēnēdāidēn Esusēn aton yua nuqui icmequin bēdamboec tabadquid icmenuen nuqui icsaid bedshumpanēdash.

⁵ Esus tantiabi yec nuqui bunacpadecuidi nuqui icsapadenedac. —Adenda —quequin Nuquin Papan chiaid tantiashi: —Adequi icsaquionona —quiash nuqui icsaquiodenedac. Adquid yec unēsasho icsano nidmequin Nuquin Papan nuqui cuidtsenēdash.

⁶ Esus tantiabi yec nuqui nadondac. —Moisesēn chiacpadec bēdamboec tabadsho Nuquin Papan nuqui bēdamboen istsias. Ambi chiaid niac-niacsho nuqui cuidendac —quiondāid nēbi Esus tantiec nuqui adenquo iquec. Nēbi Nuquin Papan Mayanēn tantiamiacpadec nuqui bēdamboec tabadec.

Icsaquid nebi, quequin Pabodon chiaid

⁷ —Nuquin Papan ambi chiaid Moises dada uamepampid icsambo iquec —¿quectabi ique? Icsapenquo iquec. Nuquin Papan ambi chiaid Moises dada uamiāid isun: —Nuquin Papan chiaid niac-niaquec icsachitobi —quequin nuqui tantiec. “Utsin na isash: ‘Con na adquid nibēdec,’ quec chieshēmēnēda,” quequin Nuquin Papan Moises dada uamiāid isun: —Adec icsachitobi —quequin tantiabenondambi. Nuquin Papan ambi chiaid Moises dada uamiabi icnuc: —Nuquin Papan chiaid niac-niacchitombi —quequin tantienquiēmbi ictsenchitondac.

⁸ Utsin na isash: —Adquid con na nibēdec —quiash chieshēmēntsēboedi Nuquin Papan: —Adenda —quequin chiaid tantiashi icsaquid yec utsin na comapenedac bunquiec

chieshēmēnquiondabi. Nuquin Papan chiaid nibēdnuc: —Adec icsachitobi —quequin tantienquoio ictsenondambi.

⁹ Nuquin Papan chiaid tantiabi yec Nuquin Papan cuidte dacuēdēnenquoio yec: —Bēdambo iquebi —nuqui quedeneq. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi.

¹⁰ Adquid Nuquin Papan cuidendac —nuqui quianondac. —Ma bēdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bēdamboec tabadenquoio iccobi. Icsachitobi. Adquid Nuquin Papan cuidendac —nuqui quianondac.

¹¹ —Ambi chiacpadomboenuidi nashobini Nuquin Papan bēdamboen isec —quec muadenedi Nuquin Papan chiaid abimbo tantiaash: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac.

¹² Aden nuqui abimbo tantiamequid Nuquin Papan chiaid bēdambo iquec. Icsaisambo icquin Nuquin Papan bēdamboen chuipampic.

¹³ Nuquin Papan chiaid isbanashta matses Nuquin Papan cuidtequido yanactic? Padenquoio. Matses Nuquin Papan cuidtequido yanambic Nuquin Papan ambi chiaid dada uamepampic. —Nēid isash: “Icsamboequini tabadchitec,” ma matses quenu —qeshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiaash nuqui nadondac. —Icsamboequini tabadchitec. Nuquin Papan nuqui bēdamboen istiapimboen icchitec. Ēbien cuidchitec —nuqui quianondac.

¹⁴ Nuquin Papan Mayanēn tantiamiacpadomboen con tsusedpan Nuquin Papan chiaid dada uapampic. Adembidi aton Mayanēn namiac Nuquin Papan chiacpadec nuqui bēdamboec tabadtsiac. Aidēn namiabi mētaniaid abibi mēnchiquidiapimbo yacimboen icsaquido icquin Nuquin Papan chiacpadomboen natiapimbo nuqui iquec.

¹⁵ —Nuquin Papan chiacpadomboen nanu —queboedombi natiapimbo nuqui iquec. Adecbidi: —Utsibo icsacpadec icsainquoio iquendabi —queboedobi nuqui adec icsachitec. Adash: —¿Atotsieshumbimbi adopoba? —quepec nuqui.

¹⁶ —Nuquin Papan chiaid bēdamboen icchitec. Aidēn chiaid niacte bunenquoio iquebi —queboedēmbi aidēn chiaid niac-niaquec: —Bēdamboen chiaidimbi niac-niacchitec —quebi.

¹⁷ Bēdamboecuidi tabadtiadquidini icsaquid yec ēbembī icsadenechitec.

¹⁸ —Bēdamboec tabadnu —queboedi icsaquid yec ēbembī bēdamboec tabadtiapimbo iquebi. Icsaquidini nec.

¹⁹ —Bēdambo icte bunebi —queboedi ēbembī bēdamboec tabadtiapimbo iquebi. —Icsate bunenquoio iquebi —queboedi ēbenquioibi icsaded-icsadedebi.

²⁰ Icsate bunenquoio icboedi icsaquid yec ēbembī bēdamboec tabadtiapimbo iquebi.

²¹ —Adquid nebi. Nuquin Papan chiacpadec bēdamboec tabadtiadquidi badedquio icsaded-icsadedebi —quequin tantiembi.

²² —Nuquin Papan chiaid bēdambo iqueque. Ambi chiacpadec ēbembī bēdamboec tabadnu —queboedi

²³ icsaquid yec ēbembī bēdamboec tabadtiapimbo iquebi. Mētaniaid abembī mēnchiquidiapimbo yacimboen ēmbī naid ēntiapimbo iquebi. —Nuquin Papan chiacpadec bēdamboec tabadnu —queboedi bēdamboec tabadtiapimboeni icchitec.

²⁴⁻²⁵ Adquid yec shubitiadquio icchitebi. Icsaquid yec: —¿Mitsipadequini bēdamboec tabadpeba? —queboedi: —Abi tantiaasho Esuquidistumbini bēdamboen tabadmec —quianondabi. Adshun Nuquin Papa naden chiembi. —Ēbi bēdamboen tabadmecquid Esus mimbi ēbi tantiamiac. Mibi bēdambo iquec, Papa —quequin Nuquin Papa chiembi.

8

Nuquin Papan Mayanēn namiaid

¹ Aden matses bēdamboen tabadmecquid Esuquidistu tantiaasho: —Mibi icsambo iqueque. Cuidnu —cainquoio iquendac Nuquin Papan.

² Icsaquido yec bēdamboec tabadtiapimbo icsho Nuquin Papan cuidtequido icboedēmbi Esus tantiaasho Nuquin Papan aton Mayan meniac aidēn tantiamiacpadec nuqui bēdamboec tabadanendac.

³ —Moisesēn chiacpadec bēdamboec tabadec unēsash Nuquin Papa yacno tabadebi —queboedi icsaquido yec abembī bēdamboec tabadtiapimbo matses iquec. Adsho isun matses bēdamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided cuidadec unēspanēdash.

⁴ —Abided cuidadaid con Mado Esus tantiaasho bēdamboen isquin con Mayan matses menendambi. Adoac aidēn tantiamiac ēmbi Moises chuimiampicpadec bēdamboec

tabadendac. Matses abi icsate bunacpadecc icsainquio yec bédamboec tabadendac – qeshun Nuquin Papan Esusedd cuidpac caondash.

⁵ Adec Nuquin Papan Mayanën tantiamiaid Esus tantiaquid Nuquin Papan tantiacpadecc bédamboec tabadte bunec. Padnuen icsaquid: –Èbi bunaid nanu –quequin ambibi tantiacpadecc icsaic.

⁶ Aden abi bunaidquio naic icsamboec tabadquid Nuquin Papan cuidendac. Padnuen Nuquin Papan Mayanën tantiamiacpadecc tabadquid Nuquin Papan cuidte dacuèdènenquio yec bédambo yec unèsash Nuquin Papa yacno tabadendac.

⁷ –Icsate bunquidèn èbi chieshènec. Ambi naiduidtsèqui naquin èmbi chiacpadomboen natiapimbo iquec –qeshun Nuquin Papan cuidendac.

⁸ Adquido chuiquin: –Mibi bédambo iquec –catiapimbo Nuquin Papa iquec.

⁹ Esus tantiaquidien adesa nec. Esus tantiasho Nuquin Papan aton Mayan nuqui meniacc aidèn tantiamiacpadecc nuqui bédamboec tabadendac. Nuquin Papan aton Mayan meniaccmaid Esus tantiesha nec. Nuquin Papan Mayan Esusèn Mayambidi nec.

¹⁰ Abided cuidadaid Esus tantiasho bédamboen isquin Nuquin Papan aton Mayan meniacc aid yec abèd tabadtequido nuqui nec. Icsaquido yec matses abitedi unèsquidombo icnubi Esus tantiaquid unèsacsho Nuquin Papan abèdi tabadmendac.

¹¹ Esus uincumequidèn Nuquin Papan ambi aton Mayan meniacc idio unèsacsho nuqui uincumequin nuquin dada utsi uaindac. Aton Mayan nuquibèd tabadsho isun nuqui adoendac.

¹² ¿Èbi adsho tantiashta Esus tantiaquid abi bunacpadecc icsapecc? Padenquio. Bédamboec tabadte bunec.

¹³ Utsiboen abi bunacpadecc icsamboecuidi tabadec unèsacsho cuidquin Nuquin Papan icsano nidmendac. Nuquin Papan Mayanën tantiamiacpadecc tabadquin nuqui icsaid nuqui ènec. Adash unèsash Nuquin Papa yacno nuqui tabadendac.

¹⁴ Aden aton Mayanën bédamboec tabadmiaido Nuquin Papan: –Con mado nec. Con champi nec –capendac.

¹⁵ ¿Icbo icsambo icquidèn yua dacuèdmiaicbimboenda Nuquin Papan Mayanën nuqui dacuèdmec? Padenquio. Nuqui bédambo icmec. Aidèn tantiamiacpadomboen Nuquin Papauidtsèqui papa nuqui capec.

¹⁶ Aden Nuquin Papan Mayanën: –Nuquin Papan mado nec. Adeccbidi aton champi nec –nuqui catsiash. Adoac: –Ai, Nuquin Papan mado nebi –dada quenubi chido: –Adeccbidi Nuquin Papan champi nebi –quepec.

¹⁷ –Con mado nec. Con champi nec –qeshun nèbi Nuquin Papan nuqui bédamboen isquin unèsacsho abèdi tabadmequin nuqui bédamboshè icmendac. Utsibon chieshènac chieshtoenuio yec unèsacsho Nuquin Papan abèdi tabadmequin Esus bédamboshè icmiacc. Adembidi Esus tantiaquid icsho utsibon chieshènaqui chieshtoenuio icquin Esus tantiequi unèsacsho Nuquin Papan abèdi tabadmequin nuqui bédamboshè icmendac. Nuquin Papa yacnombo Esuquidistun natedi nuquin na nendac.

Nuquin Papan bédamboshè icmete chiaid

¹⁸ Adec Nuquin Papa yacno nuqui bédamboshè icte tantiaquin nuqui nidaidèn natiaic tabadaiduidi ma nuqui tantiatiapimbo iqueyoc.

¹⁹ Aden Nuquin Papan nuqui bédamboshè icmete tantiecc ambi uaid utsitedi nidaidèn icquidtedi aben icquidtedi: –Nèbimbobi bédambo icmepashuni –queded-quededec tabadec.

²⁰ Abia matses uaid Adan icsho cuidquin ambi uaid nidaidèn icquidtedi Nuquin Papan unèsquiduidquio icmepampic aidon: –Padi –catiapimbo icnuc.

²¹ –Yuecshun èmbi Esus tantiaquido uincumequin aton dada utsi uacpadèn èmbi uaido utsi nidaidèn icquidtedi chodquete icboedi utsi uain bédamboshè icmendambi –quequin tantiaquimbidi unèsquiduidquio icmepampic. Aden Nuquin Papan chiaid tantiaquin ambi uaidon nidaidèn icquidtedishun aton dada abi bédambo icmete tantiaquin cainec tabadec.

²² Unèstiapimbo icte bunec unèsquid yec: –¿Tedectsicshun Nuquin Papan nuqui utsi uapeba? Nèbimbobi Nuquin Papan utsi uapashuni –queded-quededec Nuquin Papan uaidtedi. Bacuè tishquid bacuè paèmbo icnuc: –Badedquio tishmepashuni –quiacbimboec adpec.

²³ Nuquin Papan meniacc idèn aton Mayanën tantiamiacpaden nuquitsen naden chiecc. –Con dada utsi uaqun unèstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaqun Nuquin Papan unèstiapimbo icquid icmendac –queded-quededquin nuquin dada utsi uate tantiaquin nuqui cainec.

²⁴⁻²⁵ –Esus tantiaquido unèsacsho Nuquin Papan nuquin dada utsi uaindac –quequin tantiaquin nuqui Esus tantiabonendac. Nuquin dada utsi uabi icnubi: –Nèbimbobi dada

utsi uapashuni —nuqui queded-quededendac yuec. Nuquin Papan nuquin dada utsi uaquien nuqui adenquio iqwendac.

²⁶ —Aden aton dada utsi uate tantiaquin yuen cainec chieshtonoshe —queshun Nuquin Papan Mayanën nuquibëd icquin bëdamboen tantiamec. —¿Mitsipadembimbi Nuquin Papa chuipeba? —quec nuqui shubitiadquio icsho isun Nuquin Papan Mayanën abi chiec. Unësquo icnuc onquenquio icquin chiec: —Mimbi tantiacpadomboen aid matses bëdambo icmeta, Papa —quequin Nuquin Papan Mayanën nuqui comapenen chuided-chuidedec.

²⁷ Aden Nuquin Papan: —Ma Esus tantiaquido bëdambo icnu —quequin tantiaidbidi aton Mayanën onquenquio icquin chuisho Nuquin Papan tantiec. Otacquo tantiaidtedi tantiaquid icquin Nuquin Papan aden aton Mayanën chiaid tantiec.

Nuquin Papan nuqui bëdambo icmiaid

²⁸ Aden tantiaahun nuqui naden tantiec. Ambi tantiamiacpadomboen abi tantiaquido bëdambo icmete bunquin Nuquin Papan bëdamboen nashunec. Unësquo yec tabadsho aden naic. Natiambo icsho adembidi naic. Cuishonquesho adembidi naic.

²⁹ Èndenquimboshë nidaid uabi yequi Nuquin Papa nadpampic. —Èmbi tantiaidtedi ëbëdta con Mado tantiaquid icmequin Esuspadquio icnuc bëdambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquio icnuc bëdambo icmenuen Nuquin Papan naic.

³⁰ Èndenquimboshë nidaid uabi yec: —Yuecshun naindambi —abi quiampicpadomboen Nuquin Papan nuqui Esus tantiamiac. Adoac nuqui cuidmenquio icnuec abided cuidadaid Esus tantiasho Nuquin Papan nuqui bëdamboen isec isaisabimboecnuc. Nuqui bëdamboen isquin nuqui bëdamboen tabadmec. Unësacsho nuqui unëstiapimbo icquid icmeshun abëdi tabadmendac.

³¹ ¿Embi aden chiaidtedi tantiashta Esus tantiaquido dacuëdpec? —Nuqui cudasquin Nuquin Papan nuqui bëdambo icmendac. Èbi chieshënquidën: “Cuid,” cac Nuquin Papan ëbi cuidenquio ictsiash —quec nuqui dacuëdenquio iquec.

³² Nuquin Papan nuqui tantiaquie. Aton Madombo cudasenquio icquimbi nuqui cuidenquio icnuen aton Madodend cuidquid unës uamepanëdash. Adshumbic Esus tantiasho ënenquio icquin bëdamboen isquin nëbi bëdambo icmequin unësacsho abëdi tabadmequin nuqui bëdamboeshë icmendac.

³³ ¿Nuquin Papan nuqui bëdamboen isquidëmbida nuqui cuidpec? Padenquio. ¿Utsibo nuqui caic: —Icsambo iquec —queshobida Nuquin Papan nuqui cuidpec? Padenquio.

³⁴ ¿Esusëmbida nuqui cuidpec? Abi tantiaquido cuidmenquio icnuec abided cuidadec Esus unësac caondash. Unësacsho Nuquin Papan uincuemiac Nuquin Papa yacnoshon aidëmbi abi tantiaquido chianec. —Èbi tantiaquido bëdamboen isquin cuidenda, Papa —quequin Nuquin Papa chianec tabadec. ¿Adquidënquibida nuqui icsano nidmequin cuidpec? Padenquio.

³⁵ Nuqui bëdamboen isquin ënenquio icquin Esusën nuqui tantiaquie. ¿Shubisho isunda Esusën nuqui tantienquio ipec? Padenquio. ¿Dacuëdshoda Esusën nuqui tantienquio ipec? Padenquio. Adembidi nuqui tantiaquie. Utsibon chieshënsho bëdamboen isquin pete natia bunsho bëdamboen isquinc nuquin dashcute nibëdsho bëdamboen isquinc nuqui Esusën caindac. —Èbi acshunendac —quesho bëdamboen isquinc chieshëmënnquidon: —Cuesunenu —casha bëdamboen isquinc nuqui caindac Esusën ënenquio icquin.

³⁶ Aden utsibon Esus tantiaquido chieshënte chuiquin Nuquin Papan dada uamepampic naden.

“Mibi tantiasho ëbi: ‘Cuesunenu,’ caded-cadedec uimanëmënnquidon.

Aben icquidimboecnuc: ‘Cuesunenu,’ caded-cadedebi, Papa,”

quequin Nuquin Papan chiaid dada uapampic Esus tishabi icnuc.

³⁷ Aden utsibon nuqui chieshënsho Esuquidistun nuqui bëdamboen tantiaquie. Shubisho abi nuqui tantiamec. Adoac Esus tantiatsec shubiquimbi chieshtoenquio icquin nuqui Esus tantiaquie yanendac.

³⁸⁻³⁹ Nuquin Papantsen ënenquio icquin nuqui tantiaquie. Nuquin Icho Esus tantiasho Nuquin Papan nuqui bëdamboen isec. Unësacsho nuqui bëdamboen tantiatiash. Unësabi icsho nuqui bëdamboen isec. ¿Nuquin Papan abi yacnoshon uaid mayan bëdan: —Aid tantienda —cashoda nuqui Nuquin Papan tantienquio yampatsiash? Padenquio. Adembidi nuqui tantiaquotsiash. ¿Podobitsi icsabon icho Satanasën: —Aid tantienda —cacta Nuquin Papan nuqui chieshëmëmpatsiash? Padenquio. Adembidi nuqui tantiaquotsiash. Nëbi nuqui bëdamboen tantiec. Yuecshun adembidi nuqui bëdamboen tantiendac. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquotsiash. Abuc nidacsho Nuquin Papan nuqui bëdamboen tantiatiash. Nidaid uquëduquio nidacsho adembidi nuqui bëdamboen tantiatiash. Nuquin Papan uaid utsi

abitedishun nuqui caic: —Aid tantienda —caqui adembidi Nuquin Papan nuqui bēdamboen tantiatsiash ēnenquo icquin.

9

Pabadon aton matses isadaidbo chiaid

¹⁻² Aden con matses isadaidbo tantiaquid Nuquin Papa nec. —Aden abi tantiaquidi con matsesēn bēdamboen tantienuo iquec —quiash shubitiadquio iquebi. Muainquo iquebi. Esus tantiaquid icsho Nuquin Papan Mayanēn tantiamiaid icquin abimbo chiembique. Tantiata.

³ Con matses isadaidbo tantiec unēsquo yec tsadebi. Nuquin Papan: —Min matses abitedi cuidenquo icnuen mibiuidtsēqui Esusbēd tabadmenquo icquin icsano nidmequin cuidnu —capatecnēdani. Adoac: —Ai, con matses cuidenquo icnuen ēbided cuid —quetsenondabi.

⁴ Con matses tsusedpa Acobo caid Nuquin Papan Isadaid caidēn tsyuecquidotedi isadaidbo tantiaquin Nuquin Papan nadopampic. —Con matses mibi caimbique. Mibēdi tabadebique. Mibi ismenu. —quequin con matses tabadacno abu ushu bēchamauanquieccquid chomequin ismepampic. Adashic nadpampic. —Ēmbi chiacpadec bēdamboec tabadsho mibi bēdamboen isquin bēdambo icmendambi. Mibi nianenquo iquendambi —gushun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantiec isadaidbo tabadpampic. Adshumbic matses cuidmenquo ictequid chuiquin: —Mibi bēdambo icmendambi —quequin Nuquin Papan con matses chuipampic ēndenquimboshē.

⁵ Abadauan chuiquinc Isac chuiquinc Acobo chuiquinc capampic. Ambi chiacpadomboen Isadaidbon chidon tishac Esuquidistu matsesac caondash. Nuquin Papan padquidquobi yec abitedishun Icho yec matsesac caondashe. Esus chuiquin: —Nuquin Papa padquobi yec mibi bēdamboshē iquec —canuna ēnenquo icquin.

⁶ Ēmbi chiacpaden Esus tantienuo icsho Nuquin Papan con matses dadpen bēdamboen istiapimbo iquec. ¿Aden tantiashabi nadpe? —Nuquin Papa muapampic. Ambi chiacpadomboen nainquo icquin con matses bēdamboen istiapimbo iquec —¿quectabi ique? Padenquo. Nuquin Papan abimbo chuipampic. Isadaidbo dadpenshun Nuquin Papa bēdamboen tantienuo iquec. Ambi tantiactedishun abi tantiasho ambi chiacpadomboen Nuquin Papan bēdamboen isec.

⁷ Ēndenquimboshē con tsusedpa Abadauanēn mēdaidtedi adembidi Nuquin Papan bēdamboen isambo. Abadauanēn mado abentsēqui Isac caic: —Aidēn tsyuecquido ēmbi mibi cuēnacpadomboen con matses caindambi —quequin Nuquin Papan chuipampic.

⁸ ¿Abadauanēn bacuēbotedishun tsyuecquidotedida Nuquin Papan con matses caido nepec? Padenquo. Ambi chiacpadomboen Isaquēn tsyuecquido Nuquin Papan con matses caido nec.

⁹ Naden Nuquin Papan Isac tishte chuipampic. “Ēmbi tantiacpadēn choashun ēmbi namiac Sadan min chidon dada bacuē tishendac,” quepampic Nuquin Papa Abadauan chiec.

¹⁰ Aden ambi: —Adoendambi —quequin chiacpadomboen naquidquio Nuquin Papa nec. Aden Nuquin Papan Isaquēn bacuē abi ushēmbi daēd tishte chuipampic. Adnubien con tsusedpa Isaquēn aton chido Debeca caid bedshun chudquin dada bacuē daēd usundomepampic Nuquin Papan chiacpadomboen.

¹¹⁻¹² Aid dada bacuē daēd tishabi icshobi Nuquin Papan ani naden chuipampic. “Ēmbi tantiacpadquid min madon utsimpi bēyucquidimbocquid nendac,” quepampic. Aid daēd tishabi bēdamboec tabadtiapimbo icnubi: —Tishacsho ēmbi tantiacpadembi tsyuec tishsaidempi abentsēqui bēdamboen isendambi —quequin tantiec adpampic Nuquin Papa.

¹³ Adembidi Isaquēn mado chuiquin Nuquin Papan ambi chiaid dada uamepampic. “‘Acobouidtsēqui tantiaquioquin aton buchimpi Esau bēdiactsēc tantiatsendambi,’ quepampic Nuquin Papa,” quequin dada uamepampic.

¹⁴ Ēmbi aden chuisho tantiash: —Nuquin Papa icsambo iquec —quecta mibi ique? Ma Nuquin Papa icsapenquo icquid neyoc. Icsaquido yec matses abitedi ambi cuidtequido icsho Nuquin Papan ambi tantiactedi bēdamboen isec.

¹⁵ Aden Nuquin Papan con tsusedpa Moises chuipampic.

“Ēmbi tantiactedi matses bēdamboen isendambi.

Aidtedi cuidenquo iquendambi,”

quequin chuipampic.

¹⁶ ¿—Ēmbembi nasho Nuquin Papan bēdamboen istsiash —quec matses bunacpadenda Nuquin Papan matses bēdamboen ispec? Padenquo. Ambi tantiactedishun abi tantiasho Nuquin Papan bēdamboen isendac.

¹⁷ Aden ambi tantiacpadomboen ambi naid Nuquin Papan Equipito yacnocquido chuiquid dapa padaon caid chuiampic. “ ‘Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icho yec nadatiambo icquidquo nec, ma ëbi canu,’ quequin mibi chuiquid dapa icmiondambi. Mibi icsasho pacuënêdacimbocnuc mibi icmembî,” quequin Nuquin Papan padaon chiaid Moisesên dada uapampic.

¹⁸ Aden ambi tantiacpadomboen utsi-utsien icsaido pacuënêdacimbocnuc icmequin abi tantiamenquo iquec. Adembidi utsi-utsien bêdamboen isquin abi tantiamec.

¹⁹ ¿Ëbi adsho tantiashta mibi nadpe? —¿Atotsieshun Nuquin Papan matses cuidpec? ¿Abitedishun Icho icquin Nuquin Papan namiacta matsesên nainquo icpadic? —¿quecta ique?

²⁰ ¿Matses icquinda mimbi Nuquin Papa chushcapatsia? ¿Ambi uaido icquimbida nuqui nadope? —¿Atotsieshun ëbipadquid matses uao, Papa? —¿capenda nuqui ique?

²¹ ¿Ada abi nacnenquid matsun chushcapadic? Padenquo. Matsu nacnenquidên ambi tantiacpadomboen nacnenendac. —Nêid nidaid têshê têchu bêdambo icquid acte uetequid nacnenu. Nêid nidaid têshê matsumpi icsactsêcquid opa acmete nacnenu —quequin matsu nacnenquid. Aden ambi tantiacpadomboen nidaid têshun nacnenquid.

²² Adembidi nuqui uaquid Nuquin Papan ambi tantiacpadomboen naindac. — Abitedishun Icbombo yec comapenen tantiaquidquo nebi. Adquid icquin icsaido cuidquid nebi que. Ismenu —queboedëmbi ambi cuidtequido baded cuidenquo iquec. Ambi êndenquimboshê tantiacpadomboen aido icsano nidmendac.

²³ —Ma ëmbi bêdamboen isaidon naden tantianu. “Icsaisambo icquin matses bêdamboen iste bunquin Nuquin Papan icsaido badedi cuidenquo iquec,” quequin ma tantianu —qeshun icsaido badedi cuidenquo iquec. Ambi êndenquimboshê tantiacpadomboen ambi bêdamboen isaido abêdi tabadmendac.

²⁴ Aden ambi tantiacpadomboen Esus tantiasho Nuquin Papan nuqui bêdamboen isec. Isadaidbon abi tantiasho bêdamboen isquinc isadaidpembo matses utsibon abi tantiasho bêdamboen isquinc nuqui caindac.

²⁵ Ambi matses utsibotsen aden bêdamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ëmbi con matses cacmaidobi con matses cabenendambi.

Adembidi ëmbi bêdamboen tantiacmaidobi matses utsibo bêdamboen isbenendambi,”

quequin Nuquin Papan chiaid dada uashun

²⁶ nadentsen dada uapampic.

“Matses utsibo ambi con matses cacmaidobi ambi tantiacpadên aido abentse-abentsen Nuquin Papan bêdamboen isendac.

Bêdamboen isquin: ‘Con mado nec. Con champi nec,’ caindac,”

quequin Nuquin Papan matses utsibo bêdamboen iste chuiquin dada uapampic.

²⁷ Ambi con matses caidombi abi tantiatipimbo icsho isash Nuquin Papa chushquiaid con tsusedpa Isayasên naden dada uapampic. “Masitedi dadpenquo caidnêdaido isadaidbo daêdpacksêcshun abi tantiasho bêdamboen isquin aiddedsêqui Nuquin Papan cuidenquo iquendac.

²⁸ Ambi chiapadomboen ambi tantiacpadên matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasên dada uapampic.

²⁹ Nuquin Papan chiaid padpiden dada uaquin isadaidbo cuidte Isayasên chuiampic naden.

“Shubu dadpen icquid Sodoma caid yacnocquidobêdta shubu dadpen icquid utsi Comoda caid yacnocquido Nuquin Papan uesquin cuidac aton tsyuecquido nibêdquiec iquendac.

Adembidi con matses Nuquin Papan uesquin cuidtsempanêdash.

Abitedishun Icho icquin con matses nibêdquiec nuc cuidtsempanêdash. Dadpen cuidquin daêdpacksêc cuidabi icpanêdash,”

quequin dada uapampic Isayasên.

Isadaidbo bêdamboen istiapimbo icte chiaid

³⁰ Aden Isadaidbo dadpenshun abi tantienquo icsho Nuquin Papan bêdamboen istiapimbo iquec. Padnuen matses utsibo: —Mabi Nuquin Papan bêdamboen isnu. Ambi chiapadec bêdamboec tabadnu —quesabobi: —Ëbi cuidmenquo icnuc abided cuidadec unêsaid Esus bêdamboeshê iquec —qesho Nuquin Papan bêdamboen isec icsaisabimboecnuc.

³¹ Isadaidboen: —Moisesên chiampiduidi ëmbembî nasho Nuquin Papan bêdamboen isebi —queboedombi nainquo icsho Nuquin Papan bêdamboen istiapimbo iquec.

³² ¿Atotsieshun Nuquin Papan isadaidbo bédamboen istiapimbo icpec? —Ambi chiacpadomboenuidi èmbembi naquin Nuquin Papa bédamboen ismembì —queboedombi adotiapimbo icquin Nuquin Papa bédamboen ismequidquìo Esus chieshènec. Adsho Nuquin Papan bédamboen istiapimbo iquec.

³³ Esus tishabi icnuc isadaidbon Esus chieshènte chuiquin Nuquin Papan con tsusedpa naden dada uamepampic.

“Buintad bédambo icquid istuidash: ‘Nèidquìo shubu uanun nitsinembi,’ quiacbimboen Edusaden yacno èbi bédamboen ismequidquìo isadaidbobèd tabadmendambi.

Adec tabadsho anocquidon chieshènendac.

Aid chieshènquid nadquìo iquendac. ‘Cuète mabud iquec,’ quequin tantienquìo yec nidec tocoshquetanec uebudac bimboec

èbi bédamboen ismequid tantienquìo yec unèsash icsano nidendac.

Aid tantiaquido: ‘Nèid tantiasho Nuquin Papan abi yacno nuqui tabadmendac,’ quequid unèsacsho èbi yacno tabadmendambi.”

quequin Nuquin Papan ambi chiaid dada uamepampic.

10

¹ Con matses isadaidbo tantiac unèsquìo icnuc Nuquin Papa chianiombi. —Con matses isadaidbo abided cuidadaid Esus tantiameta, Papa. Esus tantiasho bédamboen ista, Papa —quequin Nuquin Papa chianiombi.

² Esus tantiabi èmbi chuidenecpadomboen chiec: —Nuquin Papan chiacpadomboenuidi naquin Nuquin Papa bédamboen ismembì —quetsèchoedombi con matsesèn Nuquin Papa bédamboen ismete tantienquìo iquec.

³ —Abided cuidadaid Esus tantiasho Nuquin Papan bédamboen isebi —quetiadquidi icsamboen tantiec. —Nuquin Papan: “Bédamboec tabadta,” quequin chiaid Moisesèn dada uactedì naquin Nuquin Papa bédamboen ismembì —quequin icsamboen tantiaquin Nuquin Papan tantiacpadomboen nainquìo icquin Esus tantienquìo iquec.

⁴ Esusuidtsèqui Nuquin Papan: —Bédamboec tabadta —quequin chiaid Moisesèn dada uactedì naquidquìo nec. Adec icsaisa yec matses icsaid bedshunuec abided cuidadec unèsac caondash. Nèbi Esus tantiasho Nuquin Papan matses bédamboen isec icsaisabimboecnuc.

⁵ Nuquin Papan chiaid dada uaquin Moisesèn chuiampic naden. “Ambi chiacpadomboenuidi naquid Nuquin Papan bédamboen isquin abèdi tabadmetsiash,” quequin Nuquin Papan chiaid Moisesèn dada uapampic.

⁶ Aden ambi chiacpadomboenuidi natiadquidombi natiapimbo icsho Nuquin Papan matses bédamboen istiapimbo icpanèdash. Nèbi abided cuidadaid Esus tantiasho nuqui bédamboen isec. Adoac Esus tantiaquido nadenquìo iquec. —Nuquin Papa yacno nidshun ¿tsuntsin Nuquin Papa nuqui bédamboen ismepatsiashba? —quenquìo nuqui iquec. —Esusquìo Nuquin Papa bédamboen ismequidquìo nec —quequin nuqui tantiec.

⁷ Aden tantiec: —¿Tsuntsin Nuquin Papa bédamboen ismequidquìo uincuemepatsiashba? —quenquìo nuqui iquec. —Abided cuidadec unèsacsho Esus uincuemiac caondash —quequintsen nuqui tantiec.

⁸ Aid tantiasho Nuquin Papan nuqui bédamboen isec. Ambi bédamboen iste chuiquin Nuquin Papan naden dada uamepampic. “Nuquin Papan chiaid chuisho tantias: ‘Abimbo chiec. Aid tantiembi,’ qesho Nuquin Papan matses bédamboen isendac,” quequin dada uamepampic. Nèbi Nuquin Papan chomiaid abided cuidadaid Esus tantiasho Nuquin Papan nuqui bédamboen isec. Aden nuqui bédamboen ismequid Esus chuibenequid nèbi.

⁹ —Nuquin Papan uincuemiaid Esus abitedishun Icho neque. Con Icho Esus canu —quequin chuisho Nuquin Papan nuqui bédamboen isquin cuidenquìo iquendac.

¹⁰ —Èbi cuidmenquìo icnuec abided cuidadaid Esus tantiembi —quequin otacquìo tantiaquidèn: —Esus tantiaquid nèbi —quequin utsibo abimbo chuisho bédamboen isquin Nuquin Papan cuidenquìo iquendac.

¹¹ Ambi chiaid Nuquin Papan dada uamiacpaden:

“Aid tantiec: ‘Nèid tantiasho Nuquin Papan abi yacno nuqui tabadmendac,’ quequid unèsacsho èbi yacno tabadmendambi.”

¹² Isadaidbo yec matses utsibo yec quequido Esus tantiaquidtedi adoendac. Aden abitedishun Icho icquin abi tantiaquidtedi Esusèn bédambo icmendac.

¹³ Aden Esusèn nate chuiquin con tsusedpan Nuquin Papan chiaid dada uapampic. “‘Abitedishun Icbombo icsho mibi tantiaquid nebique. Èbi bédamboen ista, Icho,’ qesho bédamboen isquin cuidenquìo iquendac,” quequin dada uapampic.

¹⁴ ¿Mitsipaden matsesën Esus tantiabempec? ¿Esusën naid chiabi yacta matsesën tantiapec? Padenquio. Esusën naidquio chuibanacuien tantiendac. ¿Esusën naid chuisho tantiash: —Mua —quequidta Esus tantiaquid nepadic? Padenquio. —Abimbo caic —qeshun: —Min Mado Esus tantiambique. Èbi bédamboen ista, Papa —quequidien Esus tantiaquid nec.

¹⁵ ¿Mitsipadoaidën Esusën naid chuibampec? ¿—Chuita —cacmaidënda chuibampec? Padenquio. Nuquin Papan: —Con Mado chuibeneta —caidien Esusën naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bédamboen iste chuibanquid chosho isash: ‘Bédambo iquec,’ quec matses cuishonquendac,” quequin dada uamepampic.

Isadaidbo dadpeshun Esus tantienquio yaid

¹⁶ Adquidën Esusën naid chuibanac isadaidbo dadpeshun Esus tantienquio iquec. Daëdpectsëchshun tantiec. Abi tishabi icnuc aden abi tantiesabo Esusën chuite Nuquin Papan con tsusedpa Isayas caid dada uamepampic naden. “Mimbi chiaidquio èmbi chuibancho ¿tsuntsin tantiapec, Papa? Daëdpectsëchshun: ‘Abimbo mimbi chiec. Mibi tantiaquin mimbi chiacpadomboen naimbi,’ èbi caindac, Papa,” quequin Esusën aton Papa chuite Isayasën dada uapampic.

¹⁷ Aden Esusën naid chuibancho tantiashun: —Abimbo caic —qeshun utsibon Esus tantiec.

¹⁸ ¿Esusën naid chuisho tantiabida con matses isadaidbon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiaidën naid chuibanquidën chuibanendac.” Aden chuibancho ma con matsesën tantiaboc.

¹⁹ Aden Nuquin Papan chiaid chuisho tantiash: —Tantiadenquio yec onquec —¿quepecta icnëdash con matses? Padenquio. Tantiashi abi bédamboen tantiate bunenquio icsho isun matses utsibo bédamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidbouidi èmbi bédamboen iste mimbi danubi èmbi con matses cacmaidobi matses utsibo bédamboen isbenendambi.

Èmbi matses utsibo bédamboen iso isash: ‘¿Atotsieshun Nuquin Papan matses utsibo bédamboen ispec?

Icsambo iquec,’ quec mibi chushquendac.

Matses utsibobi èbi tantiabi icquido èbi tantiamendambi.

Aido bédamboen isquin mibi nëishëmendambi,”

quequin Nuquin Papan Moises dada uamepampic.

²⁰ Adembidi dacuëdenquio icquin Isayasën Nuquin Papan matses utsibo bédamboen iste dada uapampic.

“‘Nuquin Papa tantiatiadquio iquebi,’ quenquio icquidombi èbi tantiabenosh.

‘¿Mitsipadembimbi Nuquin Papa bédamboen ismepeba?’ quesabobi èmbi bédamboen iste tantiamiombi,”

quequin Isayasën Nuquin Papan chiaid dada uapampic.

²¹ Isadaidbotsen chuiquin Nuquin Papan chiaidquibidi Isayasën naden dada uapampic.

“‘Mibi tantiac unësqüo iqueque. Èbi bédamboen tantiatia,’ cadeniaqui: ‘Padi, mibi tantiatiapimbo iquebi,’ quequin ènenquio icquin èmbi chiaid mimbi niac-niacpec,” quequin Nuquin Papan chiaid Isayasën dada uapampic.

11

Ambi chiacledi isadaidbo Nuquin Papan bédamboen isaid

¹ ¿Ambi chiaid niac-niacsho isadaidbotedida Nuquin Papan chieshëmpec? —Con matses catiapimbo iquebi —¿quecta iquec? Padenquio. Isadaidbombo nebi. Èndenquimboshë con tsusedpa Abadauan campidën baban tishmiaid Benaminën tsyuecquidon tsyuecquid yec isadaidbombo nebi. Adquid icsho Nuquin Papan chieshënenquio iquebi.

² Èndenquimboshë nidaid uabi icquimbi Nuquin Papan: —Con matses caindambi —quequin con matses isadaidbo tantiapampic. Adshun abitedi chieshënenquio iquec. ¿Ediasën chiampid tantienquioda ique? Aton matses isadaidbo nëishënshun Nuquin Papa naden chuipampic.

³ “Mimbi con matses caidotedi icsamboshë icquec, Papa. Mimbi chiaid chuibanquidobi cuesun secac. Papa quequin mibi menequin ismete cuënote nacnenaïd uesquin chic-chicpac, Papa. Icsamboshë iquec. Èbiuidtsëqui bédambo iquec. Mimbi chiaid chuibancho tantiashun èbi cuesunetiadquio iquec, Papa,” quequin Ediasën Nuquin Papa chuipampic.

⁴ Adoac ¿mitsipadomboen Nuquin Papan chuipampic? “Èbi tantiaquido abi iquec. Èmbi namiacpadomboen isadaidbo dadpeshun 700tedishun èbi tantiec. Èbi tantiesabon papa quequin nacnenaïd Bad caïd tantienquo icquin èbi tantiec,” quequin Nuquin Papan Edias chuipampic.

⁵ Adembidi nèbi con matses isadaidbon ambi tantiactedishun Esus tantiasho Nuquin Papan bédamboen isec.

⁶ ¿Ambembida con matsesèn Nuquin Papa bédamboen ismepec? Padenquo. —Èmbi chiacpadomboenuidi nasho matses bédamboen isembi —¿quecta icpec Nuquin Papa? Padenquo. Aden naquid nibédsho bédamboen istiapimbo icboedèmbi ambi tantiactedishun icsaboedon Esus tantiasho Nuquin Papan bédamboen isendac.

⁷ Isadaidbon ambi tantiactedishun Esus tantiasho Nuquin Papan bédamboen isec. Isadaidbo utsiboen bédamboen istiapimbo iquec. Aïdo: —Nuquin Papa bédamboen ismete bunquin ambi chiacpadomboenuidi èmbimbo nanu —queboedombi nainquo icsho Nuquin Papan bédamboen istiapimbo iquec. Abi bédamboen ismequidquo Esus chieshènsho Nuquin Papan pacuènédacimboecnuc isadaidbo icmepanédash.

⁸ Aden ambi isadaidbo pacuènédacimboecnuc icmete chuiquin Nuquin Papan dada uamepampic naden.

“Nuquin Papan pacuènédacimboecnuc icmiac Nuquin Papan chiaïd chiaqui tantiatiapimbo iquec,”

quequin dada uamepampic.

⁹ Adembidi ambi isadaidbo pacuènédacimboecnuc icmete chuiquin Nuquin Papan con tsusedpa Dabid naden dada uamepampic èndenquimboshè.

“Èbi bunauïduidi naic èbibi bédambo iquebi,’ quequidèmbi Nuquin Papa bédamboen tantienquo iquec.

Adsho Nuquin Papan cuidpashun.

Cuidadnushi abimbo chiaïd danec: ‘Èmbembi naic bédambo iquebi,’ quendac.

Adec abi tantienquo yec icsasho Nuquin Papan cuidpashun.

¹⁰ Pacuènédacimboecnuc icmequin Nuquin Papan abimbo tantiamenquo icpashun.

Natiamequin shubimepashun,”

quequin Nuquin Papan chiaïd Dabidèn dada uapampic.

Nuquin Papan matses utsibo bédamboen isbenaïd

¹¹ ¿Aden pacuènédacimboecnuc icmiac Esus tantiatiapimbo icsho isadaidbo padpiden bédamboen tantiametiapimboda Nuquin Papa icpec? Ambi tantiacpadomboen bédamboen tantiamendac. Nèbi isadaidbo dadpen bédamboen istiapimbo icquimbi matses bédamboen iste bunquin Nuquin Papan matses utsibo Esus tantiamequin bédamboen isbenec. —Èmbi adosho isash isadaïdbotsen ma nadnu. “Nuquin Papa bédamboen ismete bunquiebique. Èmbitsen Esus tantianu,” ma quenu —qeshun Nuquin Papan aden matses utsibo ambi bédamboen iste tantiamiac.

¹² Tantaï chomiaïd Esus tantienquo icsho isadaidbo dadpen bédamboen istiapimbo icquimbi matses utsibon Esus tantiasho ambi con matses caïdo isadaïdbobimboecnuc Nuquin Papan bédamboen isbenec. Ambi tantiacpadèn ambi tantiamiacpadomboen isadaïdo dadpeshun Esus tantiabensho Nuquin Papan bédamboen isendac. Adshumbic matses utsibobédta isadaïdo Nuquin Papan bédamboshè icmendac.

¹³ Tantaï, matses utsibo. Mibitsen chuïnu. Nuquin Papan icmiacpadomboen matses utsibo Esusèn naïd chuïbenequidquo nebi. Èmbi chuïbeneboed con matses isadaïdho chuïbanombi naden. —Esusèn naïd èmbi chuïbeniac matses utsibon Esus tantiabensho. Adsho Nuquin Papan aïdo bédamboen isbenosh —quequin con matses chiombi.

¹⁴ —Aden Nuquin Papan matses utsibo bédamboen isaïd èmbi chuïsho tantiassh Nuquin Papa bédamboen ismete bunquin Esus tantiatiassh. Adsho Nuquin Papan bédamboen istiassh —qeshun con matses aden chiombi.

¹⁵ Aden isadaïdbon Esus chieshènsho isun Nuquin Papan matses utsibo Esus tantiamequin bédamboen isbenec. Ambi tantiacpadèmbi isadaïdbontsen Esus tantiassho Nuquin Papan bédamboen isbenendac. Isadaïdbontsen Esus tantiabededsho isumbic Nuquin Papan matses unèsaidotedi uincuemendac.

¹⁶ Con tsusedpa Abadauan abi tantiaquidquo icsho Nuquin Papan bédamboen isquin: —Con matses mibi caïmbi. Adembidi min tsyuecquidotsen èmbi chiacctedi con matses caindambi —quequin ambi chiacpadomboen isadaïdbotedi Nuquin Papan con matses caindac. Ambi nitsinaïd cuète caniacsho: —Tapunuidtsèqui con na nec. Dada con napenquo nec —¿capenda icbon iquec? Padenquo. —Abichobi con na nec —caquid. Adembidi Nuquin Papan isadaïdbotedi con matses caïc. Caniec taèquid cuète tapumbimboecquid abia con

matses caid Abadauan nec. Cuète cuidibimboecquido Nuquin Papan con matses caidobidi Abadauanën tsyuecquido isadaidbo nec.

¹⁷ Aden ambi con matses caidombi ambi chomiaid chieshënsho cuète cuidi utsi pobinun pateshuniacimboen Nuquin Papan isadaidbo dadpen bédamboen istiapimbo iquec. Matses utsibo Esus tantiamequin cuète dada utsi pobiacimboen aton matses icmequin ëbipadquid isadaidbo ambia Esus tantiaquidobëda Nuquin Papan mibi bédamboen isec.

¹⁸ Adoac icsamboec onquenda. —Isadaidbo dadpen bédamboen isenquio icquin Nuquin Papan ëbien bédamboen isec. Isadaidbo icsambo iquec. Èbien bédambo iquec —quequin icsamboen chienda. Aden icsamboen chuitiadquio icquimbi nëid chaidtsen tantiata. Cuète tapunabi icnuc dada yec podo yec quec cuète ictiapimbo ictsiandac. Adecbidi isadaidbo tsusedpa Abadauan abia tishabi icnuc aton tsyuecquido isadaidbo nibëdtsempampic. Isadaidbo nibëdnuc isadaidbon chidon Esus tishenquio ictsempanëdash. Èmbi aden chiac isadaidbo chiec icsamboec onquenda.

¹⁹ ¿Èbi adsho tantiashta mibi nadpe? —Ambi con matses caido chieshëmënsho isun cuète cuidi pateshuniacimboen nëbi isadaidbo dadpen Nuquin Papan bédamboen isenquio iquec. Èbipadquid matses utsiboen bédamboen isbenac —¿quecta ique?

²⁰ Abimbo mimbi caic. ¿Atotsieshun Nuquin Papan isadaidbo bédamboen istiapimbo icpec? Ambi chomiaid Esus tantienquio icsho Nuquin Papan aido bédamboen istiapimbo iquec. Padnuen Esus tantiashto mibi bédamboen isec. Adoac: —Èbi bédambo icnubi isadaidbo icsambo iquec —quenda. —Esus tantienquio icsho isadaidbo cuidacpadomboen ëbitsen Nuquin Papan cuidpanundac —quequin Nuquin Papa Esusbëda tantiaquiota.

²¹ Ambi con matses caidon Esus tantienquio icsho Nuquin Papan bédamboen istiapimbo iqueque. Adembidi matses utsibon Esus tantienquio icsho Nuquin Papan mibi bédamboen istiapimbo iqueque. Esus tantiaquiota.

²² Aden Esus tantiasht nadecon onqueta. —Esus tantiashto bédamboen isquid yec Esus tantienquio icsho isun cuidquid Nuquin Papa nec —cata. Esus tantienquio icsho cuète cuidi pateshuniacimboen cuidquin isadaidbo bédamboen isenquio iqueque. —Esus tantienquio yansho adembidi ëbitsen cuidpanundac —qeshun chieshtoenquio icquin Esus tantianuna.

²³ —Padi, aid tantiatipimbo iquebi —queboedombi isadaidbon Esus tantiabensho abëdi tabadmenuen Nuquin Papan bédamboen isendac. Ambi cuète cuidi pateshuneboedi abibidi pobioacimboen padpiden bédamboen isendac.

²⁴ Min matses abitedi Nuquin Papa tantiesabo icnëdash. Nëbien cuète icsan cuidi pateshuniacimboen Esus tantiamequin Nuquin Papan mibi bédamboen isec. Adoac Esusbëda Nuquin Papa mimbi bëdiactsec tantiatsec. Con matses isadaidbo tsusedpabo Nuquin Papa tantiaquido dadpenquio icpampic. Nuquin Papan tantiamiac Esus chote chuiquin ënden dada uapampic. Ambi tantiacpadën ambi cuète bëda cuidi pateshuniacimboen pobioacimboembi Esus tantiamequin Nuquin Papan con matses isadaidbo bédamboen isendac. Adoac cuëshëd-uidboedombi Nuquin Papabëda Esus bédamboen tantiaquiendac.

Ambi chiapadën Nuquin Papan isadaidbotsen bédamboen isoaid

²⁵ Tantia. —“Isadaidbo icsambo iquec,” quequin chuinushe —qeshun mimbi tantiacimboen Nuquin Papan chiaid mibi chuinu. Nuquin Papan pacuënëdacimboecnuc icmiac con matses dadpen Esus tantiate bunenquio iquec. Daëdpactsëcshun Esus tantiec. Nuquin Papan tantiactedishun matses utsibo dadpenhumba Esus tantiambic

²⁶ paposhquiacimboen con matses isadaidbo dadpenhushun Esus tantienquio. Aden tantiashto Nuquin Papan con matses bédamboen isendac. Aden ambi isadaidbo bédamboen iste chuiquin Nuquin Papan naden dada uamepampic.

“Icsambo icquidobi cuidmenquio icnuc Nuquin Papa yacnuësh choquid isadaidbon chidon tishaid iquendac.

Aidëmbi isadaidbo Nuquin Papa tantiaquid padpiden icmendac.

²⁷ ‘Aden ëmbi chiapadomboen ëmbi chomiaid tantiashto abi icsaid bëpiscudquin isadaidbo bédamboen isendambi,’ quependac Nuquin Papa,”

quequin ambi chiaid Nuquin Papan dada uamepampic.

²⁸ Nëbi Esus chieshënsho isadaidbo bédamboen istiapimbo icquin Nuquin Papan matses utsibo mibi Esus tantiamiac. Ambi nëbi bédamboen istiapimbo yaido isadaidbo unësqüo icnuc Nuquin Papan tantiaquieq. —Èmbi aton tsusedpabo chiampicpaden aido con matses caimbi —qeshun adoac.

²⁹ Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic.

³⁰ Min matsesën isadaidpembon Nuquin Papa tantienquo yacimboben nëbi isadaidbon Nuquin Papa tantiamequid Esus tantienquo iquec. Aden Esus tantiatipimbo icsho isun Nuquin Papan Esus tantiamequin matses utsibo bēdamboen isbenac.

³¹ Con matsesēmbien abided cuidadaid Esus chieshēnquin Nuquin Papan chiaid niacniacpec. Adoboedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bēdamboen isendac.

³² Aden matses abitedishun ambi chiaid niacniacsho isun: —Abitedimbo icsaquiec —quequin matses bēdamboen istiapimbo ichoedēmbi nëbi Esus tantiasho Nuquin Papan bēdamboen isendac isadaidbo yec matses utsibo abitedi yec quenec.

³³ Aden Nuquin Papan bēdamboen iste chuisho tantiasn nadnuna. Nuquin Papa bēdamboshē iquec. Abipadquid utsi nibēdec. Matsesën naidtedi tantiaquidquo nec. Abitedimbo tantiaquid icquin ambi natiapimbo ictequid nibēdnuc bēdamboen naquidquo nec. ¿Ada adquid icsho Nuquin Papan naidtedi matsesën tantiapadic? Padenquo. Ambi naidtedi matsesën tantienquo iquec.

³⁴ “¿Nuquin Papan otacquo tantiaidtedida matsesën tantiapadic? Padenquo. ‘¿Mimbi tantienquo iquec. Ēmbi chiacpadomboen nata,’ quequinda matsesën Nuquin Papa chuipadic? Padenquo. Ambi tantiacpadomboembien Nuquin Papan naindac.”

³⁵ “¿Ada matsesën Nuquin Papa menepadic? Padenquo. ‘Nē. Con na bedquin mitsana ēbi cuidquin mene, Papa’ ¿quequinda Nuquin Papa chuipadic? Padenquo. Matsesën: ‘Con na nec,’ caidtedi Nuquin Papan na nendac.”

³⁶ Abitedimbo uaquidquo yec abitedishun Icbombo Nuquin Papa nec. —Uesadec nibēdanushe —quequin abitedimbo isquidquo nec. Aton na abitedi nec. Adec abitedishun Icbombo icsho: —Nuquin Papa bēdamboshē iquec —canuna ēnenquo icquin.

12

Esus con Icho cain ambi chiacpadomboen naid

¹ Con utsibobimboecquido mibi neque. Tántia. Mibi chuinu. Nuqui cuidmenquo icnuec abided cuidadaid Esus tantiasho Nuquin Papan nuqui bēdamboen isequē. Nuquin Papa bēdamboen tantiatiaquidquo icquin nadonona. —Ēbi bunaid nainquo yec mibi bēdambo icmenuc mimbi chiacpadec bēdamboec tabadtiadquidquo iquebique. Min yuambo ēbi icme, Papa —quequin Nuquin Papa chuinuna.

² Esus tantiesabon nacpadomboen nainquo icquin Nuquin Papan Mayanēn pausunacpadomboen Esus tantiaquin nuqui icsate bunaid ēnuna. Aden nuqui icsate bunaid ēnquin Nuquin Papa bunacpadec bēdamboec tabadquin nuqui tantierendac. Aden naic nuqui bēdambo iquendac.

³ Tántia. Nuquin Papan tantiamiacpadomboen mibi chuinu. Nadenda. —Ēbiuidtsēqui bēdambo iquebi. Utsibo abitedi icsambo iquec —quenda. Nuquin Papan Mayanēn tantiamiacpadec mibibi datantiadec: —Adquid nebi —quequin abimbo chuita.

⁴ Nuquin Papan Mayanēn tantiamiacpadomboen naquid Esus tantiaquidēn. Adquid yec ¿ada Esus tantiaquido abitedi chuiquid dapa yampatsias? Padenquo. ¿Mitsipadquid min dada icpec? ¿Abichobida bedantequid icpec? Padenquo. Mēdanteuidtsēquien bedantequid iquec. ¿Abichobida istequid icpec? Padenquo. Ēshēuidtsēquien istequid iquec. ¿Abichobida shēdtequid icpec? Padenquo. Dēbiateuidtsēquien shēdtequid iquec.

⁵ Min dada yacimboc Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanequid yanec. Esus tantiaquidotedi yec bēdamboec tantiananquin nashunanquido yanec.

⁶ —Ma utsibo nashunu —queshun Nuquin Papan Mayanēn namiaid nec Esus tantiaquido. ¿Atotsi naquid Nuquin Papan Mayanēn mibi icmiac? Nuquin Papan ambi tantiaidquid oncamiaid iquendac. Adquid icquin Nuquin Papan Mayanēn tantiamiaiduidi chuibanta.

⁷ Utsibic: —Utsibo nashunquid icta —caid iquendac. Adquid icquin bēdamboen nashumbanta. Utsibic Nuquin Papan: —Ēmbi chiaid bēdamboen tantiashun chuibanta —caid iquendac. Adquid icquin Nuquin Papan chiaid tantiatseccquido bēdamboen tantiameta.

⁸ Utsibic: —Chieshtoenquo icquin Esus tantiec bēdamboec tabadnuna —quequin bēdamboec tabadquin ismequid iquendac. Adquid Nuquin Papan icmiaid icquin Esus tantiaquido bēdamboec tabadte tantiameta. Utsibic aton na nibēdquido aton na menequid Nuquin Papan icmiaid iquendac. Adquid icquin cudasenquo icquin menianeta. Utsibic: —Esus tantiaquido chuiquid dapa icta —caid iquendac. Adquid icquin Esusēn namiacpadomboen Esus tantiaquido bēdamboen nameta chieshenquo icquin. Utsibic dada icsaido yec isedanquido yec aton shubu nibēdquido yec aton pete nibēdquido yec macho yec tsusioctsec yec quesho bēdamboen nashunquid iquendac. Adquid icquin Esusēn chiacpadomboen chieshtoenquo icquin nashumbanta.

Esus tantiaquidon nadoquid, quiaid

⁹—Mibi tantiac unēsquo iquec —quequin utsibo chuiquin abimbo chuinuna. Muainquo icquin utsibo tantiaquionona. Chieshēmēnenquo yec bēdamboec tabadnuna. Utsibon: —Icsanuna —caqui: —Padi —quiash icsainquo yec bēdamboec tabadnuna.

¹⁰—Ēbēdtan Esus tantiaquido con utsibobimboecquido nec —quiash bēdamboec tantianuna. —Nēid con buchibimboecquid bēdambo iquec. Aidēn chuīsho bēdamboen tantianuna —canuna nuquibēdtan Esus tantiaquido chuiquin.

¹¹Nuquin Papan chiacpadomboen naic chieshtoenda. Nuquin Papan Mayanēn tantiamiacpadec Esus tantiec chieshtoenuico yec bēdamboec tabadnuna.

¹²—Unēsacsho abi yacno Nuquin Papan ēbi tabadmendac —quec cuishonquenuna. Esus tantiaquido icsho utsibon chieshēnaqui chieshtoenuico icquin Esus tantianuna. ¿Atotsi natiante utsi icpec? Adquid tantiec shubiquimbi chieshtoenuico icquin Esus tantianuna. Baded-badedquien Nuquin Papa chian-chianuna.

¹³Nuquibēdtan Esus tantiaquido aton na nibēdsho isun nuquin nabi menenuna. Isedanquido bēdamboen isnuna. Pemequinc nuquin shubun ushmequinc canuna.

¹⁴Esus tantiaquido yec nuqui chieshēnquidobēdi chieshēnanenquo icnuna. Chieshēnanenquo icquin Nuquin Papa naden chuinuna. —Ēbi chieshēnquido bēdamboen tantiameta. Chiesh bēdameta, Papa —quequin Nuquin Papa chuinuna.

¹⁵Utsi bēdambo yec cuishonquesho isash aidbēdi cuishonquenuna. Utsi unēsquo icnuc shubisho isash aidbēdi shubinuna.

¹⁶Cuesnanenquo yec chieshēmēnenquo yec bēdamboec tabadnuna. —Con nauidsēqui naimbi —quenquo icquin utsibobēdtan bēdamboen nanuna. —Ēbiuidtsēqui bēdambo iquebi. Ēmbi tantiacpadomboenuidi naimbi. Utsibon chiaid natiapimbo iquebi —quenquo yec bēdamboec tabadnuna. —Chuiquid dapabēduidtsēqui onquequid nebī —quenquo yec mases abitedibēd onquec bēdamboec tabadnuna.

¹⁷Chieshēnaqui cuidnanenda. —Ma utsibo: “Bēdamboec tabadquido nec,” quenu —quiash bēdamboecuidi tabadnuna.

¹⁸Uimanēmēnquido icsasho isun aid chuiquin: —Bēdamboequien tabadtiad —canuna. Adquidobēd chieshēnanenda.

¹⁹Ēmbi tantiaido mibi neque. Tanta. Chuinu. Nuqui chieshēnquidobēdi cuidnanenquo icnuna Nuquin Papan naden chiaid tantiaish. “Mates cuidnanac icsambo iquec. Ēbentsēcquiobini icsaido cuidquid nec,” quequin Nuquin Papan chiaid dada uapampic.

²⁰Nuqui chieshēnquidobēdi cuidnanenquo icquin bēdamboen isnuna. “Pete bunsho pemequinc acte bunsho acmequinc canuna. Nuqui chieshēnquido: ‘Bēdambo icquidi chieshēnec icsachitobi,’ quiash ma nēish bēdanu,” quiash

²¹adec cuidnanenquo icquin nuqui chieshēnquido bēdamboen isnuna.

13*Chuiquid dapan chiacpadomboen Esus tantiaquidēn naquid*

¹Aton mases chuiquid dapan chiacpadomboen Esus tantiaquidēn naquid. Adembidi aton nidaid pais caidēn tabadquidotedi chuiquid dapabon chiacpadomboen naquid. —Nuquin Papan adquid chuiquid dapa icmiabi yac nibēdtsiash. Nuquin Papan chuiquid dapa icmiaiden aido nec —queshun aidon chiacpadomboen naquid Esus tantiaquidēn.

²Nuquin Papan chuiquid dapa icmiaidēn chiaid niacquid Nuquin Papan chiaidbidi niacquid nec. Aden ambi chiaid niacacsho chuiquidon cuidquid.

³Bēdamboec tabadquidon chuiquid dapan cuidte dacuēdēntiapimbo iquec. Adquido cuidenquo icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bēdamboec tabadta. Adsho isun: —Mibi bēdamboec tabadec —catsiash chuiquid dapabon.

⁴—Ma mases bēdamboec tabadnu —quequin Nuquin Papan chuiquid dapa icmiaidēn mibi bēdamboen tabadmetiadquio iquec. Nuquin Papan icmiac icsambo icquido cuidquid nec. Adquid icnuc: —Icsasho chuiquid dapan ēbi cuidpanundac —quiash icsaquid dacuēdendac.

⁵Ēbi adsho tantiaishun chuiquid dapabon chiacpadomboen nanuna. —Cuidnushe —queshun adonona. —Pabiate cuembo icquin Nuquin Papan chiacpadomboen natiadquio iquebi —queshun adonona.

⁶Bēdamboen tabadmenuen Nuquin Papan chuiquid dapa icmiaidon: —Ēmbi chiacpadomboen nata —cac naquid Esus tantiaquidēn.

⁷Aden chuiquid dapan chiacpadomboen nanuna. Aid bēdamboen isnuna. Aidēn: —Nata —cac nanuna chieshenquo icquin.

Utsibo tantiaquionona, quiaid

⁸ –Ĕmbi nashumbocpadomboen ěbi cuidquin nashunenquoio iquec –camenda. Abi nashunquidoběd cuidnanquid Esus tantiaquid. Esus tantiaquidbidi bědamboec tantiananquid. Adec bědamboec tantiananquin Nuquin Papan Moises chiampicpadomboen nuqui bědamboen natsiac.

⁹ “Ambi naiduidtsěqui nainquoio yec abibi datantiadacimboc ma matses bědamboec isnanu,” quequin Nuquin Papan Moises naden dada uamepampic. “Min chidopenquoio chudenda. Adembidĭ min běněpenquoio chudmenda chidon. Cuesunenda. Ampenda. Utsin na isash: ‘Adquid con na nibědosh,’ quec chieshěměnec tabadenda,” quequin Nuquin Papan con tsusedpa Moises dada uamepampic. Aiděn chiacpadomboen natiadquio icquin nuquibi datantiadacimboc uitsibotsen tantiaquionona.

¹⁰ Utsibo bědamboen isquin aido icsa uatiapimbo nuqui ictsiac. Aden utsibo bědamboen tantiasho Nuquin Papan: –Aden naic ěmbi Moises chiacpadec bědamboec tabadec –caindac.

¹¹ –Něbien abi tantiaquido abi yacno buanuec Esus chochitec –quequin Nuquin Papan chiacpadomboen nanuna. Ushacimboc nainquoio icboedi něbi ushash isucunacimboc dayacquio yec chieshtoenquoio icquin Nuquin Papan chiacpadomboen nanuna. Esus tantiabensash: –Yuecashien Esus choec –quiondaidi:

¹² –Něbien Esus chochitec –quedonetsěcquiec bědamboec tabadnuna. –Satanasěn yuanushe –qeshun Esus tantiaquin nuqui icsaid ěnshun bědamboen nanuna.

¹³ Icsainquoio yec: –Bědambo iquebique. Ma isnu –quiash bědamboec tabadnuna. Tantiadenuen atequid paěmbo icquid aquenquoio icquinc utsin chido chudenquoio icquinc utsin běně chudmenquoio icquinc chido utsi měismenquoio icquinc canuna. Adecbidi utsin na isash: –Con na adquid nibědec –quiash chieshěměnec tabadenquoio icnuna. Adembidi utsin mibi bunaid nasho isash: –Aden ěbi namenquoio icpec –quec chieshěměnenquoio icnuna. Icsainquoio yec bědamboec tabadnuna.

¹⁴ –Icsate bunchitebi. ¿Mitsipaden naiquini icsape? –quenquoio yec Esus tantiaquiec abi tabadacpadquiec bědamboec tabadnuna. Nuqui icsate bunaid ěnquionona.

14*Esus tantiaquido utsibo bědamboen isaid*

¹ Nuquibědtan Esus tantiatsěcquidon nuqui nacpadomboen nainquoio icsho bědamboen isnuna. Ambi chiaidquio chuiquin Esus tantiaquidon natetedi Nuquin Papan uesquin chiabi iquec. –Naden nac bědambo iquec. Naden nac icsambo iquec –quequin uesquin chiabi iquec. Aden Nuquin Papan chiacmaid chiec nuquibědtan Esus tantiatsěcquido: –Ĕmbi natemaid nec –qeshobi: –Icsamboen chiec –cainquoio icnuna.

² Esus tantiaquidquio: –Pete abitedi pambidbědta pesho Nuquin Papan něishěnenquoio iquec –quenubien Esus tantiatsěcquid: –Padi. Pambid pesho isun Nuquin Papan něishěnushe. Esus tantiaquiděn nitsinaid pequid. Pambid isuidquid –quepec.

³ Pambid pequidobědan pambid isuidquidombi Esus tantiasho Nuquin Papan aid daědi bědamboen isec. Padnuen pambidbědta pete utsi abitedi pequiděn pambid isuidquid maměnshunac icsambo ictsiash. Adembidi pambid isuidquiděn: –Pambid pequid icsambo iquec –cac icsambo ictsiash.

⁴ ¿Icbonpenquioda: –Yua icsambo iquec –capadic? Icbombien adoquid. Adembidi: –Mibi bědambo iquec –caquid ichon. Nuquibědtan Esus tantiaquid Nuquin Icbon yua icsho: –Ĕmbi nacpadomboen nainquoio yec mibi icsambo iquec –cainquoio icnuna. –Něid icsambo iquec. Něid bědambo iquec –quequin Nuquin Icho Esusěn ambentsěqui abi tantiaquido chiendac. Aiděn namiacpadomboen abi tantiaquidon bědamboen naindac.

⁵ Esus tantiaquido utsi-utsiec: –Aid badiadquiděnuidtsěqui Esus tantiec cuěěnac bědambo ictsiash –quenubien utsibo: –Badiadquiděn badiadquiděnquiec Nuquin Papa Esusbědta tantiec cuěěněbi –quecuededpec. Adquid daěd icsho Nuquin Papan něishěnenquoio iquec. Esus tantiaquid ambi tantiacpaděnquibi cuěěnac bědambo ictsiash.

⁶ Aden Esus tantiaquin nac bědambo ictsiash. Adembidi Esus tantiaquin: –Mimbi pete uaid bědambo iqueque. Aid penu, Papa –quequin pambid pequido iquendac. Utsibombic adembidi Nuquin Icho tantiaquin: –Mimbi pete uaid bědambo iqueque. Aid penu –qeshun utsi pequimbi pambid isuidquid iquendac.

⁷ ¿Esus tantiaquid ambi naid-uidi naquidta nedic? Padenquoio. ¿Ambi tantiacpaděn uněsquidta nedic? Padenquoio.

⁸ Nuquin Icho Esusěn chiacpadomboen natiadquio yec nuqui tabadec. Ambi tantiacpaděn nuqui uněsendac. Uněsabi yec tabadec Esusěn yuambo icboedi uněsash adecbidi aton yuambo nuqui iquendac.

⁹ Adec Nuquin Icho icnuec abided cuidadec unēsash Esus uincuempanēdash. Unēsabi yec nuqui tabadnuc Nuquin Icbombo icboedi nuqui unēsān adecbidī Nuquin Icbombo iquendac.

¹⁰ –Adquid Nuquin Icho iquec –quesho ζtantiashunda nuquibēdtan Esus tantiaquid mamēnshuntiad? Padenquo. ζNuquin Papan chiacmaid chiec: –Ĕmbi nacpadomboenuidi nainquo yec icsambo iquec –quequinda chushcatiad? Padenquo. Nuquin Icho Esusbēdtan Nuquin Papanuidtsēqui matsesēn naidtedi chiendac. –Nēid bēdambo iquec. Utsi icsambo iquec –quequin chiendac matses abitedishun tantianubi.

¹¹ Adote chuiquin Nuquin Papan ambi chiaid naden dada uamepampic.

“Tantia. Abimbo caimbiq̄ue.

Naden matses abitedishun ēbi chiendac.

‘Abitedishun Icbombo mibi nec.

Bēdamboshē icquidquo mibi nec.

Abitedishun naid tantiaquid icquin mimbiuidtsēqui: Nēid icsambo iquec. Nēidien bēdambo iquec, quequin abimbo chiendac, quequin matses abitedishun ēbi chiendac,” quequin Nuquin Papan dada uamepampic.

¹² Aden ambi cuidte ushēn Nuquin Papan: –ζEnda? ζMitsipadec tabado? –cabanac nuquitedishun nuqui naidtedi chuibanendac.

Utsibo icsamenquo icnuna, quiaid

¹³ Ĕbi adsho tantiaashun Nuquin Papan: –Adoenda –quequin chiacmaid nuqui tantiaid chienquo icnuna. –Ĕmbimbo natemaid naic aido icsambo iquec –nuquibēdtan Esus tantiaquido cainquo icnuna. Adenquo icquin nadonona. –Ĕmbi ambi natemaid nasho isash chieshtoshon Esus tantienquo yanushe. Ambi natemaid naquin ismenquo iquembi –qeshun Esus tantiaquidtedi bēdamboen isnuna.

¹⁴ Nuquin Icho Esuquidistu tantiaquidquo icquin Ĕmbien naden tantiec. –Nēbi Nuquin Papan: “Petemaid nec,” caid nibēdec –quequin tantiembi. Ĕbi adnubi utsibo: –Petemaidquo nec. Aid pec icsamane. Aid petiapimbo iquebi –qeshumbi adquid pec: –Icsachitobi –quetsiash.

¹⁵ Adsho tantiaashun aido bēdamboen tantiaquin ambi petemaid nuqui pemenquo ictsiaic. Ambi petemaid pemequin mimbi aido tantienquo iquec. –Ĕmbi petemaid piash icsachitobi –quequin Esus tantienquo yanushe. Ambi petemaid pemenda. –Nēid petemaid nec –quequido aidotsen tantiaquin cuidmenquo icnuec abided cuidadec Esus unēsaque. Aido tantiaata.

¹⁶ –Nuquin Papan chiaid niaquenquo icquin Esus tantiaquido utsibon: “Aden naic icsatsiash,” caid naimbi. Ĕmbi tantiacpadomboen naimbi –qeshun mimbi tantiacpadomboen naquin utsibo icsamboen chuimenda. –Is. Esus tantiaquid icsambo iqueque. Ĕmbi natemaid naique –camenda.

¹⁷ ζ–Nadquid petemaid nec. Nadquid actemaid nec –quequin petebēda acteuidi tantiecta Nuquin Papan chiacpadec Esus tantiaquido bēdamboec tabadpatsiash? Padenquo. Aton Mayan nuquibēdi tabadmiac chieshēmēnenquo yec cuishonquec Esus tantiaquido bēdamboec tabadendac.

¹⁸ Adec Esuquidistun chiacpadec tabadsho isun Nuquin Papan: –Bēdambo iquec –caindac. Matsesēntsen: –Aido bēdambo iquec –caindac.

¹⁹ Ĕmbi chiacpadec chieshēmēnenquo yec bēdamboec isnanuna. –Esus tantiec chieshtoenuido yec bēdamboec tabadnuna –quec chuinanuna.

²⁰ –Nuquin Papan bēdamboen isaidon Nuquin Papa Esusbēdta tantienquo yanushe –qeshun utsibon petemaid pequin aido chieshtomenda. Nuquin Papan: –Matsesēn petemaid nec –caid nēbi nibēdnubi Esus tantiatsēcquidēn petemaid pequin aid chieshtomec mibi icsatsiaic.

²¹ –Ĕbēdtan Esus tantiaquido icsamemane –qeshun ambi petemaid pambid penquo icquinc ambi actemaid acte paēmbo icquid aquenquo icquinc ambi natemaid utsi nainquo icquinc cac bēdambo ictsiaish.

²² Nuquin Papan: –Matsesēn natemaid nec –cacmaid tantiaquin: –Ĕmbimbo petequid nec. Ĕmbimbo actequid nec. Ĕmbimbo natequid nec. Aden nasho Nuquin Papan ēbi cuidenquo iquec –quequin mimbi tantiaid caic: –Natemaid nec –quequido naden chienda. –Ĕmbi nacpadomboen nainquo yec mibi icsambo iquec –cainda. Adembidi aidon: –Ĕmbi natemaid nec –caboed naquin ismenda. Chieshtonoshe.

²³ Adquid ambi: –Aid pesho Nuquin Papan nēishēnchitembini ictsiaish –caboed piash –Icsachitobi –quetsiash. Adsho Nuquin Papantsen: –Ai, adec icsaic –catsiaish. –Aden naic icsachitequini ictsiaic –nuqui caidtedi naic nuqui icsatsiaic.

15

Nuqui bunaiduidi nainquo icnuna, quiaid

¹ Esus tantiaquidēnquo Esus tantiatsēcquid chieshēnquo icquid. —Natemaïd nec — quequin Nuquin Papan chiabi icnubi Esus tantiatsēcquid: —Esus tantiaquin ěmbimbo natemaïd nec —quesho tantiashun ambi natemaïd naquin ismequin chieshtomenda. Aid tantiaquin ambi natemaïd nainquo icquin nuqui bunaiduidi nainquo icnuna.

² —Esus tantiatsēcboedēmbi ma Esus bēdamboen tantiabēnquo —quequin nuquibēdtan Esus tantiatsēcquidēn natemaïd nainquo icnuna. —Aden naic mibi bēdambo iquec — camenuen ambi natemaïd nainquo icnuna.

³ Esuquidistun ambi naiduidi nainquo icquin Nuquin Papan chiacpadomboenuidi naic abi chieshēnquido yacnobi chopanēdash. Esus tishabi icnuc Esusēn chuite chuïquin Nuquin Papan con tsusedpa naden dada uamepampic. “Mibi chieshēnacpadomboen chieshēnquin ěbi icsamboen chuishunec, Papa,” quequin Esusēn abi chuite Nuquin Papan dada uamepampic.

⁴ Aden con matses isadaïdbobēda matses utsibo abitedi bēdamboen tantiamenuen Nuquin Papan ambi chiaïd dada uamedenepampic. —Nēïd isban-isbanquin ěbēda Esus ěnenquo icquin tantiec ma matses bēdamboec tabadnu. Adec bēdamboec tabadec: “Unēsash Esusbēdi Nuquin Papa yacno tabadendabi,” ma matses quenu —queshun ambi chiaïd dada uamepampic.

⁵ Aden matses chieshtoenquo icnuc bēdamboen tabadmequid Nuquin Papa mibi chianembi. —Chieshtoenquo icquin Esus tantiaquid icmequin dayacquo yacbimboecnuc matses bēdamboen tabadmequid mibi nec, Papa. Adquid icquin Doma yacnocquidon Esus tantiasho bēdamboec isnanquid icmeta, Papa.

⁶ Mimbï adoac: “Nuquin Papa chuïnuna,” cac aidon abitedishun: “Ai, adonona,” quesahun mibi naden chuïtsiash, Papa. “Con Icho Esuquidistun Papa mibi nec. Mibi bēdamboshē iquec,” quequin mibi chuïtsiash, Papa —quequin Nuquin Papa mibi chianembi.

Nuquin Papan matses utsibo Esus tantiamiaïd

⁷ Tantiã. Padpiden mibi chuïnu. —Nuquin Papa bēdambo iquec —nuqui camenuen Esuquidistun nuqui bēdamboen isequē. Bēdamboec isnanuna. Isadaïdbo yec isadaïdpembo yec quec bēdamboec isnanuna.

⁸ Esuquidistu matses abitedi bēdambo icmenuēc matsesbēd tabadpanēdash. Esus chote chuïquin Nuquin Papan dada uamepampicadec isadaïdbobēdi tabadquin Esusēn aïdo nashumpanēdash. —Nuquin Papan abimbo chuïpampic —quequin tantiamenuen adopanēdash.

⁹ —“Icsaboedombi Esus tantiasho Nuquin Papan bēdamboen isquin cuïdenquo iquec. Nuquin Papa bēdambo iquec,” ma isadaïdpembo matses utsibo quenu —quecbidi Esus matsespanēdash. Aïdēn abi chuite chuïquin Nuquin Papan naden dada uamepampic.

‘Isadaïdpembo matses utsibobēdtan mibi naden chiendambi.

‘Nuquin Papa bēdambo iquec,’ caindambi mibi.

Adecbidi mibi bēdamboen tantiec cuēdēnendabi,”

quequin Esusēn abi chuite Nuquin Papan dada uamepampic.

¹⁰ Nadembidi isadaïdpembon matses utsibon abi tantiabente chuïquin Nuquin Papan con tsusedpa dada uamepampic.

“Matses utsibo isadaïdpembo mibi chuïnu.

Nuquin Papan con matses caïdobēdi cuïshonqueta.

‘Nuquin Papa bēdambo iquec,’ quec cuïshonqueta,”

quequin Nuquin Papan chiaïd dada uapampic.

¹¹ Nuquin Papan chiaïdbidi con tsusedpan padpiden naden dada uapampic.

‘Isadaïdpembo matses utsi abitedi mibi chuïnu.

‘Nuquin Papa bēdambo iquec,’ cata.

‘Nuquin Papa bēdambo iquec,’ quec cuēdēncuededec tabadta,”

quequin dada uapampic.

¹² Adembidi isadaïdpembon matses utsibon Nuquin Papabēda Esus tantiabente chuïquin Nuquin Papan con tsusedpa Isayas naden dada uamepampic.

“Dabidēn papa Isai caïd ěnden unēsampidēn tsyuecquid yuecash iquendac.

Nidaïd utsi-utsiec yacno tabadquidotedi chuïquid dapa icquin bēdamboen namendac.

Aïd caic: ‘Nēïdēn nuqui cuïdmenquo iquendac,’ quependac isadaïdpembo matses utsibo,”

quequin dada uapampic.

¹³ Aden chiampid mibi nec. Nuquin Papa Esusbēda tantiaquido icsho mibi Nuquin

Papa chianembi. —Mibēdi matses tabadmequidquo mibi neque. Mibi tantiamequin Doma

yacnocquido cuishoncameta, Papa. Adembidi dacuēdenquo icnuc bēdambo icmeta. Aden min Mayan aidobēdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

Matses utsibo Esus chuibanquid nebi, quiaid

¹⁴ Con utsibo mibi caimbique. Tantia. Mibi chuinu. —Nuquin Papan Mayanēn tantiamiacpadec bēdamboec isnanec bēdamboec tabadtiaquido icquidien nec. Aidēn tantiamiacpadomboen Nuquin Papan chiaid bēdamboen tantiec: “Nuquin Papan chiacpadec bēdamboec tabadnuna,” quec chuinanquidien nec —quequin mibi tantiombi.

¹⁵ Aden tantiaash: —Nēishēnushe —quenquo icquin: —Bēdamboec tabadta —quequin chuiquin nēid dada uaimbi. Nuquin Papan: —Esus chuibeneta —caid icquin mimbi ēnden tantiaidbidi Esusēn naidquo bēdamboen mibi tantiamenuen dada uaimbi.

¹⁶ Nuquin Papan icmiacpadquid Esusēn naid chuibenetiaquido nebi. Adquid icquin isadaidpembo matses utsibo Esus tantiaquido Nuquin Papan bēdamboen iste chuibeniombi. Adoac matses utsibon Esus tantiabensho isun aton Mayanēn bēdamboen tabadmesho: —Bēdambo iquec —caindac Nuquin Papan.

¹⁷ Aden: —Esuquidistu bēdamboshē iquec —quequin matses utsibo dadpen Esusēn naid chuibeniombi.

¹⁸⁻¹⁹ Esuquidistun ēbi namiaiduidtsēqui mibi chiec nendabi. Aidēmbi namiac matses utsibo Esusbēdan Nuquin Papan naid chuibenequimbi Nuquin Papan Mayanēn tantiamiacpadomboen comapenen tantiaquin nacnenquin ismebeniombi. Adosho isun Esus tantiabenshun dadpenshun Nuquin Papan chiacpadomboen natiadquido yanosh. Shubu dadpen icquid Edusaden yacnuēsh ēnapen nidash nidaid utsi Iddidico caid yacno nidshun chuibeniombi. Ambo nidtanec choaobi Edusaden yacnobidi.

²⁰ Esusēn naid chiacmanoidquid Esusēn naid chuibenetiaquido iquebi. Utsibon Esusēn naid chuibanacno nidtiapimbo iquebi. Esusēn naid chuisho tantiacmaido Esus chuite bunquiebi.

²¹ Aden nate chuiquin Nuquin Papan con tsusedpa naden dada uamepampic.

“Nuquin Papan chomiaidēn naid chuisho tantiacmaidon tantiabendac.

Adshun paposhquiacimboen bēdamboen tantiendac,”

quequin dada uamepampic.

²² —Aden Esusēn naid chiambo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnocquidon Esusēn naid tantiaash —quiash mibi yacno nidabi iccobi. Nēbi mibi yacno nidtiadquido iquebi.

Mibi yacno nidtiadquido iquebi, quiaid

²³ —Nēbi Iddidico yacno Esusēn naid uesquin chuibeniac —quiash mibi yacnotsen nidtiadquido iquebi. Ēdenquimbo taēc mibi yacno nidte bunondaidi seta dadpen matamiashic adi nēbi mibi iste bunquiebi.

²⁴ Nidaid utsi Espania caid yacno nidquimbi mibi isbidanendambi. Doma yacno nidash mibēdi cuishonquendabi. Ambo yuec-yuecpamboec tabadash: —Nidnu —quesho: —Ai, nidec nid. Mibi podqued ismequid mibēdi nidendac —ēbi caindac mimbi. Aden tantiec mibi yacno isbidantiadquido iquebi.

²⁵ Nēbini Edusaden yacnoba nidendac. Anocquido Esus tantiaquido utsibon meniaid menenuc nidendabi.

²⁶ —Edusaden yacnocquido Esus tantiaquido utsi-utsiec aton piucquid nibēdeque. Nuquin nabi ma buanshunya. Menenuna —queshun Esus tantiaquido icquin Acaya yacnocquidobēdtambi Masedonia yacnocquidon: —Con na buanshun meneta —caposhi.

²⁷ Aden ambi tantiacpaden nasho: —Bēdambo iquec —caombi. Edusaden yacnoshon Esusēn chiac isadaidbomba Esus tantiapanēdash. Adshumbic aidon chuibeniac matses utsibontsen Esus tantiapanēdash. Aden abi nashunquin chuiquido Edusaden yacnocquido caic: —“Piucquid nibēdec,” quiac caoshe. Menenuna —quesho: —Bēdambo iquec —caombi.

²⁸ Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibēdquido menebanash nidaid utsi Espania yacno nidquin mibi isbidanendambi.

²⁹ Mibēdi tabadquin ēmbi Esus tantiamequin chuisho Esusēn nuqui bēdambo icmendac.

³⁰ Ēmbi tantiaidombo mibi neque. Tantia. Chuinu. Nuquin Icho Esuquidistun aton Mayambēdan tantiamiacpadec nuqui bēdamboec tantiananec. Ēbi tantiaquin Nuquin Papa chianeta. —Ēnenquo icquin Esus tantiamequin mimbi chiacpadomboen Pabado name, Papa.

³¹ Udeya yacno nidsho Esus chieshēnquidon Pabado cuesnushe. Bedmenda, Papa. Piucquid buanacsho Edusaden yacnocquido Esus tantiaquido bēdamboen bedmeta, Papa.

“Matses utsibon isadaidpembon meniaid bedtemaid nec,” quequin bedenquio icnushe. Bëdamboen bedmeta, Papa —quequin Nuquin Papa chianeta.

³² Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bëdamboec tabadendac Esus tantiamenanec.

³³ Aden mibi tantiaquin: —Nuqui dacuëdenquio icnuc bëdambo icmequid Nuquin Papa mibëd icpashun —caimbi.

16

Mibi unësquio iquec, quequin chiaid

¹ Nuquibëdtan Esus tantiaquid nuquin chuchubimboecquid Pebe caid neque. Mibi yacno mimi isacmaid aid nidsho bëdamboen ista. Shubu dadpen icquid Senquedeya caid yacnoshon utsibo bëdamboen nashunquidquio nioshe.

² Pebe bëdamboen ista. Utsibobëdta ëbitsen bëdamboen nashunoshe. —Nuquibëdtan Esus tantiaquid nec —queshun bëdamboen isquin aidën: —Ëbi nashunta —cacadomboen aid nashunta.

³ Aquida caidbëdta aton chido Pidisida caid chuiquin: —Mibi caic: “Unësquio iquec,” quiosh Pabado —cata. Aidon ëbëdtan Esusën naid chuibeniondash.

⁴ Aden Esusën naid chuibenesho: —Cueschitomane. Aden chienda —Esus chieshënquidon caqui aidon adembidi ëbëdtan Esusën naid chuibeniondash. Adsho isun: —Mimbi bëdamboen naoc —caondambi. Adembidi aidon chionaidon isadaidpembon chiondash.

⁵ Aquidan shubuno Esus tantiec cuëdë nec cho-choquidotsen chuita. —Mibi caic: “Unësquio iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabonaid ëmbi tantiaidquio Epeneto caidtsen adembidi chuita.

⁶ Nëidtedi chuiquin: —“Mibi unësquio iquec,” quiosh Pabado —cabanta. Nëidic Madia caid mibi nashunquidquio.

⁷ Nëidic con matses isadaidbo Andedonico caid. Nëidic con matses Unias caid. Aidon ëbëdtambi Esusën naid chuibenesho chieshëmënquidon bedshun quënën nauedondash. Aidombien ambia Esus tantiabempac caondash ëmbi padabi icnubi. Adsho aidoba Esusën: —Ëbi chuibeneta —cac chieshtoenquio icquin Esus chuibenequido nec.

⁸ Nëidteditsen chuiquin: —“Mibi unësquio iquec,” quiosh —cata. Nëidic Esus tantiaquid utsi Ampidias caid ëmbi tantiaidquio.

⁹ Nëidic Esusën naid chuiquid utsi Udbano caid. Nëidic ëmbi tantiaidquio utsi Estaquis caid.

¹⁰ Nëidic Apedes caidtsen. Utsibon chieshënaqui chieshtoenquio icquin Esus tantiaquidquio nec. Nëidic Adistobudo caidën shubun icquidotedi. Aidtedi: —Mibi caic: “Unësquio iquec,” quiosh Pabado —cabanta.

¹¹ Nëidotsen adembidi chuita. Nëidic con matses utsi Edodion caid. Nëidic Nadsiso caidën shubun icquido Esus tantiaquidtedi.

¹² Nëidic chido Tidipena chedo Tidiposa caidbëdi. Aido Esus tantiec dayacquio icquin ambi chiapadomboen nabanquido nec. Nëidic chido utsi Pedsida caid con chu ichobimboecquidquio. Aidtsen Esus tantiec dayacquio icquin ambi chiapadomboen naquidquio nec.

¹³ Nëidic Dupo caid Nuquin Papan Esus tantiamiaidquio. Nëidic aton tita con tabimboecquidquio.

¹⁴ Nëidic Asinquidito caid. Nëidic Pedeconte caid. Nëidic Edmes caid. Nëidic Patëdobas caid. Nëidic Edmas caid. Nëidic abëd icquido Esus tantiaquido.

¹⁵ Nëidic Pidodoco caid aton chido Udiabëdi. Nëidic Nedeyo caid aton chuchubëdi. Nëidic Odimpas caid. Nëidic abëd icquido Esus tantiaquido. Aidtedi chuiquin: —Mibi caic: “Unësquio iquec,” quiosh Pabado —cabanta.

¹⁶ Esus tantiaquido yec bëdamboec isnanta. —Mibi tantiambi —cananta. Nëmbo icquido Esus tantiaquidtedi mibi caic: —Unësquio iquec —quiosh.

¹⁷ Ëmbi tantiaido mibi neque. Tanta. Mibi chuinu. ¿Ada mibëdtan Esus tantiaquido chieshëmëquin cuëshëdmequido icpec? ¿Ada Nuquin Papan chiaid mimi tantiaid chienquio yec mibi icsamenuec muaquido icpec? Adquidobëd onquec tabadenda.

¹⁸ Nuquin Icho Esuquidistun chiapadomboen nainquio icquin ambi petequid-uidtsëqui aidon chieque. Aidon: —Mibi bëdambo iqueque. Ëmbi chiaid tantiata —quequin ambi chiapadomboen namequin Esus tantiatsëcquid icsamec.

¹⁹ —Doma yacnocquido abi tantiec Esusën chiapadec bëdamboec tabadosh —quequin mimi naid chuibenesho dadpeshun tantiac caosh. Adsho tantiaish bëdambo iquebi.

Adecbidi Nuquin Papan chiaid tantiec bēdamboec ma mibi tabadpanuna. Utsin: —Icsaic cho —caqui: —Padi. Nuquin Papan chiaid niacmane —quiash aiddēdi icsainquo icta.

²⁰ Nuqui bēdamboen tabadmequid Nuquin Papa nec. Aidēmbi matses icsamequidquo Satanas chedo comapenen cuidendac. Nēbi Satanasēn mibi icsametiadquo icsho tantiashun: —Satanas yuamenquo icnuen Nuquin Icbo Esusēn abibi tantiamequiopashun —mibi caimbi.

²¹ Nēmbo icquidtedishun mibi tantiec. Mibi caic: —Unēsquo iquec —quiosh Timoteyo ēbēdtan Esusēn naid chuibenequidquo. Adembidi con matsesēn chiosh. Dusio caid yec Ason caid yec Sosipated caid yec quec adosh.

²² Pabadon —Naden na —cac nēid dada uaquidquo Tesio caid nebi. Esus tantiaquid icquin ēmbitsen mibi tantiambi. Padi. Aidedtsēqui ēmbimbo tantiaquin chuishun Pabadon chiaidbidi dada uaoaimbi.

²³ Nēidteditsen mibi caic: —Unēsquo iquec —quiosh. Nēidic Cayo caid. Aidēn shubun ushobi. Adnuc Esus tantiaquido iccuedednuec aton shubun pudued-puduedosh. Nēidic Edasto caid. Aid nēmbocquidon bedtequid bedbeneshun dayun uaquid nec. Nēidic nuquin utsibimboecquid Cuardo caid. Aideddishun mibi aden tantiosh.

²⁴ Doma yacnocquido mibi tantiaquin: —Nuquin Icbo Esuquidistun bēdamboen isquin mibi bēdamboen tabadmepashun —caimbi.

²⁵ —Nuquin Papa bēdambo iquec —canuna. Esuquidistu chuibanquin ēmbi: —Aid tantiasho Nuquin Papan mibi bēdambo icmendac —quequin chiapadomboen Esus tantiamequin Nuquin Papan mibi bēdamboen tabadmetiadquo iquec. Ēdenquimboshē Esus tishabi icnuc matsesēn Esus chote bēdamboen tantiambo icpampic.

²⁶ Adnubien Nuquin Papan unēsesambo icquin con tsusedpabo utsi-utsien Esus chote chuiquin dada uamepampic. Nēbi: —Esusēn naid chuisho tantiaquin ma nidaid utsi-utsiec yacno tabadquidon Esusēn chiapadomboen nanu —queshun Nuquin Papan Esusēn naid chuibenequido icmiac.

²⁷ Aden namec Nuquin Papa bēdambo iquec. Abipadquid utsi nibēdec. Ambi natiapimbo ictequid nibēdec. Abitedimbo tantiaquid nec. Nuqui cuidmenquo icnuec abided cuidadaid Esuquidistu tantiasho Nuquin Papan nuqui bēdamboen isequē. —Nuquin Papa bēdambo iquec —canuna ēnenquo icquin. Padi. Aidedi chuiquin dada uaombi.

CODINTO YACNOCQUIDON ISTE 1

Pabadon Codinto yacnocquidon iste dada uaid

¹ Pabado nebi. Nuquin Papa bunacpadomboen Esuquidistun ëbi chuibenequid icta cac nebi.

Esuquidistu tantiaquidbidi, Sostenes, nuqui con utsi caid ëbëd iquec.

² Aidbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quiash abided cuidadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caido mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

³ Matses icsaquid icsho cuidnushe quiash abided cuidadec Esuquidistu unëspanëdash, quequin abimbo tantiaho isun Nuquin Papan bëdamboen isaidquio nuqui nec. Adquido yec utsibobëd bëdamboec ma tabadpanuna.

Mibi tantiaquin Nuquin Papa chuided-chuidedaïd

⁴ Mibi tantiaquin Nuquin Papa naden chuided-chuidedembi. Matses icsaquid icsho cuidnushe quiash abided cuidadec Esuquidistu unësaid chuibanac abi tantiaquido Codinto yacnocquido yanacsho bëdamboequidbimboecnuc mimbi isec, quec bëdambo iquebi, Papa, quequin chuided-chuidedembi.

⁵ Aden Nuquin Papan bëdamboen isaïdo icquin ambi bëdamboen tantiamiaïdobidi mibitedi nec. Matses icsaquid icsho cuidnushe quiash abided cuidadec Esuquidistu unësaïd mibi Nuquin Papan tantiamiac nëbi mibitedi bëdamboec tabadquin Esuquidistu chuibanac.

⁶ Esuquidistu tantiesabo iccondaïdi ëmbi Esuquidistun naïd chuibanac tantiaquid mibitedi yanondac. Adquido yanash bëdamboec tabadquin ismequido mibitedi nec.

⁷ Adquido yec Esuquidistu choate caimbudec Nuquin Papan abi bëdamboec tabadaïd tantiamiaïbi iccoshi quetiapimbo mibitedi iquec.

⁸ Aden abi bëdamboec tabadaïd tantiamequin Nuquin Papan mibitedi chieshenquio icmec ma Esuquidistupadquid icnu quequin mimbi caimbudacpadquio icpanuna aid padpidec choanuc.

⁹ Adquid mibitedi icmequin ambi Esuquidistubëd icquido icta caïdo ambi cuëmbanaido Nuquin Papan mibitedi icmiac. Adoshon mibi badedquio Esuquidistupadquid yanenuciocsho isun chieshebi, qesa Nuquin Papa icquin abi mibitedi bëdamboequid icmebanec.

Esuquidistu tantiaquid cuëshëdacimboec chushcananquido

¹⁰ Adembidi chuïnu. Tantiata. Esuquidistu tantiaquid nebi quec Nuquin Papan bëdambo icmiaïd ënacimboec tabadenda. Adec tabadec Esuquidistu tantiaquid utsitedi tantiananec ma cuëshëdacimboec chushcananesa yampanuna.

¹¹ Esuquidistu tantiaquido Codinto yacnocquido chushcananec quec. Chido, Quëdoen shubunoësh choquido nëmbo ëbi isec choshon aden chiec.

¹² Mibi onquiaïd chuïnu. Tantia. Pabadon tantiamiaïd nebi, quec chushquiachimboec utsi-utsiec tabadnubien; Apodosën tantiamiaïd nebi, quec chushquiachimboec utsi-utsiec tabadnubien; Petedon tantiamiaïd nebi, quec chushquiachimboec utsi-utsiec tabadec.

¹³ ¿Esuquidistu tantiaquido cuëshëdmenuenda ëbipadquidon chuïbandiondash? Padenquio. Naden chuïnu. Tantia. ¿Matses icsaquid icsho cuidnushe quiash ëbida cuidadec unëspanëda? Padenquio. Adembidi ¿Esuquidistu tantiaquid nebi quequin ëbi mimbi chuïshodambi mibitedi acten mentobandionda? Padenquio.

¹⁴ Esuquidistu tantiaquid icsho Quidispobëdta Cayo aid daëdtsëqui naondambi quec tantiec tsadebi.

¹⁵ Utsi padenquio iccondambi ma Pabadon ëbi acten mentondacsho aid tantiaquid nebi, quetiapimbo ma mibitedi icpanuna.

¹⁶ Aï, Estepanasën shubun icquïdobidi acten mentondambi. ¿Utsidambi acten mentoponda? Padenquio iccondambi.

¹⁷ Ebi tantiaquido acten mentoban, Esuquidistun cainquio yaqui Matses icsaïd bedshunec abided cuidadec Esuquidistu cuesten dectanac unëspanëdash quequin chuïbeneta, Nuquin Papan cac aden chuïbenec nebi. Eëmbibi tantiaïd chienquiocquin ma matses icsaquid icsho cuidnushe quiash abided cuidadec Esuquidistu cuesten dectanac unëspanëdash quequin ma utsibontsen tantiapanu queshun chuïbenec nebi.

Esuquidistu abitedi tantiaquidquio nadatiambocquin nabanquidquibidi

¹⁸ Nuquin Papabéd icquido icmenuec matses icsaquid icsho cuidnushe quiash abided ciudadec Esuquidistu unēspaneḏdash quequin chiac, ¿Adpecta iquec? quequin tantiesa yec Nuquin Papa yacno puduedtiapimbo iquec. Adec adquido onquenubi nuquien Nuquin Papa yacno puduedtequido yec Nuquin Papan nadatiambocquin nac matses icsaquid icsho cuidnushe quiash abided ciudadec Esuquidistu unēspaneḏdash quequin tantiec.

¹⁹ Abi yacno puduedtemaido chuiquin Nuquin Papan dada uamiampid nad iquec:

“Comapenen tantiaquidon ambibi dadpen tantiaidtedi ěmendambi.

Adquidon tantiatiapimbo yacpadembi natiamequin nabanendambi,”

quequin Nuquin Papan dada uamiampid aiděmbi něbi naid nec.

²⁰ Esuquidistu tantiesa ambibi tantiaidtedi naimědan ¿mitsimbo adquido tabadpec? ¿Nidaid abuběd aiděn icquidtedimbo mitsipadquidquio icpec? quequin isbanquin, Nadquio icpec, quequin comapenen adquiděn tantiec. Aden tantiahic ambi tantiaid Nuquin Papan ěmiac ¿mitsimbo adquido tabadpec? ¿Midaquiděn bědamboen tantieque? Adquiděn tantiaid tantianu, quec onquecuededquid ¿mitsimbo tabadpec Nuquin Papan aidon tantiaid ěmiac? Adquidon dadpen tantiaquimbi matses icsaquid icsho cuidnushe quiash abided ciudadec Esuquidistu unēspaneḏdash, quequin utsin-utsinquien tantiauidec. ¿Adsho isun Nuquin Papan abi yacnoda puduedmepadic? Padenquio iquec.

²¹ Nuquin Papan nadatiambocquin nac matses icsaquid cuidnushe quiash abided ciudadec Esuquidistu unēspaneḏdash quequin chuisho ambibi dadpen tantiaquidon tantiauidec. ěmbi tantiaidpenquio tantiatiapibi quequin tantiatiapimbo iquec. Adquido tantiatiapimbo icnubi ěbi yacpadquidon Esuquidistu chuibanac abi tantiaquid utsibo yanec. Nuquin Papa yacno puduedtequidtedi adquido nendac.

²² Adquidon aden tantianubi Nuquin Papan nadatiambocquin nabantequid iste bunquin isadaidbon tantiauidec. Quidieco matsesěmbien, ěbi ěnden tantiec papuduedaid daěd uanu queboeděmbi Nuquin Papan chiaid tantiauidoaic.

²³ Adec tabadnubi matses icsaquid icsho cuidnushe quiash abided ciudadec Esuquidistu cuesten decnanac unēspaneḏdash, quequin ěbi yacpadquidon chuibanac. Adoquien, Nuquin Papan chomiaid nec, quequin isadaidbon cuesten decnanenquioctsenědash, quequin tantienquio yec tabadec. Isadaidpembo, Esuquidistu mimbi chuiboed ěmbi tantiapadpenquio iquec. Adoac mimbi Esus chuibanaid ěmbi ěnden tantiaidběda daěd uatiapimbo iquebi quec tabadec.

²⁴ Adquidon tantiauidnubi isadaidbo utsi-utsiec adecbidi isadaidpembo utsi-utsiec Nuquin Papan cuěmbanaido icquin naden tantiec: Nuquin Papan tantiampicpadquiequi matses icsaquid icsho cuidnushe quiash abided ciudadec Esuquidistu cuesten decnanac unēspaneḏdash. Aidi matses icsaquid icsho cuidnushe quiash abided cuidtequid icmequin Nuquin Papan nadatiambocquin naid nendac, quequin nuqui tantiec.

²⁵ Abitedi tantiaquidquio icquin ambi abentsěc tantiatiaid Nuquin Papan chiac dadpen tantiaquiděn děniactiapimbo iquec. Adecbidi, Nuquin Papan nadatiambocquin nainquiocquin bědiactěc natsěcnubi adomboen tantiaquin matsesěn děniactiapimbo iquec.

²⁶ Utsibo, ¿mitsipadquidquio mibi icponda? Nadquid mibi icpondaque. Chuinu. Tandia. Daědpactsěc tantiatěcquido mibi icpondac. Namequidpenquio mibi icpondac. Chuiquid dapan bacuěpenquio mibi dadpen icpondac. Adquid icsho Nuquin Papan mibitedi tantiaquin, Con bacuě caid nec, quequin mibi cuěmbanondash.

²⁷ Ai, daědpactsěc tantiatěcquido Esuquidistu tantiaquid icsho Nuquin Papan cuěmbanaido mibitedi nec. Adquid ambi cuěmbanaido icnubi dadpen tantiaquid iquequi Esuquidistu tantiesa icsho Nuquin Papan cuěmbantemaid nebi quequin tantiec natiaic ma shubiquiopanuna.

²⁸ Ademibidi utsibon tantiauidtsaido Nuquin Papan cuěmbanaido neoaic. Adecbidi, ¿Ada matses utsi iqueque? Isnu quenquiocquin matsesěn tantiambo yaid Nuquin Papan cuěmbantequid icnuc

²⁹ ěmbi comapenen tantiaquin nabansho Nuquin Papan cuěnoshi quequin matsesěn chuitiapimbo iquec.

³⁰ Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaid Esuquidistu yec abi tantiaquidtedi Nuquin Papa bědamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushe quiash abided ciudadec uněsaid isun Nuquin Papan cuidtiapimbo nuqui iquec. Icsaisa icsho Nuquin Papan aid bědamboen isquin adomboembidi nuquitsen isoaic. Adecbidi, aidi abi yacno běyucanec puduedash tsadacpadec adecbidi nuquitsen tabadoaindac.

³¹ Aden nuqui tantiaquin Nuquin Papan dada uamiampicpaden, Ēbibi bēdambo icti-apimbocquid icsho mimbi bēdambo icmiaid nebi, Icbo, quequin ěmbi naid chienquiocquin Esusēn naidquio chuibanuna nuquitedi.

2

¹ Adembidi chuinu. Tantia. Mibi yacno nidshun dadpen tantiembi quenquiocquin daēdpactsēqui cuembo chuibanondambi.

² Esuquidistubēdta abi cuesten dectanaid chuinu quequin aiduidi mibitedi chuibanondambi.

³ Codinto yacnocquido dacuēdampambo iquec quequin uēdēequimbi mibi chuibanondambi.

⁴ Ēmbibi dadpen tantiacpadomboen chuibanenquioccombi. Nuquin Papan Mayanēn tantiamiacpadomboen ěmbi chuibanubi aidēmbi nadatiambocquin mibitedi tantiamiondash

⁵ ma Pabado tantiamiacpadomboen tantiamioshi, quetiapimbo mibitedi icpanuna.

Nuquin Papan Mayanēn tantiamiaid

⁶ Nuquin Papan tantiamiac comapenen tantiaquin ěbi yacpadquidon chuibanoaic. Aden chuibeniac Nuquin Papan chiaid tantiabenec papudedquidon bēdamboen tantiec. Aden Nuquin Papan ěbi yacpadquid tantiamiaido matsesēn ambibi comapenen tantiacpaden chuibanesaambo nuqui nec. Adembidi matses chuiquid dapabon comapenen tantiacpaden chuibanesaambo ěbi yacpadquido nec. Matsesēn dadpen tantiaid uesadendac.

⁷ Adnubien Nuquin Papan comapenen tantiaquin, Esuquidistu chuibeneta, quenquiocpampidēmbi nēbi, Chuibeneta, cac Esuquidistu ěbi yacpadquidon chuibanec. Ushē uabi tabadquin matses bēdambo icmequid con mado nendac, quequin Nuquin Papan tantiapampic.

⁸ Esuquidistu nuqui bēdambo icmetequid Nuquin Papan chomiasho adquid nec quequin chuiquid dapabon tantienquiocpanēdash. Aidon, Nuquin Papan Chomiaid Esuquidistu nec, quequin abimbo tantiaquin cuesten dectanenquio ictsenēdash.

⁹ Aidpadquid chuiquin Nuquin Papan ěndenquimboshē dada uamiampid nad iquec: “Nuquin Papan abi tantiaquido ambi cuēmbanaido abi yacno tabadmenun nacenaid bēda tantiesan istiapimbo iquec.

Adecbidi Nuquin Papa yacno nadquio ictsiash, quetiapimbo matses iquec.”

¹⁰ Adnubien Nuquin Papan Mayanēn Nuquin Papan abi yacnoshon bēdamboec tabadte nacenaid iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquiec tabadaid nuqui tantiamioaic.

¹¹ Matsesēn ambi tantiacpaden chiabi yac utsin tantienquio iquec. Adembidi Nuquin Papan ambi tantiacpaden chiambocon matsesēn tantiatiapimbo iquec. Abipadquid aton Mayanēnuidquio tantiec.

¹² Con mayan ěbipadquidquio menenu quetiapimbo matses iquec. Nuquin Papambien abipadquid aton Mayan nuqui menec ma aidēnquio abi yacno bēdamboec tabadaid nuqui tantiamepanuna.

¹³ Aden aidēnquio tantiamiac adomboembidi ěbi yacpadquidon chuibanoaic. Ēmbibi tantiacpadpenquiocquin Nuquin Papan Mayanēn tantiamiacpadomboen chuibanembi. Adomboembidi ěbi yacpadquidon chuibanoaic. Aden Nuquin Papan chiaid chuibanac Nuquin Papan aton Mayan meniaidon tantiaquiec.

¹⁴ Nuquin Papan abipadquid meniacmaidon aidēn chiaid tantiatiapimbo iquec. Aden Nuquin Papan Mayanēn chiaid tantiatiapimbo icquin Nuquin Papan matses bēdambo icmenu qeshun Esuquidistu chomiash matses icsaquid icsho cuidnushe quiash abided cuidadec cuesten dectanac unēspanēdash quequin aidon tantiatiapimbo icoaic. Ēmbi tantiacpadomboen Nuquin Papan chienquio iquec, quendac Nuquin Papan abipadquid meniacmaido.

¹⁵ Nuquin Papan Mayanēn tantiamiaidombien naden utsibo tabadaid tantiec. Matses bēdamboec tabadsho isun, Nuquin Papan Mayanēn tantiamiacpadec tabadquidquio nec, quequin nuqui tantiec. Adembidi utsi icsamboec tabadsho isun, Nuquin Papan Mayanēn tantiamiacmaido nec, quequin nuqui tantiec. Nuquin Papan Mayanēn Nuquin Papan chiaid tantiamiacmaidon nuqui naic tabadaid isash Nuquin Papan chiapadquiec tabadquid nec quetiapimbo iquec adquid. Adecbidi Nuquin Papan chiapadpenquio yec tabadquid nec quetiapimbo Nuquin Papan Mayanēn tantiamiacmaido iquec.

¹⁶ Nuquin Papan chuimiampid nad iquec:

“Nuquin Papa Abia Yampid yec abitedi tantiaquidquio nec.

¿Adquid Nuquin Papa icsho abi chuiquin

ismequid mitsicquid icpec? Adquid nibëdec.”

Nuquin Papan tantiacpadomboen aton Mayanën tantiamiaido icquin Esuquidistun tantiacpadomboen nuqui tantiabane.

3

¿Esuquidistu tantiaquid utsi icsambo iquec, quecta ique?

¹ Adembidi chuinu. Adembi tantiaata. Mibi yacno tabadquin Nuquin Papan chiaid tantiabenebicquid mibitedi icsho daëdpactsëc chuibanondambi. Codinto yacnocquido bacuë uidënabi yacnimboecquido nec qeshun Nuquin Papan chiaid daëdpactsëc mibitedi chuibanondambi.

² ¿Nëbi tishaidënda pambid pepec? Padenquo. Mibitedi adquidbimboecsho tantienquo icnushe qeshun Nuquin Papan chiaid daëdpactsëc chuibanondambi. Ènden iccondacpadquibi mibitedi adquibidi icoapec.

³ Esuquidistu tantiesha yec tabadondacpadece mibi tabadoaic. ¿Esuquidistu tantiaquid utsi icsambo iquec, quecta ique? Nuquin Papan Mayanën tantiamiacmaidpadquid yec nëishec chushcananec mibi.

⁴ Pabadon tantiamiaid nebi, quec utsi-utsiec chushquenubien; Apodosën tantiamiaid nebi, quec chushqueoaic utsi. Adec chushquec Nuquin Papan Mayanën tantiamiaibi yacnimboecquido mibitedi nec.

⁵ ¿Mitsipadosho mimbi ëbi isponda? Adembidi, ¿Mitsipadosho mimbi Apodos isoaponda? ¿Ëmbembidambi mibi chuibamponda? ¿Ambembida Apodosëntsen chuibampanëdash? Padenquo. Tanta. Chuinu. Nuquin Papan chiacpadomboen Esuquidistu chuibenequid ëbi daëdi nebi. ¿Pabadon chuibanubi Nuquin Papan Esuquidistu tantiamiondashi quequinda mibitedishun tantiape? Ai, ëmbi adobanubi Nuquin Papan Esuquidistu mibitedi tantiamiondash.

⁶ Tiedën caniquid ëshë siabi yac dëyuctiapimbo yacnimboecquid icquin Codinto yacnocquido Nuquin Papan chiaid dadpen tantiatipimbo iquec, qeshun matses icsaquid icsho cuidnushe quiaish abided cuidadaid Esuquidistu nec quequin adquid chiaidba mibitedi chuibanondambi. Yuecash Apodostsen mibi yacno chopanëdash. Adec choshon tiedën caniquid dëyuctsash tanunquiocnoc canitiapimbo yacnimboecquido Codinto yacnocquido icnushe qeshun Apodosën chuibanopanëdash.

⁷ Tied nitsinshun taneshcain tiedën caniquid canimesa icbo nec. Adquibidi Nuquin Papan chiaid chuibanquid matses tantiamesa nec. Nuquin Papambien tantiamec.

⁸ Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Adembidi con tied taneshcaic cho cac nashunoaic. Adembidi abi neshcashunquid cuidoaic.

⁹ Nuquin Papan chiacpaden Esuquidistu chuibenequid Apodos nendac. Adembidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tiedbimboecquid mibitedi nec. Nuquin Papan shububimboecquidbidi mibitedi nec.

¹⁰ Nuquin Papa tabadte shubu uashunun buintad teshun abia tabëcacbimboen Esuquidistuba chuibanondambi ma matsesën tantianueshun. Buintad tabëcacbimboen Esuquidistu ëmbi chuibanan utsibon adomboembidi aibidi chuibeneoaic. Bëdamboen chuibenenuquin ¿Nuquin Papan tantiacpadomboendambi chuibaneeque? Tantianu, qeshun Nuquin Papan chiaid isted-istedtiad ambi chuibeneta caidon.

¹¹ Shubu uashunquidën shubu uidën uatequid nitsinan shubu uashunquid utsibo adomboen tabëcoanu quesa nec. Adquiecbidi Nuquin Papa tabadte uashunu qeshun buintad tabëcacbimboen Esuquidistu ëmbi chuibanan adquid nec, quequin utsi chuibantiapimbo utsibon iquec.

¹² Buintad tabëcaid tabadacnimboecquido icmenuequin Nuquin Papan chiaidquido abimbo chuibanoaic. Utsimbien abipenquiocnoc chuibanoaic.

¹³ Adashien yuecash Esuquidistu choanuc ¿Ëbi chuibanquidën ëmbi chiacpadomboenda naoshe? Nëdëncadoquin tanu, quependac.

¹⁴ Aden nëdëncaquin tanac Nuquin Papan chiaid bëdamboen chuiquidon chuibanac Esuquidistu tantiaquidombo yec buintad fauidacmaid nidacnimboec abi nidendac. Adsho isun abi bëdamboen chuibanquido Nuquin Papan menetequid nendac.

¹⁵ Adomboembidi utsibon abipenquo icnuc chuibanac Esuquidistu tantiatipimbocquido taidaid bescashun secacnimboen secatequid nendac. Adnubi abipenquo icnuc chuibanquido taidtsenacnimboec abentsëqui ambi chuibanaido nibëdnuc Nuquin Papa yacno puduedendac. Adquido Nuquin Papan menetemaïdo nendac.

¹⁶ Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatipimboda mibitedi icpe?

¹⁷ Ai, Nuquin Papa tabadtequidbidi mibitedi nec. Adquid icsho mibi icsabudmenuequido Nuquin Papan ènenquiocquin comapenen cuidendac. Abi tabadtequid Nuquin Papan cuëmbanaido ambi bédambo icmebanaidobidi nec. Esuquidistu tantiaquido Nuquin Papa tabadtequid nec caindac.

¹⁸ Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuc Esuquidistu tantiesan tantiacpadec tabadenquiocquin Nuquin Papan tantiacpadomboen tantiaquiota.

¹⁹ Esuquidistu tantiesan tantiacpadquiec tsadquidën èbi yacno tabadte tantiatipimbo iquec, quequin Nuquin Papan tantiec. Aden tantiaquin ambi dada uamiampid nad iquec: “Ambibi comapenen tantiaquin nabanaid ènabi icnubi icho unësendac.”

²⁰ Adecbidi: “Adquidën tantiaidbidi ènëdtequid nec,” quequin Nuquin Papan tantiec.

²¹ Ad icnuc, Pabadon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec.

²² Aidën bacuëbo icquin mibitedishun con utsi èbi caic. Adembidi Apodostsen mimbi adoaic. Adembidi Petedotsen mimbi con utsi caoaic. Nidaid abubèdta uashumbic aidënquiocquidtedimbo uabanquid yec aiteddishun icho Nuquin Papa nec. Adecbidi aton bacuë mibitedi icnuc aitedimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstequidbidi mibi nec. Nèid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Ichon natedi nec. Aidën cuëmbanaido mibitedi icnuc aitedi mitsanabidi nec.

²³ Mibitedishun icho Esuquidistu nec. Esuquidistun icho, Edoen, aton Papa nec.

4

Esuquidistu chuishunquido

¹ Ichó Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiaata. Ènden Abia Yampidën Nuquin Papan Esuquidistu chuibeneta, quenquiocpamidëmbi nèbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiaata.

² Nuquin Papan, Esuquidistu chuibeneta, cacpadomboen niaquenquiocquin èbipadquidon chuibenetiad.

³ Nuquin Ichon, Èbi chuibeneta, caid èbi icnuc ¿Pabadon bédamboenda chuipec? quequin tantianuna, ¿mimbi cactabi dacuèdpe? Padenquio. Adembidi, Nuquin Papan chiacpadomboen chiombi, quetiapimbo iquebi.

⁴ Ambi chiacpaden niaquenquio iccombi, quetiapimboconobi abitedi isquidquio abitedi tantiaquidquio Nuquin Ichó icquin èbi chuibanec bédamboec tabadsho isun aidën chiendac. Adembidi èbi chuibanec icsamboec tabadsho isun chiendac.

⁵ Icsamboen natsiash, quec tsadenda. Nuquin Ichó choashun icsambocquid cuidendac, quequin cainta. Aidëmbi choashun matses icsamboen ismec tabadaid abi ompoec tabadaidbèdta chuibanashun cuidendac. Adembidi, matsesën èquëducshun tantiaid chuibanquin cuidendac. Adembidi, utsibo bédamboec tabadaid chuibanquin chuiaindac, Bédamboen mimbi naoc, quequin.

⁶ Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantiabanc, Pabadopadquid utsi nibèdec, quesa ma icpanuna. Adecbidi, Apodospadquid utsi nibèdec, quesa ma utsibotsen icpanuna. Nuquin Ichopadquid utsi nibèdec, quequin tantiec tabad. Adecbidi, Codinto yacnocquidopadquid utsi nibèdec, quenda.

⁷ ¿Mitsicquidën adquid mibi icmebampashba? ¿Abembida mibi adquid icpeba? Nuquin Ichon tantiamiac nabanash, ¿atotsi quiash, èmbi tantiacpaden naombi, quepe mibi?

⁸ Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nèbi mibitedishun tantiauidpec. ¿Adpecta Nuquin Papan bédambo icmiaido tabadpadic? Nuquin Papa yacno ènden puduedachimboec yash chuiquid dapa nebi, quiacbimboec mibitedi tabadpec mibi Esuquidistu chuibanquidtedi adec tabadtiapimbo icnubi. Mibitedibèd èbi yacpadquido èbi chedo ènden chuiquid dapa yacpadquido icmiondac, Cuishon, quetsiabi.

⁹ Adecbidi, Bédambo iquebi, quec mibi tabadnubi naden tantiec tsadebique. Tantiata. Chuinu. Èmbi chuibeneta caido unëseque. Is, Nuquin Papa quiacbimboecnuc ambi abi yacnoshon uaido mayan bédabobèdtan matstedishun isbededachimboecquid nebi, quequin èmbibi tantiec tsadebi aden isbededec aido tabadenquiocnobi.

¹⁰ Esuquidistu chuibenequidon chuibancho tantiauidash, Pabiaste icsachitashien nec, quequin mamënsumbededashic Codinto yacnocquidon ambibi tantiaquin chuibancho tantiaquidquo nec, quepec Esus tantiesabo. Adecbidi, utsibo dacuëdampambo iquec, quish uëdëequin Esuquidistu chuibenequidon Nuquin Papan chiaid chuibanubi cuesambo yacrimboen mibitedishun chuibanpec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec.

¹¹ Esuquidistu chuibenequid yequi pistsec petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactsëcquid dasiuidquid nebi. Adquiecbidi Esuquidistu chuibenequid utsibo iquec. Utsin mëyanded-mëyandedaid nebi. Quenenash iquenquo icquin capucuenequin Esuquidistu chuibenec nebi.

¹² Con pete bednequin shubumpi nacnenquidquo iquec chonoadsho isquin utsibon mamënsnunaid nebi. Aden mamënsnunubi chonoadebi. Adecbidi Pabado icsambocquid nec, quequin chiaqui aido cuidenquiocquin bëdamboen ista, Papa, quequin aido chiemi. Utsin mëyanaqui dayacquio yec cacuidanesa nebi. Adquidbidi Esuquidistu chuibenequid utsibo nec.

¹³ Adembidi, utsin ëbi mua uaquin chiaqui cuidnanenquiocquin bëdamboen chiemi. Adembidi ëmbi Esuquidistu chuibeniqui icsactsëcquid nec, quequin ambi secanu caidbim-boecnuc ëbi ispec.

¹⁴ Adecbidi, Bëdambo iquebi, quec mibitedi tabadnubi mëyamboc tsadebi. Adec ëbi tabadaid ëmbi chiac Codinto yacnocquido unësquo yampec, quenquiocquin ëbi tabadaid mibitedi tantiamenun dada uaombi. Pabadon chiaid abimbo iqueque. Bëdamboec tabadnuna mibi camenuen dada uaombi, con bacuëbo. Mibi tantiac unësquo iquec.

¹⁵ Mibi chuibanquid utsi dadpen nëbi icnubi Esuquidistu ëmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ëbia yanshun Esuquidistu chuibanac mibitedi Esuquidistu tantiaquido yampondac. Ëmbi chuibanacpaden chiaid tantiaquido con bacuëbo ëmbi caidtedi nec. Adquid mibitedi icnuc papa nabique.

¹⁶ Ëmbi nacpadomboen naic tabadta quequin mibitedi chiemi.

¹⁷ Mibi ëmbi nacpadquieq tabadte tantiamenuequin Timoteyo mibi yacno nidmembali. Aidi ëmbi chuibanac Esuquidistu tantiaquid icpondash. Adquid iccondacsho ëmbi con mado caid aidi nec. Aidi Esuquidistu tantiaquidquo icquin utsi-utsiec yacnoshon ëmbi chuibeniacpadomboen chuibanuquin Timoteyon mibi padpiden tantiamendac. Esuquidistu tantiaquid utsibo iccuededacnoshon chuibanacpadomboen ismequin chuibanquid aidbidi nec.

¹⁸ Mibi utsi-utsiec Pabado choainquo iquec quequin abimbo tantiacbimboen chuibanec.

¹⁹ Aden adquidon chuinubi Nuquin Papa bunuc badedquo mibi yacno nidebique. Ista. Mibi yacno puduedshun abi onquaiid tantianu quenquiocquin abi naic tabadaid isnuna caindambi.

²⁰ Nuquin Papa tantiaquido ambibi tantiacpadec onquesa nec. Nuquin Papan Mayanën tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanec tabadquid nec.

²¹ ¿Mibi yacno puduedshun atotsimbi adquid napeque? Chui. ¿Cuesnu quiacbimboendambi adquid comapenen chushcaquin tantiamepe? ¿Adenquiocquindambi ëbëd icquid nec quequin chuibanquin adquid tantiamepe?

5

Esuquidistu tantiaquid ambi chudtemaid chudquid cacumeta caid

¹ Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaidpembo nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec.

² Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash unësquo icquimbi aidi cacumepatecnëdan.

³ Mibëd ictiapimbo yequi mibëd yacrimboecquin dada uaquin icsaquid cacumeti-adquidi mibi nenëdac quequin chuibanombi.

⁴ Esuquidistu tantiaquid nuquitedi nec, quec mibitedi iccuededec Nuquin Icho Esuquidistun tantiamiacpadomboen Pabadon naden natsiash quequin

⁵ icsaquid nidme ma Satanasën mëyanac icsa bunesa yanacsho Nuquin Icho Esuquidistu choashun ma abi yacno yuedpanuna.

⁶ Esuquidistun ënden bédambocquid icmiaidtedi nebi, quenda. Icsaquid abentsëc mibëd tabadquin abi icsamboec tabadaid ismiac acte maisacimboec mibitedi adquibidi ictsiac.

⁷ Ënden mibitedi Esuquidistu tantiesabo yec icsaquin ismec maisaccondacpadecec maismane qeshun icsaquid nidmeta. Ëbi cuidmenquiocnoec abided cuidadec Esuquidistu unëspanëdash, quiash aid icsaisa yacpadquieci tabadta.

⁸ Aden ambi naid tantieci icsaondacpadpenquo yec ma tabadpanuna. Aidquo tantiembi, quec abimbo tantiadonec ma tabadtenepanuna.

⁹ Ambi chudtemaid chudquidbëd iccuededenda, quequin ënden dada uaondambi.

¹⁰ Esuquidistu tantiesabëd iccuededenda, quenquiocquin Esuquidistu tantiaquid adquid icsho isash iccuededenda, quequin dada uaondambi caimbi. Ambi chudtemaid chudquid Esuquidistu tantiesada dadpen iquec. Adecbidi, utsin na bunquin mua uain bedquid dadpen iquec. Adecbidi, matsesën Nuquin Papan uaidbimboecnuc nacnenaid tantiaquid Esuquidistu tantiesada dadpen iquec. ¿Adquido ismane quiash mitsimbo mibi tabadpe? Nuquin Papa yacno adquid nibëdec. Nuquin Papa yacno nidash icsaquid isenquo yec mibi tabadendac.

¹¹ Esuquidistu tantiaquid nebi, quequid icsadenesho isash adquidbëd iccuededenda caimbi. Esuquidistu tantiaquid nebi, qeshun ambi chudtemaid chudquin ënesabëd iccuededenda. Adecbidi, muaquin bedbanquidbëd iccuededenda. Adecbidi, Esuquidistu tantiaquid nebi, qeshun matsesën Nuquin Papan uaidbimboecnuc nacnenaid tantiaquid ënesabëd iccuededenda. Adecbidi, Esuquidistu tantiaquid nebi, qeshun ambi tantiacpadpenquiocquidën chuisho mamëshumënuquin ënesabëd iccuededenda. Adecbidi, Esuquidistu tantiaquid nebi, qeshun cuesanquin ampequin ënesabëd iccuededenda. Adecbidi, Esuquidistu tantiaquid nebi, quiash ëmbi chuibocpadquid icsaquidbëd iccuededenda. Adembidi aidobëdtan penda.

¹² ¿Esuquidistu tantiesada abi icsaid chuiquin cacumeta, quequindambi chuipe? Padenquo. Esuquidistu tantiaquid mibëd icquid icsadenequin ënenquiocsho isun Nuquin Papan chiaid comapenen tantiaquin mibi icsaid ënta, quequin chui.

¹³ Nuquin Papambien Esuquidistu tantiesada icsaid chuiquin cuidendac. Mimbi Esuquidistu tantiaquid icsadenequid cacumeta.

6

Ëbi chushcananaid tantiashun mimbi tantiacpaden chui caid

¹ Esuquidistu tantiaquid daëd nëishash chushcananec, queoai. Adquid chuinu. Tantia. Nëishash chushcananash Esuquidistu tantiesada yacno nidshun, Ëbi chushquiaid chuisho tantiashun ¿midapaden mimbi chieque? Ëbi chui, quequin mimbi chuipec. ¿Atotsi quiash Esuquidistu tantiaquid yacno nidtiadquidi Esuquidistu tantiesada yacno nidshun mimbi adquid chui, cape?

² Yuecshun, ¿Midapaden mimbi Esuquidistu tantiesanaid chieque? Tantianu. Chui, abi tantiaquido Nuquin Papan caquien ¿nuqui chiacpaden aido Nuquin Papan cuidendac, quequin tantienquioda mimbi icpe? Yuecshun tantiesanaid chiëmbi, qeshun ¿Atotsieshun Esuquidistu tantiaquidbëd chushcananash tantiesada yacno nidshun mimbi chuibampe?

³ Yuecshun, ¿Ëmbi uaido mayanën naid midapaden mimbi chieque? Tantianu. Chui, Nuquin Papan caquien ¿nuqui chiacpaden aido cuidendac, quequin tantienquioda mimbi icpe?

⁴ Adquidon naid ëmbi chiacpadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daëd nëishash chushcananasho tantiashun, Esuquidistu tantiesada yacno nidshun, Ëbi chushquiaid chiacsho mimbi tantiacpaden ëbi chui, mimbi capec?

⁵ ¿Esuquidistu tantiaquid utsibo nibëdpecta ictic? ¿Esuquidistu tantiaquidën icsamboen chuinushe qeshunda Esuquidistu tantiesada yacno nidshun, Ëbi chushquiaid chiacsho mimbi tantiacpaden chui, mimbi capec? ¿Bëdamboec tabadaid Esuquidistu tantiaquid utsibon comapenen tantienquioctsiash, quequinda mimbi tantiape?

⁶ Mibipadquid Esuquidistu tantiaquid utsibo yacno nidenquo yec mibipadquidpenquo Esuquidistu tantiesada yacno nidshun utsibëd chushcananaid mimbi chieque. Adenda.

⁷ Ëbi chushcananaid ëbi daëdshun chiacsho tantiashun mimbi tantiacpaden chui. Tantianu, quequid mibëd icnuc Nuquin Papan bédambocquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiash nëishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiash nëishash chushcanampe?

⁸ Cuidnante bunec mibi adpec. Naden natiad. Ĕbĕd chushcananquid Esuquidistu tantiaquid nec, quec abi cuidte bunenquio yec abi yacno nidshun abi icsaboed tantiaamequin Nuquin Papan chiaid chuiban.

⁹ ¿Icsadenequin ĕnesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquiec tabadec icsate bunquid yec Esus tantiaquid nebi quec mibibi mua uadenda. Ambi chudtemaid chudquin ĕnesa Nuquin Papa yacno yuedtemaid nendac. Adembidi, Nuquin Papan uaidbimboecnuc nacnenaidd tantiaquin ĕnesa abi yacno yuedtemaido nendac. Adembidi, ambi inacmaid chudquido abi yacno yuedtemaido nendac. Adembidi, aton bĕnĕpen chudmequin ĕnesa, adecbidi dada daĕd chichudnanquin ĕnesa, adecbidi chido daĕd dachudnanquin ĕnesa Nuquin Papa yacno yuedtemaido nendac.

¹⁰ Adembidi, ampequin ĕnesa Nuquin Papa yacno yuedtemaid nendac. Adembidi, muaquin utsin na bedquin ĕnesa, adembidi, ambi tantiacpadpenquiocquidĕn chuisho mamĕnshunquin ĕnesa, adembidi, cuesunianquin ampequin ĕnesa. Adquido Nuquin Papan ambi abucshun nacnenaiddĕn tabadtemaido nendac.

¹¹ Ĕnden mibi adquio iccondaidd nĕbi utsi-utsiec padenquio icsho isash Nuquin Papa mibi cuidenquio yec mibi icsaidd bĕpiscudac. Adembidi, Nuquin Papan mibitedi bĕdambo icmabanuequin abipadquid aton Mayan mibitedi meniac. Aidi meneshun Esuquidistu icsapanquiocquid isacpaden Nuquin Papan mibitedi isoaic.

Ĕmbi chudtemaid chudmane queshun adquid isuidteneta quiaidd

¹² Ĕmbi natemaid naden nata caidd nibĕdec queshun naic bĕdambocquid ictiapimbo iquebi, quiaish padenquio yec tsadebi. Aden nabanquin ĕntiapimbo icmane quiaish padenquio iquec tsadebi.

¹³ Matsesĕn chebudaid pucu yacno budash dada bĕdambo icmianquid nec. Yuecsh matsesĕn dada chodquetequid nendac. Padnuen, ĕbi tabadte ma icpanueshun Nuquin Papan matses uapampic. Abi tantiaquid abi tabadte iquec. Adecbidi adquidbĕd Nuquin Papa iquec. Ad icnuc mimbi chudtemaid chudquid icta, quenquio Nuquin Papa icpampic. Ambi chudtemaid chudquid Nuquin Papa tabadte ictiapimbo iquec. Aden naquid chian anĕdĕnquequid nĕsecatequid nendac.

¹⁴ Nadatiambocquin Esuquidistu Nuquin Icho Nuquin Papan uincuemepanĕdash. Aidĕmbi nuquitsen abi tantiaquid icsho uincuemendac.

¹⁵ ¿Abi tantiaquid icquin, Esuquidistubĕd daĕdash tabadquid nebi, quequin tantienquioda mimbi icpe? Ai, aiddĕdi daĕdtequid nuqui nec. ¿Adquidbĕd daĕdashabi icsaquidbĕd daĕdoape? Padenquio iquebi.

¹⁶ ¿Dadpen chudmequid chudash daĕdacbimboecquid nec, quequin mibitedishun tantienquioda icpe? Aid daĕdi dada abentsĕc yacbimboecquid nec, quequin Nuquin Papan dada uamiampid nec.

¹⁷ Nuquin Icbobĕd daĕdaiddien Icbon tantiacpadquiec tabadquid nec.

¹⁸ Ĕmbi inacmaid chudmane queshun chido utsi isuidteneta. Padenquio yec icsaquidbĕd daĕdquid mibi iquendac. Ambi chudtemaid chudquid aton namibĕd ĕquĕducush daĕdaidd nec. Nami umanucush icsaidd namibĕd daĕdtiapimbo iquec.

¹⁹ Nuquin Papan Mayan tabadtequid Esuquidistu tantiaquido nec. ¿Nuquin Papan ĕbĕd tabadmaidd abipadquid nec, quequin tantienquioda mibitedishun icpe? Ĕbibi nuquin icho nec, quetiapimbo matses iquec. Adecbidi, Con icho nibĕdec. Ĕmbi tantiacpaden naimbi, quetiapimbo mibi iquec.

²⁰ Nuquin Icho cuestas dectanac matses icsaquid icsho cuidnushe quiaish abided cuidadec unĕsquid Nuquin Papan icmiac abi tantiaquid yec aiddĕn na mibitedi nec. Adoaidi ambi chiacpaden ismec bĕdamboec tabadteneta.

7

Dada chidobĕdi daĕdaidd

¹ Nĕbi mimbi dada uaboed isombi. Aid isun ĕmbi tantiacpaden chiembique. Tantiata. Chido inquid dadatedida ictiad quequin mimbi tantiapec. Padnuen, Chido bedenquio iquemi, quesho chido inta cainda caimbi mibi.

² Esuquidistu tantiesaya yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiaish chido abentsĕc inquid dada ictiad. Adecbidi dada abentsĕcshun inaid chido ictiad.

³ Con chido ĕmbi inaid nec, quequin aiduidi chudquid icta. Adecbidi con bĕnĕ ĕbi inquid nec, quequin aiduidi chudmequid chido nec.

⁴ Chidon dada daédash aton bënëñ dadabidi nec. Adecbidi dadan dada chidon dadabidi nec.

⁵ Aid daëdi daédabi yachimboec, Padi, quenda. Adboedi, Nuquin Papa chuinuec nëidtedi ushquin padenquoio nuqui iquec, queshun ënta. Aidtedec ushquin padenquiocshon, Ëmbi yuen ëntiapimbocsho isun Satanashën icsamenushe queshun padpiden nata.

⁶ Ënta quenquoio iquebi. Nëidtedi ushquin padenquoio iquemi quish mibi daëdi aidtedecuidi ushec ënëdta caimbi.

⁷ Padnuen, chido inesa ëbi yacpadec dadatedi icpashun. Dada utsi-utsiec Nuquin Papan icmiacpaden chido inquit icnubi utsi-utsiec chido inesa iquec.

⁸ Chido inesa ëbi tabadacpadec dada utsitedi tabadec bédambo ictsiash. Adecbidi dadan inaidpen bédambo ictsiash chido. Dada bënua adecbidi bédambo ictsiash.

⁹ Adquid icquin isuidtiapimbo yec comapenec chudte bunquin chido inta. Adecbidi chido bënua dada isuidtiapimbo iquec dadan inaid icta.

¹⁰ Daédash niamënenda. Ëmbibi chienquiocquin Nuquin Icbon aden chuinëdacpadembi chiembique. Tantia.

¹¹ Min bënë nianash utsin inaid iquenda. Dadan inaid icnu quec mimi niamboedën inaid icoata. Adembidi chido inquit min chido bunenquiocquin abi icsaid dada uashun ismequin nidmenda.

¹² Nëbi Nuquin Icbon naden chuiban cainquiocnobi ëmbia Esuquidistu tantiaquid icquin Esuquidistu tantiaquid utsibo ëmbi chuibocpadembi mibitedi chuoaimbique. Tantia. Dada aton chidobëdi Esuquidistu tantiesa icboedi aton bënë Esuquidistu tantiaquid yanuc aton chido padenquoio yec, Con bënë nianu, quenquoio ictsiash. Adquid icsho isash. Con chido icsambocquid nec, quenquoio yec abëdi tabadquid bënë.

¹³ Adecbidi chido utsi aton bënëbëd Esuquidistu tantiesa icboedi aton chido Esuquidistu tantiaquid yantsiash. Aden Esuquidistu tantiashe, Con bënë icsambocquid nec, quenquoio yec bënë nianec nidesa chido.

¹⁴ Esuquidistu tantiabi yec daëdacpadec aton chido Esuquidistu tantiaquid yanash aidbëd abentsëc yachimboec tabadec bënë. Adec bédamboec tabadsho isun Nuquin Papan chido bédamboen tabadmequin bënëtsen bédambo icmebampec. Chido Esuquidistu tantiaquid icquin aton bënë padenquiocnobi aton bacuëbo tantiec, Icsambocquidën bacuëbo nec, utsibo quenushe quish bënëbëd abentsëc yachimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuëbo tantiec aton chido Esuquidistu tantiesabëd tabadquid dada. Adec abentsëc yachimboec tabadsho isun, Bédambocquidën bacuëbo nec, quequin utsibon ispec.

¹⁵ Utsimbic ambi bedboedën aton chidon Esuquidistu tantiashe isun aton chido nidta catsiash. Adoquien, Mibëd tabadte bunebique. Ëbi nidmenda, quetsiash chido bënë caic. Adoqui, Nidec nid, cac cacuidenquoio yec nidquid chido. Chido utsibic aton bënë Esuquidistu tantiaquid yansho isash, Mibi nianu, quetsiash. Adoquien, Mibi unësquio iquec, quetsiash bënë.

¹⁶ Adnubien dadan nidta caid aton chido Esuquidistu tantiaquid yec bédambocquid icsho isash Esuquidistu tantiaquidtsen yantsiash bënë. ¿Adquid yantsiash, quequin tantienquioda mimi icpe? Adecbidi, chidon nianu caid aton bënë bédambocquid icsho isash Esuquidistu tantiaquid chidotsen yantsiash. Adecbidi ¿Adquidtsen yantsiash, quequin tantienquioda mimi icpe?

¹⁷ Mibi Esuquidistu tantiaquid yanash Nuquin Papan tantiacpadec tabadnu quish adequi tabadta. Adomboembidi Esuquidistu tantiec iccuededquid utsibo chuibanombi.

¹⁸ Esuquidistu tantiesa shui dëbid dëteshunaid yec Esuquidistu tantiaquid yanash ëbi shui dëbid dëteshunacmaidimbocnec nacnemeni quenquoio yec tabadta. Adecbidi, Esuquidistu tantiesa shui dëbid dëteshunacmaid yec Esuquidistu tantiaquid yanash shui dëbid dëtemenu quenda.

¹⁹ Shui dëbid dëteshunaidta nec, quenquoio yec Nuquin Papa tsadec. Adecbidi, Shui dëbid dëteshunacmaidta nec, quenquoio yec Nuquin Papa tsadec. Adquid nec quenquoio yec, Ëmbi chiacpadomboen nadenequidta nec, quec Nuquin Papa tantiec tsadec.

²⁰⁻²¹ Adec Nuquin Papa tantiec tsadnuc yua Esuquidistu tantiaquid yanash yuapen icnu quenquoio yec tabad. Adecbidi, utsin yuapenquoio yec utsin yua icnu quenquoio yec tabadoa.

²² Yua Esuquidistu tantiesa icboedi Esuquidistu tantiaquid yansho isun, Yua nec, cainquoio icquin Nuquin Icbon cuënëndac. Adembidi, utsin yuapenquoio Esuquidistu tantiesa icboedi Esuquidistu tantiaquid yanash Nuquin Icbon namiaidquio nendac.

²³ Matses icsaquid icsho cuidnushe quish abided cuidadec unësquid Esuquidistu Nuquin Papan icmiac aid tantiaquid iquec, Con icbo nec, quish utsin yuaid iquenda.

²⁴ Adembidi chuinu. Tantiata. Nuquin Papan mibi cuëñuc matses yec Esuquidistu tantiaquid yanash, Èbèd tabadquid con Icbo nec, quec matses yec bédamboec tabadta.

²⁵ Chido inesabèdta dadan inacmaid chuita quequin mimbi dada uaid isun aidotsen chiemi. Aido tantiaquin naden chuita Nuquin Icbon cainquo yaqui Nuquin Icbon èbi chuibeneta caid icquin naden mibitedi chiembique. Tantia.

²⁶ Natiatequid icnu Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido.

²⁷ Chido inquid yec chido inesa icnu quenda. Adecbidi, chido inesa yec chido inu quenda.

²⁸ Chido inesa icboedi chido inquid yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic camequid icnu, ¿Mitsipadentsimbi con chidobèdta con bacuèbo bédambo icmepeba? quec chido inquid tabadec. Chido inesain aden tantienquo yec tabadec. Natiaic camequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiemi ma natiamianquie quequo yec ma mibi tabadnueshun.

²⁹ Èmbi chuiboed mibi bédamboen tantiamembique. Tantia. Nidaidèn yuec tabadnu, quetiapimbo nuqui iquec. Nuquin Papa chieshènte ushè chonoc abi tantiaquid dadpen mèyansho isash Esuquidistu chote anoentsèqui yaneque. Abi yacno utsibo puduedtiapimbo icnushe qeshun min chido icnubi Nuquin Papa bunacpadomboen nabanec tabadta.

³⁰ Adecbidi, unèsquo yec shubiquimbi Nuquin Papa bunacpadomboen nabanec tabadta. Adecbidi, bédambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquo yec Nuquin Papa bunacpadomboen nabanec tabadta.

³¹ Yuecshun èmbi nidaidènshun bedaid Nuquin Papan èmendac, quequin tantiaquin ambi chiacpadomboen nabanec tabadta.

³² Natiatequid nibèdpashun, qeshumbic natiamiantequid iquendac, quequin tantiemi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu qeshun aden nabanec tabadpec.

³³ Chido inquidien, Nuquin Papan tantiacpadenuidi nanu quiash, ¿mitsipadentsimbi con chidobèdta con bacuèbo bédambo iquebi camepeba? quec tabadec.

³⁴ Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bènèn bédamboen istsiashi, quec tabadec.

³⁵ Aden mibi chuibanquimbi chido inesa chido bednu qesho, Chèn, caisa nebi. Nuquin Papan chiacpadomboen nabamboedèmbi utsi uain tantianushe qeshun èmbi tantiaid chuibanec nebi. Nuquin Papan tantiacpadomboen bédamboen tabadmenuequin aden tantiaquin chuibanec nebi.

³⁶ Adembidi, Min champi bednu queboed chudte bunec mèmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuè tishtiapimbo yantsiash, quiash, Con champi inec cho, quiash icsatiapimbo adquid icoaic.

³⁷ Adecbidi, min champi inu queboedi, Bedenquo iquembi, qesho tantiaishun menenda. Aden bedmenquo yec mibi bédambo icpec.

³⁸ Con champi bedec cho, qeshun bedmiash, Bédambo iquebi, quenubi, Con champi dadan inacmaid iquec quec bédamboshè utsi icpec.

³⁹ Dadan inaid icquin min bènè nianenda. Min bènè unèsan utsin inaid icnu quiash adta. Esuquidistu tantiesan inaid iquenda.

⁴⁰ Bènu utsin inacmaid icnu quiash bédamboshè iquec aid. Èmbi tantiacpaden èmbi chuiboed Nuquin Papan Mayanèn tantiamiacpaden chiaid nec.

8

Nuquin Papan uaidbimboecnuc nacnenaid tantiaquin pambid dasanaid

¹ Nèbi Nuquin Papan uaidbimboecnuc nacnenaid tantiaquin pambid dasanaid chuinin naden chiembique. Tantiata. ¿Matsesèn nacnenaidta nuqui tantiaid ictic? Padenquo. Aden tantiaquin èmbi tantiacpadpenquo icquid utsibo nec quequin mamènshumpec. Aden tantiaquin mamènshunquin utsi tantienquo iquec. Utsien, Naden nabanquindambi utsibo bédamboen tabadmepeba, quequin tantiaquidquo nec.

² Èmbi tantiemi quequid tantiabenabictsècquid nec.

³ Nuquin Papa tantiaquidien Nuquin Papan tantiaidquo nendac.

⁴ Aden chuishun ¿Nuquin Papan uaidbimboecnuc matsesèn nacnenaid tantiaquin pambid dasanaidtambi pepe? quequin mimbi chuiquin dada uaboed isun chuinu. Tantiata. Nuquin Papan uaidbimboecnuc matsesèn nacnenaid nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibèdquie.

⁵ Nidaidën samëdquid papa cain utsin cuënaid dadpen iquec. Adembidi abuc samëdquid Papa cain utsin cuënaid dadpen iquec.

⁶ Papa cain nuquin cuënaidien Abia Yampidquio nec. Adquid utsi Nuquin Papa cainquio nuqui iquec. Aidi abitedimbo uabampampidquio nec. Aidquio tantiec nuqui tabadec. Adembidi Nuquin Icho cain cuënaidquio Esuquidistu nec. Aidëmbi aton Papabëdtan abitedimbo uabampampid nec. Aidi cuestas dectanac abided cümadac nuqui cuidtiadquid icnubi Nuquin Papan cuëmbanaido yec ambi tantiaido nuqui nec.

⁷ Adembidi aid abentsëqui nuqui tantiaidquio icnubi Nuquin Papan uaidbimboecnuc matsesën nacnenaid utsibon tantiaid iquec. Aden nacnenaid tantiaquin pambid dasanaid aidon pepec. Aden peboedëmbi Esuquidistu tantiaquid yanshun nacnenaid tantiaquin pambid dasanaid ëmbi pesho isun, Icsaosh, Nuquin Papan canushe, qeshun adquid petiapimbo yanebi.

⁸ Nuqui piaid Nuquin Papa tantiamianesa nec. Ad icnuc Nuquin Papan uaidbimboecnuc matsesën nacnenaid tantiaquin pambid dasanaid penquiocsho isash, Aid bëdambocquid nec, quenquio Nuquin Papa iquec. Adecbidi, nacnenaid tantiaquidën dasanaid pesho isash, Aid bëdambocquid nec, quenquio icoaic Nuquin Papa.

⁹ Padnuen Nuquin Papan uaidbimboecnuc matsesën nacnenaid tantiaquin pambid dasanaid ëmbi bedshun pesho isash, Esuquidistu comapenen tantiaquidën tantiaid nacnenaid nec, Esuquidistu tantiabenabictsëcquid quenushe qeshun padenquio iquembi.

¹⁰ Aid pesho isash, Nacnenaid papa cain cuënaid nepec, qeshun, Aid tantiaquin ëmbitsen pambid dasanaid penu, quetsiash Esuquidistu tantiabenabictsëcquid.

¹¹ Padnuen ëmbi piaid Nuquin Papa tantiamianesa nec quequin mimbi tantiec. Aden tantiaquin nacnenaid tantiaquin pambid dasanaid mimbi pec. Aden tantiaquin mimbi penubi Esuquidistu tantiabenabictsëcquidën Nuquin Papa tantiamiantequid nacnenaid tantiaquin pambid dasanaid nec, quequin pec. Esuquidistu comapenen tantiaquid mibi icquimbi nacnenaid tantiaquidën dasanaid ëbi icsainquio ictequid nec quequin pequin Esuquidistu tantiabenabictsëcquido mimbi icsameyoc. Mímibi icsamiaido tantiec Esuquidistu unëspanëdash.

¹² Ad icnuc Esuquidistu tantiabenabictsëcquid mimbi icsamequin Nuquin Icbon chiacpadomboen niacquid mibi neyoc.

¹³ Padnuen Esuquidistu tantiaquid utsibon icsamboen tantiaquin penushe qeshun padpiden penquio iquembi ma icsainquio icpanu qeshun.

9

Esuquidistu tantiaquidon natequid

¹ Esuquidistu chuibeneta cacmaid Pabado nec quequidotsen chuinu. Tantia. ¿Matsesën nata caidtabi nedi? Padenquio. Esuquidistun ëbi chuibeneta caid nebi. ¿Adquidida nepeba quecta mibi icpe? ¿Nuquin Icbon chiacpadomboen ëmbi chuibanac mibitedi abi tantiaquido yanenquioda ictionda?

² Ai, ëmbi Esuquidistu chuibanac Esuquidistu tantiaquid mibitedi yanondac. Utsi-utsiec yacnocquid ëmbi chuibanacmaid icnubi, Ëmbi chuibanaido mibitedi nec, quequin tantiembi. Ëmbi chuibanac Esuquidistu tantiaquid mibitedi yanshun, Esuquidistun ëbi chuibeneta caidquio nebi, quequin Pabado chiaid abimbo iquec, quequin bëdamboen tantiaquidquio mibi nepec tantesa uainquiocquin.

³ Aden ëmbi Esuquidistu chuibanac abi tantiaquid mibitedi icquimbi utsin-utsinquien ëbi icsamboen chiec. Naden ëbi chieque. Tantia. Pabado Bednabëdtan chuibanasho pemenuioctiad, quequin chiec. Aden chiec onquequid ëmbibi tantiaquin naden aido chiembique. Tantia.

⁴ ¿Esuquidistu chuibanec bundoenquiodabi icpe?

⁵ Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bëdambo iquec, mibi quec. Adembidi utsibon aton chido buanubi Petedon aton chido buansho isash bëdambo iquec quiashic Esuquidistu chuibanec ëbëd capuquimbi Bednaben aton chido buansho isash, Icsambo iquec, quec mibi. ¿Esuquidistu chuibanec ëbëd capuequi aton chido buante bunenquioda Bednabe icpadic?

⁶ Adembidi, ¿Mibi pemembique. Penuequin nabanenda, capenda Esuquidistu chuibenequid utsibo mimbi ique? Bednabëbëdta ëbi chiec, ¿Penun daëdshun shubumpi nacentiad, quepecta mibi ique?

⁷ Ad yenquio utsibo iqueque. Tantia. Chuinu. ¿Sondado icquinda aton na buanshun pepec? Padenquio. Abi nashunquidombien pemeshun acmec. ¿Icho abi nashunquid aton tiedën caniquid pemesada nepadic? Padenquio. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid.

⁸ ¿Aden chuiquin ëmbibi tantiaidtambi chuipo? Padenquoio. Nuquin Papan Moises dada uamiampid ëmbi chiaid nec.

⁹ Nad iqueque. Tantia. Chuinu: “Min tiedën caniquid ëshë chicnueshun min baca tsucsucmequin dëpuquenda ma penu,” quequin Nuquin Papan chiaidquoio nec. ¿Bacanuidi ma penu quequin Nuquin Papan chiaidta nepadic? Padenquoio.

¹⁰ Matsesbëdtambi ma penu quequin Nuquin Papan chiaidquoio nec. Adembidi ambi piaid tantiaquin nabanquido icbo nec. Penuequin tiedën caniquid icbon taneshcaic. Adembidi, penuequin ëshëacsho bedquid icbo nec.

¹¹ Adembidi, ¿Nuquin Papan chiaid mibi paquiacquid yec pete bec cho quenquioti-adquidtabi nedi?

¹² Mibi chuibanquid utsibo menebanquimbi ëbia mibi chuiquidquoio icsho meneti-adquidi menianenquio mibi icpoc. Aden ëbi menenquio yaqui ëmbi chiaid tantienquoio icnushe quiash, Bec cho, quetiapimbo iquebi mibi caic. Aden chuibanec bundoquiec capuecuenec nebi.

¹³ Nuquin Papa tabadte shubu uashunaid yacnoshon nashunquidën ashunquoio peshun aquec. Adembidi ashunquoio nashunquid utsibon matsesën Nuquin Papa menenun bëaid tauishun pambid tëshë bedshun peshun aquec. ¿Aden peshun acpec, quequin tantienquioda mimbi icpe?

¹⁴ Adomboembidi Esuquidistu chuibansho abi tantiaquidon yuedec, quequin Nuquin Papan chiaid nec.

¹⁵ Ëbi yuedtiadquidi nec, quequin tantiequi ¿adabi pemenu yuedpec? quesa nebi. Adembidi, Ëmbi dada uaid buamiacsho isun ëbi yuedtsiash, quequin dada uainquoio iccombi. Bunquiec unësbudec mibi caic, Bec cho, quenquoio iquendabi.

¹⁶ Ëbibi Esuquidistu chuibenenu quenquioccobi. Ambi ëbi chuibeneta cac Esuquidistu chuibenec nebi. Abi chiesa yanash unësquoio ictsiabi.

¹⁷ Ëmbibi, Esuquidistu chuibenu, quiash, Bec cho, quetsiandabi. Esuquidistun ëbi chuibeneta caid yec ambi namiaidquoio nebi.

¹⁸ Esuquidistu chuidenesho isash, ¿atotsi Pabardon bedpash, quepecta mibi ique? Naden Esuquidistu chuibenec nebi. Tantia. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bëdambo iquebi.

¹⁹ Bec cho, quesa yec utsin yuacmaid nebi. Adquid yequi utsibo chuinuec nidanec shubu utsin puduedcuenequin aidon namiaidbimboecquin aidbëd tabadquin chuibanec nebi. Adec tabadquin ëmbi chiac ma aidotsen Esuquidistu tantiaquido yampanuna.

²⁰ Adecbidi, isadaidbo Esuquidistu chuibanec aidobëd tabadquin mimbi natemaid ëmbi natemaidpenquoio nec, quenquiocquin ambi natemaid nainquoio iquembi. Adquiec tabadquin ëmbi chuibanac ma isadaidbotsen Esuquidistu tantiaquido yampanuna.

²¹ Adecbidi, isadaidpembo chuibanec aido tabadacpadec abëdi tabadquin Esuquidistun chiacpadec niaquenquoio yec tabadec nebi. Ëmbi adoac isadaidpembotsen ma Esuquidistu tantiaquido yampanuna.

²² Adecbidi, Esuquidistu tantiabenabictsëcquido chuibanec ëmbi tantiabenabi iccondac-paden bëyuc tauain chiaidquoio tantiamenuen chuibanec nebi. Ëmbi adoac ma aidotsen Esuquidistu tantiabenquidquoio yampanuna. Adequi tabadquin Esuquidistu chuibanec nebi. Ëmbi adoac utsibo ma Esuquidistu tantiaquidquoio yampanuna.

²³ Adec tabadequi ma ëmbi Esuquidistu chuibeniac Esuquidistu tantiaquido yanash Nuquin Papa yacno nuquideti tabadendac.

²⁴ Titinguecuedquido icnuc bëyuc abia titinguec choquid iquendac. Adquid icsho isun, Mibi badedquoio titinguoc, quequin tingueta quequidën titinguec abia choquid menendac. Adembidi, Nuquin Papan menete bëda iquec. Aid bednu, queshun Icbon chiacpadomboen nabanta, caimbi mibi.

²⁵ Badedquoio titinguecquid bedte bunaid chodquetequid icnuc, Aid bednu, queshun abi bëdiactsëc titincamete pete icsa actequid icsabëda isuidec titinguenuequid iquec. Nuquien chodquetemaid bednuequin icsaid isuidec.

²⁶ Utsien, Bednu, quenquoio yec titinguec. Adembidi, Bednu, quenquoio yec utsibëd mëdanten senanu quequin nibëdacnoshombi mëdanten seded-sededec. Aden tantiaquin naisa nebi.

²⁷ Utsibon ma tantianu queshun Esuquidistu chuibenias unësacsho Nuquin Papan menete bëda bedtiapimbo icmane quiash icsaid mëmunec tsadebi.

10

Isadaidbon chieshampicpadec tabadenda quiaid

¹⁻² Abi yacno abi tantiesa chosho puduedmenquo icchitoshe quiash Nuquin Papan chiaid chieshēnenquo yec bēdamboec tabad, quequin tantiamenuen, Nadeq nuquin tsusedpabo tabadpampic, quequin chiembique. Tantiata. Equipito yacnoshon ambi mēnchicaidobēd Moises puduanec Nuquin Papan bēyucamiaid abu ushu tēdion nidanequin tsusedpabon Acte Piu potepampic.

³ Adec nidaniash yuecash aidtedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic.

⁴ Adembidi acte bundoacsho isun cuēnote cuesquin acte chomiaid acash, Ēbi bēdambo icmequin Nuquin Papan ambi yuecshun chometequid Quidistubēdtan nadatiambocquin naid nec, quequin tsusedpabon utsin-utsinquo tantiabempampic.

⁵ Aden tantiabenubien abēd icquid utsibon padenquo icpampic. Aden tantiesa Nuquin Papan nidaid Canan caid menenu caid yacno niduidequi unēsbudnepampic adquidtedi.

⁶ Tsusedpabo chieshampicpadquid icnushe qeshun Nuquin Papan aido chuiquin dada uamepampic.

⁷ Ad icnuc tsusedpabon Nuquin Papan uaidbimboecnuc nacenashun papa cain tantiampicpaden tantienda. Naden Nuquin Papan aido chuiampic. Bacabimboecnuc ambibi nacenaid tantiaquin peshun acash baidacuededpampicpaden tantiaquin nainda.

⁸ Adembidi, tsusedpa utsibon ambi chudtemaid chudampicaden chudenda. Aden nasho abi ushēmbi tsusedpabo dadpen 23,000ted Nuquin Papan cuesunemepampic.

⁹ Adecbidi, ¿Ambi chiaid niacshodabi Nuquin Papan cuidpeba? quiampicpadec adenda. Aden tantiaquido nisin pebededac unēsbudnepampic.

¹⁰ Adecbidi, Equipito yacnoshon mēnchicaido abi mēnchicquid chieshec nadpampic. Equipito yacno iquec bēdambo iccondaiddi nēmo choash bunec capuebi. Anobidi tabadec nidebi, queded-quededsho ambi abi yacnoshon uaid mayan bēdabo Nuquin Papan budmi-aidēn aidtedi cuesunepampic.

¹¹ Abi tsibanquido tantiamenuequin tsusedpabo tabadnēdaid icsa Nuquin Papan chuiquin dada uamepampid ěmbi chuiboed nec.

¹² Tsusedpabo Nuquin Papa chieshēnec icsapampicpadec icsamane quequin mibi tabadte tantiata.

¹³ Ēnden tsusedpabo chieshēmete icpampid abi iquec. Adaid natiatequid icnuc chieshēnushe qeshun Nuquin Papan mibi tantiaquin uidēn uac mibi icsainquo yec chieshtoenuquo yec dayacquo iquendac.

Nuquin Icho Esuquidistu unēsaid tantiaquin acshumbic mayan icsa tantiaquin mimbi actiapimbo iquec quiaid

¹⁴ Nuquin Papan chiaid niacmane quiash, Nuquin Papan uaidbimboecnuc matsesēn nacenaid tantianu, quenda. Dacuēdec cuenacimboc aid nanacno nidenda.

¹⁵ Tantiabenuquid icsho mibi chiec nebi. Pabadon chiaid abimbo iquec quequin tantiec aid nanacno nidenquo yec Esuquidistu chuibansho tantiec iccuededteneta.

¹⁶ ¿Iccuededquin sicaid acnun Nuquin Papa chiec onqueshun acted-actedquin matses icsaquid icsho cuidnushe quiash abided cuidadec Esuquidistun intac chididiquiaid tantien icquinda nuqui acti? ¿Adembidi, pete cuēsh-cuēshun Nuquin Papa chiec onqueshun aton dada mēyanaid tantien icquinda nuqui pedi?

¹⁷ Esuquidistubēd abentsēcshun piacimbocnebi, quequin tantiaquin pete cuēsh-cuēshun meniac abentsēcshun piacimbocnebi tantiec iccuededquidon pebededec.

¹⁸ Aden nuqui pebededacimbocnebi isadaidbo icsaid cuidnuen nidaidēn capuquid-ded cuesuniaid pambid tauiquin Nuquin Papan shēdtequid pambid bedshun cuesunequidbēdtan nidaidēn capuquid icbon pepanēdash.

¹⁹ Aden ěmbi chiac ¿atopsi Pabado ěbi tantiamete bumpec, quepecta mibi ique? Mibi naden tantiamembique. Tantiata. ¿Nuquin Papan uaidbimboecnuc matsesēn nacenaid tibopecta iquec? Padenquo.

²⁰ Adec adquid tiboquesa icnuc mayan icsa tantiaquin Esuquidistu tantiesan Nuquin Papan uaidbimboecnuc matsesēn nacenaid yacnoshon pambid dasanec. Aden aid pambid penu, qeshun mayan icsabēd yacimbocquid nebi, quequin pec. Adquidbēdtan penda.

²¹ Nuquin Icho Esuquidistu unēsaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unēsaid tantiaquin pete peshun mayan icsa tantiaquin pambid petiapimbo iquec.

²² ¿Aid tantiaquin acshun pequin Nuquin Papa nēishmenquioda mimbi icti? Ai, abitedi tantiaquidquidquo icquin abitedi isquidquidquo icquin Nuquin Papan mibi cuidendac.

Ēmbi natemaid naden nata caid nibēdec, quiash nanueboedi Esuquidistu tantiaquid utsi icsamemane quiash nainquiocte chiaid

²³ Nēid mishtermaid nec. Nēid petemaid nec. Nēid actemaid nec, quequin ėm̄bi chuitequid nibēdec, quiash Esuquidistu tantiaquid utsi icsamemane quiash nainquo yec tsadebi. Matsēsēn ambi nacnenaid tantiaquin pambid dasanaid ėm̄bi tantiacmaid nec, quiash pambid dasanaid petiadquio iquequi Esuquidistu tantiabenabictscēcquidēn, Nēid nacnenaid nuquin papa caid nec, quequin penushe quiash penquo yec tsadebi.

²⁴ Utsi tantienquoquin nacnenaid pambid dasanaid piash bēdambo iquebi, quenda. Naden natiad. Matsēsēn nacnenaid pambid dasanaid ėm̄bi pesho isun utsibon icsamboen tantiatsiash, quequin penda.

²⁵ Aton na sambededacno nidshun pambid bednuequin, ζNuquin Papan uaidbimboecnuc matsēsēn nacnenaid pambid dasanaid bedaidta nec? quenquoquin bedta.

²⁶ Abu nidaidbēdta uashun aidēnquo icquidtedi Nuquin Papan uampidquo nec. Aided-imbo aton na nec. Nacnenaid yacnoshon pambid sambededaid aton na nec. Aidēn bacuēbo iquec aid pambid pequido mibi nec.

²⁷ Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsēsēn nacnenaid tantiaquin pambid dasanaid bedaidta nec, quenda.

²⁸ Adnubien mibi puduedacno isedquid utsi Esuquidistu tantiabenabictscēcquid tsadquin, Matsēsēn nacnenaid papa cain cuēnaid tantiaquin dasanaid nēid pambid nec, cac aid pambid penda.

²⁹ Ėm̄bi papa cain cuēnaid nec, quequin utsin tantianushe qeshun aid pambid penda. Matsēsēn nacnenaid con pa nec, quequin cuēnaid tantiesā icquin ζatotsieshumbimbi matsēsēn nacnenaid tantiaquin pambid dasanaid penquo iqueque? Chuinu. Tantia.

³⁰ Nuquin Papa ėm̄bi tantiaidquio icnuc penun aidi chuisho isash ζatotsieshun matsēsēn nacnenaid papa cain tantiaquin pepec utsibo quepec?

³¹ Edoen utsibo tantiamenuen bēdamboen nabanec tabadteneta.

³² Aden naic, Esuquidistu tantiaquid isadaidbo isadaidpembobēdta Esuquidistu bēdamboen tantiabemequiono, quec bēdamboec tabadta.

³³ Naden naic ėbibi bēdambo iquebi, quenda. Naden ėm̄bi nabanuc ėbēdi utsi bēdambo ictsiash, quequin tantiata ma Nuquin Papa yacno puduedtequid utsibo yanu qeshun.

11

¹ Ambia tantiaquidēn Esuquidistun icmiacpadquiec tabadec nebi. Adecbidi ėm̄bi chuiquin ismiacpadquiec tabadteneta mibitedi.

Nuquin Papa tantiaquin iccuededquin naid

² Mimbā tantianēdaidquio mibi nec, quequin mimbi chiaid tantiaquin nabanec nebi, quequin mimbi dada uashun bēmiaid isash bēdambo iquebi. Adembidi, Esuquidistu tantiabenēdaidon chuibanaid mimbi chiacpadomboen tabadec, quequin mimbi dada uaid bēmiaidon chuibanasho tantiaish bēdambo iquebi.

³ Mimbā natequid utsi chuinu. Tantiata. Abi tantiaquid chuiquid Esuquidistu nec. Adembidi chido chuiquid dada nec. Adembidi Esuquidistu chuiquid aton Papa, Nuquin Papa caid, Edoen nec.

⁴ Adquid Nuquin Papa nec, quequin, Aid chuinu, qeshun aton mauete chicquid dadan. Aid chuinen mauet tabadquin, Ėbi chuiquidpenquo Esuquidistu nec, quiacbimboen ismequid nec. Adembidi Nuquin Papan chiaid tantiamequin chuibanquidēn aton mauete chiquec.

⁵ Chidoen, Ėbi chuiquid Esus nec, quequin ismec mapucudash tsadec. Adec mapucudenquio yec tsadquin Esuquidistu tantiaquid iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquio ictiad.

⁶ Ėbi chuiquid nibēdec, quiacbimboec tabadsho matasmetiad. Matasmiaish ma mapucudpanu chido.

⁷ Nuquin Papa aton madobēd onquec: Nuquibimboecnuc matses uanuna, quiampicpaden dadaba uapampic. Nuquin Papabimboec icquid nebi, quiash tsadquid dada. Ėbi chuiquid Abia Yampid nec, quequin ismenuec aid chiec onquec mauete mauesa dada nec.

⁸⁻⁹ Dadaba Nuquin Papan uapampic. Dadabēd icquid uanuna qeshun dadan shictodo chicshun chido uashun, Mibēd nashunanquid nec, quequin dada menepampic.

¹⁰ Adquid icmiac dada ėbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bēdabo abi chuiquid chieshēnenquo yec Icbon chiacpadquiec tabadec.

¹¹ Nēid chido nec. Nēid utsi dada nec, quenubi nashunanquid abi daēdi nec.

¹² Dadan shictodo chicshun chido uapampic. Adecbidi chidon tishaid dada nec. Ambī tantiampicpaden Nuquin Papan naidtedi nec.

¹³ ¿Nuquin Papa chuinuec ëbi chuiquid nibèdeque. Matasadnu quiash chido bédambo da icpadic?

¹⁴ Chido isadacpadec isadnu quec icsambo dada ictsiash.

¹⁵ Chido isadacpadec dada icsho isash, Chido nec, quetsiash. Dada isadacpadec chido isadenquio iquec.

¹⁶ Ëmbi chuiboed tantiash, Icsamboen chiosh, quetsiash. Adquid naden chuinu. Tantia. ¿Ëmbentsèquidambi aden chie? Padenquio. Èbipadquiocquin chuibenquidon adomboembidi chuibanec. Adembidi Esuquidistu tantiec iccuededquid utsibon tantiabedec.

Nuquin Icho unēsash uincuenaid tantiaded-tantiadedta quiaid

¹⁷ Adecbidi, Mimbi naidtedi bédambo iquec, quetiapimbo iquebi. Adquid chuinu. Tantiata. Esuquidistu tantiabenquid utsibo icmenu, quenquio yec mibi iccuededec.

¹⁸ Abentsèc yachimboec iccuedesa Esuquidistu tantiaquido Codinto yacnocquido nec, quiosh. Adsho tantiash, Abimbo capec, quiobi.

¹⁹ Nèidtedi ëmbi bédamboen isaido nec. Utsitedi ëmbi icsamboen isaido nec, quiash cuèshèdachimboec mibi tabadcuededec. ¿Adec tabadshoda Nuquin Papan mibi bédamboen ispec? Padenquio.

²⁰ Adec tabadquid Esuquidistu unēste tantienquiocquin utsin-utsinquien peshun acted-actedec.

²¹ Utsibo cainenquiocquin abia choquidon nua pebededec. Adoac utsibo choash bunec tabadnubi abia choquido paëmbocquid nua acash tantienquio yec tabadec.

²² ¿Min nuntan pete nibèdpecta iquec? Mitsana iquec. Adec mitsana min shubuno icnuc ¿Esuquidistu unēste tantiec utsibobèd iccuedednu, quenquiocquinda mibia choshon pebededpe? ¿Natiavianquiec pete nibèdchitec pete nibèdquid camenuenda mimbia pebedede? Aden pebededquido ¿atotsimbi chuipe? ¿Bédamboen mimbi nabanec quepectabi ique? Padenquio. Aden naquin Esuquidistu unēsaid tantienquiocquin mimbi pec.

²³ Nuquin Ichon chiapadomboen mibitedi chuibanondambique. Tantiata. Chuinu. Nèid inchèshëmbi ëbi chieshènquido èbèd icquidèn ëbi bedmendac, quequin Esuquidistun abi unēste tantiaquin nadopanèdash. Pete bedshun

²⁴ Nuquin Papa chuishun cuèsh-cuèshun naden abèd icquido chuipanèdash: “Pete cuèshaid bedash matses icsaquid icsho cuidnushe quiash èbided cuidadec unēste tantiaquin pebededta,” quepanèdash Esuquidistu.

²⁵ Aden chuishumbic aid pebededsho isun pete utsi pebededquin nainshun adembidi dèshote bedshun sananquin naden Esuquidistun chuipanèdash: “Esuquidistu unēsquin ëbi chian anèdènquiacno nèsecatequid icsho mènchictequid Esuquidistu iquec, quequin tantiaquin sicaid acbededta. Sicaid acquin ëbi mènchictequid iquec quequin tantiaquin acban.”

²⁶ Aden Esuquidistun ismenèdacadomboen pete cuèshëmpi pebededshumbic sicaid acbededta. Nuquin Icho unēsaid tantiaded-tantiadedquin aid padpidec choabicnuc adobanta.

²⁷ Abi unēste tantienquiocquin pete cuèshun peshun acquin Esuquidistun chiaid niacquid nec.

²⁸ ¿Pete cuèshëmpi penun Esuquidistubèd tabadacpadquiectabi tabadpe? quequin mibi utsibèd tabadte tantiata.

²⁹ Esuquidistu unēsaid tantienquiocquin peshun acquid Nuquin Papan cuidendac.

³⁰ Aden adquidon peshun acac utsi-utsiec padishec; utsi-utiec daicsambo yanec; utsi dadpen ènden unēsac.

³¹ ¿Adabi Nuquin Papan chiaid niaquenquio yec tsadpe? quequin tantiec tsad. Aden tantiec tsadshumbic, Icsaobi, Papa, queshun mibi icsaid chuiban. Aden chuishun Esuquidistu unēsaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic camenquio iquendac.

³² Adesa icsho Nuquin Papan natiaic camiaid mibi iquendac. Abi tantiesabèdta chian anèdènquequid nèsecadenquio mibi icmenuen Nuquin Papan mibi natiaic camec ma ëmbi chiapadomboen nabamenuquin.

³³ Adembidi Esuquidistu unēsaid tantianuec iccuededquin utsibo choabi iquec quequin aido cainta.

³⁴ Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unēsaid tantianuequin naden nata quequin chiombi. Mibi yacno nidash puduedshun ëmbi chuiboed daèd uain chiendambi.

12

Nuquin Papan Mayanèn tantiamiaid

¹ Nuquin Papan Mayanèn tantiametequid chuinu. Tantiata.

² Ēnden mibitedi Esuquidistu tantiesha yec Nuquin Papan uaidbimboecnuc ambi nacne-
naid matsesēn ismec, Nēid papa cain cuēnaid nec, qesho tantiaquido mibitedi iccondac.

³ Adquid iccondaidi Esuquidistu tantiaquid mibi yanacsho naden chiembique. Tantia.
Nuquin Papan Mayanēn tantiamiaido: Esus Nuquin Icbopenquio, Nuquin Papan Chomi-
acmaid nec, quetiapimbo adquido iquec. Adecbidi, Nuquin Papan Mayanēn tantiamiac-
maido: Esuquidistu con Icho nec, quetiapimbo icoaic.

⁴ Nuquin Papan Mayanēn, Naden nata, quequin tantiametequid Esuquidistu tantiaquido
iquec. Adec ambi tantiametequid dadpen icnubi aid abentsēcquiobi tantiamianquid
Nuquin Papan Mayan nec.

⁵ Adecbidi, utsi nashunquido Esuquidistu tantiaquido icnubi utsi nashunquidon Icho
abentsēcquiobi Esuquidistu nec.

⁶ Adecbidi, nadatiambocquin nabanquid utsi-utsiec icnubi Nadatiambocquin nami-
anequid abentsēcquiobi Nuquin Papa iquec.

⁷ Esuquidistu tantiaquid utsibēd tantiananquin namenu, quequin aton Mayan Nuquin
Papan nuqui menec.

⁸ Nuquin Papan Mayanēn tantiamiac ambia comapenen tantiaquidquo icquin chuiban-
quid utsi-utsiec iquec. Nuquin Papan Mayanēn tantiamiac ambi tantiaid chuibanquid utsi-
utsiec iquec.

⁹ Nuquin Papan Mayanēn tantiamiacpaden ėmbi chiapadomboen Nuquin Papan naic,
quequin tantiaquid utsi-utsiec iquec. Nuquin Papan Mayanēn tantiamiac bēdamequid utsi-
utsiec iquec.

¹⁰ Nuquin Papan Mayanēn tantiamiac nadatiambocquin nabanquid utsi-utsiec iquec.
Nuquin Papan Mayanēn tantiamiac Nuquin Papan nanun chuipampid tantiaquin
chuibanquid utsi-utsiec iquec. Nuquin Papan Mayanēn tantiamiac matses bēdamboec
tabadsho isash, Nuquin Papan Mayanēn tantiamiaid nec, quequin tantiaquidquo utsi-
utsiec iquec. Adembidi, utsi icsamboec tabadsho isun, Mayan icsan namiaid nec, quequin
tantiaoaic. Nuquin Papan Mayanēn tantiamiac nidaidēn icquid onquiacmaidēn onque-
quid utsi-utsiec iquec. Adembidi Nuquin Papan Mayanēn tantiamiac nidaidēn icquid on-
quiacmaidēn onqesho tantiaquidēn tantienquiocsho isun aidon onqueten chuibanquid
utsi-utsiec iquec.

¹¹ Aden Nuquin Papan Mayanēn tantiamiac nabanquido nuquitedi nec. Ambi tantiac-
paden abentse-abentsen Nuquin Papan Mayanēn aden tantiamec.

Dada abentsēc yacpadquiec Esuquidistu tantiaquidtedi iquec

¹² Uidēnaid dadpen icnubi matsesēn dada abentsēc iquec. Adquiobidi Esuquidistu
tantiaquid dadpen icnubi ambi tantiaid abentsēcquiobi Esuquidistu iquec.

¹³ Ad icnuc isadaidbo yec isadaidpembo yec utsin yuaid yec utsin yuacmaid yec quec
Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin
Papan aton Mayan meniaido nuqui nec.

¹⁴ Matsesēn dada abentsēcquiobi icnubi uidēnaid dadpen iquec.

¹⁵ ¿Mēdantepadquidpenquio yec matsesēn dada uidēnacmaidta taē icpec? Padenquio. Dada
uidēnaid taē iquec.

¹⁶ Adecbidi, ¿ēshēpadquidpenquio yec matsesēn dada dēccuēsquiacmaidta dēbiate icpec?
Padenquio. Dēbiate dēccuēsquequid iquec.

¹⁷ Matsesēn dada ēshēuidpambo icquin ¿atontsin tantiapatsiash? Adecbidi, aton dada
pabiateuidpambo icquin ¿atontsin shēdpatshiash?

¹⁸ Nuquin Papan tantiampicpadquiequi matsesēn dada uidēnaid nec.

¹⁹ Dēccuēsquequid abentsēc icnuc dada nec quetiapimbo iquec.

²⁰ Uidēnaid dadpembēd dēccuēsquequid dadpen icnuc matsesēn nami abentsēcquiobi iquec.

²¹ Matsesēn dada ad icnuc, ¿Mēdante bēdambo icnubi ēshē padenquio iquec, quepecta mibi
ique? Padenquio.

²² ¿Isadesa uidēnaid uquēducquid nibēdnuc matsesēn dada bēdambo icpatsiash?

²³ Uidēnaid uquēducquid ismenquiocquin ompoaidquido utsi nec.

²⁴ Nami isaidquido ompodesa nec. Nuquin Papan tantiampicpadquiequi ompoaid
nibēdnuc matses cuēdenquio yec unēsec.

²⁵ Ad icnuc, Icsambo icmianeque. Tēsnu, quetiapimbo icho iquec. Ompoaid ompodesa
aidbēdi iquec bēdambo yec nashunanquid aidtedi nec.

²⁶ Abentsēc paēmbo iquec matsesēn dada bēdambo iquenquio iquec. Adquidtedi bēdambo
iquec matsesēn dada abichobi paēpenquio iquec. Adecbidi, Esuquidistu tantiaquido
abentsēc yacimboec iquec abentsēc icsacsho isash abitedi unēsquio iquec. Abentsēc,
Bēdambo iquebi, quenuc aidbēd abitedi bēdambo iquec.

²⁷ Adquidtedi matsesën dada abentsëc yacpadquiec Esuquidistu tantiaquidtedi aidën dada abentsëc yachimboecquid nuqui nec. Abi tabadtequid iquec.

²⁸ Abi tabadtequid nadquid iqueque. Chuinu. Tántia. Ambi chiacpaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid icsho isun naded tabad quequin chuibanquin ismequid utsi iquec. Nadatiambocquin nabanquid utsi iquec. Bëdamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiacmaidën onquequid utsi iquec. Adquidtedi nuqui iquec abentsëc yachimboec nuqui tabadec.

²⁹ ¿Esuquidistu tantiaquidtedida ambi ëbi chuibeneta caid icpadic? Padenquio. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquio. ¿Esuquidistu tantiaquidtedida, Naded tabad, quequin ismequid icpadic? Padenquio.

³⁰ Adecbidi, ¿Esuquidistu tantiaquidtedida bëdamequid icpadic? Padenquio. ¿Esuquidistu tantiaquidtedida abi onquiacmaidën onquequid icpadic? Padenquio. ¿Utsi onquiacmaidën onquesho tantiaquidën tantienquiosho isun aidon onqueten onquequin chuibanquidtedida icpadic? Padenquio.

³¹ Nuquin Papan Mayanën tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenequin ëmbi abia chuibambocpadquid icte bunquiota.

Utsi tantiaquidquio

Ëmbi chuiboedtedi Esuquidistu tantiaquido Nuquin Papan Mayanën tantiamete bëdambo iquec. Padnuen ambi tantiamequin bëdamboshë icmetequid iqueque. Aid tantiauidquidba chuiboshombic aid tantiaquidquio chuinu. Tantiata.

13

¹ Matses utsi-utsiecquid onquiacpadquiec anquiadquid, adecbidi Nuquin Papan abi yacnoshon uaid, mayan bëda onquiacpadquiec onquequid icquimbi utsi tantiesa icquin chuibansho abipenquio chuisho utsibon tantiendac.

² Utsibic, Nuquin Papan Mayanën tantiamiac chuibanquid adembidi Nuquin Papan chienquio icampid Nuquin Papan Mayanën tantiamiac tantiaquid aidi niosh. Aidëmbidi Nuquin Papan nadatiambocquin naquidquio nec, quequin tantiaquin, Mananuc macuësh dapa icboedi acte nantan nënitsinoa, Papa, cacpadomboen nënitsinoac nidquid isquid icquimbi utsi tantiesa icsho, Bëdamboquid mibi nec, Nuquin Papan catiapimbo iquec.

³ Utsibic, aton na nibëdsho menequidquio niosh. Adembidi, Esuquidistu tantiesa nebi cata, cac padenquiosho mëyanaid niosh. Adquid icquimbi utsi tantiesa icsho, Bëdamboen mimbi naoc, Nuquin Papan catiapimbo iquec.

⁴ Padnuen Nuquin Papan Mayanën bëdamboshë ictequid tantiamiaid nadquio iqueque. Chuinu. Tántia. Utsi tantiaquidquio utsi tantiamequionuec chushcanesa nec. Utsi tantiaquidquio nashundenequid nec. Utsi tantiaquidquio utsin na isash adquidquio con na bëpashun quesa nec. Utsi tantiaquidquio dëniacanquidquio yec dëniacanquidquio nebi abibi quesa nec. Utsi tantiaquidquio ëbentsëqui tantiaquidquio nebi quiacbimboen nabanesa nec.

⁵ Utsi tantiaquidquio utsi icsamboen tantiaquin nabanesa nec. Utsi tantiaquidquio, Ëbentsëqui tantiapadomboenuidi utsitedishun nabantiad, quesa nec. Utsi tantiaquidquio badedquio nëshesa nec. Utsi tantiaquidquio abi icsamboen nasho cuidesa nec.

⁶ Utsi tantiaquidquio utsi icsambocsho isash, Unësqüio iquebi, quec tsadquid nec. Adecbidi, utsi bëdambochsho isash, Bëdambo iquebi quec tsadquid neoaic.

⁷ Utsi tantiaquidquio utsi icsaid chienquio yec tabadquid nec. Utsi tantiaquidquio ambi nanaid nibëdsho isash ampiash badedquio quenquio yec ¿mitsimboembi nampoba? quec onquequid nec. Utsi tantiaquidënquio utsi icsadennesho isun, Tantiamic Nuquin Papan chiacpadomboen natsiash, quequin chuibanendac. Aden chuishun bëdamboen nasho isnuen cainquid nec. Mëyanaquí chieshenquio yec dayacquio yec tabadtenequid utsi tantiaquidquio nec.

⁸ Utsi bëdamboen tantiaid ënëdtiapimboctequid nec. Nuquin Papan chiaid chuibantsaidien ënëdendac. Adecbidi, matses onquaidtedi ënëdendac. Adecbidi Nuquin Papan ambi uaidtedi ëmiac matsesën isquin tantiaid ënëdoaic.

⁹ Nabanaidtedi tantiabenabictsëcquidquio nuqui nec. Adecbidi Nuquin Papan chiampidtedi tantiabenabictsëcquidquio nuqui neoaic.

¹⁰ Nidaidën tabadquin aitedi tantiabenabictsëcquidquio nuqui icboedi Nuquin Papan yacno puduedash abitedi tantiaquidquio nuqui iquendac.

¹¹ Bacuë yec bacuëmpi onquiapadec onquepadenebi. Adembidi, bacuëmpin tantiabeni abi yacpaden tantiapadenembi. Adquid icquin caniaidën tantiacpadpenquiocquin tantiapadenembi. Adquid ichoedi caniaash bacuëmpin tantiacpadpenquiocquin tantiabenondambi.

¹² Nēbi isnanten bëisadquin Nuquin Papabimboecquid nuqui isec. Yuecshun abi yacno puduedshun aidquioabi Edoen Nuquin Papa nuqui bëistuidendac. Nēbi Nuquin Papa isenquiocquimbi ambi chiaid tantiatsembi. Ambi tantiacpaden yuecshun bëisquin nuqui tantiabenendac aid.

¹³ Nidaidën ënëdnuc nëdtedi ënëdtemaid iqueque. Chuinu. Tantia. Ambi chiacpaden nabanquidquio Nuquin Papa nec, quequin tantiaidën ënëdtemaid nec. Adecbidi Nuquin Papa yacnoësh abipadquid bédambocquidquio iquendabi, quequin cainquin tantiaidën ënëdtemaidquio nendac. Adecbidi, utsi tantiaidën ënëdtemaidquio neoaindac. Aidtedi ënëdtemaid icnuc nidaidën tabadquin, Utsi tantiembi, quequin ismiac utsi dadpen Esuquidistu tantiaquid yanash mibëdi Nuquin Papa yacno tabadendac. Adquid bédamboshëcquid nec.

14

Mimbi chiaid chuibanquid ëbi icme, Papa, quaid

¹ Utsi tantiaquid icta. Nuquin Papan Mayanën adquid icmiosi, quequin ambi tantiamete utsi bunquiebi. Adecc bunsho mimbi chiaid comapenen bédamboen chuibanquid ëbi icme, Papa, quequin chuiban.

² Aden tantiamiac tantiamenu qeshun tantianuequidën onqueten chuiban. Aton onqueten onquenquiocsho aidon tantienquio iquec. Padnuen onquaidtedimbo Nuquin Papan tantieque. Aden nidaidën icquid onquiacmaidënquio Nuquin Papan Mayanën tantiamiacpadec onquequin Nuquin Papa chiecc onqueta.

³ Ma Esuquidistu utsibon tantiabenu, qeshun Nuquin Papan chiaid chuibanec. Adembidi matses ma bédamboec tabadnu qeshun chuibanec.

⁴ Nuquin Papan Mayanën tantiamiac nidaidën icquid onquiacmaidën onquequin onquequiduidtsëqui tantiabenquid yanec. Padnuen Nuquin Papan chiaid Nuquin Papan Mayanën tantiamiac Esuquidistu tantiaquido ma Nuquin Papan chiaid tantiabenu qeshun chuibanec.

⁵ Nuquin Papan Mayanën tantiamiac nidaidën icquid onquiacmaidën Esuquidistu tantiaquidtedi onquepashun. Aden chuishumbic adec onquenquiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenendac. Padnuen nidaidën icquid onquiacmaidën chuibanac tantianuequidën tantienquio iquendac. Aden tantienquiocsho isun abi daëdi onquaid tantiaquin chuibanquid nibëdnuc nidaidën icquid onquiacmaidën chuibanenda caimbi.

⁶ Adembidi chuinu. Utsibon tantia. ¿Mibi yacno choash puduedshun nidaidën icquid onquiapadec onquenquiocquin ëmbi chuibanasho tantienquio yec, Bédambo iquebi, quecta mibi tabadpe? Padenquio. Nuquin Papan chiaid dada uamiampid min onqueten ëmbi chuibanasho mimbi tantiabampec. Min onqueten chuibanenquio yec ëbibi onquiacbimboecsho mimbi tantienquio ictsiandac.

⁷ Shoncatempi abibi shoncadtiapimbo iquec. Adembidi, aid shoncaisan shoncasho tantiatiapimbo utsin iquec. Adembidi aid cuëdëmesan tentencate cuëdëmesho tantiash, Adamboen cuëdëmenquio iccosh, quec.

⁸ Adembidi, utsibo yacno ma cuesnanu qeshun chomenuequin sondadon tantiabocpadpenquiocnoc shoncac choenquio iquec.

⁹ Adecbidi, utsi onquiacmaidën onquequin chuisho ¿mitsipaden tantiapatsiash? Utsibon tantienquio iquec. Aden chuibanec nibëdacno onquiacbimboec onquepec.

¹⁰ Onquete utsi-utsiec dadpen iquec. Aton onqueten onquequin chuibanasho matsesën tantiec.

¹¹ Utsin onqueten chiac tantiatiapimbo yec, Onquequin chuibanquid con matsespenquio nec, quequin tantiec.

¹² Ad icnuc, Nuquin Papan Mayanën ëbi tantiamepic, qeshun, Esuquidistu tantiaquido ma tantiabenquido yampanu qeshun mimbi chiaid chuibanquidquio ëbi icme, Papa, quequin Nuquin Papa chuaita.

¹³ Nidaidën icquid onquiacmaidën onquequid nebi, quequin tantiec. Adecc onquequin chuibanquin iccuededquidon onquetenquio ëmbi chuiboed chuioaquid icme, Papa, ma tantiapanu, quequin Nuquin Papa chuaita.

¹⁴ Nuquin Papa chiecc ëbi onquiacmaidën onquesho utsibon tantienquio iquendac.

¹⁵ Aden abi onquiacmaidën onquequin utsibon tantienquio icsho ¿mitsipadentsimbi tantiamepe? Naden naimbi. Iccuededquido onquiacmaidën onquequin Nuquin

Papa chuishumbic tantiamenun iccuededquidon onqueten onquequin chuibanuanuna. Adecbidi, iccuededquid onquiacmaidën Nuquin Papan naid chiec cuëdënashic tantiamenuc iccuededquidon onqueten cuëdënoanuna. Adembidi abi onquiacmaidën onquequin chuibanshun iccuededquidon onqueten chuibanooatiapimbo icquin abi onquiacmaidën onquequin chuibanenquo iquemi. Adecbidi abi onquiacmaidën cuëdënenquo iquebi.

¹⁶ Iccuededquido onquiacmaidën onquequin Nuquin Papa chuibanuc ζmitsipadec, Ai, abimbo iquec, quepec aido? Aton onqueten onquequin Nuquin Papa chuibansho tantias, Mibi bëdambo iquec, Papa, quequin chiendac.

¹⁷ Abi onquiacmaidën onquequin Nuquin Papan naboed chuibanac Esuquidistu tantiadonequidquo mibëd iccuededquido yantiapimbo iquec.

¹⁸ Èbibi utsin-utsinquec onqueten onquequidquo icnubi mibitedi adesa nec. Padnueni adec onquec bëdambo iquec, Papa, quequin chuided-chuidedemi.

¹⁹ Padnuen chuinec Esuquidistu tantiaquido iccuededacno puduedash ma tantianu quiash aton onquete daëdpactsëc tantias anquiadquid icquin aيتدtedictësequi chiendambi aido onquiacmaidën onquenquiocquimbi.

²⁰ Adembidi chuinu. Utsibon tantia. Bacuëbo tantiabenshishicquid yacpadquec icsaid tantia icta. Ènden caniaidën tantiabenshun ismiacpaden bëdamboec tabadquin ismeta.

²¹ Nuquin Papan chiampid nad iqueque. Tanta: “Èmbi chuiban cac aton matsesën chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidën onquequin chiac tantiesa icquin ëmbi chiacpadomben nate bunenquo icoaposh,” quequin Nuquin Papan dada uamiampid nec.

²² Adoaidi Nuquin Papan Mayanën tantiamiac abi onquiacmaidën onquequin chuibanquin Nuquin Papan chiaid tantiabenshishicquid Esuquidistu tantiaquid icmetiapimbo iquec. Padnuen adec onquequin chuibansho tantias, Nuquin Papan naid nec, quequin Esuquidistu tantiesa icboedi abi tantiaquid yantsias.

²³ Padnuen Esuquidistu tantiaquido iccuededacno Esuquidistu tantiesa puduedshun abi onquiacmaidën abitedi onquecuedesho tantias, Aidon tantiate icsabudpash, quepec.

²⁴ Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsëcshun-abentsëcshunquien Nuquin Papan chiaid chuibansho tantias, Icsaobi.

²⁵ Nëbi ëbi bëdambo icmequid Esuquidistu tantiate bunebi, qeshun abi icsaid ambi chienquicoaed Nuquin Papa chiasic, Nëmbo iccuededquidobëd mibi iquec, Papa, quequin chuibanpec Esuquidistu tantiaquid yanshun.

Abentsëcshun-abentsëcshunquien chuiban, quequin chiaid

²⁶ Adembidi chuinu. Ademi tantia. Esuquidistu tantiaquid iccuededec cuëdënu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidënquo onquequin chuinu, utsi quenubien; mibi onquiacmaidën chuisho tantiombique. Min onqueten chuinu, utsi quetsias.

²⁷ Aited, Chuinu, qesho ζmitsicquid chuita nuqui cape? qeshun naden chiac bëdambo ictsiash. Chuinu. Tanta. Mibi onquiacmaidën onquequin chuinuequid daëd icnuc bëdambo ictsiash. Abentsëc chotsëcnuc adembidi bëdambo ictsiash. Aited icquin abentsëcshun-abentsëcshunquien onquequin chuiban, cata. Aden abentsëcshun onquequin chuisho abi onquiaid tantiaquidën iccuededquidon onqueten chuibanta, cata.

²⁸ Padnuen abi onquiaid tantiaquin chuibanuequid nibëdnuc, Tsadquin Nuquin Papan otaquocquin chuita, cata.

²⁹ Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daëd icnuc bëdambo ictsiash. Abentsëc chotsëcnuc adembidi bëdambo ictsiash. Aited icquin abentsëcshun chuibanubi, ζNuquin Papan Mayanën tantiamiacpadomboenda chuibanec? Isnu, quequin chuibanuequid utsibon Nuquin Papan chiaid isban. Adembidi, utsin chuibanubi adomboembidi isbanoaic utsibon.

³⁰ Abentsëcshun chuibanubi Nuquin Papan Mayanën tantiamiac utsi: Èmbitsen chuibanu, qesho tantiasun ma aidën chuibanu quiash amba chuibanquid ënëd.

³¹ Adquidën iccuededquidtedi tantiamenuc abentsëcshun-abentsëcshunquien chuibanta. Aden chuibansho tantias ma chieshenquo yec bëdambo icpanu.

³² Nuquin Papan Mayanën tantiamiac utsibëd bëdamboec tabadquid nec.

³³ Nuquin Papan tantiamiacpadequi utsi onquenubi onquenquo utsibo tabadec. Onquenu, utsi quenuc, Ai, onqueta, qeshun onquenquocquin cainec tabadec chuibanuequid utsibo. Esuquidistu tantiec iccuededquido utsi-utsiec yacnocquido adembidi tabadquido nec.

³⁴ Esuquidistu tantiaquido iccuededacno otacquo tabadquid chido. Chuibanacnoësh onquenu, quenda chido. Nuquin Papan chiapadec ëbi chuiquid dada nec, quec chido.

³⁵ Anoshon chiaid tantienquo yec tsadquin cainec shubuno nidash, Tantienquo iccombique. Nuqui tantiaboed ëbi chui, qesho tantiaashun chiec aton bënën. Tantienquiocquin cainenquo iquec chido icsambo iquec.

³⁶ ¿Mimbia Nuquin Papan chiaid chuibanquidoda ne? Padenquo. ¿Chuibanac Esuquidistu tantiaquido mibitedictsëquida yanondac? Padenquo.

³⁷ Nuquin Papan chiaid chuibanquidquido nebi, mibi quenuc, Nuquin Papan tantiamiacpaden Pabado chuibanquin dada uaid nec, mibitedi quepec.

³⁸ Aden mimbi tantianubi, Pabado dada uaosh, quenquo utsibo icpec. Aido Nuquin Papan tantiamiacmaido iquec. Adquid icsho isun, Pabado dada uaid nec, quequin tantiamenu, quenda.

³⁹ Adembidi chuinu. Adembi tantiaata. Nuquin Papan chuipampid comapenen tantiaquin chuibante bunquiota. Aden chuibanquid mibi icnuc utsi onquiacmaidën onquequin chuinesho, Ai, cata.

⁴⁰ Adecbidi, Nuquin Papan Mayanën tantiamiac chuibanuequid dadpen icnuc utsibo bëdamboen tantiamenuquin abentsëcshun-abentsëcshunquien chuibanta.

15

Esuquidistu uincuenaid

¹ Adembidi chiembique. Tanta. Matses icsaquid icsho cuidnushe quiash abided cuidadec Esuquidistu unësaid ëmbi chuibanasho tantiaash, Ai, abimbo iquec. Aid tantiembi, mibi quiampondac. Aden tantiadonec chieshenquo yec mibitedi tabadec.

² Aden, Aid tantiabenu, qesho Nuquin Papan mibitedi bëdambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bëdambo icmebanacmaid nec. Adecbidi, ambi yuednu cacmaidquido adquid nec.

³ Utsin ëbi tantiamiacpaden mibi chuibanondambi. Adembidi chuinu. Tanta. Nuquin Papan chiapadomboen matses icsaquid icsho cuidnushe quiash abided cuidadec Esuquidistu unëspanëdash.

⁴ Unësascho shëcuë nacnenaidën nauedshun bëtashacsho daëdec ushtanquin ambi chiampicpaden Nuquin Papan uincuen uapanëdash.

⁵ Aden uincuemiac choquin, Uincuenobi, quequin Petedo Esuquidistun ismepanëdash. Adshumbic adembidi abëd 12ted icquido ismeoapanëdash.

⁶ Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanëdash. Aid uincuenacsho isquido dadpen abi tabadnubi utsi-utsiec padenquo iquec.

⁷ Aden aidtedi ismeshumbic aton utsi Santiacotsen Esuquidistun ismeoapanëdash. Adshumbic, ambi ëbi chuibeneta, caidtedi ismeoapanëdash.

⁸ Aden aido ismequin nainshun yuecshun ëbitsen ismeoapondashi. Icsactsëcquiocquin nec, quenquiocquin ismebenondashi tsyuecquo.

⁹ Abi tantiaquid mëyanquin cuesunemequidquido icboedi abi tantiaquid yanacsho Esuquidistun, ëbi chuibeneta, cainquioctiadquidëmbi adquid icca caid nebi.

¹⁰ Esuquidistu tantiaquid yansho isun ëbi chieshaid cuidenquo yac Nuquin Papa bunapadomboen Esuquidistu chuibenequid nebi. Adquid Nuquin Papan icmioshi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenquiocnobi. ¿Ëmbentsëquidambi chuibenedio? Aton Mayan Nuquin Papan meniac aidbëd icquin chuibeniombi.

¹¹ Adembidi, ëbi yacpadquidon Esuquidistu chuibanac utsitsen abi tantiaquido yampondash.

Matses unësash uincuenaid

¹² Adec Esuquidistu unësash uincuenondash, quequin chuinubi ¿mitsipaden tantiec uincuenta nibëdec quec utsi-utsiec onquepec?

¹³ Uincuenta nibëdnuc Esuquidistu uincuenenquo ictsempanëdash.

¹⁴ Esuquidistu uincuentequid icmiamboconoc abi chuibanquid muambo ictsiandac. Esuquidistu tantiaquid nebi, quiaidbidi muambo ictsiandac.

¹⁵ Nuquin Papan naid chuibanquidtedi muaquidquido icoatsiandac. Aden tantienquiocquin ëbi yacpadquidon chuibanendac. Unësash uincuentequid nibëdnuc ëbitedishun Nuquin Papan Esuquidistu uincuen uapanëdash quequin chiaid abipenquo ictsiandac. Unësash uincuenta nibëdnuc Nuquin Papan uincuemaiid nibëdtsiandac.

¹⁶ Unësash uincuenta nibëdnuc Esuquidistu uincuentiapimbo ictsempanëdash.

¹⁷ Aid uincuenambo icnuc matses icsaquid icsho cuidnushe quiash abided cuidadquid Esuquidistu nec, cainquo mimbi ictsiandac. Matses icsaquid icsho cuidnushe quiash cuidadquid nibëdtsiandac.

¹⁸ Aid uincuenambocnoc abia tantiaquido tsusedpabo Nuquin Papa yacno puuedtiapimbo ictsempañëdash.

¹⁹ Nidaidënuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquo ictsiandac.

²⁰ Ëmbi chuiboedtedi adtiapimbo iquec. Esuquidistu Nuquin Papan uincuen uapanëdash, quequin chiaid abimbo iquendac caimbi. Nuquin Papan ambi abia uincuemaiid abi yacno puuedmequin ambi uincuemetequid dadpen iquendac, quequin chiaid abimbo iquec.

²¹ Unëstequid bëyuc dada yanampicpadec matsestedi adecbidi iquec. Adecbidi, unësash uincuentequid Esuquidistu yanacpadec abi tantiaquidtedi adquiobidi iquendac.

²² Bëyuc dada Adan caidën tsyuecquidtedi adecbidi unëstequido nec. Esuquidistun bëdambo icmiaid uincuentequido neoaic.

²³ Esuquidistubimboecquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac.

²⁴ Aden bedoanquin abi tantiaquidtedi bëyucanec choquin Nuquin Papa Edoen caid ismequin, Nëidtedi min shubu abentsëquën tabadquido nec, quequin chiendac abi chieshënuquidtedi chën quetiapimboocnoc. Aido ambi nebudacimboecquido iquendac.

²⁵ Abi chieshënuquido utsitedibëd chuiquid icquin abi chieshëntiapimbocquid aido Esuquidistun icmëbanendac.

²⁶ Adoshombic ënquimbi unëstequid nibëdquidquo Esuquidistun icmeoaindac.

²⁷ Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquo aton Papa iquec.

²⁸ Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsëcquiobi nendac.

²⁹ Unësash uincuentequid nibëdnuc, çatotsieshun, Ënden unësaid uincuenendac, quequin tantiemi quequin utsibon acten ambibi mentomepec?

³⁰ Adecbidi unësash uincuentequid nibëdnuc ëbi unës uate utsibo comapenec buncuededsho isun çatotsieshun, Uincuentequid iquec, quequin ëbi yacpadquidon chuibampec?

³¹ Unësash uincuentequid iquec, quequin tantiemi. Aden tantiaquin Esuquidistu, Nuquin Icho, ëmbi chuibanac Esuquidistu tantiaquido mibitedi yampondac, quequin tantiemi. Aden tantiaquin unësmane quenquiocquin Esuquidistu unësash uincuentequid, quequin chuibenec nebi. Aden badiadquidën-badiadquidënquien chuibanubi ëbi unës uate utsibo bunec.

³² Uincuentequid nibëdnuc, çatotsi quenuequini Epeso yacnoshon, Uincuentequid iquec, quequin chuibansho mëyanaqui chieshenquo yec dayacquo tsadpe? quetsiabi. Adecbidi uincuentequid nibëdnuc: "Unësash nibëdquiec iquebi, quequin nua pesहन aquembi," quetsiabi.

³³ Aden tantienquo iquembi. Adembidi tantienda. "Uincuentequid nibëdec quequidbëd capuenda aidën tantiacpadec icmane quiash."

³⁴ Adquidpadquid icquin mimbi icsamboen tantiaid ënquin Nuquin Papan chiaidquo tantiata. Esuquidistu tantiec mibëd iccuededquid utsi-utsiec, Nuquin Papa nadatiambocquin uincuemianquidquo nec, quequin tantiesha nec. çAdquid mibëdi icnuc Nuquin Papan bëdambo icmiaido mibitedida icpe? Padenquo.

Uincuemequin dada chuca meniaid

³⁵ çMitsipadec unësaid uincuempec? utsi quepec. Adecbidi, çmitsipadquid uincuentequidën dada icpeç? utsi queoapeç.

³⁶ Adquidën icsamboen tantieque. Chuinu. Tanta. Mimbi tiedën chococaid tauibëd ëshë chococatequid napi dëyuctequidpadpenquo iquec.

³⁷ Mimbi tiedën chococaid utsi-utsiec iquec. Adecbidi mimbi tiedën siaid utsi-utsiec iquec. Mimbi chococaid mimbi siaidbidi dëyuctequid utsi-utsiec iquec.

³⁸ Nuquin Papan tantiampicpadec aton dada yanec.

³⁹ Abipadquidpenquo ambi uaidtedi iquec. Abipadquidquo matsestedi iquec. Abipadquidquo nidaidën capuquidtedi iquec. Abipadquidquo podochuquidtedi icoaic. Abipadquidquo acten icquidtedi icoaic.

⁴⁰ Abuc tabëcaid icnubi nidaidën icquid iquec. Abuc tabëcaid abipadquid chënquesho isec nidaidën icquid tabadec.

⁴¹ Badiadën ushë comapenquieç chënquenubi inchëshën ushë dauebudquido chënquieç. Aid daëdi nua isadnubi uispa pistëc isadoaic. Uispa utsi-utsiec iquec. Abi bedquieç chënquetequid utsi-utsiecbidi iquec.

⁴² Aidtedi ënëndendac. Adecbidi tishac matses unësacsho chococac nami chodquec. Adec nami chodquian Nuquin Papan tantiapadec uincuentequidën dada chuca chodquesa nendac.

⁴³ Tishac icsaquid matses iquec. Adsho uincuemequin ambi icsaisa icmiaid nendac. Nidaidënshun tishac chonoadec uimabudquid matses nec. Yuecash unësacsho uincuemiac uimabudenquiocquin nabanendac.

⁴⁴ Nidaidënshun tishac daicsambo yanash unësacsho uincuemequin dada chuca icmetequid nendac. Nidaidënshun tishac matsesën tantiapadquid icboedi Nuquin Papan uincuemiac aidën tantiapadquid iquendac.

Nidaidënshun tishac matsesën tantiapadquid icboedi abuc buanac anocquidën tantiapadquid iquendac.

⁴⁵ Adembidi Nuquin Papan chuiquin dada uamiampid nad iquec: “Bëyuc matses Adan caid nacneshun Nuquin Papan bushcac taëec tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec.

⁴⁶ Nuquin Papan matsesën tantiapadquidba icmiac Esuquidistu tantiaquid icsho isun abipadquid meniac icbon tantiapadquid yanec.

⁴⁷ Bëyuc matses uanu, qeshun nidaid putu bedshun nacnenaïd nepampic. Bëyuc matses Adan caidën tsyuecquid Nuquin Papan abi yacnoshon budmiaïd nepanëdash.

⁴⁸ Nidaid putu bedshun bëyuc matses nacneshun nidaidën tabadquid icmepampic. Adquiecbidi abipadquid matsestedï yanac. Nuquin Papan abi yacnoshon Chomiaïd tantiaquidtedï aton Mayan menec. Aden meniac abipadquid aïdo iquendac.

⁴⁹ Adecbidi bëyuc matses isadacimboecquid nidaidën tabadquidtedï nec. Nuquin Papan abucshun chomiaïd isadacimboecquid abëd icquido iquendac.

⁵⁰ Adembidi chuïnu. Tantiata. Matsesën dada nami intacchoquid chodquetequid icnuc Nuquin Papan shubu abentsëquën tabadtiapimbo adquid iquec. Chodquetequid chodquetemaid ictiapimbo iquec.

⁵¹ Nuquin Papan chienquiocpampid chuïnu. Tantiata. Abi tantiaquid unësabicquidbëdta ënden abi tantiaquid tsusedpabo dada chuca Nuquin Papan menendac.

⁵² Ambi namiaïdën abucshun shoncanubi ëshë badedquïo bëbedquiacimboecnuc badedquïo unësésambo Nuquin Papan abi tantiaquido icmendac.

⁵³ Chodquetequid icboedi chodquesa yanendac. Unëstequid icboedi unësésa yanendac.

⁵⁴ “Adquid icmiac unëstequid nibëdquïendac.

⁵⁵ Ad icnuc ¿mitsishunquïo unëstequid istuidpec? Adembidi, ¿mitsishunquïo unësmetequid istuidpec?”

⁵⁶ Icsaquid unëstequid nec. Nuquin Papan nadomboen nata quequin chiaïd niacquid icash unëstequid matses yanac.

⁵⁷ Adquid nuqui icsho isun Nuquin Papan Nuquin Icbo Esuquidistu chomeshun nuqui cuidenquiocquin aïdi icsaisa cuidquin nuqui bëdambo icmebanec. Adoac abi yacnoësh icsaisa unësésambo nuqui iquendac. Aden Nuquin Papan naindac, quequin, Bëdambocquid mibi nec, Papa, quequin nuqui chuided-chuidedendac.

⁵⁸ Adembidi chuïnu. Tantiata. Adenuïdi tantiaquin utsi uaqun utsin chuïsho tantienquïo yec tabad. Adec tabadquin Nuquin Papan chiacpadomboen naban Esuquidistu-padquid Nuquin Papan ëbi icmendac, quequin tantiaquin.

16

Utsibo menenun piucquid bedbanaïd

¹ Nuquin Papan bëdambo icmebanaid utsibo menenun mimbi piucquid bedbanaïd chuiquin dada uaimbique. Isec onquecuedeta. Nidaid Cadasia caïd yacnocquido Esuquidistu tantiaquido ëmbi chuïbanacpadomboen mimbitsen nabanta. Naden Cadasia yacnocquido chiombi.

² Abentsëcshun-abentsëcshunquïen mimbi bedaid musucbudcuenshun dominco ushën mimbi musucacted dayun uata. Aton na daëdpactsëc icquidën daëdpactsëc dayun uanubi mitsana dadpen icquidën dadpen dayun uata. Aden musucbudcuenshun mimbi dayun uaid icnuc ëbi choacsho isash, ¿Tedsimbi menepeba? quenquïo mibitedï iquendac.

³ Èbi choshombic utsibo bëdamboen tantiaquin piucquid dayun uaidtedï mimbi menenun buantan caïdo isun, Èmbi isaïdo neque. Yuedta, quequin dada uashun aïdo menembi ma buaneshun. Aden ëmbi meniac buanquin utsibo ismetuidpec.

⁴ Adecbidi ambo nidtiadquïo iquebi, ëbi quenuc mimbi menenun buantan caïdo ëbëdi nidendac.

Utsi-utsien chuïbanaïd

⁵ Nidaid Masedonia caid yacno Esuquidistu tantiec iccuededquid utsi-utsiec yacno isedbëquimbi mibi isbëtsenembi.

⁶ Aden isedbëequi mibi isedash tabadebi. Iquenoanquid chonobi mibëd tabadtsiabi. ¿Aid ënëdan nidnu, quesho, adabi utsi yacno mimbi nidmepatsia?

⁷ Nëbi mibëdi yuec tabadtiapimbo iquebi, quiash mibi yacno nidenquo iquebi. Yuecash mibëdi yuec tabadnec mibi yacno nidebi. Nuquin Papa bunuc adendabi.

⁸ Nëbi padenquo iquebi. Epeso yacnocquidobëd iquebi. Nuquin Papan abipadquid aton Mayan matses meniaid ushë tantiate choan nëuëshquo nidebi.

⁹ Nëmbo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantiapanueshun. Aden chuibanesho tantiauidash utsibo ëbi chieshënnquido nëmbo iquec.

¹⁰ Mibi yacno ëbi nidenquo icnubi Timoteyo mibi yacno nideque. Aid bëdamboen ista. Pabado yacpadquiocquid Nuquin Papan namiaidquiobidi Timoteyo nec, quec chieshesa icta.

¹¹ Nuquin Papan namiaidquiobidi Timoteyo icsho, Èbëd icquidta nec, quenquiocquin yuedta. Yuedac tabadash, Nidnu, quesho, Ai, nidec nid. Mibi nidsho isash unëshquo iquebi, quequin nidme ma ëbi yacno choanu. Utsibobëd Timoteyo choaic quequin cainec tsadebi.

¹² Nëbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobëd tan istanta, quequin Apodos comapenen chiombi. Adoac, Nëbi Codinto yacno nidte bunenquo iquebi, quiosh aid. Yuecash Codinto yacno nidec bëdambo ictsiash, quiash yuecash aidi mibi yacno nidendac.

¹³ Icsamane quequin chieshenquocquin Nuquin Papan chiaid tantiadoneta. Esuquidistu tantiabenquido yanta. Adecbidi, natiatequid icnuc chieshtoenquo yec dayacquo yec tabadteneta.

¹⁴ Adec tabadquin utsi bëdamboen tantiaquin nabanta.

¹⁵ Adembidi chuinu. Tantia. Nidaid Acaya caid yacno Estepanasën shubun icquido abia Esuquidistu tantiaquido icpondash. Adquid yanshun, Esuquidistu tantiaquid utsibo nashumbanquido nuquibi iquendac, qeshun adobanec.

¹⁶ Aidon namiaido icta. Adembidi, comapenen nashumbanquidtedishun namiaido icta.

¹⁷ Codinto yacno Esuquidistu tantiec iccuededquidtedi ëbëdi ictiapimbo cnobi mibi yacnoësh nëidtedi chosh. Estepanas yec Podtunato yec Acaico yec quec choash puduedsho isash bëdambo iquebi.

¹⁸ Mibitedi chuibanquin aidon unëshquocquidi bëdambo icmioshi. Mibi yacno padpidec nidash puduedshun chuibanquin adembidi mibitedi bëdambo icmendac aidon. Aido mibi yacno choacsho isun, Pabado chuibanquin mimbi bëdambo icmiacpaden nabanec tabadta, quequin chuiban.

Esuquidistu tantiaquidon mibitedi tantiaquin chuibanaid

¹⁹ Codinto yacnocquid mibitedi tantiec tabadebi, quequin dada uaquin chuita, nidaid Asia caid yacno Esuquidistu tantiec iccuededquidon cac chiembi. Adembidi, Aquidan aton chido Pidisdabëd tan chui cac chuioaimbi. Adembidi, aidon shubun Esuquidistu tantiec iccuededquidotedishun chui cac adembidi chuioaimbi.

²⁰ Aden utsibon chiaid chuishumbic, Esuquidistu tantiaquid utsibotedibëd bëdamboec tabadta, caimbi.

²¹ Èmbi chuibanac ëmbi chiaid utsin dada uashumboed nec. Nëshun bedanquin dënainquin dada uaimbique. Tantia.

²² Nuquin Icho tantiesa nëbimbobi ma Nuquin Papan comapenen cuidquin ma nësiatequid icpanuna. Adecbidi abi tantiaquido bednec badedquio Esuquidistu chopashun, quec tsadebi.

²³ Èbi icsaquid icsho cuidenquocquin Nuquin Icho Esuquidistuded Nuquin Papan cuidpanëdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

²⁴ Esuquidistun shubun icquido nuquibi icsho ëmbi bëdamboen isaido mibitedi nec.

Padi aitedtada dada uoaimbique. Isec onquecuededta.

CODINTO YACNOCQUIDON ISTE 2

¹ Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ĕmbi dada uaid mibitedishun isbanshun utsibo meneta ma isnueshun.

² Matses icsaquid icsho cuidnushe quiash abided cuidadec Esuquidistu uněspanědash, quequin tantiaquiosho isun Nuquin Papan bědamboen isaidquio nuqui nec. Adquido yec utsiboběd ma bědamboec tabadpanuna.

Bědambo icmianquidquio Nuquin Papa

³ Nuquin Papa nad iqueque. Tantia. Chuinu. Ĕbi uněsquo icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna.

⁴ Natiamiaid icsho tantiaquin chieshtomenquiocquin aiděmbi nuqui dayacquio icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui.

⁵ Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquio icmiacpadomboen Esuquidistu tantiaquid utsi tantiaquin chieshtomenquiocquin dayacquio nuqui icmendac.

⁶ Adembidi ěbipadquidobědtan Esuquidistu chuibansho utsibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyansho isun adomboembidi chieshtomenquiocquin Nuquin Papan ěbi dayacquio icmec, quec tabadta.

⁷ Utsin měyanaid icquimbi Esuquidistu tantesa uainquio iquec, quequin mibi tantiec tsadebi. Ĕbi měyanacpaden mibi měnyansho isun Nuquin Papan bědambo icmiaid mibi iquendac.

⁸ Nidaid Asia caid yacnoshon ěbi natiambeoed mimbi tantiamboen icchitec, quequin ěbi adoboed mibi chuibanu. Tantia. Dayactiapimbocnoc natiamioshi. Adoac, Uněsebi, quiobi.

⁹ Uněs uatiad, utsibo qesho tantias, Ĕbibi měnchiquidtiapimbocquimbi matses uněsacsho uincuemeguiděn ěbi měnchictsiash, quequin tantiec tsadobi.

¹⁰ Ai, uněs uanu, cac natiapobi. Adsho Nuquin Papan měnchicaid nebi. Adembidi aiděmbi ěbi měnchictene. Uněs uatsensho isun ěbi měnchicacpaden ěnenquiocquin napashun, quequin tantiec tsadebi.

¹¹ Ĕbi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, qesho tantiasun mimbi Pabado měnchicoc. Mibi bědamboquid nec, Papa, quequin ma dadpenshun ambi naid chuipanuna.

Něbi mibi yacno nidenquio iquebi, quiaid

¹² Bědamboec tabadquin ismequid nebi, quequin tantiec bědambo iquebi. Adaid chuinu. Tantia. Nuquin Papan ěbi tantiamiacpaden ismec utsiboběd bědamboec tabadobi. Adquiecbidi mibědi tabadobi. Matsesěn tantiamiacpadpenquio yec tabadobi.

¹³ Ma tantiamenushun abimbo chuiquin mibi dada uashunec nebi. Ĕmbi dada uaid bedshun isec, Pabado bědamboec tabadec, quequin ěnenquiocquin tantiapashun mibitedishun.

¹⁴ Ĕběd Pabado bědamboec tabadosh, quequin tantiec bědambo iquebi, quec utsi-utsiec. Adecbidi, Codinto yacnocquido utsi-utsiec bědamboec tabadosh, quequin utsibon chuisho tantias bědambo iquebi. Esuquidistu choanuc adquiequi Codinto yacnocquido tabadpashun, quec tsadebi.

¹⁵ Aden ěbi bědamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bědambo iquebi, quepashun, caimbi mibi.

¹⁶ Mibi isbidanec nidaid Masedonia caid yacno nidashic padpiden mibi isbětsenec choabi. Aden isbětsenembi, qesho tantiasun nidaid Udeya caid yacno mimbi ěbi nidmetsiac, quequin mibi chiombi.

¹⁷ ĔUquěducshun, Nidenquio iquebi, quequin muaquindambi chuidio? Adenquiocquin chiombi.

¹⁸ Ambi chiacpadomboen nabanquidquio Nuquin Papa nec. Aid chuinu. Tantia. Abimbo chuiquidquio yec utsi yantiapimbo iquec. Adquidquio icquin ambi, Esuquidistu chuibeneta, caidquio yec adomboen chuiquid nebi. Utsi uain chuinu, quesa nebi.

¹⁹ Ambi chiacpadomboen nabanquidquio Nuquin Papan Madombo, ěmbi chuibeniaid, Esuquidistu nec. Aidi Sidasěn chuibeniaidbidi nec. Aidi Timoteyon chuibeniaidbidi nec.

Esuquidistu abimbo chuiquidquio yec utsi yantiapimbo iquec. Abi chuibenequidquio adquidbidi nec.

²⁰ Con Madon naden naindac, quequin Nuquin Papan chiacpadomboen Esuquidistun ënden nabanac. Aden abi nabanec. Ambi chiacpadomboen naquidquio Esuquidistu nec, quequin tantiaquin ambi naid ëbipadquidon chuibanec. Aden chuibanac abi tantiaquidquio yanash, Abimbo iquec. Esuquidistun ambi chiacpadomboen naindac, quec tantiec nuqui tabadec.

²¹ Nuquin Papan tantiamiac: Esuquidistu tantiaquid nebi, quiash, Tantiesa nebi, queti-apimbo nuqui iquec. Adquid icmiac aton Madombo chuibanquid nuqui nendac.

²² Adembidi aton bacuë icmiaid nuqui nec. Adembidi aton Mayan Nuquin Papan meniaid nuqui nec. Ëbëd tabadquid aido nendac, quequin tantiamenuen Nuquin Papan aton Mayan meniac ma aidëmbi nuqui bëdambo icmepanushun.

²³ Nuquin Papan tantianubi mibi yacno nidnu quiobi. Adashic, chushcachitomane quiash mibi yacno nidenquio iccobi.

²⁴ Ëmbi Esuquidistu chuibanac abi tantiaquid dadpen iquec. Aidon icbopenquio nebi. Aidon icbopenquiobidi Esuquidistu chuibanquid utsibo nec. Esuquidistu tantiec bëdambo iquebi ma quenu, quequin chuibenequidquio nebi. Esuquidistu tantiaquid nebi, abimbo quequin aid tantesa uainquio mimbi iquendac.

2

¹ Aden tantiaquin comapenen chuiquin unësquio icmenushe quec mibi yacno nidenquio iquebi caombi.

² Mibi unësquio ëmbi icmiac çtsuntsin ëbi bëdambo icmepatsiash? ¿Ëmbi icsambo icmeboedënda ëbi bëdambo icmepadic? Padenquio.

³ Aden tantiaquin mimbi iste dada uaombi ma ëbi bëdambo icmequid unësquio icmeti-apimbo iquebi, qeshun. Bëdambo iquebi, quequin ëbi tantiec adquiobidi mibi icoatsiac, quequin tantiombi.

⁴ Unësquio yec shubiquimbi mibi dada uashun, Meneta, caondambi. Unësquio icmenu, quenquiocquid mibi comapenen tantiaquin dada uaondambi.

Abi icsaboed bëpiscudnueshun yued quiaid

⁵ Anocquidën ëbi unësquio icmedenequimbi adembidi comapenquiec unësquio mibi icmeoaosh. Aidi mibi chiondambi.

⁶ Aidi mibi dadpenshun cacumiac abi icsaid ënosh quec.

⁷ Adoacsho abi icsaid bëpiscudshun aidi yuedoquin bëdambo icme. Yuedenquio yac natiamianquiec unëstiadquio yantsiash.

⁸ Nuquibi iccuedednuna, quequin aid tantiaquin yued caimbi.

⁹ ¿Ëmbi chiacpadomboen nabanquidquioda neque? Isnu, quequin icsaquid cacumeta, quequin dada uaondambi.

¹⁰ Aden ëmbi dada uacpaden mimbi cacumiac abi icsaid ënsho isun abi icsaid nibëdacbimboec bëpiscudshun yued. Adsho tantiashun adomboembidi naimbi. Aidbëdi abentsëc yacimbocquido yanosh, qesho tantiash abi icsaid bëpiscudebi Esuquidistun tantianubi.

¹¹ Nuqui chieshëngquidën Satanasën aidi icsamenushe qeshun abi icsaid ëmboed yuedta. Yuedenda, Satanasën quequin tantiamiac onquesho tantienda.

Nuquin Papan con Mayan meniaid adquid ëbëdi tabadtequid nec, quiaid

¹² Esuquidistu chuibanec shubu dadpen icquid Todoas caid yacno ëbi chonoc, Tantianu, quec cho-choquid dadpen icpondash.

¹³ Adquid dadpen icnubi ëmbi con utsi caid, Tito, mibi yacnoësh choabi icnuc ambo yuec tabadiapimbo iccobi. Adash, Bëquednu, quianec nidaid Masedonia caid yacno nidoapobi.

¹⁴ Bëdamboquid mibi nec, Papa. Mimbi Esuquidistu tantiaquid ëbi yacpadquido icmeshun mimbi, Esuquidistu chuibeneta, caid ëbitedi nec. Ëmbi chuibanaid noadte bëdabimboecquid nec. Noadte bëda pushudec noadsho uano-uanoc tabadquidon shëdec. Adembidi, Esuquidistu ëbi yacpadquidon chuibenesho uano-uanoc tabadquidon tantiec.

¹⁵⁻¹⁶ Esuquidistu chuibanac noadte bëdan danoshquiaid shëdacbimboen utsibon tantiec. Adembidi, Esuquidistun ëbi chuibeneta caido Icho isacimboben Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ënëdenquio yec abëd icquido aidtedi iquendac. Aden nuqui isquin Esuquidistu tantiesa icsho Nuquin Papan nësiatequid iquendac. ¿Tsutsi Esuquidistupadquidquio icpec? Adquid nibëdec. Adesa icsho ambi, Ëbi chuibeneta, caidquio nebi. Adquid icquin chuibenenubi

¹⁷ piucquid bedte bunquin utsin-utsinquier Esuquidistu chuibanec. Adesa ëbipadquido iquec. Piucquid bednuequin ëbi yacpadquidon Esuquidistu chuibanenquo iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

3

¹ ¿Pabado bëdamboec tabadquin Esuquidistu chuibenequid nec, mibi camenuendambi aden mibi chuibandio? Padenquio. Adembidi, ¿Utsi yacno nidnun bëdamboec tabadquin Esuquidistu Pabado chuibanosh, quequin dada uata, ëmbi cac mimbi dada uaidtambi buampe? Padenquio.

² Mibëdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chëshëten pinchuquën tansiabimboecnuc paucudti-apimboecnoc Nuquin Icbon tantiamioshi. Adembidi icsamboec tabadboedi nëbi bëdamboec tabadsho isun Pabado Esuquidistu chuibanaido Codinto yacnocquido nec, quequin adomboembidi tantiahedec utsibon.

³ ¿Abi tantiaquid icsho isun bëdamboec tabadmenuequin ambi cuënote bedshun dada uampicpadquidta mibi meniondash? Padenquio. Esuquidistu tantiasho isun unëstiapimbocquid aton Mayan abipadquidquio mibitedi meniondash.

⁴ Nuquin Papan tantiacpadomben Esuquidistun, Èbi chuibeneta, cac chuibanac Esuquidistu tantiaquid mibitedi yanacsho tantiec ëmbi chuibanaido aitedi nec, quequin tantiembi.

⁵ Èmbibi tantiacpaden chuibanesa nebi. Nuquin Papan tantiamiacpaden chuibanquid nebi, quequin tantiembi.

⁶ Èmbibi Esuquidistu chuitiapimbo icsho Nuquin Papan Mayanën tantiamiac Esuquidistu chuibenequidquio nebi. Ambi, Nadomboen nata, quequin dada uamiampicpadomben chuibanta caidpenquio nebi. Ambi nadomboen nata, quequin dada uamiampidtedi natiapimbo yec aibdëdi matses tabadtiaimbo iquec. Aton Mayan meniaidbëd tabadtequid nec.

Abi tantiaquido bëdambo icmetequid aton Mayan

⁷ Nuquin Papan nadomboen nata quequin chiaid cuënoten dada uacpaden nainquio yec matses abi yacno tabadtiaimbo iquec, quequin dada uampid meniac abi chënquiacpadec Moisesën bëtantiate comapenec bëchomauanquiech chënqueboedi macuësh budec bëdiambo chënquesho isadaidbon bëstiapimbo icpampic.

⁸ Nëbi Esuquidistu tantiaquid bëdambo icmetequid aton Mayan abipadquid meniaid ënëdenquiocquidquio nec.

⁹ Èmbi nadomboen nata quequin chiaid niacquid ëbëdi tabadtiaimbo iquec, quequin dada uaid Nuquin Papan meniac buanshun Moisesën aton matses ënëdenquiocnoc tabadmetiapimbo icambien matses icsaid bedshunash icsaisa abided cuidadec unëshash uincuenquidën abi tantiaquido ënëdtiapimbocnoc tabadmendac.

¹⁰ Nëbi Esuquidistu unësaid tantiaquid ënëdtiapimbocquid nec, quequin chiac ambi dada uaid meniampid ënëdacbimboecquid nendac.

¹¹ Ai, nadomboen nata quequin chiaid Moisesën bedshun meniaid ënëdtequid icnubi bëdambo icmiantequid Nuquin Papan chomiaid icsaisa ënëdtiapimbo iquec.

¹² Aden tantiaquin, Esuquidistu nuqui tantiaid icsaisa yec ënëdtiapimbocquid nec, quequin chuibenequid nebi.

¹³ Moises Nuquin Papabëd onquec bëchomauanquiechoedi auëshquio nidec ushmashtacsëcquio yanash matses ismenquiocnuec bëpucudpampic. Adesa icquin ompoenquiocquin utsibon ma tantianu, quequin Esuquidistu chuibenequido nuqui nec.

¹⁴ Nuquin Papan dada uaid Moisesën bëaid tantiate bunesa abëd icquido icpampic. Adquibidi pamumëdacbimboec isadaidbo abi tabadec. Nuquin Papan cuënoten dada uacpadquid isec onquec nëbi adquibidi utsi-utsiec tabadec. Esuquidistu tantiesha yec adequid tabadec. Abi tantiaquid ambi paucshun tantiamiaido nendac.

¹⁵ Nadomboen nata quequin dada uaid Moises menepampid isec onquec pamumëdacbimboecquid isadaidbo utsi-utsiec iquec.

¹⁶ Esuquidistu tantiaquid icsho Nuquin Papan Mayanën paucquin tantiamiaid nendac.

¹⁷ Nuquin Icho icsaisa icquin ënden nadomboen nata quequin dada uapampicpaden naquidquio nec. Adquid Esuquidistu nec, quequin tantiaquin chuibenec nebi.

¹⁸ Paucac, Èbi icsaid bedshunash Esuquidistuded cuidadpanëdash, quequin nuqui tantiec. Aidënquio icsaisa icquin abipadquid nuqui meniac aton Mayanën adquid nuqui icmebanec.

4

Nuquin Papan nadatiambocquin nadenequin Esuquidistu chuibenemiaid

¹ Aden Nuquin Papan nuqui tantiaquin, Esuquidistu chuibanta, caidquo icquin chiesh-
enquiocquin aidi chuibanec nuqui nec.

² Icsash ompodquid icboedi nëbi muesa icquin Nuquin Papan chiaid utsi uainquo yec
nuqui bēdamboec tabadec. Nuquin Papan isec, quec adequi nuqui tabadec. Adec tabadec
ēbipadquid utsi yansho isash Nuquin Papan chiaid tantiate utsibo bunquiopec.

³ Esuquidistu chuibansho utsin-utsinquien bēdamboen tantiatipimbo iquec. Adquid
Nuquin Papabēd tabadtiapimboquid nec.

⁴ Nuquin Papapadquid Esuquidistu tantiaquid icnushe qeshun icsamianuequidēn
Satanasēn pamunacimboen utsi-utsien tantiamenquo iquec.

⁵ Ēmbibi naid chiesa nebi. Matsesēn Icho Esuquidistu nec, quequin chuiquid nebi. Aid
mibi tantiamenuen chuiquin mibi nashunquid nebi.

⁶ Abitedi uanuna, qeshun, "Inchēshquo icboedi uēshēmo yanquiota," capampic
Nuquin Papan. Adomboembidi Nuquin Papan chiaid pamumēdabimboen tantien-
quiochoedi Nuquin Papan paucquin tantiamiac Esuquidistu Nuquin Papapadquid nec,
quequin nuqui tantiec.

⁷ Aden tantiec abipadquid yanabicshobi Nuquin Papan nadatiambocquin nabanquin
Esuquidistu chuibenecquid icmiondashi.

⁸ Aden chuibansho mēyanaqui abi chuibenec nebi. Padpiden-padpidemboen natiami-
aqui, ¿Atotsimbi napeba? qesho Nuquin Papan dayacquio icmedenebi.

⁹ Ēbi chieshēnquid dadpen icnubi ēbi bēdambo icmequid aidi iquec. Comapenen cues-
tanec, Unēsēc, qeshun nianaqui abi Esuquidistu chuibenembi.

¹⁰ Esuquidistu mēyanquin unēs uacpaden mēyanquin unēs uatsen-unēs uatsenshobi day-
acquio icmedenioshi. Adoacsho uincuenaidēn dayacquio icmedeniaid nec, quequin
utsibon isbededebi.

¹¹ Adembi Esuquidistu chuibansho unēs uatsiashi, quequin chuibenec nebi. Aid
chuibansho unēs uatsenaqui abipadquid unēsesa yanebi, quec bēdamboec tabadebi.

¹² Aden tantiaquin aid chuibanac abi tantiaquid yanash aidbēdi tabadec unēsesa mibitedi
yanendac.

¹³ Ambi chiacpadomboen Nuquin Papan naindac, quequin tantiaquin chiombi, quequin
Nuquin Papan dada uamiampicpaden tantiaquin Esuquidistu chuibanec nebi.

¹⁴ Aden tantiaquin Nuquin Papan Esuquidistu uincuemiacpaden aidbēdi tabadmenuen
mibitedihēdtabi ēbēd icquidtedi uincuemendac, quequin chiembi.

¹⁵ Aid tantiaquid ma mibi icpanueshun chuibansho mēyanaid nebi. Mēyanaqui utsi
dadpen Esuquidistu tantiaquido ma yanu qeshun chuibenec nebi. Aden chiac abi
tantiaquid icsho isun, Mimbi naidtedi bēdambo iquec, Papa, quequin ma Nuquin Papa
utsibon chuipanuna.

¹⁶ Aden tantiec dayactiapibi quenquo iquebi. Tsusio budquimbi badiadquidēn-
badiadquidēnquien Esuquidistu tantiadonequidquo yanebi.

¹⁷ Natiamiantequid ēnēdendac. Natiamiaid yashic Nuquin Papa yacno tabadec
bēdamboshē iquendabi. Esuquidistupadquid icsaisa yec unēsesa yanash ēnēdtiapimbo
iquendabi.

¹⁸ Aden tantiec, Ēbi natiamiaid iquec, quiashic, Nuquin Papabēd tabadendabi, quequin
comapenen tantiec tsadebi. Ēmbi isaidtedi ēnēdendac. Nuquin Papa yacnocquid ēmbi
isacmaidtedibēd ēnēdtemaid iquendabi.

5

Nuquin Papabēd tabadte iquendac quiaid

¹ Con nami shēnibudash unēsash nibēdnuc Nuquin Papabēd tabadec nami chuca uaid
iquendabi. Nami chuca uaid ēnēdtemaid matsesēn nacnenacmaid nec, quequin tantiembi.

² U abucquo nidabi yec uēshquequid nebi. Adquiocsho nami chuca uaid ēnden menion-
dac, Cuishon, quetsiabī.

³ Aden meniac ēbibimboec isadsho isendac, quec tsadebi.

⁴ Nami chodquequid icnuc uēshquec nuqui tabadec. Nami chuca uaid chodquesa
menepashuni mabi unēsesa icpanu quec nuqui tabadec.

⁵ Con Mado Esuquidistu tantiaquid ēbēd abuc tabadmenuen ēbipadquid unēsesa icmenu,
quequin Nuquin Papan aton Mayan menetequid nuqui nec.

⁶ Aton Mayan meniaid iquec nami chodquetequid abi iquequi chieshenquoio yec dayacquio yec nuqui tabadec. Adec tabadash abuc Nuquin Icbobëd tabadendabi, quequin nuqui tantiec.

⁷ Aton Mayan meniac nuqui isacmaid Esuquidistu cainec nuqui tabadec. Ëmbi isaid Ëmbi caintemaid nec.

⁸ Aden aid cainsho nami chodquesa badedquoio menepashuni. Aden meniac Nuquin Icbobëd iquendabi, quequin nuqui tantiec.

⁹ Aden tantiec nidaidën tabadequi Nuquin Papa bunacpadquiec tabadnuna. Abuc nidash tabadec abi bunacpadquiec tabadoaindabi, quequin tantiembi.

¹⁰ Adembidi abi tantiaquidtedishun naid ambi chuibante ushë chonoc Nuquin Icbon chuibanendac, quequin tantiembi. Utsi-utsien, Mimbi bëdamboen nabanoc, quequin chuibanendac abitedishun naid cuidquin.

Ma utsibotsen abi tantiaquid icpanu quequin chuibanaid

¹¹ Aden ambi tantiacpaden nabansho, Bëdamboen mimbi nabanoc, Nuquin Icbon ëbi caindac, quequin tantiaquin ma utsibotsen Esuquidistu tantiapanueshun mibi chuibenec nebi. Aid tantiaquin nabanec bëdamboec tabadsho Nuquin Papan tantiec. Ai, adec Pabado tabadsho ispombi, quequin adembidi mimbi chuipashun, quec tsadebi.

¹² Aden tantiaquin, Mibi bëdambo iquec, ëbi camenuen mibi dada uashunenquoio iquembi. Ëbi chienquiocquin, Bëdamboec tabadquin ismiacimboecquidën ëbi icsamboen chuisho aido chuita, quequin mibi dada uashunembi.

¹³ Aido, Pabado tantiate icsabudosh quec. Adembidi, Nuquin Papan chiacpadomboen ëmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu qeshun aid chuibenec nebi utsibon chuibenenquiocnobi.

¹⁴ Chian anëdënquequid icsambocquid nësianushe quiash matses icsaid bedshunash abided cuidadec icsaisa Esuquidistu unëspanëdash, quequin ma utsibon tantiapanueshun chuibenec nebi.

¹⁵ Ma ëmbi naid chiac ëbi tantiaquido ma ëbëdi icpanu, quiaash unësash uincuempanëdash Esuquidistu.

¹⁶ Adec unësash Esuquidistu uincuempanëdash, quequin matses unësash uincuenta iquec, quequin abi tantiaquidon tantiec. Ënden, matsesquio Esus nec, quiondaidi nëbi, Nuquin Papan Chomiaid yec matses tantiec unësash uincuempanëdash, quequin tantiembi.

¹⁷ Abi tantiaquid ambi tantiamiaid nec. Ënden matsesën tantiacpadquiec icboedi Esuquidistun tantiacpadquiec bëdamboec tabadec abi tantiaquidquoio.

¹⁸⁻¹⁹ Nuquin Papan ëndenquimboshë tantiampicpaden Esuquidistun naid nec. Nuquin Papan chiaid niacquid nuqui icboedëmbi matses icsaid bedshunash abided cuidadec Esuquidistu unëspanëdash, quequin tantiaquin ma aidquoio utsibon tantiapanu qeshun ambi naid nuqui chuibenec.

²⁰ Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Ëbi icsaid bedshunash Esuquidistuded cuidadpanëdash, quequin abëd icnuequin aid tantiaquiota.

²¹ Ambi cuidtiadquid nuqui icnubi Esuquidistu icsaisaded Nuquin Papan cuidpanëdash ma Esuquidistu ambi cuidaidpadquid tantiaquidtedi icsaisa yampanueshun.

6

¹ Matses bëdambo icmenu, quequin Nuquin Papan chiaid bëpiscudmane qeshun ambi tantiamiacpaden nabanec tabadta.

² Nuquin Papan chiampid chuinu. Tantia.

“Mibi bëdambo icmete ushë chonoc cuënsho tantiombi.

Tantiesa icboedi nëid ushënquoio mibi tantiamiombi.”

Aden Nuquin Papan chiampicpadomboen bëdamboen tantia. Nëbi Nuquin Papan bëdambo mibi icmenu cac, Ai, cata. Nëid ushënquoio ambi aton bacuë icmete ushë nendac.

Pabado natiamiaid

³ Icsamboec tabadquimbi Pabado Esuquidistu chuibansho, Tantiatiapibi, utsibo queti-apimboenoc bëdamboec tabadec nebi.

⁴ Nuquin Papan chuimiaid yec nadec tabadebi: Chieshenquoio yec dayacquiocquin ambi chiaid chuibenec bëdamboec tabadec nebi. Natiamiaid yec adequi tabadebi.

⁵ Utsin cuesaqui adequi bëdamboec tabadebi. Quënën naüedaqui adequi bëdamboec tabadebi. Nuquin Papan chiaid ëmbi chuibanac cuesnanubi padenquoio yec bëdamboec tabadebi. Natia chonoadbudequi adequi bëdamboec tabadebi. Utsi tantiaquin nabanec natia ushcasequi adequi bëdamboec tabadebi. Bunquiec bëdamboec tabadebi.

⁶ Icsainquo yec bēdamboec tabadebi. Nuquin Papan chiaid tantesa uainquo yec bēdamboec tabadebi. Tantiatiapimbo yec utsibo tabadsho isun adembidi Nuquin Papan chiaid chuibenec nebi. Naden chiac tantiatsiash, qeshun chuibenembi. Adembidi, Nashunquin chiac tantiatsiash, quequin adquid nashunembi. Nuquin Papan Mayanēn tantiamiaid yec bēdamboec tabadebi. Muainquocquin utsi abimbo tantiec adecbidi tabadebi.

⁷ Abimbo chuibanec tabadebi. Nuquin Papan nadatiambocquin nac adequi bēdamboec tabadebi. Nuquin Papan chiacpadomboen nabanec nebi ma utsibon abi icsaid empanueshun.

⁸ Ēbi chiec: Pabado bēdambo iquec, quenubi adequi tabadebi. Utsin ēbi chiuoiaic: Pabado icsambo iquec, quenubi adequi bēdamboec tabadebi. Ēbi icsamboen chuinubi adequi bēdamboec tabadebi. Ēbi bēdamboen chuinubi adequi bēdamboec tabadebi. Muaquid nec, quenubi abimbo chuiquid nebi.

⁹ Ēbi isquidēmbi, Ēmbi isacmaid Pabado nec, caqui ēmbi chuibansho tantiaboedo nec caimbi. Ēbi unēs uate bunubi abi chuibanec capucuenebi. Mēyanaqui unēsabi yec nidebi.

¹⁰ Unēsquo icmiaqui Esuquidistu tantiec bēdambo iquebi. Con na nibēdsho isun adembidi Esuquidistu chuibanec nebi ma Esuquidistu tantiec utsibo bēdambo icpanueshun. Con na nibēdsho isash Nuquin Papan bacuē yec aton natedi con na nec, quequin tantiec tsadebi.

¹¹ Chuitiapibi, quenquocquin ēbi natiaboedtedi mibi chuibanombi. Mibi comapenen tantiaquin ēmbi nabanaid mibi chuibanombi.

¹² Mibi tantiaquocquin chuibanquid ēbi icnubi ēbi tantiaquin chienquo mimbi iquec.

¹³ Pabadon con bacuēbo caido nebi, quequin mimbi naid mimbi tantiaidbēdta ompoenquocquin ēbi chuiban, caimbi mibi.

Esuquidistu tantiesabēdtambi icsain nainda quiaid

¹⁴ Esuquidistu tantiesabēdtan icsamboen nainda. Adembidi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, quesa aton papa. ¿Nuquin Papan bēdambo icmiaidēnda ambi chiaid niacquidbēdtan nabampadic? ¿Nuquin Papan Mayanēn tantiamiaidēnda Icho chieshēnquidbēdtambi chieshēmpadic?

¹⁵ ¿Esuquidistu Satanaspadquidta nedic? Padenquo. ¿Esuquidistu tantiaquid abi tantiesapadquidta nedic? Padenquo.

¹⁶ ¿Nuquin Papan ambi uaidbimboecnuc matsesēn nacnenaid tantiaquidta aton Mayan Nuquin Papan meniaid icpadic? Padenquo. Abi tantiaquid aton Mayan menec. Nuquin Papan dada uamiampid dada uanu. Ista.

“Ēbēd icquidbēd iquendabi;

Aidbēdi capuebi;

Aton papa nebi;

Con matses adquido nec,

¹⁷ Con matses icquin ēbi tantiesan ēmbi chiaid niacacpadomboen nainda.

Adecbidi aid icsacpadec tabadenda.

Adecbidi icsainquo yec tabad.

Adquid ēbēd iquec cho caindambi.

¹⁸ Adquidon papa iquendabi;

Adquid ēmbi con madobēd con champi caid iquendac, quec Nuquin Papa.” Abi tantiaquido nadatiambocquidēn aden chiec.

7

¹ Naden nanuna, quequin Nuquin Papan chiac nuqui naid icsatedibēdtabi nuqui tantiaid icsatedi ēnu, quequin Nuquin Papan chiacpadomboen nabanec tabadtenenuna.

Unēsquo icboedi mimbi naid tantiaish bēdamboshē iquebi quiaid

² Adembidi, ēbēdtabi ēbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi.

³ Pabado tantienquo yec icsaobi mibi camenuen nēid chuiquin dada uainquo iccomb. Mibitedi tantiec tsadebi, quequin padpiden chiemi. Abimbo caimbi. Unēssequi mibi bēshuntiapimbo iquendabi.

⁴ Mimbi chiacpadpenquocboedēmbi naosh, quequin choquidēn chioshi. Aden chuisho tantiaishun, Nuquin Papan chiacpaden nabanquidquido nec, quequin mibi chiec nebi. Unēsquo icboedi mimbi naid tantiaish bēdamboshē iquebi. Utsin natiamiaid icshobi bēdambo iquebi, mimbi ēbi camioc.

⁵ Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedëmbi tantesa uatsiash, quec quenenuquo iccobi.

⁶ Unësquio icsho ëbi tantiaquin Nuquin Papan Tito padpiden chomiosh ëbi bëdambo icmeoanuen.

⁷ Choashun mimbi aid tantiaquin nabanaid Titon chioshi. Ademibidi, ëbi iste mibi bunaid chioshi. Mimbi dada uaid isash unësquio icquin, Codinto yacnocquidon mimbi chiacpaden nabanosh, quequin Titon chioshi. Aden chiac bëdamboshë yanobi ad yenquo icboedi.

⁸ Mimbi dada uaid isash Codinto yacnocquido unësquio iccosh, qesho tantias, Icsambo icchitobi, quenquo iquebi. Aden dada uaic icsambo iccobi, quetiapimbo yequi mibi unësquio yacpadequi unësquio iccobi. Yuec mibi ad yenquo iccoc.

⁹ Adecbidi nëbi bëdambo iquebi. Ëmbi mibi unësquio icmiac mibi icsaid ënquin Nuquin Papan chiacpaden nabanec, quec utsibo. Aden chuïsho tantiaquin mibi unësquio icmequin mibi icsabudmiambo iccombì. Unësquio icmiac mibi bëdambo yanoc.

¹⁰ Unësquio icmiac, Nuquin Papan chiaid niacombi, qiash unësquio icquin mibi icsaid mimbi ënac. Adsho isun Nuquin Papan ënëdtiapimbocnoc aïdbëd mibi icmendac. Aden unësquio icmiac, Bëdambo iquebi, mibi quendac. Adecbidi mibi icsacpadeç icsainquo mibi icpendac. Padnuen Nuquin Papan chiacpaden niacquin ënesa abi natiamiaiduidi tantiec Nuquin Papa yacno puduedtiapimbo iquendac.

¹¹ Padnuen mibi unësquio icmiac nëbi ambi chiaid comapenen tantiate bunec mibi. Aid padpiden tantiaquin, ¿atotsi quiashini icsao? quequin mimbi chuipoc. Nuquin Papan cuidnushë quequin mibi icsaid mimbi ënoc. Ademibidi, Ëbi padpiden bëdamboen is, quequin Nuquin Papa mimbi chioc. Icsashun chienquoicboedëmbi nëbi cuembo bëdamboen chuïnu, quequin mimbi chuibanoc. Aden mibi icsaid ënacsho isun mibitedi icsaquin ëntiapimbo icquidën nacpaden naisa nec, quequin tantiembi.

¹² Icsaquid ambi icsa uanaïdbëdtabi chuïnuen mibitedi dada uainquo iccombì. Abentsëc icsash abitedi unësquio iquec. Adquiecbidi ëbi unësquio icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin

¹³ Ëmbi tantiacpaden naquin mimbi bëdambo iquebi camiaid nebi.

Ademibidi Tito yuedquin mimbi bëdambo iquebi camiaïdbidi niosh. Ëbi yuedenquoictsiash queboedi niosh. Yuedoshi, Tito qesho tantias bëdamboshë iquebi.

¹⁴ Mibi nidmembi, Tito, qeshun, Ëbi yuedquin nashunacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ëmbi chuïbocpadomboen mimbi nashunac. Aden tantias, Abimbo chiombi, quepobi. Ëmbi mibi muainquiocquin chuïbanacpadeç adquïbidi mibi nabanec tabadaïd abimbo iccosh. Adomboembidi Titon mibi isbanosh.

¹⁵ Èbitedi chushcatsiash, quequin mibitedishun Tito yuedpanëdac. Aden yuedac, Naden nata, quiosh Pabado, cac cacuidanenquiocquin mimbi nabanoc, quec Tito.

¹⁶ Adoaidi ambia tantiaquid icquin Ëmbi chiac mibitedishun nabanendac, quequin tantiembi. Aden tantiec bëdambo yec tsadebi.

8

Aton na nibëdquid icsho aton na dadpen icquid menequid

¹ Nuquin Papan tantiamiac nidaid Masedonia caid yacnocquidon, Esuquidistu tantiec iccuededquidon, nëbi bëdamboen nabanec tabadaïd chuïnu. Tantia.

² Natiamiaqui bëdambo iquebi quec aïdo tabadec. Adec tabadquin Esuquidistu tantiaquid utsibo tantiaquin menenuquin aton na daëdpectsëc musucshun dayun uaosh.

³ Ëmbi, Meneta, cainquiocnobi aton na bedtequid naimbudtsëcquien menenuquin bedbanosh.

⁴ Esuquidistu tantiaquid utsibo, nidaid Udeya caid yacnocquido, aton na nibëdec natiaic, quequin chiac Masedonia caid yacnocquidon, Aïdo menenuna, quequin comapenen chuïposhi.

⁵ Mitsana daëdpectsëc icnuc utsibo mimbi menetiapimbo icpec, quequin chuïnu quenubi Nuquin Icbon tantiamiac, Codinto yacnocquidon chiacpadomboen bedbanshun menenuna, quequin aïdon chioshi.

⁶ Adomboen menenun bedbamposh. Adoshu isun Tito nadombi. Mimbi ënden nidaid Udeya caid yacnocquidon natiaïd chuïbanac Nuquin Papan tantiamiacpadomboen menenushun Codinto yacnocquidon tauain bedbanshun dayun uapondash. ¿Ambi chïactedta bedbanoshe? Isnu, qeshun istanta, quequin Tito chiombi.

⁷ Naden naquid Codinto yacnocquido nec, quequin mibi tantiembi. Nuquin Papan Mayanën tantiamiaïdquïo yec comapenen Esuquidistu tantiaquido nec. Esuquidistu

tantiaquin aid chuibanec. Nuquin Papan chiaid ambia tantiaquidquo Pabado nec, quequin tantiaquin, Naden nata, quequin ěmbi chiacpadomboen badedquo comapenenaquidquo mibi nec. Adembidi ěbi tantiaquin naquido nec. Adquid mibi nec, quequin, Natiamaido menenuen bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

⁸ Meneta, quenquo iquebi. Natiamaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi.

⁹ Nuquin Icho Esuquidistu abuc tabadec abitedishun Icho icboedi nuquitsen abuc abědi tabadmenuec matsesash nidaiděn tabadnuc aton na nibědpadenec. Aiděn matses tantiaquin nabanacpaden utsibo tantiaquin nabanta.

¹⁰ ěmbi tantiacpaden mibi adembi chuinu. Tantia. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uquin mimbi tauapondac.

¹¹ ¿Aden nanuna, qeshun mimbi chiacted ěnquinda bedshun dayun uao? Padenquiocquin adota.

¹² Mitsana daědpactsěc icnuc daědpactsěc musucshun menesho isash, Dadpen meneta, quenquo Nuquin Papa iquec.

¹³ Aton na nibědquid icsho, Natiacquin meneta, quenquo iquebi. Aton na nibědquid icsho aton na dadpen icquiděn menec.

¹⁴ Mitsana dadpen icquid mimbi musucshun meniac aton na nibědquid bědambo iquebi, quepec. Aden meniac mibědi aton na nibědquid bědambo iquendac.

¹⁵ Nuquin Papan dada uamiampid nad iquec. Chuinu. Tantia. Petequiděmpi Nuquin Papan mana caid meniaid chuiquin: “Shubun tabadquid dadpeshun aidtedaidtedquien bedbanshun peshun napi uaid nibědosh. Adecbidi, aton shubun daědpactsěc tabadquidon aidted bedbanshun peshun napi uaid nibědosh.” Adec Nuquin Papan meniaidtedi bědambo yampicpadec aton na dadpen icquidbědi ambi meniaido bědambo yampec.

Tito Codinto yacno nidte

¹⁶ Něbi Tito mibi chuinu. Tantia. ěbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bědambo iquec, Papa, quec tsadebi.

¹⁷ ¿Codinto yacno tsutsi nidpatsiash? quequin ěmbi chiac, ěbibi nidebi, quioh Tito.

¹⁸ Tito mibi yacno nidnuesho tantiashun nuqui con utsi caid utsi Titobědi nidta caombi. Aidi Esuquidistu chuibanquid nec, quequin utsibon chiec. Bědamboquid nec.

¹⁹ Nidaid Masedonia caid yacnocquidon, Esuquidistu tantiec iccuededquidon ěmbi dayun uaid Pabadobědtan buanec nid caidbidi Titoběd nidquid nec.

²⁰ Aid daěd ěbědi nidsho isash, Nuqui na buanquin ampetsiash, quetiapimbo utsibo iquec.

²¹ Nuquin Papan tantiamiacpaden aidobědtambi bědamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobědtambi buanshunembi.

²² Tsyuec nidebi, quequin utsibobědta Tido mibi yacno nidmembi. ěmbi nata cac bědamboen nabanquid aidtedi nec. Mimbi chiacpadomboen nashunquido Codinto yacnocquido nec, quec aid mibi yacno nidec.

²³ Mibi nashunquin ěbědtambi Esuquidistu chuibanquid Tito nec. Aidbědi Esuquidistu tantiaquid utsi nidec. Esuquidistu tantiec iccuededquidon něuěshquo puduanec Codinto yacno nidta caboedi Titoběd nidec.

²⁴ Naden mibi chuiquin aid chiombi: Abi yacno choacsho isun Codinto yacnocquidon mibi nashunendac. ěmbi chiacpadomboen nashumbanta ma mimbi nashumbanacsho aid nidmequidon Masedonia yacnocquidon tantiapanuna.

9

¹ ěnden Esuquidistu tantiaquid utsibo tantiaquin nashunta quequin ěmbi chiac,

² Adonona, qeshun mitsana bedbanquin mimbi tauaondac. Adsho isun nidaid Masedonia yacnoěsh Esuquidistu tantiec iccuededquido mimbi menuequin chuibocpadomboen chiombi. Abentsěcshun-abentsěcshunquien menebanquin dayun uanuna, quequin seta utsin mimbi chuibocpadomboen ěmbi chiac Masedonia yacnocquidotsen, Adomboembidi nabanembi, queoaposh.

³ Aden aidon chuisho tantiashun nuqui con utsi caido mibi yacno nidmembi mimbi chiondacaden bedbanambo icnushe qeshun.

⁴ Nidaid Masedonia caid yacnoësh Esuquidistu tantiec iccuededquido ëbëdien tsyuec mibi yacno nidchitec. Aidobëdi mibi yacno choshon ëmbi chiacpaden mimi bedbanambocsho isash, Abimbo chiachimboen chuichitombi, quec natiaic bëpiutsiabi. Adquiecbidi mibi icoaic.

⁵ Adquo icnushe qeshun utsiboba mibi yacno nidmembali. Aido mibi yacno choacsho mimi chiondacted bedbanquin dayun uaid mimi ismetsiac, Abimbo chiombi, quequin. Aido chonoc mimi chiaacted bedbanquin dayun uambochoedëmbi nëbi mimi bedbampec. Aden mimbibi bedbanquin mibi menete bunacteduidtsëqui mimi menec. Utsimbic, Menetiapibi, queboedëmbi utsin, Bec cho, cac aton piucquid tantiec unësquio icquin menetsiash. Aden tantiaquin menenda.

Nuquin Papan na dadpen bedmiaidën aton na nibëdquid menequid

⁶ Nuquin Papan chiaid chuinu. Adembi tantia. Tied icbon daëdpactsëc nitsinac caniaash ëshëacsho aidtedtsëcbidi bedpec; dadpen ambi nitsinac caniaash ëshëacsho dadpen bedpec.

⁷ Adquiobidi aton na icquid iqueque. Tantia. Chuinu. Nëidted menenequin ambi chiaacted menequid. Ëmbi meniaid tantiaash bëdambo iquebi, quepec adquid. Utsimbic, Menetiapibi, queboedëmbi utsin, Nëidted bec cho, cac menepec. Aden utsin chiaacted meniaish, Bëdambo iquebi, quetiapimbocquin menec.

⁸ Mitsana menete bunquin mimi chiaacted menesho isun Nuquin Papan uesadmenquiocquin mimi bedmec ma utsi-utsien menebampanueshun.

⁹ Nuquin Papan dada uamiampid adomboembidi chiaid nad iquec:

“Nuquin Papan dadpen bedmiosi, quequin tantiaquin aton na nibëdquid utsi-utsien menebanec.

Aden menequid tantiaquin ënenquiocquin ambi nabod Nuquin Papan chuibanendac.”

¹⁰ Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adecbidi ambi uaid tiedën caniquid ëshë abentsëc siaid dadpen yanec. Matsesën petequid adquiecbidi dadpen yanoaic. Adecbidi utsi menequid mibi icsho isun Nuquin Papan mibi bedmedenec ma mimi meniaido dadpen icpanueshun. Aden mimi dadpen menebanac aidontsen ambi bedaid musucshun utsi meneoapec.

¹¹ Aden mimi meniac utsibotsen, Bëdambo iquebi, quec tabadec. Adec tabadquin mimi meniaid tantiaquin, Nuquin Papa bëdambo iquec, quequin mimi meniaidon chiendac.

¹² Nuquin Papa tantiaquin icquin aton na nibëdquid Esuquidistu tantiaquid dadpen icsho menebanquin mimi bëdambo icmiaid dadpen iguendac. Adembidi, Nuquin Papa bëdamboshë iquec, quequin aidon chuibanendac.

¹³ Meniacsho isash, Esuquidistu tantiaquid nebi, quequin abimbo chuiquidquido aid nec, quequin mimi meniaidbëdtambi utsibon mibi chuibanendac.

¹⁴ Adquidquido nec, quequin utsibon mibi chiec. Mimi tantiamiacpadomboen nabanquidquido Codinto yacnocquido nec. Aido bëdambo icme, Papa, quequin mimi meniaidon adomboembidi chiendac.

¹⁵ Aden aidon chuinubi naden nuqui Nuquin Papa chiec. Mimi chomiaid Esuquidistu ëbi bëdambo icmenuec ëbi icsaid bedshunash abided cuidadec unësash uincuempanëdash. Aidpadquid utsi nibëdec, Papa, quequin nuqui chiec.

10

Ëmbi dada uacpaden mibi yacno choshon adomboembidi nabanembi quiaid

¹ Comapenec chushquenquiocquin matses bëdamboen tabadmenuequin chuibanquid Esuquidistu icpanëdash. Mibi yacno choshon Esuquidistupadquid icnuequin ëbi chieshëquid bëdamboen tabadmenuequin chuibanendambi. Ëbi chieshëquido nadeq onquequin ëbi naden chiec, quec. Nuquibëd tabadquin dacuëdacimboecquin comapenen Pabadon chushcainquio iquec. Utsi yacno nidshun dada uaquin comapenen chushcaic, quiosh. Mibi chiec adosh.

² Adsho tantiaash mibi yacno choash tabadquin chushcante bunenquio icquimbi, Ambibi tantiacpaden nabanquid Pabado nec, quequido bëdamboen chuibanembi.

³ Esuquidistu tantiaquid yanshun icsaquidën tantiacpaden nabanesa nebi.

⁴ Mibi yacno choshon matsesën tantiacpadenquiocquin Nuquin Papan tantiamiacpaden ëbi chieshëquido Satanasën icsamboen tantiamiaido Nuquin Papan chiaid chuibanendambi.

⁵ Satanasën tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibëdec, qeshun ëmbibi tantiacpaden naic bëdambo iquec, quequin tantiamiaido nec. Aden tantiaquid icsho isun ambi icsamboen tantiec pamumëdacimboe yaid

ëmenu quequin Nuquin Papan chiaid ëmbi chuibanubi abi pamumëdacbimboe yaid padpidec pausudtiapimboconoc pauchanshun ambi tantiacpaden Nuquin Papan pausunendac ma ambi chiapadomboen namenuequin.

⁶ Aden chuibanushun Nuquin Papan chiapadomboen utsin-utsinquin abi icsaid ënabicsho isun comapenen cuidendambi.

⁷ Ambi isaiduidi tantiec utsi-utsiec onquec. Aido onquiaid chuinu. Tantia. Esuquidistu tantiaquid nebi, quequi, Pabado icsactsëcquio isadtsec, quepec aido. Aden chuiquido, Esuquidistu tantiaquid nebi, ëbi qesho tantiash, Muec nec, quetiapimbo iquec.

⁸ Abi tantiaquid ëbi yansho, Esuquidistun, Èbi chuibeneta, cashumbic abi tantiaquido abi tantiadonequin icmenuequin chuibanquidbidi icmiondashi. Adquid icmiac ambi chiaid ëbi chieshënquido tantiamenuen chuibanubi aidon tantiaid icsa pauschun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmioshi, quequin tantiec, Adesa nebi, quetiapimbo iquebi. Aden tantiaquin ëmbi chiapaden naimbi mibi yacno choshon caimbi.

⁹ Adquid nebi, quequin, Dacuëdampambocquid Pabado nec camenuen dada uainquio iquembi.

¹⁰ Mibi aden dacuëdmenu, quenquio icnubi ëmbi dada uaondaïd bedshun isun naden utsin ëbi chiosh quec. Chuiquidën comapenen chushquequin chiapadomboen Pabado dada uaic. Nëmbo choshon ambi dada uaquin chiapaden chuitiapimbo icpec. Chichompibictsecsho ëbi isun, Chuiquidida nepec, quetsëcquin istsëccombi. Tantiatiapimboconoc chuibanondash, quequin aidon ëbi chiec.

¹¹ Aden ëbi chiec onquequidën bëdamboen tantiata. Chuinu. Èmbi dada uacpaden mibi yacno choshon adomboembidi nabanembi caimbi.

¹² ¿Esuquidistun, Èbi chuibeneta, caid nebi, quepecta ëbi chieshënquido iquec? ¿Adenda Esuquidistun, Èbi chuibeneta, caidënuquio utsi icsamboen chuipec? ¿Esuquidistun, Èbi chuibeneta, caid nebi, quequin abimbo chuiquidquio yec muaquin chuiquidpadquid nebi, quepectabi ique? Padenquio iquebi. Esuquidistun, Èbi chuibeneta, caid nebi, quec muaid chuiquin abipadquid utsibëdtambi icsamboen nabanash, Nuqui bëdamboen naoc, cananec. Ambia icsamboen nabanquidën chuibanquin ismiac ambibi tantiacpaden nabanec abipadquid yanquidon.

¹³ Èbien Nuquin Papan tantiamiacpaden chuibanquid nec. Ambi tantiamiacpaden mibitedi chuibanquid nebi.

¹⁴ Codinto yacno nidshun anouidi tabadquin Esuquidistu chuiban, Nuquin Papan cac mibëd tabadquin chuibanondambi.

¹⁵ Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ëmbi chuibanaido nec, quenquio iquebi. Mibëdi tabadquin ëmbi chuibanac aid tantiaquid mibitedi yanondac. Adsho isash Esuquidistu tantiadonequidquio yampashun, quec mibi tantiec tsadebi.

¹⁶ Esuquidistu ëmbi chuiban-chuibanac aid tantiadonequiec mibitedi tabadsho isash Esuquidistu utsin chuibanacmanombo chuibanoidaïd nidendabi caombi.

¹⁷ Aden Esuquidistu chuibanac. Èbibi bëdambo ictiapimboquid mimbi bëdambo icmiad nebi, Papa, quequin ma Nuquin Papa Esuquidistu tantiaquidtedishun chuipanuna.

¹⁸ Bëdamboen nabanombi, abibi qesho Nuquin Papan bëdamboen istiapimbo iquec. Ambi, Bëdamboen mimbi naoc, caiduidi ambi bëdamboen isaidquio nec.

11

Pabado muesa icnubi muaquido

¹ Nëbi ëmbi dada uaid isash, tantiesa onquiacbimboen mamëmenuequin Pabado chiec, quenquiocpashun caimbi mibi. Aden tantiatsiash, quequin abi dada uaimbi. Nëid bedash ëmbi abia dada uaondaïd isec mibi onquiacpadec nëbi nëid mimbi iste dada uaid isec onqueta.

² Nuquin Papan tantiamiacpadec mibitedi cudasquidquio nebi. Adec cudasquin aton champi utsin, Bednu, cashunac utsin, Bednu, cac Bedadenda, quequin amën aton champi chiachimboen, Esuquidistun bednu caid yec icsamenuequidën, Bednu, cac, Bedadenda, caimbi. Esuquidistu ëmbi chuibanaido mibitedi bedec choeque.

³ Èmbi chuibanac Esuquidistu tantiauidquimbi nisi bëdambo isadacbimboecquidën muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi.

⁴ Adec ëbi tsadnubi Codinto yacno choshon utsin Esuquidistu ëmbi chuiboed utsi uain chuisho badedquo tantiec aidon. Adembidi, Mayan utsi iquec, qesho tantias, Èbi mene, quec mibi. Adembidi, Mibi bédambo icmequid Esus utsi iqueque. Aid tantia, quequin ëmbi chiaid utsi uain chuisho, Abimbo iquec, quequin tantiec mimbi. Aden utsibon ëmbi chuiboed utsi uain chuisho tantiec, qesho tantias Esuquidistu tantesa uatsias, quec tsadebi.

⁵ Esuquidistun ëbi chuibeneta cac Nuquin Papan tantiamiacpaden chuibenec nebi. Aden chuibeneta mibi, Bédamboenshë utsibon chuibanacpaden Pabado chuibanenquo iquec, qesho tantias, Icsamboen chiombi, quetiapimbo iquebi.

⁶ Utsibon bédamboenshë chiapadec Pabado onquenquo iquec, mibi quenuc Esuquidistun, Èbi chuibeneta, quequin ambia tantiaquidën tantiamiacpadombon mibitedi chuibanombi bédamboen tantiaquin.

⁷ ¿Codinto yacnocquido ma Esuquidistun bédambo icmepanueshun chuibanequi, Bec cho, quenquo yectabi icsape?

⁸ Mibi Esuquidistu chuibanu quiash Esuquidistu tantiec iccuededquid utsibon na ampiacimboec tabadobi. Aidon aton na meniaqui aido nashunenquo yec mibi yacno nidash tabadquin mibi nashunquin Esuquidistu chuibanondambi.

⁹ Adec mibi yacno tabadquin Esuquidistu chuibanec bunec tsadec, Bec cho, quenquo iccondabi. Nidaid Masedonia caid yacnoësh choquidëmbini meniondash. Aden ënden, Bec cho, mibi cainquo iccondapadec nëbi adquecbidi tsadebi.

¹⁰ Esuquidistun chuimaidquo nebi. Adquid icquin adquid nebi quequin chiemi mibëdi nidaid Acaya caid yacnocquid utsitedi, Padi. Aden chienda, quetiapimboec.

¹¹ ¿Atotsi quiashini, Bec cho, quenquo icpe? ¿Mibi tantienquocquindambi mibi, Bec cho, cainquo icpe? Mibi tantiec tsadebi. Codinto yacnocquido Pabado tantiaid nec, quequin Nuquin Papan tantiec.

¹² Aden mibi tantiaquin, Bec cho, cainquocquin Esuquidistu chuibenec nebi mimbi bédamboenshë chuibanquid caid: Pabado nabanec tabadapadec tabadebi, quetiapimbo icnubi.

¹³ Aido Esuquidistun ëbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec.

¹⁴ Aido tantiamequin ismequid Satanas nec. Nuquin Papan abi yacnoshon uaid mayan bëda aibëdi tabadquido icsaisa yacpadquid nebi, quequin abipenquocnoc chuiquin ismequin tantiamiac

¹⁵ adquecbidi ambi namiaidtedi bédambocquidbimboec capucuededec. Cuidte ushë chonoc aido icsaid Nuquin Papan comapenen cuidquin chiendac.

Pabado abi mëyanaid chuibanaid

¹⁶ Adembidi chuinu. Tantia. ¿Mamëmenuequin tantiesa onquiacimboendambi ëbi icaid chuibandio? ¿Utsin aden chuibancho tantianu, quepecta mibi ictsia? Aden chuibanenquocquin ëbi icaid chuibanuna,

¹⁷ Chuita, Nuquin Icbon cainquiocnobi.

¹⁸ Abi icaid utsin-utsinquien chuibanec, quequin tantiaquin adomboembidi ëbi icaid chuibanuna.

¹⁹ Bédamboen tantiaquidquo nebi, qeshun mamëmenuequin ambembi chiacimboen chuisho tantiec mimbi.

²⁰ Ambembi chiacimboec, Yuanu, qesho tantias icsamboen tantiaquidbimboec mibi yuade bumpec. Ambembi chiacimboec, Bec cho, qesho icsamboen tantiaquidëmbimboen menebanec mimbi. Muaquin chuiquin mitsana bedshunaqui cacuidenquo yec tabadec mibi. Aden mitsana ambembi isash, Mibi chuiquid nebi, qesho tantias, ¿Tsuntsin mibi adquid icmiosh? quenquocquin aidën chiapaden nabanec mimbi. Aton yuabimboecnuc mibi mëyanaqui, Min yuapenquo nebi, quenquo iquec mibi.

²¹ Nuquin Papan yua icta cac, Padi, quetsias, quequin aden mibi chuitiadquidëmbi chienquo iccondambi.

Mibi yuanequidon ambembi abi icaid chuibanac. Adomboembidi Pabado abi icaid chiec, Codinto yacnocquido quetsias, quequin tantiaquin ëbi icaid chuibanu. Tantia.

²² ¿Mimbi bédamboen chuiquid nec caid, Isadaidbo nebi, quepecta iquec? Adembidi, Èbi isadaidbo nebi, caimbi. ¿Abadauanën tsyuecquid nebi, quepecta aido iquec? Adembidi, Èbi Abadauanën tsyuecquid nebi, caimbi.

²³ ¿Esuquidistu chuibanquid nebi, quepecta aido iquec? Èbibi Esuquidistun ëbi chuibeneta caidquo nebi. Esuquidistu chuibanquid ëbi yacpadquid utsi nibëdec. ¿Mibi mamënshumenuequindambi aden chuipadi? Padenquo. ¿Èbi yacpadquid utsida iqueque?

Tantiata. Chuibanu. Utsi bëdiactsëc chonoadnuc comapenec chonoadobi. Adecbidi quënën nauedaid utsi icnubi quënën nauedeniaid nebi. Adecbidi utsi bëdiactsëc cuesaid icnuc yuen cuesto-cuestoaid nebi. Mëyanac unëstsenobi, utsi quenubi aden mëyanac unëstsen-unëstsemboedi nebi.

²⁴ Isadaidbon cueshcanten 39ted tambanquin cacuestoniondashi. Yuecshun aidtedembidi. Yuecshun aidtedembidi. Yuecshun aidtedembidi yuenquo cacuestonioshi.

²⁵ Adembidi cuesten cuesoshi. Yuecshun padpiden. Yuecshun padpiden. Adembidi cuënöten se-sioshi. Adecbidi cano dapa ëbi antsadnubi bincudec cano dapa mentoadosh. Yuecshun adecbidi. Yuecshun adecbidi. Adecbidi cano dapa abentsëc bidiadec mentoadan abentsëc ushec cano cuëshë bedash mentoadmane quiash noadpondabi.

²⁶ Adecbidi quenenenquo yec capucuenequin Esuquidistu chuibeniombi. Adec utsi-utsiec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpemo adquidbidi icposh. Matses dadpen yacno adquidbidi icposh. Unës uachitoshe, quenquo yec matses nibëdacno capucueniobi. Adecbidi acte dapan capucueniobi. Esuquidistu tantiaquid nebi, quequin abimbo chiachimboen chuiquidën unës uachitoshe, quenquo yec capucueniobi.

²⁷ Con na bednuec chuoadec uëshquiobi. Padpiden-padpidemboen ushenquo icquin chuibanombi. Piasec acte bunquin adembidi Esuquidistu chuibanombi. Iquenquimbi chuibanombi. Dashcute icsactsëcquid dasiuidquimbi chuibanombi. Yuedenquo yaqui adembidi chuibudombi.

²⁸ Ëmbi chuiboec Esuquidistu tantiabenabicquido icpec, quequin capucuenequin chuibeniombi. Utsi yacno nidshun, Ëmbi chuiboedo bëpiscudnushe queshun mibitedi chuiquin dada uaombi.

²⁹ Esuquidistu tantiaquid chieshec dayactiapimbo icpec. Adquiobidi iccobi, quequin tantiec tsadebi. Esuquidistu tantiaquid icsaosh, qesho tantiash unësquo yec, Nëbimbobi icsamianquid comapenen cuidta, Papa, quec tsadebi.

³⁰ Aidted ëbi icaid icnuc chieshenquo yec ëbi dayacquo yaid chuibanombi. Nëbi ëbi cuenondaid chuinu. Tantiata.

³¹ Abia Yampidën, Nuquin Icho Esuquidistun Papan nabanaid ënenquiocquin chuitequidquo iquec. Aidën nabanaid chuibanec muesa Pabado nec, quequin ëbi cuenondaid Nuquin Papan tantiec.

³² Ëbi cuenondaid nad icpondashe. Chuinu. Tantiata. Damasco yacnocquido ancanquidën Adetas cuëmëdquidën Pabado Damasco yacnoësh puduensho bedta quequin shubu dadpen daquënë uaid dapa shëcuëtedi sondado ëctabëdmepondash.

³³ Adec daquënë uaid shëcuë cuëmanquo sondado tabadnubi bednushe queshun abuc daquënë uaid iste shëcuëshun tsitsan dapa antsadunshun daquënë uaid cachoc budmepondashi. Budmiac ancanquidën bedadtiapimbo yec cuempondabi.

12

Nuquin Papan Pabado ismiaid

¹ Ëbi icaid chuibanquin ëmbi dada uaid isbanash, Esuquidistun ëbi chuibeneta caidquo Pabado nec, quequin Codinto yacnocquidon tantiatsiash, quequin adobamboedtedi chuibanquin dada uaombi. Ëbi icaid chuibanquin ëmbi dada uaid isash, Abi natiamiaid dadpen icpec, quetsiash, quenquocquid dada uaombi. Adembidi Nuquin Papan ëbentsëqui ismiondaid chuinu. Tantiata. Nad iccondashe.

² Ëndenquimbo seta 14ted matamequin Nuquin Papan bëdamboshë yacno indopondashi. Intacchobi abuc indopondashi, quetiapimbo iquebi. Tantiengquo iquembi. Adecbidi ëmbi tantiateuidi indoac, quetiapimbo icoaibi. Tsaudi, tantienquo iquembi. Nuquin Papambien tantiec.

³ Abuc bëdamboshë yacno indopondashi, quequin abimbo chiembi.

⁴ Abucshun utsi chuitemaidquo tantiapondambi. Ëmbi tantiondaid chuitiapimbo icpebi. ¿Mitsipadentsimbi ëmbi abucshun tantiaboec con onqueten chuiatsiaba?

⁵ Bëdambocquid icsho Nuquin Papan abi yacno indondashi, quetiapimbo iquebi. Natiamiantequid dadpen icnuc ambo abuc nidabi yec bëdambocquid nebi, quetiapimbo iquebi.

⁶ Abuc nidshun ëmbi isondaidd chuibanquin dada uaid isash, Bëdambocquid Pabado nec, quequin tantianushe queshun padenquo iquembi. Ëbi bëdamboec tabadsho isash, Pabado bëdamboec tabadec, qesho tantiash bëdambo ictsiabi. Adecbidi chuibanquo tantiash, Abimbo chuiquidquid Pabado nec, qesho tantiash adecbidi bëdambo ictsiabi.

Satanasën natiamiaid

⁷ Bédambocquid yansho Nuquin Papan abuc indoshon ismiondashi, quequin Pabado chuinushe qeshun Satanasën chomiaidën ëbi natiameded-natiamededsho isash, Chën, quenquo Nuquin Papa iquec. Satanasën chomiaidën natiamiac pinchuquën siadaid namin nidaëdaid chictiapimbo yacimboec con dada bédanenquo iquec.

⁸ Adec con dada bédantiapimbo icnubi, Èbi natiamequid cueme, Icho, quequin chiondambi. Adshumbic, padpiden. Adshumbic padpiden adomboembidi chuided-chuidedondambi.

⁹ Adoaquien, Padi. Bédambocquid icmenuequin naid nec. Mibi dayacquio icmequid con Mayan mibédi iquec, quequin Nuquin Ibon chiondashi. Adoaqui, Bédanambo icsho Nuquin Ibon ëbi dayacquio icmec quequin tantiec bédambo iquebi, quec tsadebi.

¹⁰ Aden tantiec con dada icsambo icnubi Esuquidistu chuibenec capuebi. Èbi icsamboen chuiquin mamënshunaqui adecbidi Esuquidistu chuibenec capuebi. Utsin natiamiaqui adquiecbidi Esuquidistu chuibenec capuebi. Utsin mëyanaqui adquiecbidi Esuquidistu chuibenec capuebi. Adquid icnuc natiapimbo icsho isun Nuquin Papan ëbi dayacquio icmiac tsadtiapimboequin chuibenec capuebi.

Esuquidistu tantiabemenuen chuibanombi quiaid

¹¹ Èbi yacpadquid utsi nibèdec, quequin chienquioctiadquidi niobi. Esuquidistu chuibanquid utsibon chiaid tantiaequidquio iquec, qeshun mibéd icquidon ëbi icsamboen chiosh qesho tantiaishun Pabado Esuquidistu chuibenecquid nec, quenquo utsibo iccosh, qesho tantiaishun ëbi icaid chuibanquin dada uaombi. Bédamboen tantiacimboen chuibanquid dadpen iquec. Aidon icsactsëcquio isadtsec, quequin ëbi chiec onquenubi Esuquidistu chuibenecquidquio nebi.

¹² Natiamiaqui chieshenquiocquin Esuquidistu ëmbi chuibancho mibitedishun tantiapondac. Adembidi nadatiambocquin ëmbi nabansho mibitedishun isbededpondac. Adosho isun Esuquidistu ëbi chuibeneta caidquio Pabado nec, quequin chuitiadquidëmbi padenquo mimbi icpondac.

¹³ ¿Esuquidistu tantiec iccuededquido utsi tantiaquin nashunquimbi mibi padenquiodambi ictio? Utsibon meniaid niondabi. Mibédi tabadec bunec, Bec cho, quenquo iccondabi. ¿Bec cho, qeshoda ëbi bédamboen mimbi tantiatsemponda?

¹⁴ Ènden mibédi tabadondabi. Yuecash padpidec mibédi tabadoapondabi. Nèbi padpidec mibi yacno nidendabi. Mibédi tabadec adecbidi, Bec cho, quenquo iquendabi. Mitsana bunesa nebi. Esuquidistu tantiaquidquio ma icpanu quequin mibédi tabadquin chuibanendambi. Aton bacuëbo tantiaquin amën anibédtan ambia tantiaquid icquin tied uaic adembidi shubu uaic bacuëmpibon nabantiapimbo icnubi.

¹⁵ Adquibidi mibitedi tantiec Esuquidistubéd icquido yampec quec chonoadec tsu-siobudquimbi chuibenendambi. ¿Èmbi mibitedi comapenen tantiaisho isunda mimbi ëbi tantienquo yampe?

¹⁶ Bec, cho, quenquo yec mibédi tabadondabi. Adsho isash, ¿Piuquid bedenquo icpecta Pabado tabadash? Muaquin chuiquin bedpash icnui, quec mibi.

¹⁷ ¿Mitsipadentsimbi bedpa? ¿Èmbi mibi yacno nidmiadonda muaquin chuiquin mitsana bedpash? Padenquo.

¹⁸ Titobédta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquo icboc. Aidbédi abentsëc yacimboen tantiaquidquio nebi. Aduidequi tabadquid ëbi daëdi nebi.

¹⁹ ¿Pabado ampesa nec mibi camenuendambi dada uaqin chuibampo? Padenquo. Esuquidistu tantiaquid icquin mibi aid tantiabemenuen chuibanombi. Èmbi chuibanaid abimbo iquec, quequin Nuquin Papan tantiec.

²⁰ Mibi yacno choash ëbédi abentsëc yacimboen tantienquo icnushe qeshun dada uaimbi. Comapenec chushcanansho istuidmane qeshun adembidi mimbi iste dada uaimbi. Mitsana nibédnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembidi dada uaimbi. Abipenquo chuisho tantiamane qeshun adembidi dada uaimbi. Bédambo icquid ëbi icnubi utsi padenquo iquec qesho tantiamane qeshun adembidi dada uaimbi. Mimbi tantiacpadpenquocquid icsho isash comapenec cuëdcuededsho tantiamane qeshun adembidi dada uaimbi.

²¹ Ai, mibi yacno choashun adquid icsho isun, Èmbi Esuquidistu chuibanaido nec, quequin Nuquin Papa chuitiapimbo yec natiaic bëpiuacimboec tsadmane qeshun dada uaimbi. Icsadenequidën abi icsaid ënabi icsho isash aido unësacimboecquid nec, quiaish unësquo icmane qeshun dada uaimbi. Aidon naid utsin istemaidquio nec. Ambibi ambi chudtemaid chudted-chudtedec icsambo yequi, Bédambocquid nebi, quec muacuededec.

13*Icsaid ěnesa chuiquin cuidendambi quiaid*

¹ Mibi yacno daědec puduedashic padpidec puduedendabi. Choshon, Icsadenequid iquec, quequin daědshun-daědshunquien chuiho tantiendambi. Abentsěcshun: Icsaquid iquec, quequin chuiho tantiatiapimbo iquendabi.

² Tauamboec puduedshun Esuquidistu chuibanac abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ěnta, cac padenquiocsho padpidec puduedoashun Nuquin Papan tantiamiacpadomboen mibi adquid utsibobědta comapenen chuiquin cuidembi, quequin chiondambi utsitedishun tantianubi.

³ Esuquidistun tantiamiacpaden Pabadoon dada uaid nec, quequin ĵmitsipadentsimbi tanti-ape? quequid comapenec onquequin chuibanembique. Tantiapiota, caimbi. Esuquidistun nadatiambocquin nacpaden ěmbi nasho mibitedishun ispondac. Aiděn tantiamiac padpidec puduedshun adomboembidi mibi ismeoaimbi.

⁴ Aidi matsesash nadatiapenquio icquidbimboecsho isun cuesten dectampanědash. Aadoacsho Nuquin Papan uincuemiac uněsesa yanquipanědash. Aid tantiaquidquio icquimbi ěmbibi nadatiambocquin nabantiapimbo icpebi. Abi chuiquid Nuquin Papan icmiosi. Aiděmbi ěbědi icquin icsadenequid comapenen chuiquin naquidbidi ěbi icmeoaindac.

⁵ Esuquidistu tantiaquid nebi, qeshun ĵmitsipadentsimbi aid tantiape? Adecbidi, ĵAmbi chiacpadectabi tabadpe? qeshun tantiabono, quequin Nuquin Papan chiaid isbanta. Aden isbanshun, Ambi chiacpaden niac-niaccombi, qeshun Esuquidistu ěběd ictiapimbo iquec, quequin tantiata. Aid miběd icnuc ambi chiaid niac-niaquenquio mimbi iquendac.

⁶ Adecbidi, Pabado Esuquidistun ěbi chuibeneta caidta neque. Isnu, quequiděn ěbi nabanec tabadsho isun, Pabadoon abimbo chiosh, capashuni mimbi.

⁷ Aden tantiaquin Codinto yacnocquido bědamboen tabadmeta, Papa, quequin chuided-chuidembi. ĵMibi bědamboec tabadsho isash, Pabadoon chuibanaiado nec, quequin mibi isquidon chuitsiash, quequindambi Nuquin Papa chuided-chuidedpadi? Padenquio. Esuquidistun ěbi chuibeneta caid Pabado nec, quequin tantiesa utsi-utsiec icnubi, Nuquin Papan chiacpadomboen nabanquidquio Codinto yacnocquido nec, quequin utsibon chuiho tantiatiadquio iquebi.

⁸ Nuquin Papan chiaid abimbo iquec, quequin ambi chiaidquio chuibanquidquibidi nebi. Ambi chiaid utsi uain chiesa nebi.

⁹ Mibi bědamboec tabadsho isash bědambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuided-chuidedec nebi.

¹⁰ Aden mibi tantiec tsadquin mimbi iste dada uaimbi. Mibi yacno nidabicquin dada uaimbi ma puduedshun icsaquid nibědsho isun comapenen chienquio icpanu quequin Esuquidistun tantiacpaden Nuquin Papan nua pausunaid ma icpanueshun chuibanec nebi. Mibi comapenen chuitiapimbo iquebi.

¹¹ Něbi ěnquin dada uaimbi. Icsaisa icnu quec Nuquin Papan chiacpadec bědamboec tabadta. ěmbi dada uain chiaid isquin adobanta. Abentsěc yacsimboen tanti-quin nabanec tabadteneta. Adec tabadsho isash tantianquidquio utsiběd bědamboec tabadquidquio Nuquin Papa mibědi iquendac. Aiděnquio mibi adquidquibidi icmendac.

¹² ěbi isec cho cananta.

¹³ Mibi tantiec tabadebi, quec němbo tabadquido Nuquin Papan bědambo icmebanaido.

¹⁴ Nuquin Icho Esuquidistun bědambo icmiaido nebi, quequin mibitedishun tanti-quiota. Adembidi, Nuquin Papan tantiaid nebi, quequin tantiaquiota. Adembidi aton Mayan ěběd iquec, quequin tantiaquiota.

Padi. Aidedi dada uaimbi.

CADASIA YACNOCQUIDON ISTE

Pabaddon tauamboen chiaid

¹ Pabado nebi. Esus chuibenequidquo nebi. Matsesën: —Adquid icta —¿caidtabi nedi? Padenquo. Esuquidistun: —Ëbi chuibeneta —caidquo nebi. Aid uincuemënëdaid Nuquin Papantsen: —Con mado Esus chuibeneta —caidquo nebi.

² Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquoio iquec. Adembidi tantiec nëmbo icquido Esus tantiaquidtedi: —Unësquoio iquec —quiosh.

³ Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi.

⁴ Matses bëdambo icmequid Esus nec. —Ëbi tantiesabo tabadacimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiapadec abi tantiaquido cuidmenquoio icnuec abided cuidadec Esus unëspac caondash.

⁵ Aidën Papa tantiaquin: —Nuquin Papa bëdamboshë iquec —canuna ënenquoio icquin.

Esusuidi tantienquoio yanaid

⁶ —Esus tantienquoio yanosh —quequin mimbi naid chuisho tantias shubitiadquoio iccobi. ¿Ëbi chonobida badedquoio Esus tantienquoio yano? Nuquin Papan tantiamiac abided cuidadec unësaid Esus tantiec mibi tabadondac. Aden Nuquin Papa aton Mado Esusbëda tantiaboedëmbi ¿nëbida Nuquin Papa tantienquoio yano? Utsibon icsamboen chiaquien mimbi Esus tantienquoio yanac.

⁷ ¿Aidon chiaidta bëdambo icpec? Aidon chiaid ma Nuquin Papan chiaidpenquoio neyoc. Esusquoio chienquoio icquin muaquin chuisho tantiasshun: —Abimboen cachitec —qeshun mimbi Esus tantienquoio yampac.

⁸ —Aton Mado Esusuidtsëqui tantiasho Nuquin Papan nuqui bëdamboen isec —quequin abimbo chiondambi. —Nuquin Papan chiaid abimbo chienquoio icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiasshun aidtsen: —Nuquin Papan cuidpashun —catsiambi. Utsibontsen muaquin chuisho tantiasshun aidtsen: —Cuidpashun —quiobi.

⁹ Tantia. Adembidi mibi chuinu. Ëmbi chuibanac mimbi Esus tantiabonondac. Mimbi tantiondaid Esusquoio chienquoio icsho: —Nuquin Papan cuidpashun —cainbi mibi mauaquin chuiquido.

¹⁰ —¿Matsesën: “Mibi bëdambo iquec,” mabi canu —quequindambi aden chuibampadi? Padenquoio. Nuquin Papan chiapadomboen mambi natiadquoio yoc. —Bëdambo iquec —Nuquin Papa camenuen mambi chuibampaboc. Matsesën chiapadomboenuidi natiapimbo iquebi. Adenuidi naic Esuquidistun yuambo ictiapimbo ictsiabi.

Esusën chiaidquoio chiec nebi, quiaid

¹¹ Tantia, con utsibo. Mibitedi chuinu. —Esus tantiassho Nuquin Papan matses bëdamboen isbentsiassh —quequin ëmbi chuiboed amben chiaidpenquoio nec.

¹² Matsesën chiabi Esuquidistun tantiamiac ambi chiaidquoio chuibanombi.

¹³ Tantia. Aden Esusën ëbi tantiamiondaid mibi chuinu. Con matses isadaidbon chiapadomboenuidi natiadquoio icquin Nuquin Papa tantiesabo danquin Esus tantiaquido compapenen chieshënnuquin cuesun secatiadquoio icpadenebi. Ëmbi adodened ëmbi chuisho mimbi tantiondac.

¹⁴ Nuquin Papa tantiatadquoio icquin con matsesën chiaid abitedimbo natiadquoio ictenebi. Èbëda tishaidon caniabon bëdiactsëc natiadquoio icnubi con tsusedpabon chiaiduidi natiadquoio ictenebi. Adquid icquin Esus tantiaquido compapenen chieshëndenembi.

¹⁵ Adshobini Nuquin Papan aton Mado Esus tantiamiondash. Ëbi tishabi icnubi ëbi caic: —Con Mado Esus tantiameshun bëdamboen isquin

¹⁶ Pabado: “Matses utsibo isadaidpembo con Mado Esus chuibeneta,” caindambi —quequin ambi chiapadomboen Esus tantiamiondashi. Adoac: —Esusën chiaid ëbi chui —quequin matses chiamo iccondambi.

¹⁷ Shubu dadpen icquid Edusaden caid yacnocquido Esusbëd icnëdaido ambia Esus chuibanëdaido chuitanambo iccondambi. Utsibo chienquoio yec nidaid utsi Adabia caid yacno matses nibëdacno badedquoio nidtanondabi. Adashic yuec-yuecpambo ictanec auëshquoio choec shubu dadpen icquid Damasco caid yacnobidi choaondabi.

¹⁸ Adashic ambo nidash seta abentsëc chotsecnuc matametanec Edusaden yacno Petedo isec nidtanondabi. Adec nidash 15tedec ushec aibdëd tabadondabi.

¹⁹ Ambobi Nuquin Icho Esusën utsi Acobo caid isondambi. Esusbëd icnëdaid utsi isambo iccondambi. Aid daëdtsëqui isondambi. Utsibo padambo.

²⁰ Abimbo chuiquin nëid dada uaic nebi. Ëmbi aden chuibansho tantiash: —Ai, abimbo caic —quec Nuquin Papa.

²¹ Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auëshquio nidshun nidaid utsi Sidisia caid yacno istanondambi.

²² Nidaid utsi Udeya caid yacno Esusbëd icnëdaido yacno yuec tabadambo iccondabi. Adsho anocquidon Esus tantiaquidon isabi iccondashi.

²³ Ëmbi naid chuishouidi tantiapac caondash. —Nuquipadquid Esus tantiaquido cuesun secatiadquio icnëdaidëmbi Esus tantiabenshun Esusquio chuibeniosh —quequin ëmbi naid chuishouidi tantiapac caondash.

²⁴ Aden ëmbi naid chuisho tantiash: —Nuquin Papan nac Pabado bëdambo iquec. Adomboen Pabado tantiamec Nuquin Papa bëdamboshë iquec —quepac caondash Udeya yacnocquido.

2

Edusaden yacno nidoaid

¹ Yuecash seta 14ted matamiamsh Edusaden yacnobidi nidoapondabi. Ëbëdi Bednabe caid nidpondash. Titotsen buanondambi.

² Adec Nuquin Papan tantiamiacpadec ambo nidshun Esus tantiaquido chuiquid dapabo caidouidsëqui cho-chomeshun ëmbi naboed chuibanondambi. —Ëmbi chiabi yac aidon: “Muegui neque. Pabodon chuisho tantienda,” canushe —qeshun naden chiondambi. —Nuquin matsespenquo isadaidpemo matses utsibo Esusquio chuibeniombi. “Esusuidi tantiasho Nuquin Papan nuqui bëdamboen istsiash,” quequin chuibeniombi. ¿Adembidida mimbi tantiape? —capondambi Esus tantiaquido chuiquid dapabo chuiquin. Ëmbi adoac: —Ai, adembidi tantiembi —quepondash aid.

³ Èbëd icquid Tito caid isadaidpemo icshobi: —Shui dëbid dëteshune —cainquo iccondash chuiquid dapabon abi utsibon: —Adotiad —canubi.

⁴ Adec: —Shui dëbidien dëteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Esusuidtsëqui tantiasho Nuquin Papan nuqui bëdamboen isec,” quequin con tsusedpan chiaid niacsho tantianu —quiash ëbi yacno puduedpondash. Adec puduedshun tantiashic: —Mimbi icsamboen chiec. Nuquin tsusedpa Moisesën chiampidtedi nasho Nuquin Papan bëdamboen istsiash —quepondash.

⁵ Adec aid: —Nuquin tsusedpan chiampicpadomboenuidien nametiad —qesho: —Padi. Mimbi icsamboen chiec —quequin aidën chiaicpadomboen nainquo iccondambi. —Ma matses utsibon: “Esusënuidsëqui Nuquin Papa ëbi bëdamboen ismec,” quequin ma Esusquio tantianu —qeshun nainquo iccondambi.

⁶ Aden Esus tantiaquido chuiquid dapa caidon Esus tantiaquidën natequid utsi chienquo iccondashi. —Esus tantiabnacsho isun nuquin tsusedpan chiaicpadomboentsen nameta —quequin chienquo iccondashi. ¿Esusbëd icnëdaidën: —Moisesën chiaidtsen nameta —cactambi nametsemponda? Padenguio ictsenondambi. ¿Atotsi Nuquin Papan aido capec? —Esusbëd iccondaidquio neque. Bëdamboen isnu —¿capenda iquec? Padenguio.

⁷ Naden Petedo chedon chiondashi. —Nuquin Papan chiaicpadomboen mimbi matses utsibo isadaidpemo Esusën naid chuibeniac. Nuquin Papan chiaicpadomboembidi Petedon nuquin matses isadaidbo Esusën naid chuibeniosh. Petedon nacpadomboen mimbi bëdamboen nac —capondashi.

⁸ —Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbtsen matses utsibo dadpen Esus tantiamiac

⁹ —qeshun bëdamboen ispondashi. —Adembidi nanuna. Mimbi isadaidpemo Esusën naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquio mibi nec —qeshun chuiquid dapabon Bednabebëdta mëdimbampondashi. Nëidic Petedo. Nëidic Acobo. Nëidic Uan. Aidedishun chuiquid dapabo icquin adondashi.

¹⁰ Nadentsen chuipondashi. —Aton na nibëdquido bëdamboen isnuna —capondashi. Adsho tantiash: —Ai, adonona —quepondabi. Adanec nidpondabi.

Antioquiya yacnoshon Petedo chushcaid

¹¹ Adash yuectaniash ëbi iccondacno shubu dadpen icquid Antioquiya caid yacno Petedo chopondash. Auëshquio icsashobimbi bëisquioquin chushcapondac.

¹² Abëdtan Esus tantiaquido matses utsibon codocaid pec bëdamboec tabadboedi aton pete isuidanec aidobëd cuëshëdec Petedo icsapondash. Ambo choash Esus tantiaquido con matsesëmpenquio codocaid pec bëdamboec tabadondash. Adnubien Acobon: —Ambo istan —cac con matses Moisesën chiampid tantiaquido cho-chopondash. Aido cho-chosho isash: —Moisesën chiampid niacquin matses utsin codocaid pesho chushcanushe —quec dacuëdquin isadaidpembon pete meniaid isuidampondash Petedon. Adec abëdtan Esus tantiaquido matses utsibobëd cuëshëdec icsapondash.

¹³ Adsho isash anocquido isadaidbotsen abëdtan Esus tantiaquido matses utsibobëd tabadenquio yec cuëshëdpondash. Adsho isash ëbëd icquid Bednabetsen adecbidi cuëshëdec icsapondash.

¹⁴ Adec icsaquin Esusën chiacpadomboen nainquio icshobimbi Petedo chushcapondac Esus tantiaquidtedishun tantianuc. —¿Ada mimbi bëdamboen naoque? Tantia. Chuinu. Isadaidbo tsusedpan chiaid matses utsibo mimbi namec. Isadaidbo icquimbi matses utsibon codocaid pec aidbëdi mibi bëdamboec tabadoc. Aidon piaid pec bëdamboec tabadboedi nëbi aidbëd mibi cuëshëdoc. Adsho isash mimbi nianaido: “Petedon matses isadaidbo tabadacimboc tabadshouidien Nuquin Papan nuqui bëdamboen ischitotsiash,” quepec icsamboen chiec. Aden mimbi icsamboen tantinameque. Tantia. ¿Atotsiequin mimbi naoque? —capondambi Petedo chushcain.

Nuquin Papan bëdamboen iste chiaid

¹⁵ Naden con matses Petedo chiondambi. —“Moisesën chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dëbid dëteshun secanëdaido nec.

¹⁶ Adquid icquin: “Moisesën chiaiduidi naquin Nuquin Papa bëdamboen ismemb,” quedenedi nëbi nuqui utsien chiec. “Abided cuidadaid Esusënuidtsëqui Nuquin Papa ëbi bëdamboen ismec,” quequin Esus tantiasho Nuquin Papan nuqui bëdamboen isec,” quequin nuqui tantiec. Adshun matses utsibobëdtambi nuqui Esus tantiaquiec. “Moisesën chiaid niaquesa nibëdsho isun Nuquin Papan matses abitedi bëdamboen istiapimbo iquec,” quequin tantiashun nuqui bëdamboen ismequid Esus nuqui tantiabenondac —quequin Petedo chiondambi.

¹⁷ Adashic Petedobidi chui-oaic: —“Esusuidi tantiasho Nuquin Papan nuqui bëdamboen istsiash,” qeshun Esus tantiabenondacsho nuquin matsesën icsambo capondashi. “Nuquin tsusedpan chiacpadomboen nainquio yec mibi icsambo iquec matses utsibobimboec,” capondashi nuquin matsesën. ¿Ada Esuquidistun matses icsambo icmepec? ¿Ambi chiacpadomboen naicta nuqui icsape? Padenquio.

¹⁸ “Nuquin tsusedpan chiampicpadomboen nashoen Nuquin Papan nuqui bëdamboen isec,” quequin nuquin matsesën chiaid nec. Esus tantiaquin aden chuitiapimbo yanondabi. Adec Esus tantiaquid ichoedi: “Padpiden con tsusedpabon chiaiduidi naquin Nuquin Papa bëdamboen ismemb,” qeshun abi bëdamboen ismequidquio Esus tantienquio yequini icsambo icchitotsiac.

¹⁹ Con tsusedpa Moisesën chiacctedi natiadquio ictenebi. Adquid bëdamboen iste danquin abitedi natiadquio icquimbi abitedi nainquio iccondambi. Adshun: “Moisesën chiacctedi ambimbi matsesën natiapimbo iquec,” qeshun ëmbimbo naid ënondambi. Nëbini Esus tantiec Nuquin Papan chiacpadec tabadec.

²⁰ “Ambi con tsusedpa Moisesë chuiamiactedi nashouidi Nuquin Papan nuqui bëdamboen istsiash,” quedenedi Esus tantiec adenquio yanondabi. Nëbi ëmbi tantiaidquio nainquio yec Esuquidistubëdi cuëshëdenquio yec bëdamboec tabadebi. “Ëbi tantiec ëbi cuidmenquio icnuec abided cuidadec unësac caondash,” quequin tantiashoeni Esusëmbi bëdamboec tabadquid icmec.

²¹ “Abided cuidadaid con Mado Esusuidi tantiasho matses bëdamboen isendambi,” quequin Nuquin Papan chuipanëdash. Aden Nuquin Papan chiaid niactiapimbo iquebi. Moisesën dada uapampid ambi chiaid niaquesa icsho Nuquin Papan bëdamboen istsenac. Ambi chiaid niaquesa nibëdec. Adquid Nuquin Papan chiaid niaquesa icnuc: “Matses cuidmenquio icnuec ëbided cuidadec unësnu,” queboedi Esus padenquio ictsempañëdash —capondambi Petedo chuiquin.

3

Nuquin Papan aton Mayan tabadmiaid

¹ Tantia. —Cadasia yacnocquido piushbimboecquin tantienquio yanosh —quequin chuisho tantiashun mibitedi chuinu. ¿Tsuntsin: —Tantienda —cac Esus tantienquio yano?

—“Cuesten dectanac abided cuidadaid Esusēnuidtsēqui Nuquin Papa nuqui bēdamboen ismec,” quequin Esus tantiasho Nuquin Papan nuqui cuidenquio iquec —quequin mibi chuibanondambi. ¿Esus tantiatiapimboda ique?

² Mimbí tantiaid ēbi chui. Tiantanu. ¿Atotsi quiash Nuquin Papan Mayan mibēdi tabadanondash? ¿Nuquin Papan ambi chiaid Moises dada uamepampid mimbí nabanuda mibēd tabadanondash? Padenquio. Ēmbi chiondaid Esusquio mimbí tantiabensho isashien mibēd tabadanondash.

³ ¿Pabiate shēcuē choquidida mibi nendac? Tantia. ¿Atotsieshun tantienquio ique? Mibēdi tabadquin Nuquin Papan Mayanēn mibi bēdamboec tabadquid icmec. ¿Nēbi Esus tantienquio yanecta mibi bēdamboec tabadpatsia? Mibembi bēdamboec tabadiapimboen mibi iquec.

⁴ ¿Aden Nuquin Papan aton Mayan mibēdi tabadmiad icquimbida Esus tantienquio yano?

⁵ Nuquin Papan aton Mayan mibēdi tabadmequin comapenen tantiaquin nacnenquin mibi ismiondash. ¿Atotsieshun Nuquin Papan aton Mayan mibēdi tabadmec? ¿Con tsusedpa Moisesēn chiampid nashoda Nuquin Papan aton Mayan mibēdi tabadmec? Padenquio. Ēmbi chiondaidquio Esusquio tantiasho Nuquin Papan aton Mayan mibēdi tabadmec.

Nuquin Papa tantiaquidquio Abadauan chiaid

⁶ ¿Tsutsi Nuquin Papa tantiaquidquio icpampic? Abadauan nepampic. Nuquin Papan chiac Abadauan: —Abimbo mimbí caic —quesho: —Adquid bēdamboen isembi —queshun Nuquin Papan bēdamboen isbempampic.

⁷ Adec Abadauan: —Nuquin Papan abimbo caic —quequin tantiapampicpadomboen nēbi matsesēn Esus tantiasho Nuquin Papan bēdamboen isendac ambi Abadauan ispampicpadomboen.

⁸ —Esus tantiaquidquio iquendac —quequin naden Nuquin Papan Abadauan chuipampic ēndenquimbo. “Abadauan, mibi unēsan yuecquimbo ictaneshun min tsyuecquid abentsēc tantiaquidtedi bēdambo icmendambi. Nidaid utsi-utsiec yacno tabadquidon min tsyuecquid abentsēc tantiasho bēdambo icmendambi,” quequin Nuquin Papan chiaid con tsusedpan dada uapampic.

⁹ Abi tantiaquidquio icsho ambi Abadauan bēdamboen isampicpadomboen nēbi aton Mado Esus tantiasho Nuquin Papan nuquitsen bēdamboen isec.

¹⁰ Utsiboen Nuquin Papan cuidtequido nendac. —Moisesēn chiampicpadomboenuidi nasho Nuquin Papan bēdamboen istsiashi —quequidēmbi abitedimbo nainquio icsho Nuquin Papan cuidendac. Aden ēnden Nuquin Papan chiaid dada uapampic. “Ambi chiactedi nainquio icsho Nuquin Papan cuidendac,” quepampic.

¹¹ —Ambembi Moisesēn chiampicpadomboenuidi nasho matses bēdamboen isendambi —¿quecta icpanēdash Nuquin Papa? Padenquio. Ambi chiaid niacquidoudquidquio icsho bēdamboen istiapimbo icquin Nuquin Papan naden chuiquin dada uamepampic. “Nuquin Papa ambi chiacpadomboen naquidquio nec,” quequin abi tantiec tabadquidien Nuquin Papan bēdamboen isec,” quequin dada uamepampic.

¹² ¿Ēmbembi Moisesēn chiactedimbo nanuequidta Nuquin Papambo tantiec tabadpec? Padenquio. “Moisesēn chiactedi naquid Nuquin Papabēd tabadendac,” quequin chiampicpaden ambembi matsesēn natiapimbo iquec. Natiapimbo icsho Nuquin Papan bēdamboen istiapimbo iquec.

¹³ Aden Nuquin Papan matses abitedimbo bēdamboen istiapimbo icnuc Esuquidistu: —Ēbided cuidshun ēbi tantiaquido ma con Pan cuidenquio icnu —quiash abided cuidadec unēspac caondash cuesten dectanac. Aidquio chuiquin Nuquin Papan con tsusedpa dada uamepampic. “Cuesten dectanad Nuquin Papan cuidaidquio nec,” quequin Nuquin Papan chiaid dada uapampic.

¹⁴ Adec matses utsi-utsien abi tantiaquido cuidmenquio icnuec abided cuidadec Esus unēspac caondash. Ēndenquimbo con tsusedpa Abadauan chiec: —Yuecshun bēdambo icmendambi —quequin Nuquin Papan chuipampicpadomboen abi tantiaquido bēdambo icmequin aidobēdi aton Mayan tabadmenuec Esus unēspac caondash.

Abadauamba chuishun Moisesetsen Nuquin Papan chiaid

¹⁵ Tantia, con utsibo. Mibitedi chuinu. Min matsesēn nadoquid. —Naden naindambi —quequin dada uashun: —“Abimbo chiaidquio nec,” ma isquidon canu —queshun abi cuēmēdquidtsen dada uaquid. Aid dada uaid dada uaquidbēdtambi utsintsen utsi uatiapimbo icquid: —Chuiquidēn cuidnushe —queshun. Adembidi ambi chiaid utsi uatiapimbo icquid icquin

¹⁶ Nuquin Papan: –Nadomboen naindambi –quequin Abadauan chuipampic. –Mibi nibédanan yuecquimbo ictaneshun min tsyuecquid abentsëcshun matses bédambo icmendac –quepampic. –Min tsyuecquid abentsëc tantiaquidtedi bédamboen isendambi –quequin tantiec adapampic. Esus caiqui: –Min tsyuecquid abentsëc –quec adapampic. –Min matses tsyuecquid dadpen –quenquo icpampic.

¹⁷ ¿Ada tantie? Èdenquimboshë Nuquin Papan Abadauan chuiquin: –Min tsyuecquidën matses bédambo icmendac –caspampic. Adshumbic yuecquio ictaneshun seta dadpenquo 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquo icquin Nuquin Papan ambi chiaid utsi Moises dada uamepampic. Muenquo icquin Abadauan chuipampic.

¹⁸ ¿Èmbi chiaid èmbi Moises dada uamiacpadomboen nashouidi mibi bédamboen isembi –qeshunda Nuquin Papan Abadauan bédamboen isbempampic? Padenquo. Moises tishabi icnuc ambi chiac: –Nuquin Papan abimbo caic –abi casho Nuquin Papan Abadauan bédamboen isbempampic. Adashic: –Yuecshun min tsyuecquidën matses bédambo icmendac –quepampic. Aden ambi èdenquimboshë chiampicpadomboen nèbi matses bédambo icmequin Esus tantiaquido Nuquin Papan bédamboen isec.

¹⁹ ¿Atotsieshun Nuquin Papan ambi chiaid Moises dada uamepampic? –Èmbi chiaid isash: “Icsamboequien nuqui tabadchitec,” quequin ma matsesën tantianu –qeshun Moises dada uamepampic. Nuquin Papan Abadauan chiampid Esuquidistu choabi icnuc adapampic. Nuquin Papan abi yacnoshon uaido mayan bédabon Moises chuiuampampic. Adoac Moisesën aton matses Nuquin Papan chiaid chuibampampic.

²⁰ Nuquin Papanquo Abadauan chuipampic. Abadauan caic: –Chuitan –cainquo icquin Nuquin Papanquo Abadauan chuipampic.

Matses abi icsaid tantiamete chiaid

²¹ Aden Nuquin Papan Abadauamba chuishumbic Moisessten chuipampic. ¿Ambi: –Min tsyuecquid tantiaquido bédamboen isendambi –quequin Abadauan chiampid niaquinda Nuquin Papan Moises chuipampic? Padenquo. ¿Matses bédamboen isnuenda Nuquin Papan ambi: –Naden nata –quequin chiaid Moises dada uamepampic? Padenquo. –Matses bédamboen isnu –qeshun ambi chiaid Moises dada uameshun ambi chiaid niaquesa bédamboen isun unësacsho abëdi tabadmetsiash. –Èmbi chiaid niaquesa nibédendac –quequin tantiaquin ambi: –Naden nata –quequin chiaid Moises dada uamepampic.

²² –Èmbi chiaid isun: “Nuquin Papan chiaid matses abitedishunquien niac-niacchitec. Mëtaniac abembi mënchiquidtiapimbo yacimboc abembi bédambo ictiapimboen icchitec,” quequin ma matsesën tantianu –qeshun Nuquin Papan Moises dada uamepampic. Adec matses abitedi icsamboec tabadsho bédamboen istiapimbo icquimbi ambi Abadauan chiampicpadomboen naquin Esuquidistu tantiaquidouditsëqui Nuquin Papan bédamboen isec.

²³ Esus choabi icnuc nadquo matses icpanédash. Moisesën chiacpadomboenuidi natiadquidi abembi bédamboec tabadtiapimbo icpanédash. Mëtaniac mënchiquidtiapimbo yacimboc aidën chiacpadece bédamboec tabadtiapimbo icpanédash. Nuquin Papan Esus tantiamiabi icnuc adquo matses icpanédash.

²⁴ Aden: –Ambi chiaid niaquec icsamboec tabadsho Nuquin Papan èbi bédamboen istiapimbo iquec. ¿Nuquin Papa bédamboen ismequidta nibédpeba? –nuqui camenuen ambi chiaid Moises dada uamepampic. Aden nuqui icsaid tantiameshun Esussten tantiamiac: –Esus tantiasho Nuquin Papan nuqui bédamboen isec icsaisabimboecnuc –nuqui quendac.

²⁵ Aden tantiec: –Isadaidbo tsusedpan chiacdedi nashouidi Nuquin Papan matses bédamboen istsiash –quenquo nuqui iquec. –Esus tantiasho Nuquin Papan nuqui bédamboen isquin bédamboen tabadmec –quequin nuqui tantiec.

Nuquin Papan con mado con champi caido

²⁶ Aden Esus tantiasho Nuquin Papan: –Con mado mibi nec. Con champi mibi nec –nuqui capec.

²⁷ Adec: –Esus tantiaquid nebi –qesho acten mentoaid yec Esuspadquo ictiadquo nuqui iquec.

²⁸ Aden Esus tantiasho Nuquin Papan nuqui bédamboen isec. Isadaidbo yec isadaidpemo yec matses yuaido yec matses yuapenquo yec dada yec chido yec quequin Esus tantiasho nuqui bédamboen isec. –Matses utsibo bédamboen istiapimbo iquebi –quenquo icquin matses utsibombi aton Mado Esus tantiasho Nuquin Papan bédamboen isec.

²⁹ Adembidi abi tantiasho ambi Abadauan bédamboen isampicpadomboen Esus tantiasho Nuquin Papan nuqui bédamboen isquin bédambo icmec ambi Abadauan chiampicpadomboen. Adec Abadauanën tsyuecquidobimboecquido nuqui nec.

4

Yuabimboecquid isadaidbo yaid

¹ Tantia, con matses. Mibitsen chuinu. Aton na dadpen dayun uaquidën nuquin matsesën nadoquid. —Ëbi unësän con madon con na abitedi bedendac. Bacuë icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidën amën aton mado aden chuiquid. Aton papa unësän caniabi yec utsibon yuabimboec aton mado iquec.

² Caniabi icquin utsibon chiacpadomboen naindac aton madon. Adashic aton papan chiacpadec canishun aton papan na bedash yuabimboecoedi adquidpenquo yanendac.

³ Adquo yuabimboecquido con matses isadaidbo icpanëdash. Tsusedpabon yuabimboecquido icquin Nuquin Papan bëdamboen iste bëdamboen tantienquo icpanëdash. —Tsusedpabon chiacpadomboen Nuquin Papan: “Naden nata,” quequin chiaiduidi nanu —quiashi abembi bëdamboec tabadtiapimbo icpanëdash.

⁴ Adnubien ambi ëndenquimbo tantiampicpadën Nuquin Papan Esus chomepanëdash. Isadaidbon chidon tishaid icquin Nuquin Papan: —Naden nata —quequin chiaid naquidquo Esus nepanëdash.

⁵ Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanëdash. Adsho isash matses cuidmenquo icnuec abided cuidadec Esus unësac caondash. Nëbi Esus tantiasho: —Con mado mibi nec. Con champi mibi nec —quequin Nuquin Papan nuqui bëdamboen isec.

⁶ Adec: —Con bacuëbo nec —queshun Nuquin Papan nuquibëdi Esusën Mayan tabadmec. Adoac bacuën amë: —Ëbi, papa —cacbimboen Nuquin Papa nuqui chianec.

⁷ Esus tantiabi Moisesën dada uapampiduidi namenuequido yuabimboecquido icboedi nëbi Esus tantiasho Nuquin Papan: —Con bacuëbo nec —nuqui capec. Aden nuqui bëdambo icmec ambi Abadauan chiampicpadomboembi.

¿Utsin yuameteda bumpe? quiaid

⁸ Tantia. Nëbi matses utsibo mibi chuoanu. Ënden Nuquin Papambo tantiesa icquin matses uaquidpenquiobi utsi mimbi tantiapanëdac. Papa quequin mimbi tantianëdaidën yuabo yec mëtaniacimboecquido mibi icpanëdac.

⁹ Nëbi Nuquin Papa mimbi tantiabenondac. ¿Mimbembida adonda? Padenquo. Aidëmbi mibi tantiamapanëdash. Aidën tantiamiaidombo icquin ¿atotsiequin aid tantienquo yanoi? ¿Moisesën dada uapampiduidi namenuequido tanshoda Nuquin Papan mibi bëdamboen ispec? Padenquo. Adquid mëtaniacimboecquid nec. ¿Mëtaniacimboecquid icoatiadquoda ique?

¹⁰ Aden Nuquin Papa tantienquo icquin mimbi icsamboen chiec. —Aid badiadën adenda. Aid inchëshën ushën adenda. Aid setambi adenuidtsëqui nanuna. Nuquin Papan cuidnushe —quequin mimbi icsamboen chiec. Mímibi chiacpadomboen naquid Nuquin Papan bëdamboen iste danquin mimbi icsamboen chiec.

¹¹ Mibi caic: —Adosh —quesho tantiash shubitiadquo iquebi. —¿Ëmbi chiondaidonda Esus tantienquo yampash? —quequin tantiac mibi unësquo iquec.

¹² Con utsibobimboecquido mibi neque. Tantia. Mibitedi chuinu. Isadaidpembo yec mibi: —Moisesën chiampiduidi nanu —quenquo yacimboec yanondabi. —Ëmbembi Moisesën chiampid naquin Nuquin Papa bëdamboen ismembí —quedenedi ënëdondabi. Nëbi Esusuidi tantiaquid nebi. Adembidi Esusuidi tantiata.

Ëbi adsho tantiash chieshenda. Tauamboen ëmbi Esus chuisho mimbi ëbi chieshënenquo iccondac.

¹³ Mibi yacno tauamboec choshon daicsabudtsëcsumbi mibi Esusën naid chuibanon-dambi.

¹⁴ Istiapicpambo yec daicsabudacshobi mimbi ëbi cacumenquo iccondac. Ëbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bëda choacimboecnuc mibi cuishonquiondac. Nuquin Icho Esuquidistu choacimboecnubidi mibi adondac.

¹⁵ —Min ëshë chicshun ëbi mene —ëmbi cac mimbi ëbi menetsenondac. Aden ëbi mimbi tantiaquiondac. Adonaidi ¿atotsi quiaish chieshcueno?

¹⁶ ¿Nëid abimbo chuiquindambi mibi chieshëmpe? Padenquo iquembí. ¿Aden chuisho mimbidabi chieshëmpe?

¹⁷ Ista. Esus chienquo icquidon ambi chiacpadomboen mibi nametiadquo iqueque. ¿Mibi tantiaquiquin bëdamboen namenuenda mibi chuipéc? Padenquo. Ëbi chieshëmenuembien ambi chiacpadomboen mibi nametiadquo icchitec. Mibi abibi tantiamenuen naic.

¹⁸ Ēmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbi ěmbi chiaidquio tantiabendonac. Ēběd icquimbi Esus bědamboen tantiaobodombi ěbi nidtsěcnubi mimbi badedi utsi tantiac.

¹⁹ Aden mimbi naid tantiac mibi uněsquoio iquec. Anin bacuě tantiacimboen mibi tanti-aquiemi. –Esusbimboec icpashun. Aid tantiec ambi chiacpadec bědamboec tabadpashun –quequin mibi tantiemi.

²⁰ Miběd icquin běisquoioquin mibi chuitsiambi. Miběd iquenquoio icquimbi mibi běisquoioquin chiacbimboen dada uaquin mibi naden chiemi. –ĵAtotsieshun Esus tantien-quoio yanoao? –caimbi.

Abadauaněn mado daěd chiaid

²¹ ĵ–Moisesěn chiacpadomboenuidi naquin Nuquin Papa bědamboen ismembi –quequido icpampic. Ichon chiacpasěn chiampid bědamboen tantieque? Tantia. Mibi chuinu.

²² Naden chuquin Moisesěn dada uapampic. Abadauaněn madombo daěd icpampic. Aton chidon yuaid chido bedshun tishmiaid abentsěc icnuc aton shanunquoio aton chidon tishaid abentsěcbidi icpampic.

²³ Abadauaněn chudac badedquio bacuě usundoshon chido yuaiděn aton mado tishpampic. Abadauaněn chidombo naido icsho: –Mimbi bacuě tishendac –quequin ambi chiacpadomboen Nuquin Papan naidopenquoio icmiac aton mado tishpampic.

²⁴⁻²⁵ Aidi Sada nepampic. Chido yuaid Acad nepampic. Aiděn tishaid yec aton mado yuabidi nepampic. Ichon chiacpadomboenuidi napampic. Yuaiděn madobimboecquido Moisesěn dada uapampiduidi namenuequido nec. Adquiobidi Edusaden yacnocquido iquec. Esus tantienquoio yec Moisesěn chiaiduidi tantiate bunquiec. Nidaid utsi Adabia caid yacno macuěsh dapa Sinai caiděnshun Nuquin Papan ambi chiaid Moises dada uamepampic. Aid macuěsh mases utsin Acad capec. Aden tantiaquin: –Chido yuaid Acad caiděn madobimboecquido Moisesěn dada uapampiduidi namenuequido nec –caombi.

²⁶ Edusaden caid utsi iquec. Nuquin Papa tabadacnombo Edusaden caoapec. Ambo Esus tantiaquido yec nuquibi tabadendac. Yuaiděn madobimboecquido Moisesěn dada uapampiduidi namenuequidoen padenquoio iquendac.

²⁷ Nuquin Papan ambi chiaid dada uamepampicpadec Esus tantiaquido dadpenquoio iquendac. Naden dada uamepampic.

“Tantia, chido. Naido icsho mibi chuinu.

Bacuě tishtiapimbo yequi bědambo icta.

Bacuě paěmbo icnuc tishacmaid yequi cuishonqueta.

Běně choquiděn bacuě dadpen tishquiděn bacuěn tsyuecquido daědpectsěc yanubi

Bacuě nibědquiděn min mases dadpenquioshě yanendac,”

quequin ambi chiaid Nuquin Papan dada uamepampic.

²⁸ Tantia, con utsibo. Mibi chuinu. ĵAda Nuquin Papan Abadauan chiampid tantie? –Min chido naido iccondaiděn tishaid Isac cuěmědquiděn tsyuecquid tantiaquido bědamboen isendambi –quequin Nuquin Papan Abadauan chuipampic. Abadauan chiacpadomboen aton Mado Esus tantiasho Nuquin Papan: –Con mado nec. Con champi nec –nuqui caindac.

²⁹ Ēnden Nuquin Papan naidopenquoio icmiampiděn mado chieshěnquin chido yuaiděn madon aton utsibi chieshěmpampic. Adembidi Nuquin Papan Mayaněn tantiamiaido Esus tantiaquido Moisesěn dada uapampiduidi namenuequidon chieshěnendac.

³⁰ Aden Abadauaněn mado běyucquiděn aton utsi chieshěnsho isun ĵatotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobědtabi cueme. Min mado utsi Sadan madon tsyuecquido dadpenquoio caidmequin bědamboen tabadmemb. Yuaiděn madoembi padenquoio iquendac,” quequin Nuquin Papan Abadauan chiaid dada uapampic Moisesěn.

³¹ Sada caiděn mado Isac caidpadquid yuapenquoio nuqui nec. Esus tantiasho Nuquin Papan: –Con mado mibi nec. Con champi mibi nec –nuqui caic. –Esusěnuidtsěqui Nuquin Papa ěbi bědamboen ismec –quequin Esusquoio tantiaquid yec: –Ēmbembi Moisesěn chiacctedi naquin Nuquin Papa bědamboen ismembi –quenquoio icnuna.

5

Esus tantiasho Nuquin Papan bědamboen iste chiaid

¹ Aden: –Esusěnuidtsěqui Nuquin Papa ěbi bědamboen ismec –mases camenuc abided cuidadec Esus uněspac caondashe. Aidquio tantiaata. Muaquiděn: –Moisesěn chiampic-paden nasho Nuquin Papan nuqui bědamboen istsiashe. Aiděn chiacpaden nanuna –quequin chuisho tantienda. Aden muaquin chiacpaden naic isadaidbo tsusedpan yuabim-boec mibi yantsiaque.

² Mimi isonaid Pabado nebique. Tanta. Mibitedi chuinu. Moisesën chiactedi naquid Nuquin Papan bédamboen iste danquin Esus tantienquo yanec muaquidën chiacpader shui dëbid dëteshuniadacsho isun Esusën Nuquin Papa mibi bédamboen ismetiapimbo ictsi-ashe. Adenda.

³ Aden Moisesën chiaid abentsëc natsëcshun aidën chiaid utsitedi nainquo icsho Nuquin Papan mibi bédamboen istiapimbo ictsi-ashe. Moisesën dada uapampiduidi namenuequido tanenda.

⁴ Aido Esus tantiesabo nec. Aden abi bédamboec ismianquid Esus tantienquo icsho Nuquin Papan aido bédamboen istiapimbo iquec.

⁵ Esus tantiaquidoen Nuquin Papan Mayanën tantiamiacpaden naden tantiec. —Esus tantiahouidi ambi chiaid niac-niacacmaidbimboecnuc bédamboen isquin Nuquin Papan: “Mibi bédambo iquec,” nuqui caindac —quequin nuqui tantiec.

⁶ Shui dëbid dëteshuniadën Esus tantiasho Nuquin Papan bédamboen isec. Adembidi shui dëbid dëtiaacmaidontsen Esus tantiasho Nuquin Papan bédamboen isoac. Aden Esus tantiabenashe: —Ambi chiacpadomboen Nuquin Papan matses tantiaquid ëbi icmendac —quequin aden utsibo tantiasho isun Nuquin Papan: —Adquid con Mado tantiaquid nec —caindac.

⁷ —Bednu —quequin nadancacbimboen aiduidtsëqui tantiaquin mimi Esusquo tantiondac. ¿Tsuntsin muaquin chiac Esus tantienquo mimi yanoape? ¿Atotsiequin abimbo chiaid niacpe?

⁸ ¿Nuquin Papan nacta Esus tantienquo yano? Padenquo. Ma aidëmbi mibi Esus tantiametiadquido yoc.

⁹ Muaquido tantienda. Nadquo aid iquec. Toshō bedquid abentsëcshun bedmebanac abitedi toshoquedec. Adembidi muaquid abentsëcshun chiac matses dadpeshun abimbo tantienquo yantsiashe. Muaid tantienda.

¹⁰ —Nuquin Icho Esusën tantiamiac ëmbi chiacpadomboen Cadasia yacnocquidon tantiatiashe —quequin mibi chiec nebi. Mibi muaquin chuiquid Nuquin Papan cuidendac.

¹¹ —“Con tsusedpan chiacpaden shui dëbid dëteshuniaduidtsëqui Nuquin Papan bédamboen istiashe,” queposh Pabado —quequin ¿tsundanquieni muauapac caosh? ¿Adendambi chuidio? Aden ëmbi chuisho adembidi chuiquidon chieshënenquo ictsenoshi. Esus chienquo icsho ëbi chieshënenquo ictsenoshi. Abi tantiaquid cuidmenquo icnuec abided cuidadec unësaid Esusuidi chuisho mabi chieshëmpaboc.

¹² Mibi muaquin chuiquido Moisesën dada uapampiduidi namenuequido caic: —Auëshquo cuemepashun —caimbi.

Esus tantiaquido bédamboec tabadte chiaid

¹³ —Ëbi cuidmenquo icnuec abided cuidadec unësaid Esusquo tantiashe Nuquin Papan ëbi bédamboen isec —camenuen Nuquin Papan mibi Esus tantiamiac. Adoac: —Esus tantiashe Nuquin Papan cuidtiapimbo iquebique. Ëbi icsate bunaid nanu —quenda. Nëbi Esus tantiaquin mibi icsate bunaid ënquin mëmunta. Esus tantiaquido yec tantiananquiec nashunanta.

¹⁴ Adomboen Nuquin Papan Moises naden chuimiapadomboen mimi natsiac. “Mibibi min dada datantiadacbimboen utsibotsen bédamboen tantiaquiota,” quequin Nuquin Papan ambi chiaid Moises dada uamepampic.

¹⁵ —Opa penantiadpambo yacimboc nëshnanash chushcananosh —quiosh mibi caic. Aden naic mibi icsacudededeque. Esus tantienquo mimi yanec. Bédamboec tabadta.

Nuquin Papan Mayanën bédamboen tabadmete

¹⁶ Nuquin Papan Mayanën tantiamiacpadomboen naic bédamboec tabadta. Aden mibi icsate bunaid mimi nainquo ictsiac.

¹⁷ Nuqui icsate bunaid nainqui Nuquin Papan Mayanën tantiamiacpader bédamboec tabadtiapimbo nuqui ictsiac. Nuquin Papan Mayanën tantiamiacpadomboen tantiaquin nuqui icsate bunaid ënquin nuqui mëmuntsiac.

¹⁸ Nuquin Papan Mayanën tantiamiacpadomboen tantiec: —Esusënuidtsëqui Nuquin Papa ëbi bédamboen ismec —queshun: —Moisesën chiactedimbo naquin ëmbimbo Nuquin Papa bédamboen ismembu —quequin tantienquo nuqui iquec.

¹⁹ Nadquo icsateuidi bunquid matses iqueque. Tanta. Chuinu. Nëdic aton chidopenquo chudquido. Nëdic aton bënëpenquo chudmequido. Nëdic dada daëd chichudnanquido. Nëdic opabimboec chudnante bunquin matses ismequin adoquido. Nëdic tsienbëdta shui chuibudquin icsamete bunquido.

²⁰ Nëdic Nuquin Papan chiaid niac-niacquin ambi matsesbimboecnuc nacenaidi papa caquido. Nëdic nënëchoquido. Nëdic dauë icsa bedash icsa uanquido. Nëdic chieshëmënuquido. Nëdic chieshëmënech chushcananquido. Nëdic cudasquido. Nëdic

nëishëmënquido. Nëidic ambi naiduidi naquido. Nëidic abitedi cuësh-cuëshëdmianquido. Nëidic: —Utsin chiaid tantiatipimbo iquebi. Embentsëqui bédamboen chiemi —quequido.

²¹ Nëidic utsin na natiambo bunec chieshëmënquido. Nëidic tantiadenuen paëmbo icquid acquido. Inchëshën ushenquio icquin adoquido. Adquidtedishun icsamboen naic. Adec abi icsaid êntiapimbo yec unësash Nuquin Papa yacno tabadtiaipimbo iquec. Aden mibi chuibanondambi ênden.

²² Padnuen Nuquin Papan Mayanën namiaid yec nadquiec tabadquid. Nuquin Pabêdta matses tantiaquiec tabadquid. Esus tantiec cuishonquec tabadquid. —Nuquin Papan êbi bédamboen isec —quec bédambo yec dacuêdenquio yec tabadquid. Utsibon chieshënaqui chieshëmënenquio yec tabadquid. Nëishëmënenquio yec tabadquid. Bédamboen isquin utsibo nashunec tabadquid. Muainquio yec tabadquid Nuquin Papan namiaid.

²³ —Con naidi naimbi. Êbiuidtsëqui bédambo iquec —quenquio icquin utsibo bédamboen tantiec tabadquid. Abi icsate bunaid ênquin mêmunec tabadquid. Adquio yec Nuquin Papan Mayanën namiaido Esus tantiaquido bédamboec tabadtsiash. ¿Adec bédamboec tabadsho isunda: —Adec tabadenda —quequin Nuquin Papan Moises dada uamepampic? Padenquio. —Icsamboec tabadenda —quequin icsamboec tabadquid chuipampic. Nuquin Papan Mayanën tantiamiacpadeç tabadquin aden chuipampid nuqui niaquenquio iquec.

²⁴ Adoenquio icquin cuesten dectanac abided cuidadec unësaid Esus tantiaquin nuqui icsate bunaid ênquin nuqui mêmuntsiac.

²⁵ Aden icsamboen nainquio yec bédambo icnuna. Nuquin Papan Mayanën Esus tantiamiaid icquin aidën tantiamiacpadomboen nanuna.

²⁶ —Êbiuidtsëqui bédambo iquec —quenda. Adenquio yec nuqui chuiquid dëniacte bunenquio yec bédamboec tabadnuna. —Êbi bunacpaden êbi namianenquien icchitec. Utsin namechitec —quec chieshëmëneç tabadenda. Nëishnanenquio yec bédamboec tabadnuna.

6

Esus tantiaquido bédamboec isnante chiaid

¹ ¿Nuquin Papan Mayanën tantiamiacpadomboen bédamboen tantiaquidta icpec? Adquidên abêdtan Esus tantiaquidên icsamboen nasho isun: —Padi. Esus tantiaquid adesambo neque. Bédamboec tabadta —caquid yendac. —Nëishëc êbitsen icsamane —qeshun nëishenquio icquin aden chuiquid yendac. Abibi datantiadec: —Icsaquid nebi. Esus bédamboen tantienquio yec adecbidi icsatsiabi —quequin tantiec: —Bédamboec tabadta —quequid yendac.

² Adec bédamboec isnaneç: —Bédamboec tabadnuna —quec chuinanquiota. Adecbidi nashunanquiota. Aden naquin Nuquin Icho Esuquidistun chiacpadomboen mimi natsiac.

³ Utsien: —Utsibêd onquetiapimbo iquebi. Êbiuidtsëqui bédambo iquebi —quec abibi muauadquid icsambo iquec.

⁴ Adenquio yec mibibi datantiadta. —¿Nuquin Papan chiacpadeçtabi bédamboec tabadpe? —quec mibibi datantiadta. Adashic: —Ai, Nuquin Papan chiacpadeç tabadebi —quiash adecbidi bédambo icta. —Utsitedi icsambo icnubi êbiuidtsëqui bédambo iquebi —quenda.

⁵ ¿Mimbi utsibon naid chuibanshoda Nuquin Papan: —Mibi bédambo iquec —capatsiash? Padenquio. Mimbi bédamboen naid isun: —Mibi bédambo iquec —catsiash.

⁶ Esus tantiaquidon nadoquid yendac. Nuquin Papan chiaid abi chuibanquid nashunquid yendac.

⁷ Piacbo sequidbimboec matses iquec. Tantienquio icquidên icbompin uestsaidi siac canienquio ictsiash. Padnuen tantiaquidên êshê bédaidquio siac bédamboec canitsiash. Tantienquio icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unësash Nuquin Papa yacno nidtiapimbo iquec. Padnuen Esus tantiaquid ambi chiacpadomboen naic unësash Nuquin Papa yacno nidendac. Êbi adsho tantiaç: —Icsaido Nuquin Papan cuidenquio ictsiash —quec muaic tabadenda. Ambi chiacpadomboen mibi cuidendac.

⁸ Ambi chiaid niac-niaquec abi icsate bunaiduidi naquid cuidendac. Nuquin Papan Mayanën tantiamiacpadomboen naquidien bédamboec tabadec unësash Nuquin Papa yacno tabadendac.

⁹ Êmbi aden chuisho tantiaç bédamboec tabadta. Bédamboec tabadec chieshtoenquio icsho isun ambi tantiacpadên Nuquin Papan abêdi nuqui tabadmendac.

¹⁰ Adec bédamboec tabadquin utsibo bédamboen isquin nashununa. Aden utsibo bédiaçtsëc tantiec Esus tantiaquido yec tantiananquiec nashunanquionona. —Shubu abentsëquên tabadquidobimboec Esus tantiaquido iquec —qeshun adonona.

Pabadon ênquimbi chiaid

¹¹ Is. Nua-nua icnuc dada uaquin êmbimbo ênquimbi dada uanu.

¹² Muaquin chuiquidon mibi con tsusedpan chiacpadomboenuidi nametiadquoio iqueque. Aidon chuisho tantienda. Con matses isadaidbo: –Mibi bédambo iquec –camenuen mibi adometiadquoio iqueque. –Esusuidi chuisho con matsesên chieshênquin cuidnushe. Moisesên chiacpadomboen namenu –quequin mibi shui dēbid dēteshunemetiadquoio icchitec. Aido muasho tantienda.

¹³ Aden mibi: –Adota –caquidombi Moisesên chiactedi nainquien icchitec. Adquid yec: –Is. Bédambo iquebique. Êmbi chiacpadomboen nēidon naosh –quenuembien mibi shui dēbid dēteshunemetiadquoio icchitec. Aidon chiacpadomboen nainda.

¹⁴ Êbien adtiapimbo iquec. Esus tantiesabimboec: –Êbibi bédambo iquebi –quetiapimbo iquebi. Esusuidtsēqui bédambo iquec. Abi tantiaquid cuidmenquoio icnuec abided cuidadec unēspac caondash cuesten dectanac. –Aidquoio tantiec bédambo iquebi –caimbi. Aden Esus tantiec: –Êmbimbo Moisesên chiactedi naquin Nuquin Papa bédamboen ismembí –quec ênêdondabi. Adecbidi Esus tantiec êbi bunaid ênash icsate bunenquoio iquebi.

¹⁵ –Moisesên chiactedi naquiduidi Nuquin Papan bédamboen istisash –quetiapimbo iquebi. Shui dēbid dēteshunaidēmbi Esus tantienquoio icsho Nuquin Papan cuidtsiash. Adembidi shui dēbid dētiacmaidēn Esus tantienquoio icshobidi cuidtsiash. Nuquin Papan Mayanên chuca uaidien Esus tantiaquid Nuquin Papan bédamboen isquin bédamboen tabadmec.

¹⁶ Êmbi aden chuisho tantiash: –Ai, abimbo mimbi caique. Adonona –quesho: –Aido Nuquin Papan bédamboen isquin bédambo icmepashun –caimbi. Adquido Nuquin Papan: –Con matsesquio nec –caindac.

¹⁷ –Abimbo chienquien icchitec –êbi cainda. Esusên chiaidquoio chiombi. Aidquoio tantiaquin ambi chiacpadomboen nabanta. Êmbi Esusên chiacpadomboen nasho isun chieshênquin cuesaniondashi. Cuesondaïd bish abi iquec.

¹⁸ Tantiã, con utsibo. Mibi Nuquin Papa chianembi naden. –Mimbi nabocpadomboen con Icho Esuquidistubēdtan Cadasia yacnocquido bédamboen ista, Papa –quequin Nuquin Papa chianembi. Padi. Aïdtedi chuiquin dada uaombi.

EPESO YACNOCQUIDON ISTE

¹ Pabado nebi. Nuquin Papa bunacpadomboen Esuquidistun, Èbi chuibeneta, caid nebi. Adquidquo icquin mibitedi Nuquin Papan bédambocquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onquecuedeta.

² Aden Nuquin Papan bédambocquid icmenu caidombo icquin ma Nuquin Papan Nuquin Icho Esuquidistubédtan ènenquiocquin èbi bédamboen isec, quequin mibitedishun tantiapashun. Ademibidi, Nuquin Papan bédambo icmenu caido yec abéd iquebi, quequin tantiapashun mibitedishun.

Nuquin Papan abéd abuc bédamboec tabadacpadquiocnoc icmiaid

³ Edoen, Nuquin Papa, Nuquin Icho Esuquidistun Papa bédambocquid nec. Esuquidistu adquidquibidi neoaic. Aid tantiaquid icsho abéd abuc bédamboec tabadacpadquidquo nuquitedi icmiac. Adoaid yec, Mibi bédambocquid nec, Papa, quequin chiec nuquitedi onquedenec.

⁴ Nidaid abubédta uabicquin aidènquiocquidtedi uabicquin, Nèidtedquo Esuquidistu tantiaquido icsho èmbi cuèmbanaido iquendac, quequin Nuquin Papan tantiapampic. Ambi tantiapicpaden ma nuqui icsaisa icmepanuna. Aden nuqui tantiaquin

⁵ abi bunacpadomboen Nuquin Papan, Esuquidistu tantiaquido con bacuèbo icmendambi, quiampicpadomboen nèbi adobanec.

⁶ Esuquidistu tantiaquid nuqui icsho abéd icquid nuqui icmenuen Nuquin Papan abi yapadquidquo icmebanec. Adoac, Bédambocquid mibi nec, Papa, quequin Nuquin Papa nuqui chuidenec.

⁷ Matsestedi icsaid bedshunacsho Nuquin Papa cudasaidquo Esuquidistu icsambocquidbimboecnuc cuesten dectanquin unès uapanédash. Adosho isash, Nèbi Esuquidistu tantiaquid èmbi bédamboen isaidquo nec. Mibi cuidenquo yec mibi icsaid bèpiscudobi, quec Nuquin Papa.

⁸ Naden nanuna, quequin ambi tantiapicpadomboen aton bacuè icmebanac abéd icquido nuqui nec.

⁹ Abi bunacpadomboen, Icsaquid cuidte bedshunash unèsquid con Mado Esuquidistu iquendac, quequin ambi matses tantiamenquo icpampid nèbi ambi cuèmbanaido Nuquin Papan tantiamebanec.

¹⁰ Adoaid iquec con mado abun icquido nidaid yacnocquidobéd chuiquid abentsèqui iquendac, quequin Nuquin Papan tantiapicpadquibidi adquidquo icmenu caidquo Esuquidistu iquendac.

¹¹ Esuquidistu tantiaquid icsho isun ambi tantiapicpadomboen, Con bacuè icmiaido nec, quequin Nuquin Papan cuèmbanaido

¹² abia tantiaquido nuqui bédamboec tabadsho isash, Nuquin Papa bédambo iquec, quequin chiec ma utsibo cuèdèmpanuna.

¹³ Mibi icsaid bedshunash abided ciudadec Esuquidistu unèsapanédash, quequin chuibanac abi tantiaquido mibitedi yansho isun, Esuquidistun na nec, quequin aton Mayan mibi meniaid abi iquec.

¹⁴ Aidèmbi mibi bédambo icmiac Nuquin Papabéd tabadendac. Mibitedi bédamboec tabadsho isash Nuquin Papa bédambo iquec, quequin chiec ma utsibo cuèdèmpanuna.

Nuquin Papa chiec onquianiaid

¹⁵ ¿Bédamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Ademibidi, Epeso yacnocquido Esuquidistu tantiaquid yanash abipadquid utsibo tantiec abéd icte bunanec iccuededec, quequin chuisho tantiapombi.

¹⁶ Aden tantiaquid mibitedi bèpiscudenquiocquin badiadquidèn-badiadquidènquien naden Nuquin Papa chian-chianembi.

¹⁷ Esuquidistun Papa, icsaisambo, tantiaquidquo mibi cadoque. Mibi bédamboen tantiaquid yapadquiocnoc min bacuèbo Epeso yacnocquido min mayan icmeban, Papa. Adquido min Mayanèn icmiac mibi tantiadonequidombo ma icpanuna.

¹⁸ Adecbidi, Abuc èbèdi mibi iquendac, quequin mimbi chiacpaden tantiamequin pausunac mibéd icnequin cainquidombo Epeso yacnocquido ma icpanuna, Papa. Aidèn tantiamiac, Mibi yacno Esuquidistu tantiaquid utsibobéd bédamboec tabadendabi, quequin Epeso yacnocquidon ma tantiapanuna, Papa.

¹⁹ Aden tantiamiac Nuquin Papan nadatiambocquin nabanquin Esus unēsacsho uincuemēdacpaden ēbi uincuemendac. Adembidi nadatiambocquin nabanquin Esus tantiaquid ēbi icmiac. Adembidi ēbi bēdambocquid icmebanec, quequin ma Epeso yacnocquidon tantiaquiopanuna, Papa.

²⁰ Esuquidistu unēs uacsho uincuemeshun mibi yacno aidi indoshon min dayunquio mimbi tsadumpānēdac, quequin tantiec Nuquin Papan nadatiambocquin naidquio nec, quequin adomboembidi ēbi indoapēc, quequin tantiacpadomboen ma Epeso yacnocquidon tantiaipanuna, Papa.

²¹ Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibēdec, quequin Esuquidistu min dayunquio tsadunquin utsibo mimbi ismepānēdac, Adquid nebi, chuiquid utsi quetiapimboēnoc. Nuquin Papan nadatiambocquin nac ēnenquiocquin abitedi chuiquidquio Esuquidistu iquendac, quequin Epeso yacnocquidon ma tantiaquiopanuna.

²² Abitedishun con icbo caidquio Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquio nec.

²³ Ambi ēndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsēcquiobi Esuquidistu icquin abēd icquido nua pausunaido yec abi yacpadquio ictequid yec abentsēc yacbimboec abēdi nuqui tabaden-dac.

2

Nuquin Papan Esuquidistubēd icmiaido

¹ Mibi icsaquid yec Nuquin Papabēd ictiapimbo iccondac. Adboedi nēbi aidēmbi ēnenquiocquin abēd icquido mibitedi icmiac.

² Ēnden Nuquin Papa chieshēnquin mimbi tantiacpadomboen nabanondac. Adquid icsho Nuquin Papa chieshēnquid dapan Satanasēn yuaido mibi iccondac. Aidēn Nuquin Papan chiaid niacacpadomboen mibitedishun niacbededpondac.

³ Adquiduidquio yec nuqui tantiacpādec icsadenec nuqui tabadpadenec. Adec tabadquin Nuquin Papan chiaid niactenepondac nuqui. Aden niacsho isun adquid utsibobēdta Nuquin Papan cuidnu caido nuquitedi icpondac.

⁴ Adec cuidnu queboedēmbi nuqui tantiec unēsquiocquin Nuquin Papan comapenen nuquitedi tantiamēpondash.

⁵ Ambi cuidnu caido icsaquido yec abēd ictiapimbo nuqui tabadpondac. Adec tabadsho Esuquidistu tantiaquido nuqui icmebanquin abēd icquido Nuquin Papan nuquitedi icmiac.

⁶ Esuquidistu nuqui icsaid bedshunacsho abided cuidquin unēs uapanēdash. Unēsacsho isun uincuemeshun abi yacno Nuquin Papan indopanēdash. Adshun abi tantiaquidtedi abuc Esuquidistubēdta ambi indoacbimboecquido icsho Nuquin Papan nuqui bēdamboen isec. Adecbidi abuc Esuquidistubēd icquid nendabi, quequin tantiec nuqui tabadec.

⁷ Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubēd icquido nuqui icmec. Ma adquid icsho isash utsibo, Nuquin Papan naid nec, ma quepanuna.

⁸ Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, Ēmbibi tantiembi, quetiapimbo nuqui icnubi, Mibi tantiamimbique. Ēbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abēd icquido nuqui nec.

⁹ Icsaquido icquin bēdamboen naic nuqui icsaid cuidadiapimbo nuqui iquec. Bēdamboen naic cuidadpebi, quiash abi icsaquid yequi, Bēdamboquid nebi, quec tabadsho isun utsibon icsamboen tantianushe qeshun Nuquin Papan icsaisa aton Madoded cuidpanēdash.

¹⁰ Nuquin Papan uaido nuqui nec. Aidēmbi Esuquidistu tantiaquido nuqui icmebanec ma ambi tantiampicpadomboen utsibotsen nuqui tantiaquin ma nashumpanueshun.

Esuquidistubēd abentsēc yacbimboecquido

¹¹ Nuquin Papan, Cuidnu, quenquiocquin comapenen tantiamiaidquio mibitedi icquin mibi ēnden tabadaid tantiata. Shui dēbid dētemesa isadaidpēmo nec, quequin isadaidbon shui dēbid dētemequidon mibi cuēnondash. Nuquin Papan matsesquio nebi, quequin shui dēbid dētemequidquio isadaidbo nec.

¹² Adquidquio isadaidbo icnuc, Nuquin Papan chomiaid choec, quequin tantiesa mibitedi icpondac. Adquido yec Nuquin Papan matses nebi, isadaidbo quiacpādec adtiapimbo mibitedi iccondac. Adecbidi, Ēbi yacno yuedanquid iquendac, quequin Nuquin Papan chiaid tantiesa mibitedi icpondac. Adecbidi, Abēdi ēndenquio yec tabadebi, quequin

chuitiapimbo mibitedi icoapondac. Adecbidi, Abia yampid Nuquin Papambo iquec, quequin tantiesa mibitedi icpondac.

¹³ Adec aid tantiesa yec icsaquid yec, Nuquin Papa yacno puduednu, quetiapimbochoedi, Matses icsaid bedshunash abided cuidadec Esuquidistu unēsspanēdash, quequin tantiaquid icsho aidēnquo abi yacno yuedendac. Nēbi aid tantiaquid yec abi tantiaquid utsibobēd abēdi tabadac bimboecsho Nuquin Papan nuqui bēdamboen isec.

¹⁴ Isadaidpembo isash isadaidbo, Ēbēd icquidpenquo nec, quequin tantiec datamēncuenepondash. Adecbidi isadaidbo isash adquiecbidi isadaidpembo datamēncuenepondash. Adquido icboedi ēbi icsaid bedshunash Esuquidistu unēsspanēdash, quequin isadaidbo utsin-utsinquier tantiec. Adembidi isadaidpembo utsin-utsinquier aid tantiec. Adec aid tantiaquid yanash datamēncuenequo yec matses abentsēc yac bimboecquido yanac.

¹⁵ Esuquidistu matsesash nidaidēn tabadquin isadaidbo icquin isadaidbon, Naden nata, quequin chiacpadomboen utsitedishun natiapimboconobi Esuquidistun uesquin nabampanēdash icsainquiocon. Adec tabadquin naimbudsho icsaquid bimboecnuc unēs uapanēdash. Aden unēsmesho isec Nuquin Papa, Padi. Chēn, quenquo icpanēdash. Ēbi yacno isadaidbo isadaidpembobēdtabi con madon yuedendac, quiash chēn quenquo icpanēdash. Datamēncueneboedi aido Esuquidistu tantiaquid yanash datamēnenquo yanac.

¹⁶ Naden nata, quequin chiaidtedi nuqui natiapimboconoc nuqui icsaid bedshunash Esuquidistu unēsspanēdash, quequin tantiaquido isadaidbobēdi isadaidpembo yanac. Ambi tantiaid Esuquidistu yanash datamēncueneboedi adec datamēnu quetiapimbo yanec Esuquidistun shubun icquido yanoaic.

¹⁷ Matsestedi bēdamboen iste Nuquin Papa bunec quequin ambi chuibeniacpadec abided matses icsaid bedshunash unēsquin isadaidbo isadaidpembobēdta Nuquin Papan bēdamboen isaïdo icmepanēdash.

¹⁸ Adoac nēid isadaidbo nec. Nēidic isadaidpembo nec, quenquiocon, Esuquidistu tantiaquid nec, quequin Nuquin Papan abi tantiamenuquid aton Mayan meniac. Aden meniac aidēn tantiamiac, Mīmibi ēbi tantiec, quec Nuquin Papa chiec Esuquidistu tantiaquidombo onquedenec.

¹⁹ Aden chiec onquec ambi yuedtiapimbo icboedi nēbi Esuquidistu tantiaquido yanash Nuquin Papan shubun ēnden icnēdaïdobēd tabadtequid mibitedi iquec.

²⁰ Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquo isadeque. Chuinu. Tanta. Esuquidistu abia yampid abi yacno yuedanquidquo yec abia nitsinaid cueste nidquid bimboecquid nec. Nuquin Papan chiaïd chuïbampampidobēd Esuquidistun ēbi chuïbeneta caïdo shubu nitsinaïdbimboecquid neoaic.

²¹ Aidted abia icquid icnuc isadaidbobēd isadaidpembo Esuquidistu tantiaquid dadpen yansho Icbon tabēcshun tanebanaid bimboecquido neoaic. Abi tabadte Icbopadquid icsaisa yampec.

²² Mibi Epeso yacnocquido Esuquidistu tantiaquid utsibobēd Nuquin Papan Mayan meniaïd yec Nuquin Papa tabadtebidi mibi nendac.

3

Isadaidpembo Esuquidistu chuïbenequid Pabado

¹ Isadaidpembobēdi ma Nuquin Papa tabadte icnu quequin Esuquidistu chuïbenesho quēnēn nauedaïd icquin aidēn chiacpadomboen mibi chuïbanquidquo nebi.

² Isadaidpembo yacno nidshun Esuquidistu chuïbeneta Nuquin Papan cac nebi. Esuquidistu chuïbenequid Pabado nec, quequin mīmibi tantiec.

³ Ēbi yacno yuedanquid Esuquidistu iquec, quequin Nuquin Papan tantiamiacpaden ēnden dada uaquin mibi chiondami.

⁴ Ēmbi dada uaondaïd bēdamboen isec onquequin Nuquin Papan ēbia Esuquidistu tantiamiacpaden mīmibi tantiapec.

⁵ Ēndenquo Nuquin Papan Esuquidistu nidmembi, quequin chienquicpampidēmbi nēbi ambi, Esuquidistu matses tantiameta, caïd aton Mayan nec. Adoac Nuquin Papan, Esuquidistu chuïbeneta, caïdtedi ambi naden nanuna, quequin chienquicpampidēmbi aton Mayanēn tantiamiac.

⁶ Ambi nēbi tantiamiaïd nad iqueque. Tanta. Chuinu. Isadaidpembo Esuquidistu tantiaquido isadaidbo Esuquidistu tantiaquidobēd Nuquin Papa yacno ēnēdenquo yec tabadtequido nendac.

⁷ Nuquin Papan, Cuidnu, quenquiocquin nadatiambocquin ëbi ismiaid yec ambi Esuquidistu chuibeneta caid ambi namiaid icsho ambi nadatiambocquin nabamiaidquio nebi.

⁸ Esuquidistu tantiaabicquid utsi bêdiactsêc icsaquid icnubi comapenec icsaquidquio icsho Nuquin Papan Esuquidistu tantiaquid icmeshun Esus bêdambo yaidbêdtabi abêd tabadte bêdaidquio tantiamequiopardashi. Adembidi ambi, Esuquidistu chuibeneta, caidquio nebi. Adquid icquimbi Esuquidistun matses bêdamboen tabadmenu, quequin tantiaid dadpen icnuc aitedi uesquin chuitiapimbo iquebi. Aitedi matsesên bêdamboen tantiatiapimbo icoapec.

⁹ Êbêdtambi abitedi uampidquio Esuquidistu aid tantiaquido ëbi yacno yuedquid iquen-dac, quequin Nuquin Papan tantiamenquiochoedi nêbi matses tantiamenuen Esuquidistu chuibeneta caidquio nebi.

¹⁰ Aden êbipadquidon Esuquidistu chuibeniatic icsaquid icboedi Esuquidistu tantiaquid dadpen yanac. Adsho isun aitedi Nuquin Papan Esuquidistubêd abentsêc yacimbocquid abipadquid ambi tantiampicpadomboen icmebanec. Aden icmebancho isun abi yacno tabadquin namequidon tantienquiochoedêmbi nêbi tantien-dac. Nuquin Papan, Yuecshun naden nanuna, quequin ambi bêdamboen tantiampicpadomboen nabanac nêbi abêd icquid dadpen iquec, quequin Nuquin Papan abi yacnoshon uaidon tantiec.

¹¹ Matses bêdambo icmetequid Esuquidistu iquendac, quequin ambi tantiampicpadom-boen Nuquin Papan Esuquidistu Nuquin Icho icmepanêdash.

¹² Aton mado Esuquidistu ëbi icsaid bedshunash unêsash uincuenash Nuquin Papan dayunquio iquec, quequin tantiec dacuêdenquio yec Nuquin Papa chiec nuqui onquec.

¹³ Adecbidi, Esuquidistu chuibenesho bedshun Pabado quênên nauedac, quequin tantiec chieshenquiocquin Esuquidistu tantiaata, Epeso yacnocquido mibi caimbi. Êmbi chuibanac Esuquidistu tantiaquid yansho Nuquin Papan abêdi tabadmenuequin Nuquin Papan ambi, Bêdamboquid icmenu, caid mibitedi neque. Chieshenda. Adembidi Pabado chiac êbipadquid isadaidpembo utsi-utsiec dadpen Esuquidistu tantiaquid yampec, quequin tantiec tabadta.

Epeso yacnocquido tantiec Nuquin Papa chiec Pabado onquiaid

¹⁴⁻¹⁵ Nuquin Papan isadaidpembo Esuquidistu chuibeneta cac, chuibenesho quênên nauedaid icquin êmbi chiac Esuquidistu tantiaquid isadaidbobêd isadaidpembo Nuquin Papan matses yanash aton shubun icquido nec. Nuquin Papan cuêmbanaido nec, quequin tantiec danêshên sebudash aid naden chiec onquebi.

¹⁶ Mibi icsaisa icquin mimbi tantiapaden Epeso yacnocquido nua pausun, Papa, ma natiamantequid icnuc Esuquidistu tantiesa yanenuciopanuna.

¹⁷ Aden pausunac ma aido Esuquidistu tantiadonequidombo icpanuna. Aido mimbi tantiamiac ênêdenquio yec utsibêd tantiananec tabadquid ma Epeso yacnocquido icpanuna.

¹⁸ Aden pausunac, Êbi utsibobêdta comapenen tantiaquid Esuquidistu nec. Ambi bÿyuc matses uaid tantiaquinc, aidên tsyuecquid ênden icpampido tantiaquinc, nêbi tsyuec tishaido tantiaquinc, tishabicquido tantiaquinc caquin aitedi icsaid bedshunach-sho Nuquin Papan cuidpanêdash, quequin ma Epeso yacnocquidon tantiapapanuna, Papa. Adembidi abuc bêdamboeshê yacno icboedêmbi matses icsaid bedshunachsho Nuquin Papan cuidpanêdash, quequin ma Epeso yacnocquidon tantiaquiopanuna, Papa.

¹⁹ Aden tantiaquidquio yec Esuquidistu unêsêdash, quequin tantiec papuduedash Esuquidistun matses tantiapadquidquio Nuquin Papan ma mibitedi icmebanpanuna.

²⁰ Nadquid Nuquin Papan ëbi icmetsiash, quequin nuqui tantiatiapimboconobi nadatiambocquin nabanquin ambi tantiapadomboen abi yacpadquidquio nuqui icmebanen-dac.

²¹ Adoac ma abi tantiaquidon ênenquiocquin Nuquin Papan Esuquidistubêdtan naid chuibampanuna. Ma aidon tsyuecquidontsen adembidi chuiopanuna. Ma nuquin tsyuecquidon tsyuecquidontsen adembidi chuiopanuna. Ambi uaid utsitedi naimêdec, quenubi ma adomboembidi Nuquin Papan Esuquidistubêdtan naid matsesên chuibanoapanuna. Ai, ma ênenquiocquin adopanuna.

4

Abentsêc yacimbocquido Esuquidistu tantiaquido

¹ Nuquin Papan isadaidpembo Esuquidistu chuibeneta cac chuibenesho bedshun quênên nauedaid icquin naden mibi chiembique. Tantia. Esuquidistu tantiaquido aton shubun icquido yec icbo bêdamboec tabadacpadquiec tabadteneta.

² Utsi icsambocsho isun, Icsaisa Nuquin Papapadquid yanabicquid nebi, quequin tantiaquid abêd onquequin abi icsaid êmenuequin chuiban.

³ Nuquin Papan Mayanën abi utsibëd bëdamboec tabadaid tantiamiacpadquiec Esuquidistu tantiaquid utsibobëd bëdamboec tabadteneta.

⁴ Esuquidistu tantiaquidtedi abentsëc yac bimboecquid nec. Abentsëcquiobi mibitedi meniaid aton Mayan iquec. Adquiecbidi Nuquin Papa yacno nidash aidbëd tabadec abipadquid yec icsaisa iquendabi, quequin abuc indotequid mimbi caintequid abentsëcquiobi iquec.

⁵ Abentsëcquiobi mibitedishun con Icbo caid iquec. Abentsëcquiobi mibitedishun tantiaidquio Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsëc yac bimboecquid nec.

⁶ Abia yampid Nuquin Papa Esuquidistun Papambo abentsëcquiobi iquec. Abitedi uaquidquio yec abitedi Chuiquid Dapambo nec. Aidbidi Esuquidistu tantiaquido bëdambo icmequid neoaic. Aidëmbi Esuquidistu tantiaquidobëd tabadnuequin abipadquid meniac nuquibëd aton Mayan iquendac.

⁷ Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac.

⁸ Èndenquio chiampicpadembi nëbi pausumbanec. Naden ènden chiampid neque. Tantia. Chuinu.

“Nuquin Papan abucquio indoac, Èbi tantiaquidtedi ëbëdi tabadendac, quequin Esuquidistun bedbanshun buanac bimboecquido aido nec.

Nadquidquio iquendac, quequin ambi tantiacpadomboen pausumbanac,”
quequin ènden chiampid nec.

⁹ “Abucquio indoac,” quequin ¿mitsipadomboen tantiampampiba? mibi quepec. Aidquio chuinu. Tantia. Esuquidistu abia yampid yec abucquio tabadboedi, Matses icsaid bedshunash ëbided cuidadnu, quianacsho nidaidënsnun chidon tishpanëdash.

¹⁰ Aid nidaidënsnun tishacsho unës uacsho uincumequin Nuquin Papan aidquio abuc abi yacno indoshon abitedi chuiquidquio Esuquidistu icmepanëdash. Adquid icmiac ma ëbi tantiaquidobëd icpaneshun abipadquidquio aton Mayan aido menebanec.

¹¹ Aden aid menebanac aidënquio Esuquidistu tantiaquido utsi-utsien nadquid icmabanec: Esuquidistu chuibenequid utsi-utsien icmabanquimbi, Nuquin Papan naden nanuna, quequin chiaid chuibanquid utsi-utsien icmabanosaic. Adquid icmabanquin utsi-utsien Esuquidistu chuibenequidon, Esuquidistu chuibanta, caidbidi aido icmabanquin utsi-utsien abëd iccuededquido isbanquin chuiquin tantiamequid icmabanosaic.

¹² Bëdamboec tabadtenequido ëbi tantiaquidtedi icmeta, cac aidën tantiacpadomboen adquido icmabanac

¹³ ma shubu dapan icquid dadpen yanec abentsëc yac bimboec abi tantiaidonequido icpanuna. Aden Nuquin Papan mado tantiaidonec ambi uesquin pausunaidquio yec abipadquidquio iquec icsaisa iquendac.

¹⁴ Ambi pausunaidquio icquin abimbo chiac bimboen utsibon chuisho tantiabenebicquidën badedquio tantiacpaden tantienquio nuqui iquendac.

¹⁵ Tantiananec abimbo chuinanquido Esuquidistu tantiaidonequido icmiac chuiquid Esuquidistupadquid yanash abëdi abentsëc yac bimboecquid nuqui yanendac.

¹⁶ Èbi chuiquidquio Esuquidistu nec, quequin ambi chiacpadomboen nabanquidquio abi tantiaquidtedi yec abëdi abentsëc yac bimboecquid nuqui iquec. Esuquidistun pausunacpadomboen abentsëcshun-abentsëcshunquien nabanequi tantiananquiec abi tantiaquidtedi Esuquidistupadquidquio abëdi abentsëc yac bimboecquid yanendac.

Esuquidistun nua pausunacpadquiec tabadteniaid

¹⁷ Esuquidistubëd abentsëc yac bimboecquid abi tantiaquidtedi iquendac, quiash, aidpadquid icnu, quec ènden icsamboec tabadnëdacadpadquiec tabadenda caimbi mibi. Esuquidistun ëbi chuibeneta caidquio icquin dada uaquin mibitedi aden chiembi. Esuquidistun tantiesan ambibi tantiacpadomboenuidi tantiec. Adecbidi ambibi tantiacpadomboen nabanec.

¹⁸ Pashuac bimboen tantienquio iquec. Nuquin Papabëd tabadte iquec, utsibo qesho tantiesaya yec, Tantiatiapibi, quepec aido.

¹⁹ Icsaquid nebi, quequin badedquio chienquio aidon iquec. Adquid icsamianquidën yuaid yec. Icsanu, quiacpadec tabadec. Adec icsasho utsin istemaid nec.

²⁰ Adpenquio Esuquidistun tantiamequin pausunaid iquec.

²¹ Esuquidistu chuibanasho Epeso yacnocquidon tantiaposh, quequin chuisho tantiaiondambi. Mibi, Aid tantiaquid nebi, qesho tantianshun Esuquidistu chuibenequidon, Abëd icquid yec abipadquid yanebi quec adquiecbidi tabadteneta, quequin mibi chuipondash.

²² Adoac mimbi tantianëdacpadec tabadoaında. Mibi ënden icsamboec tabadacpadquiequi mibi icsaded-icsadedondac. Icsaquid yequi, Bëdambocquid nebi, quec mibi muadenepondac.

²³ Mibi icsate bunaid ënta.

²⁴ Adsho isun ma Esuquidistun tantiacpadomboen tantiapanu queshun Nuquin Papan Mayanën mibi nua pausunendac. Adoac adomboembidi mimbi tantiapiec. Adecbidi aid bunacpadquiec bunoapec. Adoaid yec mibi bëdambocquid icnuec icsaisa yanec mibi bëdamboec tabadtenendac.

²⁵ Adquid icnuec Esuquidistun shubun icquido nebi, quec muainquo yec Esuquidistu tantiaquid utsibobëd abimbo chuinanquidombo icta.

²⁶ Nëishhec icsaında. Nëishash abi ushëmbi bëdanta.

²⁷ Satanasën yuanushe quiash badedquio bëdanta.

²⁸ Ampequid ichoedi Esuquidistu tantiaquid yanshun ampanda. Adquid ichoedi chonoadquin mitsana bedshun utsin na nibëdsho isun menequid icta.

²⁹ Icsaquid onquiabcimboec onquenda. Utsi tantiaquin bëdambocquid icmenuequin chiec onqueta ma Nuquin Papan aidtsen bëdambo icmepanu quiash.

³⁰ Esuquidistu tantiaquid mibi icscho isun Nuquin Papan, Con bacuëbo yec ëbëdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidën mibi icsasho isec unësquio yampec. Aid unësquio icmenda.

³¹ Utsi icsamboen chuinu, quequin tantiaid ënta. Adecbidi comapenec nëishash bëdanta. Utsi cuestiadquio yec nëishboedi adecbidi bëdanta. Nëishash chushqueboedi adecbidi bëdanta. Utsi icsamboen tantiaquin chuiboedi adecbidi bëdanta. Utsi icsamboen tantiaid ademvidi ënoata.

³² Ademvidi bëdambo icmenuequin utsi bëdamboen tantiaquin nabanta. Adecbidi utsin chieshëquin mibi icsamboen nasho isash chieshnanec cuidnanenda. Esuquidistu mibi icsaid bedshunash abided cuidadec unëso isash Nuquin Papa mibi icsaid bëpiscudacpadquiec utsi icsaid bëpiscudoata.

5

¹ Nuquin Papan bacuëbo yec

² tantiananec tabadteneta. Nuquin Papan chiampicpadquiec Esuquidistu nuqui tantiaquin nuqui icsaid bedshunash abided cuidadec unëspanëdash. Adquidquio icscho isun Nuquin Papan bëdamboen isaidquio Esuquidistu icpanëdash.

³ Esuquidistu tantiaquid yec, Mimbi inacmaid isec chudnu, quesambo icta, dada. Adecbidi, Èbi inesa chudmenu, quesambo icta, chido. Opabimboec iquenda. Adecbidi, utsin na isash, Bednu, quesambo icta. Esuquidistu tantiaquid nebi, quequin adoenda.

⁴ Adecbidi, Esuquidistu tantiaquid yec tsienbëdta shui icsamboen chiec onqueboedi adec mibi onquiaid ënta. Adecbidi, utsi icsamboen oncaisambo icta. Adecbidi, bëdamboec onquequid utsi uain chuiquin mamënshunesambo icta.

⁵ Chudtemaid chudnu, quequiduidi chudquid yec opabimboecuidi tabadquid Nuquin Papa yacno Esuquidistun shubun icquid ictiapimbo iquec. Adecbidi, Bednu, quequiduidi bedquid yec Nuquin Papa yacno Esuquidistun shubun icquid ictiapimbo iquec. Aden nabanquid Nuquin Papabëd Esuquidistu con icbo nec, quetiapimbo icoaic.

⁶ Ambembi chiec onquiaid tanties icta. Adquid Nuquin Papan chiacpadomboen naisa nec. Adquid Nuquin Papan comapenen cuidendac.

⁷ Adquidbëd icsaında.

⁸ Ènden Esuquidistu tanties icta in chëshquiocnoc isacimboen tantienquo ichoedi nëbi Esuquidistu tantiaquid mibitëdi yansho ambi tantiamebaniaido icquin badiadnuc isucunacimboen tantiaquiota. Aden tantiec Nuquin Papan bacuëbo yec Nuquin Papan tantiamiacpadquiec bëdamboec tabadteneta.

⁹ Esuquidistun ambi tantiacpadomboen pausunac abi yacpadquiec nuqui bëdamboec tabadtenendac. Ademvidi aid yacpadomboen abimbo chuidenequid icta.

¹⁰ ¿Nadec tabadshodabi Nuquin Papan bëdamboen istsiashe? Tanu, quequin adomboen nabanec tabadteneta.

¹¹ Utsibëd icsaında. Utsi icsadenenubi mibi bëdamboec tabadtenesho isun abi icsaid utsin ëmpec.

¹² Icsaquidën ompoquin naid chuitemaid nec.

¹³ Adquidën Esuquidistu tantiaquid bëdamboec tabadtenesho isun, Icsambocquid nebi, queshun Esuquidistu tantiabempec.

¹⁴ Bëdamboec tabadquin ismedeniac icsambocboedëmbi bëdamboen tantiabentsiashe. Esuquidistu tantiaquido chuiquin dada uaid nad iqueque. Tanta. Chuinu.

“Unēsacimboen tantienquioeboedi isucunshun tantiabenacimboec bēdamboec tabadta.

Adquid icsho Esuquidistun mibi nua pausunendac.”

¹⁵ Adec bēdamboec tabadnuec Esuquidistun tantiamiacmaid tabadacpadec tabadenquio yec Esuquidistun tantiamiacpadquiec tabadteneta.

¹⁶ Icaquid dadpen iqueque. Aidpadquid iquenda. Esuquidistun pausunaid mibitedi bēdamboec tabadtenesho isec ma Esuquidistu tantiesa icboedi abi tantiaquid yampanuna.

¹⁷ Mimbi icsamboen tantiacpaden nabanenda. ¿Atotsi mimbi ēbi namepatsia? quequin Nuquin Papa chui. Aden abi chuisho Nuquin Papan mibi tantiamiacpaden adobanta.

¹⁸ Icsachitomane quequin nua paēmboquid aguenda. Aden aquec icsaindac. Icsate bunenquiocquin Nuquin Papan Mayanēn tantiamiacpadomboen nua pausunaid icquin bēdamboen nabanta.

¹⁹ Adec icsate bunenquiocquin Esuquidistu tantiaquid utsibobēdtan Nuquin Papan chiaid chuiquinc, chuiquid dapa Dabidēn dada uampid sadmo caid utsi-utsien chuiquinc, cuēdēntsi chuiquinc cain chiec cuēdēnteneta. Adec cuēdēnquin Nuquin Icbon naid chuideneta.

²⁰ Esuquidistu tantiaquid icsho Edoenēn Nuquin Papan bēdambo icmiaidtedi yec aidēn naid chiec onquedeneta.

Utsi tantiaquin nashunta quiaid

²¹ Esuquidistu con iccho nec, quequin ambi chiaid niacmane qeshun utsi tantiaquin nashunta.

²² Adembidi Esuquidistun chiapadomboen dadan inaidēn min bēnēn chiapadomboen nabanta.

²³ Adembidi abi tantiaquidtedi chuiquidquio Esuquidistu nec. Abi yacno indoshon ēnēdenquio yec icsainquiocnoc tabadmendac. Adembidi aton chido chuiquidbidi aton bēnē nec.

²⁴ Esuquidistun chiapadomboen abi tantiaquidon nabanacpadomboen aton bēnēn chiaid naquidquio aton chido neoaic.

²⁵ Esuquidistu abuc tabadboedi abi abuc bēdamboec tabadtequid tantienquio yec unēs uanushe quenquio yec matses tantiec nidaidēnshun tishaid yec matses icsaid bedshunash abided cuidadec unēsapanēdash. Abuc ēbēdi abentsēc yacimboecnuc tabadmenu, quec unēsapanēdash.

²⁶ Adecbidi, Ēbi tantiaquido icsaisa icmenu, quiash abided cuidadec unēsapanēdash.

²⁷ Adecbidi, icsaid nibēdquid bēdaidquio abi tantiaquido icmeshun Nuquin Papa yacno yuedshun, Ēmbi yuedboed min shubun ictequid nendac, quequin ismembī, quec Esus unēsapanēdash.

²⁸ Adomboembidi chido inquidēn abibi tantiadacpadomboen ma con chido tantiaquin, Bēdamboquid icmenu, quequin nashundeniash ma aibdēdi bēdamboquid icsho Nuquin Papa yacno Esuquidistun yuedpanuna. Aton chido tantiaquid abibi tantiadquidbidi nec. Aibdēdi abentsēc yacimboecquid neoaic.

²⁹ Abibi chieshēmēdesa dada nec. Bunquioquin peshun aquec. Adembidi iquenquin cuēte cuēc. Esuquidistun abi tantiaquido abēd icquido icsho aido tantiaquin nabanacimboen

³⁰ dadan abēd icquid aton chido icsho aidi tantiaquin nashunquid. Dadaba uashun aidēn shictodobi chichshun chido uapampic. Adoshon dadan nami aton canitebēdta chido uashun daēd uac abentsēc yacimboec aid daēdi yanac.

³¹ Nuquin Papan ēnden dada uampid nad iqueque. Tantia. Chuinu. “Aibdēd icnu, qeshun bedash aton papa aton titabēdta nianacimboec daēdash aton chidobēdi abentsēc yacimboec tabadtenec.”

³² Adec dada aton chidobēd daēdash abentsēc yacimboecnuc ambi icmiampicpadec Esuquidistu tantiaquido aton shubun icquido abentsēc yacimboec tabadendac, quequin chiec.

³³ Nēbi adomboembidi chido inquid ambi inaidbēdta chuioaimbique. Tantiata. Mibibi tantiadacpadomboen min chido bēdamboen tantiata dadan. Con bēnē ēbi chuiquid nec, quequin aidēn chiaid tantiata chidon.

6

Bacuēbobēdta bacuēchoquid tantiamequin chuibanaid

¹ Bacuēbon Esuquidistu tantiaquid icquin papan chiapadomboen chieshenquiocquin nabanta. Titan chiapadomboembidi chieshenquiocquin nabanoata. Aidon, Nata, quequin chiaid cacuidenquiocquin nata.

² Nuquin Papan, Naden nata, quequin ambi chiaid cuēnoten dada uaid Moises meniampid abentsēc nad iqueque. Tantia. Chuinu: “Ēbi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboembidi nabanoata,” quequin Nuquin Papan chiampid nec. Aden naquid cuidte nad iquec, quepampic:

³ “Amēn anibēdtan chiacpadomboen naquid Nuquin Papan bēdambo iquebi camiaidquio iquendac. Adecbidi nidaidēn yuec tabadnuequin adobanta,” quepampic.

⁴ Amēn anibēdtan con bacuēbo chieshmemane qeshun bēdamboen chuiquin tantiamequin isme. Adembidi, aido pemeshun acme. Adembidi, Ēmbi chiacpadomboen ma nabampanueshun Nuquin Icbon chiaid tantiamenu, quequin adobanta.

Utsin yuaido yuaquidobidi tantiamequin chuibanaid

⁵ Yuan mimi Esuquidistun chiacpadomboen nabanacpadomboembidi mibi yuaquidēn chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidēn chiacpadomboen nabanta.

⁶ Min icbon chuishun isnuc ambi chiacpadomboen bēdamboen mimi nabanacpadomboembidi min icbon isenquiocnoc nabanoata. Esuquidistu con Icho nec, quequin aidēn chiacpadomboen nanuna, quequin nidaidēnshun min icbon chiacpadomboen nabanta. Aden nabanquin Nuquin Papa bunacpadomboen mimi nabanendac.

⁷ Min Icho Esuquidistun aton Papan chiacpadomboen chieshenquiocquin nacpadomboen nidaidēnshun min icbon chiacpadomboen chieshenquiocquin nabanta.

⁸ Bēdamboen nabanquido yuacmaidbēdta yuabo Nuquin Papan bēdamboen cuidquin menendac, quequin tantiaquin bēdamboen nabanta.

⁹ Yuaquidon min yuabo chieshēnenquiocquin bēdamboen chuibanta. Mibi cuesnu, quenquiocquin ancata. Min Icho abucquio tabadquid min yuabon Icbobidi nec. Aidēn abitedi isec: Nēdic yua icsho daēdpactsēc pausunembi. Utsibic, abi yuaquid icsho nua pausunembi, quesa Nuquin Papa nec. Yuaquid isacpadomboen yua isec.

Satanas cuemetequid dasiuidaid

¹⁰ Nuquin Icho nadatiambocquin nabanquid iquec, quiash aidēnquio nua pausunaid icta.

¹¹ Satanas cacumetequid dasiuiu, quiash, Nuquin Papa mibi nua pausunuesho, Ai, cata Satanasēn mua uaquin bedchitoshē qeshun.

¹² Matses isadacpadpenquio nami intacbēd isadesa Satanasbēd icquido nec. Aidedi Nuquin Papan abi tabadaid tēdion tabadmec. Aido icsamianquido nec. Matses yuanuequid Satanas nec. Nuquin Papan uaid tantiaquid bēdambo mibi iquendac, quequin muaquin aidon chiec.

¹³ Aden muaquin chuiquid aidedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiatequid ushē chonoc Satanas mibi icsamenuec choacsho bēcuniacimboen cacumec abi mibi nidtoash Esuquidistu tantiaquid yec nidendac.

¹⁴ Aid cacumec abi nidquid icnuec Nuquin Papan abimbo chiaidquio nacrēshēdacimboec tabadteneta. Adembidi, Nuquin Papan abi bēdamboec tabadtequid shictoncacimboec tabadteneoata. Adec tabadec abi nidtoash mibi nidendac.

¹⁵ Adecbidi, Esuquidistu tantiaquid ebēd icquid iquendac, quequin Nuquin Papan tantiamequin pausunaidēn tapucudacimboen adomboembidi chuibenequin Satanas cacumec nidacimboec abi mibi nidendac.

¹⁶ Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidēnquio dēcatemēnquiash abi mibi nidendac. Aden Nuquin Papan tantiamequin pausunaidēnquio dēcatemēnquiash Satanasēn abi tantiamenuequin pian sedoachimboen pausuntemaid yec abi mibi nidendac.

¹⁷ Adecbidi, Esuquidistu tantiaquid ēmbi yuedtequid nendac, quequin Nuquin Papan tantiamiac utsin machictiapimbo yec shocosh mauete uaid mauiacimboec tantiec tabadteneta. Aden pausunac tabadquin Satanas, Esuquidistu mibi bedec choenquio iquendac, qesho cacumiasabi mibi nidquin mimi ēnenquiocquin, Esuquidistu choate cānembi, quequin abi mimi caimbudendac. Adecbidi, shocosh siantebimboecquid Nuquin Papan chiaid nec. Ambi chiaid aton Mayanēn tantiamiaidquio icquin mimi chuisho tantiaquid Satanas cuenendac.

¹⁸ Adecbidi, Nuquin Papan chiaid aton Mayanēn tantiamiaid icquin utsibo tantiaquin baded-badedquieq Nuquin Papa chiec onqueta. Satanasēn icsamenushe quiash Esuquidistu tantiaquid utsibo Nuquin Papa chiec onquedeneta.

¹⁹ Ĕbitsen tantiaquin Nuquin Papa chuoata. Dacuēdenquiocquin Nuquin Papan tantiami-acpadomboen Esuquidistu abi yacno yuedanquidquo nec, quequin Pabado chuime, Papa, quequin Ĕbitsen chuioa.

²⁰ Esuquidistun chuibeneta caid icquin abi chuibenesho mētaneshun quēnēn nauedaid nebi. Adoaid Ĕbi icnuc mimbi tantiacpaden chuibanquid Pabado icme, Papa, quequin chuoata.

Ĕnquin chiaid

²¹ NĔbi ĔbĔd icquid chiembique. Tantia. Tiquico mibi yacno nidec. Aidbidi Esuquidistu tantiaquid icsho nuqui con utsi caid nec. Nuquin Icbon chuimaidquio aidi nec.

²² Mibi yacno puduedshun Ĕmbi naidtedi Ĕbi tabadaidbĔdta mibi chuibanendac. Ĕbi mimbi chuisho tantiaash, BĔdambo iquebi, quependac Epeso yacnocquido, quequin Tiquico mibi yacno nidmembi.

²³ MibĔd icquido Esuquidistu tantiaquid utsibobĔd ma bĔdamboec tabadpanuna caimbi mibitedi. Esuquidistun Nuquin PapabĔdtan abi tantiamiantequidbĔdta utsi tantiatequid pausunaid ma icpanuna caimbi mibitedi.

²⁴ Ĕnenquiocquin Nuquin Icho tantiaquidtedi ma abipadquid icpanuna.

PIDIPOS YACNOCQUIDON ISTE

Pabadon tauamboen chiaid

¹ Esuquidistun yuambo Pabado nebi. Esusën yuabidi Timoteyo caidbëd iquebi. Aidbëd icquin shubu dadpen icquid Pidipos yacnocquido Esus tantiaquidtedi mibi chuiquin dada uaimbi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi.

² —Con Icho Esusbëdtan Pidipos yacnocquido bëdamboen isquin bëdambo icmeta, Papa — quequin mibi Nuquin Papa chianembi.

Pabadon Nuquin Papa chianiaid

³ Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimi bëdamboen namiaido nec. Aden namequid yec mibi bëdambo iquec, Papa —quequin chianembi.

⁴ Aden mibi tantiaquin Nuquin Papa chiec bëdambo yec cuishonquebi.

⁵ Ènden ëmbi chuibanac Esus tantiabenquin mimbi ëbi piucquid meniondac. —Esusën naid ma Pabadon matses utsibotsen chuibanu —queshun meniondashumbic nëbi adem-bidi ëbi menete mimi bëmeoac. Aden mimi bëmeoaid isash mibi tantiec cuishonquebi.

⁶ Nuquin Papan tantiamiac mimi Esus tantiabenondac. Adembidi Esus tantiamequin Nuquin Papan mibi bëdamboen tabadmec. Esus padpidec chote ushën abëdi tabadmenuen Nuquin Papan adem-bidi mibi bëdamboen tabadmendac. Adembidi mibi tantiec cuishon-quebi.

⁷ —Èbëd tantiananquidombo nec —quiash adebi. Esus chuibenesho quënën naue-dondashi. Aden quënën nauedacsho: —Mimbi icsamboen naid chiec cho —cac nidshun: —Abimbo chuibanombi —quequin chuiquid dapa chuideniondami. Aden chiac pudue-menquo icquin abi quënën tsadunebi. Adquid icho chieshënenquo icquin mimi ëbi bëdamboen tantiec. Nuquin Papan ëbi icmiacpadquid chieshtoenquo icquid icquin mimi ëbi adoec. Adsho mibitsen tantiembi.

⁸ Esusën matses tantiacpadomboen mibi tantiac unësquo iquec. Mibi istiadquo iquebi. Èbi adsho tantiash Nuquin Papatsen: —Abimbo caic —quendac.

⁹ Aden mibi tantiaquin Nuquin Papa chianembi. —Aido bëdiactësëc tantianansho comape-nen tantianamequo, Papa. Adembidi mibimbo tantiamequinc Esus tantiamequinc mimi chiaid tantiamequinc cata.

¹⁰ Aden tantiamiac: “Nadec tabadec bëdambo ictsiabi. Adec tabadenquo yec icsambo ictsiabi,” quequin bëdamboen tantiendac, Papa. Aden tantiaquid yec chieshtoenquo icquin Esus tantiec bëdamboec tabadendac. Adsho abi chote ushën Esusën: “Icsambo icquid mibi nec,” catiapimbo iquendac.

¹¹ Adec con Icho Esus tantiec bëdamboec tabadsho isun: “Bëdamboen tabadmec Nuquin Papa bëdambo iquec,” quetsiash utsibo, Papa —quequin Nuquin Papa chianembi mibi tantiaquin.

Utsibon Esus chuibeniaid

¹² Quënën nauedac ëmbi Esus chuibenetiapimbo icnubi utsibon chuibeniac utsin-utsinquien Esus tantiabenac caosh.

¹³ Nëshun shubu dadpen icquid Doma yacnoshon: —Quënën nauedaid cuenushe — quequin ëbi isquido sondadon: —Esusën naid chuibansho Pabado quënën nauedac — quequin tantiec. Aidon chiac nëmbo icquido utsitedishun adem-bidi tantiec.

¹⁴ Quënën nauedaqui dacuëdenquo iquebi. Èbi adquo icnuc: —Pabadon nacpadomboen dacuëdenquo icquin Esusën naid chuibanembi —quepac caosh Esus tantiaquido dad-pen. Adshun dacuëdboedombi dacuëdenquo yanquin Nuquin Papan chiaidquo chuibeniac caosh.

¹⁵⁻¹⁶ Aidon ëbi bëdamboen tantiaquin Esusën naid chuibenec. —Pabado tantiembi. Esusën naid chuibenesho bedshun quënën nauedac aidën natiapimbo icnuc ëmbiquien nanu —quequin ëbi bëdamboen tantiaquin Esusën naid chuibeniac caosh. Utsibombien ëbi chieshënquimbi Esusën naid chuibeniac caosh. —Quënën tsadunac ma Pabado mëyadbudchitono.

¹⁷ Aidën chuibantiapimbo icnuc ëmbiquien nanu. Aden ëmbentsëqui chuibanac dad-penshun tantiashun: “Mibi bëdambo iquec,” ëbi catsiash —quequin Esusquo tantienquo icquimbi Esusën naid chuibenec.

¹⁸ —Ēbi chieshēnec —¿quiashtabi nēishpe? Padenquoio. —Ēbi chieshēnquidon ēbi bēdamboen tantiaquidobēdtambi Esusēn naid chuibanac matses utsibo utsiestic Esus tantiaquido yanec —quiash bēdambo yec cuishonquebi. Adecbidi cuishonquebi:

¹⁹ —Pidipos yacnocquidon Nuquin Papa ēbi chianiac caosh —quiash. —Mēyadsho Pabado chieshtomenda, Papa. Abi quēnēn nauedquidon puduemequin nidmeta, Papa —quequin mimbi chiacpadomboen namenuen Nuquin Papan Esuquidistun Mayan menequin cuesambo icmiac chieshtoenquoio iquendabi. Adembidi aidēn nac quēnēn tsadenquoio iquendabi.

²⁰ Ēmbi naondacpadomboen dacuēdenquoio icquin Esusēn naid chuibantiadquoio iquebi. Chieshtotiapimbo iquebi. —Ma utsibon: “Esuquidistu bēdambo iquec,” canu —quiash aduidequi iquebi unēsabi yec. Utsin: —Cuesunchitono —caqui adecbidi chieshtoenquoio ictsiabi.

²¹ Unēsabi Esuquidistu tantiec bēdambo iquebi. Unēsash Esusbēd tabadequic bēdamboshē ictsiabi.

²² ¿Mitsipadtebi bumpeba? ¿Unēstedabi bumpeba? ¿Unēsenquoio yec tsadtedabi bumpe? Unēsabi icquin ēmbi Esusēn naid chuibanac utsibon Esus tantiabentsiash.

²³ Nuquin Papa yacno nidash Esus isec bēdamboshē ictsiabi. Esus iste bunqueibi.

²⁴ Aden tantiequi: —Unēsabi yec Pidipos yacnocquido Esus tantiaquido Esus bēdamboen tantiamec ano nidtsiabi —quequin tantiec unēstiapimbo icoaibi.

²⁵ Unēsabi yec mibi yacno nidoatsiabi. Aden tantiec: —Nuquin Papan nēbi ēbi unēs uamenquoio iquec —queoaibi. Mibēd tabadquin Esusēn naid bēdamboen chuibantsiambi. Adoac bēdiactsēc Esus tantiatsēcboedombi Esus tantiaquiec mibi bēdambo ictsiac.

²⁶ Ēbi choacsho isash: —Pabado padpidec chomequid Esus bēdamboshē iquec —mibi quetsiac. Adec mibi cuishonquetsiac.

Chieshtoenda, quequin Pabado chiad

²⁷ Ēbi ano nidtiapimbo icnuc Esusēn chiacpadec chieshtoenquoio yec bēdamboec tabadta. Quēnēn ēbi nauedboedēn puduemiac mibi yacno nidshun mibi bēdamboec tabadsho isash: —Pidipos yacnocquidon ēmbi chiacpaden naic —quetsiandabi. Nēbi mibi yacno nidtiapimbo iquebi. Adnuc mibi istanquidon: —Chieshtoenquoio icquin Esus tantiec cuēshēdenquoio yec Pidipos yacnocquido bēdamboec tabadosh.

²⁸ Esus chieshēnquidon: “Esusēn naid chienda. Cueschitomane,” caqui dacuēdenquoio icquin Esusēn naid adembi chuibanosh —quequin mimbi naid chuisho tantiasb bēdambo ictsiabi. Adec cuesambo yec nuqui: —Nuquin Papan icmiacpadec dacuēdenquoio iquebi. Ēbi dacuēdenquoio icmequidēn ambi chiacpadomboen ēbi chieshēnquido unēsacsho icsambo icquido cuidacno nidmendac. Ambi chiacpadec Esus tantiaquid yec unēsashini Nuquin Papa yacno tabadendac —quequin nuqui tantiatsiac.

²⁹ —Con Mado Esus tantiasho utsibon chieshēntsiandac —quequin Nuquin Papan tantiacpadomboen utsibon mibi chieshēnendac.

³⁰ Ēbi nacpadomboen mibi chieshēnoaic. Mimbi isnuc ēbi chieshēnondash. Adembidi ēbi chieshēnoaic nēbi. Nēid dada uaid isquin: —Pabado padpiden chieshēnoaic —quequin mimbi tantiendac.

2

Utsi tantiec tabadta, quiaid

¹ Tantia, con utsibo. Mibitēdi chuinu. ¿Mitsipadquoio Esus tantiaquido icpec? Esuquidistu tantiaquiec dayacquio yachimboec iquec. Adecbidi Esusēn tantiaido yec bēdambo icquido nec. Adecbidi Nuquin Papan aton Mayan abēd icmequin bēdamboec tabadquid icmiaidobidi nendac. Adoaido matses tantiaquidombo nec.

² —Adquidbidi nebi —quec adquecbidi bēdamboec tantianancuededta. Ēbi cuishoncamenuec adta. Abitedi: —Esusēn chiacpadomboen nanuna —quecuededec chieshēnanenquoio yec bēdamboec tabadta.

³ Nadec onquec tabadenda. —Ēbiuidtsēqui bēdamboshē iquec. Con nauidtsēqui nanu. Con nauidtsēqui bednu —quec mibiuidtsēqui tantiadec tabadenda. —Ēbi bēdapabi icnuc utsibo bēdamboshē iquec. Aido nashuntiaquido iquebi —quec bēdamboec tabadta.

⁴ Mimbi tantiacpadomboenuidi nainquoio icquin utsin tantiacpadomboentsen nata. Mitsanauidi tantienquoio icquin utsibo nashuntetsen tantiaita.

⁵ Esuquidistun nacpadomboen naic mibi bēdamboshē ictsiac. Aidēn chieshtoenquoio icquin Nuquin Papan chiacpadomboenuidi napanēdash.

⁶ Aton Papa Nuquin Papapadquidquoio yec Esus abitedishun Icbombo nepanēdash.

Aton Papabéd yec bédamboshë ichoedi: —Padi icnuna. Nuquibi namec bédambo iquebi — quenquo yec Nuquin Papan chiacpadomboen naic auëshquio chopanédash.

⁷ Adec aton Papan yuabimboecquid yanash ambi chiacpadecec matsepanédash chidon tishac.

⁸ Adashic matse yec aton Papan chiacpadequi abided cuidadec unëspac caondash.

Matses icsamboshë icquido cuidacimboen cuستن decantanquin icsaisambobi Esus unës uapac caondash.

⁹ Aden ambi chiacpadomboenuidi Esusën nasho isun Nuquin Papan uincuemeshun abi yacno chomeoashun abédi Esus tabadmepanédash.

Aden abitedishun Icbombo icmeoapanédash.

¹⁰⁻¹¹ —“Nuquin Icbombo Esuquidistu bédamboshë iquec,” ma abitedi quenu —queshun aden Nuquin Papan abitedishun Icbombo Esus icmeoapanédash.

—Èmbi èbi yacnoshon uaido mayan bédabo yec nidaidën tabadquido matse yec unësacsho uincuemaiido yec quequido: “Nuquin Icho Esuquidistu bédamboshë iquec. Abi abitedishun Icho icmeoquid Nuquin Papatsen bédamboshë iquec,” ma quenu —queshun adopanédash.

Utsibo Esus tantiamete chiaid

¹² Mibi tantiaquiembique. Tantia, con utsibo. Mibitedi chuinu. Esusën nacpadomboen mimbítsen bédamboen nata. Èbi mibéd icnuc mimbi nadeniondacadpadomboen èbi nibédnuc adembidi bédamboen nata. —Nuquin Papa dacuédampambo icquidën chiaid niacmane —quiash ambi chiacpadomboen naic aibdédi tabadnush bédamboec tabadta.

¹³ —Ma bédamboec tabadnu —quequin Nuquin Papan ambi chiacpadecec tabadte bumequin nuqui bédamboen tabadmeque. Bédamboec tabadta.

¹⁴ Adec bédamboec tabadec chushcananenda. Adecbidi: —Bédamboen nanuna —cac chieshec tabadenda.

¹⁵ —Esus tantiaquido icsambo iquec —utsibo quenushe. Adenda. Nuquin Papan: —Con mado nec. Con champi nec —caido yec bédamboec tabad. Matses dadpenquo icsamboshë icnubi adequi bédamboec tabad. Adec bédamboec tabadquin icsambo icquido mimbi Esus bédamboen tantiametsiac pashquiacbimboecnuc.

¹⁶ Mimbi adoac utsin: —Esus tantiasho Nuquin Papan èbi bédamboen isec. Nèbi bédambo yanec unësashini aibdéd tabadendac —quequin tantiatsiash. Aden mimbi chuibanaido Esus tantiaquido yansho isash cuishonquetsiabi. Esuquidistu nidaidën padpidec chote ushën bédambo ictsiabi. —Èmbi chuibanondaido Pidipos yacnocquido ambi Esus tantiamaiidobéd choeque. Is —quec bédambo ictsiabi.

¹⁷ —“Bédambo mibi iquec,” Nuquin Papan mabi canu —queshun Esus tantiaquin mimbi bédamboen nac. Utsibo nashunquin Esusën naid chieshtoenquo icquin mimbi chuibanac. Mimbi adoaid chuisho tantiashun: —Mibi unës uanu —caquini bédambo ictsiac. —Aido bédambo iquec —queshun mibi tantiec bédambo yec cuishonquetsiabi.

¹⁸ Èbi unës uaid chuisho tantiash adecbidi bédambo icta. —Esus tantiec chieshtotiapimbo icsho Pabado unës uac —quiash bédambo icta.

Pabadon Timoteyo chiaid

¹⁹ Con madobimboecquid èbéd icquid Timoteyo mibi yacno nidmetsiambi. —¿Midapadquiec Pidipos yacnocquido tabadeque? Istan, mado —quequin nidmetsiambi. Esuquidistun adembidi tantianuc adotsiambi. Adoac istanshun chuituidac bédambo ictsiabi.

²⁰ Timoteyopadquid utsi nibèdec. Aid abentsëcshumbi èmbi nacpadomboen mibi tantiacquiec.

²¹ Utsibombien aton nauidsëqui tantiaquin Esuquidistun chiacpadomboen natiapimbo iquec.

²² —Timoteyon bédamboen naondash —quequin mimbi tantiec. Mimbi tantianubi èbédtan Esusën naid chuibanondash con mado icbobimboecquid. Aid bédambo iquec.

²³ Adquid icsho mibi yacno: —Istan —catiadquio iquebi. Èbi quënën nauedquido èbi caic: —Unës uanu —quesho tantiabono. Tantiashun: —Èbi quënën nauedquidon chiaid Pidipos yacnocquid chuitan, Timoteyo —catsiandambi.

²⁴ Èbitsen nèbi mibi yacno nidtiadquio iquebi. Èbi caic Nuquin Icho: —Ma nidnu —quenuc anobi nidtsiabi.

Eppadodito chiaid

²⁵ Eppadodito con buchibimboecquid mimbi: —Pabado nashuntan —cac Pidipos yacnuësh chonèdaid nèmbo iquec. Utsibon chieshèmbi dacuèdenquo icquin èbédtan Esusën naid chuibanondash. Adondaiddi nèbi: —Mibi iccondacno tabadec nid, buchi —caombi.

²⁶ Aid mibi tantiec unësquoio yec tsadposh. —Ëbi unëstsemboed con matses chuinuec Pidipos yacno nidaccosh —quiash mibi ismete bunquieic shubiantiadtsëcquoio tsadposh. Adsho isun: —Min shubuno nidec nid —caombi.

²⁷ Adec unëstsenquiondash. Adshobien Nuquin Papan bédamboen isquin bédamepondash. Èbitsen bédambo icmenuen Nuquin Papan adopondash. Epapadodito unësquoio icnuc ëbi shubiec tsadsho isash: —Aid unësan unësquoio icnuc Pabado mëyadnushe —queshun Nuquin Papan Epapadodito bédamepondash.

²⁸ Adoacsho mibi yacno aid badedquoio nidmetiadquoio iquebi. Aidbéd iquec mibi bédambo ictsiac. Mibi yacno nidsho isash ëbitsen bédambo ictsiac.

²⁹ Epapadodito nidacsho bédamboen ista cuishonquequin. —Nuquin Icbon mibi bédamiac. Aid bédambo iquec. Mibitsen bédambo iquec —quequin chuita matses dadpen tantiamenuen. Adquid Esus chuibanquido utsibo mibi yacno nidacsho adembidi bédamboen ista.

³⁰ Esuquidistun chiacpadomboen naic ëbëdi tabadec Epapadodito chondash. Chieshëmënquido dadpen icnubi ëbi nashunec tabadec daicsabudash unëstsenondash. Chotiapimbo icquin mimbi: —Pabado nashuntan —cac choash nibëdantsenondashe. Mibi yacno nidacsho bédamboen ista.

3

Esusuidtsëqui tantiasho Nuquin Papan bédamboen isaid

¹ Nuquin Icho Esus tantiec cuishonquenuna. Aduidequi icac bédambo ictsiash. Tantia, con utsibo. —Tantienquoio yanushe —quequin ëmbi chiondaid dada uaquin padpiden mibi chuiouanu.

² Muaquidon chuisho tantienda. Aidon: —Shui dëbid dëteshun secaidouidi Nuquin Papan bédamboen istsiash —quequin chuisho tantienda. Aden chiec icsa uanquidombo neque. Uimanëmënquidoen nechitec.

³ —Shui dëbid dëteshun secaid nec —çqueshunda Nuquin Papan nuqui bédamboen ispec? Padenquoio. Aidon Esus tantienquoio icsho bédamboen isenquoio icquin aton Mado Esus tantiaquidoen Nuquin Papan bédamboen isec. Aton Mayanën tantiamiac: —Nuquin Icho Esuquidistu bédamboshë iquec. Abided cuidadec unësaid tantiasho Nuquin Papan nuqui bédamboen isec. Èmbembi naquin Nuquin Papa bédamboen ismetiapimbo iquebi —quequin nuqui tantiec.

⁴ Matsesën tsusedpan chiaiduidi tantiasho Nuquin Papan bédamboen iste icnuc nadtsiac. —Tsusedpan chiaid utsibon daëdpectsëc nanuc ëmbimbo naquin dadpenquoio nabanombi. Aden ëmbimbo dadpenquoio nasho Nuquin Papan ëbi bédamboen isec. Adembidi isadaidbombo icsho ëbi bédamboen isoaic —quetsiac. Nëbi adtiapimbo iquebi.

⁵ Isadaidbo nebi. Isadaidbon chidon tishacsho sietetedec ushun Moisesën chiampicpadomboen shui dëbid dëteshunenedaidquoio nebi. Con matses tsusedpa Benamin yampid icnuc Ebedeyombo nebi. Isadaidbo caimbidi Ebedeyo capec. Adquid yec aidën onqueten onquequid nebi. Moisesën chiampid namequidquoio padiseyobo caid niondabi.

⁶ Adquid icquin icsambo icquido danquin Esus tantiaquido cuesun secatiadquoio iccondabi. Nuquin Papan chiacpadomboen natiadquoio iquequi adondabi. Moisesën chiampiduidi nate bunquiondabi.

⁷ Adquid icquin Esus tantiabi: —Èmbimbo naic bédamboshë iquebi —quequin icsamboen tantiapondambi. Adondaiddi Esus tantiabensh: —Èmbimbo naiduini icsambo iccoc.

⁸ Nëbi con Icbomno Esuquidistu tantiec bédambo iquebi —quequin tantiabensh. Aiduidtsëqui tantiatadquoio icquin icsa secacimbomno ëmbimbo naid ënondambi.

⁹ Esus tantiate bunquiebi. Adquid yec: —Moisesën chiampicpadomboen ëmbimbo naiduini bédambo iquec —quetiapimbo yanashic nadondabi. —Nuquin Papambien aton Mado Esuquidistu tantiasho bédamboen isquin ëbi bédamboen tabadmec —quequin tantiabensh.

¹⁰ Aden tantiabenshun Esusuidtsëqui comapenen tantiatadquoio iquebi. —Comapenen tantiaquin Nuquin Papan uincuemaiid icquin Esusën bédamboen tabadmetsiacshi —quec Esus tantiate bunquiebi. —Nuquin Papan chiacpadomboenuidi nasho mëyanac Esus unësaac caondash. Adembidi Nuquin Papan namiacpadomboen nasho mëyanac chieshtotiapimbo ictsiac.

¹¹ Unësambo icsho Esusën bédamboen tabadmetsiacshi. Unësaacsho Nuquin Papan uincuemetsiacshi —quec adec Esus tantiate bunquiebi.

Nuquin Papan chiacpadomboenuidi nate bunaid

¹² Tantia, con utsibo. Mibitedi chuinu. —Nuquin Papan chiaid niaquesambo nebi —¿quetatabi ique? Padenquo. Adquo ictiadquidi adquo yenquieni icchitec. —Bédamboshē icmenuen Esuquidistun yuapondashi —quequin tantiec bédamboshē icte bunquiebi.

¹³ Adec bédambo yanabi yec: —Ēmbi naboed naic bédamboshē iquebi —quenquo icquin Esusquo tantiaquin ambi chiapadomboen natiadquo iquebi.

¹⁴ —Bednu —quequin bedteuidtsēqui tantiec titinuiacimboen Esusquo tantiaquieci ambi chiapadquieci bédambo ictiadquo iquebi. —Adec tabadec unēsacsho Nuquin Papan abi yacno ēbi tabadmec —quec bédambo icte bunquiebi.

¹⁵ Nuquin Papan chiapadomboen natiadquo icquin ěmbi chuibocpadomboen mimbi tantiaquieci. Utsien: —Padi. Pabado chiaid abitedi nainquo icquin abentse-abentsen naindambi —quesho Nuquin Papan ambi tantiaid bédamboen tantiametsiash.

¹⁶ Nēbi nuqui icbocpadquieci tantianaquieci bédamboeci tabadnuna.

¹⁷ Ēbi yacpadquieci bédamboeci tabadta. Ēmbi chiapadomboen utsibon nasho isun adomboembidi bédamboen nata.

¹⁸ Ēmbi chuideniondapadomboen mibi padpiden chiemi shubiquimbi. Mibi yacno utsi-utsieci icsamboeci tabadpec. —Abided cuidadeci cuesten dectamēdaid Esus tantiaquid nebi —quetsēboedi icsamboeci tabadeci. Adquido Esus tantiaquidpenquo nec.

¹⁹ Peteuidtsēqui tantiec icsambo yequi: —Bédambo iquebi —quec tabadeci. Nuquin Papa tantienquo icquin nidaidēn icquiduidtsēqui tantiec. Unēsash Nuquin Papa yacno nidtiapimbo yec icsambo icquido cuidacno nidendac.

²⁰ Padnuen Nuquin Papan bédamboen isaído yec aidbēd tabadtequido nuqui nec. Abi yacno buanueci abucuešh Nuquin Icho Esuquidistu chosho isnueci nuqui tabadeci.

²¹ Choshon aidēmbi nuquin dada chuca uaindac aton dada chuca uacpadomboen. Adoaci unēstiapimbo icquiduidquo nuqui iquendac. Abitedishun Icombo icquin ambi chiapadomboen abitedi namequidquo icquin aden nuquin dada chuca uaindac.

4

Esus tantiec cuishonquiaid

¹ Ēmbi aden chuisho tantiaš Nuquin Icho chiaid niaquenquo yec bédamboeci tabadta. Mibi tantiaquin mibi istiadquo iquebi. Mibi caic: —Ēmbi chuibanondaído Esus tantiabēnash bédambo ictiadquo iccondash —quec bédambo iquebique. Adquieci chieshtoenuquo icquin Esus tantiec bédamboeci tabadta.

² Tantia. Nēbi chido daēd Ebodia caid Sintique caidbēdtatsen chuinu. Amicananenda. Esus tantiaquido yec: —Ai, Nuquin Icho Esusēn tantiacpadomboembien natiad —quec tabadta.

³ Tantia, buchi. Ēbēdtan Esus chuibanondaído icsho mibitsen chuinu. Aid chido daēd chuiquin: —Bédamboeci isnanta —cata. Utsibon chieshēnubi ēbēdtan aid daēdshun Esusēn naid chuibeniondashe. Adembidi Quedemente caidētsen ēbēdtan chuibanondash. Adembidi utsibonsen. Adquidotedi Nuquin Papan: —Esusbēda ēbi tantiaquido mibi neque. Ēbēd tabadeci cho —caindac.

⁴ —Nuquin Icho Esus tantiaquieci bédambo yec cuishonquenuna —caimbi. Esus tantiaquieci cuishonquenuna.

⁵ —Ma utsibo: “Esus tantiaquido chieshēmēnenquo yec bédambo iqueci,” ma quenu —quiaš bédamboeci tabadnuna. Nēbi Nuquin Icho Esus choeque.

⁶ Adecbidi chishpiquieci tabadenda. —¿Atotsimbi napeba? ¿Atotsimbi pepeba? ¿Nēbida con matses unēspeba? —quequin uesquin tantienda. Padenquo icquin nuqui dacuēdquin tantiaidtedi Nuquin Papa chuinnuna. —Ēbi nashunquin utsibotsen nashunta, Papa. Aden nashunec mibi bédambo iqueci, Papa —quequin Nuquin Papa chuinnuna.

⁷ Aden nuqui chiac aidēmbi nuqui bédambo icmec dacuēdenquo icnuc. Adoaci bédambo icnuc utsibo: —¿Mitsipadeci dacuēdenquo yampash? —quetsiash. Nuquitsen: —¿Mitsipadequini bédambo yampo? —quetsiac. Adec: —Nuquin Papan ēbi nashunquidquo nec —quequin Nuquin Papa chianequin Esus tantiaquieci nuqui dacuēdenquo yec bédamboeci tabadtsiac.

Bédamboshē iqueci, caiduidi tantiaa, quiaid

⁸ Tantia, con utsibo. Nēidtsen chuinu. ¿Atotsi abimbo chiaid icpec? Adquid tantiaa. ¿Atotsi bédambo icpec? ¿Tsuš bédamboeci tabadquid icpec? Adquidtsen tantiaa. Aden: —Bédambo iqueci —caidtedi tantiaa.

⁹ Adembidi ěmbi chuisho mimbi tantiondac. Aden ěmbi chiondaído tantiaquin ěmbi naondacpadomboen nata. Adsho isash mibi dacuēdenquo icmequid Nuquin Papa mibēd iquendac.

Pidipos yacnocquidon bēmiaid

¹⁰ Nēbi mimbi bēmiaid bedash bēdambo iquebi. Ēnden mimbi aden menianiondashumbic yuectaneshun nēbi ēbi tantiaquin mimbi meneoaïd bēacsho bedombi. —Nuquin Icbon tantiacpadomboen padpiden Pidipos yacnocquidon ēbi ma menenuquin piucquid bēmiac —quiash bēdambo iquebi. ¿Ēbi tantienquioda mimbi ictionda? Ēbi tantiaquin ěnden bēmetiadquidi tsundan bētiambo icnuc mibi nepanēdac.

¹¹ —Con na nibēdeque. Beccho —¿quectabi ique? Padenquo. Adtiapimbo iquebi. Con na icnuc bēdambo ictsiabi. Con na nibēdnubi adecbidi bēdambo ictsiabi.

¹² Con na dadpen icnuc bēdambo ictsiabi. Con na nibēdnubi adecbidi bēdambo ictsiabi. Con piucquid dadpen icnuc bēdambo ictsiabi. Con piucquid nibēdnubi adecbidi bēdambo ictsiabi. Peten cubudash adecbidi bēdambo ictsiabi. Buna natiambo icnubi adecbidi bēdambo ictsiabi.

¹³ ¿Ēbenquiodabi adti? Padenquo. Esusēn namiaquini adquo iquec. Aidēmbi namiac ambi chiacpadomboen naimbi.

¹⁴ Adnuc: —“Mēyadec,” quiosh —queshun mimbi ēbi ma menenuquin bēmiaid bēdambo iquec.

¹⁵ Min nidaid Masedonia caid yacnuēsh nidsho Esus tantiaquido shubu utsinquidon uanocquidon menenquo iccondashi. Adnubi tauamboen menequin mimbiuidtsēqui ēbi meniondac. Esus tantiabentsēcshun mimbi adondac.

¹⁶ Adoaquini shubu dadpen icquid utsi Tesadonica caid yacno nidondac. Ambo yuec tabadnubien: —“Pabado aton na nibēdec,” quiosh —queshun mimbi piucquid bēmiaccondac. Yuectaneshun adembidi. Adshumbic padpiden.

¹⁷ —Mimbi bēmiaid bēdambo iqueque. Utsi beccho —¿quequindambi aden chuipe? Padenquo. —Pidipos yacnocquido Esus tantiaquido bēdambo iquec —Nuquin Papa camete bunquin: —Mimbi bēmiaid bēdambo iccosh —caimbi.

¹⁸ Utsi-utsien bedshumbeneshun mimbi bēmiaid Epapadoditon bēacsho bedondambi. Mimbi bēmiaidbēd daēdash ēbi bunaid dēniaquec con na dadpenquo yanac. —Mibi bēdambo iquec —Nuquin Papa camenuen mimbi bēmenēdac. Adsho isash Nuquin Papa: —Adquido bēdambo iquec —quependac.

¹⁹ Abitedishunquo Icho Nuquin Papa nec. Comapenen tantiaquin Esuquidistu tantiaquido bēdamboen isquin nashunquidquo nec. ¿Ada mitsana nibēdnuc mēyadacimboec tabadpe? Adec mēyadsho isun Nuquin Papan mitsana icmendac. Unēsquo icsho aidēmbi mibi bēdambo icmendac. Adecbidi: —Chieshtotiadquo icchitebi —quesho Nuquin Papan nac mibi chieshtoenquo iquendac. —Aid nibēdnuc unēsebi —mimbi caid Nuquin Papan icmendac.

²⁰ Ēbi adsho tantiaquin: —Bēdamboshē mibi iquec, Papa —quequin Nuquin Papa chuina enenquo icquin.

Pabadon ēnquimbi chiaid

²¹ Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban.

²² Adembidi nēmbo Doma yacnoshon Esus tantiaquido abitedishun mibi tantiec. Chuiquid dapa Sesad caidēn shubun icquido Esus tantiaquido icquin adembidi mibi tantiec.

²³ Mibi tantiaquin: —Con Icho Esuquidistubēdtan Pidipos yacnocquido bēdamboen isquin bēdambo icmeta, Papa —quequin Nuquin Papa chianembi. Padi. Aidtedi chuiquin dada uaombi.

CODOSAS YACNOCQUIDON ISTE

¹ Pabado nebi. Nuquin Papa bunacpadomboen Esuquidistun ëbi chuibeneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec.

² Aidbëdtambi ënenquioequin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquioequin ambi bëdamboquid icmebanaid nebi, quequin tantiec mibitedi Codosas yacnocquido adqueic ma mibi tabadpanuna. Adecbidi, Nuquin Papabëd icquido nebi, quequin tantiec ma tabadpanuna.

Nuquin Papa chuidoniaid

³⁻⁴ Nuquin Papa, Nuquin Icho Esuquidistun Papa chiec nadec onquebi. Bëdamboquid icquid mibipadquiocnoc Codosas yacnocquido Esuquidistu tantiaquido bëdamboquido mïmbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yanosh. Adquid yanshun Esuquidistu tantiaquid utsibo bëdamboen tantiec, quequin chuisho tantiaish bëdambo iquebi, Papa, quequin mibitedi tantiec Nuquin Papa chiec onquedenebi.

⁵ Esuquidistu Nuquin Papa yacno yuedanquid nec, quequin, Nuquin Papan chiaid abimbo iquec, quequin chuibanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquid Esuquidistu tantiaquid utsibo mibitedishun tantiec.

⁶ Ëbi icsaid cuidtiadtësëcquio Nuquin Papa icnubi utsibon Esuquidistu chuibanac abi tantiaquid ëbi yanacsho isash Nuquin Papa ëbi icsaid cuidenquio yec ënden bëpiscudac, quequin mibitedishun abimbo tantiaishun mïmbi bëdamboec tabadquin ismebanendac. Aden mibitedishun ismebanac utsin-utsinquin Esuquidistu tantiaquid yanshun abi bëdamboec tabadaid ademvidi ismebanoaic. Adoac nidaid utsin-utsinquieic tabadquidon Esuquidistu tantiaishun adomboembidi ismebanoaic.

⁷ Epapadasën Esuquidistu chuibanac Esuquidistu tantiaquid mibitedi yampondac. Codosas yacno nidtiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquio nec.

⁸ Adquid yec mibi yacno nidshun chuibanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chioishi.

⁹ Aden Epapadasën chiac mibi tantiec baded-badedquieic Nuquin Papa chiec onquian-onquianebe. Mïmbi tantiacpadomboen min Mayanën pausunacsho Codosas yacnocquido bëdamboen tantiamë, Papa, quequin chian-chianembi.

¹⁰ Aden mibi bunacpaden mïmbi tantiamiac Codosas yacnocquido, Esuquidistu tantiaquid nebi, quiaish utsibo ismenuec bëdamboec tabadec. Adec Codosas yacnocquido tabadsho isash, Bëdambo iquebi, ma Esuquidistu quepanuna. Adec bëdamboec tabadquin nabanquidquio utsi iquendac. Adec tabadquido mibi tantiadonequido yanendac, Papa.

¹¹ Ademvidi mïmbi dayacquio icmenu caid Codosas yacnocquido iquec natiatequid icnuc aido chieshenquio yec abi tantiec mibi nidendac. Aden chieshenquiocnoc mïmbi nidmiac, Bëdambo iquebi, Papa, quec, Cuishon, quec aido mibi chiec onquedenendac, Papa.

¹² Mïmbi bëdamboquid icmebanac icsaquid nibëdacno mibi tantiaquid utsibobëd mibëdi tabadendabi, Papa, quequin tantiec, Bëdambo iquebi, quec ma Codosas yacnocquido mibi chiec onquepanuna, Papa.

¹³ Ënden adquidpenquio yec Satanasën yuaido yec, Nuquin Papa tantianu, quesa nuqui iccondac. Aidën yuaido icsho Nuquin Papan nuqui mënchicpondash. Aden nuqui mënchicquin abi cudasaquid aton Madombo Esuquidistu icsaisapadquid nuqui icmenuequin aid Nuquin Papan nuqui tantiamëpondash.

¹⁴ Abipadquid icmenuec matses icsaid bedshunash abided cuidadec ünëspanëdash. Adoacsho Esuquidistu tantiaquid icsho cuidenquio yec mibi icsaid bëpiscudendabi, quequin Nuquin Papan tantiampicpadquiequi bëpiscudendac.

Abia yampidquio iquec abitedishun icbombo Esuquidistu nec quiaid

¹⁵ Nuquin Papa isadesa icnubi abipadquidquibidi matsesash Esuquidistu nuqui isendac. Abitedi uabi yec Esuquidistu aton Papabëdtsëqui Abia Yampid icquid utsi abitedi ambi uaid nec. Ambi uaidtedi aton na nec. Aidon icho Esuquidistu nec.

¹⁶ Nidaid abubëdtabi uashun aidënquiocquidtedi uanu quequin ambi uaido nec. Matsesën isaidtedi matsesën isacmaidtedibëd Esuquidistun uampidquio nec. Mayantedi ambi uampidquibidi nec. Mayan utsi-utsiec chuiquid nebi, quenubi utsi-utsiec utsin icho nebi,

quepec. Adecbidi matses queoaindac. Aidotedi Esuquidistun uaido nec. Aidotedishun icbo Esuquidistu nec.

¹⁷ Esuquidistu abia yampidquio iquec. Aidëmbi, Ëmbi uabanaido namebanu, quequin ambi chiacpadomboen namebanec.

¹⁸ Nidaid utsi-utsiec yacnocquido abi tantiec iccuededquidtedi chuiquidquio Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unëspanëdash. Adsho Nuquin Papan abia uincuemeshun abi tantiaquidtedi chuiquid abentsëcquiobi abipadquid icmepanëdash.

¹⁹ Utsi abipadquid ictiapimbo iquec. Aidën nabanacpaden natiapimbo utsi iquec. Ëbipadquidquio con mado nec, quiash, Bëdambo iquebi, quec Nuquin Papa tsadec.

²⁰ Aton Papapadquid icquin aton Papan tantiacpadomboen tantiaquid Esuquidistu nec. Adquid yec matses icsaid bedshunash ëbided ciudadec unëspebi, abi quiampicpaden mat-sesën cuesten dectanac unëspanëdash. Adoacsho isun ambi bëdamboen istiapimbochoedi Esuquidistu tantiaquid yansho isun aidtedi Nuquin Papan bëdamboen isec.

²¹ Ènden Nuquin Papan matsespenquido mibitedi iccondac. Icsamboen tantiec icsaquid yec Nuquin Papa chieshënquido mibitedi iccondac.

²² Adquid icboedi, Ëbi yacno yuednu qeshun Esuquidistu tantiaquidotedi cuidentquio yec abi icsaid bëpiscuquid Esuquidistu icsaisapadquiocnoc aido isembi, quec Nuquin Papa tsadec.

²³ Ènenquiocquin Esuquidistu tantiaquid icsho abi yacno mibi yuedendac, quequin chuibansho mïmbi tantiondac. Adenuidi ënenquiocquin tantiata. Adomboen chuibenesho utsin-utsinquien tantiapondash. Esuquidistun, Aden chuibeneta, caid nebi.

Esuquidistu tantiadoneta, quequin Pabadon chuibanaid

²⁴ Ëbi tantiaquid Nuquin Papan bëdamboen isendac. Aden isac, Èbëd icquido iquendac, quequin Esuquidistun ambia chuibansho matsesën mëyampanëdash. Adomboembidi Esuquidistu chuibansho mëyamposhi. Adoaqui, Cuishon, quebi. Ènden abi tantiaquid yanacsho isun, Ëbi chuibeneta, quequin chuishumbic, Ëbi chuibansho mibi mëyante dadpen iquendac, quequin Esuquidistun chuiopondashi. Aden aidën chiondacadpaden mëyanaid nebi. Ma abi tantiaquid dadpen yanu quequin chuibenembi ambi tantiactedi mëyante yanuc.

²⁵ Ai, Nuquin Papan, Esuquidistu ambi naidbëdta chuibeneta, caidquio nebi. Abi chuiquidquio nebi.

²⁶ Nuquin Papan ambi tantiampicpaden chienquiocboed nëbi aid tantiamiac Esuquidistu tantiaquido yanec.

²⁷ Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ëbi yacno ëbëdi tabadendac, quequin Nuquin Papan aton Mayan Esuquidistu tantiaquid menec, quequin isadaidpembotsen chuibeneta caid nebi.

²⁸ Aden ëbëdtan ëbipadquidon Esuquidistu chuibeni Esuquidistu tantiaquid yansho isash, Esuquidistu tantiec bëdamboec tabadteneta, quequin Nuquin Papan chiacpadomboen chuibenec nebi ma abi yacno chosho adquidquio Nuquin Papan yuedpanu qeshun.

²⁹ Badiadquidën-badiadquidënquien aton Mayanën nadatiambocquin nac natiatequid icnuc ma Esuquidistu tantiadonequido mibitedi icpanu, quequin dayacquiocquin chuibenec nebi.

2

¹ Aden dayacquiocquin Nuquin Papa chuiquin mibitedi tantiembi. Adembidi chuibanquin Daudiseya yacnocquido tantiembi. Adembidi utsi-utsiec yacno iccuededquido ëbi isacmaidobi Nuquin Papa chuiquin tantiembi.

²⁻³ Esuquidistu tantiadonequido ma yampanueshun dayacquiocquin chuibenec nebi. Abentsëc yacbibmoec tantiananquidquio ma yampanueshun dayacquiocquin chuibenec nebi. Adquidquio yanshun utsin abimbo chuisho tantias, Abimbo chuiquid nec, quequin ma bëdamboen tantiapana. Adembidi, abimbo chiacbibmoen chuisho tantias, Icsamboen chiec, quequin ma tantiaquiopana. Nuquin Papan tantiamenquiocboed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpanueshun dayacquiocquin chuibenec nebi.

⁴ Comapenen tantiaquid icquin, Utsi tantiata, quequin Esuquidistupenquio chuisho ma tantienquio mibitedishun icpanu, quequin aden mibi tantiaquin chiec nebi.

⁵ Mibëd icte bunquiequi mibi yacno nidtiapimbo yequi mibitedi tantiec tsadtenebi. Adecc tsadnubi, Esuquidistu tantiaquido yanshun ënëdenquio yec iccuededquin aiduidtsëqui tantiadonec, quequin mibi yacnoësh choquidon chuisho tantias bëdambo iquebi.

Esuquidistu tantiaquid iquec utsin chiacpaden naic abuc nidendabi, quequin tantienda.

⁶ Adebidi Esuquidistu tantiaquid yec abéd icquido iquec, Aidi con Icho nec, quec ambi chiacpadquiec tabadteneta.

⁷ Adec tabadquin cuëte tapun uquëducquiocquidën cuëte uidënash canidoachimboen Esuquidistu tantiaquid icquin tantiadonequiota. Aden Esuquidistu chuiquin ëbipadquidon mibitedi chuipondash. Aid tantiadonequid icquin, Mibi tantiaquiec bédambo iquebi, quequin baded-badedquien Esuquidistu chuidoneta.

⁸ Adembidi aid tantiadonequid icquin aid tantiesan ëndenquo ambembi chiec onquiampicpaden nëbi icquidën adomboembidi chuisho Nuquin Papan chiacpadomboen chiesha nec, quequin tantiaquiota.

⁹ Matsesash Nuquin Papapadquidquibidi Esuquidistu icpanëdash.

¹⁰ Esuquidistubéd icquid icsho Nuquin Papan mibi adembidi abipadquid icmebanec. Mayan chuiquidtedi chuiquidbidi mibéd icquid Esuquidistu nec.

¹¹ Aidën, Èbéd icquid nec, quequin mimbi tantiaid icsa cuëte cuidi pateshuniacimboen mibi ëmebanec. Chështhen tiachimboen nainquiocquin bédamboen tantiamequin aton Mayanën mibi icsaid ëmendac.

¹² Adembidi Esuquidistu unësacsho chococachimboecnuc abi tantiaquid paucnu quiacimboen acten mibitedi mentobanondash. Adembidi Nuquin Papan Esuquidistu uincuenëdachimboecnuc icsaisa icmenu, quequin acten mentotanguin mibitedi cadobampondash.

¹³ Ènden Nuquin Papan matsespenquo icquin mimbi tantiaid icsa icnuc unësacimboec icquin Nuquin Papan ënden, Naden nata, quequin chiaid tantienquiocquin niacquido mibitedi iccondac. Adquid ichoedi Esuquidistu tantiaquid icsho isash, Con madobéd icquido nec, quec Nuquin Papa nuqui icsaidtedi bëpiscudac.

¹⁴ Ènden, Matses icsaid bëpiscudnu, quenquiocquin, ëmbi naden nata quequin chiaid niacquid comapenen cuidnu, quequin Nuquin Papan dada uampid iquec, quequin Esuquidistun icsainquiocquin ambi chiaidtedi nabampanëdash. Adquid icshobi icsaquid-bimboecnuc matsesën unës uaquin cuesten dectanac matses icsaidtedi bedshunash abibi cuidadec unëspanëdash. Aid unëso isun, Matses icsaid cuidosh, quequin abi tantiaquidquo icsaid ambi naden nata quequin dada uamiaid ucachimboen tantiec bëpiscudtenec Nuquin Papa.

¹⁵ Esuquidistuidi Nuquin Papan naden nata quequin chiaid niaquesha yec matses icsaid bedshunash abided cuidadec unësash uincuenquin Nuquin Papan chiaid niacquido mayan icsabo dëniacquec Esuquidistu abitedi chuiquid yampanëdash. Aden dëniacshun, Nëidtedi ëbi tantiaquido chuiquid ictiapimbo iquec, quequin bedshun mëtaneshun buanachimboen Nuquin Papa Esuquidistun ismepanëdash.

¹⁶ Aden chuiquid utsitedi dëniacquid Esuquidistu nec, quequin tantias, Nadquid peshun nadquid utsi acsho Nuquin Papan ëbi bédamboen isec, quenda. Adembidi, Nèid ushëmbi abi tantiec iccuededsho isun Nuquin Papan ëbi bédamboen isec, quenda. Adembidi, ushë chuca choaid usudsho isec cuëdënsho Nuquin Papan ëbi bédamboen isendac, quequin tantienda. Esuquidistuidi tantiaquidquo icsho Nuquin Papan ëbi bédamboen isec, quequin tantiata.

¹⁷ Matses icsaquid yec ambi naidënquo abembi bédantiapimbo iquec, quequin tantiamenuequin Nuquin Papan ambi, Naden nata, quequin chiaid Moises menepampic. Èmbi bédamboen isaidquo matses bédambo icmequid choendac, quequin tantiaquin ambi naden nata quequin chiaidba Moises menepampic.

¹⁸ Esuquidistun bédambo icmiaid nebi, qeshun utsi icsamboen chiec onquesho tantienda. Ambibi chiec onquesho tantiasun Esuquidistu tantesa uaindac. Adquidbéd Esuquidistu ictiapimbo iquendac. Adquidën, Mibi chuiquidpenquo nebi, qeshumbic ambia tantiaquidbimboecquin ambi tantiaid Nuquin Papan uaid mayan bëda mibi tantiamenuequin chuibansho tantienquiocquin nadota. ¿Tsuntsin mibi adquid icmepash? cata. Aden chiaquien, Ushquin adquid isombique. Chuinu. Tanta, quequin ambembi chiec onquesho tantienda.

¹⁹ Adquidën Esuquidistu abi tantiaquidon icbombo nec, quequin tantienquo iquec. Adebidi Nuquin Papan tantiacpadquiec Esuquidistu tantiaquid dadpen yanash aton utsibobéd tantiananec nashunanec aton icbopadquid yanec, quequin tantiesha adquid nendac.

²⁰ Tantienu. Èbi chui. ¿Atotsi quias Esuquidistu tantiaquid yanash ëbi icsaid cuidnuec Esuquidistuded unësash uincuenachimboec bédamboec tabadebi, qeshumbic,

²¹ Nēid bedtemaid nec. Aid bedsho mayanēn mibi cuidendac, quequin utsi chuisho mimbi tantiape? Adembidi zatotsieshun mimbi tantiaid icsa unēsacsho chococabi yacbimboen, Nēid petemaid nec. Aid pesho mibi cuidendac, qesho mimbi tantiape? Aden Esuquidistu tantienquo icquidēmbimboen, Nēid mishtemaid nec. Aid misho mibi cuidendac, qesho mimbi tantiapēc.

²² Nadquid petemaid nec. Nadquid mishtemaid nec, quequin matsesēn ambibi chuiquin tantiamete nec. Ambi petemaidbēdi ambi mishtemaid ēnēdendac.

²³ Matsesēn bēdamboen tantiacbimboen chiaid aidtedi nec. Nēid ēmbi tantiaid nec, qeshun aid bēdamboen ismenuen naden nanuna, quequin matsesēn chiec. Aden ambibi tantiashun, Naden nata, quequin mibi chuitiapimbo iquebi, qeshumbic namenuequin comapenen adquidēn chuibanec. Adecbidi, Damēyamēdsho ēmbi tantiaidēn ēbi bēdamboen istsiash, quequin ambibi tantiash damēyamēdec. Adec damēyamē-dashic abi bunaiduidi tantiaquin ambi inacmaid dadan isuidtiapimbo iquec. Adecbidi abi inesa chidon isuidtiapimbo iquec.

3

Bēdamboec tabadaid chiaid

¹ Esuquidistu tantiaquid yec abia uincuenēdac abuc nidash Nuquin Papa yacno icsate bunquid nibēdacno tabadacpadquiec tabadteneta. Adec tabadec, Nuquin Papan dayunquo Esuquidistu tsadec bēdambo iquec, quequin abēd icte bunquin Esuquidistu tantiadonec tabādta.

² Abuc abēdi ēbi icnuc aton na con na iquendac, quequin tantiaquin nidaidēnshun bednu, quequinuidi tantienda.

³ Esuquidistu unēsaid tantiaquin aidbēdtabi mibi icsaid chococashunacbimboec icsatiapimbo yec nidaidēn tabadta. Adecbidi Esuquidistu uincuenash abuc Nuquin Papa yacno nidash, Ēbi tantiaquidtedi bēdaidquio iquec. Aido ēbi cudasaidquio nec, quequin aidēn dayun uaid nuqui nec.

⁴ Aidēn padpidec choshon abi yacno buanac abipadquidquio bēdaidquio nuqui iquendac.

⁵ Adec abi yacnoēsh abēdi bēdaidquio iquendabi, quequin mibi icsaidtedi cuesun secacbimboen ēmbanta. Ēmbi inacmaid chudnu, quenquiocquin ēnta dadan. Adembidi, Ēbi inesa chudmenu, quenquiocquin ēnta chidon. Adembidi, Chudnu, quequinuidi tantiaid ēnta dadan. Adembidi, Chudmenu, quequinuidi tantiaid ēnta chidon. Adembidi mibi bunaid icsatedi ēnta. Adembidi aton na daēdpactsēc icquidēmba ma bednu, quenquiocquin, Ēmbia bednu, quequin tantiaid ēnta. Aden ēnshun, aton na daēdpactsēc icquidēmba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaidbimboecnuc matsesēn ambibi nacnenaid tantiacbimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatiapimbo iquec.

⁶ Abi bunaid icsabēdta ambi tantiaid icsa ēnesa icsho matsesēn naid chuibante ushē choan adquidtedi Nuquin Papan comapenen cuidendac.

⁷ Adquid icboedi

⁸ nēbi adenquiocquin ēnash bēdamboec tabadteneta. Adecbidi comapenec nēishboedi adenda. Adecbidi, cuesantiadquio yec nēishboedi adenda. Adembidi, utsi icsambo icmeboedēmbi adoenda. Adecbidi, utsi icsamboen chuiboeadi adoenda. Adecbidi, tsienbēdta shui chedo chiec icsamboen tantiec onqueboedi adenda.

⁹ Adecbidi, mua uanamboedi ēnēdta. Adquid icboedēmbi icsactsēcquid niacbimboen mibi icsaid ēnta.

¹⁰ Min tantiate chuca uacbimboecnuc abi tantiadonequidquio icnuequin mibi tantiamequid tantiadēd-tantiadēdta.

¹¹ Adquid Nuquin Papan icmiac Esuquidistu tantiaquid utsibo naden mimbi tantienquo iquendac. Nēid isadaidbo nec. Nēidic isadaidpembo nec, quequin tantiesa mibi iquendac. Adecbidi, nēid shui dēbid dētemequid nec. Nēid shui dēbid dētemesa nec, quequin tantiesa mibi neoaic. Adecbidi, Nēid chotac nec. Nēidic mayu nec, quequin tantiesa mibi neoaic. Adecbidi, Nēid yua nec. Nēidic yuaquid nec, quequin tantiesa mibi neoaic. Adquid Esuquidistu tantiaquid icnuc abēd icquid aton matses nec. Abi tantiaquidtedi chuiquid dapa abentsēcquiobi Esuquidistu nec.

¹² Aden Nuquin Papan cuēnaido yec ambi bēdamboecquid icmebanaidobi abi cudasaido yec ambi tantiamiaid nēbi, quiaish bēdamboecquid isadacbimboec naded tabadteneta. Utsibo natiamiaid icsho isun bēdambo icmenuequin nashumbanta. Adecbidi, Mimbia bedan bedembi, quequid icta. Adecbidi, Mimbia nashunu, quequid icta. Utsi icsaid ēmenuec comapenec chushquenquiocquin bēdamboen chuiban. Tantesa uasho isun ismeded-ismededta.

¹³ Mimbi nacpadomboen utsibon natiapimboesho isun, Padi, quenquiocquin abi tantiameban. Adecbidi utsin mibi icsamboen nasho isash cuidnanenquio yec bēpiscudta. Nuquin Papa ēbi icsaid cuidenquio yec bēpiscudosh, quec adta.

¹⁴ Adecc tabadtenec tantiananta. Adecc tantiananec Esuquidistubēd abentsēc yacimboec icsaisa mibitedi yanendac.

¹⁵ Adecc Esuquidistubēd abentsēc yacimboecnuc icmiaid nebi, quequin tantiec bēdamboec tabadtenenu, quec mibitedi tabadteneta. Adecc tabadtenequin, Mibi bēdambo iquec, Papa, quequin chuideneta.

¹⁶ Nuquin Papan Esuquidistu tantiadonemiaido icta. Adquido yec abi tantiaquid utsibobēd Esuquidistu chuinanec, Bēdamboec tabadta, quec adquiecbidi tabadec ismenanta. Aden naic chuiquid dapa Dabidēn dada uampid sadmo caidbēdta cuēdēnte utsi Nuquin Papan mibi bēdambo icmiaidbēdtabi ambi naid utsi chiecc cuēdēncuedeta.

¹⁷ Adecc tabadquin Esuquidistu tantiaquid nebi, quequin Esuquidistun chiacpadomboen nabanta. Adecbidi, ambi chiauidi chiecc tabadteneta. Adecc tabadquin, Esuquidistun tantiamiaid yec bēdambo iquebi, Papa, quequin Nuquin Papa chuideneta.

Aton shubun icquidbēd tabadaid

¹⁸ Bēdamboec tabadnu, queshun nadota. Chidon min bēnēn chiacpadomboen nabanta. Esuquidistu tantiaquid icquin adobanta.

¹⁹ Chido inquidēn, Con bēnēbēd tabadec bēdambo iquebi, camenuen yuacimboecquin aid chuiquin min chido namenda. Mibibi tantiadquinuidi min chido namenda.

²⁰ Bacuēbon, Esuquidistu tantiaquid icquin papan chiacpadomboen cacuidenquiocquin nabanta. Adembidi, titan chiacpadomboen nabanoata. Adosho isashien, Cuishon. Bēdambo iquebi, quependac Nuquin Papa.

²¹ Anibēdta min bacuēbo namenuc comapenen cuēdquin chieshmenda.

²² Yuan mibi yuaquidēn chiacpadomboen nabanta. Aidēn aden chuishun isnuc adobanta. Aden chuishun min icbon isenquiocnoc adomboembidi nabanta. Aden nabansho mibi bēdamboen isendac. Nuquin Icho, Esuquidistu tantiaquid nebi, queshun adobanta.

²³ Con Icho Esuquidistu nashunu, quiacimboen mibi yuaquidēn chiacpadomboen chieshenquiocquin bēdamboen nabanta.

²⁴ Con Icho Esuquidistun abi yacno ēbi nidacsho isun ēmbi bēdamboen nabanaid cuidquin ambi ismiambo yaid menendabi, quequin tantiaquin adobanta. Nidaidēnshun abi nashunquid mibi neque. Adobanta.

²⁵ Min icbon chiacpadomboen nata. Abi chieshēnquid icbon cuidendac. Adembidi Nuquin Papan Esuquidistu tantiaquid nebi, quesho abi chieshēnesa menequin bēdamboen cuidendac. Abi chieshēnquid menenquiocquin comapenen cuidendac. Adenuidi tantiaquin cuidendac.

4

¹ Yuanquidēn, mimbi yuaido ambi nabanacpaden bēdamboen menebanta. Abuc con Icbombo iquec, quequin tantiaquin mimbi yuaido bēdamboen menebanta.

Chuibanaid utsi

² Esuquidistu tantiaquid utsibo natiatequidbēd abi icsaid iquec, quequin tantiec badedbadedquiecc Nuquin Papa chiecc onquedeneta. Aden chiecc onquequin, Mimbi ēbi tantiaquin nabanaid tantiec bēdambo iquebi, Papa, quequin Nuquin Papa chuideneta.

³ Adecbidi ēbipadquid utsibobēdta ēbi tantiec Nuquin Papa chiecc onqueta. Mimbi chienquiocnēdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, ēbi chuibeneta, cac aid chuibenesho bedshun mētaniaid nebi.

⁴ Pabado utsin onqueten onquesho cuembo chuime, Papa, ma aidontsen tantiapanu, quequin Nuquin Papa chuideneta.

⁵ Esuquidistu tantiesan ēbi tabadaid istenec, quequin tantiec bēdamboec tabadteneta. Adecc tabadquin Esuquidistu tantiesatsen tantiamenuquin Esuquidistu chuideneta.

⁶ ¿Mitsicquid mimbi tantiaid icpec? quetsiash tantiesa. Adsho tantiaquin mibi onquaidbēd sa batambo iquec daēdacimboecnuc Esuquidistu mimbi tantiaid utsibo chuita ma aidon tantiapanu queshun.

Abēd icquid chuibanaid

⁷ Nēbi ēbēd icquid utsi-utsien chuibanu. Tantiata. Mibi yacno nidshun Tiquicon ēbi tabadaid mibitedi chiendac. Aid Esuquidistu tantiaquidquio icsho ēmbi con utsi caid nec. Aidi Nuquin Icho nashunquid neoaic.

⁸ Èbéd icquid utsibo naic tabadaid mibitedi tantiamenuequin aidi mibi yacno nidmembali. Adoac mibi yacno nidash puduedshun èbi naic tabadaidbèdtabi Nuquin Papan chiaid chuibanac mibitedi èbi tantiec unèsquiocboedi cuishon queta.

⁹ Onesimobéd Tiquico mibi yacno nidec. Onesimo nuqui con utsi caidbidi nec. Onesimo mibi yacnoshon tishaid nec. Aidi chieshenquiocquin èbi nashunquid nec. Aid daèdshun èbéd icquidon nabamboed mibitedi chuibanendac.

¹⁰ Nèbi mibi yacno nidesa chuinu. Tantiata. Adistadico èbéd icnuec abembi quènèn nauedadondaid nec. Aidèmbi, Codosas yacnocquido tantiec tsadebi, quequin chuisho tantiasun dada uaimbi. Adomboembidi Madcosèn chiec. Madcos Bednaben utsi nec. Aidi yuecash mibi yacno nidtsiash. Ambo chosho isun yuedta.

¹¹ Esus cashumbic Ustus caidèn, Codosas yacnocquido tantiec tsadebi, quequin chiacpadomboen dada uaimbi. Adistadico yec Madcos yec Ustus yec quec aidtedtsèqui isadaidbo nec. Aidon èbèdtambi Esuquidistu chuibanquin èbi bèdambo icmequido neoaic.

¹² Epapadas mibi yacnoshon tishaid Esuquidistu chuibanquidquio nec. Aidèmbidi, Codosas yacnocquido con utsibo tantiec tsadebi, quequin chiacpadomboen dada uaimbi. Icsamenuequid icnuc mibi bunacpaden tantiadonemequin mimbi Codosas yacnocquido abi tabadme, Papa, quec badiadquidèn-badiadquidènquiec Nuquin Papa chiec onquec Epapadas.

¹³ Aidi mibi Codosas yacnocquido yec Daudiseya yacnocquido yec Yedapodis yacnocquido yec quequin tantiec chieshenquio yec Esuquidistu tantiadonequidombo ma icpanu quiash mibitedi chiec onquedenec.

¹⁴ Adembidi Ducasèn dauèchoquidèn Demasbèdtan, Codosas yacnocquido tantiec tabadebi, quequin chiacpadomboen dada uaimbi.

¹⁵ Codosas yacnocquidon nèid èmbi dada uaid mibitedishun isun, Pabado mibitedi tantiec tsadec, quequin utsibo chuita. Adomboembidi Daudiseya yacnocquido chuiota. Adomboembidi chido Nimpas cuèmèdquidèn shubun Esuquidistu tantiec iccuededquido chuiota.

¹⁶ Adembidi, nèid èmbi dada uaid isec onquequin mibéd iccuededquido tantiameshun Daudiseya yacno iccuededquido tsusiobo menequin, Nèid Pabado dada uaid isec onquequin mibéd iccuededquido tantiaméoa, quequin chui. Adembidi èmbi Daudiseya yacnocquido tantiaquin dada uaid bedshunshun isec onqueshun mibéd iccuededquido tantiaméoa.

¹⁷ Adembidi Adquipo naden chuita. Nuquin Icbon Esuquidistun chiacpadomboen naimbudta, quequin chuita.

¹⁸ Mibitedi tantiaquin èmbibi nèid dada uaombique. Èbi tantiec nidtiapimbo yec Pabado quènèn tsadeque. Aid puduemeta, Papa, quequin Nuquin Papa chiec onquedeneta. Nuquin Papan ma mibitedi bèdamboen ispanu, quec tsadebi.

Padi. Aidedi dada uaombi.

TESADONICA YACNOCQUIDON ISTE 1

Pabadon tauamboen chiaid

¹ Pabado nebi. Shubu dadpen icquid Tesadonica caid yacnocquido Nuquin Papabēdta Nuquin Icho Esus tantiaquido mibi chuiquin dada uaic nebi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbano caidbēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

Tesadonica yacnocquidon Esus tantiaid

² Naden mibi Nuquin Papa chianembi. —Tesadonica yacnocquido bēdamboen namequid yec mibi bēdamboshē iquec, Papa.

³ “Aidon Esus tantiaquin ambi chiapadomboen matses tantiaquin nashumbanosh. ‘Abi yacno abi tantiaquido buanuec Nuquin Icho Esuquidistu padpidec choec,’ quequin chieshtoenquo icquin Esusēn naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chianembi.

⁴ Con utsibobimboecquido mibi neque. Tanta. Mibitedi chuinu. Mibi tantiaquin ambi tantiapadomboen Nuquin Papan mibi Esus tantiamenēdash naden.

⁵ Ambembi chiaid chienquo icquin Esusēn naid mibi chuibanondambi. Aden chuibanac Nuquin Papan Mayanēn tantiamiapadomboen: —Abimbo caic —qeshun mimbi Esus tantiabonodac. Adembidi Esus tantiamenuc Sidbanochedobēd bēdamboec ēbi tabadsho isun: —Adquid abimbo chuiquid nendac —quequin mimbi ēmbi chuisho tantiondac.

⁶ Aden Nuquin Papan Esus tantiamiaido yec ēbi Nuquin Icho yapadec chieshtoenquo icsho isash mibitsen chieshtoenquo iccondac. Ēmbi Nuquin Papan chiaid chuibanac Nuquin Papan Mayanēn namiapadec cuishonquequin mimbi Esus tantiondac utsibon: —Padi. Chēn —quequin comapenen chieshēnquionobi.

⁷ Adec mibi bēdamboec tabadaid chuisho tantiash min nidaidēn icquido Masedonia yacnocquido Esus tantiaquido mibi yapadquiec tabadtiadquido icpac caosh. Adembidi tantiash nēid nidaid Acaya caid yacno tabadquidotsen adtiadquido icpac caosh.

⁸ ¿Anocquidonuidida mibi Esus tantiec bēdamboec tabadaid tantiapash? Padenquo. Mimbi chieshtoenquo icquin Esusēn naid chuibanac nidaid utsi-utsec yacno tabadquidon tantiac caosh. Adashic aido mibi caic: —Nuquin Papa tantiaquidombo nec —quecuededac caosh. Aden mimbi naid chuisho tantiashun: —Tantiash —qeshun nēmbi icquido mimbi naid chienquo iccombi.

⁹ Mimbi naid naden chuisho tantiombi. —Pabado chedon Esus chuibanosho tantiash: “Nuquin Papapadquid utsi nibēdec,” qeshun Nuquin Papabēdta Esus tantiabonac caosh. Adshun ambi papa quequin nacnenaid aidon tantienquo yanac caosh. Aden Nuquin Papan chiapadomboen natiadquido yanac caosh —quequin chioshi.

¹⁰ Adashic: —Adquid yec Nuquin Papa yacnuēsh aton mado Esus nidaidēn padpidec chosho istiadquido iquec. “Ēbi cuidmenquo icnuec abided cuidadec unēsacsho Nuquin Papan uincuemiaid Esus choec,” qeshun aid istiadquido iquec —quequin mimbi naid chioshi.

2

Pabadon bēdamboen chuibanondaid

¹ Mibi yacnoshon tauamboen ēmbi chuibanac Esus tantiaquid yanshun mimbitsen utsibo Esus chuibanondac.

² Shubu dadpen icquid Pidipos caid yacnoshon quēnēn nauedac ēbi mēyadec tsadboedi puduemeshun nidmiac mibi yacno nidshun Esusēn naid mibi chuibanondambi. Utsibo dadpenshun chieshēnubi Nuquin Papan namiapadomboen cuesambo icquin mibi Esus chuibanondambi.

³ ¿Ēmbi naidquio namenuendambi adodionda? Padenquo. ¿Ēbi tantiamenuendambi chuibandionda? Mambi padenquo iccondac. ¿Ambembi chiaidtamibi mibi chuibandionda?

⁴ Mambi mibi abimbo chuibampondac. Matsesēn naidtedi tantiaquidēnquo Nuquin Papan: —Aidēn abimbo chuibantsiashe. Con Mado Esusēn naid chuibenquid icmenu —caidquio nebi. Adquid yec matses: —Mibi bēdambo iquec —cameteuidi bunenquo iquebi. Nuquin Papa: —Mibi bēdambo iquec —camenuembimibi ambi chiapadomboen naic.

⁵ Ēmbi tantiapadomboen mibi namenuc: —Mibi bēdambo iquec —quenquo iccondabi. Min piucquid bednuen muaquin chiamo iccondambi. Nuquin Papan isnubi abimbo chiondambi.

⁶ ¿—Pabado bēdambo iquec —matses camenuendambi chuibandionda? Mibi adometi-
apimbo icquin utsibotsen adometiapimbo iccondabi. Esusēn naid tantiamenuembimbi
bēdamboen chuibanondac.

⁷ —Ēbi chuibeneta —Esuquidistun caidquio nebi. Adoaid icquin tsusio dapan chi-
acimboen: —Nata —quequin ¿ancabudquindambi mibi chuibandionda? Mambi padenquio
iccondac. Anin bacuē nēishmenquio icquin bēdamboen namiacimboembimbi nēishmenquio
icquin mibi chuibanondac.

⁸ Mibi tantiaquioquin chieshtoenquio icquin Esusēn naid chuibanec yuec mibēd
tabadondabi. Aden naic tabadec bēdambo iccondabi.

⁹ ¿Ada tantie, con utsibo? Aden Esusēn naid chuibanquin nidaidēn capuquid yua bitsibi
tuscaquin shubumpi nacnendeniondambi. Mibi caic: —Ēbi menianiac aton piucquid
naimēdnushe —quiash con piucquid bednuec chonoadteniondabi. Mimbi isnubi adondabi.

¹⁰ Mibēd yec Nuquin Papan chiaid niaquenquio yec bēdamboec tabadondabi. Utsibo:
—Pabado chedo icsambo icquido nec —quetiapimbo icnuc aduidequi tabadondabi. Ad-
shobini mimbi ispondac. Adembidi Nuquin Papan ispanēdashi.

¹¹ Amēn aton mado: —Naden na —quequin nēishmenquio icquin chiacimboen mibi
abentse-abentsen bēdamboen chuibanquin

¹² mibi bēdambo icmepondambi. —Nuquin Papan: “Icsatiapimbo icquid icmequin ēbēdi
tabadmendambi,” quequin Esus tantiamiaido mibi nec. Adquid Nuquin Papan chiacpadec
bēdamboec tabadquid neque. Ambi chiaid niaquenquio yec bēdamboec tabadnuna —
mibitēdi cadeniondambi.

¹³ Aden Nuquin Papan chiaidquio chuibanac: —¿Ambembida chuidiosh? Nuquin Papan
chiaidquio ma Pabado chuiboc —mibi quianondac. Aden Nuquin Papan chiaidquio tanti-
ash Esus tantiaquido yanash aidquibidi chuisho tantiash mibi bēdambo yanec. Mibi adaid
tantiaquin Nuquin Papa chianembi naden. —Tesadonica yacnocquido aden bēdamboen
tabadmequid yec mibi bēdamboesh iquec, Papa —quequin Nuquin Papa chianembi.

¹⁴ Nidaid Udeya caid yacnocquido yacpadquiech chieshtoenquio icquin mimbi Esus
tantiec. Udeya yacnoshon Esus tantiaquido aton matses isadaidbon cuestiadquio icquin
chieshēnac chieshtoenquio iccondash. Adomboembidi aid matses mibi yacno tabadquin
chieshēnac mibi chieshtoenquio iccondac.

¹⁵ Isadaidbombidi Nuquin Papan chiaid chuibanquido cuesun secapampic. Adembidi
Nuquin Icho Esus unēs uapac caondash. Adomboembidi chieshēnquin mibi yacnoshon
cuemepondashi. Aden Nuquin Papa chieshēnquinc matses abitēdi chieshēnquinc caquin

¹⁶ isadaidbon matses utsi isadaidpembo ēbi chuimetiapimbo icpondash. —Esus tanti-
asho Nuquin Papan bēdamboen isquin mibi cuidenquio iquendac —quequin ēmbi chuisho:
—Padi. Aid chienda. Cueschitomane —capondashi. Aden ambi chiaid ēnenquio icquin niac-
niacsho Nuquin Papan aido cuidquiendac.

Pabado istante bunaid

¹⁷ ¿Mibi yacnoshon aden chieshēmēnquidon cuemiac mibi tantienquiodambi ictionda?
Mibi unēsquio icnuc mibi instantiadquio iccondabi.

¹⁸ Adec: —Padpiden istanu —quesho Satanasēn nac padenquio iccondabi. Padpidec:
—Nidnu —quesho adembidi. Padpidec: —Nidnu —quesho Satanasēn nacbidi padenquio
iccondabi. Nēbi adecbidi mibi instantiadquio iquebi.

¹⁹ Nuquin Icho Esuquidistu choan aidbēd tabadquin ¿tsutsimbi ispatsia? ¿Tsutsi isashini
cuishonquepatsia? ¿Tsutsi isumbimbi: —Is. Ēmbi chuibanac Esus tantiabendonaido neque
—capatsia? Mibibimbi caic.

²⁰ —Esus tantiec bēdamboec tabadosh —quesho tantiash mibi tantiec cuishonquebi.
Adembidi mimbi naid isun: —Mimbi bēdamboen naondac. Mimbi chuibanac ēbi tani-
tiabenondash —ēbi caindac Nuquin Icbon.

3

Istan, quequin Timoteyo chiaid

¹ Aden mibi tantiec: —“¿Mitsipadec tabadpec?” quequinuidtsēqui tantiec tsadtiapimbo
iquebique. Istan —caondambi Timoteyo chuiquin. Adshumbic shubu dadpen ic-
quid Atenas caid yacno tabadec ēbēd icquid utsi Sidbano chuiquin: —Timoteyo nidan
nuquiuuidtsēqui icnuna —caondambi.

² Ēmbi: —Nid —caondaid Timoteyo Esus tantiaquid yec nuquin utsi nec. Ēbēdtan Esus
chuibenequidquio nec. Adquid icsho nadopondambi. —Tesadonica yacno nidshun Esus
bēdamboen chuibantan. Adembidi: “Esus tantiec chieshtoenquio yec nadquiech tabadquid
nendac,” quequin bēdamboec tabadquin ismetan, Timoteyo.

³ Aton matesen compamen chieshēnac chieshtoshon Esus tantienquo yanushe. Chuitan —caondambi. Aden chieshēnte mibi chiondambi. —Nuquin Papan tantiacpadomboen Esus tantiaquid chieshēnendac —quequin mibi chiondambi.

⁴ Aden mibēd icquin chuideniondambi. Adsho ěmbi chiacpadomboen nuqui chieshēnondash.

⁵ —“Ēbi nidan chieshēnac ĵadecbidida Tesadonica yacnocquido chieshtoenquo icpatsiashba?” quequidtsēqui tantiec tsadtiapimbo iquebique. Istan —caondambi Timoteyo chuiquin. —“Icsamequin tanu,” quequidēn Satanasēn namiac chieshtoshon Esus tantienquo yanushe. Istan. ĵAda ěmbi Esus chuibanondaido bēdamboec tabadeque? —caondambi Timoteyo chuiquin.

Timoteyon chuituidaid

⁶ Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquo yamposh —quequin chuiposh Timoteyon. Adashic: —“Pabado chedo bēdambo iccondash. Aido padpiden istiadquo iquebi,” quiosh Tesadonica yacnocquido —queposh Timoteyo. Adembidi mibi istantiaquidquo iquebi.

⁷ Timoteyon chuiboed tantiaash bēdambo yanobi. Nēmbo icquidon chieshēnac shubiantiadtsēcquo iccobi. Adboedi mibi caic: —Chieshtoenquo icquin Esus tantiosh —quesho tantiaash bēdambo yanobi.

⁸ Mimbi aden naid tantiaash dayacquio yacnimboec iquebi.

⁹ Aden tantiaashun Nuquin Papa chianembi naden. —“Tesadonica yacnocquido bēdambo iccosh,” quesho tantiaash cuishonquebi, Papa. Mimbuidtsēqui namiac chieshtoenquo iquec. Aden namec mibi bēdamboshē iquec, Papa.

¹⁰ Aido istiadquo iquebi. Mimbi chiaid bēdiactsēc tantiaasho aidobēd tabadquin bēdamboen chuibantsiambique. Ēbi ano nidmeta, Papa —quequin Nuquin Papa chianembi.

¹¹ —Nuquin Icho Esusbētan Nuquin Papan nēbimbobi ambo nidmepashuni —caimbi.

¹² Adec mibēd ictiadquo icquin Nuquin Papa mibi chianembi. —Ēmbi aido tantiaquiacpadomboen utsibobēd tantianameta, Papa. Bēdiactsēc tantianantsēboedobi comapenec tantianamequiota, Papa. Adembidi utsibotsen bēdamboen ismeta.

¹³ Aden bēdamboec tabadquid icmeta, Papa. Mimbi adoac chieshtoenquo yec bēdamboec tabadtsiash. Adsho mimbi mibi yacnoshon uaido mayan bēdabobēd nidaidēn padpidec choshon con Icho Esusēn: “Tesadonica yacnocquido icsambo iquec,” catiapimbo ictsiash. Adembidi: “Icsambo iqueque. Cuidnuna,” catiapimbo mimbi ictsiac, Papa —quequin Nuquin Papa chianembi mibi chuiquin.

4

Chidobēd bēdamboec tabadte chiaid

¹ Tantia, con utsibo. Chiaid utsitsen mibi chuinu. —“Bēdambo mibi iquec,” Nuquin Papa camenuc bēdamboec tabadta —quequin ěmbi chiondacadpiquec tabadta. Nuquin Icho Esus tantiaquiec adta. —Bēdamboec tabadosh —quesho tantiaashun: —Adquiequi tabadta —caimbi mibi.

² Nuquin Icho Esusēn namiac aidēn chiaidquo mibi chuibanondambique. Aid tantiaquiec bēdamboec tabadta.

³ Nuquin Papan tantiamiacpadquiec tabadquidēn nadoquid yendac. Utsin chido chudenquo icquin aton chidoidtsēqui chudquid yendac. Adembidi chidon dada utsi chudmenquo icquin aton bēnēuidtsēqui chudmequid yendac.

⁴ Adec Nuquin Papan chiaid niaquenquo yec abi bunaid mēmunc dada ambi inaidquo aton chidoidtsēqui chudec aidbēd bēdamboec tabadsho: —Bēdambo iquec —catsiash Nuquin Papan.

⁵ Nuquin Papa tantiesabimboec tabadenda. Esus tantiesambien comapenec tsien bunquin aton chidopenquo chudendac. Adembidi Nuquin Papa tantiesa icquin chidon utsin shui bunquin aton bēnēpenquo chudmendac. Adec tabadenda.

⁶ Bēnē nidan aton chido abentsēqui uequid istuidshun chudenda. Adoquid Nuquin Papan cuidendac ěmbi chiondacadpadomboen.

⁷ —Opabimboec chudnanec ma icsamboec tabadnu —ĵaquequinda Nuquin Papan Esus tantiaquido nuqui icmediac? Padenquo. —Ma bēdamboec tabadnu —quequimbien Esus tantiaquido nuqui icmiaque. Bēdamboec tabadnuna.

⁸ Aden chuiquin aton Mayan nuqui menequidēn Nuquin Papan chiaid chiec nebi. Aden ěmbi chuiboed niacquin Nuquin Papan chiaidquo mimbi niactsiac.

Adecbidi tantiananquiota, quequin chiaid

⁹ —Bëdamboec tantiananta —quequin padpiden chienquo iquemi. Nuquin Papan tantiamiac Esus tantiaquido yec mibi tantianec.

¹⁰ Min nidaid Masedonia caidën tabadquido Esus tantiaquido utsibotedi mimbi tantiec. Mibi yacpadquiecbidi tantiananquoquin utsibotsen tantiaquiota.

¹¹ Èmbi chiondacadquieac chieshëmënenquo yec bëdamboec tabadta. Utsi icsaiduidi chienquo yec bëdamboec tabad. Chieshenquo yec dayacquio yec chonoadta.

¹² Adash bunenquo mibi ictsiac. —Con na nacnenambo iccombique. Mitsana beccho —mibi quenquo ictsiac. Mibi adquo icsho isash Esus tantiesabo: —Esus tantiaquido bëdamboec tabadec —quetsiash.

Esusën abi yacno abi tantiaquido buante chiaid

¹³ Tantia, con utsibo. —“Esusën abi tantiaquido uincuemendac,” quequin chuisho mimbi tantiabi icnushe —qeshun mibi bëdamboen chuinu. Esus tantiesabo: —Èmbi tantiaidquo padpidec isadenquo iquec —quec yuecquo shubiabimboec shubienda. —Èbipadquid Esus tantiaquid Nuquin Papa yacno istuidendambi —quec ma yuecquo shubianenquo icnueshun Esusën uincuemete mibi chuinu.

¹⁴ —Unës uaqui Esus uincuenacpadecebidi nuquitsen uincuenendac. Esus tantiaquido unësacsho uincuemeshun Nuquin Papan abi yacno aton Mado Esus buamendac —quequin nuqui tantiec.

¹⁵ Tantia. Nuquin Icho Esusën chiaidquo mibi chuinu. Nuquin Icho Esus nidaidën padpidec chonoc aid istuidec Esus tantiaquido unësabi icquido abia nidenquo iquendac.

¹⁶ Padenquo icnubien Nuquin Papa yacnuësh choec Nuquin Icho Esusba nua cuëdtuidendac. Adnubien Nuquin Papan abi yacnoshon uaido mayan bëdabo chuiquid dapatsen nua cuëdtuidoindac. Adnubien Nuquin Papan chiacpadomboen utsin nua shoncatuidendac. Adnubien Esusën abi tantiaquido unësaidotedi abia aton dada chuca uaquin uincuemendac.

¹⁷ Adoquien aidobëdi Esus tantiaquido unësabi icquido tsidadash aidotedi abuctoendac Nuquin Papabëd tabadec nidec. Abitedi abuctoquimbi abi bëquedec Esus chosho istuidendac. Adash Esusbëd Nuquin Papa yacno nidash anobi nuqui quenendac.

¹⁸ Èbi adsho tantiashun nadota. Aton matses unësaid tantiec shubiquido bëdambo icmenuen èmbi chuiboed chuita.

5

Esus chote chiaid

¹ Tantia, con utsibo. Mibi chuinu. —Nëidtedec ushash Esus padpidec choec —quequin chuitiapimbo iquebi. Adembidi: —Nëidted seta matamiash choec —quequin dada uatiapimbo iquebi. Tantienquo iquemi. Naden mibi chiondambi.

² —“Nëid inchëshëmbi ampequid choec,” quequin tantiatiapimbo yacbimboec: “Aid ushën Nuquin Icho choec,” quequin tantiatiapimbo icnuc Esus choindac —quequin mibi chiondambi.

³ Esus tantienquo yequi matses dadpen: —Cuesnanenquo yec nuqui bëdamboec tabadec —qeshobien ambi: —Èbi cuidendac —cacmaidënquo padpidec choshon cuidquidendac. ¿Mitsipadquo chido bacuë usunquid icpec? —Aid ushënquo tishembi —quequin tantiatiapimbo yequi badedquo nëncuenec. Adecbidi ambi: —Choec —cacmaid Esus badedquo chosho abi tantiesabon cuenëntiapimbo iquendac.

⁴ ¿Esus chonoda nuqui dacuëdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nëbien Esus chochitec —quec bëdamboec nuqui tabadnubi Esus chonoc nuqui dacuëdenquo iquendac.

⁵ ¿Pacuënëdacadbimboecquidoda nuqui nedi? Padenquo. Pabiate paposhquiacbimboecnuc Esus bëdamboen tantiamiaido yec bëdamboec tabadquido ma nuqui neyoc. Adecbidi bëdamboec tabadnuna.

⁶ Ushquin pabiaten tantienquo yacbimboen utsibon Nuquin Icho Esus tantienquo iquec. Adec tabadenquo icnuna. —Esus tantienquo icmane —qeshun nuqui icsate bunaid nainquo icquin mëmununa. Nuquin Icho chosho istiadquo yec bëdamboec tabadnuna.

⁷ Esus tantiesaboen inchëshën ushquin tantienquo yacbimboec iquec. Adquiecbidi tantiaduenen acte paëmo icquid acquido nec.

⁸ Adquidpenquo yec Esus tantiaquido yec bëdamboec tabadnuna. Nuqui icsate bunaid nainquo icquin mëmununa. Sondado: —Shocosh tsasimbo icquid shictonquenu. Sicsenushe —quiacbimboec icnuna. Satanasën Esus tantiamenquo icnushe. Esus tantiaquidquin matsetsen tantiaquionona. Adecbidi sondado: —Masenushe. Shocosh tsasimbo icquid mauete mauenu —quiacbimboecbidi icnuna. Satanasën icsamboen tantiamenquin

chieshtomenushe. —Esus tantiasho cuidenquo icquin Nuquin Papan abi yacno ëbi tabadmendac —quequin bédamboen tantianuna.

⁹ ¿Cuidnuenda Nuquin Papan nuqui Esus tantiamediac? Padenquo. Abëdi tabadmeneu Nuquin Icho Esuquidistu nuqui tantiamiac.

¹⁰ Aidi abi tantiaquid cuidmenquo icnuec abided cuidadec unësac caondash. Aidën padpidec choshon abi tantiaquidotedi buanshun abëdi tabadmendac. Unësaid uincuemidobëdta unësabi icquidotedi adoendac.

¹¹ Ëbi adsho tantiashun mimbi nabocpadomboembidi Esus tantiec bédambo icnuec ëmbi chuiboed chuinanquiota. Adechidi bédamboec tabadec: —Adequi tabadnuna —cananta.

Bédamboec tabadte Pabado chiaid

¹² Esus mibi chuibanquido bédamboen ista. —Nuquin Ibon chiapadomboen chieshtoenquo icquin nuqui chuiquidën nuqui bédamboen chuibanec —quequin aido bédamboen tantiata. Mibi nashunquidombo neque. Aidon: —Nuquin Papan chiaid niaquenquo yec bédamboec tabadnuna —quequin chuisho bédamboen tantiata.

¹³ —Nuquin Papan chiaid bédamboen tantiaquidombo nec —quequin bédamboen ista. Adechieshëmënenquo yec bédamboec tabadta.

¹⁴ Mibëd icquido naden chuiban. Chieshquid icsho: —Mibitsen chonoadta —cata. Dacuëdsho: —Dacuëndenda —cata. Esus bëdiactscëc tantiatscëcsho bédamboen chuiquin Esus tantiamequiota. Dada padishquio icsho nashunta. Aden nëshenquo icquin abitedi bédamboen ista.

¹⁵ Utsin chieshënac cuidnanenquo yec bédamboec tabadta. Mibëdtan Esus tantiaquidobëd bédamboec isnanquin utsibotsen bédamboen ista.

¹⁶ Aden Esus tantiec ënëdenquo yec cuishonquianeta.

¹⁷ Adembidi Nuquin Papa chianequin: —Ëmbi chiapadomboen ëbi nashunquin utsibotsen nashunta, Papa, —quequin chianeta.

¹⁸ ¿Mimbi chiapadomboen Nuquin Papan nasho isunuidida mimbi: —Nuquin Papa bédambo iquec —cape? Nadoac bédambo ictsiash. Bédamboec tabadquin: —Mibi bédamboshë iquec, Papa, —cac bédambo ictsiash. Daicsabudshumbic adembidi nac bédambo ictsiash. Paëmbo icnubi adembidi. Mitsana icnuc adembidi. Mitsana nibëdnubi adembidi. Utsibon chieshënaqui adembidi: —Mibi bédamboshë iquec, Papa —cac bédambo ictsiash. Aden Nuquin Papan: —Ma Esus tantiaquidon adono —quequin tantiacpaden mimbi natsiac.

¹⁹ Nuquin Papan Mayanën Nuquin Papan chiaid tantiamiac pamumëdacimboc tabadenda.

²⁰ Aden Nuquin Papan Mayanën tantiamiac utsibotsen chuisho: —Mue nec —badedquio cainda. Chuishoba tantiata. —Nuquin Papan chiaidquio chuino —quesho mamëshunenda.

²¹ Adenquo icquin: —¿Nuquin Papan chiaidquibida chuibanec? Tantiabono —cata. Aden tantiashun Nuquin Papan chiaidquio isbanta. Aden isbanquin abimbo chuisho tantiashun: —Ai, Nuquin Papan chiaidquio chiec —queshun aidën chuisho bédamboen tantiata.

²² Adembidi Nuquin Papan chiaid isbanquin icsamboen chuisho tantiashun: —Nuquin Papan chiaidpenquo chiec —queshun aidën chuisho tantienda. Aidën chiapadomboen nainda.

²³ Mibi Nuquin Papa chianembi. —Matses bédambo icmequid icquin mimbi chiapadomboen aido name, Papa. Mimbi chiaidquio bédamboen tantiamequin bédamboen tabadme, Papa. Mimbi adoac bédamboec tabadnuc choashun con Icho Esusën: “Aido bédambo iquec,” catsiash, Papa —quequin Nuquin Papa chianembi mibi.

²⁴ Nuquin Papa nuqui Esus tantiamequid muesambo nec. Adquid icquin ambi chiapadomboen nuqui chieshtomenquo iguendac.

²⁵ Nuquin Papa ëbi chianeta. —Abëd icquidobëdta Pabado bédamboen nameta, Papa —quequin Nuquin Papa chianeta.

²⁶ Ambocquido Esus tantiaquidotedi chuiquin: —Pabado chedon nuqui tantiaquiec —quequin chuiban.

²⁷ Nuquin Ibon tantiacpaden chuiquin dada uaombique. Ëmbi dada uaboed nëid isquin ambocquido Esus tantiaquidotedi chuiban.

²⁸ —Nuquin Icho Esuquidistun bédamboen ispashun —quequin mibi tantiembi. Padi. Aidedi dada uaombi.

TESADONICA YACNOCQUIDON ISTE 2

Pabadon tauamboen chiaid

¹⁻² Pabado nebi. Tesadonica yacnocquido Nuquin Papabēda Nuquin Icho Esus tantiaquido mibi chuioaquin dada uaimbi. —Nuquin Papan Esuquidistubēdan bēdamboen isquin bēdambo icmepashun —caimbi mibi. Ēbēd icquin Sidbanobēdan Timoteyon: —Nuquin Papan adopashun —quequimbidi mibi tantiec.

Nuquin Papan Esusbēdan matses cuidte chiaid

³ —Esus tantiaquidēn: “Aden naic mibi bēdamboshē iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bēdiactšec tantiašecboedombi nēbi Esus tantiabededosh,” quiošh, Papa. “Adecbidi bēdiactšec tantianamboedi nēbi comapenec tantiananosh,” quiošh. Aden aido bēdambo icmec mibi bēdamboshē iquec, Papa —quequin chianembi mibi.

⁴ Mimbidi aden bēdamboen naid Esus tantiaquido utsibo chuibeniombi. —Dadpenšhun chieshēnaqui chieshtoenquio icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

⁵ Adec chieshtoenquio icquid icquin nuqui naden tantiec. —Ēbi chieshtomenquio icquid abitedishun naid tantiaquidquio nec. Adquid icquin icsambo icquido cuidquān bēdambo icquido Nuquin Papan bēdamboen isec —quequin nuqui tantiec. Adec chieshtoenquio icquin Esus tantiašho Nuquin Papan: —Adquido ěmbi namiacnombi chomeshun ěbēdi tabadmendambi —nuqui caindac.

⁶ Nuqui chieshēnquidon naidtsen tantiaquid icquin Nuquin Papan aido cuidendac.

⁷ Aden nuqui chieshēnquido cuidquān aidon nuqui natiamiaid nuqui bēpiscudmendac. Abi yacnuēšh mayan bēdabo ambi comapenen tantiaquin namiaidobēd choshon Nuquin Icho Esusēn adoendac.

⁸ —Icsaisambo yec matses cuidquid nebi —quequin tantiamenuec bēchamauanquiec choshon Nuquin Papa tantiesabo cuidendac. —“Nuquin Icho Esus tantiašho Nuquin Papan mibi bēdamboen istiašh,” quequin chuisho tantiatipimbo iquebi —quequin abi tantienquio icsho Esusēn cuidendac.

⁹ Cacumiācbimboen abi yacno puduedmenquio icquin ambi icsambo icquido cuidacno nidmendac cuentiapimbo icnuc. Adoac Esus abitedishun Icho yec bēdamboshē isadsho isec tabadiapimbo iquendac.

¹⁰ Aden ambi icsaido cuidte ušhēmbi Esus choshō abi tantiaquido: —Ēbi cuidmenquio icnuec abided cuidadaid Nuquin Icho bēdamboshē iquec —quequin aton Icho isec tabadendac. Ēmbi Esus chuibanac aid tantiabēnondaido icquin mimbitsen Esus choshō isendac.

¹¹ —Aidbēdtambi Esus isendambi —quequin mibi Nuquin Papa chianembi naden. —Mimbidi Esus tantiamiaido Tesadonica yacnocquido bēdamboen tabadme, Papa. Aido: “Esus tantiaquin ambi chiacpadomboen natiadquio iquebi,” quesho ambi chiacpadomboen name, Papa. Comapenen tantiaquidquio mibi neque. Adota, Papa.

¹² Aden mimbidi con Icho Esuquidistubēdan bēdambo icmiac Esus tantiec bēdamboec tabadtsiašh, Papa. Adec bēdamboec tabadsho isash utsibo mibi caic: “Abi tantiaquid icsho Esusbēdan Nuquin Papan aden bēdamboen tabadmec. Aton Icho Esuquidistubēd Nuquin Papa bēdamboshē iquec,” quependac utsibo, Papa —quequin Nuquin Papa chianembi mibi tantiaquin.

2

Icsamboshē icquidba chote chiaid

¹ Tanta, con utsibo. Mibitēdi chuinu. —Abi yacno tabadmenuen buanuec Nuquin Papa yacnuēšh Nuquin Icho Esus ěnden choac —quesho tantiašh

² dacuēdtanēnda. Mibi yacnoshon ŷtsuntsin adec muaquon chuiposh? Aidon: —Tantia. Nuquin Papan Mayanēn tantiamiacpadomboen chuinu. Nuquin Icho Esus ěnden choac —quec nuwapašh. Ambembi chiaidien chuichitash. —Naden Pabadon chiaid iquec —quequin ěmbi dada uaidbimboecquid isquimbien chuichitash.

³ Adec muaid tantiašh: —Abimboen cachitosh —quēnda. ŷNuquin Icbobada chopadic? Padenquio. Utsibain choendac. —Nuquin Papa caidēn chiaid tantiatipimbo iquebi —quec matses icsamboec tabadnubien Nuquin Papa chieshēnquidquio icsamboshē icquidba choash matses dadpenquio chuiquid dapa iquendac. Aid Nuquin Papan cuidtequidquio nendac. Aidba choabi icnuc Esus choenquio iquendac. Icsamboshē icquidbain choendac.

⁴ Aid chuiquid dapa yanashic Nuquin Papa dēniacte bunquieuc Nuquin Papa tabadte shubu uashunaidēn puduedshun: —“Comapenen tantiaquin ēbi nashunquidquo nec,” quequin mimbi Nuquin Papa caid nibēdeque. Ēbiuidtsēqui tantiata —caindac matses abitedi chuiquin.

⁵ Aden mibi chuideniondambi. ζTantienquioda ique?

⁶ Nuquin Papan tantiacpadēnquo chomenuen uidēnuac icsamboshē icquid nēbi choenquio iquec. Nuquin Papan tantiacpadēnquo choendac. Ēmbi chiondacpadquid abi chomequio icquid mimbi tantiec.

⁷ Nēbi isadenquio icquidēn Satanasēn namiac matsesēn Nuquin Papan chiaid niacniacbededec. Padnuen icsamboshē icquid choabi iquec. Aid chomenquio icquid nidabi icnubi icsamboshē icquid chuiquid dapa yantiapimbo iquendac. Abi chomenquio icquid nidmiambien

⁸ icsamboshē icquid matses chuiquid dapa iquendac. Adnubien Nuquin Icho Esusēn: —Ēbien matsesēn Icbombo nec —quequin matses abitedi tantiamenuec choshon icsamboshē icquid: —Unēsta —caquinuidtsēqui unēs uashunendac.

⁹ Adec Esus choabi icnuc icsamboshē icquid chuiquid dapa yanendac. Adquid yanshumbic Satanasēn tantiamiacpadomboen comapenen tantiaquin dadpenquio nabanquin ismendac. —Comapenen tantiaquidquo nebique. Istac —quequin ambembi chiaid tantiamenuen aden nadatiambo icquin nabanquin ismendac.

¹⁰ Adec icsauidequi tabadquid yec comapenec muasho tantiaquid: —Abimbo caic —quependac Esus tantiesabo Nuquin Papan cuidtequido yec. Aidon Esus chuibenequidēn Nuquin Papa yacno tabadte abimbo chuisho pamumēdacimboen tantiatiapimbo icquin ambembi chiaiduidtsēqui tantiendac.

¹¹ Aden ambi chiaid niac-niacuidequi icsho Nuquin Papan: —Abi bunaidquio ambembi chiaidquio chuisho ma tantiapanuna —quequin namiac: —Mue nec —quequin tantienquio iquendac. Utsi muasho tantiaquid badedi: —Abimbo chiech —quetsiash tantienquio yec.

¹² Aden ambi chiaidquio tantiatiapimbo icquin aid niac-niaquec icsateuidi bunsho Nuquin Papan cuidquidendac.

Nuquin Papan tantiamiaid

¹³ Nuquin Icbon mibi tantiaquieuc. Ēendenquimboshē matses uabi Nuquin Papa nuqui caic: —Ēbi yacno tabadmenuen Esus tantiamequin aido bēdambo icmendambi —quepampic. Adshumbic aidēn chiapadomboen aton Mayanēn namiac Nuquin Papan chiaidquio tantiaquid Esus tantiec mibi bēdamboec tabadcuendac. —Adquibidi iccosh —quesho tantiaquid Nuquin Papa chianembi naden. —Aden aido bēdamboen namequid yec mibi bēdamboeshē iquec, Papa —quequin chianembi mibi tantiaquin.

¹⁴ Nuquin Papan chiaidquio ēmbi chuibanac mimbi Esus tantiamenondac. Abi yacnoshon Nuquin Icho Esuquidistupadquio bēdamboeshē icmenuen aden Nuquin Papan mibi Esus tantiamiac.

¹⁵ Ēbi adsho tantiaquid ēmbi chiondacpadomboen chieshtoenquio icquin Esus tantiaquid. Ēmbi mibi bēisquin chiondaidbēdta ēmbi dada uaquin abimbo chiondaid bēpiscudenda.

¹⁶ Nuquin Icho Esuquidistubēdta Nuquin Papan nuqui tantiaquin bēdamboen isec. Adembidi: —Nuquin Papa yacno Esusbēd iquendabi —quequin tantiamequin dayacquo yachimboecnuc nuqui icmec.

¹⁷ Adquid icsho chianembi naden. —Tesadonica yacnocquido chieshtomenquio icquin Esus tantiamequin bēdamboec tabadquid icme, Papa. Adembidi bēdamboec chuinanquid icmequin nashunanquid icme, Papa —quequin Nuquin Papa chianembi mibi tantiaquin.

3

Nuquin Papa ēbi chianeta, quiaid

¹ Tantiā, con utsibo. Mibi chuinu. Nuquin Papa ēbi chianeta. —Nidaid utsi-utsiec yacno nidmeshun Pabado chedo matses dadpenquio Esusēn naid bēdamboen chuibame, Papa. Mimbi bēdamboen chuimiāc ēmbi Esus tantibenondacpadomboen utsibon dadpeshun Esus tantiabentsiash, Papa.

² Aden Esus chuibansho isun Esus tantiesabo chieshēmēnquidon: “Pabado cueschitono,” casho cuesmenda, Papa —quequin Nuquin Papa ēbi chianeta.

³ Nuquin Icho bēdambo iquec. Muesambo icquin ambi chiapadomboen nuqui bēdamboen dayun uaindac. —Ēbi tantienquio yanushē —queshun nuqui chieshtomenquio icquin Satanasho nuqui yuametiapimbo iquendac.

⁴ —Aden Nuquin Icbon bēdambo icmiāc ēmbi chiapadomboen naboedi adembidi Tesadonica yacnocquidon naindac —quequin tantiombi.

⁵ Aden mibi tantiaquin naden Nuquin Papa chianembi: —Con Icho Esuquidistun tantiamiacpaden: “Nuquin Papan ëbi tantiaquiec,” quequin Tesadonica yacnocquido tantiameta, Papa. Esusën chieshtoenquo icquin nacpadomboembidi aido chieshtoenquo icquid icmeta, Papa —quequin Nuquin Papa chianembi.

Esus tantiaquido uspuenquo icquid

⁶ Tanta, con utsibo. Nuquin Icho Esuquidistun: —Ëbi chuiheneta —caidquo icquin mibi chuinu. Esus tantiaquido utsi-utsiec ëmbi mibi chiondaid niac-niaquec chieshuidequi icsho isash aïdbëd chieshec tabadenda.

⁷ —“Ëbëd iquec Pabado dayacquo iccondacpadquiec chieshenquo yequien tabadtiað,” quiosh —quiosh mibi caic. Abimbo mimbi cac. Mibëd yec dayacquo iccondabi. Chieshenquo yec chonoatdeniondabi.

⁸ Mimbi pete meniac ^çcon piucquid mibi menenquiodambi ictionda? Bedquin mambi mibi menianepondac. —Ëbi meniac aton na naimëdnushe —quiash con piucquid bednuec chonoatdeniondabi.

⁹ —Esus tantiaquidon abi chuibanquid menenquo icquid —çquectabi ique? Padenquo. Esusën naid chuibanquid ambi chuibanaidon meniaquien bëdambo ictsiash. —Chieshenquo icquin ëmbi nacnensho isun ma adembidi Tesadonica yacnocquidontsen nanu —quiashini chonoatdeniondac.

¹⁰ Mibëd tabadquin naden chiondambi. —Aton na nacnenenquo yec chieshuidequi icsho pemenquo icquid —quequin chiondambi.

¹¹ Mibi caic: —Utsi-utsiec chieshuidequi tabadosh. Utsi icsaiduidquo chiec tabadosh —quetuidosh.

¹² Uspun tanta. Nuquin Icho Esuquidistun chiaid mibi chuinu. Chieshuidequi tabadenda. Mitsanabi penuec chonoadta.

¹³ Nuquin Papan chiacpadomboen naic chieshtoenda. Chieshtoenquo icquin bëdamboen-uidi nata.

¹⁴ Nëid dada uaquin ëmbi chiaid niac-niacsho ista. Adec icsasho isash: —“Icsamboen naombi,” quequin ma tantiabenu —quiash abëduidi iquenda.

¹⁵ Aid chieshënenquo yequi adta. Mibipadquid Esus tantiaquid icsho naden chui. —Esus tantiaquid adesa ye. Padi. Bëdamboequien tabadtiað —quequin chuita.

Pabadon ënquin chiaid

¹⁶ Mibi tantiaquin Nuquin Papa chianembi naden. —Bëdambo icmianquidquo icquin Con Icbonquo ma aido dacuëdenquo icquid icmepanuna, Papa. Aidobëd ma Esus tëshëdenquo icpanuna, Papa —quequin Nuquin Papa chianembi.

¹⁷ —Ista. Ëmbimbo dada uaid nëid neque —quequin ëmbi nëidtedpactsëc dada uaid isun: —Pabadon chiaidquo nec —quequin mimbi tantiendac.

¹⁸ —Nuquin Icho Esuquidistun bëdamboen ispashun —caimbi mibi. Padi. Aidtedi dada uaombi.

TIMOTEYON ISTE 1

Tauamboen chiaid

¹ Pabado nebi. Nuquin Papa yacno yuedanquidën Esuquidistun: —Ëbi chuibeneta —caidquo nebi. Aton Mado tantiasho nuqui bédamboen isquidën Nuquin Papan: —Con Mado Esus chuibeneta —caidquo nebi.

² Ëmbi chiondac Esus tantiabenash con mado icbobimboecquid mibi neque. Mimbi iste nêid dada uanu. Mibi tantiec: —Nuquin Papan aton Mado Nuquin Icho Esuquidistubêdtan con mado bédamboen isquin bédambo icmepashun —quiobi.

Chiaid utsi chienda, quequin chiaid

³ Tantia. Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnocquidon: —Nuquin Papan chiaidquo chuinu —queboedombi aidquo chienquo icsho naden chuita. —Nuquin Papan chiaid chuiquimbi chiaid utsibêda nactsusuaquin Nuquin Papan chiaid chienda —cata.

⁴ Nadembidi chuibanta. —Tsusedpabon ambembi chiampiduidi chiec tabadenda. Adembidi utsibon: “Nuquin matsesën mado nepampic. Aidën bababic nadeccuëmêdpampic. Aidën tsyuecquidouditsêqui bédambo iquec,” quequin dadpenquo ambembi chuibampac caosh. Aden chiaiduidi tantiec tabadenda —cata. —¿Adenuidi chuiquinda mimbi Nuquin Papan chiaidquo bédamboen tantiamepe? Adenuidi chuiquin mimbi Esus tantiamenquo iquec. Aden mimbi ambembi chiaid chuisho tantiash: “Mimbi icsamboen chiec. Ëmbimboen bédamboen chiec,” quec mibêdi chushcananeque. Nuquin Papan chiaidquien chuitiad —cata. Nuquin Papan chiaid bédamboen chienquo icquido aden chuita.

⁵ Adshumbic aidobidi naden chuita. —“Matses ma bédamboec tantiananu,” quequin Nuquin Papan chiaidquo chuita. Adoac bédamboen tantiashun Esus tantiec bédamboec tabadec matses bédamboec tantianantsiash —cata, mado.

⁶ Mimbi aden chiapadomboen nainquo icquidoen Nuquin Papan chiaid bédamboen tantienquo yec abembi onquec.

⁷ Adquidon: —Nuquin Papan ambi chiaid Moises dada uamepampid bédamboen tantiembi. Moisesën chiampicpadomboen namenuc aid chuibanquid icte bunebi —queboedombi Nuquin Papan chiaid bédamboen tantienquo icquin icsamboen chiec.

⁸ —“Naden nata,” quequin Nuquin Papan chiaid Moisesën dada uapampid icsambo iquec —¿quequindambi chie? Padenquo. Ma aidi bédambo iqueyoc. —Nêid tantiashun ma abi icsaid ënu —qeshun aid abimbo chiac bédambo ictsish.

⁹ ¿Bédambo icquid chuiquinda Nuquin Papan Moises dada uamepampic? Padenquo. Icsambo icquido chuiquimbien adopampic nadquido chuiquin. Nêidic Nuquin Papan chiaid niac-niacquido. Nêidic aton chuiquidën chiaid niac-niacquido. Nêidic Nuquin Papa tantiesabo. Nêidic Nuquin Papa mamënsnunquido. Nêidic anibi cuesunequido. Nêidic amëbi cuesunequido. Nêidic cuesunianquido.

¹⁰ Nêidic aton chidopenquo chudquido. Nêidic aton bënëpenquo chudmequido chido. Nêidic aton chido bunenquo yec dada daêd chichudnanquido. Nêidic matses utsi bedshun yuaquido. Nêidic muaquido. Nêidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic.

¹¹ Adembidi Esus chuibenequidon: —Adquid icsambo iquec —quequin chiec. Bédamboshë icquin Nuquin Papan aden Esus chuibenequido chuimec. Esus chuibenequidbidi icquin adembidi chiembi.

Nuquin Icbon Pabado bédamboen isbenaid

¹² Tantia, mado. Mibi chuinu. Nuquin Icho Esuquidistun: —Pabado ëbi bédamboen chuibantsiash —quequin tantiashun: —Ëbi chuibenequid icta, Pabado —qeshun ëbi bédamboen namec. Adoaid icquin: —Ëbi namequid yec mibi bédamboshë iquec, Icho —quequin Nuquin Icho Esus chianembi.

¹³ Ënden adenquo iccondabi. Nuquin Papan Madopenquo danquin Esus icsamboen chuishunondambi. Abi tantiaquido chieshënquin cuesun secate bunondabi. —Aton Mado Esus tantiasho Nuquin Papan ëbi bédamboen istsish —quenquo icquin adopondambi. Adshobini: —Pabado abimbo tantiabi iquec —qeshun Nuquin Icbon cuidenquo icpanêdash.

¹⁴ Adec icsambo icquid icsho Nuquin Icbon tantiamiac: —Abi tantiasho ëbi bédamboen isbentsiash —quequin Esusquo tantiabonondambi. Esus tantiaquin matsesten tantiaquiemi.

¹⁵ Tanta, mado. Naden chiaid bédambo iqueque. —Icsambo icboedën abi tantiasho cuidmenquo icnuec Esus matesac caondash —quequin chiaid bédambo iquec. Èbìc icsamboshë icpondabi. Utsibon Nuquin Papan chiaid bédiactsec niac-niacnubi èmbimbo compapnen niac-niaccondambi.

¹⁶ Adec ëbi yuec icsambo icsho Nuquin Icho Esusën baded cuidenquo icquin abibi tantiamequin bédamboen isbempondashi. —Pabado bédamboen isaid chiac utsibo: “Pabado icsambo icboedi Nuquin Papan bédamboen isbenac. Adembidi Esus tantiasho Nuquin Papan èbitsen bédamboen isendac,” quequin ëbi tantiendac. Adquid unèsacsho ëbi yacno tabadmendambi —qeshun abi tantiamequin Esusën bédamboen isbempondashi.

¹⁷ Aden tantiaquin nadoemi. —Nuquin Papa ambiuidtsëqui abitedi namequid yec abitedishun Icombo nec. Nèstiapimbo icquid nec. Isadenquo icquid nec. Adquid abentsëquiobi icnuc abipadquid utsi nibèdec. Adquid icsho abitedishun: “Mibi bédamboshë iquec, Papa,” capashun ènenquo icquin —caimbi.

Matsesën mibi chiondacpadombota, quiaid

¹⁸ Mibi con mado icbobimboecquid neque. Èmbi chiacpadomboen Nuquin Papan chiaidquo chuibanta, mado. Ènden mibi Esus chuibanquid yanabi icnuc Nuquin Papan oncamiac nuquibèdtan Esus tantiaquidën mimbi chuibante chuipondash. —Esus bédamboen chuibanquin Timoteyon Esus tantiaquido bédamboen namendac —quequin mimbi chuibante chuipondash. Aidën chiacpadomboen chieshtoenuquo icquin Nuquin Papan chiaidquo chuibanta.

¹⁹ Aden Nuquin Papan chiaid niaquenquo icquin Esus tantiaquiec bédamboec tabadta. Utsiboen adenquo iquec. Icsamboec tabadquin Nuquin Papan chiaidquo niac-niacquin Esus tantienquo yanosh.

²⁰ Adecandedo caidbèdtan Imeneyo caidën aden Esus tantienquo yanosh. Aid daèdshun Nuquin Papa muauaquin icsamboen chuisho nadopombi. —Adquid Satanasën natiambo icnepashun —qeshun: —Esus tantiaquido cho-choacno choenda —capombi. —“Nuquin Papa muauachitombi. Icsambo icchitebi,” quequin ma tantianu —qeshun adopombi.

2

Nuquin Papa bédamboen chianete chiaid

¹ Tanta. Utsibotedi chuinu. Matses abitedi tantiaquin Nuquin Papa chianenuna. —Matses abitedi min Mado Esusbèdta mibi bédamboen tantiamequin bédamboen ista, Papa. Matses nashunquidquo yec mibi bédamboshë iquec, Papa —quequin Nuquin Papa chianenuna.

² Adembidi Nuquin Papa chuiquin: —Chuiquid dapambo pedesidente caidtedibèdta chuiquid dapa utsibotedi bédamboen tantiameta, Papa. Adoac aidon bédamboen namiac cuesun secanenquo yec matses abitedi bédamboec tabadtsiash. Adnubi abi chieshënuquido nibèdnuc Esus tantiaquido abi tantiec bédambo ictsiash, Papa —quequin Nuquin Papa chianenuna.

³ —Con matses Esus tantiameta, Papa —quequin nuqui aden chianesho tantiash: —Bédamboen chiec. Èbi bunaidquo chiec —quendac Nuquin Papa nuqui cuidenquo icquin abèd tabadmequid.

⁴ Matses abitedimbo cuidenquo icnuen matses bédamboen iste bunquid yec: —Ma èmbi chiaid tantiashun abided cuidadec unèsaid ma tantiapanu —quec Nuquin Papa.

⁵ Nuquin Papan chiaidquo tantiashun nuqui naden tantiec. —Nuquin Papa matses uaquid abentsëqui icnuc abipadquid utsi nibèdquiec. Abèd icboedi matsesun: “Nuquin Papapadquid icquin aid tantiamequid nebi,” quequin aton Madon matses chuipanèdash. Adecbidi aton Papa matses bédamboen ismequid yampanèdash Esus. Aid abentsëqui Nuquin Papa bédamboen ismequid nec.

⁶ Abi tantiaquid cuidmenquo icnuec abided cuidadec unèspac caondash —quequin chiaidquo nuqui tantiec. Nèbien Nuquin Papan tantiacpadomboen matsesën aden chiaidquo chuiben-chuibeneç.

⁷ Adomboemidi Esus chuibenquidquo nebi. —Matses utsibo isadaidpembo ëbi chuibeneta —Esusën caondaid nebi. Adoaid icquin: —Ma Esus tantianu —quequin Nuquin Papan chiaidquo chuibenec nebi. Abimbo caimbi. Adquid nebi.

Esus tantiec cuèdënacnoshon nate chiaid

⁸ Tantia. Dadatedi chuinu. Cuëdēnacno puduedshun Nuquin Papa chuinu ec bēdamboequien tabadtiad. Nēish bēdanash chieshēnanenquio icquimbien Nuquin Papa chuitiad.

⁹ Chidobotsen chuinu. Esus tantiec Esus tantiaquido cuëdēnacno nidnuec: –Mabi isnu –quequin tantienquio yec bēdamboec dasiuidta. Bēdamboec tabadquid dasiuidacimboec dasiuidta. Chido chishpidabimboec dasiuidenda. –Mabi isnu –quenquio yec Esusquio tantianu ec Esus tantiaquido cuëdēnacno puduedta.

¹⁰ –Mabi isnu –quequin tantienquio yec: –Nuquin Papa tantiaquidquio nebi –quec utsibo nashumbanec bēdamboec tabadta.

¹¹ Esus tantiaquido cuëdēnacnoshon dadan Nuquin Papan chiaid chuibancho tantiaquid chidon. –Aidēn chiacpadomboen natiapimbo iquebi –quequin tantienquio yec bēdamboen tantiec otacquo tabadquid chido.

¹² Esus tantiaquido cuëdēnacno puduedshun dada chuibanesa chidon. Adembidi dada ancaisa chidon. –Otaequien tabadquid chido –caimbi.

¹³ Dada Adan caidba Nuquin Papan matses uapampic. Adshumbic aton chido Eba caidtsen.

¹⁴ Aden dadabēdta chido nacnenacsho isumbien Satanasēn: –Icsamequin tanu –queshun muauac icsaquin chidomba Nuquin Papan chiaid niacpampic. Adan padabi. Aden tantiaquin: –Dadan chido chuibanquid –caimbi.

¹⁵ Adec abia icsasho isun Nuquin Papan cuidac paēmbō icnuc bacuē tishquid chido abitedi nec. Nēbi Esus tantiaquid yanash ambi tishaido bēdamboen namequid nendac. Esusēn chiacpadomboen natiadquio icquin matses tantiaquid nendac. Nuquin Papan chiaid niaquenquio icquid nendac. Aton bēnēuidtsēqui chudmequid yendac Esus tantiaquid chidon. Adquid Nuquin Papan bēdamboen isquin abēdi tabadmendac.

3

Esus chuibanquid chiaid

¹ Tantia. Utsitsen mibi chuinu. –Esus chuibanquid ictiadquio iquebi –quesho: –Bēdamboen nate mibi bunec –cata.

² –Nuquin Papan chiaid chuibanquid nadquien ictiad –quequin anocquido chuita. –Bēdamboec tabadquid nec –utsibon caidquio Nuquin Papan chiaid chuibanquid nendac. Adquid chido abentsēc inquid nendac. Abi bunaid ēnshun mēmunquidquio nendac. –Bēdamboen tantiaquidquio nec –utsibon caidquio nendac. Isedanquido bēdamboen isquid Nuquin Papan chiaid chuibanquidēn. Nuquin Papan chiaid bēdamboen tantiamequin chuibanquid nendac.

³ Tantiadenuen acte paēmbō icquid aquenquio icquid nendac. Badedquio nēishenquio icquid nendac. Uimanēmēnenquio icquid nendac. Chushcananteuidi bunenquio icquid Nuquin Papan chiaid chuibanquid. Pucquid bedteuidi bunenquio icquid nendac.

⁴ Aidēn chiacpadomboen aton chidon aton bacuēbōbēdta naquid. Chieshenquio icquin aton papan chiacpadomboen naquid aton bacuēbō.

⁵ ¿Ambi chiacpadomboen aton chidobēdta aton bacuēbō bēdamboen namenquio icquinda Esus tantiaquido bēdamboen namepatsiash? Padenquio ictsiash.

⁶ Ēnden Esus tantiabenondaid chuiquin: –Ēbi chuibanquid icta. Ēbi bēdamboen chuiquin ēbi bēdamboen nameta –Esus tantiaquidon cac bēdambo ictsiash. Nēbimbo Esus tantiabenquid aden chienda. Chuibanquid icmiac adquidēn Nuquin Papan chiaid badedquio niactsiashē. Satanasbimboec: –Ēbiuidtsēqui bēdamboshē iquebi –quetsiashe. Adquid: –Ēbi chuibanquid icta –cainda.

⁷ Ēnden Esus tantiabenondaid mibi chuibanquid icmenun Esus tantiesabon: –Bēdambo icquid nec –casha tantiaata. –Icsambo icquid nec –caid chuibanquid icmenda. Adquid chuibanquid icmiac icsasho Esus tantiesabon mamēnshuntsiash. Adquid Satanasēn badedi yuatsiashe. –Icsambo icquid nec –caid: –Ēbi chuibanquid icta –cainda.

Esus tantiaquido nashunquid chiaid

⁸ Tantia. Esus tantiaquido nashunquidtsen chuinu. –Nuqui chuibanquidēn chiacpadomboen ēbitedi nashunquid icta –quequin nadquid chuita. Utsibon: –Bēdambo icquid nec –caidquio nendac. Muesambo nendac. Tantiadenuen acte paēmbō icquid aquenquio icquid Esus tantiaquido nashunquidēn. Pucquid bunquin ampenquio icquid nendac.

⁹ Nuquin Papan chiaid bēdamboen tantiaquinc Esus tantiaquinc caic bēdamboec tabadquid Esus tantiaquido nashunquid. Adquid bēdambo ictsiash.

¹⁰ Esus tantiaquido nashunquid icmienen: —¿Bédambo icquidida nëid nec? —quequin chuimiac utsibo: —Ai, bédambo icquid nec —abitedi qesho tantiashun: —Esus tantiaquido nashunquid icta —cac bédambo ictsiash.

¹¹ Adquidën chido: —Bédambo icquid nec —utsibon caidquio nendac. Utsi icsaiduidi chienquio yec bédamboec tabadquid adquidën chido. Tantiadenuen acte paëmbo icquid aquenquio icquid aton chidon. Ampenquio yec bédamboec tabadquid. Adquidquio Esus tantiaquido nashunquidën chido bédambo ictsiash.

¹² Esus tantiaquido nashunquidën chido abentsëqui inquid. Ambi chiacpadomboen aton chidon naquid. Adembidi aton bacuëbon.

¹³ Abi nashunquidën Esus tantiaquido bédamboen nashunsho isun utsibon bédamboen isendac. Adoaidën dayacquio icquin abi utsibo nashumbanquin dacuëdenquio icquin Esuquidistu tantiamendac. —Esus tantiaquido nashunquid adquidquio iquendac —quequin ënquin chiombi.

¹⁴ Tantia. Utsi mibi chuinu. Mibi yacno nëbi nidtiadquio iquebi. —Nidenquio icmane —qeshun nëid dada uaic nebi.

¹⁵ Èbi mibi yacno badedquio nidabi icnuc: —“Esus tantiaquidon nadoquid,” quequin Pabadon chiacpadomboen nanuna —cata. ¿Tsutsi tantiaquido nuqui nepe? Unëstiapimbo icquid Nuquin Papambo nec. Aid tantiaquido yec shubu abentsëquën tabadquidobimboec nuqui iquec. Adquid icquin Nuquin Papan chaidquio tantiaquin nuqui Esus chuibenec.

¹⁶ Èndenquio abi bédamboen ismequid ambi tantiamiaibi icnëdaidi nëbi Nuquin Papan tantiamiaid Esus bédamboshë iquec.

Aid Nuquin Papan matsesmeapanëdash.

Nuquin Papan Mayanën: “Nuquin Papapadquidquio icsaisambo Esus nec,” quequin tantiamec.

Matsesën unës uaquu uincuenaid yec Nuquin Papan abi yacnoshon uaido mayan bédabon isaidquio Esus nec.

Abi chuibenequidën nidaid utsi-utsiec yacno nidshun chuibeniac utsin-utsinquien Esus tantiaibenac caosh.

Aidquiobi Nuquin Papan abuc nidmeshun abëdi tabadmeoapanëdash.

4

Utsibon icsamboen chiaid

¹ Tantia, mado. Nuquin Papan Mayanën tantiamiaid mibi chuinu. —Esus chote nëbi icnuc abi tantiaquidon utsin-utsinquien Esus tantienquio yanendac. Satanasën yuabo podobitsi icsabon muaquin pausunac matsesën chuisho tantiashun Esus tantienquio yanendac —quequin Nuquin Papan Mayanën abimbo tantiamioshi.

² Aden muaquidon: —Abimbo caimbi —quequin bédambo icquid damianquien aden muaquin chiendac. —Nuquin Papan cuidnushe —quequin tantienquio iquendac.

³ Adquidon naden chiendac. —Dadan chido bedenda. Chidon dada bedmenda. Padenquio yec tabadta —quequin icsamboen chiendac. Adembidi: —Aidquio petemaid neque. Penda —quequin pete abentse-abentsen chiendac aid pete bédambo icnubi. ¿Atotsi quequin Nuquin Papan pete uapampic? —Èmbi chaidquio bédamboen tantiashun Esus tantiaquidon: “Nuquin Papan pete uaid bédambo iquec,” quequin ma penu —quequin Nuquin Papan pete uampic.

⁴⁻⁵ Aidën pete uaidtedi bédamboshë iquec. —Èmbi pete uaid bédambo iqueque. Ma penu —qeshun Nuquin Papan pete icmiaid ma petequid neyoc. —Mimbi pete uaid bédambo iquec, Papan —qeshun pete isuidenquio icquin penuna.

Esus chuibanquid icquin bédamboen nata, quiaid

⁶ Esus tantiaquido ëmbi chuibocpadomboen chuibanquin mimbi bédamboen natsiac, mado. Bacuëtsëcsho min matsesën Nuquin Papan chaidquio mibi chuibanëdash. Aidën chiaid tantiaquid icquin Esusën chiacpadomboen nate bunquin ëmbi chiacpadomboen mimbi chuibantsiac.

⁷ Con tsusedpabon ambembi chiampidbëdta nëbi matsesën adembidi ambembi chiaid tantienda. Nuquin Papan chaidquio niactiapimbo yec bédambo icte bunquiota.

⁸ Aton dada uidënuquio icmenuec titinquetanequid nuquin matses nec. Esus tantiaquido bédambo icnuec ¿mitsipadquio icpec? Nuquin Papa tantiaquieci ambi chaid niaquenquio yec bédamboec tabadquid nec. Adquid unësash Nuquin Papa yacno nidash bédamboshë icquid iquendac.

⁹ Èbi adsho tantiash: —Abimboen caic —queta.

¹⁰ Adec: —Abi yacno abēdi tabadendabi —quequin Nuquin Papan chiacpadomboen ēnenquo icquin nanuna. —Esus tantiaquid unēsacsho cuidenquo icquin unēstiapimbo icquidēn Nuquin Papan abēdi tabadmendac —quec chieshtoenquo yec bēdamboec tabadnuna.

¹¹ Ēmbi chuiboed chuibanta, mado. —Nuquin Papan chiacpadomboen nanuna —quequin chuibanta.

¹² Mibi nēbi caniaid neque. Bēdamboec tabadta, mado. Ēnden caniaidēn: —Nēbi caniaid icquin Nuquin Papan chiaid mimbi tantienquo iquec —canushe. Bēdamboec tabadta. —Esus tantiaquido utsibotsen ma ēbi yacpadec bēdamboec tabadnu —quiash adta. Bēdamboen chuibanquinc matses tantiaquinc Esus tantiaquinc Nuquin Papan chiaid niaquenquo icquinc caic bēdamboec tabadta.

¹³ Ēbi ano nidabi icnuc Nuquin Papan chiaid adenuidi chuibanta. —Nuquin Papan chiacpadec bēdamboec tabadnuna —quequin Nuquin Papan chiaid isbanquin matses chuibanta. Aden bēdamboen tantiameta.

¹⁴ Ēnden mibi mamishquin chiondaiđada tantie? Ēnden Esus tantiaquido icquin tsusio dapabon mibi mamishbedondash. Adshobien Nuquin Papan aido mimbi chuibante chuimepondash. Adoac: —Nuquin Papan chiaid bēdamboen chuibanquid Timoteyo iquendac —quequin chuipondash. Chieshtoenquo yec adquid icta, mado.

¹⁵ Ēmbi dada uaquin chuiboedtedi isbanshun ēnenquo icquin ēmbi chiacpadomboen bēdamboen nabanta, mado. —Ēmbi adosho isun ma ēmbi chuibanaidon: “Nuquin Papan chiaid chuibanquidquo yanosh,” ma ēbi canu —qeshun bēdamboen chuibanta, mado.

¹⁶ —Nuquin Papan chiaid niacmane —quec mibibi bēdamboec tantiadta, mado. —ĀAdabi bēdamboec tabadpeba? ĀAdambi Nuquin Papan chiaidquo muainquo icquin chuibampoba? —quec mibibi tantiadta. Bēdamboec tabadquin Nuquin Papan chiaidquo ēnenquo icquin chuibanta. Aden Nuquin Papan chiacpadomboen naic aibbēd mibi tabadendac. Mimbi chuibanaidobidi adoaindac.

5

Esus chuibanquidēn bēdamboen chuite

¹ Nuquin Papan chiaid chuibanquid icquin dada ēnden caniaid chushcainda, mado. —Esus tantiaquidēn nadoquid yendac —quequin bēdamboen chui: —Con pabimboecquid nec —quequin. Nēbi caniquid: —Con utsibimboecquid nec —quequin adembidi bēdamboen chuiban, mado.

² —Con tabimboecquid nec —qeshun macho bēdamboen chuiban. Chido machobudabi icquidtedi chibibimboecnuc isquin: —Nēid chudtiadquo icchitebi —quenquo icquin Nuquin Papan chiaidquo chuibanta, mado.

Chido niantembo chiaid

³ Tantia, mado. Esus tantiaquidon abēdtan Esus tantiaquid icsho niantie nashunte chuinu. Niantie aton matses nibēdquid: —ĀTsuntsimbini nashumpatsiashba? —quequid Esus tantiaquidon nashunquid.

⁴ ĀAda nianten tishaido icpec? Aidēmbi ani nashuntsiash. ĀAda aton baba icpec? Aidēmbi aton chichi nashuntsiash. Aidēmbidi aton shanuachotsen nashuntsiash. —Ēbi nashundenēd neque. Nēid nashunu —qeshun nashuntsiash. Aden ambi chiacpadomboen nasho isash: —Bēdamboen naic —quetsiash Nuquin Papa.

⁵ Padnuc aton matses nibēdquidēnquo nianten Nuquin Papa chianequid: —Nuquin Papan ēbi nashuntsiash —qeshun. —Mimbi ēbi tantiaquieque. Ēbi nashunta, Papa —quequin Nuquin Papa chianequid niantie icsho abēdtan Esus tantiaquidon nashunquid.

⁶ Niantie utsimbien ambi tantiaiduidi naic. Petebēdta acteuide tantiaquin abi bunaiduidi naic. Adquidēn unēsacsimboecquin Nuquin Papa tantienquo iquec. Adquid Esus tantiaquidon nashunenquo icquid.

⁷ Ēmbi aden niantie nashunte chuiboed Esus tantiaquido utsibotsen chuita, mado. —Aton matses nibēdquid niantie nashunenquo icsho: “Esus tantiaquido icsambo iquec,” utsibon canushe —qeshun chuita.

⁸ Aton shubun icquidotsen Esus tantiaquidon nashunquid. Abēd icquido menenquo yec pemenuquo yec quec nashunēnenquo icquid icsamboshē iquec. Esus tantiesabo icsambo icnubi: —Esus tantiaquid nebi —queboedi Nuquin Papan chiaid niac-niaquec aton matses nashunenquo icquid icsamboshē iquec.

⁹ —Nēidtedi chido Esus tantiaquido nashunquidombo iquec —quequin abi cuēmēdquid abi cuēmēdquidquien mimbi dada uaondac. Nadquid chido: —Esus tantiaquido nashunquid

icta –cata. Seta dadpenquo 60ted matamec machobudaidquo. Aton bënëuidtsëqui chudmedenedquo.

¹⁰ –Matses nashunquid nec –utsibon caid. Bacuë bëdamboen caniuadened machon. Isedanquido bëdamboen isquid. Esus tantiaquido nashundenequid. Matses daicsabudacsho nashunquid. Adec bëdamboec tabadquid: –Esus tantiaquido nashunquid icta –cata.

¹¹⁻¹² Utsi niante machobudabi icquid: –Adquid icta –cainda. –Esusuidtsëqui tantiaquin abi tantiaquido nashunembi –queboedëmbi dada bunquin ambi chuiboedi niacbidansho isun utsibon: –Icsambo icquid nec –catsiashe.

¹³ Adquid shubu utsin shubu utsinquien isedben-isedbenec uspumbo yanash onque-teuidtsëqui buntsiash. Utsibo icsaiduidi chuibenquidquo ictsiash.

¹⁴ –Adquid niante machobudabi icquid dadan bedac bëdambo ictsiash –caimbi. Adoac bacuë tishoatsiash. Adshun codocaquinc sicaquinc daëdcaquinc catsiash. Adec bëdamboec tabadsho: –Icsambo icquid nec –Esus tantiesabon catiapimbo ictsiash.

¹⁵ Adquid niante machobudabi icquidën utsin-utsinquien Esus tantienquo yanshun Satanasën tantiamiacpadomboen nac caosh.

¹⁶ Niantebëd icquid utsi ¿ada Esus tantiaquid chido icpec? Aidëmbi niante nashunac bëdambo ictsiash. –Ëmbi nëid nashumbanuc niante utsi aton matses nibëdquidquo Esus tantiaquido utsibon nashuntsiash –qeshun abëd icquidën nashunac bëdambo ictsiash.

Esus tantiaquido chuibanquid chiaid

¹⁷ Tantia, mado. Esus tantiaquidon abi chuibanquid nashuntetsen mibi chuinu. ¿Ada Esus chuibanquidën bëdamboen naosh? Adquidën Nuquin Papan chiaid bëdamboen tantiamequinc Esus bëdamboen chuibanquinc casho ambi chuibanaidon bëdamboen isquin nashunquid. –Ma penu –qeshun menequid.

¹⁸ Adembidi chuikin Nuquin Papan ambi chiaid dada uamepampic. “ ‘Penushe,’ qeshun adosbitsecquid bitsi secamenuen manemiaid baca bënë utsibon dënëshquid. ‘Adec chonoadquidën ma penu,’ qeshun isadaidbon dënëshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “ ‘Naic cho. Mibi bëdamboen cuidquidën menenu,’ cac chonoadsho abi chonoa uaquidën menequid,” quequin Nuquin Papan chuipampic. Adembidi Esus tantiaquidon abi chuibanquid nashunquid.

¹⁹ Padnuc Esus chuibanquid caic: –Nuquin Papan chiaid niac-niacsho isombi –quequin matses abentsëcshun chuisho: –Abimboen cachitec –cainda. Daëdshun chuisho: –Abimboen cachitec –cata. Adembidi abentsë chotsecquin chuisho tantiaata.

²⁰ Esus chuibanquidën Nuquin Papan chiaid niacacsho: –Mibi icsaac. Padi icnuna –cata. Esus tantiaquido dadpenshun tantianubi adota. –Aden chuisho tantiashe dacuëdec: “Ëbitsen adembidi chushcapanundac,” qeshun ma utsibon Nuquin Papan chiaid niaque-nquo icnu –qeshun chushcata.

²¹ Esuquidistubëdtan Nuquin Papan nuqui isec. Adembidi Nuquin Papan abi yacnoshon uaido mayan bëdabon nuqui isequë. Ëmbi chuibocpadomboen nata. Min matsesën mimbi tantiaidënquiobi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. –Con matses ëmbi tantiaidquo neque. Chushcainquo iquëmbi –cainda.

²² Nuquin Papan chiaid chuibanquid icmenuen nuqui naondacpadomboen badedquo mamishenda. Ambi naid yuen isquioshon ambi chiaid yuen tantiaquioshon: –Bëdambo icquid nec –quequioshon nata. –Esus chuibanquid icta –mimbi badedquo caboedën Nuquin Papan chiaid badedquo niacsho isash: –Ambi: “Adquid icta,” caidbëd Timoteyo icsamboshë iquec –utsibo quenushe. –Ëbëdtan chuibanquid icta –badedquo cainda.

²³ –Daicsabudteniaccosh. “Pucu paëmbo yan-yanebi,” quiosh –quiosh mibi caic, mado. Acteuidi acashien mibi niaque. Actequid utsi paëmbo icquid pistëc ac ma pucu bëdanuequin.

²⁴ Tantia. Mibi padpiden chuinu. –Ëbëdtan namembi –canuen matsesën naid bëdamboen tantiaata. Utsi aton matses ismec icsasho: –Icsambo icquid nec –badedi catsiash aton matsesën. Utsibic ismenquo yec icsasho: –Icsambo icquid nec –quequin badedquo tantienquo icquin yuecshun istuidshumbi adotsiash.

²⁵ Utsien ismequin bëdamboen nasho: –Bëdambo icquid nec –badedi catsiash aton matsesën. Utsimbic ismenquo icquin bëdamboen nabansho: –Bëdambo icquid nec –quequin badedquo tantienquo icquin yuecshun istuidshun adembidi tantiashe. Ëbi adsho tantiashe: –Nuquin Papan chiaid chuibanquid icta –badedquo cainda.

6

¹ Matses yuabo Esus tantiaquido icsho naden chuita. —Min icbo Esus tantiesia icsho bédamboen isquin ambi chiacpadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chuinushe. Min icbon chiacpadomboen nata —quequin yuabo chuita.

² Utsibi chuiquin: —Min icbo Esus tantiaquidbidi icsho: “Ēbipadquidi nec. Ambi chiacpadomboen natiapimbo iquebi,” cainda. “Ēbipadquid icsho aid tantiaquin con icbon chiacpadomboen nanu,” quequin min icbo bédamboen nashunta —quequin yuabo chuita. Ēmbi chuiboedtedi Esus tantiaquido chuiban. —Adota —quequin chuibanta, mado.

Piucquid bunquin utsibon ambembi chiaid

³ Mimi: —Nuquin Papan chiaid niaquenquo yec bédamboec tabadnuna —quequin Nuquin Icbon chiaidquido chuisho: —Aden chuisho tantiatiapimbo iquebi —quequin ambe-mbi chiaid chuiquid icsambo iquec. Adquidēn chuisho tantienda, mado.

⁴ Aden icsamboen tantiaquidēn: —Ēmbi chiaiduidtsēqui bédambo iquec —quequin icsamboen chuibanendac. —Mimbi icsamboen chuinuc Ēmbimbo bédamboen chiec —quec chushcanantiadquido iquendac. Abembi onqueteuidi bunendac. Adquid yuec onquesho tantiash: —Utsi onquetiapimbo icnuc abentsēqui onquebudec —quec utsibo nēishendac. Adquidbéd chushcananec mauuananec icsamboec tantiashunanendac.

⁵ Pabiate shēcuē nibēdadimboben Nuquin Papan chiaidquido bédamboen tantienquo yec chushcananendac. Nuquin Papan chiaid chuibanquidēn piucquid dadpen bedte danec chuibanquidbidi ictiadquido iquendac.

⁶ Nuquien Nuquin Papa tantiaquieci bédamboec tabadec nuquin na dadpen bedte bunenquo yec bédambo ictsiac.

⁷ Tishac chucactscnuc nuquin na nibēdpanēdash. Adembidi unēsquin nuquin na nuqui buantiapimbo iquec.

⁸ Nuquin pete dashcutebéd icnuc utsi bunenquo yec bédambo nuqui ictsiac.

⁹ Piucquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaiduidquido bednuen mēmunenquo icquin icsamboen nabantsiash. Aden Nuquin Papan chiaid niac-niacquin icsamboen naic quenesh adenuidi naic unēsash icsambo icquido cuidacno nidendac.

¹⁰ Adec piucquid natiambo bunquido aid bednuec baded-badedquieci icsadenendac. Adquido: —Esus tantiembi —queboedobi padenquo yanash: —Esus tantienquo yanchitombi —quec natiaic tabadendac.

Bédamboec tabad, quiaid

¹¹ Mibi Nuquin Papa tantiaquidquido neque. Piucquid bedteuidi bunenquo yec bédamboec tabadte bunquiota, mado. Nuquin Papan chiaid niaquenquo yec chieshtoenuquo icquin Esus tantiata. Matses ten tantiec nēishēmēnenquo yec bédamboec tabadta.

¹² Utsibon chieshēnaqui chieshtoenquo icquin Esus tantiaquieci bédambo icta. Unēsash Nuquin Papabéd tabadnuec adta. —Con Mado Esus tantiaquieci unēsasho ēbēdi tabadmendambi —queshun Nuquin Papan Esus tantiamiac mimi Esus tantiabempondac. Adshumbic: —Nuquin Papan Mado Esus tantiaquiembi —quequin matses dadpen mimi tantiamiondaque. Adembidi aid tantiaquieci bédamboec tabadta.

¹³ Abitedi uampidēn Nuquin Papan nuqui isequē. —Adquid nebi —quequin ancanquid dapa Ponsio Pidato chiec dacuēdenquo icnēdaidēn Nuquin Icho Esuquidistuntsen nuqui isequē.

¹⁴ Esus tantiaquin chieshtoenquo icquin aidēn naidquido chuibanta. Nuquin Icho Esuquidistu choabi icnuc Ēmbi chuiboed niaquenquo yec bédamboec tabadta. —Esus tantiaquido icsambo iquec —utsibo quetiapimbo icnuc adta.

¹⁵ Nuquin Papan tantiacpadēnquo aid ushēmbi Esuquidistu nidaidēn padpidec choendac. ¿Esus chomequid mitsipadquido icpec? Icsaisambo yec bédamboshē icquid nec. Aid abentsēcquiobi abitedishun Icbombo nec. Aidēmbi chuiquid utsibo abitedi namendac. Aidquido chuiquid utsin dēniactiapimbo iquendac.

¹⁶ Aid abentsēqui unētiapimbo icquid nec. Bēchamuanquieci cho istiapimbo yec utsibo tabadec. Aidi matsesēn istiapimbo icquid nec. Adquid icsho: —Mibiuidtsēqui abitedishun Icho yec mibi bédamboshē iquec, Papa —quequin Nuquin Papa chianenuna ēnenquo icquin.

Aton na dadpen dayun uaquido chiaid

¹⁷ Aton na dadpen dayun uaquido naden chuita, mado. —“Con na dadpenquioshē icnuc ēbiuidtsēqui bédambo iquebi,” quenda. Nibēdantiapimbo icquid danquin mimi dayun uaiduidtsēqui tantienda. Nuquin Papambo tantiaquiota. Aidēmbi matses bédambo icmenuen aton na bedmec —cata.

¹⁸ Adquidobidi chuiquin: —Bëdamboec tabadquin utsibo nashumbanquiota. Adembidi cudasenquio icquin mitsana utsibo menianeta.

¹⁹ “Mimbi bëdamboen naoque. Èbëdi tabadmequin mibi bëdambo icmendambi,” Nuquin Papa camenuen adota. Adash unësacsho Nuquin Papan abëdi mibi tabadmendac padpidec unëstiapimbo icnuc —quequin aton na dadpen dayun uaquido chuita.

Pabadon ënquin chiaid

²⁰ Èmbi chuiboedquibidi adembidi bëdamboen chuibanta, mado. Nuquin Papan chiaid chienquio yec abembi onquesho tantienda. —Bëdamboen tantiaquin abimbo caimbi —quequidobi muasho tantienda. Adquidobëd chushcananenda.

²¹ Aden icsamboen chuisho tantiashun: —Abimbo caic —quequin utsin-utsinquent Esus tantienguo yanondashe. Adquido tantienda. Chieshtoenquio icquin Esusquio chuibanta. —Nuquin Papan con mado bëdamboen ispashun —quequin mibi tantiembi. Padi. Aidedi chuiquin dada uaombi.

TIMOTEYON ISTE 2

Tauamboen Timoteyo chiaid

¹ Pabado nebi. Nuquin Papan tantiacpadomboen Esuquidistun: —Ëbi chuibeneta —caidquio nebi. —Ambi chiampicpadomboen aton Mado Esuquidistu tantiaquid unèsacsho Nuquin Papan abèdi tabadmendac —quequin Esus chuibenequidquio nebi.

² Con mado icbobimboecquid mihi neque. Mibi chuiquin nêid dada uanu, Timoteyo. —Nuquin Papan aton Mado Nuquin Icho Esuquidistubêdta bédamboen isquin bédambo icmepashun —quequin mihi tantiembi.

Chieshtoenquo icquin Esus chuiban, quiaid

³ Con tsusedpabon nacpadomboen Nuquin Papauidi tantiaquin ambi chiapadomboen natiadquio iquebi. Adquid icquin Nuquin Papa mihi chianembi. —Mibi tantiaquid Timoteyo bédambo iquec, Papa. Adquio icmec mihi bédamboshê iquec. Adquiuoidi icmeta, Papa —quequin Nuquin Papa chianembi.

⁴ —Ëbi nidnu —quesho tantiash mihi shubiondaid tantiec mihi iste bunquiebi, mado. Ambo nidash mihi isec cuishonquetsiabi.

⁵ Naden mihi tantiembi. —Aton chichi Doida caidên ani Eunisebêdta aid daêdshumba Esus tantiabenquiacpadomboen Timoteyontsen nêbi Esus tantiaquiec —quequin mihi tantiembi.

⁶ Adquid icsho mimbi tantiondaid padpiden mihi chuinu. —Min Mayan nêidbêd tabadmequin cuesambo icmequin Esus chuibame, Papa —quequin mihi mamishquin Nuquin Papa chiondambi. Adoac aton Mayan mibêd tabadmiac. Adoaid icquin dacuêdenquo icquin Esus chuibanta, mado.

⁷ ¿Nuquin Papan aton Mayan nuquibêd icmiacta nuqui natia dacuêdpe? Padenquo. Comapenen tantiaquid yec nuquibêd icquin nuqui cuesambo icmec. Adembidi Nuquin Papan Mayanên tantiamiac nuqui matses bédamboen tantiec. Adembidi nuqui icsate bunaid namenquo icquin mêmunquidquio icnuc nuqui bédambo icmec.

⁸ —Adoaid nebi —queshun dacuêdenquo icquin Nuquin Icho Esus chuibanta. Adembidi dacuêdenquo icquin: —Pabado tantiaquiembi —cata. —Quênên nauedtsaid Pabado tantiatapi —quenda. Utsibon cuestiadquio icquin chieshênaqui Nuquin Papan namiacpadec chieshtoenquo icquin Esus chuibanuna.

⁹ Nuquin Papan: —Bédamboec tabadquid icmequin con Mado Esus tantiamembi —caido icquin adonona. ¿Nuqui bédamboecuidi tabadshoda Nuquin Papan nuqui bédamboen isbempdash? Padenquo. Êndenquimboshê nidaidbêdta matses uabi Nuquin Papan: —Ëmbi chiaid niac-niaquec icsambo icboedêmbi con Mado Esus tantiasho cuidenquo iquendambi —quequin ambi chuipampicpadomboen nuqui Esus tantiamiac.

¹⁰ Aden ambi chuipampid tantiamiabi icshumbic nêbi Esuquidistu matsesmeshun matses tantiamiac. Adoac: —Abi tantiaquid unèsacsho icsaido cuidacno nidmenquo icquin unêstiapimbo icquid icmequin Nuquin Papa yacno abèdi Esuquidistun tabadmendac —quequin nuqui tantiec.

¹¹ Aden tantiaquin Esus chuibenequidquio nebi. —Ëbi chuibeneta —Esusên caonda yec Nuquin Papabêdta Esus tantiaquidquio nebi.

¹² Aden chuibeneshobini chieshênquin quênên nauedondash. Adoqui chieshtotiapimbo icquin Esus tantiembi. —Ëmbi tantiaidquio comapenen tantiaquin nabanquidquio Esus nec. Adquid icquin: “Ëbi tantienquo yanushe,” quesun abi tantiamequin ëbi chieshtomenquo iquendac. Nidaidên choabi icquin Esusên ëbi chieshtoenquo icquid icmendac —quec dacuêdenquo iquebi.

¹³ Tanta, mado. Mibi chuinu. Ëmbi abimbo chiondaidquio chuiban: —Nuquin Papan chiaidquio nec —quesun. Esuquidistu tantiaquinc matses tantiaquinc caquin adenuidi chuibanta, mado.

¹⁴ Nuquin Papan Mayan nuquibêd iqueque. Aidên namiac ëmbi chiondacpadomboen Nuquin Papan chiaidquio chuiquin Esus chuibanta, mado.

Onesipodo chiaid

¹⁵ Ëmbi: —Cho —cac choenquo icboed mimbi tantiac, mado. Nidaid utsi Asia caid yacnocquido dadpen adec choenquo iccosh. Edemoquenes caid choenquo iccosh. Adechidi Piquedo caid chedo.

¹⁶ Onesipodo caidën nēbi bēdamboen isposhi. Ēbi quēnēn nauedacsho dacuēdenquo icquin isuan-isuanquin bēdambo icmioshi. Adsho isun: –Aton shubun icquidobēda aid bēdamboen ista, Papa –quequin Nuquin Papa chianembi.

¹⁷ Aidēmbi nēmbō shubu dadpen icquid Doma caid yacno choboshon: –¿Mitsimbo Pabado icpece? –quequin yuen nibēmbenequin istuidpondashi.

¹⁸ Mimbī isnubi Epeso yacnoshon aidēmbidi baded-badedquien nashundeniondashi. Adsho tantiashun: –Nidaidēn padpidec choshon Nuquin Icbon Onesipodo bēdamboen ispashun –caimbi.

2

Chieshtoenquo icquin chuiban, quiaid

¹ Chieshtoenquo icquin Esus chuibanta, mado. –Esuquidistun ēbi bēdamboen isec. Aidēn bēdambo icmiac dayacquio icquin naimbi –qeshun chieshtoenquo icquin Esus chuibanta.

² Matses dadpenshun tantianuc ēmbi chuibansho mimbi tantiondac. Ēmbi aden chiondaid utsibotsen chuiban. Adshun mimbi chuiboedo abentse-abentsen chuita. –Nēidēn chieshtoenquo icquin Esus chuibantsiash –qeshun: –Mimbitsen chuiban –cata, mado.

³ Sondado bēdambo icquidēn nachimboen chieshtoenquo icquin bēdamboen nabanuna. Matsesēn chieshēnubi Esuquidistun chiapadomboenuidi nanuna chieshtoenquo icquin.

⁴ Sondadon: –Mibi bēdambo iquec –camenuen aton chuiquid dapan chiapadomboenuidi naquid. Ambi tantiaid nainquo icquinc utsibon chiapadomboen nainquo icquinc caquin aton chuiquid dapan chiapadomboenuidi naquidquo sondado nec. Adomboembidi Nuquin Icbon chiapadomboenuidi nanuna, mado.

⁵ Ma nuquin matses titinquequidquo. ¿Mitsipadquo icpec? Aton uidēn tanec aton matsesēn chiaction abia titinquec chosho: –Bēdamboec titinquiosh –qeshun mauete menequid. Ambi chiaction titinquiabi icsho mauete menenquo icquid. Adembidi: –Mimbī bēdamboen naoc –Nuquin Icho camenuen ambi chiapadomboen chieshtoenquo icquin nabanuna, mado.

⁶ Ma nuquin matses tied uaquidquo. ¿Mitsipadquo icpec? Chonoadquidēnquo dayacquio icquin aton tied uashun ambi nitsinaid pequid. Adembidi Esus chuibanquid icquin dayacquio icquin Esus chuiban-chuibanuna ēnenquo icquin. Adoac utsibon Esus tantiabentsiash.

⁷ Aden ēmbi chuiboedo tantiata. Adsho Nuquin Icbon mibi bēdamboen tantiametsiash.

Esuquidistu tantiata, quiaid

⁸ Utsibon chieshēnubi Esus tantiata, mado. Aidi matsesash isadaidbo tsusedpa Dabidēn tsyuecquid nepanēdash. Nuquin Papan uincuemēdaidquo yec abi iquec. Aidquo tantiaquiota. Aid chuibenequidquo nebi.

⁹ Aden chuisho chieshēnquin bedshun icsambo icquid uidēn uacimboen shocosh nacenaidēn mētaniac mēyadebi. ¿Ēbi aden uidēn uacimboenda Nuquin Papan chiaid uidēn uapadic? Padenquo. Ēmbi chuibenetiapimbo icnuc Nuquin Papan chiaid chuibanquido utsibon adembidi chuibenendac.

¹⁰ Adnubi: –Aden Nuquin Papan ambi tantiactedi Esuquidistu tantiamendac. Aid tantiaquido unēsacsho cuidenquo icquin abēdi tabadmendac –quec chieshtoenquo iccobi quēnēn nauedondaid yequid.

¹¹ Naden abimbo chiaidquo tantiash chieshtoenquo iccobi. –Abi bunaid ēnshun Nuquin Icbon chiapadomboen naquid chieshēmēnquidēn unēs uacsho Nuquin Icbon abi yacno abēdi tabadmendac.

¹² Utsibon chieshēnaqui chieshtoenquo icquin Esus tantiec unēsash abi yacno nidendac. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Ēmbi tantiacmaido neque. Nēid nuquibēdi tabadmenquien ictiad, Papa,” quequin Esusēn Nuquin Papa chiendac.

¹³ Aden abi tantiesabon ambi chiaid niac-niacsho isun Nuquin Icho Esusēn ambi chiapadomboen naquidquo icquin icsaido cuidendac.

Adembidi ambi chiapadomboen abi tantiaquido bēdambo icmendac –quequin chiaid tantiashun ambi chiapadomboen naquin Esusēn naid chuibanuna chieshtoenquo icquin.

Nuquin Papan chiaid isbanta, quiaid

¹⁴ Ĕmbi dada uaqin chuiboed mibĕd icquido naden chuibanta, mado. —Nuquin Icbon nuqui isnubi Esusquo chienquo yec ambembi chiaid chiec mibi chushcanaqueue. Adenda. Adec chushcanansho tantiash matses icsambo yaneque. Padi —cata, mado.

¹⁵ —Mibi bĕdambo iquec —Nuquin Papa camenuen bĕdamboen nata. —Dacuĕtiapimbo iquebique. Ĕmbi naid ma Nuquin Papan isu —qeshun adota. Ambi chiaid bĕdamboen isbanshun chieshtoenquo icquin Nuquin Papan chiaidquo chuibanta, mado.

¹⁶ Ambembi chiaid chuiquidobĕd onquec tabadenda. Adec onquequido icsambo icboedi buĕdanquiec Nuquin Papan chiaid niac-niaquec icsamboshĕ yaneque.

¹⁷ Toshō bedachimboec adquidĕn chiaid tantiaquido dadpen yaneque. Adquidĕn chuisho tantienda. Aden chuiquid Imeneyo caid nec. Adquidbidi Pideto caid nec.

¹⁸ Aidon Nuquin Papan chiaidquo chienquo icquin muaquin chiec. —Esus tantiaquido unĕsabi icquido nĕbimbobi uincuenachimboec icpec. Unĕsacsho aton dada chuca uaqin uincuemenuo iquendac —quequin muaquin chuisho tantiashun utsibon Nuquin Icbon chiaid tantienquo yanac.

¹⁹ Aidon Esus tantiabien icchitash. Nuquin Papan Esus tantiamiac ĕnenquo icquin Esus tantiatsempanĕdash. Padnuc Esus tantiaquidombo dadpen iquec. Adquido chuiquin ambi dada uamepampicpadomboen: “Ĕbi tantiaquidombo nec;’ quequin Nuquin Icbon tantiec.” Adnuc Esus tantiaquidĕn: —Con Icho Esus nec —qeshun ambi icsamboen naid ĕnendac.

²⁰ Esus tantiaquido nadquo iquec. Shubu dapan tsitsan tabĕcaid tabadachimboec-quid nec. Tsitsan abentse-abentsec icsactsĕcquio icnubi utsi-utsiec bĕdambo iquec. Icsactsĕcquidĕn icsa secanun sandoquid yendac. Bĕdambo icquidĕn di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquo yec Esus tantiaquidquo icnubi utsi-utsiec abi icsaid ĕnabi: —Esus tantianu —quetsĕcquid iquec.

²¹ Esus tantiaquidquo ictiadquo yec: —Muaid chuisho tantiatiapimbo icquin nĕbi Nuquin Icbon chiacpadomboen natiadquo iquebi —quiash Nuquin Icbon yuambo yantsiash. Adsho Nuquin Icbon bĕdamboen nametsiash.

²² Caniabon mĕmunenquo icquin abi bunacpadomboen naquid tanenda, mado. Adenquo yec bĕdamboec tabadte bunquiota. Nuquin Papan chiaid niacte bunenquo yec: —Nuquin Icho Esus nec —quequidobĕdan chieshtoenquo icquin Esus tantiata. Matsesten tantiec bĕdamboec isanec bĕdamboec tabadta.

²³ Mibi yacnoshon ambembi chuiquidon: —Mimbi icsamboen tantiec —canuen: —ĔMitsipaden mimbi tantiape? —cac chienda. Adquidĕn chuisho tantiash matses chushcanandashe. Aidĕn chiac chienda.

²⁴ Nuquin Papan chiaid chuibanquid chushcananenquo icquid nendac. Chieshĕmĕnenquo icquin aton matses bĕdamboen isquid nendac. Adembidi nĕshĕnenquo icquin Nuquin Papan chiaid tantiamequid nendac. Utsibon chieshĕnaqui chieshĕnanenquo icquid nendac.

²⁵ Esus tantiesabon: —Mimbi Nuquin Papan chiaid chuisho tantiatiapimbo iquebi —cac adembi nĕshenquo icquin Nuquin Papan chiaidquo chuibanendac. —Nuquin Papan ambi chiaidquo tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac.

²⁶ —Aden Nuquin Papan ambi chiaidquo tantiamiac Esus tantienquo icboedĕmbi Esus tantiabenshun abi yuaquidĕn Satanasĕn namiaid ĕnendac. Aden Nuquin Papan chiacpadomboen naindac —qeshun chieshtoenquo icquin Nuquin Papan chiaidquo chuibanendac abi chuibanquidĕn.

3

Icsambo icquido iquendac, quiaid

¹ Tantia, mado. Mibi chuinu. Esus padpidec choabi icnuc matses dadpenquioshĕ icsamboshĕ iquendac.

² Nadquido iquendac. Nĕdic utsi tantiatiapimbo yec abiuidtsĕqui datantiadquido. Nĕdic piucquid bedte comapenec bunquidombo. Nĕdic: —Is. Ĕmbimbo naiduidi bĕdambo iqueque —quequido. Nĕdic utsibo chieshĕnec icsamboec onquequido. Nĕdic amĕn chiaid niac-niacquido. Nĕdic anin chiaid niac-niacquido. Nĕdic aton na nashunaqui nashumĕnenquo icquido. Nĕdic Nuquin Papan chiaid niac-niacquidombo.

³ Nĕdic aton matses tantiesabo. Nĕdic chiesh bĕdanesabo. Nĕdic muauanquido. Nĕdic abi icsate bunaid ĕnenquo icquido. Nĕdic cuesanquido. Nĕdic bĕdambo icquid chieshĕnquido.

⁴ Nēidic bēdambo icquid damianquiashic cuesunianquido. Nēidic bēdamboen tantienquio yec badedi icsa uanquido. Nēidic: —Ēbiuidtsēqui bēdambo iquec —quec abibi tantiadquido. Nēidic ambi naiduidi bunquin Nuquin Papan tantiesabo.

⁵ Nēidic: —Nuquin Papan tantiaquid nebi —quec muaquin aidēn chiaid niac-niacquido. Adquidtedi icsambo icquido nec. —Adquidbēduidi onquec tabadenda —caimbi.

⁶ Adquidon mibi yacnoshon shubu utsin shubu utsinquien isben-isbenac caosh. Adash chidoidquio icnubi shubun puduedshun ambembi chiaid chuibanac caosh. Aden chuisho tantiaashun: —Padi —catiadquidi chidon: —Mimbi chiaid tantianu —quequin badedquio tantiac caosh. Nuquin Papan chiaid niacash adecbidi icsate bunquieic tabadac caosh aid chidobo.

⁷ Aden icsambo icquidēn ambembi chuidenesho tantianeshun Nuquin Papan chiaidquio tantiatiapimbo icpac caosh aid chidobo.

⁸⁻⁹ Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquio chuisho tantiaashun aidon: —Mue nec. Ēmbimbo comapenen tantiaquin ismenu —queboedombi bēdiactsēc tantiaquin nacnenuidpampic. Adsho isun: —Abimbo cainquio iccosh. Muachitosh —capampic matsesēn. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bēdamboen istiapimbo iquec. Adembidi aidon muaquin chuisho tantiaashun matses dadpeshun: —Muequi nec —capendac.

Nuquin Papan chiaid isbanec bēdamboec tabadte

¹⁰ Ēbini muaquidpenquio nec. Ēmbi naid ma mimbi tantieyoc. —Ma Esus tantianu —quequin Esusēn naid chuibanec bēdamboec tabadondabi. Esus tantiaquidquio icquin matses tantiaquin Esusēn naid chuibeniondambi. Chieshēnaqui chieshtoenquio icquin adembi chuibeniondambi.

¹¹ Ēmbi aden chuibancho isun chieshēnondashi. Shubu dadpen icquid Antioquiya caid yacnoshon ēbi: —Cuesnu —casha Nuquin Icbon nac padenquio icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquio bedshun cuēnoten se-sequin unēs uatsempondash. Adsho Nuquin Icbon nac unēsenuio iccondabi.

¹² Ēbipadquido Esus tantiaquidotedi bēdamboec tabadtiadquio icsho adembidi utsibon comapenen chieshēnendac.

¹³ Padnuen chieshēmēnquidobēd bēdambo icquid damianquieic muaquido bēdiactsēc icsambo icboedi mauuananquieic buēdanquieic icsamboshē yanendac.

¹⁴ Mibi adquidpenquio nec, mado. —Ēmbi isondaidon bēdambo icquidon abimbo chuibanondashi —quec Nuquin Papan chiaid niaquenquio yec bēdamboec tabadta, mado.

¹⁵ Ēnden bacuēmpi icquin Nuquin Papan chiaidquio min matsesēn chuibancho mimbi tantianēdac. Adshun: —Aton Mado Esus tantiaquid unēsacsho abēdi Nuquin Papan tabadmendac —quequin mimbi tantiabēdac. Aden Nuquin Papan bēdamboen iste tantiametembo Nuquin Papan chiaid nendac.

¹⁶ Nuquin Papan chiaid aton Mayanēn tantiamiac matsesēn dada uapampic. Aidēn chiaid abitedimbo bēdamboshē iquec. Aid isec onquequin: —Nuquin Papan chiacpadec bēdamboec tabadnuna. Esus tantiaquido yec icsainquien ictiad —quequin abi chuibanquidēn chuibanec. Adembidi: —Esus tantiaquido adesa. Padi. Bēdamboembien natiad —quequin chuibanec.

¹⁷ Nuquin Papan: —Ēmbi chiaidquio tantiaashun Esus tantiaquinc matses nashunquinc caic Esus tantiaquido ma bēdamboec tabadnu —quequin ambi chiaidquio dada uamepampic.

4

Nuquin Papan chiaid chuisho tantienquio yaid

¹ Nuquin Papabēdtan Esuquidistun mibi isequē. Bēdamboen nata. Esusēn nidaidēn padpidec choshon abitedishun Icbombo icquin unēsaido uincuemiaido unēsabi icquidobēdta chiendac. —Nēid ēbi tantiaquid ēbēdi tabadmembī. Nēid ēbi tantiesā cuidembi —quequin chiendac.

² Aidēn chiacpadomboen naquin Nuquin Papan chiaidquio chuibanta, mado. Matsesēn tantiatiaquido icnuc adota. Tantiatiapimbo icnubi adembi chuibanta. Esus tantiaquido icsasho isun: —Esus tantiaquido adesambo neque. Bēdamboembien natiad —quequin nēishēmēnenquio icquin chuīta, mado. Utsibo bēdamboec tabadsho: —Mibi bēdamboec

tabadoc. Aduidequi tabadta —quequin chieshtoenquo icquin chuita. Bēdiactšēc tantiatsēquido: —Esus tantiaquidon nadoquid —quequin chuibanta, mado.

³—Yuechshun Nuquin Papan chiaidquio matses dadpeshun tantiatiapimbo iquendac —qeshun nata, mado. Aden tantiatiapimbo icquidēn Nuquin Papan chiaidpenquo chuisho tantians: —Mimbi ēbi bunaidquio chuisho tantianu. Ēbi chiec cho —quequin muaquid utsiutien abi yacno pudedmendac.

⁴Pamumēdacbimboecquin Nuquin Papan chiaid tantienquo icquin tsusedpabon ambe-mbi chiampiduidi tantiendac.

⁵Aidēn nacpadomboen nainda, mado. Nuquin Papan chiaidquio bēdamboen tantiaquid yec bēdamboec tabadta. Adsho utsibon chieshēnaqui chieshtoenquo icquin Esusquio tantia, mado. Adem-bidi Nuquin Papan bēdamboen iste Esus tantiesabo chuibanta. —Esus chuibanquidēn nadoquid —caidtedi nabanta, mado.

⁶—Ēbi unēs uan ėm-bi nacpadomboen: “Adota,” mibi caquid nibēdtsiash —qeshun mibi aden chiec nebi. Nēbi Nuquin Papan tantiapadēn chieshēmēnquidon ēbi unēs uaic.

⁷Utsibon chieshēnubi ēnenquo icquin Esusēn naid chuibeniom-bi. —Ēbi bunaid bednu —quec comapenec titinquiacimboen dayacquo icquin Nuquin Papan chiaidtedi naombi. Chieshtoenquo icquin Esus tantiaquidquio nebi. Adshobini nēbi unēs uaic.

⁸Unēs uacshobini matsesēn naid abitedimbo tantiaquidēn Nuquin Icbon: —Ēbi tanti-aquin ėm-bi chiapadomboenuidi naic mibi bēdambo iccoque. Nuquin Papa yacno ėbēdi tabadmequin mibi bēdamboshē icmendambi —caindac. Abi chote ushēn choshon aden Nuquin Icbon ēbi chiendac. Adem-bidi abi chosho iste bunquidotedi abi tantiaquido Nuquin Icbon abēdi tabadmendac.

Timoteyo: Cho, caid

⁹Nēbimbobi ēbi isec cho, mado.

¹⁰Utsibo nidanebon ėbentsēqui tsadebique. Demas caid aton na bedteuidi bunec ēbi nianec shubu dadpen icquid Tesadonica caid yacno nidosh. Quedesente caidic nidaid utsi Cadasia caid yacno nidosh. Titobic nidaid utsi Damasia caid yacno nidosh. Aidedi nidanebon

¹¹Ducas abentsēqui ėbēd iquec. Madcos bedbētsenec cho, mado. Ēbēd-tan aidēmbi nēshunquo Esus chuibantsiashe.

¹²Tiquico caid Espo yacno mibi yacno nidmiombi.

¹³Shubu dadpen icquid Todoas caid yacno Cadpo cuēmēdquidēn shubun con na nimēdaccondashe. Con dashcute ėm-bi dada uaidbēdta bedbētsenec cho, mado. —Abitedi buantiapimbo iquebi —qeshun nēish yua bitsi nacnenaid dada uaiduidtsēqui bēta.

¹⁴Shocosh nacnenquidēn Adecandedo caidēn comapenen chieshēnondashi. Aid Nuquin Papan cuidendac, mado.

¹⁵Nuquin Papan chiaid ėm-bi chuisho tantiatiapimbo icquin icsamboen chuishunon-dashibique. Choquin aid isenda: —Ēbitsen icsamboen chuishunushe —qeshun.

¹⁶Ēnden tauamboen bedshun: —Quēnēn nauednu —cac cuidte chuiquid dapa ėbentsēqui chuibampondambi. —¿Mitsipadosho isun ēbi bedo? Icsamboen nambo iccombi —capondambi. —Ēbēd icboedon dadpeshun: “Bēdambo icquid nec,” quequin ėm-bi naid chuibanac ēbi quēnēn nauedquidon ēbi nidmetsiash —qeshun ėbēd icboedo: —Chiec cho —caqui choenquo iccondash. Aden ēbi cacuidondaiddo tantiaquin: —Nuquin Papan aidocuidenquo icpashun —caimbi.

¹⁷Nuquin Icbombini nianenquo iccondash. —Isadaidpembro matses utsibo ma ėm-bi naid chuibenenu —quequin cuesambo icmepondashi. Adondaiddo icshobini chieshēmēnquidon: —Cuesnu —cabededpondash. Nuquin Icbon nac aid matsesēn unēs uainquo icpondashi.

¹⁸Padpiden chieshēmēnquidon ēbi caic: —Ma mēyanac chieshtoshon Esus tantienquo yanu —casha Nuquin Icbon nac chieshtoenquo ictsiabi. —Nuquin Icbombidi abi yacno ambi matses dadpen namiacno abēdi ėbi tabadmendac —qeshun: —“Nuquin Icho bēdamboshē iquec,” canuna ēnenquo icquin —caimbi.

¹⁹Mibi yacnocquido: —Mibi caic: “Unēsquio iquec,” quiosh Pabado —quequin chuiban, mado. Nēidic Aquida caid. Nēidic aton chido Pidisdita caid. Nēidic Onesipodo caid chedo. Aidedi aden chuiban.

²⁰Mimbi isondaiddo Edasto caid shubu dadpen icquid Codinto yacno tēshēdondash ēbi chonoc. Utsibic Tēdopimo caid aton dada icsabadacsho shubu dadpen icquid Mideto caid yacno nianondambi.

²¹Ue tsasi iquenuanquid taēnushe. Baded cho, mado. Doma yacnocquido nēmbo icquidon: —“Timoteyo unēsquio iquec,” quequin dada ua —caposhi. Nēidic Eyobudo caid.

Nëidic Pudente caid. Nëidic Dino caid. Nëidic Quëdaudia caid. Nëidic Esus tantiaquido nëmbo icquido utsibotedi. Aidtedi adosh.

²² —Nuquin Icho Esusën abëd icquin con mado bëdamboen ispashun —quequin mibi tantiemi. Padi. Aidtedi chuiquin dada uaombi, mado.

TITON ISTE

¹ Pabado nebi. Nuquin Papan chiapaden chuibenequid nebi. Adembidi Esuquidistun, Èbi chuibeneta, caidbidi nebi. Aden chuibanac Nuquin Papan cuènaido Esuquidistu tantiadonequidquo ma icpanuna. Adquid iquec ma bédamboec tabadpanuna.

² Muesa Nuquin Papa nec. Adquid icquin, Èmbi ènden chiampicpadomboen ènenquiocquin Esuquidistu tantiaquido èbèdi tabadendac, quequin ma aidon tantiapanueshun adomboen chiaid chuiquidquo Esuquidistun icmiondashi.

³ Ambi tantiampicpadèn ambi chuipampid Esuquidistu tantiamenuequin aidèn chuibeneta caid nebi.

⁴ Èmbi chuibanac Esuquidistu tantiaquid mibi yampondac, Tito. Adquid yanshun Esuquidistubèd icquid nebi, quequin èmbi tantiacpaden mibi tantiec. Aden tantiaquid con madobimboecquid mibi icsho ismenuequin dada uambique. Isec onqueta.

Esuquidistu tantiaquid icsho isash èbi icsaid cuidenquo yec Nuquin Papa bēpiscudac, quequin ma ènenquiocquin mimi tantiapanuna. Adecbidi Nuquin Papabèd tabadendabi, quequin tantiapanuna, Tito.

Quideta yacno nidshun Titon natequid

⁵ Èmbi nauidboed mimi naimenu, quequin mibi Quideta yacno nianombi ma mimi ambi tantiaid icsa chiac ma Quideta yacnocquidon èmpanuna. Adembidi, shubu dadpen icquid uano-uanoecquid yacno nidshun èmbi chiapadomboen Esuquidistu tantiadonequid istuidshun Esuquidistu tantiaquid utsibo isbanquin bédamboen tabadmenuequin chuiquid icta, quequin adquiduidquo chuita, Tito.

⁶ Mimi Esuquidistu tantiaquid utsibo isbanquin bédamboen tabadmequin chuiquid icta caid nadquo ictiad, Tito. Bédamboec tabadquid ictiad. Adecbidi chido abentsèc inquid ictiad. Aton bacuèbotedi Esuquidistu tantiaquidobidi ictiad. Adquidèn bacuèbo icquin bédamboec tabadquin aton papan chiaidbèdta aton titan chiaid chieshenquiocquin nabantiad.

⁷ Aidi utsibèd bédamboec tabadquin, Nuquibi nanuna, qeshun utsibèd onquenquiocquin ambibi tantiacpadomboenuidi nabanesa ictiad. Adecbidi badedquo nèishesa ictiad. Adecbidi paèmboecquid nua aquesa ictiad. Adecbidi cuesnante bunesa ictiad. Adecbidi muaquin bedesa ictiad.

⁸ Adecbidi Esuquidistu tantiaquid utsibo yuedquid ictiad. Adecbidi utsibobèd bédamboec tabadte bunquid ictiad. Adecbidi utsi bédamboec tabadsho tantias, Cuishon, quec tabadquid ictiad. Adecbidi bédamboen tantiaquin, Naden naic icsatsiabi, qeshun naisa ictiad. Adecbidi, Naden naic bédamboecquid yantsiabi, qeshun adomboen naquidquo ictiad. Adecbidi abimbo chuiquidquo ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Papan chiapadomboen nabanquid ictiad. Adquid nec, quequin utsibon chuisho tantiashun adquid Esuquidistu tantiaquid utsibo isbanquin bédamboen tabadmequin chuiquidquo icta, quequin chuita, Tito.

⁹ Aden utsibo isbanquin bédamboen tabadmenuequin chuiquid icta, cashun nèid aido chuita. Nuquin Papan chiaid chuca uainquiocquin bédamboen chuiban. Aden mimi chuisho tantias ma utsibo bédamboec tabadpanuna. Adembidi Nuquin Papan chiaid chuca uaquidèn chuibancho Nuquin Papan chiapadomboen abimbo chuiban. Aden mimi chiac, Icsamboen chiombi, quetsias, quequin mimi utsibo chuiquid icta caido chuoata, Tito.

¹⁰ Quidetabo nad iqueque. Chuinu. Tanta. Abi chuiquidèn chiapaden naisa Quidetabo dadpen iquec. Abimbo chiosh, camenuequin abimbo chiacbimboec aido onquec. Dadpeshun isadaidbon nacpadomboen nanuequin, Shui dèbid dètemeta, quequin Quidetabon chiec.

¹¹ Adquidon shubu utsin-utsinquec puduedshun ambi tantiaid icsa chuibanac utsin-utsinquec tantias cuèshèdec. Adembidi bedte bunquin adquidon muaquin chuibanec. Adquid tantiamenuen Nuquin Papan chiaid bédamboen chuibanquin ambi muaquin chiaid èmeta, Tito.

¹² Quidetabon matses ènden icnèdaid abentsècshun naden aton matses chuipanèdash. “Quidetabo muaic chuinanquidombo nec. Aben icquid yuatemaiddimboec uimanèmènkuido nec. Chonoadenquiocquin nua peshun nua actenequido neoaic,” quequin Quidetabo ènden icnèdaidèn chuipanèdash.

¹³ Abimbo chuiquidënquo aden chuipanëdash. Aden chuipanëdash, quequin muaquin chuiquid ambi icsamboen tantiaid tantiaimequin comapenen chuiban ma Esuquidistu abimbo tantiaquid adquid yampanueshun.

¹⁴ Aden mimbi chuibanac Esuquidistu tantiaquid yanash isadaidbon Nuquin Papan chiaid utsi uain chiampicpaden chuisho tantiesa ma icpanuna. Aden mimbi chuibanac abimbo chuiquidën chiacbimboen niacquidon chuisho ma tantiesa icpanuna.

¹⁵ Nuquin Papan Esuquidistu tantiamiaidën icbon chiaid bëdamboen isoaic. Adomboembidi ambi uabanaid isec. Adash abitedi bëdambo iquec, quec tsadec. Ambi tantiaid icsambocquid icnuc Esuquidistu tantienquocquin, Nëid mishtemaid nec. Nëid utsi petemaid nec. Nëid utsi actemaid nec, quequin chuibanquidën chiaid tantiec. Aden tantiec aton tantiate icsabudec, Icsaobi, quequin tantienquo iquec.

¹⁶ Nuquin Papa tantiemi, qeshumbic Nuquin Papan chiacpadomboen niacquin tantiesa nebi, quiacbimboec tabadsho utsibon adquid isec. Nuquin Papan chiaid niacquid adquid nec. Nuquin Papan icsamboen isaidquo adquid neoaic. Naid bëda natiapimbo icquid neoaic, Tito.

2

Esuquidistu tantiec iccuededquido tantiametequid

¹ Icsateuidi bunquid icnubi mimbi Esuquidistu tantiaquido abi tantiadonequidquo icmenuequin chuibanquin tantieme.

² Mimbi paëmbocquid nua aquenquo icteniaccpadomboen Esuquidistu tantiaquid tsusiobo chuibanquin tantieme. Adembidi, Mibi bëdamboec nec, utsibo camenu, quec bëdamboec tabadtenequin tsusiobo ismequin tantiemeoa. Adembidi, Naden naic icsatsiabi, qeshun mimbi nainquo yacpadomboen mimbi bëdamboen tantiaid aido chuibanquin tantiemeoa. Adembidi, Naden naic bëdamboecquid yantsiabi, qeshun adomboembidi naquid nebi, quequin tsusiobo chuibanquin tantiemeoa. Adembidi mimbia Esuquidistu tantiadoniaccpadomboen pausunaic icquin ma adquibidi tsusiobotsen yampanueshun tantiaimequin chuibanta. Adembidi, Esuquidistu tantiec utsibobëd tantiananec mibi tabadteniaccpadomboen chuibanquin tantieme. Adecbidi, natiatequid iquendac, quequin Esuquidistu tantesa uainquocquin abi choate mimbi caimbudaccpadomboen chuiquin tantiemeoata, Tito.

³ Adembidi, Esuquidistu tantiaquid ënden machoaido tantiamenuequin chuiban. Nuquin Papan bëdamboecquid icmiaid nebi, quec bëdamboec mibi tabadteniaccpadomboen tantiaimequin chuioa. Adembidi, utsi icsamboen chuiquid iquenda, quequin chuibanquin tantiemeoa. Adembidi, mimbi paëmbocquid nua aquenquo yacpadomboen chuiquin tantiemeoa. Mimbi bëdamboen nabanaid nëbi machocuenaido ismequin tantieme, quequin ënden machoaido chui, Tito.

⁴ Aden chiac ënden machoaidon aton bënë aton bacuëbo chedobëd abi tabadaid tantiamenuequin nëbi machocuenaido bëdamboen ismepec.

⁵ Adembidi aidën bëdamboen tantiaquin, Naden naic icsatsiabi, qeshun nainquo iquec. Naden naic bëdambo ictsiabi, quequin naquid, quequin ënden machoaidon nëbi machocuenaido chuibanquin tantiemeoapec. Adembidi, Mibi inesa chudmenquo yec tabadta, quequin ënden machoaidon nëbi machocuenaido chuiquin tantiemeoapec. Adembidi, aton shubun tabadquin ambi nabanaccpadomboen ismequin aidon nëbi machocuenaido tantiemeoapec. Adembidi, utsibo bëdamboen tantiaquin ambi nashunaccpadomboen ismequin ënden machoaidon nëbi machocuenaido tantiemeoaic. Adembidi, aton bënë chiacpadomboen nabanquin nëbi machocuenaido ismequin tantiemeoaic. Aden ënden machoaidon abi ismiaccpadomboen nëbi machocuenaidon naic tabadsho isash, Nuquin Papan chiacpadomboen naic tabadchidobo, quequin utsibon ispec.

⁶ Adembidi, caniabo chuibanquin tantieme, Tito. Naden naic icsatsiabi, quequin nainquo iquembi, quequin mimbi bëdamboen tantiacpadomboen caniabo tantiaimequin chuioa. Adembidi, Naden naic bëdambo mibi icpec, quequin mimbi bëdamboen tantiacpadomboen aido tantiaimequin chuioa.

⁷ Bëdamboec tabadaid tantiaimequin ismenu, quec mibibi bëdamboec tabadteneta. Mibibi icsainquocquin ismequin tantieme. Adembidi mamënenquocquin bëdamboen chuiquin tantieme.

⁸ Adec mibibi bëdamboec tabadtenequin ismequin Nuquin Papan chiaid abimbo mimbi chuibanac Esuquidistu tantiesa mibi chieshënquid mibi icsamboen chuitiapimbo yec tabadendac.

⁹ Adembidi yuabo chuiquin, Bëdambo iquebi, min icbo camenuequin ambi chiaidtedi chieshenquocquin nabanta, quequin tantiameta, Tito.

¹⁰ Adembidi, min ichon na ampenquiocquin bēdamboen dayun uaqin nashunquin min icho ismeta, quequin yuabo tantiame. Aden Esuquidistu tanquin nabansho isun min icho: Con yua Esuquidistu tantiaquid yec bēdamboshē yanac. Con yua bēdambo icmequidēn chiaid tantianu, quendac icho.

¹¹ Nuquin Papan matses abēd icmenuequin matses icsaid bedshuntequid Esuquidistu icmenuequin chomepanēdash.

¹² Aden chomiac nidaidēn tabadquin utsibo tantiaquin Nuquin Papan chiacpadomboen naquin ismiac adomboembidi naic bēdamboec tabadquid. Nuquin Papan bēdamboen tantiamiac bēdamboen tantiasho, Aidēn bēdambo icmiaid icquin naden naic bēdambo icpec, quequin naquid. Adembidi, Naden naic icsatsiabi, quequin nainquio icquin Nuquin Papan tantiamiacpadomboen naic nuqui tabadtenec. Adomboembidi Quidetabo Esuquidistu tantiaquido chuiquin tantiame, Tito.

¹³ Nuquin Papapadquid con Ichō Esuquidistu choaic, quequin caimbudec bēdamboec tabadebi, quequin chuiquin tantiamēoa.

¹⁴ Nuqui cainaid: Ēmbi con utsibo caid ēbipadquid iquendac, quiash nuqui icsaid bedshunash abided cuidadec unēspanēdash. Adacsho aid tantiaquidquio yec bēdamboec tabadquid nec, quequin chuiquin tantiame, Tito.

¹⁵ Ēmbi chuiboetedi chuibanquin tantiame. Mimbīa tantiaquid icquin, Ēmbi chiacpadomboen nabanec tabadteneta, quequin Quidetabo chuoata. Mimbī chiacpadomboen nainquicsho isun cuembo chuoata. Adecbidi, utsibon mibi icsamboen chuitiapimboec bēdamboec tabadteneta.

3

Utsi tantiaquin nabantequid

¹ Esuquidistu tantiaquidtedi bēpiscudmenquiocnuequin naden chuibanta, Tito. Min tsuibon bēdamboen chiaid naquimbi adembidi mibi chuiquid utsibon bēdamboen chiaid chieshenquiocquin naban. Adembidi, utsibo tantiaquin nashunta, quequin Quideta yacnocquido chui.

² Adembidi, Utsi muaquin chienda, quequin chuoata. Adecbidi, Utsibobēd tantiananec bēdamboec tabad, quequin chuoia. Adembidi, Mimbī naiduidi tantienquiocquin nabanta, quequin chuoia.

³ Ēnden Esuquidistu tantiesā nuqui iccondac. Adquid icquin Nuquin Papan chiacpadomboen nainquio nuqui iccondac. Adquid icquin nuqui bunacpaden nabanec nuqui icsadedicsadedondac. Utsibobēd icsamboec nuqui cuidnampondac. Adembidi, utsin bēdamboen isaic ichso isash nuqui nēishpondac. Adecbidi utsibobēd nēishash nuqui chushcanampondac.

⁴ Adquid nuqui icnuc matses tantiec abēd icquid icmenuec nuqui icsaid bedshunash abided cuidadec Esuquidistu chopanēdash.

⁵⁻⁶ Adec choash cuidadsho isun Nuquin Papan Esuquidistu nuqui tantiamiac. Adoac abi tantiaquid ichso isun adquidtedi Esuquidistun aton Mayan meniac. Adoac, Bēdamboen nasho abi yacno tabadmendac, quenquio yec nuqui tabadec. Aidēnquio nuqui icsate bunaid tantiamequioquin nuqui ēmec.

⁷ Adec aton Mayan nuquibēd ichso isun, Bēdamboquid nec. Aidtedi ēbēdi tabadendac, quequin Nuquin Papan tantiec.

⁸ Ēmbi chuīta, quequin chiaidtedi abimbo iquec, Tito. Aden tantiaquin Quideta yacnocquido chuiban Esuquidistu tantiaquid icquin ma adomboen nabanec bēdamboec tabadpanuna. Ēmbi chiacpadomboen Esuquidistu tantiaquidtedishun nadenec utsibobēd bēdamboec tabadquid nec, quequin chuīta.

⁹ Adec tabadec min tsusedpabo chiec utsibēd nēishnanash icsamboec onquenda, quequin Quidetabo chuīta, Tito. Adembidi, aton tsusedpabon naden nata quequin chuīnēdaid chuiquin chushcanu qesho adembidi anda, cata. Aden chiaid Nuquin Papa yacno mibi puduedmetemaid nec, quequin chuīta.

¹⁰ Adec onquequin Esuquidistu tantiaquido cuēshēdmenuequin chuibanquid ichso bēdamboen tantiamenuequin chuiban. Aden chiaqui niacbidanquin adomboembidi aidēn chuioasho tantianashun aidi comapenen chuibanquin tantiamēoa. Aden chiaqui padpiden niacbidanquin adomboembidi chuioasho tantianashun cacumeta, Tito.

¹¹ Adquid ambi icsamboen tantiacpadecuidi tabadquid neque. Adota. Mimbī chiaqui adecuidi tabadquid Nuquin Papa yacno nidtiapimbo yec abibi cuidadtequid nendac.

Utsibo chuiquin chiaid

¹² Nēbi utsibo chuīnu. Tantiā. Adtemas Tiquico chedo ēbēdi iquec. Abentsēqui Quideta yacno nidmēmbi. Aid mibi yacno choambien mimbī tantiamedonequin chuibanquin

naimbudnu quiash Nicopodis yacno nidoata, Tito. Ue dapa sequenuc Nicopodis yacno tabadnu, quianec nidendabi.

¹³ Matses icsasho cuidte chuiquid, Senas mibi isbidanec Apodosbëd udi nidec. Aid daëdi mibi yacno chosho yued. Nidnu, qesho aton na nibëdsho isun menequin bëdamboen nidme.

¹⁴ Peshun acnu, quequin Esuquidistu tantiaquidën chonoadquin nabanquid. Utsi nashunquin adomboembidi nabanec tabadquid. Aden nabanec tabadsho isash utsibo Esuquidistu tantiaquidquiobidi yanendac.

¹⁵ Mibi tantiec tabadebi, quequin Tito chuita, ëbëd icquidon cacpadomboen dada uaimbi. Adembidi mibëd icquido Esuquidistu tantiaquido tantiec ëbëd icquido tabadoaic.

Esuquidistun, Bëdambo iquebi, camiaido ma mibitedi icpanuna. Padi. Aideded chiombi, Tito.

PIDEMONËN ISTE

¹ Pabado nebi. Esuquidistun ëbi chuibeneta cac chuibansho quënën nauedaid nebi. Ëbëdi Timoteyo iquec. Aidi Esuquidistu tantiaquid icsho nuqui con utsi caid nec.

Ëbi yuedquid Esuquidistu chuibanquidquio mibi neque. Ëmbi dada uaid isec onqueta, Pidemon.

² Mibëd icquid, Apia, Esuquidistu tantiaquidquio icsho nuqui con chu caid nec. Adquipo mibëd icquidbidi nuqui con utsi caidbidi nec. Sondanon matses icsambocsho cacumi-achimboen Esuquidistu tantiaquid icsamenuequid cacumequid Adquipo nec. Aido min shubun Esuquidistu tantiec iccuededquido iqueque. Ëmbi dada uaid bedash isec onquequin aido chuoata, Pidemon.

³ Esuquidistu tantiaquido icsho Nuquin Papan ëbi icsaid cuidenquiocquin ambi bëdambo icmebanaid nebi, quequin mibitedishun ma tantiapanuna. Adecbidi, Nuquin Papabëd icquido nebi, quequin ambi tantiamiaidquio ma icpanuna.

Nuquin Papa chiec onquiaid

⁴⁻⁵ Pidemon Nuquin Icbo tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantiash, Pidemon tantiec bëdambo iquebi, Papa, quequin Nuquin Papa chiec onquebudebi, Pidemon.

⁶ Aden mibi tantiaquin Pidemon ambi tantiaid Esuquidistu chuibanquid icme. Aden aidën chuibansho mimbi Esuquidistu bëdamboen tantiamiac Esuquidistu tantiaquid utsibo ma Pidemonën bëdamboen tantiapanuna, Papa, quequin Nuquin Papa chiec onquebudebi.

⁷ Aden ëmbi Nuquin Papa chuibudacpadomboen mimbi naic. Pidemonën Esuquidistu tantiaquid utsibo tantiaquin nashunec, qesho tantiash bëdambo iquebi, Pidemon.

Onesimo tantiaquin chuidoniaid

⁸ Esuquidistun ëbi chuibeneta caid icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mimbi nashunacpadomboen ëmbi nidmiaidtsen bëdamboen tantiaquin nashunta, quequin mibi chuitiadquio icquimbi padenquio iquemi.

⁹ Tantiananquid nuqui icquin aden chienquio iquemi. Tsusio budobi. Adquid icquin Esuquidistu chuibansho padpiden quënën nauedoshi.

¹⁰ Quënën nauedaid icquin ëmbi Esuquidistu chuibanac aid tantiaquidbidi Onesimo yanosh. Adquid yansho ëmbi con mado caid nec. Adquid yanash ¿Onesimo mibi yacno nidacsho ada ëbi bëdamboen tantiaquin mimbi nashunondacpaden aidi bëdamboen tantiaquin nashunoatsia? Pidemon.

¹¹ Ënden min yua icquin mimbi chiacpadomboen mibi nashunenquio iccondaidëmbi nëbi Esuquidistu tantiaquid yanshumbini nëshunquio bëdamboen nashunec. Mibi yacno nidshun adomboembidi Onesimon mibi nashunoaindac.

¹² Aidi mibi yacno nidmeoaimbi. Con dayunquio icquid nidmenu, quiash aid tantiec unësquio tsadebi, Pidemon.

¹³ Esuquidistu chuibansho quënën nauedshun tataniac caputiapimbocsho mimbi ëbi nashuntiapimbo iquec. Adec mibi nashumëntiapimbocnobi Onesimombini nashunosh, qeshun nidmetiapimbocquimbi mibi yacno nidmembali.

¹⁴ Onesimo ëbëdi tabadmenuequin chuita, mibi catiapimbo iquebi. Mimbibi aden chiac bëdambo ictsiash.

¹⁵ Yuecash cuëshëdenquio yec Pidemombëd Onesimo tabadoaindac, quequin Nuquin Papan tantiondacpadquiec mibi yacnoësh cuenëdaid mibi yacno nidash Onesimo tabadtsiash.

¹⁶ Onesimo min yua iccondaid Esuquidistu tantiaquid yansho mimbi con utsi caid aidi nendac. Ëbëd icquin natiapimbocsho aidën nashunëbi. Mibi yacno nidshun mimbi chuisho Esuquidistu tantiaquid icquin chieshenquiocquin bëdamboen mibi nashunendac.

¹⁷ Pabado ëbëd isedanquid nec, qeshun mimbi ëbi yuedondacpaden Onesimo yuedta, Pidemon.

¹⁸ Con na utsibëdtabi con na bedtequid Onesimon bedaccondash, quequin mimbi chiacctedi mibi meneoaimbi.

¹⁹ Aidedi meneoaimbi, quequin ëmbibi dada uaimbique. Isec onquequin tantiaquiota. Ëmbi Esuquidistu chuibanac abi tantiaquid yanshun Onesimon bedaidtedi daëd uaquin ëbi nashunquin cuidtiadquidi mibi nec, Pidemon.

²⁰ ¿Aden ëbi nashunuequinda mimbi Onesimo ëbibimboecsho bëdamboen tantiaquin nashumpatsia? Aden mimbi aid nashunuc bëdambo ictsiabi.

²¹ Ĕmbi chiacdedi daëd uaqin mimbi natsiac, quequin tantiec tsadebi, Pidemon.

²² Nēidtsen chuinu. Tantia. Ĕmbi tantienquiocnoc Pabado chonoshe qeshun abi ushondaïd nacnenueshun nacnenta, Pidemon. Mibi ěbi tantiec Nuquin Papa chiec on-quiapadomboen badedquo Nuquin Papan mibëd icmepashuni.

Utsibo chuinu quiaid

²³ Esuquidistu tantiaquid utsibo ěbëdi iquec. Aidon chiaïd chuinu. Tantia. Epapadas, abembi ěbëd icnuec quĕnĕn nauedadondaidĕn: Mibëd icquidotedi tantiec tsadebi, quequin Pidemon chuita, cac adomboen dada uaimbi, Pidemon.

²⁴ Madcos yec Adistadico yec Demas yec Ducas yec quec ěbëd icquido iquec. Aidombidi: Mibëd icquido tantiec tabadebi, quequin Pidemon chuita, cac dada uaoaimbi. Aidtedishun ěmbi Esuquidistu chuibanacpadomboen chuibanoaquido nec.

²⁵ Nuquin Icbo Esuquidistun mibitedi bëdamboçquid icmëbanacpadquiec ma tabadoapana, Pidemon.

Padi. Aidted dada uaombique. Isec onqueta.

EBEYON ISADAIDBON ISTE

Abi yacnoshon ambi uaidon Icbombo Esuquidistu nendac

¹ Èndenquimboshë Nuquin Papan ëmbi chiacpadomboen chuibanta cac adomboembidi abëd icquido tsusedpabon chuibanoapampic. Abentsëc chuimeshun yuecshun ambi chiaid utsi tsusedpa utsitsen chuimeoapampic. Adoshombic yuecquiocshon ambi chiaid utsitsen tsusedpa utsitsen chuimeoapampic. Adembidi ambi abi yacnoshon uaid mayan bëda budmiac aidënchiacpadomboen tsusedpabon chuiuoapampic. Adembidi nadatiambocquin uabanquin ismequin chiac adomboembidi chuiuoapampic.

² Nëbi tsyuecquio Nuquin Papan chiacpadomboen abipadquiocquidëmbi aton Madon chuibanec. Aidi Nuquin Papan ambi uaido con icbo camiaidquio nec. Nidaid abubëdta uashun aidënquiocquidtedi aton Papabëdtan uabanampidquio aton Madombo nec.

³ Aidi, aton Papa bëdaidquio yampidpadquidquibidi aton Mado neoaic. Aton Papa yapadquiocquin ismequid yec ambi nadomboen natiad, quequin nadatiambocquin ambi tantiapadquiequi nidaid abubëd aidënquiocquidtedi adquiuoidi iquec. Aidi aton Papan chiaid niaquesambo yec matses icsaid bedshunash abided cuidadec unësash, Èmbi bëdamocquid icmebanaido matses nendac, quequin tantiashe abuc nidoash Nuquin Papabëd tabadoapanëdash aidquio.

⁴ Ad icnuc ambi abi yacnoshon uaido abipadquid nibëdec. Aidon con Icbombo caidquio nec.

⁵ ¿Ambi abi yacnoshon uaid mayan bëda isec:

“Con mado mibi nec.

Èbi min papa nendac, quepecta Nuquin Papa iquec? Padenquio.

Adecbidi:

¿Nëidën Papa nebi.

Adecbidi: Con mado nec, quepecta Nuquin Papa iquec aido caic? Padenquio.”

⁶ Abëd Abiambo Yampidi nidaidën tabadash choasho isun Nuquin Papan ismequin:

“Nëid con Madombo Abentsëqui nec. Aidquio tantiec con Icbo nec, quec cuishon quec, ambi naid chiec cuëdën, cac aden ambi abi yacnoshon uaido mayan bëdabo chuibanec cuëdëncuedendac.”

⁷ Ambi abi yacnoshon uaido mayan bëdabo naden Nuquin Papan chiec:

“Èmbi chiacpadequi cunquequid yanec.

Adecbidi, ëmbi chiacpadequi cuëte nëdënquedote iquendac.”

⁸ Padnuen ambi uacmaid abipadquid aton Madombo utsi uatiapimbo iquec. Adquidquio icsho Nuquin Papan naden chiec:

“Ènenquiocquin ëbëdtan Chuiquid Abentsëcquio mibi iquendac.

Adecbidi namequid bëdaidquio mibi iquendac.

⁹ Èbipadquid iquec bëdamboec tabadquin nabante bunquidquio mibi nec. Adquid yec icsamboec tabadquin nabante bunësambobidi mibi nec.

Adquid yec ëbi yapadquidquio Icbo Abentsëcquio mibi nec. Mibëd icquido adquid nibëdec.

Mibi abentsëqui adquidquio iquec. Adquid iquec, Bëdambo iquebi, quec mibi cuishon quendac.”

¹⁰ Adembidi Nuquin Papan naden aton Mado chuiuoic,

“Tauamboen nidaid abubëdta uashun aidënquiocquidtedi mimbi uabampampic.

Aidtedishun icbombo mibi nec.

¹¹⁻¹² Aidtedi ënëdendac.

Mibien nibëdantiapimbo yec abi tabadendac.

Aidtedi dashcute shënbudaid niacbimboen chuca uaindac.

Mibien Abiambo Yampid yec abi ënëdesa mibi iquendac.

¹³ Nëbi cainec ëbëdquio tabadec cho.

Mibi chieshënkuidtedi nibëdquio icmenun nabono. Chiata,”

quequin Nuquin Papan chiampic. ¿Ambi abi yacnoshon uaido mayan bëda aden chuiampidta nepadic? Padenquio. Esuquidistu aden chuiampic.

¹⁴ Ambi abi yacnoshon uaido mayan bëdabo Nuquin Papan, Èbëd tabadtequidombo nashunta, caido nec.

¹ Adec abitedishun Icbombo aton Mado icnuc ambi chiaid chieshēnchitomane qeshun tantiadonequie tabadnuna.

² Ĕndenquimboshē ambi, Naden nata, quequin chiaid ambi abi yacnoshon uaido mayan bēdabo chuimiapadomboenuidi naisa icsho isun Nuquin Papan cuidpampic. ¿Aden Ĕndenquimboshē ambi chiaid chieshēnquid ambi cuidpampicpaden

³ nēbi icquidtsen ambi chiaid chieshēnsho isun cuidenquioda icpadic? Ambi chiaid niacquid ambi cuidtiadquidi icnubi aton Madoded cuidpanēdash. Adoac, Ĕbi yacno Yuedanquid nebi, quequin aton Madonquio Esusēmba chiambic adomboembidi abi tantiaquidontsen chuioapondashi. Aden Esusēn chiaid tantiaquidon chuibanubien,

⁴ Ĕmbi chiaidquio chuibanoopec, quequin ismenuequin aton Mayanēn Nuquin Papabēd icquidēn tantiamebanacpadomboen nadatiambocquin utsi-utsien bēdamebanquinc, mayan icsa dapuedmequinc, unēsaid uincuemequinc caquin adquidēn-adquidēnquien nabededpanēdash.

Matses icnu quiash Esuquidistu matsespanēdash

⁵ Adembidi chuinu. Tantiata. Abi yacno Esuquidistu tantiaquido choash tabadsho isun, Nēido Ĕbi yacnoshon Ĕmbi uaido mayan bēdabo mibi chuiquid nec, quenquio Nuquin Papa iquendac.

⁶ Ĕndenquimbo aden tantiaquin dada uaquin naden Nuquin Papa chiec Dabid pado onquepampic:

“Tantiaquiono. Ĕbi chui, Papa. ¿Atotsieshun matses mimbi uaid pistēcquio icsho mimbi comapenen tantiatequid aido icpec? Papa.

Adembidi, ¿Atotsieshun Adanēn tsyuecquido mimbi nashumpe? Papa.

⁷ Nēbi chuitan mimbi cac mibi yacnoshon uaid mayan bēdan adomboembidi chuioac matsesēn nabanec.

Yuecquiocshon mibipadquid matses mimbi icmendac.

⁸ Adquid icmeshun mimbi uaidtedishun icbombobidi aid mimbi icmendac,”

quequin abimbo chiampid nec. Nēbi abitedishun icbo matses mimbi icmiambo iquec.

⁹ Utsien Nuquin Papapadquidquio yequi matsesun Nuquin Papan tantiamiapaden ambi abi yacnoshon uaido mayan bēdabon chiac nabamboedi nēbi aton Papabēd tsadec abitedishun Icbombo yanac. Aidi Nuquin Papan chiacpadomboen nanuec nidaidēnshun tishac matsesash matses tantiec matses icsaid bedshunash abided cuidadec unēsash abitedishun Icbombo yampanēdash.

¹⁰ Nuquin Papa abitedi uaquidquio icnuc ambi tantiacpadec iquec. Adquid icquin ambi, Matses icsaisa icmeshun con bacuē icmembali, quequin tantiacpaden Ĕbi yacno abi tantiaquid yuedquid con Madombo iquendac, quequin ambi chiampicpadquiequi aton Mado matsespanēdash. Aidi matses yec natiamianquiequi icsaisa yec unēsash uincuenash bēyucanec abi yacno dectatonepanēdash ma Nuquin Papan, Matses con bacuē icmembali, quequin tantiaido Ĕbi tsibanec dectatonepanu quiash.

¹¹ Matses bēdambo icmequid Esuquidistun Papa ambi bēdambo icmebantequidon Papabidi nendac. Aton Papa Abentsēqui icnuc Esuquidistu Nuquin Papa yacno choash, Con utsibo nec, quependac

¹² aton Papa chiec:

“Mibi chuiquin con utsibo tantiamenu, Papa.

Aidobēd tabadquimbi mibi chuinu. Tanti, Papa, quependac.”

¹³ Adembidi chuioaic:

“Mibi tantiaquin mimbi chiampicpadomboen nabanash choaobi, Papa.

Ĕbi tsibantequid mimbi bēdaidquio icmiaidquio bēec choaobi, quequin mibi chiendambi, Papa,”

quequin matsesabi yec abuc tabadquin Esuquidistun chuipampic.

¹⁴ Matses namibēd intachoquid yec unēstequid icsho mēnchicquid icnu quiash Esuquidistu matsesash unēstequid yampanēdash. Ma matses mayan icsan dacuēdmequin dēcatemēntiapimbo yampanu quiash matsesash unēstequid yampanēdash

¹⁵ ma mayan icsan ambi dacuēdmiaido ambi yuaido icboedi matses Ĕmbi mēnchictequid ma icpanuna.

¹⁶ Ĕmbi uaido mayan bēdabo unēstequid icsho mēnchicnu, quenquio yec matsesash Esuquidistu unēsapanēdash. Abadauanēn tsyuecquido mēnchicnu, quiash matsespanēdash.

¹⁷ Aden ambi chiacpaden nanuec matsespadquid yampanēdash. Adec matsesash matses nēnacpadquieq nēmpañēdash. Abi bundoacpadquieq bundopanēdash. Abi natiacpadquieq natiatequid icpanēdash. Mayan icsan icsamenuequin tanaidbidi icpanēdash. Matses yanash icsaisa yec matses icsaid bedshunash abided cuidadec unēsapanēdash

matses Nuquin Papan bēdamboen istequid icmenuec. Adechidi, Matses icsaisa yanabi yec chuibanec Nuquin Papabēd onquetiapimbo iquec, quec matses chuibanec Nuquin Papabēd aidi onquec.

¹⁸ Matsesacsho mayan icsan: Nuquin Papan chiaid niacmenu, quequin tanac niaquesa Esus icpanēdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe ēbi dayacquio icmec cho, cac badedquio choquin chieshesa nuqui icmendac.

3

Abi yacno yuedanquidquio icquin Moises dēniacquid Esuquidistu

¹ Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ēbi chuibeneta, cashumbic adembidi ambi matses chuibanec ēbēd onquequid dapa icoata caid Esuquidistu nec, quequin aidquio tantiaquionona.

² Nuquin Papan chiapadomboen chieshenquiocquin naquido Nuquin Papan shubun icquido abi tantiaquido iquendac, quequin Moisesēn chuided-chuidedampicpaden Esuquidistun adomboembidi chuibampanēdash.

³ Aidi Abiambo Yampid yec, Ēbi tantiaquido con shubun icquido nendac, Esuquidistu quiacpadec adechidi adtiapimbo Moises icoapampic.

⁴ Nēidted con shubun ēbēdi tabadendac, quequid shubu icbo nec. Aden Nuquin Papan chiapadomboen aton shubun icquido bēdambocquid icmequid Esuquidistu nec.

⁵ Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin min matses chuita, cacpadomboen chuiquid Moises icpampic.

⁶ Esuquidistu Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepanēdash. Aidēn shubun icquid nebi, qeshun chieshenquiocquin cainquidquio aton shubun icquidquio nuqui nendac.

Chieshenda

⁷ Aton shubun tabadnuequid naden Nuquin Papan Mayanēn ambi chiaid mibi bēdamboen tantiamenuen chieque. Tantiata:

“Nēbimbobi Nuquin Papan chiaid chieshēnenquio yec tabadta.

⁸ Equipito yacnoēsh cuēte nibēdacno capuquin tsusedpabon,

¿Nuquibēdida Nuquin Papa iqueque? Tantiabono, qeshun ambi chiaid chieshēmpampicpaden chieshēnenda.

⁹ Cuēte nibēdacno seta 40ted matamec capucuenequin tsusedpabon Nuquin Papan nadatiambocquin naded-nadedsho isquimbi

¿Ambi chiaid niacshoda Nuquin Papan ēbi cuidpeba?

Isbono, quiacpadquiec tsusedpabo icsamboec tabadpampic.

¹⁰ Adec tabadsho isash nēishpondabi.

Ēmbi chiaid chieshēnec ambibi tantiacpadequi icsadenepampic.

¹¹ Adquid icsho isun chushcain: Ēmbi abitedi uabanquin nainash

ēbi tabadacno aidtedi puduedmenquio iquembi, quequin chiapadomboen naindambi. Abimbo caimbi,”

quequin Nuquin Papan isadaidbo chiampid nec.

¹² Abiambo Yampid Nuquin Papa abi iquec, quequin tantish cuēshēdchitomane qeshun tantiadonequota.

¹³ Nuquin Papan chiapadquiec tabadnuna, quec badiadquidēn-badiadquidēnquiec chuinanec onqueta ma adoac icsamianquidēn chiac Nuquin Papan chiaid chieshēnenquiocpanuna.

¹⁴ Esusbēd icquid nebi, quiondacpaden tantiadenequin caimbudec aton matses yec Esus yacno nidanetequidquio mibi nendac.

¹⁵ Nuquin Papan chiampid utsitsen chuinu. Tantia:

“Nēbimbobi Nuquin Papan chiaid tantesa uampicpaden tantesa uainda.”

¹⁶ ¿Tsuatsin Nuquin Papan chiaid tantishun chieshēmpampic? ¿Equipito yacnoshon bēyucanquin Moisesēn buanaido Nuquin Papan chiaid tantish chieshquido yanenquioda icpampic?

¹⁷ ¿Tsuatsibidi seta 40ted matamec chiesho isash Nuquin Papa aidtedbidi seta matamec nēishted-nēishtedpampic? Adoac ¿Cuēte nibēdacnoēsh icsaquidtedi unēsbudnenquioda icpampic?

¹⁸ ¿Abitedi uabanquin nainash ëbi tabadacno puduedmenquo iquembí, quequin tsutsi Nuquin Papan chuipampic? ¿Ambi chiaid chieshênquid Nuquin Papan chienquioda icpampic?

¹⁹ Ai, tsusedpabon Nuquin Papan chiaid tantiash, Bêdambo iqueque, Adonona, queboedombi, Nuqui nabocpadomboen nanuna, quequin ambi chiaid chieshênsho Nuquin Papan abi yacno puduedmetiapimbo icpampic.

4

Ëbi yacno puduedash ëbêd tabadtequid quiaid

¹ Ëbi yacno puduedash ëbêd tabadtequid iquendac, quequin Nuquin Papan chiampicpadomboen nêbimbobi chuioaique. Abi yacno abêdi ictiapimbo icchitomane quequin Esuquidistu tantiadonequionona.

² Ëbi yacno puduedash tabadtequid iquendac, quequin êndenquimboshê Nuquin Papan nuquin tsusedpabo chiampicpadomboen nêbi nuqui chuioaic. Aden êndenquimbo chuisho tantiash, Nuquin Papan chiaid abimbo iquec, quiash tantienquo yanash, Aid cainu, quetiapimbo tsusedpabo utsi-utsiec yampampic.

³ Ambi chiaid tantiaquidomboen nêbi aïdbêdi tabadec.

“Ênden yampidon tantienquiosho isash, Abitedi uabanquin nainash ëbi tabadacno chotiapimbo aido iquendac,”

quequin chushcaquin Nuquin Papan aden chuipampic. Tauamboec ambi tantiacpadomboen abitedi uabanquin nainash Nuquin Papa quenenash tabadpampic.

⁴ Abi tabadaid chuiquin Nuquin Papan naden dada uamiampique. Tántia: “Seistedec ushquin abitedi uabanash badiad utsin ênash tabadpobi.”

⁵ Ashumbic nadentsen dada uamiampic:

“Ëbi ênash tabadacno ëmbi chiaid chieshênquido chotiapimbo iquendac,” quequin chuipampic.

⁶ Aden chuimiac êndenquimboshê ambi chiaid tantiesa icquin niac-niacquec Nuquin Papabêd tabadtiapimbo icpampid icnubi ambi chiapadomboen naquin cainpampidobêd nêbi nidaid utsi-utsiec icquido Nuquin Papabêd tabadtequid nendac.

⁷ Ambi tantiacpadên Nuquin Papan chuimiapaden Dabid padon:

“Icsachitomane qeshun Nuquin Papan chiaid tantiaquiota,” quequin dada uapampic.

⁸ Chuiquid dapa Dabid tishamboconoc Equipito yacnoêsh nidaid Canan yacno abi chuiquid dapa Osuebêd isadaidbo cho-chopampic. Capuec ênêdash nidaid Canan yacno cho-choash isadaidbo ênêdenquo yec tabadte icnuc, Ëbi yacno ênêdenquo yec tabadte iquendac, quequin Canan yacno choash tabadquidon tsyuecquid Dabid pado Nuquin Papan chuimenquo ictsenampic.

⁹ Aden Dabid pado chuimiaid tantiash abi tantiadonequidombo Nuquin Papabêd tabadquido nendac.

¹⁰ Aden uabanquin nainash Nuquin Papa tabadacpadec ambi bêdambo icmenuequin tantiactedi nabanquin nainash aïdbêdi tabadendac.

¹¹ Nuquin Papabêd tabadnuequin ambi tantiacpadec icnuen nainu, qeshun Esuquidistu tantiaquionona. Nuquin Papan chiaid tantiesa yanash tsusedpabo puduedenquiocpampicpadec icmane qeshun adonona.

¹² Nuquin Papan chiaid ambia chuipampidquo abi iquec. Nadatiambocquin tantiamete ambi chiaid nec. Shocosh siante abiuc daêdi cuênumboquidên siaid uquêduc sênquin nami icsaid isendac. Adomboembidi Nuquin Papan chiaid chiac papuedquid matsesên tantiaidtedi uquêduc sênaid isacimboecnuc abi icsaid tantiamendac. Ambi, Naden nanuna, quequin chiabi yaidtedi abi bunquin ambi chiabi yaidtedibidi matses tantiamequin naden: Mimbí tantiaid icsa nêid icnubi mimbí tantiaid utsi bêdambo iquec. Adecbidi, mibi bunaid icsa nêid icnubi mibi bunaid utsi bêdambo iquec, quequin tantiamebanshun mimbí tantiaid icsa mibi bunaid icsabêdtabi ênta, quequin Nuquin Papan chiaidênquo mibi tantiamendac.

¹³ Abitedi isquidquo Nuquin Papa nec. Adquid icquin matses ompodtiapimboconoc isendac. Adembidi, Êmbi chiapadomboenda matsesên nabanoshe. Tántianu, qeshun, abi yacno tabadnuequin cainquido bêsiquoquin ambi nabanaidtedi chuimendac.

Matses chuibanec Nuquin Papabêd onquequid dapa Esuquidistu

¹⁴ Adec Nuquin Papa abitedi isquidquo icnubi icsambocquid icquin ambembi matsesên aid chuitiapimboconcho isun abi tantiaquido chuibanec Nuquin Papabêd onquequid dapa

ënden abi yacno dectatonëdaid Esuquidistu nec. Aidi Nuquin Papan Madombo nec, quequin tantiesa yanchitomanë qeshun aidquo tantiaquionona.

¹⁵ Matses chuibanec Nuquin Papabëd onquequid dapa matses yequi natiamiacmaidbimboec tsadpondash, quetiapimbo nuqui iquec. Matsesacsho mayan icsan, Nuquin Papan chiaid niacmenu, cac niaquenquo Esuquidistun icpanëdash.

¹⁶ Adquid nuqui chuibanec Nuquin Papabëd onquequid dapa iquec, quequin tantiec dacuëdenquo yec abi yacno ënden Esuquidistubëd puduedquidëmbimboen Nuquin Papa ëmbitsen chuinuna. Icsashun Nuquin Papa chiac, Con mado Esus mibi icsaid bedshunash abided cuidadpanëdash, quequin tantiec mibi icsaid bëpiscudobi, quequin mibi tantiamec. Adembidi mibi natiamiaid abi chuisho Nuquin Papan Mayanën mibi chieshmenquiocquin dayacquio icmendac.

5

¹ Ëndenquimbo Nuquin Papan, Min matses chuibanec ëbëd onquequid dapa icta, caid isadaidbo utsi-utsiec icpampic. Adquid Nuquin Papan icmiac, Con matses icsapash icnui, qeshun nidaidën capuquid yua cuesunedenequin taudienepampic. Adembidi, Mibi bëdambo iquec, Papa, quequin ismequin, Nëid menenu, cac Nuquin Papan naden nata cain chiacpadomboen naquin aton matsesën bëaido cuesuneshun taudienepampic.

² Aton matses chuibanec Nuquin Papabëd onquequid dapan aton matses icsasho isun, Con matsesbëdi icsaquid nebi, quequin

³ nidaidën capuquid yua utsi-utsien cuesunedenepampic.

⁴ Aidi, Con matses chuibanec Nuquin Papabëd onquequid dapa icnu, quenquo icpampic. Nuquin Papambi, Min matses chuibanec ëbëd onquequid dapa icta, caid nepampic. Min matses chuibanec ëbëd onquequid dapa icta, Nuquin Papan abia caid Adon cuëmëdquid icpampic. Aidi unësan abi tsibanquid-abi tsibanquidquien Nuquin Papan, Min matses chuibanec ëbëd onquequid dapa icta, caid icpampic.

⁵ Adembidi Nuquin Papan, Matses chuibanec ëbëd onquequid dapa icta, caid Esuquidistu iquec. Èbibi adquid icnu, quenquo Esuquidistu icpanëdash. Aton Papambien:

“Mibi con Madombo neque.

Con shubun icquido mimbi icmiaido chuibanec ëbëd onquequid dapa icta,”

capampic aton Papan Esuquidistu chuiquin. Adembidi Esuquidistu chuoiaquin aton Papanquo:

“Matsesash icsaisa yec min utsibo icsaid bedshunash cuidadec unësash uincuenash matses chuibanec ëbëd onquequid dapa icta,” capampic.

⁶ Ambi chiaid utsi nad icpampic:

“Matses chuibanec ëbëd onquequid dapa Medquisedec yampidpadquid mibi nendac.

Adquid yec ënëdenquioctequidquo mibi nendac.”

⁷ Adec, Con Pan chiampicpadquid icnu, quiash matsesacsho unës uaquin mëyante nendabi, quequin tantiec shubiec nadpanëdash. Matses icsaid bedshunash cuidadquid ëbi icmenda, quetiapimbo iquebi, Papa. Matses icsaid bedshunash cuidadquid iquendabi. Mimbi chiacpadomboen natiadquo iquebi, Papa, quequin yuen chuidonepanëdash Esuquidistun. Aden abi chuisho aton Papan adquidquo icmepanëdash.

⁸ Nuquin Papan Madombo iquequi matsesacsho mëyanac Nuquin Papan chiacpadomboen tantiabempanëdash.

⁹ Aden tantiabënash matses icsaid bedshunash abided cuidadash Nuquin Papa yacno Yuedanquid yanquioipanëdash.

¹⁰ Adoacsho isun, Nëbi matses chuibanec ëbëd onquequid dapa Medquisedecpadquid icta, cain Nuquin Papan Esus chuiampic.

Nuquin Papan chiaid ënden tantiaboedi tantiesa yanenda

¹¹ Ambia matses chuibanec Nuquin Papabëd onquequid dapa Medquisedec nepampic. Aid chuiquin tantiamete dadpen iquec. Aidedi chuitiadquiocquin mibi eme uacsho çmitsipadomboentsimbi chuibanquin mibi tantiamepe?

¹² Mibia utsin tantiamiaid icquin ënden tantiabempatecnëdan mibitedishun. Adembidi mimbi abia tantiaid utsibo tantiamepatecnëdan. Bacuën shuma chishquin tantiacpaden tantiaquid icquin Nuquin Papan chiaid tantiatiapimbo mimbi icpec.

¹³ Shuma chishquid bacuëmpi, Bëdamboen nata, quequin chiaid tantiesa nec.

¹⁴ Pete pequidëmbien, Nadomboen nata, quequin ismiac adomboembidi isbanec mëquiadquidën icsa uainquiocquin nabanec. Adomboembidi Nuquin Papan chiaid tantiamiac tantiabënquidquo yanshun adomboen nabandene. Adquid yanshun utsin, Naden

nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabi, qeshun nainquio iquendac.

6

¹ Aden Esus chuiquin abia tantiamiaid bēdamboen tantiashun abipadquid icnuequin abi chuiquin tantiamiaid utsi tantiaquionona. Abia tantiamiaid nad iqueque. Tantia. Chuinu. Esus tantiaquid icta. Adquid icquin icsaid ēnta. Adembidi, Nuquin Papan chiaid tantiaquidquio icta.

² Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menenuequin mēdanten mamishaid icta. Adembidi, Abi tantiaquid unēsash uincuente iquec, quequin tantiaquidquio icta. Adembidi, Abi tantiesa cuidtequid iquendac, quequin tantiec bēdamboec tabadteneta.

³ Aidedi mimbi tantioc. Aidedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta.

⁴ Aden Esuquidistu tantiasho isun aton Mayan Nuquin Papan meniaid icboedi

⁵ Nuquin Papan chiapadomboen nadatiambocquin nabamboed,

⁶ Esus matesquio yec icsamboquid nepanēdash, quiash, Esus cuesten dectan, quequid-bimboecquid icsho Nuquin Papan aid isendac. Aidēn oncain Esus mamēshunec. Aden Esus tantienquio yanacsho bēdamboen tantiamenuen chuiquin, Icsaobique. Ēbi icsaid ēnu, cametiapimbo Nuquin Papan iquendac.

⁷ Baded-badedquiec ue sequequin nidaid pachi uaidēn tiedēn caniquid caniacsho taneshcaquidēn petequid nendac. Adecbidi Esuquidistu chuibanac abi tantiaquiosho Icbon yuedaido iquendac.

⁸ Echobēd cana shēta chedo ēshē idash dadpen yanushe qeshun nēdēncatequid nendac. Adecbidi icsamboen chiaid tantiaquid uquē nēsiatequid nendac.

⁹ Aden mibi chuiquimbi, Nuquin Papan nēsiatemaid mibi nec, quequin tantiembi. Esuquidistu tantiaquid yec abi tantiaquid utsibobēd tantianec bēdamboec tabadquin ismequid nec, quequin mibi chuiquin utsibon chioshi.

¹⁰ Adoac abi tantiaquid utsibo tantiaquin mimbi nashundeniaid Nuquin Papan bēpiscudenquiocquin tantiec.

¹¹ Adecbidi utsibobēd tantianec mibi bēdamboec tabadpashun. Adec tabadash abi yacno puduedsho, Bēdamboen mimbi nabanoc, Nuquin Papan mibi caindac.

¹² Aden nabanec chieshenquiocquin Nuquin Papan chiaid tantiaquioquin tsused-pabomba caimbudec unēsash Nuquin Papa yacno puduedampicpadec Esuquidistu tantiaquioquin ēnenquiocquin caimbudequi ma Nuquin Papa yacno puduedpanuna.

Naden nanu quec Nuquin Papa muatiapimbo iquec

¹³ Ēdenquimboshē Abadauan bēdamboec tabadsho isun ambia tantiaquidquio abi yampidquibidi icquin, Ēmbibi tantiacpadomboen nanuna. Abimbo caimbi, quequin Nuquin Papan naden chuiampic:

¹⁴ “Mimbi tishmiaidēn tsyuecquido dadpen iquendac, qeshun ěmbi chiapadomboen nabanquin mibi, Bēdambo iquebi, camembi,” quequin Nuquin Papan Abadauan chuiampic.

¹⁵ Aden chuisho tantiashun caimbudquin tishtiapimbocquidēmbi Abadauanēn chidon aton mado tishpampic.

¹⁶ Abimbo caimbi, quequin abitedi tantiaquidēnquio Nuquin Papan chiac utsi, Muenec, quetiapimbo iquendac.

¹⁷ Adembidi, Ēbi yacno tabadte iquendac, quequin ēnden yampidēn Nuquin Papan chiaid chuca uatiapimbo iquebi, quequin Esuquidistu tantiaquido tantiamenuen abimbo caimbi, quequin chuipanēdash.

¹⁸ Adec Nuquin Papa muatiapimbo icquin ambi chiapadomboen naquidquio Nuquin Papa nec. Adembidi, Ēbi yacno tabadte iquec, quequin chiaid chuca uatiapimbo iquec. Adquid Nuquin Papa icnuc abi yacno ěbi puduedmequid Esus iquec, quequin caimbudquid nuqui nendac.

¹⁹ Aden caimbudquin, Ēnden Nuquin Papa yacno puduedshun ěbi yuedquid iquec, quequin nuqui tantiec.

²⁰ Nuqui caintequid Esuquidistu ēnden Nuquin Papa yacno bēyucanec abi tantiaquido chuibanec Nuquin Papabēd onquenuc puduedash Medquisedecpadquid yampanēdash.

7

Medquisedec matses chuibanec Nuquin Papabēd onquequid dapa

¹ Medquisedec nad icpampic, Saden yacnocquido chuiquid dapa nepampic. Ambi Saden cain cuēnāidi yuecshun Edusaden cain cuēnoapampic. Aidbidi Nuquin Papan, Matses chuibanec ēbēd onquequid dapa icta, caid nepampic. Adquid icquin aton mado bedboedo tsibanshun cuesuniash Abadauan chosho bēquedshun, Nuquin Papan bēdamboen isaidquio mibi nec, quequin Medquisedequēn Abadauan chuiampic.

² Adsho tantiash, Nuquin Papan con mado bedmiaid nebi, quequin ambi cuesuneboedēn na ambi bedboed musuctanquin abi chuibanec Nuquin Papa chiec onquequid dapa Medquisedec Abadauanēn menepampic. Bēdamboen tabadmequid icsho Medquisedec cuēmpampic. Adembidi, Saden yacnocquido chuiquid dapa icquin bēdamboen tabadmequid icsho Medquisedec cuēmpampic.

³ Aidi aton papabēd aton tita nibēdquid nec. Nēdi ushēn tishaid nebi, quetiapimbo aid iquec. Abi unēste ushē adquiobidi iquec. Nuquin Papan Madombo aben icquid-padquid Medquisedec nec. Matses chuibanec Nuquin Papabēd onquequid dapa yanash adquidquidquio iquec. Utsi yantiapimbo iquec.

⁴ Aidi ēbi chuibanec Nuquin Papabēd onquequid dapa nec, quequin ismequin ambi bedaid aton na musuctanquin Abadauanēn Medquisedec menepampic.

⁵ Yuecquioshon Nuquin Papan: Min matses chuibanec ēbēd onquequid dapa icta, caid mibi icquin min utsibon aton na musucaid bedshunta, quequin Debi chuiampic. Adoac adquid Debi icash unēsān aton tsyuecquid abentse-abentsec icpampic. Debi Abadauanēn tsyuecquid yec aton utsibonquio aton na musucaid bedquid icpampic.

⁶ Medquisedequēmbien tsyuecquidpenquio icquimbi Debin tsusedpa Abadauanēn na musucaid bedshun, Nuquin Papan bēdamboen isaidquio mibi nec, quequin Abadauan chuiampic.

⁷ Bēdambo mibi icmenu, quequin Nuquin Papan chiaid ambia chuiquid Medquisedec icpampic.

⁸ Yuecshun ambia chuibanec Nuquin Papabēd onquequid dapapadquiocquin aton matsesēn na musucaid bedquid Debi unēsampic. Adecbidi aton tsyuecquido unēsampic. Padnuen Abadauanēn na musucaid bedquid Medquisedec unēsesa yampampic.

⁹ Adquid icsho Debin buchisio Abadauan caidēn, Con tsyuecquid dadpen iquendac, quequin tantiaquin, Con na musucshun menenu, queshun Medquisedec menepampic.

¹⁰ Aton tsyuecquid tishambocnobi Debin buchisio Abadauan caidēn Medquisedec bēqueduidshun menepampic.

Medquisedec yampidpadquid Esuquidistu

¹¹ Abadauanēn tsyuecquido Debipadquidon Nuquin Papan nadomboen nata quequin chiaid nadenequin aton matses bēdamboquid icmian Medquisedecpadquid choenquio ictsempampic.

¹² Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabēd onquequid dapa yampanēdash. Debipadquidēn Nuquin Papan nadomboen nata cain ēndenquimbo chiaid nadenepampic. Nēbi Nuquin Papan chiaid utsi naquid Medquisedecpadquid Esuquidistu nec.

¹³ Aidpadquid icquin Nuquin Papa nidaidēn tabadte shubu uashunaidēn puduedshun nambocpanēdash.

¹⁴ Aton tita Uda cuēmēdquidēn tsyuecquid icnuc matsesash Udan tsyuecquid Nuquin Icho Esuquidistu nec. Adquid icquin Debipadquidēn nadeniampicpaden natiapimbo Esuquidistu icpanēdash. Adembidi ambi tantiaiduidi chiec Moises, Udan tsyuecquid Debipadquid nec, quenquid icpampic.

¹⁵ Medquisedecpadquid matses chuibanec Nuquin Papabēd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec.

¹⁶ Aton matses chuibanec Nuquin Papabēd onquequid Debi unēsān Debin tsyuecquid aton matses chuibanec Nuquin Papabēd onquequid icpampic. Adquidpenquio Esuquidistu yampanēdash. Matsesash icsaisa yec unēsash uincuempānēdash. Adec uincuenquid yec unēstiapimbo iquec matses chuibanec Nuquin Papabēd onquequid dapa yanquiopanēdash.

¹⁷ Aid chuiquin Nuquin Papan nadopampic:

“Ēnenquiocquin matses chuibanec Nuquin Papabēd onquequid dapa Medquisedecpadquid mibi nendac,”
quequin chuiampic.

¹⁸ Aden chiambien matses chuibanec Nuquin Papabēd onquequid dapa Debipadquidon Nuquin Papa nidaidēn tabadte shubu uashunaidēn puduedshun ēnden nadomboen nata cain chiacpadomboen nadenequin aton matses icsaisa icmetiapimbo icpampic.

¹⁹ Adoaid Nuquin Papa yacno puduedtemaid matses icpampic. Nèbien bëyucanec puduedash Nuquin Papa yacno abi tantiaquido chuibanec Nuquin Papabéd onquec tabadec, quequin abi yacno yuedte caimbudec nidaidèn Nuquin Papabéd tabadachimboec nuqui tabadec.

²⁰ Abimbo caimbi. ¿Matses chuibanec Nuquin Papabéd onquenu quec puduedquid ènèdenquiocnoc mibi icmendambi, Mado, quenquioda Nuquin Papa icpampic? Ai, aden chuiampic. Aden Debi chienquiocquin aton madouditsèqui chuiampic. Debi unèsan aton tsyuecquid aton matses chuibanec Nuquin Papabéd onquequid dapa icpampic.

²¹ Nèbi Nuquin Papan aton Madombo caic:

“Icho icquin matses chuibanec èbi chiec puduedoata, mado, quequin abimbo chiemi. Aden chuiquin chuca uainquio iquemi.

Èndenquio yampid yec èbi yacno utsi puduedmenush èbi chiec puduedash ènèdenquio yec tabadquid mibi nec, quequin abimbo chiemi,”

quequin chiampicpadec aton Madombo adquid yanquiopanèdash.

²² Adquid yec matses icsaid bedshunash abided cuidadash abi tantiaquido yuedec bëyucanquid Esuquidistu nec. Debibéd aton tsyuecquid adecbidi adquid ictiapimbo iquec.

²³ Debi adecbidi aton tsyuecquido unèstequidquio iquec yuen chuibanec Nuquin Papabéd onquequid dapa ictiapimbo iquec.

²⁴ Esusien abi yacno chuibanec bëyucanec puduedash ènèdenquio yec Nuquin Papabéd onquequid dapa nendac. Adquid utsi nibèdendac.

²⁵ Adec Nuquin Papa yacno ènèdenquio yec tabadquin abi tantiaquido chuibanec aton Papabéd onquedenenuc abi tantiaquido Nuquin Papa yacno ambi yuedtequid iquec abipadquid icsaisa yec tabadendac.

²⁶ Adec aidi abi yacno yuedanquid, icsa nibèdquid, icsa uatiapimbocquid, icsa nibèdquiec yacno tabadquid yec abi tantiaquido chuibanec Nuquin Papabéd onquequid dapa yampanèdash.

²⁷ Debipadquidpenquio yec, Matses icsaquid neque. Nuquin Papan chiampicpaden baded-badedquien nidaidèn capuquid yua cuesunenu, quenquio icpanèdash Esuquidistu. Matses icsaid bedshunash abided unèspanèdash padpidec unèsenquio icnush.

²⁸ Debibèdi abipadquid icsaquid icsho, Min matses chuibanec Nuquin Papabéd onquequid dapa aid icmeta, Nuquin Papan cac Moisesèn Debi adquid icnepampic. Nèbi Medquisedecpadquidien Bèdambocquid icpampid èbèd onquec èbi yacno Puduedquid Abentsècquiobi mibi iquendac. Abimbo caimbi, quequin Nuquin Papan chiampidquio Esuquidistu nendac.

8

Matses chuibanec Nuquin Papabéd onquec abi yacno puduedquid

¹⁻² Adec Esuquidistu abi tantiaquido chuibanec Nuquin Papabéd onquequid dapa Nuquin Papa tabadacnombobi puduedoash aton Papa Abiambo Yampidbèdquio onquec tabadec. Debipadquidoen aton matses chuibanec nidaidènshun Nuquin Papa tabadte shubu uashunaidèn puduedash auèshquio Nuquin Papabéd onquepanèdash.

³ Con matsesbèdi icsaposh icmanendac, qeshun aid shubun puduednu qeshun umanuschun nidaidèn capuquid yua aidon cuesunepampic. Adembidi Nuquin Papa tantiaquin menuequien aton matsesèn bè-bèaid bedshun nadenepampic. Esusien Nuquin Papa yacno puduedoanush, Èbi icsaid èbibi cuidadnu, quenquio yec matses icsaid bedshunash abided cuidadpanèdash.

⁴ Aidi unèsabi yec nidaidèn tabadnuc Moisesèn chiacpadec Debipadquid matses chuibanec Nuquin Papa chiec onquequid icpanèdash. Adquid icnuc nidaidènuèsh matses chuibanec Nuquin Papabéd onquequid dapa ictiapimbo Esuquidistu icpanèdash.

⁵ Nidaidèn tabadquin Nuquin Papa tabadte shubu uashunaidèn puduedshun Debipadquidèn nashumpampic. Èndenquimbo Nuquin Papan shubu naden icchitec, quequin abi tabadte shubu uanu, qesho tantiaquid: “Macuèsh yacnoshon chuibocpadomboen shubu uame,” Nuquin Papan cac Moisesèn chuiopampic. Aden chiac Nuquin Papa tabadte shubu uashumpampic.

⁶ Adnubien yuecash Nuquin Papa tabadacnombob aton Madombo abi tantiaquido chuibanec Nuquin Papabéd onquec puduedpanèdash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniapicpadomboen naquin aton matses chuibanec Debipadquid Nuquin Papabéd onquec abi yacnombob yuedanquid ictiapimbo icpampic. Esuquidistuen Nuquin Papabéd abia yampid bëyucanec abi yacnombob nidoash abi tantiaquido chuibanec Nuquin Papabéd onquequid yec yuedanquidquio nec.

⁷ Ĕndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquo ictsempañdash.

⁸ Nadomboen nata caqui ambi chiacpadomboen nadenequi matses icsaisa yantiapimbo icsho isash:

“Yuecash Ĕmbi chiaid utsi iquendac.

Aid isadaidbo chiendambi. Aidbidi Udan tsyuecquido chiendambi.

⁹ Aidĕn tsusedpabo Equipito yacnoshon bëyucamequin

Ĕmbi chiacpadpenquiocnoc chiaid utsi iquendac.

Ĕmbi abia naden nata cain chiaid Isadaidbon chieshĕnsho

utsibon natiacquin mëyansho isun isadaidbo mënchicambocondambi.

¹⁰ Ĕnden chiaid adquo icnuc:

Nĕbi ĕbĕd tabadmetequid chiaid nendac, quequin isadaidbo chiemi.

Ĕmbi nadomboen nata cain chiaid isadaidbo pausunendambi tantiate bunquionoc.

Aden tantiamiashton Papa iquendabi.

Adecbidi adquidquo con matses iquendac.

¹¹ Adoaid Nuquin Papa tantiaquid icta, qesa iquendac.

Abitedi ĕbi tantiaquidquo iquendac.

Nĕidtedishun ĕbi tantierendac:

Nĕidic, bacuĕbo; nĕidic, caniabo; nĕidic, tsusiobo aidtedshun.

¹² Aido icsaidtedi padpiden tantienquo yec bëpiscudendabi,”

quequin Nuquin Papan chiaid utsi nendac.

¹³ Chiaid utsi nec, quequin ĕnden abia nadomboen nata cain chiaid ĕnĕdendac.

9

Nuquin Papa tabadte shubu uashunaidĕn puduedshun naid

¹ Nuquin Papan ambi, Ĕbi ismequin nadomboen nata cain chiaid dadpen dada uameshun isadaidbo menepampic. Nuquin Papan naden ĕbi tabadte shubu uashun cacpadomboen abi nidaidĕn tabadte shubu uashumpampic.

² Nuquin Papa tabadte shubu uashunaid nitsinaid anquĕnĕ uaid daĕd icpampic. Baded-badedquiec puduedte anquĕnĕ uaidĕn tabote dectantebĕd pan sante cuate nacnenaid icpampic. Icsaisa anquĕnĕ uaid nec caid niosh.

³ Aid nuntambidi bitsipambocquid daĕdcashun dectanĕdaid shĕcuĕ anquĕnĕ uaid dayun uequid Isaisa Bĕdaidquo cain chianiaidquo niosh.

⁴ Aid nuntan bĕdambo noadquid sandoshon tauite shocosh icpampic. Ambobidi cuate dabitacaid shocosh icpampic. Aid cuesten sauedaid mana caid isadaidbon piampid dayun uaid icpampic. Aid sauedaid utsi Adonĕn cuate tiaid dĕyucaid icoapampic. Aid sauedaid utsi cuĕnote pada uashun Nuquin Papan nadomboen nata quequin dada uaid icpampic.

⁵ Aid sauedte matincash tabadquid ambi abi yacnoshon uaid mayan bĕdamboquidbimboecnuc nacnenaid daĕd icpampic. Aid daĕd Nuquin Papa icsaisambo bĕchomauanquiec nac-nacquo ismiantequid icpampic. Nidaidĕn capuquid cuesuniaidĕn intac daseccaid isun Nuquin Papan matses cuidenquioctsiash, quequin aidĕn podon dĕcatequin dectanaid diadpampic. Aid Icsaisa Bĕdaidquo anquĕnĕ uaid sanaidtedi chiombi.

⁶ Aden shubu uashun aidĕn icquidtedi nambanash icsaisa anquĕnĕ uaidĕn baded-badedquiec puduedquidon Nuquin Papan Moises chiacpadomboen uesquin nabampic.

⁷ Padnuen Isaisa Bĕdaidquo anquĕnĕ uaidĕn setan-setanquiec matses chuibanec Nuquin Papabĕd onquequid dapa puduedpampic. Baded-badedquiec puduedtemaid aid nec. Ĕmbi con matsesbĕdtan Nuquin Papan chiaid niacposh icmanendac, quequin nidaidĕn capuquid yua cuesuneshun intac bedshun buanec nuntan bitsipambocnoc daĕdcashun dectanĕdaid shĕcuĕ anquĕnĕ uaid dayun uequid Icsaisa Bĕdaidquo caidĕn puduedquid abentsĕqui nepanĕdash. Unĕsaidĕn intac buanenquo yec puduedtemaid aid anquĕnĕ uaid nec.

⁸ Adec aid anquĕnĕ uaidĕn puduedquid isadaidbo abentsĕqui icnubi Nuquin Papa yacno aton matses puduedte nibĕdec, quequin Nuquin Papan Mayanĕn tantiamĕte nendac.

⁹ Adembidi, baded-badedquien nidaidĕn capuquid yua cuesunedenec, Ĕbibi bĕdamboquid nec, quetiapimbo icpampic. Adembidi aton matses icsaisa icmetiapimbo icoapampic.

¹⁰ Adecbidi, Nĕidic petequid nec. Nĕidic actequid nec. Nĕid nanush mëpamĕdtequid nec, quequin chiacpadomboen nabanquin icsaisa icmetemaidbidi nendac. quequin Nuquin Papan Mayanĕn nuqui tantiamĕc.

Esuquidistu abided unēsac intac chiuidaid

¹¹ Ambi chiaid utsi tantiamenuc ambi uacmaid yec abipadquid Esuquidistu Nuquin Papabēd tabadboedi nidaidēn budash matsesash icsaisa yec matses icsaid bedshunash abided cuidadec unēsash Nuquin Papa yacno matses chuibanec aton Papabēd onquequin chuiquid dapa iquec abi yacno Yuedanquid yampanēdash.

¹² Nidaidēn capuquid yua cuesuneshun intac bedshun buanec Nuquin Papa yacno puduedenquio Esuquidistu icpanēdash. Aidi abia yampidi icsaisa matses icsaid bedshunash abided cuidadec unēsacsho cudan siac aton intac chiuidash Nuquin Papa yacno mbu puduedoapanēdash.

¹³ Aidi matses icsaid bedshunash abided cuidadabicnuc nidaidēnshun natemaid nasho matses cuēshēdmepanēdash. Adoac utsibēd ictiapimbocsho isun nidaidēn capuquid yua cuesuneshun aidēn intac bēdta sisapuc daēd uashun daseccac icsaisa icmiabi yequi aton shubun puduedoapanēdash.

¹⁴ Abia abēd yampid unēsasa aton Mayambēd iquec Esuquidistu icsaisambo yec, Matses icsaid bedshunash ēbided cuidadebi, Papa, quianec unēsacsho siac aton intac chiuidacsho isun uincuemaidēn nuqui pauquec ma Nuquin Papan chiacpadomboen nate bunquidquo nuqui icpanueshun.

¹⁵ Adoaidi Nuquin Papan chiaid utsi chuiquin tantiamequid Esuquidistu icpanēdash. Ēnden matses yampid icsaid bēdtabi nēbi matses icsaid bedshunash abided cuidadec unēsapanēdash ēbi tantiaquido ēbēdi tabadmenu quiash.

¹⁶ Adnubien abi unēste tantiec, Ēbi unēsān ēmbi chiacpadomboen con na abitedi mēnebanta, matses quepec. Aden chuiquid unēsō isun ambi chiacpadomboen mēnebanec.

¹⁷ Aden chuiquid unēsabi icnuc ambi chiacpadomboen utsibon menetiapimbo iquec. Icbon na abi iquec. Aid unēsān aidēn na icboedi utsin na yanec.

¹⁸ Adembidi ambi nadomboen nata cain chiaid Moises mēnequin, Ēmbi chiaidtedi nadenesho isun ēmbi chiacno mbu mibi buanēmbi, quequin Nuquin Papan chuiampampic. Aden mēnequin chiac Moisesēn nadopampic.

¹⁹ Nuquin Papan chuibocpaden chuihun nidaidēn capuquid yua cuesuneshun intac bedshun actebēdta daēd uain cacushun cuēte shubi madquēnaid podo mēsequiabicquid bedshun sedquid piu uaid potaneshun daēd uaboed nēnanshun Nuquin Papan chiaid dada uaid bēdta matses daseccabampampic.

²⁰ “Nēid Nuquin Papan chuibocpaden mimbi natequidquo nec,” quequin ismequin Moisesēmba abitedi daseccabampampic.

²¹ Adoshombic Nuquin Papa tabadte shubu uashunaid bēdta aidēn tabēcaidtedi daseccabampampic.

²² Cuesunaidēn intac daseccatequid nec. Shubu chedo cuesunaidēn intaquēn daseccabicquid mishtemaid nec. Adecbidi cuesunaidēn intac chiuidenquiocnoc matses icsaid Nuquin Papa bēpiscudenquio iquendac.

²³ Nuquin Papa yacno mbu puduednush icsaisa unēsēndac, quequin ismenuen matses chuibanec Nuquin Papabēd onquec nidaidēn capuquid yua cuesuneshun intac bedshun buanec Nuquin Papa nidaidēn tabadte shubu uashunaidēn puduedpampic.

²⁴ Esuquidistu matses icsaid bedshunash abided cuidadec unēsash nidaidēnshun Nuquin Papa tabadte bimoecnuc shubu uashunaid yacno puduedenquio icpanēdash. Abi tabadacno mbu abi tantiaquido chuibanec aton Papabēd onquec puduedash abi tabadec.

²⁵ Ambo puduedash, Matses icsaid bedshunash ēbided padpidec cuidadnu, quenquio yec tabadec. Nidaidēnshun setan-setanquien Nuquin Papa tabadte shubu uashunaidēn puduedquin aton intapenquio bedshun daseccadēnec.

²⁶ Matses icsaid bedshunash abided cuidadec unēsambo yec Nuquin Papa yacno puduedoash padpidec nidaid yacno choash unēsash abuc Esuquidistu puduedoatsiandac. Adenquio iquec matsesash abi unēste ushēnquiobi matses icsaid bedshunash abided cuidadpanēdash nēid nidaid naimēdbudte aonoentsēqui icnuc.

²⁷ Nidaidēn icquid unēste ushē abentsēc iquec. Unēsacsho ambi naid Nuquin Papan chuitequid ushē choendac.

²⁸ Adecbidi matses icsaid bedshunash abided cuidadec Esus unēste ushē abentsēc icpanēdash. Matses icsaid bedshunash cuidadoanu, quenquio yec aidquio padpidemboec choendac. Abi cainquido abi yacno puduedmenuc choaindac.

10*Abided cuidadec unēste abentsēquēnquiobi*

¹ Setan-setanquien nidaidēn capuquid yua cuesuneshun intac bedshun buanec puduedsho isun matses icsaid bedshunash abided unēsash abi tantiaquido chuinuec bēyucanec

Nuquin Papa yacnoësh yuedanquidquo choec, quequin nuquin tsusedpabon tantiabempampic. Nidaidën capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abëd onquetiapimbo icpanëdash.

² Aidënquoio daseccaquin matses icsaisa icmiac nidaidën capuquid yua padpiden cuesunenquo ictsempampic. Adecbidi, Icsambocquid nebi, quenquoio matses ictsiandac.

³ Aton matses icsaisa icmetiapimbocquin setan-setanquien nidaidën capuquid yueded cuesunepanëdash.

⁴ Adshun yuan intac bedshun daseccaidën matses icsaisa icmetiapimbo iquec.

⁵ Adoaquien Esuquidistu nidaidënshun tishac caniaash onquec:

“Nidaidën capuquid yua cuesunenubi ëmbi chiacpadomboen matsesën natiapimbo iquec queshun yua cuesunete bunenquoio mibi iquec, Papa.

Matsesën tishtequid mimbi icmiadquio nebi, Papa.

⁶ Adecbidi nidaidën capuquid abichobi tauideniac matses abi icsambo iquec, quiash, Padi. Adoenda, mibi quec, Papa.

⁷ Adsho isun mimbi chuiquin dada uamiampicpadomboen naimbi, Papa.”

⁸ Mimbi dada uamiampicpadomboen matses chuiquidën nabanquimbi aton matsesbëd bëdamboec tabadenquiocsho isash, Padi. Aid nainquiocquin ënta, quequin mimbi matses chuinuc

⁹ mimbi ënden nadomboen nata cain chiaid naimbi, Papa, quiash matses icsaid bedshunash abided cuidadec unësun Nuquin Papan ënden chiaid ëmepanëdash. Aden ëmian nëbi Nuquin Papan chiaid utsi iquec.

¹⁰ Aden Nuquin Papa bunacpadomboen nash unëstiapimbo yanshun abi unëste ushënquoio abi tantiaquid paucpanëdash.

¹¹ Aden matses icsaid paucpec, quetiapimbocnoc badiadquien-badiadquidënquien nidaidën capuquid yua cuesuneshun intac bedshun daseccaquin icbo icsaidbëdta utsibo icsaid pauctiapimbo iquendac.

¹² Esuquidistuen abided unësash abi tantiaquido icsaid pauctequid abentsëquiobi iquec aton Papabëdi ënëdtiapimbo yec abitedishun icbombo iquec.

¹³ Ambobi tabadquimbi abi chieshënquido ambi chiacpadomboen naquidquoio icmete ushë cainec.

¹⁴ Abided unëste ushënquoio abi tantiaquid ambi icsaisa icmiad abëd cuëshëdesambo yampanëdash.

¹⁵ Adembidi Nuquin Papan Mayanën Nuquin Papan chiaid utsi naden chiec:

¹⁶ “Nëbi ëbëd tabadmenun chiaid utsi nendac, quequin chiendambi.

Aidi aton pabiaten puduedmendambi paucudenquiocnoc.

Adembidi ëmbi chiacpadomboen nate bunquidquoio icmendambi, quec Icho.”

¹⁷ Adshumbic Nuquin Papan chiaid utsi abi chiec aton Mayan:

“Abi icsaidtedi padpiden tantianu quenquoio yec bëpiscudendabi, queoac Icho,”

quequin chuipanëdash aton Mayanën.

¹⁸ Adec abi icsaid bëpiscudash nidaidën capuquid yua cuesuneta quenquoio Nuquin Papa iquec.

Nuquin Papa yacno puduedte cainta

¹⁹ Adoaidi Esuquidistu unësacsho isun cudan siac aton intac chiuidan, Ambi paucaid nebi, quec dacuëdenquoio yec Nuquin Papan shubu icsaisa caid yacnombo puduedte ushë nuqui cainendac.

²⁰ Matsesash abided cuidadec unësash Nuquin Papa yacno puduedoash tabadquid Esuquidistu nec.

²¹ Ambo nidash Nuquin Papabëd onquequin aton shubun icquido nuqui Esuquidistun chuibanubi,

²² Ambi paucaid ambi dapanacximboecquidbidi nebi, quequin tantiaquin abi yacno choacximboen nidaidënshun Nuquin Papa chiec onquec tabadnuna.

²³ Nuquin Papa ambi chiacpadomboen naquidquoio nec, quequin abi tantiaquid yec abi yacno puduedebi, quequin caimbudnuna.

²⁴ Aden tantiaquin abi tantiaquid utsibobëd tantiananec bëdamboec tabadquin nashununa.

²⁵ Aden nabanec abi tantiaquid utsibobëd iccuededtiapimbo iquebi, utsi-utsiec quiacpadecc adenquoio icnuna. Adec iccuededec, Nuquin Papan chiacpadquiec bëdamboec tabadnuna, quec chuinantata. Niacquid dadpen icsho isash, Matsesën naid chuibanquin cuidte ushë badedquio choec, quiash baded-badedquiec chuinantata bëdamboec tabadte bunec.

²⁶ Èbi icsaid bedshunash abided cuidadec Esuquidistu unëspanëdash, quequin tantiash icsaded-icsadedquid iquec, Adquidquoio Esus nec, quetiapimbo iquec.

²⁷ Aid cuidte ushë chonoc nëishun comapenen chushcaindac Nuquin Papan abi chieshënquido nibédamequin.

²⁸ Nadomboen nata cain Moisesën chiaid niacsho isun daëdshun chiac niacquid unësmiampic.

²⁹ Nuquin Papan abia naden nata cain chiaid niatenequid adomboen cuidnushe quiash ëbi icsaid bedshunash abided cuidadec Esuquidistu unëspanëdash, queboedi, Ëmbi tantiaoboed Nuquin Papan Madopenquid matsesquio ëbipadquid icsacsho cuesuniac, quequin chieshënsho ¿comapenen Nuquin Papan cuidenquioda icpadic? Adquid Nuquin Papan Mayanën bédambocquid icmenu quequin chiaid chieshënquid nec.

³⁰ Nuquin Papan: “Ëmbimbo ëmbi chiaid chieshënquid cuidendambi,” quequin chiaid nec, quequin nuqui tantiec. Adembidi: “Abi tantiaquid icboedëmbi tantienquio yansho cuidquidquio Nuquin Icho iquendac.

³¹ Abi cuidantequid dacuëdampambo iquec,” quequin Nuquin Papan chiaid nec.

³² Esuquidistu tantiaquid yanash mibi bédamboec tabadondacpaden tantiamec chuinan-deneta. Esuquidistu tantiabnacchuca icsho chieshëmëndonquidon mëyanaqui, Esuquidistu tantiaquid nebi, quec dayacquio yec bédamboec mibi tabadteniondac.

³³ Dadpen tabadnubi, ëmbi tantiaid Esus nec, qesho mibi utsibon mamënsnunondash. Adembidi aidon natiambocquin mëyanac. Adomboembidi Esuquidistu tantiaquid utsi mëyansho isun, Aidbéd icquid nebi, quequin ismequin mimbi nashundenepondac.

³⁴ Esuquidistu tantiaquid utsi quënën nauedaic icsho isash abëdi tabadacbimboec natiamianquiec unësquio yec mibi tabadpondac. Adecbidi mibi chieshënquidën mitsana bedacsho isash Nuquin Papan ëbi menetequid ampetiapimbo iquec, quequin tantiec, Bédambo iquebi, quec mibi tabadpondac.

³⁵ Adoaidi Nuquin Papan bacuë yec bédambo iquebi, quiash dacuëdenquio yec bédamboen nabanec mibi ënden dayacquio iccondacpadquiec adquiecbidi tabadteneta. Adquid Nuquin Papa yacno puduedquid nendac.

³⁶ Utsin mëyanaqui Nuquin Papan chiaid chieshenquiocquin tantiadenedeta. Adec tabadquin Nuquin Papa bunacpadomboen nabanash abi yacno tabadendac.

³⁷ Nuquin Papan chiaid nadquio iquec:

“Chiata. Nëbien mimbi cainaid mibi mënchictequid choendac.

³⁸ Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,”

quec Nuquin Papa.

³⁹ Aid cainuidash utsi tabadnubi abi choate nuqui cainec. Abi cainesa abi yacno puduedmenquiocquin Nuquin Papan chian anëdënquequid nësiatequid nendac. Nuquien abi cainquid yec Nuquin Papa yacno puduedtequid nec.

11

Nad iquendac, quequin tantiaquin cainquid

¹ Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abéd icte ushë nuqui cainendac. Aden cainquin, Con icbo ëmbi isacmaid nec, quequin aid isbenacbimboen ëmbi tantiaid nec, quec tabadquidquido nebi.

² Adembidi tantiec tsusedpabo tabadsho isun, Bédamboen mimbi tantiec, capampic Nuquin Papan aido chuiquin.

³ Adembidi Nuquin Papan: “Abubëdi nidaid yanquiota,” cashumbic: “Aidënquiocquidtedi yanquiota,” cac ambi tantiacpadquiequi yampampic, quequin nuqui tantiec. Aden tantiec ëmbi nëbi isaidtedi nibëdnuc ¿mitsipadomboentsi aidtedi icmëbampampiba? quenquio nuqui iquec. Nuquin Papan: “Yanquiota,” quequin tantiacpadquiequi abitedimbo yampampic.

⁴ Adembidi, Mibi tantiaquin mibi bunacpadomboen nidaidën capuquid con yua cuesuneshun tauinu, quequin chuishun Abedën naid Nuquin Papan bédamboen isaidquio icpampic. Aton utsin Cain caidën aden tantienquiocsho Nuquin Papan icsamboen isaid icpampic. Adosho isun Cainën aton utsimbo cuesuniambien Abedën Nuquin Papa tantiaquin naid chianetequidquido abi iquec.

⁵ Adnubien adecbidi abi tantiaquidquido Enoc icsho isun Nuquin Papan buanac unësesa icpampic. Bédambocquid nec, quequin Nuquin Papan buanacsho nibënquin Enoc istuidambocpampic.

⁶ Abi tantiesa icsho isashien, Ëmbi bédamboen isaidquido nec, quetiapimbo Nuquin Papa iquec, quequin tantish aid tantiaquid icsho, Abi yacno puduemetequid nebi, quequin tantiaquid ambi bédamboen isaidquido nec.

⁷ Adnubien adembidi Nuquin Papa tantiaquin Noe caidën, Nuquin Papan chiacpadomboen nanuna, qeshun, Èbèd icquid unës uanushe qeshun, Con utsibo Nuquin Papan chiaid tantiesa yec unëstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bédamboen isaidquio aidquio icpampic.

⁸ Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic.

⁹ Adembidi Nuquin Papa tantie abi capuacmanombo choash, Con nidaid iquendac, quiash yuedacmaidbimboec quenenenquio yec daëdcaid shubumpi buan-buanequi aid nidaidën tabadpampic. Adecbidi aton mado Isactsen aid shububidi buanash tabadoapampic. Adecbidi Isaquën mado Acobotsen tabadoapampic.

¹⁰ Nuquin Papa yacno ambi tantiampicpadomboen shubu uaidën tabadendabi, quequin cainec quenenenquio yec nidaidën Abadauan tabadtenepampic.

¹¹ Adembidi Abadauanën Nuquin Papa tantiaquin aton chido Sada machobudash bacuë tishtiapimbocquid icnubi, Nuquin Papan chiacpadquiec con mado iquendac, quequin tantiapadomboen Abadauanën chidon machobudquioshon aton mado tishpampic.

¹² Adoac Abadauan tsusiobudaidënquio tsyuecquid dadpen uispatedi yampampic. Masedbidi yanaopampic.

¹³ Aden Nuquin Papan aid nidaid ëbi menendac, quequin tantie chieshenquio yec Abadauan ambi isacmanombo choash, Con nidaid nendac, quequi Nuquin Papan meniabicnuc quenenash tabadenquio yec nidequi unëspampic. Adomboembidi tantiequi aton mado unësbudnepampic. Adomboembidi tantiequi aton baba ado unësbudnepampic. Adomboembidi tantiequi aidon tsyuecquido unësbudnepampic.

¹⁴ Nuquin Papa tantiaquid yec Nuquin Papabèd tabadendabi, quiash nidaidën quenenenquio yec aitedi tabadpampic.

¹⁵ Èbi tishondacnombo tantie unësquio iquebique. Ambo nidoaibi, quiash nidtsem-pampic.

¹⁶ Adenquio yec, Nuquin Papa yacno tabadendabi, qesho tantiash, Con matses nec. Adecbidi aton Papa nebi, quequin chuishun abi yacno abèd tabadte shubu uapampic Nuquin Papan.

¹⁷⁻¹⁸ Mimi tishmiaidën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiasho isun, Èmbi chiaid tantiaquidquioda Abadauan neque. Isnu, qeshun, Min mado abentsëc Isac caid cuesuneshun ëbi tantiaquin tauita, Nuquin Papan cac Nuquin Papan chiaid niacmane qeshun Abadauanën tauineuquin aton mado setsem-pampic.

¹⁹ Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiaid, obeca bënëded seshun tauipampic aton mado uincuen uaidbimboecquid icnuc.

²⁰ Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobèdta Esau Nuquin Papan ambi chiacpadomboen nanun bédambo icmete chiaid chuiopampic.

²¹ Adnubien adembidi Nuquin Papa tantiaquin tsusio budash unësbudquimbi aton cuate bedash shuebudshun, Nuquin Papa bédambo iquec, quequin Nuquin Papan ambi chiacpadomboen nanun bédambo icmete chiaid aton baba Osen bacuë daëd Acobon chuiopampic.

²² Adnubien adembidi Osen Equipito yacno tabadec unësnun, Nuquin Papan nidaid menenun nabono, quequin chiaid tantiequi unësebiq. Mibitedi: Aid nidaid yacno nidnu, qeshun con canite buanta, quequin chuiopampic Osen.

²³ Adnubien adembidi Nuquin Papan bédambo icmiaid con mado nec, quequin tantiaquin aton mado Moises tishun aton titan aton papabèdtambi ompopampic. Equipito yacnocquid ancanquidën: Isadaidbon chidon dada bacuë tisho cuesuneta, quequin chiaid niacquid dacuëdenquiocquid aton mado adopampic.

²⁴ Adnubien adembidi Nuquin Papa tantie Moises caniacsho, Ancanquidën champin mado mibi nec, caqui chieshënec, Aidën madopenquio nebi, queoapampic.

²⁵ Ancanquid Nuquin Papa tantiesa nec. Con matses isadaidboen Nuquin Papa tantiaquido nec. Adquid icsho aidobèdtabi ancanquidën mëyanaid iquendabi, quianec Moises cuëshèdpampic.

²⁶ Yuecshun Nuquin Papa yacno yuedac bédambo iquendabi, quequin tantiaquin Equipito yacnocquidon shubun yuedshun meniaid isuidec, Natiaic icsatiapimbo iquebi, quiash tabadquin Moisesën caimpampic.

²⁷ Adembidi tantiaquin, Equipito yacnoësh ëbi nidsho isash nëishun ancanquidën con matses nidmenquoio icpec, quenquoio yec Nuquin Papa isacbmboec Moises tabadtenepampic.

²⁸ Yucash Equipito yacno choashun adembidi tantiaquin, Bëyuec tishaid unësmetequid ëmbi ëbi yacnoshon uaid mayan bëda ëmbi budmiaid min shubu datamenuen ëmbi chi-acpadomboen nabanta, Nuquin Papan cac ambi chiacpadomboen naquidquoio Moisesba icpampic. Ambi chiacpadomboen nabanquin nidaidën capuquid yua cuesuneshun shëcuë cuëmano abiuc daëdi abuchëdta intaquën ëcnoshcashun nami shuishun pan bidisquesabëdta pepampic. Adoacsho isun Nuquin Papan budmiaidën datampampic.

²⁹ Adnubien adembidi Nuquin Papa tantiec Equipito yacnoësh puduanec nidquin Acte Piu potec nidquid podqued nibëdboedi tanunquiocquidën uesadmiadën isadaidbon potepampic. Aden isadaidbon potenubi abëdtambi potenuec abi chieshënquido Equipito yacnoçquido acte chomiaidën mentoadbudnepampic.

³⁰ Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenadtanepampic. Siete yacno cuëscain tambanec dacuenadtanec shubu dadpen daquënë uain tsasi uaid sec uebudpampic.

³¹ Adnubien adembidi Nuquin Papa tantiaquin Edico yacnoçquido cuesunenun isquido isadaidbo chosho isun, Nuquin Papan matsesbo nec. Aido ëmbi yuedac ëbëd icquido cuesunenquiocpec, qeshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cuesunianenquiocpampic Nuquin Papa tantienquoio yec chiesho Daban matses utsibo cuesunequimbi.

³² Adecbidi Nuquin Papa tantiaquid dadpen icpampic. Nëidic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpenshun Nuquin Papan chiacpadomboen naindac, quequin cainquido icpampic. Abitedi chuiti-apimbo iquebi.

³³ Aido utsin-utsinquien: Abi ancaidobëdtabi ancanquid Nuquin Papa tantiesa nec, qeshun cuesunepampic. Adembidi, Mibi bëdambo icmenu, quequin Nuquin Papan chiaid tantiaquin cainec adquidquoio icpampic. Adquid icsho isun, Pemenu, qeshun bëdi nibëdquid deon caid tabadacno buanshun nebudpampic. Adosho isun piantiapimboçnoc Nuquin Papan quiuëccac deonën penquiocpampic.

³⁴ Utsin-utsinquien adembidi Nuquin Papa tantiaquid icsho, Nëdëncashun tauinu, cac taboadaidën pichiquenquiocquid icpampic. Adembidi tantiec utsi-utsiec chështen senuesho isun mënchicquin cuemepampic. Adembidi tantiequi dayacquiocpimboçboedi dayacquiocquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic.

³⁵ Adembidi utsin Nuquin Papa tantiaquin nianten bacuë unësboed uincuetanquin ani menepampic. Adembidi tantiec tsadsho isun Nuquin Papa tantiesa nebi, camenuequin shoyombedetsëcquin cuesuniaqui, Nuquin Papan chiaid tantesa uainquoio yec Nuquin Papa yacno nidebi, quiash unësampic.

³⁶ Utsi-utsien shocosh bucun mëtaneshun quënëna nauedacsho isun mamëshunquimbi cueshcanten cuesaqui Nuquin Papabëd tabadte tantiec dacuëdenquoio yec tsadpampic.

³⁷ Adembidi utsitsen cuënoten seshunepampic. Adembidi utsitsen sënten nacsëshunepampic. Adembidi utsitsen nidaidën capuquid bitsi nacnenaid dasiuidpampic. Aton na nibëdnubi mëyanaqui Nuquin Papa tantiaquidquoio yec aidtedi tabadpampic.

³⁸ Nuquin Papa chieshënquid ëbëd tabadtemaïdo nec, quequin tantiec adpampic. Adoac quenentiapimbo yec uano tabadnubien nidaïd shëcuë uaidën utsi tabadpampic.

³⁹ Aidtedishun, Ebi yacno mibi chuibanec ëbëd onquequid bëyucanec yuedanquid iquen-dac, quequin Nuquin Papan chiaid tantiaquin cainec aidtedi unësbudnepampic.

⁴⁰ Aidtedi icnubi abi icsaid bedshunash abided cuidadec unësash uincuenash abi yacno nidoash Yuedanquid Abentsëcquiobi Esuquidistu yanabi icpampic adboedëmbi ma nuqui nëbi icquidobëdta yuedpanuna.

12

Aton bacuë Nuquin Papan dayacmenuequin namiaïd

¹ Aden Nuquin Papa tantiec chieshesa dadpen icpampic, quequin dada uasho isun ëbi chieshtometequid utsi ëbi icsaidbëdtabi nainquiocquin ënuna. Adembidi dayacquiocquin Nuquin Papan chiacpadomboen nabanec tabadnuna.

² Esuquidistu, abitedishun icbombo abia yampidquoio ëbi chuibanec Nuquin Papabëd onquec bëyucanec abi yacno puduedash yuedanquid nec, quequin tantiaquin aid isacimboen adonona. Aidi, Ëbi yacno matses yuednu, quiash aton Papabëd tabadteneboedi matsesash icsambocquidbimboecnuc cuستن dectanac chieshenquoio yec unësacsho uincuen uaid yanash aton Papabëdi Icbombo iquec. Aidquoio tantiec isacimboec nidaidën nuquibi tabadnuna.

³ Abi chieshënquidën natiacquin mëyanaqui chieshenquiocquid Esuquidistu icpanëdash, quequin aid tantiec ma chieshtoenquoio icpanuna.

⁴ Ëbi icsaid padpiden nainquoio icnu, qeshumbi natiatequid icnuc mimbi ënambo iccoc.

⁵ ¿Con bacuë cain Nuquin Papan mibi dayacquio icmenuequin chiaid bëpiscudecta icco? Nad iqueque. Tantia:

“Abuido, min Icbon dayacquio icmenuequin chiaid cacuidenda.

Adecbidi ambi natiamianquiopec camiaid icash chieshenda.

⁶ Ambi matiamianquiopec camiaid dayacquio icmenuequin nametequid con bacuëbo nec,”

quequin Nuquin Papan chiampid nec.

⁷ Natiatequid mibi dayacquio icmetequid nendac. ¿Ëbi cudasaidquoio con mado dayacquio icmenuequin namebanesa nebi, quecta aton papa icpadic? Padenquoio. Ambi: Con bacuë nec, caid natiatequid icnuc, Dayacquio icmenu, quequin ancaquin chono uaic.

⁸ Natiatequid icnuc ambi dayacquio icmenu quequin namiaidpenquoio yec, ambi, Con bacuë nec, caidpenquoio mibi nec.

⁹ Ënden dayacquio icmenu quequin mibi ancaquidën mibi tishmequidën chiacpadomboen natiatequid icnuc naquidquoio mibi icpondac. Nëbi Nuquin Papan dayacquio icmenu quequin chiacpadomboen natiatequid icnuc naquidquoio icnuna abëdi tabadnuen.

¹⁰ Abi tishmequidën ambibi tantiaquaden dayacquio icmenu quequin aton bacuë yuen nametiapimbo iquec unësëndac. Padnuen Nuquin Papan abipadquid icsaisa icmenu quequin natiacquionoc nuqui namendac.

¹¹ Adoac nuqui natiacquiec tabadec. Adoaidi yuecash nuqui bëdamboec tabadendac. Adecbidi natiatequid icnuc dacuëdënesa nuqui yanec. Adecbidi Nuquin Papabëd icquid nebi, quequin tantiaquidquoio yec natiatequid dacuëdënesa nuqui yanec.

¹² Aden tantiec dayacquio ictiapimbochoedi: Abipadquid iquendabi, quiash dayacquio yec tabadta.

¹³ Adenuidi naic tabadquin utsibo isme ma dayacquio ictiapimbocquin niaquec cuëshëdte bumboedi bëdambo yampanuna.

¹⁴ Aden naic tabadec utsibobëd bëdamboec tabadnu, quiash adec tabadta. Adecbidi Nuquin Papa icsaisa yacpadquiec nuquibi icnuna, quiash aid tantiec tabadec isananec chuinanec adquid yanta. Adoesa Icbobëd tabadtiaimbocquid nendac.

¹⁵ Nuquin Papan bëdambo iquebi camiaid icboedi chiesho isun, Mimbi icsamboec tabad-
eque. Mibi icsamboec tabadquin ismiac utsibo icsabudtsiashe. Bëdamboec tabad, quequin chuiban.

¹⁶ ¿Ada aton chidopenquoio chudquid icpec? Adecbidi, ¿Ada adembidi aton bënëpenquoio chudmequid icpec? quequin isnuquin adquid istuidshun Nuquin Papan chiaid chuiquin bëdamboen tabadmeta. Adembidi, Esaupadquid icnushe qeshun ¿ada Nuquin Papan bëdamboen tantiaid chieshënquin isuidquid icpec? qeshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unësnum tsusio icquin con pan bëdamboen tantiaid chuisho mimbi tantia, quequin aton papan bëdambo icmenu quequin chiaid chieshquin Esaun tantienquiocpampic.

¹⁷ Yuecshun, Aton utsi Acobo aton papan chuibanosh, qesho tantiaish shubiquin, Mimbi bëdamboen tantiaid ëbitsen chui, papa, cac chuitiapimbocquidëmbi, Ënden nibëdquiocnoc uesquin min utsi chiombi, quequin Esau chuiampic aton papan.

¹⁸ Adembidi, Nuquin Papan nadatiambocquin uabanaid tsusedpabon isampicpadomboen mimbi isabiccoc. Macuësh Sinai caid yacno choshon aidon isbenampid nëid iquec: natia nëdënquedote; utsibic, inchëshacimboec isadquid; utsibic, cunquequid dapabimboec isadquid;

¹⁹ utsibic, shocosh shoncaten shoncacimboec onquenuec pabiate paëmboshë icpampic. Adec onquesho tantiaishun, Papa, mibi onquesho tantiac dacuëdampambo iqueque. Mibi chuitequid Moises icme, capampic.

²⁰ Adec macuësh yacnombo icquin: “Ëmbi nadatiambocquin uabanaid ismenubi macuësh yacno anoentsëqui choenda. Adecbidi matses adecbidi nidaidën capuquid. Anoentsëqui choquid cuënoten setequid nendac,” quequin chuipampic Nuquin Papan.

²¹ Aden Nuquin Papan nadatiambocquin uabansho isash: “Dacuëdampambo iquec, quiash, Dacuëdebi,” queoapampic Moisessten uëdëquec.

²² Mibien dacuëdenquoio yec Macuësh Sion cashumbic Edusaden Chuca Bëdambocquid caid Nuquin Papa ënëdesambo tabadacno choachimboec mibi tabadec caimbi. Aid nuntan Nuquin Papan abi yacnoshon ambi uaid mayan bëdabo tambantiapimbo yec dadpenquioshë tabadec. Aido, ëmbi nashunaidtedi, Esus tantiaquid chotequid iquec, quiash bëdambo iquebi, quec cuëdëndonec tabadendac.

²³ Abi tantiaquidtedi Nuquin Papan bacuë icbo yacpadquiec aton shubu abentsëquënuëshi Icbobëd onquec ënden mibi taëpoc. Aidi mimbi naid cuidquid ambi chiapadomboen nadenequid mibi unësesa icsaisabidi icmequid Nuquin Papa nec. Aidbëd ënden tabadachimboec abëdi onquec mibi taëpoc.

²⁴ Abëd icquin Nuquin Papan ambi ënden chiaid ëmeshun ambi nëbi chuioid, mibi chuibanec aton Papabëd onquec bëyucanec yuedanquid Esuquidistubëd ënden mibi onquepoc. Mibi icsaid bedshunash abided cuidadec unëso isun cudan siac intac chiuidnëdaid tantiec aidbëdi mibi onquepoc. Abedën nidaidën capuquid yua cuesuniampicpadquidën intac chiuidec unësaid tantiec Icbobëd mibi onquetiapimbo iquec.

²⁵ Nuquin Papan chiaid niacchitomane quequin isquiota. Macuësh Sinai yacno choquid Nuquin Papan ënden chiaid chuiquid tantiate bunesa cuidpampic. ¿Adembidi ambi nëbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic?

²⁶ Ënden Macuësh Sinai yacno Nuquin Papan chiacnoshonquoio nidaid ishcupampic. Nëbien: “Padpidemboen nidaidbëdta abu ënëdmenuen ishculoaindami,” quec Nuquin Papa.

²⁷ Aden chuiquin ambi uaidtedi ënëdmenuen padpidemboen ishculoaindac abi yacno choaidtedi icsaisa icmiaido yec ënëdtiapimbo iccuedednuc.

²⁸ Adoaidi Nuquin Papabëd abi tantiaquido ambi bëdambo icmiaido yec abëd tabadte ëntiapimboec Nuquin Papan nadatiambocquid nabanaid tantiec cuëdëndonec tabadta.

²⁹ Nadatiambocquid Icsaisabidi icquin aidëmbi, Esuquidistu tantiate, quequin nëbi chiaid tantiesa chian anëdënquequid nësecaindac.

13

Nadomboen nata cain chiaid

¹ Esuquidistu tantiaquid yec aid tantiaquidtedi con utsibo nec, quiash tantianec nashunanta.

² Adembidi Nuquin Papa yacnoësh choquid abi tantiaquido nashuntequid ambi uaido mayan bëdabo chosho yuedampicpaden mimbi isacmaidquoio Esus tantiaquid chosho yuedta.

³ Adembidi quënen nauedaid iquec utsi iste buntsiabi, qeshun quënen nauedaid istan-istanta. Adecbidi buntsiabi, qeshun menetan-menetanta. Adembidi utsin mëyanaid tantiec shubioata.

⁴ Adecec tabadec con chidopenquoio chudnu qesa iquec chido utsi isuidquid icta. Adesa icsho Nuquin Papan mibi cuidendac.

⁵ Adecbidi, piucquid con na bedtequid dadpen bednu, quec bunquiduidi iquenda. Adesa iquec: Con na icnuc bëdambo iquebi, quec tabadta. Adecec tabadquid Nuquin Papan ënden dada uamiampid naden chiec:

“Mibëdi iquebi.

Nianenquiocquin mibi dayun uanuna.”

⁶ Adsho tantiash:

“Con Icbombo ëbëdi iquendac.

Aidëmbi ëbi cudasquin dëcatiac chieshëmënnquid dacuëdënenquoio iquembi,”

nuqui quendac.

⁷ Adembidi nidaidën icquid mibi chuiquid dapabo Nuquin Papan chiaid mibi tantiamenuequin chuiquido bëshunenda. Aido Esus tantesa uainquoio yec bëdamboec tabadpanëdash. Aido tanec bëdamboec tabadoata.

⁸ Con Icbombo Esuquidistu nec. Abia Yampidquio yec nëbi adquiobidi iquec. Aidi ënëdtiapimbo yec abi tabadec.

⁹ Adquid Esus icnuc Nuquin Papa chieshënquidën chuisho tantiesa icta. Aidën naden chiec, Nëid petequid icnubi nëid utsi petemaid nec, quequin chiec. Mimbi piadën mibi bëdambo icmetiapimbo iquec. Padnuen matses icsaid bedshunash abided cuidadquidën, Nuquin Papan madonquoio paucaid iquebi, quequin tantiaquidquio icsho isun Icbobëd tabadmequin ambi bëdambo icmiaidquoio nendac.

¹⁰ Matses icsaid bedshunash abided cuidadash uincuenash abi tantiaquidbèd ènèdenquo yec tabadquid Esuquidistu nec. Adec tabadquid Esuquidistu icnubi, Matses icsapash, qeshun nidaidèn capuquid yua cuesuneshun nibèdquiocnoc tauiaidènquo matses Nuquin Papabèd tabadmetiapimbo iquec. Adembidi aidènquo nuqui icsaisa icmetiapimbo iquec.

¹¹ Isadaidbo icsapash, qeshun nidaidèn capuquid yua cuesuneshun aidèn intac bedshun, Nèid intac Icsaisa Bèdaidquo anquènè uaid nuntan buanshun daseccacsho isun abi yacno puduedacbimboecsho Nuquin Papan isadaidbo isec, qeshun nuntan buanshun daseccapampic. Adnubien matses nibèdacno nami buanshun uesquin tauipampic.

¹² Adembidi matses tabadenquo yacno Esus buanshun dectanac unèsacsho siac aton intac chididiepanèdash nuqui icsaisa icmenuec.

¹³ Adoaidi abi tantiaquid yec abèd icquid nebi, quequin ènden chiampicpaden nainquicsho isun isadaidbo Esuquidistu tantiesan cacumiaqui chieshenquo yec tabadta.

¹⁴ Adquid iquec nidaidèn yuec tabadesa icquimbien Edusaden Chuca caid Nuquin Papa ènèdtiapimbocquidbèd tabadaid cainquidquo nuqui nendac.

¹⁵ Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bèdambo iquec, quequin Nuquin Papa chuidenenuna.

¹⁶ Adodenequin utsibobèd tantiananquin nashunquin aton na nibèdquid menequid icta. Adsho isash, Con mado yec con champi yec quec bèdamboec tabadquid nec, quiash bèdambo iquebi, quependac Nuquin Papa.

¹⁷ Ambia Esus tantiashun chuiquidon chiapaden nabanta. Nuquin Papan, Èbi tantiaquid utsibo isbanta caid icquin aido Nuquin Papan, Icsambo iquec, canushe qeshun isted-istedec. Aidon chiapadomboen naquin ma aido bèdambo iquebi camepanuna. ¿Chieshecta mibi bèdambo icpe? Padenquo.

¹⁸ Chieshenquiocquin èbèd icquid Nuquin Papa chui. Bèdamboen nabanec tabadteniobi. Adequi tabadebi utsibo: Icsambocquid nec, quetiapimbocnoc.

¹⁹ Adembidi èbi tantiaquin Nuquin Papa chuidoneta. Mibi adonoc badedquo mibèd iquendabi.

²⁰ Adembidi utsibèd bèdamboen tabadmequid Nuquin Papan aton Mado matsesacsho utsibon unès uashun siacsho isun uincuemiac bèyucanec abuc puduedoash abitedishun Icbombo nec. Abi tantiaquido chuinuen yuedquid aidi Nuquin Papan icmepanèdash.

²¹ Adquid Esus icmeshun ambi tantiacpadomboen ma Nuquin Papan mibi icmepanuna. Adoac, Èbi puduedmenuen Nuquin Papan naid nec, quequin ènenquiocquin chuiquid ma icpanuna.

²² Mibi tantiamenuen èmbi dada uaqin chiaid daèdpacksècquo icsho bèdamboen isec onquequin tantiadoneta.

²³ Nèbi utsi chiembique. Tantia. Timoteyo quènèn nauedboedi nèbi puduemiac aid badedquo nèmbi choan aidbèdi mibi yacno nidendabi.

²⁴ Mibèd icquid Esus tantiaquid utsibobèdta mibi chuiquidtedi tantiec tsadebi quequin Pabadon dada uaosh, quequin chuita. Adecbidi èbitsen tsadebi quequin chuiota, queoapec nèuèsh Itadia yacno tabadquido.

²⁵ Nuquin Papan bèdambo icmiaid ma mibitedi icpanuna. Padi. Aidedi dada uaombi.

SANTIACON DADA UAID

¹ Santiacono nebi. Nuquin Papan namiaidquio, Nuquin Icho Esuquidistun namiaidquio-bidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

Natiametequid

² Utsibo, mibi u tabadnuc mibi nënaid, mibi bundoaid, utsin mibi mëyanaid, mibi natiametequid utsi-utsiec iquendac. Adaïd icnuc, chonoadbudec cuishon quec, Chieshen-quiocquin nainembi, quiacpadquiec adecbidi tabadoata.

³ Adaïd icnuc, ¿Ëbi tantiaquidquioda neque? Isnu, quequin, Nuquin Papan ëbi dayacquio icmec, quequin tantiec adecbidi tabadoata.

⁴ Aden tantiec tabadsho isun bëdamboec tabadte uesquin tantiabenquidquio mibi icmendac ma Esuquidistupadquid yampanueshun.

⁵ Mimbi tantienquio yaid Nuquin Papa chuita. Aden chiaquien, Ma tantianu, qeshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec.

⁶ Ëbi tantiamete, queboedi, ëbi tantiamenquiocpec quequin tantienda. Ëbi tantiametepec queboedi padenquio yanec cuëshëdec capuidequi yampec.

⁷ Adquid Nuquin Icbon pausuntiapimbo icpec.

⁸ Adquid, Nuquin Papan ëbi tantiamete, queboedi capuidequi icquidbimboec icpec.

⁹ Shubu abentsëquën tabadacpadquiec tabadquid icta. Adec tabadec mitsana daëdpactsëc icquid yec, Con na daëdpactsëc iquec, quequin mitsanauidi tantienquiocquin naden tantiatata. Nuquin Papan bacuë nebi. Abëdi cuëshëdenquio yec tabadebi, quequin aiduidtsëqui tantiec tabadteneta.

¹⁰ Aton na dadpen icquidombien aton na bëdiactsec tantiaquin naden tantiendac: Con na nëidic chodquec; utsibic chiuidec. Adecbidi con nami shëñibudequi Nuquin Papan bacuë nebi. Abëdi cuëshëdenquio yec tabadebi quequin tantiec tabadta.

¹¹ Tanunquiocquidën tiedën caniquid unësec podo tididiquec. Bëdamboeboedi nibëdqieç. Adquiecbidi icho aton nabi bedbanequi aton nami shëñibudequi unësec. Icho ichoedi icho ictiapimbo yanec. Adec icho ictiapimbo yanebi, quequin mitsana comapenen tantienda.

¹² Adecbidi natiaic shubitequid icnuc Nuquin Papan chiaïd niaquenquio yec dayacquio yec tabadquid Nuquin Papan bëdamboe icmiaïd nendac. Adquiecbidi, Ëmbi chiaïd niaquenquio yec mibi tabadsho isembi. Èbëd icquid mibi neque. Pudued. Nëuëshquio mibi unëstiapimbo iquec, quendac Nuquin Papa.

¹³ Mibibi icsash, Nuquin Papan namiac nebi, quenda. Nuquin Papa Icsapenquiocquid nec. Aidi icsa uantiapimbo iquec. Icsa uanesa nec.

¹⁴ Nidaidën tabadquidien icsate bunec abibi icsaic. Adecbidi ambibi tantiacpadeç icsaoaic.

¹⁵ Icsamane quequin tantienquio yec unësascho abi yacno puduedmenquiocquin Nuquin Papan uguë nësecaindac adquid.

¹⁶ Utsibo, Nuquin Papan chiaïd chieshënesa nebi, quec mibibi mua uadenda.

¹⁷ Nuquin Papan pausunaid bëdambouidi iquec. Utsi uaquin namiantiapimbo iquec. Adenuidi namec. Adquiuuidi Nuquin Papa iquec.

¹⁸ Ëmbi chiaïd tantiaquidquio icsho con bacuë nec, caimbi, quequin Nuquin Papan tantiampampic. Aden tantiaquin Nuquin Papan abi chuidonequidquio aton Mado Esus nidaidën budmepadenec. Adec budash nidaidën capusho isash abëd ichoedo abi tantiaquido nuquitedi nec. Adquid icsho ambi bëyuc bacuë icmiaïdo, con nabo cain, Nuquin Papan cuëmbanoshi. Aden ambi bëyuc bacuë uaido icquin chuibanac ma tantiaquidquio dadpen yampanuna.

Nuquin Papan chiaïd tantiaquin nabanta quiaïd

¹⁹ Nëid bëdamboen tantiatata. Chuinu. Nuquin Papan chiaïd bëdamboen tantiaquid icta. Ambi chiaïd bëdamboen tantienquiocquin aid badedquio chienda. Adecbidi badedquio nëishenda.

²⁰ Badedquio nëishquidën Nuquin Papan chiacpadquiec bëdamboec tabadaïd ismesa nec. Adquid, Bëdamboen mimbi naoc, Nuquin Papan catiapimbo iquec.

²¹ Bëdamboec tabadesa icquin mimbi icsamboen tantiacpaden naid ënquiota. Aden ënu quiaish, Icsaobique. Mimbi chiaïd tantiaquiono. Ëbi pausunec, quequin Nuquin Papa

chui. Aden chuisho Nuquin Papan mibi pausunec. Ambi pausunaid iquec aton Mado Esuspadquio yec cuëshêdenquoio yec abêdi mibi iquendac.

²² Nuquin Papan chiaid tantiashun nainquoio yequi Nuquin Papan chiaid bêdambo iquec, quec mibibi mua uadenda. Nuquin Papan chiaid tantiabocpadomboen nabanta.

²³ Nuquin Papan chiaid tantiashun naisa isnanten

²⁴ bêsadash bêpiscudacimboec bêpiscudendac.

²⁵ Padnuen Nuquin Papan nêbi chuiboed utsin comapenen tantiaded-tantiadedec. Aden tantiashun, Con Mado Esuquidistu tantiaquid con bacuê caimbi, quequin Nuquin Icbon chiapadomboen nabanec tantesa uainquoicquid adquid nendac. Aden tantiaquin nabanquid Nuquin Papan bêdambo icmendac.

²⁶ Padnuen, Nuquin Papan chiaid tantiaquid nebi, queboedi ana bêdamboen oncamesa abibi onquequid nec. Adquid, Esus tantiaquid nebi, quequin ambibi tantiaquin icsamboen chuiquid nec. Abipenquoio chuiquid nec. Adquidbidi bêdamboec tabadaid ismesa nec.

²⁷ Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsêcquid chonoadsho isun nashuntiad. Natiaic camiaid icsho isun ademibidi nashunoatiad. Ademibidi shiadimpi machoabictsêcquido tantiaquin nashunoatiad. Ademibidi niante machobo utsin bedabi samêdquido tantiaquin nashunoatiad. Aden naquid Esus tantiesan nabanacpaden naisa nendac. Adquid icsho isash, Êmbi chiaid tantiaquin naquidquoio nec. Con Madopadquidquoio icsaisa nec, quendac Nuquin Papa.

2

Nêid bêdambo iquec. Nêidien icsambo iquec, quesa icta quiaid

¹ Utsibo, Nuquin Icho Esuquidistu Bêdaidquoio nec. Aid tantiaquid mibi nec. Adquid icquin, Nêid bêdambo iquec. Nêidien icsambo iquec, quenquiocquin icsamboen nainquoiocta.

² Mibi iccuededacno Esus tantiaquid mimbi isacmaid choec. Abentsêc bêdaidquoio dasiuidash nac-nacquiocquid mésiuidquid puduednubien utsi icsactsêcquiocquid dasiuidtsash puduedec. Aid daêd chosho isun ¿mitsipadentsi mimbi tantiapatsia?

³ Bêdaidquoio dasiuidquid isun naden mimbi tantiatsiac: Bêdamboquid nec. Aton na dadpen icquid nec, quiacimboen, Tsusion dayunquoio tsadec cho, quequin mimbi aidi tsadumpec. Adshumbic, icsactsêcquiocquid dasiuidquid isun, Aton nain nibêdchitec, quiacimboen uano tsad mimbi caopec.

⁴ ¿Nêid icsambocquid nec. Nêidien bêdamboquid nec, quiacimboen Esus tantiaquid utsibo mimbi tsadunenquioda ictio? ¿Aton na tantiaquin adoenuioda ictio? Aden naquin bêdamboen tantiaquin naisa mibi neyoc.

⁵ Nuquin Papan chiaid tantiesabimboecquin mimbi naid nec. Mimbi, Icsambocquid nec, quequin tantiaquin uano tsad caid tsadbudash nadpec: Icsambocquid nec, quequin êbi isec, quequin tantiec aidi tsadpec. Aidbidi Nuquin Papan tantiaid nec. Aidi Esus tantiaquid yec abi yacno puduedtequid iquendac.

⁶ Aidi bacuêbimboecnuc mimbi uano tsadumpec. ¿Utsibic tsusio dapabimboecnuc mimbi dayunquoio tsadumbocpadquidên utsin-utsinquien chono uashun mibi daêdpectsêc menenquioda ictiosh? ¿Adquidon mua uain chuiquin mibi utsi-utsien quênên nauedmenquioda ictiosh?

⁷ ¿Adoanquidên baded-badedquien Esus quec onquequin mamênshunenquioda ictiosh?

⁸ Nuquin Papan chiaid nad iquec: “Utsin naden êbi nashuntiadquoio iquec quequin, mimbi tantiacpadomboen nashunta.” Nuquin Papan chiapadomboen tantiaquin nashunquidquoio iquec mibi bêdambo icpec.

⁹ Nêid bêdambo iquec. Nêidien icsambo iquec, quiacimboen naquid icnuc Nuquin Papan chiaid niacquid mibi iquec.

¹⁰ Nuquin Papan chiaid utsi-utsien nabanquid icquimbi ambi chiaid utsi niacquid mibi icaopec.

¹¹ “Mimbi inacmaid chudenda,” quequin Nuquin Papan chiaid nec. “Utsi cuesunenda,” quequin ambi chiaid utsi nec. Min chidoudi chudquid icquimbi utsi cuesunequid mibi iquec Nuquin Papan chiaid niacquid mibi nepec.

¹² Mibi tantiaquin mibi icsaid pauquec Esuquidistuded icsambocquidimboec yec unêspanêdash. Aid tantiaquid icsho Esusên paucaid mibi nec. Adquid yec Icbon mibi tantiaquin nabanacpadomboen utsi tantiaquin nabanec bêdamboec tabadta.

¹³ Esuquidistu tantiaquid utsi icsambocquid nec quesa icta. Êbi icsaid Esuquidistun pauca. Adomboembidi abi tantiaquid utsi icsaidbidi pauca quequin bêdamboen naban. Icsambocquid nec quiacimboen icsamboen nabansho isun Nuquin Papan adomboembidi mibi chuiquin cuidoaindac. Êbêda Esuquidistun paucaid nec quequin utsi tantiaquin

nashumēnquid icquin icsambocquid nec quiacbimboen icsamboen nashuntiapimbocquid mibi nec.

Esus tantiaquid nebi quequin ambi tantiacpadomboen nabanquin isme quiaid

¹⁴ Utsibo, Nuquin Papan bacuē nebi, qeshun ¿Icbon chiaid nainquiocquinda utsi bēdambo mimbi icmepadi? Padenquio.

¹⁵ Esus tantiaquid abi dasiuidtebēd pete nibēdquid, Bec cho, qesho

¹⁶ menenquiocquin, Nidec nid. Dashcute bedash dasiuidta. Adembidi pete bedshun codocashun peta, ¿mimbi cacta bēdambo icpadic? Padenquio.

¹⁷ Adembidi, Nuquin Papan bacuē nebi, qeshun Icbon chiacpadomboen naisa Icbon bēdambo icmiaidpenquio nec. Nuquin Papan bacuē nebi, qeshun naisa Nuquin Papa yacno puduedtiapimbo icoaic.

¹⁸ Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiacpadomboen nabanquidquio iquec. ¿Mitsipaden aid daēdshun tantiacpadomboen mimbi tantieque? Chui. Tantuan, quequin mimbi chuitsiac.

Adoiqui, Esus tantiaquid nebi, quequimbi Nuquin Icbon chiacpadomboen naisa naden chuitsiambi. ¿Nuquin Icbon chiacpadomboen nainquiocquin mitsipaden mimbi tantiaid mimbi tantiamepe? quetsiabi adquid chieci. Mimbi ambi chiacpadomboen nainquiocquin ismetiapimbocnobi, Esus tantiaquid nebi, quequin chienquiocquimbi Esusēn chiacpadomboen naquin mibi ismembi, caimbi.

¹⁹ Nuquin Papa Abentsēcquiobi iquec, quequin mimbi tantiec. Aden tantiaid bēdambo iquec. Adembidi, Nuquin Papa Abentsēcquiobi iquec, quequin mayan icsatedishun tantiaoaic. Aden tantiaquin niacquido yec uēdēquec.

²⁰ Icsamboen mimbi tantieque. Tantia. Chuinu. Nuquin Papa Abentsēcquiobi iquec, qeshun Icbon chiacpadomboen naisa yec, Icho tantiaquid nebi, quetiapimbo iquec.

²¹ Nuquin Papa tantiambi, qeshun ambi chiacpadomboen naquidquio icpampid chuinu. Tantia. ¿Abadauan ēbi tantiaquidquioda neque? Tantuan, qeshun, Min mado abentsēc mibi cudasaidquio ēbi tantiaquin cuesuneshun taita, cac Abadauanēn Nuquin Papan chiaid niacmane qeshun tauinuequin aton mado abentsēc setsempampic. Chēshtempi sanandosho isun, Padi. Chēn. Embi chiacpaden nanuesho mibi bēdambo iquec, quequin mibi bēdamboen isembi, ¿quequin chienquioda Nuquin Papan icpampic?

²² Abadauan Nuquin Papan chiaid cacuidenquio yec, Con Icho Nuquin Papa nec, quec abi onquiacpaden ismepampic.

²³ “Mimbi tishmiaidēn tishmiaid dadpenquioshē iquendac,” quequin chiondashumbic Nuquin Papan yuecshun adembidi: “Min mado abentsēc cuesuneshun taita,” quequin chiuoiqui, Nuquin Papa abimbo chuiquidquio nec, qeshun ambi chiaid niacchitomane quequin, Abadauanēn aton mado abentsēc setsempampic. Adosho isashien Nuquin Papa, “Ebi tantiaquin naquidquio Abadauan nec. Adquid con matesquio aidi nec. Aden aidi tantiaquin ēmbi yuecquiocshon nanuequin tantiaid Abadauan chiemi,” quepampic Nuquin Papa.

²⁴ Nuquin Papan bacuē nebi, qeshun ambi chiaid naquidquio Nuquin Papa tantiaquidquio nec. Nuquin Papan bacuē nebi, qeshun ambi chiaid naisa niacquid nec.

²⁵ Adashic, Nuquin Papan chiaid tantiashun naquid utsi icpampic. Aidi isadaidbon chidopenquio, Daba cuēmēdquid, dada dadpen chudmequid icpampic. Isadaidbon Icho nadatiambocquid nec, qesho tantiashien, Adquid abu nidaidbēdta aidēnquiocquid Icbobidi nec, quequin Daban tantiapampic. Aden tantiaquin Daban mates cuesunenuequido isadaidbo abia puduedquin isquid chosho, Nadatiambocquidēn mates nec, qeshun abi yacnoidtsēqui Daban puduedmepampic aton mates ismenquiocquin. Aden puduedmequin nadomboen tantiapampic. Abi puduedmequidbēd icquido cuesunenquiocpec, quequin Nuquin Papan tantiamiacpadomboen omposhon podqued utsin nidmepampic. Aden nidmiac yuecash isadaidbo dadpen cho-chonobi abia choamboedēn chuibocpadquioibi Dababēd icquido cuesunianenquio yec isadaidbobēd icquidobimboec isec tabadpampic.

²⁶ Nuquin Papa tantiaquid Daba yanshun bēdamboen nasho isun mēnchicaid Nuquin Papan con mates caidbēd tabadpampic. Padnuen, Esus tantiaquid nebi, qeshun Icbon chiacpadomboen naisa cuēshēdacbimboec tabadec.

3

Anan icsamboen chieci onquiaid icsa ēnta quiaid

¹ Utsibo, Nuquin Papan chiaid chuibanquid dadpen iquenquioctiad. Nuquin Papan chiaid tantiamenu, quequin ambi chiaidpenquiocnoc chuibanquid abi yacno chosho isun Nuquin Papan comapenen cuidendac.

² Chuibanquidtedishun chua-chuatsëquien chuibantsec. Nuquin Papan chiaid cuembo chuibanquid yec icsaisa yanec adquid. Bëdamboec tabadaid uesquin tantiaquin ismequidquio adquid nendac.

³ Cabayo anëshquin dëchëdëdcash uidën uash tsadquin nidmec. Aden uidën uaquin bidiacmec.

⁴ Ademibidi uncaten cano dapa tsibidiacoaic. Cunquequidën comapenen bëcunetiadquiocnobi ademibidi icbon nidmec.

⁵ Cabayo canobidi nua icnuc abi bidiacmete aniactëc iquec. Adecbidi icbo nua icnuc aton ana aniactëc iquec. Aniactëcquidi oncamequin icbon ambi naid dadpen comapenen chuibanec. Ademibidi oncamequin onquiaid icsa chuibanec. Nëdënquiaid dëtsisidash badedquio nidacimboec onquiaid icsa badedquio nidoaic.

⁶ Ana onquiaid icsa chuibanacpaden nabanec adecbidi icsabudquieic icbo. Adquid mayan icsan yua iquec adequi icsate bunec.

⁷ Nidaidën capuquid podochoquidbidi matsesën yuampicpaden abi yuaid iquec. Yua queneshash cuenquiocquid.

⁸ Ad yenquio ana iquec. Quenenenquio yec ana onquebudec. Onquiaid icsa adecbidi ënëdtiapimbo iquec. Ana onquiaid icsa tantianec adecbidi icsabudquieic tabadendac.

⁹ Nuquin Icho bëdambo iquec, qeshumbic ana icbon, Nuquin Icbon uaid matses icsambo iquec, quequin chuibanec.

¹⁰ Ana shëcuën utsi bëdamboen chuishumbic utsi icsamboen chuioaic. Aden nuqui chienquio ictiad.

¹¹ ¿Acte batapenquiocquid choaidënuësh batambocquidta chopadic? Padenquio.

¹² Adecbidi ¿cuëte bacuë batambocquidën ëshë bëchi chopecta dëyuctic? Padenquio. Adecbidi, ¿isitodo dataniadaidën bacuë batambo yecta dëyucpadic? Padenquio. Aidi adesa yapadquieic Esus tantiaquidën ana shëcuën utsi bëdamboen chuishun utsi icsamboen chiesa ictiad.

¿Tsutsi Nuquin Papan chiaid tantianecquidquio icpec? quiaid

¹³ ¿Tsutsi Nuquin Papan chiaid tantianecquidquio icpec? Adquid yec comapenen Esus tantiaquid nebi, quenquiocquimbi bëdamboec tabadquin ismequid utsi-utsien ma icmebampanuna.

¹⁴ Utsin tantiamenushe qeshun ëmbia chiapadomboen ma napanu quesa icta. Nuquin Papan chiapadomboen nabanquin ismequid icta.

¹⁵ Ademibidi, utsin dëniacnushë qeshun namenun chuinuequid Nuquin Papan tantiacpadomboen pausunacmaid nec. Adquid mayan icsan tantiacpadomboen pausunaid nec.

¹⁶ Aden aidën icsamboen tantiacpadomboen abëd icquidon adomboembidi tantieic. Aden tantieic, Utsi dëniacnu, quiash utsi-utsieic dëniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquieic. Ad icnuc icsateuidi bunquid yampec.

¹⁷ Nuquin Papan tantiacpadomboen pausunaid ad yenquio iquec. Ambi tantiacpadomboen pausunaid yec utsibëd bëdamboec tabadquid iquendac. Ademibidi utsi tantiaquin nashunquidquio icoaindac. Ademibidi ëbëdtan nabanec cho cac nabanendac. Ademibidi, Icsambocquid nec, quenquiocquimbi bëdamboen nabanquin ismendac. Ademibidi, Esus tantiaquid nebi, abi quiacpadomboen bëdamboen naic. Adecbidi utsibo chieic muaisa nendac.

¹⁸ Ambia tantiaquid utsibëd bëdamboec tabadquin ismiac adecbidi utsibëd bëdamboec tabadquid dadpen yanendac.

4

Ëbi nua pausun, quequin chiash Nuquin Papan dayunquio tsadta quiaid

¹ ¿Atotsi quiash Esus tantiaquido cuididianante buncuededpec? Mibi icsate bunacpadequi mibi cuididianante bunec. Aiduidquio tantiabudequi mibi chushcanancuededec.

² Nëid bunebi, queboedëmbi bedtiapimbo yanquin mimbi cuesunec. Adecbidi, Utsi dëniacnu, quiash chushcananec. Mimbi nauiduidi naquin Nuquin Papan tantiacpaden naisa mibi nec.

³ Aden naisa icquin Nuquin Papan chiaid niacmane quenquiocquimbi aidi mimbi chieic. Adecbidi icsanueshun chuisho Nuquin Papan mibi menetiapimbo iquec.

⁴ Mimbi inaiduidi chudenquio yapadquiequi Nuquin Icbouidi tantienquio yec Esus tantiesan icsate bunquin nacpadomboen mimbi nadenec. Adquid yec Nuquin Papa chieshëquid nec.

⁵ Adenquiocquimbi Esus tantiasho isun aton Mayan Nuquin Papan Esus tantiaquidtedi meniac bëdamboec tabadec. ¿Atotsieshshun Esus tantiaquid aidi menepec quepecta mibi iquec?

Nad iqueque. Tantia. Chuinu. Con bacuë nec, quequin aton Mayan Nuquin Papan Esus tantiaquido menec. Aden tantiaquin meniac, ¿Esuquidistu tantiaquido cudasquin dëcatenquioda aidën icpec?

⁶Aidëmbi abi chieshenquoio yacpaden tantiamebanac icsamane quiash chieshenquoio yec bëdamboec tabadta. Nuquin Papan dada uamiampid nad iqueque. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Èmbibi bëdamboen tantiatiapimbo iquebique. Èbi tantiamé, Papa, qesho Nuquin Papan nua pausunac aton icbo chieshënenquiocquid iquendac adquid.”

⁷Aden Nuquin Papan chiaid icnuc, Icsaobique. Mibia Yampidën èbi nua pausun, Papa, quequin chiasch Nuquin Papan dayunquoio tsadacimbocquid ambi chiaid tantiata. Nuquin Papa chieshënnquid mayan icsan yuadenda. Adquidën yuatiapimbo iquebique. Nuquin Papan chiaidquio nabanu, qeshun nabanuc mayan icsa cuenendac.

⁸Aton dayunquoio tsadquidimbocquidbëd tabadquidquio Nuquin Papa nec. Icsash uano tsadquid icboedi bëchishash acten dapanudacimbocquid mimbi tantiad icsa ënta. Adash, Tantiad bëda pausumenu, quiash Nuquin Papan dayunquoio tsadacimbocquid chieshenquiocquid ambi chiaiduidi tantiaadeneta.

⁹Aden tantiec tsadboedi, Èmbibi tantiemi, quec Nuquin Papa chieshënnquidën dayunquoio uano tsadashic, Con Icbo tantiec unësquio iquebi, quiash shubiec mamënenquoio yec tsadta. Mibibi uano tsadquid yash unëscimbocquid icboedi choec isadcuencimbocquid Nuquin Papan dayunquoio tsadacimbocquid yec chieshenquoio yec bëdamboec tsadoata.

¹⁰Uano icboedi choash, Èbibi icsaobi. Nëbi icsate bunenquoio iquebi. Mimbi chiacpadtiadquio iquebi, Papa, quequin chui. Aden mimbi chuisho tantiash, Puduedash nëmbo ëbëd tsadacimbocquid mibi yanoaic, quependac Nuquin Papa.

¹¹Utsibo, Esus tantiaquidtedi min utsimbocquid nec. Mibëd icquid icsamboec chuinanenquoio yacpadquiec Esus tantiaquid utsibëd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid Nuquin Papan chiaid icsambo iquec quiacimbocquid nec.

¹²Nuquin Papa Chuiquid Dapa Abentsëcquiobi iquec. Ambi chiacpaden naquidquio nec. Nuquin Papa abitedi Isquidquio Abentsëcquiobi nec. Aden isquin: Nëid icsambocquid nec. Nëidien bëdambocquid nec, quequin Chuiquidquio abentsëcquiobi aidi neoaic. Adquid icquin ambi chiaid nabanquid abëdi tabadmec. Ambi chiaid niacquidien abëdi tabadmenquiocquid uquë nësecaindac. Nuquin Papan ambi chiacpadombocquid naquidbëdtabi ambi chiacpadombocquid naisa isquidquio icquin ambi isacpaden cuidendac. ¿Adquidbidida mibi ne? Padenquoio. Adquidpenquoio icquin ¿atotsieshun, Icsambocquid nec, quequin mimbi chuipe?

Ma badiadshun nanun chiaid tantiesha neyoc, quequin chiaid

¹³Tantiaquidquio nebi, quiash, Piucquid bednuec seta abentsëc matamec chonoadec nidebi, quequid chuinu. Tantia.

¹⁴Ma adquid badiadshun nanun chiaid tantiesha mibi neyoc. ¿Tedtsi seta matamec mibi tabadpe? Badiadbudnuc cuen-cuempambo yash badedquio nidacimbocquid matses nidaidën tabadash adecbidi mibi nibëdanendac.

¹⁵Naden nanu quenquiocquid nadembien tantiatiad: Nuquin Papa bunaid icnuc badiadash isedec nidebi, quetiad. Adecbidi, Nuquin Papa bunaid icnuc badiadshun tied neshcaimbi, quetiad.

¹⁶Aden chienquiocquidmibi mibi utsi dëniaquec onquiaid mimbi chiec. Aden chiec icsaic.

¹⁷Nuquin Papan chiaid tantiemi, qeshun adombocquid natiadquid mibi naisa iquec icsaic.

5

Na dadpen bedbanquin dayun uaquido chiaid

¹Nëbi aton na dadpen bedbanquin dayun uaquido chiembique. Tantiata. Mibi unësun mimbi bedbanquin daëd uaid mimbi tantiadquio buantiapimbo mibi iquendac. Aden mimbi bedbanquin daëd uaiduidtsëqui icscho isun Nuquin Papan mibi cuidendac. Adquid nebi, quequin tantiash shubita.

²Unësosh, quequin chiac mimbi dadpen dayun uaid nibënnquin isac ënden chodquiac. Adembidi mimbi bëdaidquio dectanaid capishton ënden piac.

³Min shocosh piucquid ënden chiuidac. Adecbidi min piucquid utsi ënden tiadac. Adenuidi tantiaquin bedbanquid unëscasho abi yacno yuedquin, Bëdamboen mimbi naoc, quetiapimbo Nuquin Papa iquendac. Tanunënnquoio shubu nëdënnquish nibëdacpadquiec mimbi bedbanaid nibëdquendac. Adenuidi tantiaquin, Esus èbi bedec chonoshe qeshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquid mitsana dadpen bedbanshun mimbi dayun uaoc.

⁴ Adembidi mimi icsamboen naid utsi iqueque. Tantia. Min tied uaquido mimi chono uaboedo bunec sidquec. Aidi mimi menenquo yaid Esuquidistu tantiaquido Nuquin Papan tantiaido nec. Adembidi, Con tiedën caniquidtsen dayun uanu, quequin mimi bedmiaido uëshquec bunec sidquesho Nuquin Papan, Nadatiambocquid Abentsëchshun tantiec.

⁵ Aido bunec sidquenubi chonoadenquiocquin nua pec mibi tsadec. Adec tsadquin min nami bunaiduidi tantiaquin mimi bedbanoaic. Nua pec cubudacimboen mibi bunaiduidi bedbanquin dadpen dayun uaquido mibi nec. Aden nabanquin bëdamboec tabadaid ismesa mibi nec. Adec tabadec unëshash abi yacno mibentsëqui chosho Esuquidistu tantiamboocquid nec, quequin Nuquin Papan mibi isendac. Aden isquin mimi chono uaido mimi cuidacpadomboen aidëmbi mibi cuidendac.

⁶ Mimi chiaid mimi chono uaidon niaquenquiocquin nabanachobi, Icsamboen mimi naoc, quequin daëdpactsëc mimi menebampoc. Aden nabanec mimi cuesuni-acimboec bunquec chonoadequi unëshosh.

Ma Nuquin Icho chono quiaish chieshesa icta quiaid

⁷ Nëbi utsibon chono uaido chuinu. Tantiata. Nuquin Icho choec quequin tantiec chieshenquo yec tabadta. Nitsinash ma caninu quianec pec nidash cainec icbo tabadec.

⁸ Adembidi, Nuquin Icho ëbi bednuec choec, quec bëdamboec tabadquin caimbudta.

⁹ Adec tabadquin Esus choate cainec Esuquidistu tantiaquid utsibobëd chieshënanenda. Adec utsibobëd bëdamboec tabadsho isun abitedi tantiaquidënquo Chuiquid Dapan mibi menequin bëdamboen cuidendac. Adesain menenquiocquin cuidendac. Adembidi, Nëidën bëdamboen naosh. Nëidëmbien icsamboen naosh, quequin ëbi Chuiquidënquo chierendac, quec chieshenquo yec bëdamboec tabadta.

¹⁰ Utsibo, natiatequid icnuc Nuquin Papan chiaid ambi chuimiaido chieshenquiocpampic. Aidquo chuibanu. Tantia.

¹¹ Natiad icnuc chieshenquiocsho isun Nuquin Papan bëdambo icmendac, quequin nuqui tantiondaid nendac. Natiac cametequid icnuc Nuquin Papa chieshënenquiocquid Obo icpampic. Aton na dadpen icboedi icsatequid utsi-utsiectsëcquieccquidën uesac nibëdqiosho isash, Con nabëd con nabo nibëdnuc Nuquin Papa bëdambo iquec, quec chieshenquiocpampic Obo. Adquid icsho isun daëd uaquin Nuquin Papan meneoapampic. Matses tantiaquin naquidquo Nuquin Papa nec, quequin

¹² abimbo chuiquidquo icta. Utsin: ¿Ada naden natsia? cac, Ai, quiacpadomboen nabanta. Adembidi, Padenquo, quiacpaden nabanoata. Mua uanec onquequid Nuquin Papan cuidendac.

Nëidic bëdampec quequin abimbo tantianuc quiaid

¹³ ¿Natiambo icsatequid icnuc dayactiapimbo icquidta icpec? Adquidënquo Nuquin Papa chuitiad. ¿Bëdambo iquebi, quec tsadquidta icpec? Adquid Nuquin Papan naid chiec cuëdëntiad.

¹⁴⁻¹⁵ ¿Aton dada icsabudquidta icpec? Adquidën ambia Esus tantiaquido chuiquin, Nuquin Papa ëbi chiec cho, catiad. Adsho tantiash choshon icsabudquid tantiaquin anoshonuidi Nuquin Papa chuidoneta. Aden chuidoneshun cuëte bacuë ënë chinchun dashunquinqin, Mimi utsibo bëdamenëdacpadomboen mimi tantiacpaden nëidtsen bëdame, Icho, quequin chuita. Aden Nuquin Papa chuinin mibi icsaid icnuc, Icsaobi, quequin mimi naid Nuquin Papa chui. Adembidi dada icsabudaid chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucapaden ma aton dada bëdamepanuna.

¹⁶ Abi icsaid uesquin Nuquin Papa chias bëdamboec tabadendac. Adquidën chiac dada icsambocquid Nuquin Papan bëdamendac.

¹⁷ Edias nuquibimboecquid matses icpampic. Nuquin Papan nua pausnac Nuquin Papan tantiacpadomboen Ediasën tantiapampic. Adquid icquin, Ue secamenda, Papa, cac adecbidi seta 3ted matamiash seta utsi choabicnuc ue sequenquo icpampic.

¹⁸ Adembidi, aidëmbi yuecshun, Ue secame, Papa, cac ue sequenuc tiedën caniquid canipampic.

¹⁹ Esus tantiaquidën Nuquin Papan chiacpadomboen nabamboedi adoesa utsi-utsiec yantsiash. Adsho isun Nuquin Papan chiaid tantiamequin ambi icsamboen tantiaid chuibanac Nuquin Papabëd yacimboec icoaindac.

²⁰ Aden mimi chiac chieshenquo yec tabadsho isun Nuquin Papan uquë nësiatiapimbo adquid iquendac. Adecbidi abi icsaid bëpiscudoaic Nuquin Papa.

Padi. Mibi tantiaquin aidted dada uaombi.

PETEDON DADA UAID 1

Petedon tauamboen chiaid

¹ Petedo nebi. Abëd icquid icsho Esuquidistun: —Ëbi chuibeneta —caidquio nebi. Esus tantiaquidtedishun mimbi iste dada uanu. Isadaidbo icsho nuquin nidaidënsun ënden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidtedi nidaid yacno tabadquidon iste nëid dada uaic nebi.

² Ëndenquio Nuquin Papa: —Ëmbi tantiactedi matses ëbëdta Esus tantiamendambi —quepampic. Nëbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: —Icsambo icquid cuidmenquio icnuec abided cuidadaid Esus tantiasho Nuquin Papan ëbi bëdamboen isec. Aidën chiacpadomboen natiadquio iquebi —quequin Esus tantiec nuqui bëdamboec tabadec. Aden tantiaquin Nuquin Papa chianembi naden. —Ënenquio icquin aido bëdamboen ista, Papa. Adembidi dacuëdenquio icnuc bëdambo icmeta, Papa —quequin Nuquin Papa mibi chianembi.

Esus tantiaquid Nuquin Papa yacno tabadte chiaid

³ —Nuquin Icho Esuquidistun Papa Nuquin Papa bëdamboshë iquec —canuna naden tantiaquin. Icsaquido cuidte bunenquio icquin utsiacimboecnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. —Esuquidistu chococac uincuenash padpidec unëstiapimbo iquendac. Adembidi nuqui unësascho uincuemeshun Nuquin Papan abi yacno nuqui tabadmendac padpidec unëstiapimbo icnuc.

⁴ Ambi chiampicpadomboen bëdamboshë yacno Esusbëdquio ëbi tabadmendac. Unëstequid nibëdec icsabudtequid nibëdec chodquetequid nibëdec quiacnombo Esusbëdquio nuqui tabadmendac —quequin nuqui tantiec.

⁵ Aden Esus tantiaquid icsho isash: —Con Mado Esus tantienquio yanushe —quiasch nadatiambo icquin nabanquid yec Nuquin Papa nuqui cudasec. —Esus chote ushën ëbi yacno tabadmendambi —quec Nuquin Papa nuqui cudasec.

⁶ Ëmbi aden chuisho tantiasch mibi cuishonquendac. Esus tantiesabon chieshënac shubiantiadtsëcquio yec natiaboedi mibi bëdambo yanendac. —Nuquin Papabëd tabadec quenenedabi —quec yuec nuqui shubienquio iquendac.

⁷ Nuqui cudasquid yec zatotsi quiasch Nuquin Papa: —Padi. Chën. Esus tantiaquido natiamenda —queboedi adenquio icted-ictedpec? Matsu nacnenquidën: —Ma tsasinu —quequin ambi nacnenaid tauiec. Adembidi Esus tantiaquid chieshtoenquio icquid icmete Nuquin Papa comapenec bunec. Matsu nacnenquidën: —Ëbëdambo icquidida neque? Isnu —quetanquin matsu tauiec. Adembidi: —ËEsus tantiaquidquiboda neque? Isnu —quequin: —Natiamenda —cainquio iquec Nuquin Papan. Aden natiamiaqui chieshtoenquio icquid icsho Esuquidistun padpidec choshon: —Mibi bëdambo iquec. Ëbëdi tabadec cho —quequin utsibo tantiamequin chuishun abi yacno buanendac.

⁸ Aden mimbi isacmaidi Esus mimbi tantiaquiec. —Nëbi isadenquio icquidi Nuquin Papan Madombo Esus ëbi bednuec choendac —quec mibi cuishonquianec.

⁹ —Abi tantiasho icsano nidmenquio icquin Esusën abi yacno ëbi yuedendac —quec Esus tantiec mibi cuishonquianec.

Esus chote tsusedpabon chiampid

¹⁰ Ëdenquimboshë Nuquin Papan tantiamiac isadaidbo tsusedpabon Nuquin Papan chiaid chuiquidon Esusën matses cuidmenquio icte dada uapampic. Esusën nate abitedi tantienquio icquin daëdpectsëc tantiaquin: —ËMitsipadquid Nuquin Papan chomepeba? —queded-quededquin chuipampic nuquin tsusedpabo isadaidbon.

¹¹ Aidobëd icquin Esuquidistun Mayanën tantiamiac Esus chote abentse-abentsen chuipampic. —Matsesën chieshënquin cuesten dectanac matses cuidmenquio icnuec abided cuidadec unësendac. Adec unësascho uincuemiac padpidec abitedishun Icho icoaindac —quequin Esus chote chuipampic. —ËTsutsi chopec? ËTedectsi yash chopec? —quequin abitedi tantiatadquio icquimbi daëdpectsëc isadaidbo tsusedpabon tantiapampic.

¹² Naden Nuquin Papan tantiamepampic. —Mibi nibëdanan ëmbi chuiboed ëmbi matsemiacsho utsibon isendac —quequin tantiamiac Esusën nate chuipampic. Aden chiampicpadomboen Esusën naondash. Nuquin Papan Mayanën tantiacpadomboen aid

chuibenequidon aidën naid mibi chiac caondash. Aden Esusën naid Nuquin Papan abi yacnoshon uaido mayan bédabontsen tantiatiaquido icquimbi abitedi tantienquo iquec.

Bédamboec tabadte tantiamiaid

¹³ Ēmbi chuiboed Esus tantiaquido icquin paposhquiacimboen Esusuidi tantianuna. Nuqui icsate bunacpadec icsainquo yec bédamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna ënenquo icquin.

¹⁴ Ambi: —Con mado nec. Con champi nec —caido icquin Nuquin Papan chiacpadomboen nanuna. Ēnden Nuquin Papan chiaid tantiabi mibi bunaid naic mibi icsanëdacpadec icsainda.

¹⁵ Mibi Esus tantiamequid icsaisambo Nuquin Papa neque. Ambi chiaid niaquenquo yec bédamboec tabadnuna.

¹⁶ Nuquin Papan ambi chiaid naden dada uamepampic. “—Nuquin Papa icsaisambo nec,’ quiash icsaisa ictiadquo yec bédamboec tabad,” quequin Nuquin Papan ambi chiaid dada uamepampicpadec bédamboec tabadnuna.

¹⁷ Papa quequin nuqui chianeboed Nuquin Papa matsesën naidtedi chuiquid nendac. —Nëid ëbi tantiesha neque. Icsano nidmenu. Nëid ëbi tantiaquid neque. Ēbëdi tabadmenu —quequin matses abitedi chiendac. —Abëdi tabadmenquo icnushe —quiash Nuquin Papabëd icte bunec bédamboec tabadnuna.

¹⁸ Nuquin tsusedpabon chiaiduidi naquin Nuquin Papa tantienquo nuqui icpondac. Aden Satanasën yuaido icsho Nuquin Papan nuqui bédamboen istiapimbo icpanëdash. Adshun Satanas nuqui bedshunuen çpiucquidida Nuquin Papan menepanëdash? Padenquo. Adquid icsabudtequid menenquo icquin

¹⁹ aton Mado Esus icsaisambo icsho matsesmepanëdash. Aden matsesmiacsho chieshëmëñquidën cuestas decanac Esus aton intac chididiquec abided cuidadec unëspondash. Nëbi aton Mado Esus tantiaquido bédamboen isquin Nuquin Papan Satanas bedshunec. Aden Nuquin Papan bedshunaid yec bédamboec tabadnuna.

²⁰ Ēdenquimboshë abitedi uabi Nuquin Papa nadpampic. —Ēmbi tantiapadën yuecash matsesash matses cuidmenquo icnec mibided cuidadec unësta, Mado —quepampic. Aden ambi chiampicpadomboen badedquo namenquo icboedëmbi nëbi nameshun Esus tantiasho mibi bédamboen isec.

²¹ Abi tantiasho Esusëmbi Nuquin Papatsen nuqui tantiamec. Adoac nuqui naden tantiec. —Esus unësacsho uincuemeshun abëdi tabadmequin abitedishun Icbombo Nuquin Papan icmeoapanëdash. Ambi chiacpadomboen naquidquo Nuquin Papa nec. Ēbi unësacsho uincuemeshun abi yacno ëbi tabadmendac —quequin Nuquin Papatsen nuqui tantiec.

Esus tantiaquido tantiananquiotie chiaid

²² Nuquin Papan chiacpadomboen naic bédambo yanshun mibëdtan Esus tantiaquido utsibo mimbi tantiec. Adecbidi muenquo yec tantiananquionona.

²³ Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibëdantiapimbo icquid icnac ambi chiaid bënudtiapimbo iquec. Aidën chiaid tantiashun mimbi Esus tantiabempanëdac.

²⁴ Ambi chiaid bënudtiapimbo icte Nuquin Papan nuquin tsusedpa dada uamepampic naden chuiquin.

“Uasimbimboec unësquid matses nec.

Cuëte bacuëc bédamboshë isadboedi badedquo chodquequid nec. Adecbidi matses: ‘Con nabëdi bédamboshë iquebi,’ queboedi badedquo unësquid nec.

²⁵ Nuquin Papain nibëdantiapimbo icquid nec. Adnuc ambi chiaid bënudtiapimbo iquec,” quequin abimbo chuipampic. Aidën chiaidquo mibi chiac caondash.

2

Nuquin Papan chiaid iste bunquionona, quiaid

¹ Aden Nuquin Papan chiaid tantiash chieshëmëñec tabadenda. Utsi muauainda. —Esus tantiaquid nebi —quiashi icsamboec tabadenda. Utsin na isash: —Adquid con na nibëdec —quec chieshëmëñec tabadenda. Utsibo chieshëñec icsamboec onquenda.

² Adenquo yec Nuquin Papan chiaid iste bunquionona. Tishac chucactšëc bacuëmpi shuma chishte bunquiacimboec Nuquin Papan chiaid iste bunquionona. —Bëdiactšëc tantiaoboedi aid isban-isbanquin Nuquin Papan chiacpadomboen natiadquo yantsiabi —qeshun Nuquin Papan chiaid isbanuna.

³ —Esus tantiec bédambo iquebi —qeshun Nuquin Papan chiaid isbanuna.

Buintadimboecquid Esus nec, quiaid

⁴ Nuqui tantiaid nadquo iquec. Shubu uanun buintadquo nacnitsinuen istuidshun: —Nëid bédambo iqueque. Nëidquo naimbi —quiacimboen Nuquin Papan: —Èmbi tantiaidquo yec mibi bédambo iqueque. Èmbi chiacpadomboen mibi namenu —capanédash Esus. Adoaidi matses dadpeshunquo Esus chieshëndash. Padnuen nuqui: —Nuquin Papa yacno puduedmianquid bédambo iquec —quequin nuqui Esus tantiabempondac.

⁵ Aden Esus tantiaquido icsho isun Nuquin Papan aton shubu icquidobimboecnu nuqui icmec. Adoac: —Con matses Esus tantiamé, Papa —quequin Nuquin Papa chianequid nuqui yanec. —Nuquin Papa bédamboshë iqueque. Ambi chiacpadomboenuidi natiadquo iquebi —quec bédamboec tabadquidtsen nuqui yanec. Adsho isash: —Bédambo iquec —quependac Nuquin Papa nuqui caic.

⁶ Aden aton Mado Esus tantiate chuiquin Nuquin Papan dada uamepampic naden. “Buintad bédambo icquid istuidash: ‘Nëidquo shubu uanun nitsinemi,’ quiacimboen Edusaden yacno èbi bédamboen ismequidquo isadaidbobéd tabadmendambi. Aid caic: ‘Nëid tantiasho Nuquin Papan abi yacno nuqui tabadmendac,’ quequin abi tantiaquido unèsasho èbi yacno tabadmendambi,” quequin Nuquin Papan ambi chiaid dada uamepampic.

⁷ Aid tantiec: —Bédamboshë iquec —quependac Esus tantiaquido. Utsibombien Esus chieshë nec. Èndenquimbo Esus choabi icnuc aidën nate chuiquin Nuquin Papan dada uamepampic naden.

“Buintad bédambo icquid istuidashi: ‘Nëidquo shubu uanun nitsinemi,’ quetiadquidi isuidacimboen Nuquin Papan namiaid chieshë nac. Aden buintad isuidaid utsin bedshun shubu uanun nitsinacimboen Nuquin Papan tantiacimboen utsibon ambi namiaid tantiosh,” quequin Nuquin Papan dada uamepampic.

⁸ Adshumbic Esus chieshëntetsen dada uamepampic naden chuiquin.

“Nuquin Papan abipadquidquo Edusaden yacno isadaidbobéd tabadmiacsho ambocquidon chieshë nendac.

Aid chieshë nquid nadquo iquendac. ‘Cuète mabud iquec,’ quequin tantienquo yec nidec tocoshquetanec uebudacimboec èbi bédamboen ismequid tantienquo yec unèsash icsano nidendac,”

quequin Nuquin Papan ambi chiaid dada uamepampic. Aden Nuquin Papan chiaid tantiatipimbo icquin Esusen tantiatipimbo iquec. —Adquid icsano nidmendambi —quequin Nuquin Papan tantiacpadec Esus tantiesabo yec unèsash icsano nidendac.

Nuquin Papan matses nuqui nec, quequin chiaid

⁹ Esus tantiesabo dadpen icnubi Nuquin Papan Esus tantiamiaido nuqui nec. Icsambo iccondaidi nuqui Esus tantiamépondash paposhquiacimboecnu. Adoac: —Nuquin Papa bédamboshë iquec. Ambi chiacpadomboenuidi natiadquo iquebi —quec bédamboec tabadquid nuqui yanec. Adembidi: —Con matses Esus tantiaméta, Papa —quequin Nuquin Papa chianequid nuqui nendac. Adecbidi: —Nuquin Papa bédambo iquec —quequin utsibo chuibanquid nuqui nendac.

¹⁰ Ènden abi tantiesabo icsho Nuquin Papan mibi bédamboen istiapimbo icquin: —Con matses mibi nec —mibi catiapimbo icpanédash. Nëbi Esus tantiasho Nuquin Papan mibi bédamboen isquin: —Con matses mibi nec —mibi caindac.

Bédamboec tabadte chiaid

¹¹ Èmbi tantiaido mibi neque. Tantia. Mibi chuinu. —Nuquin Papa yacno tabadendabi —quias Esus tantiesabo icsate bunacpadec icsainda. —Esus tantienquo yamane —quias bédamboec tabadta.

¹² Esus tantiesabobèdi bédamboec tabadnuna. —Ma aidontsen Esus tantianu —quias adnuna. Adec mibi bédamboec tabadsho isun mibi chieshë nquin icsamboen chuishumboedombi Esus tantiabenshun Nuquin Papa naden chiendac. —Mimbi namiaido bédamboec tabadsho isun Esus tantiabonombi. Mibi bédambo iquec, Papa —quendac.

¹³ Bédamboec tabadnuna. —Con Icho Esus matsesën chieshë nushe —qeshun matses chuiquid dapatedishun chiacpadomboen nanuna. Nuquin nidaidën tabadquido abitedi chuiquid dapa pedesidente caidën chiacpadomboen nanuna.

¹⁴ Aidën: —Mibitsen matses chuiquid icta —caidon chiacpadomboentsen nanuna. Matses icsasho isun cuidquid neque. Adecbidi bédamboec tabadsho isun: —Bédambo icquid nec —caquid neque. Aidën chiacpadomboen nanuna.

¹⁵ Aden Nuquin Papan chiacpadomboen naic bédamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquo icquin icsamboen chuiboedombi ambi icsamboen chiaid èntsiash.

¹⁶ Satanasën yuaido icsho Esusën bedshunaid yec nëbi icsambo icquidën yuapenquio yec bēdamboec tabadnuna. Icsanuec: —Utsin yuapenquio yec ēbi bunaiduidi naimbi —quenda. Nuquin Papan yuambo yec bēdamboec tabadnuna.

¹⁷ Matses abitedi bēdamboen isnuna. Esus tantiaquido icquin nuquibēdtan Esus tantiaquido utsitedi tantiaquionona. Dacuēdampambo Nuquin Papa icsho tantiashe bēdamboec tabadnuna. Chuiquid dapambo pedesidente caid bēdamboen isquin aidën chiacpadomboen nabanuna.

Yuabo chiaid

¹⁸ Tantia, yuabo. Esus tantiaquido icsho mibi chuinu. Min icbon chiacpadomboen nata. Min icbo bēdambo icquid icnuc adota. Min icbo dacuēdampambo icquid ancanquidquio icnubi adembidi nata.

¹⁹ Adec Nuquin Papa tantiaquid yec bēdambo icsho cuesaqui chieshēmēnenquio icsho: —Aid yua bēdambo iquec —quequin Nuquin Papan mibi bēdamboen istiashe. Min icbon chiacpadomboen nata.

²⁰ Źicsamboec tabadquid cuesac chieshēmēnenquio icquidta Nuquin Papan: —Aid yua bēdambo iquec —capātsiashe? Padenquio. Nuquin Papan chiacpadquiec bēdamboec tabadquidi cuesaqui chieshtoenquio icsho: —Aid yua bēdambo iquec —Nuquin Papan cātsiashe. Bēdambo icta.

Chieshtoenquio yec Esus unēsaid

²¹ —Chieshēnaqui chieshtotiadquio iquebi —Źquecta ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenquio icnu —queshun Nuquin Papan nuqui Esus tantiaquid icmepondash. Esus nadondash. Nuquin Papa nuqui cuidmenquio icnuec abided cuidadec mēyadec unēspondash.

²² Nuquin Papan dada uamepampicpadquio “muesambo yec icsaisambo icpondash.”

²³ Adquid icsho abi chieshēnquidon mamēnshunaqui Esusën chushcainquio icpondash. Aidon matonbudnetanquin buanshun cuesten dectanac: —Mibitsen cuidendambi —cainquio icpondash. Adenquio yec nadpondash. —Nuquin Papan matsesën naidtedi tantiaquid icquin bēdambo icquid abēdi tabadmequin icsambo icquid cuidquin icsano nidmendac —quiash chieshēmēnenquio icpondash.

²⁴ Adash: —Ēbi tantiaquid ma icsaid ucudacimbboec bēdamboec tabadnu —quiash nuqui icsaid bedshunec abided cuidadec unēspondash. Adec aton Madoded cuidadec unēsacsho isash nēish bēdashun Nuquin Papan aton Mado tantiaquido bēdamboen isec.

²⁵ Yuan icbo cuenēnacimbboen Nuquin Icho nuqui tantienquio icpondac. Adoboedi nēbi: —Con Icbon ēbi bēdamboen dayun uaquin ēbi bēdamboen namendac —queshun nuqui Esus tantieque. Bēdamboen nanuna.

3

Bēnēbēdta chido chiaid

¹⁻² Tantia, chidobo. Bēnēchoquid icsho mibi chuinu. Esus tantiaquid icquin min bēnēn chiacpadomboen nata. —Esus tantieci ēbi bēdamboec tabadsho isun Nuquin Papan chiaid tantienquio icboedēmbi con bēnēn Esus tantiabentsiashe. “Mimbitsen Esus tantiabenta,” quequin ēmbi chiambobi Esus tantiabentsiashe —queshun min bēnēn chiacpadomboen nata.

³ Bēdamboec tabadquid ictiadquio icquin casēdu payuteuidi tantienda. Adembidi dashcute bēdambo icquid dasiuidteuidi tantienda. —“Bēdambo isadec. Mibi bēdambo iquec,” mabi canu —quiash nacnemēdteuidi tantienda.

⁴ —Bēdambo mibi iquec —camenuec bēdamboec tabadta. Nēishēmēnenquio icquin bēdamboen nabanta. Chieshenquio icquin min bēnēn chiacpadomboen naquid icta. Mibi adquio icsho isash: —Mibi bēdambo iquec —quendac Nuquin Papa.

⁵ Ēndenquimbo isadaidbo tsusedpan chido Nuquin Papa tantiaquid yec adquio icpampic. Aton bēnēn chiacpadomboen naic bēdambo icpampic.

⁶ —Con bēnē con icbobimbboec iquec —quequin aton bēnē Abadauan caidēn chiacpadomboen Sada caidēn napampic. Esus tantiaquid icsho mamēnshunaqui min bēnē dacuēdēnenquio icquin aidēn chiacpadomboen naic bēdamboec tabadec Sadapadquio mibi ictsiac. Adquid bēdambo iquec.

⁷ Tantia. Bēnētsen chuinu. Abia uimabadquid icsho min chido bēdamboen ista. Mibēdtan Esus tantiaquid yec Nuquin Papa yacno mibēdi tabadtequid neque. Min chido bēdamboen ista. —Ēbi bēdamboen ista, Papa —quequin mimbī chiaid Nuquin Papan tantienquio icnushe. Min chido bēdamboen ista.

Bēdamboec tabad, quequin chiaid

⁸ Nēbi Esus tantiaquido abitedi chuinu. Tantia. —Nuquin Papan chiacpadomboen nanuna —quiash bēdamboec isnanuna. Cuishonquequidbēd cuishonquec shubiquidbēd shubinuna. Adec tantiananquionona. —Ēmbi naiduidi naimbi —quenquo icquin utsibon chiaidtsen nanuna.

⁹ Mibi chieshēnaqui cuidnanenda. Mibi chieshēnquin icsamboen chuishunaqui cuidnanec icsamboec chuishunanenda. Adenquo icquin Nuquin Papa chianeta. —Ēbi chieshēnquid bēdamboen isquin bēdamboen tabadme, Papa —quequin Nuquin Papa chianeta. —Ēmbi bēdamboen isaidon ma aton matses utsibo bēdamboen isnu —qeshun Nuquin Papan nuqui Esus tantiaquido icmiaye. Bēdamboec tabadnuna.

¹⁰ Adec bēdamboec tabadte chuiquin Nuquin Papan dada uamepampic naden. “Bēdamboec tabadte bunquidēn nadoendac.

Adonante bunenquo icquidēmbi utsibo muauainquo iquendac.

Chieshēnquin utsibo icsamboen chienquo iquendac.

¹¹ Icsamboec tabadboedi bēdamboec tabadendac. Utsibo chieshēnansho isash:

‘Padi. Chieshēnanenda,’ quendac.

¹² Adec bēdamboec tabadsho Nuquin Papan bēdamboen isendac.

Aden bēdamboen isaidon: ‘Ēmbi chuisho tantia. Ēbi bēdamboen ista, Papa,’ quequin abi chuisho Nuquin Papan tantiendac.

Icsamboec tabadshoen bēdamboen istiapimbo iquendac,”

quequin Nuquin Papan dada uamepampic.

Cuesaqi dacuēdenda, quequin chiaid

¹³ ¿Bēdamboec tabadshoda bēdambo icquidēn badedquo mibi cuespatsiash? Padenquo ictsiash.

¹⁴ Bēdamboec tabadsho isun icsambo icquidēn cuesacsho mibi Nuquin Papan bēdamboen istsiash. Mibi chieshēnquo dacuēdēnenda.

¹⁵ Dacuēdēnenquo icquin: —Con Icho Esuquidistu nec —quequin ambi chiacpadomboen nanuna. Aden mimbī Esus tantianuc utsibo: —¿Atotsieshun Esus tantie? —quesho: —“Abided cuidadec unēsaid Esus tantiasho Nuquin Papan ēbi bēdamboen isquin unēsacsho abi yacno ēbi tabadmendac,” qeshun Esus tantiembi —quequin Esus tantiesabo chuibanuna.

¹⁶ Aden nēishēmēnenquo icquin Esusēn naid chuibanuna. Aden bēdamboen chuinec Esus tantiaquiec bēdamboec tabadnuna. —Ēbi bēdamboec tabadsho isash ēbi chieshēnquin muauaquid: “Bēdambo icquidi muauachitombi. Icsachitobi,” ma quenu —quiash bēdamboec tabadnuna.

¹⁷ —Ēbi tantiaquid utsibon chieshēnendac —quequin Nuquin Papan tantiacpadomboen Nuquin Papa tantiaquido utsi-utsien utsibon chieshēnendac. Bēdamboec tabadquid icsho utsibon chieshēnaqui nuqui chieshtoenquo icsho isash: —Mibi bēdambo iquec —quetsiash Nuquin Papa nuqui caic. Icsambo icsho quēnēn nauedaidi nēishenquo icsho: —Mibi bēdambo iquec —cainquo ictsiash Nuquin Papan.

Esus unēsaid tantia, quiaid

¹⁸ Chieshēnaqui Esusbimboec chieshtoenquo yec bēdamboec tabadnuna. Aid icsaisambo yequi nuqui icsaid bedshunec abided cuidadec unēspondash. Aden Nuquin Papa abi tantiaquido bēdamboen ismenuec abentsecquiobi unēspondash padpidec unēsenuquo icnuec. Aton dada unēsambi aton tantiate unēsabi icpanēdash.

¹⁹ Adec aton dada unēsambi aton tantiate icnuc ēndenquimboshē Noe caidēn matses abi tantiesabo icsho Nuquin Papan cuidquin unēs uampido uidēn uashun quēnēn sauedampicno Esus nidpanēdash. Ambo nidshun Nuquin Papan cuidpampido Esusēn ambi naboe chuibampānēdash.

²⁰ Naden Nuquin Papan aido cuidquin unēs uapampic. Ēndenquimboshē aton matseshēd tabadec Noe bēdambo icnubi aton matses icsamboshē icpampic. Adnubien Nuquin Papan: —Matses icsaquido abitedi uesquin unēs uanuen nidaid abitedi acte mabudadmembique. Baded cano dapa nacnen —quequin Nuquin Papan Noe caid chuipampic. Adoac badedquo cano dapa nacnemēdenquo yacpadembi Nuquin Papan badedi cuidenquo icpampic: —Ma abi icsaid ēnshun ēbi tantianu —qeshun. Adnubien cano dapa nacnentanec Noe chedo 8tedpactēsēc cano dapa antabēdtopampic. Adnubien aido antabēdtoaid cano dapa acten bedtoac nuadtopampic. Utsiboen acte mabudadmiaidēn mentoadbudnepampic. Noe abi tantiaquidquo icsho Nuquin Papan cuidenquo icpampic.

²¹ Adembidi Esus tantiasho nuqui cuidenquo iquec. —“Esus tantiaquid nebi,” quequin utsibo ismequin acten mentomembi —qeshun nuqui acten mentomec. ¿Bēchish ucquinda

nuqui adodi? Padenquo. Nuquin Papa naden chuiquin: —Esus tantiaquin icsaid ucacimboen mimbi chiacpadomboen natiadquo iquebi, Papa —quequin nuqui adoec. Aden abi tantiasho Nuquin Papan uincuemenedaidēn Esuquidistun nuqui cuidmenquo iquec.

²² Aidi uincuenash Nuquin Papa yacno nidash aidbēdi tsadoaic abitedishun Icbombo yanoac. Abitedimbo chuiquid dapa icquin ambi chiacpadomboen abitedi namendac. Nuquin Papan abi yacnoshon uaido mayan bēdabo bēdamboen namequimbic Satanas aton yuabo mayan icsabobēdta Esusēn cuidendac.

4

Bēdamboec tabadnuna, quiaid

¹ Nuquin Papan tantiacpadomboen nasho utsibon chieshēnquin mēyanaqui Esus chieshtoenuo icpondash. Adembidi chieshēmēnquidēn chieshēnaqui adecbidi chieshtoenda. Abided cuidadec unēsaid Esus tantiaquin nuqui icsaid nuqui ēnendac.

² Aden nuqui tantiacpadomboen nainquo icquin Nuquin Papan chiacpadomboen natiadquo nuqui iquendac.

³ Nuquin Papa tantiesabon nacpadomboen Nuquin Papan chiaid mimbi yuen niacnacpondac. Utsin chido chudquinc utsin bēnē chudmequinc tantiadenuen acte paēmboc icquid acquinc: —Nēid papa canu —quequin matsesbimboecnuc nacnenuen mimbi capondac. Adec icsateuidi bunec mēmuntiapimbo mibi icpondac. Adquid iccondaidi nēbi bēdamboec tabadta.

⁴ Adec bēdamboec tabadsho isun mibēd icsaondaidēn: —¿Atotsieshun nuqui naondacpadomboen nainquo ique? Mimbi Nuquin Papa caid nibēdec —quequin mibi icsamboen chuiquin mibi mamēnshunendac.

⁵ Aden mibi mamēnshunquid Nuquin Papan cuidendac. Cuidnumbi matsesēn naidtedi tantiaquid icquin Nuquin Papan: —¿Mitsipaden nao? ¿Ada bēdamboec tabado? —cac ēnden unēsaidobēdtan unēsabi icquidotedishun ambi naidtedi uesquin chiendac.

⁶ Aden abēdi tabadmete tantiaquin Nuquin Papan namiac Esus chuibenequidon chuibenepondash. Adoac Esus tantiaquido yanash Nuquin Papan Adan cuidquin unēsquid icmiacpadec unēsquid yec unēsashic Nuquin Papabēd tabadendac padpidec unēsenuo yec.

Utsibo nashununa, quiaid

⁷ Tanta. Mibitedi chuinu. Nuquin Papan cuidte nēbi iqueque. Esus tantiec nuqui icsate bunaid ēnash mēmunc bēdamboec tabadnuna. —Ma ēmbi abi chianesho Nuquin Papan bēdamboen tantianu —quiash adta.

⁸ —Tantiananquido chieshēnanec cuidnante bunenuo iquec —quiash ēnēdenquo yec tantiananquionona.

⁹ Nuquibēdtan Esus tantiaquido isedec chosho bēdamboen isnuna. Shubu utsinquido ēnapenuēsh chosho adembidi chieshēnenuo icquin min shubun yued.

¹⁰ Nuquin Papan tantiamiacpadomboen nuquibēdtan Esus tantiaquido nashuntiad. Esus tantiaquidquo icmenuen chieshenquo icquin nanuna.

¹¹ ¿Ada Nuquin Papan Esusēn naid chuibanquid mibi icmiac? Adquid icquin Nuquin Papan chiaidquo chuibanquiota. ¿Ada Nuquin Papan mibēdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunmibi —quequin Esus tantiaquido nashunta. —“Ēbi nashunquid bēdamboen namequid Nuquin Papa bēdambohē iquec,” ma ēmbi nashunaido quenu —queshun utsibo nashununa. —Abitedishun icombo yec Nuquin Papa bēdambohē iquec —canuna ēnenuo icquin.

Chieshēnaqui chieshtoenuo icte chiaid

¹² Ēmbi tantiaido mibi neque. Tanta. —¿Atotsieshun matsesēn ēbi chieshēmpēba? —¿quecta ique? ¿Mibentsēquida chieshēndic? Ma Esus tantiaquido dadpenquo chieshēmpayoc.

¹³ —Chieshēnquin Esuquidistu comapenen mēyanacimboen Esus tantiesabon ēbitsen mēyanosh. Esus tantiaquid icshoeni adochitosh —quiash Esus tantiec bēdambo icnuna. —Utsibon chieshēnaidi abi tantiaquid ambi namiacno buanuec Nuquin Icho Esus choec —quiash abi chote ushēn cuishonquenush adnuna.

¹⁴ —Esuquidistu tantiaquid nec —queshun chieshēmēnquidon natiamiaid mibi bēdambo iquendac. Nuquin Papan Mayan mibēd tabadquin Nuquin Papa yacno tabadte mibi tantamequin mibi bēdambo icmendac.

¹⁵ Utsibo icsasho abi chuiquidēn natiamequin cuidquid. Cuesunianquid yec ampequid yec chieshēmēnquin icsamboen chuishunquid yec quec icsasho chuiquidēn cuidsho isun: —Bēdambo iquec —catsiambi. Adec icsainda.

¹⁶ Esus tantiaquid icsho utsibon chieshēnac dacuēdenda. Adec dacuēdenquo icquin: —Nuquin Papa bēdambohē iquec. Aton Mado Esus tantiaquid icmiac bēdambo iquebi —quequin ēnenquo icquin Esus tantianuna.

¹⁷ —Nuquin Papan cuidte ushē nēbi icnuc ambi con matses caido Esus tantiaquido chieshēmēnquidon natiamentac —quiacpaden nēbi tauaquin mibi natiamec. Adsho isun: —Chieshēmēnquidēn chieshēnac ēmbi tantiacpadomboen abi icsaid ēntsiash —qeshun Nuquin Papan: —Natiamenta —cainquo iquec. Aden abi tantiaquido icsaid ēmete bunquin nashun ꝥbēdiactśēcta abi tantiesabo cuidpec?

¹⁸ Naden chuiquin Nuquin Papan dada uamepampic. “Aden chieshēdeniac nati-ambo yan-yanequi unēsash Nuquin Papabēd abi tantiaquido tabadendac. Nuqui adnuc ꝥbēdiactśēcta ambi chiaid niac-niacquido Nuquin Papan cuidpec? Padenquo. Comapenen cuidendac,” quequin dada uamepampic.

¹⁹ Nuquin Papan tantiacpadec mēyadec Esus tantiaquid ma nadpanuna. —Ēbi uaquidēn Nuquin Papan ambi chiacpadomboen ēbi bēdamboen namec. Aid tantiec bēdambo iquebi —quiash ma bēdamboec tabadpanuna.

5

Esus tantiaquido chuibanquid Petedon chiaid

¹ Tantia. Esus tantiaquido chuibanquido icsho mibi chuinu. Mibipadquid Esus tantiaquido chuibanquid nebi. Paēmbohē icmequin Esuquidistu unēs uasho isondambi. Aidēn padpidec nidaidēn choshon abi yacno buanuen nuqui beduaneque. Tantia.

² Icho yua cudasacimboec mibēd icquido Esus tantiaquido cudasta. —Esus tantienquo yanushe —qeshun: —Nuquin Papan chiaid niaquenquo yec bēdamboec tabad —quequin chuibanta. —Esus tantiaquido chuibanquid icta —cac: —“Padi,” quetiadquo icquimbi naimbi —quenquo icquin: —Aden Esus tantiaquido nashumbantsiambi —quec Esus tantiaquido chuibanquidquo icta. —Piacquid dadpen bednun nanu —quenquo icquin Nuquin Papan chiacpadomboen natiadquo yec Esus tantiaquido chuibanquid icta.

³ —Nēidtedi Esus tantiaquido bēdamboen name —caidtedi bēdamboen isequi chushcandennda. Adenquo yec: —Ēbi yacpadec ma tabadnu —quec bēdamboec tabad.

⁴ Aden Esus tantiaquido chuibanquidēn bēdamboen namesho isun Nuquin Icbon nidaidēn padpidec choshon utsibo ismequin: —Nēid bēdambo icquid nec —qeshun chuibanquid ambi namiaidobēda abi yacno buanendac.

Esus tantiaquidon nate utsi chiaid

⁵ Tantia, caniabo. Mibitsen chuinu. Mibi chuiquid dapabon chiaid niaquenquo icquin aidēn chiacpadomboen nata. Aidtedtsēqui caniabo chuishumbic mibi yacnocquidotedi chuinu. —Ēbiuidtsēqui bēdambo iquebi. Ēmbimbo naiduidi naimbi —quenquo icquin utsin nacpadomboentsen nata. Aden chuiquin Nuquin Papan ambi chiaid naden dada uamepampic.

“Nuquin Papa tantienquo icquin aton matses utsibo tantienquo icquin ambi naiduidtsēqui nasho: ‘Adquid icsambo iquec,’ catsiash Nuquin Papan.

Utsimbien Nuquin Papa tantiaquin utsibon naidtsen nasho Nuquin Papan bēdamboen isquin bēdambo icmec,”

quequin Nuquin Papan ambi chiaid dada uamepampic.

⁶ Aden Nuquin Papan chiacpadomboen nabanuna. Nadatiambo icquid yec abitedishun Icbombo Nuquin Papa neque. Utsibon chieshēnaqui chieshtoenquo icnuna. Adec chieshtoenquo icsho ambi tantiacpadēn utsibo ismequin: —Ēbi tantiaquidquo mibi neque. Ēbēdi tabadec cho —nuqui caindac Nuquin Papan.

⁷ Aidēn nuqui tantieque. —ꝥAtotsimbi pepeba? ꝥĒbida cuespeba? ꝥCon matsesta unēspeba? —quequin nuqui dacuēdaidtedi Nuquin Papa chuinuna.

⁸ Nuqui icsate bunacpadec icsainquo icquin Esusuidi tantianuna. Esus tantiaquido icsho Satanasēn nuqui chieshēnquec. Esus bedshunuen nuqui icsametiadquo icquin bēdin nēish nibēnacimboen ambi icsametequid Satanasēn ēnenquo icquin nibēmbeneque.

⁹ Ista. Icsamenda. Chieshtomenda. —Satanasēn icsamechitoshe —qeshun Nuquin Papan chiaid niac-niaquenquo icquin Esus tantiaquionona. —Ēbi chieshēnacpadomboen Esus tantiaquid utsibo nidaid utsi-utsiec yacno tabadquido utsibon chieshēnac caosh —qeshun chieshtoenquo icquin Esus tantianuna.

¹⁰ Aden utsibon chieshēnaido yec yuec-yuecpectsēc nuqui tabadec. Adshobien abi yacno buanquin nuqui bēdambo icmequidēn Nuquin Papan Satanas nuqui icsa uamenquo iquendac. Adembidi Nuquin Papan nuqui bēdamboen isquid icquin dayacquio yacimboecnuc chieshtoenquo icquid nuqui icmendac.

¹¹ Ęmbi aden chuisho tantiashun: —Mibi bĕdambohĕ iquec, Papa. Mimbĭ tantiacpadom-boen abitedi mimbĭ namendac. Abitedishun Icbombo mibi nec, Papa —Nuquin Papa canuna ĕnenquoio icquin.

Petedon ĕnquimbĭ chiaid.

¹² Esus tantiaquidquoio Sidas caid nĕidtedtsĕqui ĕmbi dada uaboed mibi yacno buamembi. —Esusquoio isondambi. Aid tantiasho Nuquin Papan matses bĕdamboen isbenendac —quequin abimbo mibi chiombique. Chieshtoenquoio icquin Esus tantianuna.

¹³ Nuquin Papan tantiamiac nuquibĕdtan Esus tantiaquido ĕmbi Babidonia caid yacnocquidon: —Aido unĕsquoio iquec —mibi caosh. Babidonia caidbidi Doma caic. Con madobimboecquid Madcosĕn —Aido unĕsquoio iquec —mibi caosh.

¹⁴ —Ĕbĕdtan Esus tantiaquido nec —quiash: —Mibi unĕsquoio iquec —cananuna. —Ma Nuquin Papan mibi Esus tantiaquidotedi bĕdambo icmepanu —quequin Nuquin Papa chianembi. Padi. Aidedi chuiquin dada uaombi.

PETEDON DADA UAID 2

Tauamboen chiaid

¹ Petedo Simon caid nebi. Abëd icquid yec aton yuambo icsho Esuquidistun: —Ëmbi naid chuibeneta —caidquio nebi. Ëbëdñan Esus tantiaquido mibi neque. Mimbi iste dada uanu. Abi tantiaquido cuidmenquio icnuec abided cuidadaid Esus tantiaho Nuquin Papan bëdamboen isaïdo nuqui nec.

² Ëbëdñan Esus tantiaquido icsho mibi tantiaquin Nuquin Papa chianembi naden. —Aidon Esus tantiatsëcsho mibëdta Esus tantiamequin bëdambo icme, Papa. Aïdo bëdamboen isquiota, Papa —quequin Nuquin Papa chianembi.

Nuquin Papan bëdambo icmete chiaid

³ Comapenen tantiaquid icquin Nuquin Papan namiac aidën chiaid niac-niacte bunenquio yec Esus tantiaquido bëdamboec tabadec unësash Nuquin Papa yacno tabadendac. Abipadquid utsi nibëdnuc bëdamboshë icquid icquin Nuquin Papan Esus tantiamiaïdo nuqui nec.

⁴ Abipadquidquio Esusën chiondacadomboen abi tantiaquidobëdta Nuquin Papan aton Mayan tabadmequin bëdambo icmec. Aden abipadquio icnuc bëdambo icmiac icsate bunenquio yanec nuqui bëdamboec tabadec. Utsibo icsateuidi bunec icsaquionobi nuqui bëdamboec tabadendac.

⁵ Aden Nuquin Papan Esus tantiamiaïdo yec dayacquo yachimboec ënëdenquio yec bëdamboec tabadnuna. Adecbidi Nuquin Papan chiaidquio tantiec tabadnuna.

⁶ Aden Nuquin Papan chiaidquio tantiec nuqui icsate bunacpadec icsainquio icquin mëmununa. Aden mëmunquid yec nuqui chieshëñquidbëdi chieshëñanenquio yec chieshtoenuio icquin Esus tantianuna. Nuquin Papatsen tantiec bëdamboec tabadnuna.

⁷ Aden Nuquin Papabëdta Esus tantiaquido yec nashunanquionona. Adec nashunanquioquin Esus tantiesabo tantianuna.

⁸ Ëmbi chuiboedtedi nabanquin chieshtoenuio icquin adenuidi nanuna. Aden naquin Esus bëdiatsëc tantiatsëcboedëmbi chieshtoenuio icquin nuqui Esus tantiaquioticsiac.

⁹ Ëmbi chuibocpadomboen naisa pamumëdacbimboec iquec. Adquidon: —Aton Mado Esus tantiaho icsaid ucudacimboecnuc Nuquin Papan nuqui bëdamboen isec —queboedombi bëpiscudquin tantienquio yanec.

¹⁰ Ëbëdñan Esus tantiaquido mibi neque. Tantia. Mibitedi chuinu. Ëmbi aden chuisho tantiaho chieshtoenuio icquin Esus tantiec bëdamboec tabadnuna. Adec tabadquin naden nuqui tantiendac. —Ëndenquimboshë ëbi tishabi icnuc ëbi caic: “Esus tantiamendambi,” quequin ambi chiampicpadomboen Nuquin Papan nëbi tantiamiac Esus tantiabonombi —quequin nuqui tantiendac. Aden tantiec Esus tantienquio icquid nuqui yanenquio icsiac.

¹¹ Adec bëdamboec tabadash unësacsho: —Ëbi tantiaquid mibi neque. Ëbëdi tabadec cho —qeshun ambi namiacno abëdi tabadmequin Nuquin Icho Esuquidistun nuqui bëdambo icmendac padpidec unësenquio icnuc.

¹² Ëmbi aden chuiboedtedi mimbi tantiondac. Aden tantiabosh Esus tantiec bëdamboec tabadcuenondac. Aden mimbi tantiondaïdi mibi chuided-chuidendambi.

¹³ —Nëbi unësendabi —queboedi ëbi unësabi yacpadembi mibi chuided-chuidendambi.

¹⁴ —Adënuio mibi unësendac —quequin Nuquin Icho Esuquidistun chiacpadën nëbi unësebi.

¹⁵ —Ëbi unësan ëmbi chiondaïd ma bëpiscudenquio icnu —qeshun mibi chuiquin dada uanu.

Nuquin Papan Esus chiaid

¹⁶ ¿Muacquindambi mibi Esus chuidionda? Padenquio. —Nadatiambo icquin nabanquin Esusën ismedenepondash. Adquid yec abuc nidnush: “Padpidec nidaidën choindabi,” quepondash Esus —¿quectabi muadionda? Padenquio. Ëmbimbo isondaidquio mambi mibi chiondac. —Nëid con Madombo nec —quequin Nuquin Papan ismiac Esus isondambi.

¹⁷⁻¹⁸ Nadquio iccondash. Macuësh dapan dectatoash Esus bëchamauanquiec iccondash. Adnubien Nuquin Papan: —Con Madombo nec. Ëmbi tantiaidquio yec bëdamboshë iquec. Nëid isec bëdambo iquebi —quequin abucshun dacuëdampamboecnuc chuipondash.

¹⁹ ¿Ëmbentsëquidambi Esus chuibanquin nape? Padenquio. Ëndenquimboshë Esus chote tantiamequin Nuquin Papan isadaïdbo tsusedpabo dada uamepampic. Pacuëñëdacimboen utsibon tantienquio icnubi paposhquiacimboecnuc Esus chote

tantiamenuen dada uamepampic. Aden Nuquin Papan chiaid isec onquequin bēdamboen tantianuna: —Muaquidon chuisho tantiamane —qeshun. —Abitedishun Icbombo nebi —quequin ismenuec padpidec Esus choabi yacpadembi Nuquin Papan chiaid bēdamboen tantianuna.

²⁰ —Nuquin Papan nadoendac —quequin ζambembi chiaidta nuquin tsusedpabon dada uapampic? Padenquo.

²¹ Ambembi chiaid dada uainquo icquin Nuquin Papan chiaidquo dada uapampic. Nuquin Papan Mayanēn tantiamiac abimbo chuiampic.

2

Muaquido iquendac, quequin chiaid

¹ Nuquin Papan chiaidquo isadaidbo tsusedpabon chuinubien utsibo: —Nuquin Papan nadoendac —quec muapampic. Nēbi adquidbidi iquendac. Mibi yacno puduedash ambembi chiaid chiec muasho tantiaishun: —Mibi muequi nec —badedquo cainquo mimbi iquendac. —Abided cuidadec unēsaid Esus tantiaquid nebi —queboedi: —Esusēn chiapadomboen natiapimbo iquebi. Adshobi Nuquin Papan ēbi cuidenquo ictsiash —quequin muaquin chiendac. Adquid Nuquin Papan icsambo icquido cuidacno nidmequin cuidendac.

² Aden muaquidēn chuisho tantiaishun Esus tantiauidtsēcboedombi dadpeshun aidēn chiaid tantendac. Adashic Nuquin Papan chiaid niac-niaquec muaquido tabadachimboec padpidec icsamboec tabadoaindac. Adsho isun: —Esus tantiaquidobi icsambo iqueque. Is —caindac utsibon.

³ Muaquido tantienda. Aidon piucquid comapenec bunquin ambembi chiaidquo mibi chiec. ζMuasho tantienquioda Nuquin Papan icpec? ζAda Nuquin Papa ushpec? Muasho tantiaishun aido cuidendac. —Adquid icsano nidmequin cuidendambi —quequin ambi ēndenquimboshē tantiapampicpadomboen comapenen Nuquin Papan cuidendac.

⁴ Ambi chiaid niac-niacsho icsano nidmequin cuidquid Nuquin Papa nendac. Endenquimboshē nidaid uabi icnuc ambi abi yacnoshon uaido mayan utsin-utsinquien: —Ēmbiquen abitedi namenu —quequin ambi chiaid niac-niacsho isun Nuquin Papan icsamboshē yacno nidmequin cuidpampic. —Chian anēdēnquiacno nēsecanumbi nabono —qeshun aden tauamboen Satanas chedo cuidpampic.

⁵ Adshumbic yuecquo ictanquin matses abitedishun ambi chiaid niac-niacsho isun nidaid abichobi mabudadmequin Nuquin Papan matses uesquin unēs uapampic. Noeuidtsēqui padambo icpampic. —Bēdamboec tabadnuna —quequin Nuquin Papan chiaid chuibanquid icsho Noe chedo 8tedpactsēc Nuquin Papan cuidenquo icpampic.

⁶ Adshumbic yuecquo ictanquin matses utsibon Nuquin Papan chiaid niac-niacsho cuidquin nēdēncapampic. Shubu dadpen icquid nēid daēd icpampic. Nēidic Sodoma caid. Nēidic Comoda caid. Ambo tabadquido aton shububēdi abucūēsh taboadampamboec paēdquidēn pichiquepampic matses nibēdquo yec. —Aden icsambo icquido cuidquid nebi —quequin Nuquin Papan adopampic.

⁷⁻⁸ Sodoma caid yacnocquid abentsēqui Dod caid pichiquenquo icnuc Nuquin Papan cuemepampic. Bēdambo icquid yec: —Nuquin Papan chiaid niac-niaquec nēmo icquido icsamboecuidi tabadec —quec shubiec tsadsho cuemetsaidi pichiquiambo ictsampic.

⁹ Aden abi tantiaquido daēd Noebēda Dod Nuquin Papan cuidambo icpampic. Adembidi nēbi abi tantiaquido cuidenquo icquid Nuquin Papa nendac. Utsibon chieshēnāidi abi tantiaquido bēdambo icmequid nendac. Icsambo icquido cuidquid icquimbi matses cuidte ushē choabi icnuc nēbi tauaquin icsambo icquido Nuquin Papan cuidendac.

¹⁰ Muaquido nadquo icsho Nuquin Papan cuidendac. Abi bunaiduidi naic icsaic. Adem-bidi pabiate shēcuē nibēdadchimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidtsēqui bunebi —qeshun ambi naiduidtsēqui naic. Dacuēdtiadquidi dacuēdenquo icquin Esus tantiaquido chuiquid dapa caic: —ζBēdamboen namequidta nedic? —quequin icsamboen chuishunec.

¹¹ Padnuen Nuquin Papan abi yacnoshon uaido mayan bēdabon adec muaquido chuishuntiapimbo iquec. Muaquido bēdiactsēc tantiaquido icnubi comapenen tantiaquido icquin mayan bēdabon Nuquin Papa naden chienquo iquec. —Aido baded cuid, Papa —cainquo iquec. —Ambi cuidte ambentsēqui tantiaquid Nuquin Papa nec —qeshun adoenuo iquec.

¹² Padnuen ēmbi chuiboedo muaquidon Nuquin Papambo tantienquo icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ζAda bēdi cuidnushe quepadic? Padenquo. Adembidi abi cuidte tantienquo icsho Nuquin Papan cuidendac.

¹³ Nuquin Papan chiaid niac-niacmequin muaquidon utsibo icsamesho Nuquin Papan cuidendac. Icsateuidi bunquieic inchëshên icsash badiadënsen icsaic: —Bëdambo iquebi —quec adquido cuishonquec. Esus tantiaquin penuec mibi cho-choacno mibëd tabadec muaquidotsen chopac caosh. —Esus tantiaquidbidi nebi —quiash mibëd tabadec aid icsasho isash: —Esus tantiaquid abitedi icsaic —quependac utsibo.

¹⁴ Muaquido utsin chido mësmec tabadec. Nuquin Papan chiaid niac-niaquec icsaic ënëdenquio iquec. Adquid icquin Esus tantiatsëcquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic.

¹⁵ Nuquin Papan chiaid niac-niaquec icsateuidi bunquieic. Ëndenquimboshë matses utsi Beyod caidën mado Badan caid Nuquin Papan chiaid chuiquid yequi piucquid dadpen bunec Nuquin Papan chiaid niactiadquio icpampic.

¹⁶ Adnubien abi catsadaid cabayobitsecquid asno caid matsesbimboec onquiampampic. Ambi chiaidquio chuimequin Nuquin Papan oncamiac: —¿Atotsieshun icsamboen nai? —cac aton icbo icsanuec niduidboedi: —Aucbidi nidnu —quepampic. Adquio muaquido iquec. Piucquid companec bunec Nuquin Papan chiaid niactiadquio iquec.

¹⁷ —Mibi bëdambo icmete chuinu —quequin muaquidon chuisho tantiash: —Ai, mimbhi chiacpadte bunebi —queuidtsiash matses. Uispa dadpen icboedi badiadnuc abu chëshên bëtinacsho isash: —Tanunquien badiadec —queuidac bimboec: —Ambi chiacpadquio bëdambo icnu —queuidtsiash matses. Adec muasho tantiash: —Adquid chian anëdenquiacno nësecaindambi —quendac Nuquin Papa.

¹⁸ Adec muaquido abembi onqueuidequi onquec. Utsin chiaid tantienquio icquin ambi tantiauidi chiech naden. —Mibi bunacpadec mibitsen icsata —cac Esus tantiatsëcquin Nuquin Papan chiaid nauidsëcquimbi abi icsaid ënuuidboedi padpidemboec icsaqueic.

¹⁹ Muaquidon: —Nuqui bunaiduidi nanuna. Adec nuqui bëdambo ictsiac —quequin chuibanec. Adboedi abi icsaid ambembi ëntiapimbo yec icsamboshë iquec. Adec icsami-anquidën chiacpadomboen naic matses icsaquid nendac. Adecbidi ambi naiduidi naic icsaquid matses nendac.

²⁰ Nuqui cuidmenquio icquid Esuquidistu tantiatsëcquin abi icsaid ënuuidboedi padpiden Nuquin Papan chiaid niac-niaquec icsamboshë muaquido yanec.

²¹ Ënden Esus chiondac: —Ai, aid tantiembi —quetsëccondaidi aden Esus tantienquio yanec icsamboshë yansho isun: —“Esus tantiembi,” quenquio icpatecnëdan —caimbi.

²² Adquid chuipanëdash naden. —Ambi ucbudaid opan chequid. Opa nesmi-aqui nidaidën nocoshquec padpidec bëchishoaquid —quepanëdash. Adecbidi Esus tanti-auidtsëcquido icsaid ënuuidboedi muaquid padpidemboec icsadenechitequien iquec.

3

—Esus chote chiaid

¹ Tantia. Ëmbi tantiaido mibi neque. —Pabiate cuembo icquin Nuquin Papan chiaid tantiaquec bëdamboec tabad —quequin mibi chuiquin dada uaondambi. Adomboembidi mibi chuiquin nëid dada uanu.

² Esus chote chuiquin Nuquin Papan isadaidbo tsusedpabo dada uamepampid ¿ada tantie? Adomboembidi nuqui cuidmenquio icquidën Nuquin Icho Esusën chuibanondash. Aidën chiondaid abëd ictened utsin mibi chuinëdash. Aden chiaid tantiata. Aidbidi chuinu.

³ Esus nidaidën padpidec choabi icnuc Esus tantiesabon abi icsate bunaiduidi naquin Esus mamënshunendac.

⁴ —“Utsi uanuec padpidec nidaidën choaindabi,” ¿quenëdaida chopec? Ma choenquio icpayoc. “Nëbi Esus choec,” quedenedi con mëdimbo abitedi unësbudniac. Esus choambobi —quependac Esus tantiesabo. Nadembidi chiendac. —Taëc nidaid yanubi matses nidaidën tabadpampic. Adecbidi aton tsyuecquido tabadpampic. Nëbi adecbidi matses nidaidën tabadec. Ëbi nibëdnuc adiquendac. Utsi uanuec Esus choenquio iquec —quependac Esus tantiesabo.

⁵ ¿Abimboda capec? Aden chuiquin Nuquin Papan chiaid tantienquio iquec. Ëndenquimboshë ambi uaidtedi nibëdnuc: —Ad icta —quequin Nuquin Papan chiac abu yec acte yec nidaid yec quiampampic. Acteuidpambo icboedi nidaid nënantan yampampic. Aden Nuquin Papan abitedi uapampic.

⁶ Aden abitedi uambic yuecquio ictaniash matses icsambo icsho isun ambi chiacpadom-boen ue dapa chomeshun nidaid mabudadmequin aid matses Nuquin Papan uesquin unës uapampic.

⁷ Aden ambi chiacpadomboen Nuquin Papan naindac. Ambi icsambo icquido cuidte ushën abu nidaidbëda nëdëncaindac. Adembidi matses Esus tantiesabo cuidendac.

⁸ Ĕmbi aden chiac: —ĴTedectsiash Esus chopeba? —Ĵquetta ique? Tantia. Mibi chuinu. Ambi tantiacpadĔmbi Nuquin Papan Esus chomendac. Naden Nuquin Papan tantiec. —Dadpen seta icquid iquequi seta abentsĕcbimboecquid nec. Adecbidi seta abentsĕqui icquidquio iquequi dadpen seta icquidbimboecquid nec —quequin Nuquin Papan tantiec.

⁹ —Ĕndenquio: “Padpidec choendabi,” quenĕdaiidi Nuquin Icho Esus choenquien icchitec —quenubien Nuquin Papan: —Chiata. Cuidte bunenquio iquebique. Utsibontsen Esus tantiaashun Ĕmbi chiaid niac-niacboedi ĕnushe. Isbono. Ĕnacsho icsamboshĕ yacno nidmenquio ictsiambi —qeshun Nuquin Papan Esus chomiabi iquec.

¹⁰ Adnubiĕn matses: —Nĕbi choec —quenquio icnuc Esus badedquio choendac. —ĴNĕid ushĕmbi ampequidĕn con na ampec —quequinda tantiapec? Padenquio. Adembidi: —Nĕbi choec —quequin tantienquio icnubi Esus choendac. Choshon acquimboen toncac abitedi nibĕdanendac. Uispa yec inchĕshĕn ushĕ yec badiadĕn ushĕ yec queboedi nibĕdquiecnuc nĕdĕncaindac. Nidaid abichobimbo nĕdĕnquenuc aidĕn icquidtedi nĕdĕnquendac nibĕdquio yec.

¹¹ —Nuquin Icbon nac adquidtedi nĕdĕnquendac —quiash Esus tantiec bĕdamboequien tabadtiad.

¹²⁻¹³ Esus chobon Nuquin Papan cuidquin ambi uaidtedi nĕdĕncaindac. Abu yec uispa yec inchĕshĕn ushĕ yec badiadĕn ushĕ yec queboedi nĕdĕncaindac nibĕdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidĕn bĕdambo icquiduidquio nuqui tabadmendac. Ĕmbi aden chuisho tantiaash: —Ma Nuquin Papan Esus chomenu —quequin utsibo tantiamequin Esusĕn naid chuibanec bĕdamboec tabadnuna.

¹⁴ Ĕmbi tantiaido mibi neque. Tantia. —Choshon abi yacno Esusĕn nuqui tabadmendac —quec chieshtoenquio yec bĕdamboec tabadnuna. Choshon Esusĕn: —Mibi icsambo iquec —cainquio icnuc Nuquin Papan chiaid niaquenquio yec bĕdamboec tabadnuna.

¹⁵ Adec tabadquimbi Ĕmbi chuiboed tantiaashun naden tantia. —“Utsitsen ma Esus tantiaquid yanu. Aden Esus tantiaasho aid cuidenquio ictsiambi,” qeshun Nuquin Papan Nuquin Icho chomiabi iquec —quequin tantiec tabadta. Adembidi mibi chuiquin nuquin buchibimboecquidĕn Pabadon dada uapaccondash. Nuquin Papan tantiamiac bĕdamboen chiaccondash.

¹⁶ Ĕmbi chuiboebidi chuiquin dada uadenepaccondash. —Pabadon dada uaid abentsec abentsec badedquio tantiaidenquio iquec —qeshun utsibon aidĕn chiacpadomboen chienquien icchitosh. Nuquin Papan chiaid niac-niactiadquio icquidon Pabadon chiaidquio tantienquio icquin icsamboen chiosh cashnad-cashnadacbitsĕcquiecnuc. Nuquin Papan chiaidquio nuquin tsusedpabon dada uapampidtsen isbanshun adembidi tantienquio icquin icsamboen chiec. Adquido Nuquin Papan cuidendac.

¹⁷ Ĕmbi tantiaido mibi neque. Tantia. Chuinu. —Abimbo tantienquio icquin Nuquin Papan chiaid niac-niacquidon muauaic —ĕbi qesho tantiaashun: —Esus tantienquio yamane. Muasho tantiatiapimbo iquebi —quequin ĕnenquio icquin Esus tantianuna.

¹⁸ —Abi tantiaquid cuidmenquio icnuec abided cuidadec Esus unĕspondash. Aid tantiaasho Nuquin Papan nuqui bĕdamboen isec —quequin Esus bĕdiactĕc tantiatĕcshun comapenen Esus tantiaquionona. Adshumbic: —Nuquin Icho Esuquidistu bĕdambohĕ iquec —canuna ĕnenquio icquin. Padi. Aidtedi chuiquin dada uaombi.

UANĚN DADA UAIĔĔMPI 1

Nuquin Papabĕd ĕnĕdenquoio yec tabadte chianiaidquoio

¹ Abia Yampidĕnquoio matsesun Esuquidistun chuibansho ĕbĕd icquidobĕdtan tantia-padenembi. Aidi ĕbĕd icquidobĕdtan ispadenembi. Aidi ĕbĕd icquidobĕdtan mishpaden-embi. Aidi Nuquin Papabĕd ĕnĕdenquoio yec tabadte chianiaidquoio nec. Aidquoio chuiquin dada uaid nĕid nendac. Aidquoio tantiaquido icquin bĕdamboen ista.

² Aid, abuc Nuquin Papabĕd ĕnĕdenquoio yec tabadboedi nidaidĕnuĕsh matses icnuec chopanĕdash. Choshon apadquoio yec Nuquin Papabĕd ĕnĕdenquoio yec tabadte ismequin chianiaidquoio ĕbĕd icquidobĕdtan isteneshun chuibanec nebi.

³ Aidi ĕbĕd icquidobĕdtan ispadened adembiĕd ĕbĕd icquidobĕdtan tantiapadened chuibanec nebi ma mibitedishun tantiaash shubu abentsĕquĕn tabadac bimboec ma tabad-panu qeshun. Nuquin Papa tantiaquid icquin aton Madombo Esuquidistu tantiec Nuquin Icbobĕd shubu abentsĕquĕn tabadac padec nuqui bĕdamboec tabadendac.

⁴ Esuquidistu tantiaquidtedi shubu abentsĕquĕn tabadac bimboecquido nec, quequin chuiquin dada uaimbi ma aid tantiaash, Cuishon. Bĕdambo iquebi, quiacpadec ma mibitedi tabadpanueshun.

Nuquin Papa Bĕdamboquid Abentsĕcquiobi nec quiaid

⁵ Esuquidistun Nuquin Papa chuibansho nuqui tantiondacadomboen chuioaimbique. Tantiata. Nuquin Papa Bĕdamboquid Abentsĕcquiobi nec. Icsapenquiocquid aidi nec.

⁶ Adquid icnuc, Nuquin Papan shubun icquid nebi, queboedi ambi chiaid niacquin abipenquoio chuquid nuqui nendac.

⁷ Nuquin Papan chiacadomboen nabanquidquoio iquec abi tantiaquid utsibobĕd shubu abentsĕquĕn tabadac bimboecquid nuqui nendac. Adquid nuqui icmenuc nuqui ic-said bedshunash abided cuidadec Nuquin Papan Mado Esuquidistu unĕspondash. Aid unĕsnĕdaidĕnquoio nuqui icsaidtedi paubantequid nendac.

⁸ Icsaisa nebi, quequi mua uadquin abipenquoio chuquid nendac.

⁹ Icsaobique. Ĕbi pauc, Papa, qesho tantiaashun, Con mado unĕso isun abi tantiaquid icsaid bĕpiscudnu, quequin ambi chiacadomboen niaquenquiocquin Nuquin Papan nuqui paucoaindac. Naden Nuquin Papan naindac: Matses icsaid ĕmbi paucaid padpiden tantiamenu, quenquiocquin icsaidsa nuqui icmendac.

¹⁰ "Matses icsaidsa nibĕdquiec", quequin Nuquin Papan dada uamiampid icnubi, Icsaisa nebi, quequin chiec, Muaquid Nuquin Papa nec, quiac bimboec adquid onquepec. Aden chuquid Nuquin Papan pausuntemaid nendac. Adquid Esuquidistu tantiesa nec.

2

¹ Ma iclainquoio icnu qeshun con nabo quequin adembi mimbi iste dada uaimbique. Isec onqueta. Icsaobi, quiaash cuenenda. Abi tantiaquid icsasho isun Esuquidistun Nuquin Papa chiendac. Ĕbi tantiaquid paucoata, quequin Nuquin Papan chiaid niaquesa icquin aton Madonquoio Esuquidistun nuqui icsasho aden chiendac.

² Aidi matsestedi icsaid bedshunash abided cuidadec unĕspondash.

³ Ambi chiacadomboen nabanquin Esuquidistu tantiaquid nebi, qeshun nuqui tantierendac.

⁴ Esuquidistu tantiaquid nebi, qeshun Icbon chiacadomboen nainquiocquin abipen-quoio chiendac adquidĕn.

⁵ Ambi chiacadomboen nabansho isun abi tantiamiantequid Nuquin Papan nua pausunendac. Aden pausunaidĕn. Aidbĕd icquid nebi, quequin nuqui tantierendac.

⁶ Aden pausunac Nuquin Papan Madonquoio bĕdamboec tabadquin nabanacadomboen naimbi, quec nidaidĕn bĕdamboec tabad.

⁷ Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi.

⁸ Mimbi tauamboen tantiondaid Esuquidistun, Naden nata, quequin chiaid chuca nendac. Nidaidĕn capuquin utsi tantiaquin nabanquin Esuquidistun ismiondashi. Adem-bidi Esuquidistupadquiocquin utsin ismiac mibi Esuquidistu tantiesa icboedi nĕbi abi-padquiocquin utsi tantiaquin nabante mimbitsen ismiac Esuquidistu tantiaquid utsi dadpen yanendac. Aidobidi aidĕn pausunac tantiananec tabadquin nabanec nec. Chieshĕmĕnquid icboedi aidĕn pausunac tantianquidquoio yanec.

⁹ Esuquidistu tantiaquid nebi, qeshun abi tantiaquid utsi chieshĕnec Nuquin Papan tantiacpadomboen pausunacmaid adquid nec.

¹⁰ Esuquidistu tantiaquid utsi con utsiho nec, quequin tantianquidien Ichoh pausunaid nendac. Adquid icsate bunenquio yec bédamboec tabadquin ismequid nendac.

¹¹ Esuquidistu tantiaquid utsi chieshënquid Nuquin Ichoh pausunacmaid nec. Inchëshquio icnuc capuacimboecquid adquid nec. Mayan icsan yua icquin ambi natiadquio yaid tantiesa nec.

¹²⁻¹⁴ Esuquidistu tantiaquid icsho Nuquin Papan cuidenquiocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ëmbi con nabo caidtedi chuiquin dada uaid nëid nec. Abia Yampidënquio Esuquidistun chiac abi tantiaquido utsi-utsiec dadpen yanondash. Adquido chuiquin tsusiobo quequin ëmbi dada uaid nëid nec. Ëmbi tsusiobo caid ambia tantiaquidën ismiac caniabobimboecquin comapenen tantiaquin tantesa uainquiocquido utsi-utsiec iquec. Aden comapenen tantiec mayan icsan yua icboedi nëbi Nuquin Papan chiaid tantiabentsëcquido yanash nëbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ëmbi caniabo caidtedi ëmbi chuiquin dada uaid nëid nec. Ëmbi dada uaid mibitedishun tantiatequidquio neque. Isec onqueta.

Icsate bunesa icta, quequin chiaid

¹⁵ Mayan icsan yuadenda. Icsate bunesa icta. Mayan icsa bunquid Nuquin Papanpadquiocte bunesa nec.

¹⁶ Abia Yampidquio Nuquin Papa nec. Adquidpenquio mayan icsa nec. Aid Nuquin Papa chieshënquid nec. Adquid icquin Nuquin Papan chiaid mua uaqin chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ëmbitsen nanu quequin adoata. Dadpen bednu quequin utsi dëniacneshun adota. Adec icsamane quenquiocnoc mayan icsan Nuquin Papan chiaid matses chieshëmec.

¹⁷ Mayan icsan tantiaid ënëndendac. Aidën tantiacpadomboen tantiaquid icbobëd Nuquin Papa yacno tabadiapimbo iquec. Nuquin Papan chiacpadomboen naquidien ënëndenquio yec Icbobëd tabadendac.

Esuquidistu chieshënquid dadpen choendac, quequin chiaid

¹⁸ Adembi chiembique. Ëmbi con nabo caidon tantiata. Nëbi nëid nidaid naimbudec. Adecbidi Esuquidistu chieshënquid dadpen choendac, quequin chiondacadpadquiec ënden cho-choac. Dadpen cho-choacsho isun, Nëbi nëid nidaid naimbudendac, quequin nuqui tantiendac.

¹⁹ Esuquidistu chieshënquid nuquibëd iccuededboedi ënden nidanepac. Nuquin Papan shubu abentsëquën tabadacadpadpenquiocquid Esuquidistu chieshënquid iquec nidaniac. Nidaniascho isun, Esuquidistu tantiesa iquec nuquibëd shubu abentsëquën tabadacadpadpenquio icquido niosh, quequin nuqui tantiendac.

²⁰ Esuquidistu chieshënesa mibi nendac. Nuquin Papan aton Mayan meniac abimbo chiaid tantiaquid mibi nendac.

²¹ Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesa mibi icsho chuiquin dada uainquio ictsiambi. Abimbo chuiquid muatiapimbocquid nec, quequin mimbi tantiendac.

²² ¿Tsutsi muaquid nepec? ¿quepecta mibi ique? Nuquin Papan Madombo nidaidënshun chidon tishac matsesash aton Papan chuimiadquio nec, quesa muaquid nendac. Adquid Esuquidistu chieshënquid nendac. Abentsëcquidquibi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic.

²³ Nuquin Papan Madombo Esuquidistu nec, quesa Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

²⁴ Tauamboen chiampid tantiadonec tantesa uainquiocquid yanta. Mimbi tauaquin tantiadoniaid tantesa uainquio yec Nuquin Papan Mado Esuquidistubëd shubu abentsëquën tabadacimboecquido mibi iqwendac.

²⁵ Èbëd shubu abentsëquën nidaidën tabadacimboecquido ëbëd abuc ënëndenquio yec tabadte iqwendac, quequin Esuquidistun chiaid nendac.

²⁶ Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata.

²⁷ Nuquin Icho Esuquidistun tantiamiaid icquin utsi uain chuisho tantiesa icta. Esuquidistun ambi tantiaid pausunac ambi chiaid tantiaquidquio mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquio

nebi. Esuquidistun abimbo chiaid tantiaash bédambo iquebi, mibi quendac. Aden Esuquidistun tantiamiaidquio yec abéd cuëshêdesa icnuec adequi tabadta.

Nuquin Papan chiaid tantiaquid ambi bacuë icmiaid

²⁸ Adembidi con nabo quequin mibi chuioaimbique. Adembi tantia. Esuquidistun chiaid tantidonequieci tabadteneta. Adec tabadquin Esuquidistu choasho isash cuenenquio yec, Èbi, ambi paucaid, bednuec choec, quependac mibi. Abëdi nidebi, quequin caindonec tabadta.

²⁹ Nuquin Papa bédambocquid nec, quequin tantiaquin nuqui Nuquin Papan chiacpadomboen naquin, Ambi con bacuë caidquio nebi, quequin nuqui tantiendac.

3

¹ Matses tantiaquin naquidquio Nuquin Papa nec. Ma ëmbi unësquioocquin comapenen tantiaido ëbëdi tabadpanuëshun con bacuëbo caimbi, quequin Nuquin Papan icsaisanquio tantiapampic. Aden chiampid abimbo iquec. Ambi con bacuë caido nuqui nec. Ambi con bacuë caidpenquio Nuquin Papa tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido.

² Nuquin Papan comapenen tantiaido mibi nec. Adquid icsho adembi mibi chuinu. Tantiata. Nëbi Nuquin Papan con bacuë caido nuqui nec. Aden ambi con bacuë caid icsho, Nadquidquio mibi icmendambi, ¿ada Nuquin Papa capec? Padenquio. Esuquidistupadquioocquin nabanquid Nuquin Papan nuqui icmec, quequin nuqui tantiadonetquidquio nendac. Esuquidistu nuqui bedec chosho isash, Nëbi aidpadquidquio Nuquin Papan nuqui icmendac, quequin tantiembi, nuqui quendac.

³ Aid choabicnuc, Abipadquid iquendabi, quequin caindonequido nëbi Esuquidistu icsainquio yec tabadacpadquieci tabadte bunquid nuqui nendac.

⁴ Nuquin Papan nadec bédamboec tabadta, quequin chiaid niacquid abibi icsaquid nendac.

⁵ Adnubien, Esuquidistu abuc tabadboedi nidaidëshun chidon tishac matsesun nuqui icsaid bedshunash abided cuidadec unëspanëdash, quequin nuqui tantiendac. Icsapenquioocquid Esuquidistu nec.

⁶ Ichopadquidquio icnu quiaish Esuquidistubëd tabadac bimboecquid icsadenesa nec. Icsadenequid, Nuquin Papan Esuquidistu tantiamiooshi, quetiapimbo iquec. Esuquidistu tantiesa adquio iquec.

⁷ Con nabo, tantesa uamane qeshun muaquin chuibanaid tantiesa icta. Esuquidistu bédamboec tabadacpadquieci tabadquid icsaisa nec.

⁸ Abia icsadenequid mayan icsa nec. Aidën yua adquiecbidi icsadenendac. Mayan icsan yua matses icsho isash Nuquin Papan chiaid tantiaquidquio iquec Esuquidistu nidaidën choash matses icsaid bedshunash abided cuidadec unëspanëdash ma abi tantiaquid yec mayan icsan yua icboedi aidën yuadtiapimbo yampanuna.

⁹ Nuquin Papan con bacuë caido icsadenesa nec. Ambi con bacuë caido Nuquin Papapadquidquio yec icsadenetiapimbocquid nendac.

¹⁰ Mayan icsan yua Nuquin Papan chiacpadomboen naisa nec. Utsi tantiesa adquid nec. Nuquin Papan chiacpadomboen naquid Icbon bacuë nec. Icbon bacuë yec utsi tantiaquidquio nendac.

Esuquidistu tantiaquido tantiananaid

¹¹ Esuquidistu tantiaquid utsibo tantiaquiota, quequin chiaid nuqui abia tantiondaid nendac.

¹² Aton utsimbo chieshënquid Cain icpampidpadquid iquenda. Mayan icsan yua icquin aton utsi cuesunepampic. Aden cuesunaidën aton utsi Abedën abi tantiaquin nadenesho Nuquin Papan aid bédamboen isnubi Cainën ambibi tantiacpaden nadenesho Nuquin Papan bédamboen istiapimbo icpampic. Aden isac Cainën aton utsimbo Abed chieshënquid cuesunepampic.

¹³ Cainën aton utsimbo chieshënacpadomboen Nuquin Papa tantiesan Nuquin Papan con bacuë caidtedi chieshënoaic. Nuquin Papa tantiesan mibi chieshënsho isash, ¿Adquidshenda mibi nepec? quenda. Nuquin Papan chiaid tantiesabimboec adenda.

¹⁴ Esuquidistu tantiaquid tantienquioocboedi Esuquidistu tantiaquid yanash abi tantiaquid utsibo tantiaquidquio nuqui nendac. Aden abi tantiaquid utsibo tantiaquid icquin, Nuquin Papabëd tabadquid bimboecquid nebi, quequin nuqui tantiendac. Aton utsibo tantiesa cuëshêdac bimboecquid nec.

¹⁵ Aton utsibo chieshënquid, Con utsi cuesunenu, quiac bimboecquid nec. Adquid Nuquin Papabëd tabadtemaid nendac, quequin nuqui tantiendac.

¹⁶ Matses tantiaquin nashunquidquo Esuquidistu icpondash. Nuqui tantiec, ma ëbëd ënëdenquo yec tabadpanu quiash unësmene, quenquo yec nuqui icsaquito icsho cuid-nushe quiash abided cuidadec unëspendash. Abi tantiaquid icquin abi tantiaquid utsibo tantiaquin nashunec unësmene quenquo yec nuqui tabadendac.

¹⁷ ¿Aton nachoquid icnuc Esuquidistu tantiaquid utsin na nibëdquiosho isec, Con utsi menenquo iquemi, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu qesa adquid nec.

¹⁸ Ëmbi con nabo caid, Utsi tantiec bëdamboec tabadquidquo nebi, quec onquequinuidi tantiec tabadenda. Utsi tantiemi, quequin mimbi chiacpadomboen nabanquin ismeta.

¹⁹ Aden mimbi chiacpadomboen nabansho isun Nuquin Papan tantiamiac dacuëdenquo yec Nuquin Papa chuinu quiash abi yacno puduedquidbimboecquin nuqui chuided-chuidedec.

²⁰ Utsien Nuquin Papan chiacpadomboen abentse-abentsen naquid, Nuquin Papa dacuëdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid ëmbi paucaid, ëmbi con bacuë caid mibi nec. Mimbi chuisho tantianuna. Muesa nebique. Dacuëdenquiocquin ëbi chuita, quependac Nuquin Papa adquid caic.

²¹ Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidënquo Nuquin Papa bësquidëmbimboen, Ëbi menepec, quequin dacuëdenquiocquin chianendac.

²² Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bëdamboen isquin menendac.

²³ Naden tantiata, quequin Nuquin Papan chiaid nad iquec: Abëd Abia Yampidquido, Esuquidistu, nidaidënshun chidon tishac matsesaid Nuquin Papan chomiaid aton Madombo nec quequin nuqui tantiaquidquid nendac. Adembi Ësuquidistun chiacpadec abi tantiaquid utsibobëd tantiananendac.

²⁴ Aden ambi chiacpadomboen naquidbëd Nuquin Papa iquec. Adquidquidquo Nuquin Papabëd ictequid nec. Abibimboecquid Nuquin Papan aton Mayan meniac ëbëd tabadquin tantiamiac, Nuquin Papabëd icquid nebi, quequin nuqui tantiendac.

4

¿Nuquin Papan chiaidquiobida chuibanoshe? Isnu, qeshun Nuquin Papan chiaidquio isteneta quiaid

¹ Utsibo, Nuquin Papa chieshënquidën chuimiao dadpen iqueque. Aidën chuimiaoaidën chuisho tantiashun, ¿Nuquin Papan chiaidquiobida chuibanoshe? Isnu qeshun Nuquin Papan chuiquin dada uamiaoquido isteneta. ¿Adquiobida iqueque? Isnu, qeshun isteneta.

² Nuquin Papan pausunaidën naden chiendac: Nidaidënshun chidon tishac matsesaid Nuquin Papan chomiaid aton Madombo nec, quequin chuibanendac.

³ Nuquin Papa chieshënquidën chuimiaoaidën naden chiendac: Nuquin Papan chomiacmaid Esus niondash. Aid aton madopenquo nec, quequin chiendac. Aden chuiquid Esuquidistu chieshënquid nec. “Ëmbi chomiaid chieshënquid choec,” quequin Nuquin Papan chiampid mimbi tantiec. Aden chuiquid ënden dadpen cho-choac.

⁴ Con nabo quequin Nuquin Papan aton Mayan meniac aidënquo tantiamiac Esuquidistu chieshënquidon chuisho, Tantanu, qesa mibi nendac. Nuquin Papan meniaoaidën tantiamiac Nuquin Papan chiaid chiac dëniacacpadquiec mibi chieshënquid cuenendac.

⁵ Esuquidistu chieshënquido Nuquin Papan chiacpadomboen naisa nec. Ambi tantiacpadenuidi chuibanec. Aden chuisho tantiesa Esuquidistu tantiaquid nec.

⁶ Aidën chuisho tantiesa nuqui nec. Nuquin Papan con bacuë caid nuqui nec. Adoac ambi tantiamiacpaden nuqui chuibanosho Nuquin Papa tantiabenguid utsibon tantiendac. Adsho isun Nuquin Papan tantiamiaoaido nec, quequin nuqui tantiendac. Nuquin Papa tantiesain Esuquidistu chuibanosho, Tantanu, qesa iquendac. Adsho isun, Abipenquo chuiquidën yua nec, quequin nuqui tantiendac.

Nuquin Papan ismiac adecbidi tantiananquidquo ma nuquitedi icoapanuna quiaid

⁷ Utsibo, Nuquin Papa tantiaquido adembi mibi chiembique. Adembi tantiata. Nuquin Papan ambia utsi tantiaquin nabanquin ismiac adecbidi nuqui abi tantiaquidobëd tantiananquin ma nabanoapanuna. Utsi tantiaquidquo Nuquin Papan bacuë nendac. Adquid Nuquin Papa tantiaquidquo nec.

⁸ Utsi tantiaquidquo Nuquin Papa nec. Adquid icnuc utsi tantiesa yec, Nuquin Papa tantiemi, quietiapimbo iquec.

⁹ Matses tantiaquin Nuquin Papan aton Mado Abentsëcquiobi Esuquidistu matsesmiac matses icsaid bedshunash abided cuidadec unëspodash. Adoac abi tantiaquido abëdi ënëdenquo yec tabadendac.

¹⁰ Aden Nuquin Papan matses tantiaquin naid dëniactiapimbo nuqui iquendac. Aidëmbien nuqui tantiabudquin aton Mado Abentsëcquiobi nidaidën chomiac nuqui icsaquido icsho cuidmenquocnoec abided cuidadec unëspodash.

¹¹ Nuquin Papa comapenen tantiaquidquo icquin Nuquin Icbopadquiocquin Esuquidistu tantiaquid utsi tantiaquiotiad.

¹² Nuquin Papa matsesën istiapimbocquid iquec. Abi tantiaquid utsi tantiaquiocsho isash Nuquin Papa nuquibëd tabadec. Aden aton Mayan meniac aidën tantiamiac Nuquin Papapadquiocquin nuqui tantiaquiendac.

¹³ Aton Mayan meniac ambi tantiamiaidquo yec Nuquin Papa ëbëd iquec, nuqui quendac.

¹⁴ Nuquin Papan Madomboen nuqui isaidquo icpadenec. Aden isboshon uquë nësiatiadquido nuqui icscho mënchicquid Nuquin Papan chomiaid chosh, quequin nuqui chian-chianec.

¹⁵ Esuquidistu Nuquin Papan Madombo nec, quequin tantiaquidquo Nuquin Papan pausunquin aton Mayan meniaid nec.

¹⁶ Aden aid meniaid icquin, Ambi tantiaid nebi, quequin nuqui chuidonec.

Nuquin Papan matses tantiapadomboen utsi tantiaquid Icbobëd icquidquo nendac. Adecbidi Ico abëd icquidquo nendac.

¹⁷ Nëid uquë nësecatequid nec; nëid ëbëd icquid nec, quequin Nuquin Papan chuibante ushë chonoc, Abëd icquid nebi, quec dacuëdenquo yec Nuquin Papa tantiaquid aton Madopadquiocquid Nuquin Papa yacno puduedendac.

¹⁸ Nuquin Papan tantiaid dacuëdenquo iquendac. Ambi tantiamiaid dacuëdesa nec. Abi tantiesha, Ëbi icsaquid icscho cuidtsiash, quec dacuëdenquo yec dacuëdec.

¹⁹ Nuquin Papa Ambia Tantiiaquid icquin ismiac tantiananquidombo nuqui nendac.

²⁰ Ëmbi isacmaidquo Nuquin Papa icscho, Aid tantiaquid nebi, quequin Esuquidistu tantiaquid utsi ambi isteniaid chieshënquid iquec muaquid nendac. Ambi isteniaid chieshënquid iquec ambi isacmaidquo Nuquin Papa chieshënquid nendac.

²¹ Nuquin Papan chiaid nad iqueque. Tantiata. Nuquin Papa tantiaquid nebi, quequin Nuquin Papa tantiaquid utsibo tantiatiad.

5

Nuquin Papan Madombo abimbo tantiaquid

¹ Nuquin Papan Madombo aton Papabëd abuc icboedi nidaidën chomiac matsesaid Esuquidistu nec, quequin tantiaquid Nuquin Papan con bacuë caid nendac. Ambi con bacuë caidënquo Nuquin Papa tantiendac. Adembidi Nuquin Papan con bacuë caid utsibo nuqui tantiendac.

² Ambi con bacuë caidën Nuquin Papa tantiaquin ambi chiacpadomboen naquidquo icquin ambi con bacuë caido nuqui tantiendac.

³ Aden tantiaquin Nuquin Papan, Naden nata, cac nabanendac. Ambi, Naden nata, quequin chiaid natiamiantemaid nec.

⁴ Aden Nuquin Papan con bacuë caid icquin ambi chiacpadomboen nabanec tabadquin dëniacacimboen icsamenuequid nuqui cuemendac. Adembidi Abia Yampid nidaidënshun chidon tishac matsesash tabadec aton Papabëd cuëshëdesa Esuquidistu nec, quequin tantiaquid nuqui icnuc icsamenuequid cuenendac.

⁵ Esuquidistu Nuquin Papan Madombo Yampid nec, quequin tantiaquidënquo ismiac icsamenuequid cuenendac. Ai, icsamenuequidën yuadesa Esuquidistu tantiaquidquo nendac.

⁶ Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidënshun chidon tishac matsesash capusho acten mentoacsho: “Ëmbi bëdamboen tantiaidquid mibi nec. Mibi isash bëdambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten dectanac diadec unësec aton Papa chiec: “Ëbi yuedta, Papa,” quiash Esuquidistu unësassho nacsic aton intac chididiquepondash. Adashic, Nuquin Papa abimbo chuiquid-padquidquo icquin aton Mayanën tantiamiac, Esuquidistu Nuquin Papan Madombo nec, quequin tantiaquin chiendac nuqui.

⁷ Nuquin Papa yec aton Mado yec aton Mayan yec quequin abucshun aitedishun abentsëc yacimboecquin Esuquidistu Nuquin Papan nidmiac chosho nidaidënshun tishac matsesaid nec, quequin chuided-chuidedec.

⁸ Adechbidi nidaidënuësh Esuquidistu matsesacsho isun, Nuquin Papan Madombo nec, quequin ismenuec aton Mayan abucüësh budash aidbëd icpondash. Adembidi yuecshun ambi chiapadomboen acten mentomiacsho, Con madombo nec, quequin chuiuoapon-dash. Adembidi yuecshun ambi chiapadec unëso isun, Con madombo nec, quequin inçhëshacimboecnuc icmequin Nuquin Papan nadatiambocquin ismebampondash.

⁹ Aden ismiac isondaidën naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unëso isombi, quequin isondaidën chiec. Aden chuinubi Nuquin Papanquo, Con madombo nec, quequin ambia Esuquidistu chuiquidquo icsho tantiadonetequidquo nuqui nendac.

¹⁰ Adembidi Nuquin Papan Mayanën tantiamiac, Esuquidistu Nuquin Papan Madombo nec, quequin tantiaquin adomboembidi chuiuoapec nuqui. Esuquidistu Nuquin Papan madopenquo nec, quequid, Nuquin Papa muaquid nec, quiacimboen chuiquid nendac.

¹¹ Con Madombo, Esuquidistu nec, quequin Nuquin Papan chiaid tantiaquidquo abi yacno nidash abëdi ënëdenquo yec tabadendac. Matses icsaid bedshunash abided cuidadec aton Mado unëspanëdash, quequin tantiaquid Nuquin Papa yacno tabadtequid nuqui nendac.

¹² Esuquidistu tantiaquid ënëdenquo yec Nuquin Papa yacno tabadendac. Aid tantiesa aidbëd tabadtiapimbo iquendac.

Ma tantiaquidquo mibi icpanuequin chiaid

¹³ Nuquin Papan Madombo Esuquidistu nec, quequin tantiaquid, Icbobëd ënëdenquo yec tabadtequid nendac, quequin ma tantiaquidquo mibi icpanuequin mibi chuiquin dada uaimbi.

¹⁴ Adec abëd ictequid icquin ambi tantiamiacpaden chuisho, Nuquin Papan tantiec, quequin nuqui tantiendac.

¹⁵ Abitedi tantiaquidquo icquin ambi tantiacpadomboen tantiamiac nuqui chuisho Nuquin Papan menendac.

¹⁶ Esuquidistu tantiaquid nebi, queboedi icsasho isun, Cuëshëdnushe qeshun aid bëdamboen tabadme, Papa, quequin chiapaden Nuquin Papan naindac. Utsien, Esuquidistu tantiaquid nebi, queboedi, Icsaquionona, quiapadec tabadsho isun, Cuëshëdnushe qeshun aid bëdamboen tabadme, Papa, cainda. Nuquin Papan chiaid tantiate bunesa aid nec.

¹⁷ Nuquin Papan chiaid niaquec icsaic. Padnuen, Nuquin Papan bacuë nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiashun Nuquin Papan padpiden paucoaindac. Aid cuëshëdenquo yec Nuquin Papabëd tabadendac.

¹⁸ Nuquin Papan con bacuë caid iquec icsadenesa nec, quequin nuqui tantiendac. Nuquin Papan chiaid niacmane quiash icsate bunesa nebi, quiacpaden nanuesho tantiamequin pausunendac. Adoac Nuquin Papa chieshënnquidën adquido yuadtiapimbo iquendac.

¹⁹ Esuquidistu tantiec Nuquin Papan con bacuë caid nebi, quequin nuqui tantiec. Adesa Nuquin Papa chieshënnquidën yua nec, quequin nuqui tantiec.

²⁰ Nuquin Papan Madombo abuc abëd icboedëmbi nidaidënsun Nuquin Papa chuiban-quin tantiamiac. Aidën aton Mayan abi tantiaquid meniac, Nuquin Papa Abentsëcquiobi iquec, quequin nuqui tantiendac. Aidbëdquiocquid nuqui nendac. Aton Madombo aton Papabimboecquid nec. Aid tantiec aidbëd ënëdenquo yec nuqui tabadendac, quequin nuqui tantiendac.

²¹ Con nabo, Nuquin Papabëdtactsëqui aton Madombo Esuquidistu tantiaquid icta. Utsin nacnenaid ismequin, Nuquin Papa neque. Nëid tantiaquiota, cac tantienda. Esuquidistu nebi, qesho adembidi tantienda.

Nëbi padi. Aidted chiombi.

UANĒN DADA UAIDĒMPI 2

Nuquin Papan chiaid abimbo iquec, quequid tantiaid

¹ Ēmbia Esuquidistu tantiondaidquio Uan nebi. Nĕid chido Esuquidistu tantiaquid nendac, quequin Nuquin Papan tantiacpadquiec icquin mibĕd Nuquin Papan chiaid tantiec iccuededquidobĕdta mibi chuiquin dada uaimbique. Isec onqueta. Nuquin Papan chiaid abimbo iquec, quiosh, quequin mibi utsin chuisho tantiash mibitedi tantiec tsadebi. ĴĒbentsĕquidabi mibitedi tantiec tsadpe? Padenquio. Aden chuisho tantiash utsibotsen adecbidi mibi tantiec tabadoaic.

² Nuquin Papan chiaid abimbo iquec, quequin ĕnenquiocquin nuqui tantiendac.

³ Uquĕ nĕsiatiadquido nuqui icsho isash abĕdi ĕnĕdenquio yec nuqui tabadmenuec nuqui icsaid bedshunash abided cuidadec Esuquidistu unĕspondash. Adembidi ambi chiaid tantiaquido utsibobĕdta bĕdamboen tabadmiaido nuqui nendac. Nuquin Papabĕdtan aton Mado Esuquidistun adquid icmiac, Ambi chiaid abimbo iquec, quequin tantiec utsibobĕd tantiananquidquio nuqui nendac.

⁴ Mimbi chiac utsi-utsiec Nuquin Papan chiacpadomboen nabanec tabadsho isash bĕdambo iquebi.

⁵ Naden nata, quequin chiaid utsipenquio nĕid dada uaid nendac. Esuquidistu tanti-aquidtedi nuquibi tantiananuna.

⁶ Esuquidistu tantiaquid utsibĕd tantiananquin Nuquin Papan chiacpadomboen nabanquido nendac. “Ēbi tantiaquidtedi tantiananta,” quequin Nuquin Papan champid mimbi tauamboen tantiondaid nendac. Mimbi tantiacpadquiec ma tabadpanuna.

Muaquin chuiquid

⁷ Muaquin chuiquid dadpen capueque. Adquidĕn chiaid tantiesa icta. Esus Nuquin Papan chomiacmaid matsesquio niosh, quequin adquidĕn chiendac. Adquid muaquin chuibanec Esuquidistu chieshĕnquid nec.

⁸ Adquidĕn chuisho tantiamane queshun chieshenquiocquin Esuquidistu tantiaquiota. Nuquin Papa yacno nidshun ambi meniaidtedi bedembi, queshun Icbon chiacpadomboen nadeneta.

⁹ Esuquidistu Nuquin Papan Madombo nec, quequin tantiembi, queboedĕmbi, Ambi chiaid tantianu, quenquiocquin tantesa uatsĕcquid nendac. Adquid Nuquin Papabĕd tabadac bimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobĕd tabadac bimboec tabadendac.

¹⁰ Esuquidistu Nuquin Papan Madombo nec, quequin chiesa chosho isun yuedenda. Adembidi, Bĕdambo icta, quequin adquid chienda.

¹¹ Adquid yuedquid ambi yuedaidbĕdtan muaquin chuiquin ismequid nendac.

Ēnquin chiaid

¹² Dadpen dada uatiadquio icquimbi mibi yacno nidtiadquio icquin daĕdpactsĕc dada uaombi. Mibi yacno nidash mibĕdi onquebi.

¹³ Mibitedi tantiec tsadebi, quequin chuita quiosh ĕbĕd Nuquin Papan chiaid tantiec iccuededquido. Adembidi dada uaimbi.

Padi. Aidtedi dada uaombi.

UANËN DADA UAIDËMPI 3

Cayon naid chuiquin utsibon chiaid

¹ Ëmbia Esuquidistun tantiondaidquo Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

² Mimbi Nuquin Papan chiaid tantiacpadquiec min nami bëdambo icpashun. Adembbidi Nuquin Papan chiapadec tabadquin ismiac ma utsibobëd bëdamboec tabadpanuna.

³ Mibëd icquidon nëmbo choshon naden chioshi. Esuquidistun chiapadomboen nabanec tabadquid Cayo nec, quequin chuibanoshi. Aden chiaid tantiabosh, Bëdambo iquebi, quec tsadebi.

⁴ Mimbi chuibanac Esuquidistu tantiaquin muainquiocquin utsibon chuioaic, quequin chuisho tantiaash bëdambo iquebi, quec tsadebi. Ëmbi con mado caidën bëdamboen naid chuisho tantiaash bëdambo iquebi.

⁵ Mimbi yuedaidon naden chioshi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembbidi yuedshun aido Cayon nashunec, quequin chioshi.

⁶ Mimbi yuedshun nashunaid utsi-utsiec nëmbo choshon mimbi abi tantiaquin nashunaid nëmbocquido Esuquidistu tantiec iccuededquidobëdta chuibanoshi. Bëdamboen mimbi naic. Adembbidi nabanquin adquid mibëdi tabadash, Nidnu, qesho meneta ma buaneshun. Aido Nuquin Papan con bacuë caido ambi chuimaidquio nec.

⁷ Aido isadaidpemo chuinec nidshun adquid yacno choshon Esuquidistu tantiesa nec quec ëbi yued quetiapimbo iquebi quec Esuquidistu tantiaquid mibi icsho isash, Èbipadquid nec, quiash mibi yacno puduedendac.

⁸ Esuquidistun chiaid tantiaquid icquin Esuquidistu tantiaquid ambi chuimaido yuedtiad. Adoquin aidobëdtambi Esuquidistun nacpadomboen ismendac.

Diotedepesën icsamboen naid

⁹ Mibëd iccuededquido aden chuiquin dada uaondambi. Aden ëmbi dada uaid bedash: “Èmbentsëqui namembi,” quec Diotedepes chieshondash. Aidi ëbëd icquidon chiaid tantiate bunesa nec.

¹⁰ Mibi yacno choshon Diotedepesën muaquin chiaid mibëd iccuededquido chiendambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantiaash: “Padi. Yuedenda,” quec yuedmianesa Diotedepes nec. Adembbidi, Yuedmenu, quequido cuëshëdmequid aidi nec.

Demetedio caid bëdamboquid nec, quequin chiaid

¹¹ Aidën nacpadec icsainda, caimbi mibi. Nuquin Papan Icsaisanquo chiapadomboen naquid aidën con bacuë caid nec. Icsaquidën nacpadomboen naquid Nuquin Papan chiaid tantienquo yec tabadquid nendac.

¹² Utsien Demetedio caid bëdamboquid nec, quequin utsibon chiec. Abimbo chiec. Aidi Nuquin Papan chiapadomboen nabanec tabadquidquio nec, quequin ëbëd icquidobëdtan chuioaimbi. Uanën chiaid abimbo iquec, quequin mibitedishun tantiendac.

Ënquin chiaid

¹³ Dadpen dada uatiadquiocquimbi daëdpactsëc dada uaombi.

¹⁴ Daëdec ushtanquin mimbi ispashuni. Mibi yacno nidash mibëdi onquendabi.

¹⁵ Esuquidistun chiaid tantiaquid utsibëd bëdamboec ma mibi tabadpanuna. “Mibi tantiec tsadebi, Cayo, quequin dada uata”, Esuquidistu tantiaquid utsibon nëmbocquidon chiac adembbidi chuioquin dada uaombi. Esuquidistun chiaid tantiaquid anocquido adembbidi chuibanooata.

Padi. Aided dada uaombi.

UDASËN DADA UAID

Tauamboen chiaid

¹ Santiacon utsi Udas nebi. Esuquidistun yuambo nebi. Esus tantiaquidon mimbi iste dada uanu. Mibi tantiaquioquin Nuquin Papan mibi Esus tantiamiac. Adoac aid tantiasho isash: —Ëbi tantienquoio yanushe —quiash Esus mibi cudasac.

² —Aido bédamboen isquin bédambo icme, Papa —quequin Nuquin Papa chianembi mibi tantiaquin.

Muaquido iquendac, quequin chiaid

³ Ëmbi tantiaido mibi neque. Tantia. Nuqui cuidmenquoio icnuec Esus abided cuidadec unésaid tantiateuidi mibi chuitiadquoio iccobi. Adnuc: —Esus tantiaquido iccuededacno muaquido puduedosh —quesho tantiaboshon aid mibi chuinu. Mibi yacnoshon ambenquiobi chuisho: —Mua. Esusën chiaidpenquoio mimbi chiec. Aid tantiatipimbo iquebi —cata. Nuquin Papan tantiapadomboen Esusën abéd icquido chuibanédaid nuqui tantiaid neque. Utsi tantienda.

⁴ Esus tantiaquido mimbi danubi mibi icsamenuc mibi yacno muaquido puduedac caosh. Ambí êdenquoio tantiapadomboen Nuquin Papan icsano nidmetequido aido neque. Muasho tantienda. —Nuquin Papan bédamboen isaido icsauidequi icsho nuqui cuidtipimbo iquec. Chido chishpidambo yec dada cuididimbo yec quec ícsashobi nuqui bédamboen isec —quec comapenec muaique. Muasho tantienda. Esuquidistu Nuquin Icho abentsêcshun chiaid niac-niaquec icsaique.

⁵ Adquid Nuquin Papan comapenen cuidendac. Tantia. Nuquin Papan cuidampid mimbi tantianédaid mibi chuinu. Equipito yacnoshon unésmenuen ancanquidên icsamboen chonoa uasho isun ashunquoio Nuquin Papan con matses isadaidbo tsusedpabo puduamepampic. Adoac yuectanquin puduamiaiombi ambi chiaid niac-niacsho isun Nuquin Papan uesquin unês uapampic.

⁶ Adembidi utsibotsen cuidpampic. Abéd icpampido ambi abi yacnoshon uaido mayan chedo abédtan namequido icboedobi Nuquin Papan chiaid niac-niacce buncuenash Nuquin Papabéd icte bunenquoio yampampic. Adec Satanas chedo abéd icte bunenquoio icsho isun puduentiapimbo yacno icsamboshê yacno Nuquin Papan nidmepampic. —¿Ada mibi bédambo icti? Mibi icsamboshê iqueque. Mibi cuidnu —quetequid ushên padpiden uesquin cuidnumbi adopampic.

⁷ Adembidi shubu dadpen yacnocquido cuidpampic. Shubu dadpen icquid Sodoma caid yacnoshon dadan aton chidopenquoio chudnubi adembidi chidon aton bënëpenquoio chudmepampic. Dada aton dada utsibédi chichudnanquidquoio icpampic. Shubu dadpen icquid Comoda caid yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nêdêncapampic nibêdquiecnuc. Aido cuidampid tantiaquin: —Adembidi icsamboec tabadquido abitedi cuidquin Nuquin Papan chian anêdênquiacno nêsecaindac —quequin nuqui tantiec.

Muaquido icsaid

⁸ Cuidte tantienquoio yec adecbidi muaquido icsamboecuidi tabadec. Aton dada utsibédi chichudnanquido nec. Abi chuiquid dapabon chiaid niac-niacquin Nuquin Papan chiaid niac-niacquin caindac. Adembidi Nuquin Papan abi yacnoshon uaido mayan bédabo caic: —¿Nadatiambo icquidta nedic? —quequin muauaic.

⁹ Mayan bédabo chuiquid dapa Miqued caidên adotiapimbo icpampic. Aidi Moises unêsacsho isash: —Chococanu —quesho podobitsi icsabon icbon Satanasën: —Ëmbiquen bednu —catuidpampic. Adoac: —Icsano nidta —cainquoio icpampic Miquedên. Adenquoio icquin: —Nuquin Papambien mibi cuidec —capampic Miqued caidên mayan bédabo namequid dapa icquin.

¹⁰ Muaquidombien ambi tantienquoio yaid icsamboen chuishunec. ¿Ada bédi cuidnushe quepadic? Adembidi abi cuidte tantienquoio icquin ambi tantiaiduidi naic tabadsho Nuquin Papan cuidendac.

¹¹ Cain caidbimboecquid muaquido nec. Nuquin Papan chiaid niac-niacquin abi bunaid naiqui icsaic. Badan caidên piucquid bednuen Nuquin Papan chiaid niactiadquoio yampampic. Adembidi piucquid bednuen muaquidon ambenquiobi chiec. Code caidên abi chuiquid dapan chiaid niac-niacpampic. Adembidi abi chuiquid dapan chiaid muaquidon niac-niaquec. Adsho Nuquin Papan comapenen cuidendac.

¹² Muaquido icsambo iquec. Mibi icsametiadquien icchitec. Esus tantiaquidon pebedacno puduedshun mibëdtambi muaquidon piac caosh. —Esus tantiaquidquio nebi —quiash puduedash dacuëdenquio yec icsaiqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuiadic? Padenquio. Ambi naiduidi naquin ambembi chiaid chiac matses nadquio iquec. Uispa dadpen icboedi badiadnuc abu chëshën bëtinacsho isash: —Tanunquien badiadec —queuidachimboec matses iquec. Pete ambi nitsinaid unësacsho istuidash: —Pete nitsinuidombi —quiacimboec muaquidon chuisho tantiaquido: —Bëdamboen chiaid tantianu —queuidendac.

¹³ Acte tēccuasquequidën cuëmano nushan uaquin icsa uacimboen icsaquin muaquidon mibitsen icsamec. Abi capuaid tantienquio yequi: —Ëbi capuaid tantiaquidquio nebieque. Isec cho —queboedi bēnudtaniacimboen: —Nuquin Papan chiaid tantiamequidquio nebi —queboedēmbi tantiamenquio iquec. Adec muasho cuidquin Nuquin Papan puduentipimbo yacno icsamboshë yacno nidmendac.

¹⁴ Adquido con tsusedpa Enoc caidën chuiampic. Abia matses uaid Adanën madon baban tishmiaidën baba Enoc nepampic. Naden chuiampic. “Nuquin Papan abi yacnoshon uaid mayan bëdabo dadpenquioshë Nuquin Icbobëd choendac.

¹⁵ ‘¿Ada mibi bëdambo icti? Icsambo icquid yec mibi icsauidequi iccoc. Mibi cuidnu,’ quequin matses icsambo icquido cuidnuec Nuquin Icho choendac. Nuquin Papa icsamboen chuishunquinc Nuquin Papan chiaid niac-niacquinc caquido cuidnuec choendac,” quepampic Enoc Esus matses cuidnuec chote chiec.

¹⁶ Aidën cuidtequido muaquido abi chuiquid dapabon chiaid cacuidec: —Icsambo iquec. Adtiapibi —quec chieshëmë nec tabadec. Abi bunacpadecuidi icsaquie. —Ëmbentsëqui bëdamboen naic —queuidequi iquec. —Ëmbi tantiacpadomboen ma nanu —quiash matses chiec: —Ëmbi tantiaidquio mibi nec —quec muaic.

Esus tantiaquionona, quiaid

¹⁷ Ëmbi tantiaido mibi neque. Tanta. Esusbëd iccondaidon chiaid mibi chuinu.

¹⁸ Nadpondash. “Esus padpidec choabi icnuc Nuquin Papan chiacpadec bëdamboec tabadsho Esus tantiesabon mamëshunendac. Nuquin Papan chiaid niac-niaquec abi bunacpadec icsaquiendac,” quepondash.

¹⁹ Adquio muaquido iquec. Aton padi yec icsaiqui chieshëmënquin mibi cuësh-cuëshëdmec. Nuquin Papan aton Mayan aidobëd tabadmenquio iquec.

²⁰ Adquid icsacpadec icsainquio icquin Esus tantiatsëcboedēmbi Nuquin Papan chiaid isban-isbanquin ënenquio icquin Esusbëdta Nuquin Papa tantianuna. Nuquin Papan Mayanën tantiamiacpadomboen Nuquin Papa chianenuna.

²¹ —Abi tantiasho bëdamboen isquin abi yacno Esusën nuqui tabadmendac —qeshun Esus chosho isnuen cainquin aidbëdta Nuquin Papa tantianuna. —Nuquin Papan ëbi tantiec —quequin ambi chiacpadomboen utsibo tantianuna.

²² Adshumbic Nuquin Papan chiaid tantiatsëcquido bëdamboen isnuna. Adquidon muaquidon chuisho tantias: —¿Abimbobida capeba? —qesho tantiasshun nëishenquio icquin Nuquin Papan chiaidquio tantiamenuna.

²³ Bacuëmpi cuëten pichiquetsensho: —Baded bed. Taidnushe —quiacimboen —Icsano nidmequin Nuquin Papan cuidnushe —qeshun utsibo Esus tantiamenuna. Icsaquidotsen bëdamboen isnuna. Esus tantiamenuen aido bëdamboen isec: —Ëbitsen icsamane —quiash aido icsacpadec icsainda.

²⁴ Nuquin Papa bëdamboeshë iquec. Aid tantiasho nuqui icsamenquio iquendac. Adshumbic: —Icsambo mibi iquec —utsibo quetiapimbo icnuc bëdambo icmeshun bëdamboeshë yacno abëdi nuqui tabadmendac. Adoac nuqui cuishonquendac.

²⁵ Aden tantiaquin naddonona. —Abipadquid utsi nibëdnuc abentsëcquiobi Nuquin Papa iquec. Nuquin Icho Esused cuidshun abi tantiaquido cuidenquio icquid nec. Abitedishun Icbombo Nuquin Papa nec. Nadatiambo icquin nabanquidquio nec. Abitedi chuiquid dapambo yec abitedi namequidquio nec. Bëdamboeshë iquec —canuna ënenquio icquin. Esus tantiaquido icquin adonona. Padi. Aidedi chuiquin dada uaombi.

ESUSËN UAN ISMIAID

Nëidba chuiquin Uanën dada uaid

¹ Nuquin Papan tantiamiac Esuquidistun ismeboedquio chuibanquin dada uaic nebi. Esusbéd ictenedquio aton yuambo Uan nebi. —“Nuquin Papa aton Mado Esusbédi abitedishun Icho icquin Satanas chedo ambi yuaido matsesbédta cuidquimbi Esus tantiaquido abédi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bédabontsen ismeposhi.

² Adoac Nuquin Papan chiaidbédta Esuquidistun ismeboedquio chuibanquin dada uaic nebi. Abimbo caimbuque. Tanta.

³ Nèid dada uaid tantiash chuibanquido ambi chiaidobédi: —Ambi chiacpadomboen nèbi Esusën nanushe. Chieshtoenquio icquin abi tantiec bédamboec tabadnuna —quias bédamboec tabadsho Nuquin Papan bédambo icmendac.

Esus tantiaquidon iste dada uaid

⁴ Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbédta bédamboen isquin bédambo icmepashun. Adembidi aton Mayanën bédambo icmepashun —quequin mibi tantiembi. Nidaid uabi yec èndenquimboshè icpampidi nèbi adquid yec nibédantiapimbo icquid Nuquin Papambo nec. Aton Mayanën abi bëisec tabadquidëmbi nuquibédtsen icquin Nuquin Papan chiaid nuqui tantiamec.

⁵ Aton Mado Esuquidistu Nuquin Papan bédamboen iste tantiamequidquio nec. Abia aton dada unèstiapimbo icquid icmequin uincuemiadquio nec. Adquid yec abitedishun Icbombo nec. Ambiuidsèqui chuiquid dapa abitedimbo namendac. Aidquio nuqui tantiaquidquio yec nuqui icsaid bedshunuec abided cuidadec unëspondash.

⁶ Abi tantiasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bédamboen ista —quequin Nuquin Papa chianequidquio nuqui nec. Adquido icquin: —Esus bédamboshè iquec. Abitedishun Icbombo nec. Ambi chiacpadomboen abitedishun napashun —canuna ènenquio icquin.

⁷ Aidquio tantianuna. Nèbi chonoshe. Abitedishun Icbombo yec dacuèdampamboec chosho matses abitedishunquio isendac. Con matses ambi unës uaondaidquio chosho istanec: —Padtemboshè. Ashibi cuidpec —quetanec cuidte tantiec dacuèdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac.

⁸ Adnubien Nuquin Papan chioshi. —Èmbi tantiacmaid nibèdec. Abitedi comapenen tantiaquidquio nebi. Nidaid uabi yec ictenedi nebi. Nèbi adquid yec nibédantiapimbo icquidquio nebi. Adquid yec abitedishun Icbombo nebi —queposh Nuquin Papa. Aidquio tantianuna.

Dacuèdampamboecnac Esusën ismiaid

⁹ Esusbéd ictened Uan nebi. Mibédtan Esus tantiaquid yec min utsibimboecquid nebi. Mibi yacpadembidi Esus tantiasho Esus tantiesabon chieshèmpondashi. Adoac Esusën namiacpadec chieshtoenquio iquebi. Chieshtoesa yec Nuquin Papabéd tabadtequido nuqui nec. Esus tantiesabon chieshènquin quènèn nauedacimbomboen cuemenquio icnuen acte dapa nuacquid mad caid nënantan nidaid icquid Pacmos caidèn tsadumpondashi. Adondac Pacmos caidèn abi tsadec nebi.

¹⁰ Dominco ushèn Esus tantiec tsadshobini Nuquin Papan Mayanën tantiameposh. Adoac cacohuèsh shoncate shoncacimbomboec comapenec onquesho tantiapombi. Ushenquio icquimbi ushqin isacimbomboen tantiombi.

¹¹ Naden chuiposhi. —Nèbi mibi dadpen ismenu. Adoac èmbi ismeboedtedi dada uabanta. Nèidtedishun iste dada uata. Nèidic shubu dadpen icquid Epeso caid yacnocquidon. Nèidic shubu dadpen icquid Esmidina caid yacnocquidon. Nèidic shubu dadpen icquid Pedcamo caid yacnocquidon. Nèidic shubu dadpen icquid Tiatida caid yacnocquidon. Nèidic shubu dadpen icquid Sadis caid yacnocquidon. Nèidic shubu dadpen icquid Pidadepia caid yacnocquidon. Nèidic shubu dadpen icquid Daudiseya caid yacnocquidon. Aidedishun iste dada uashun buame —quequin comapenec onquequin chuiposhi.

¹² Comapenec onquesho tantiatanec bidiadquin isquien tabote manitsinaid 7tedi icposh. Shocosh piu nacnenaquidquio neposh.

¹³ Aid nënantanquo Esusquo icposh. Con matses isadaidbo chuiquid dapabimboec dasiuidaccosh. Dashcute ënapen icquid abitiombi datonquiaccosh. Abi shiconquete bëshpiu-bëshpiuctsëcquid nuacquid dapambo icposh.

¹⁴ —Icsaisambo nec —camenuc aton mapi aton manëdaidbëdi abu ushubimboec ushumboshë icposh. —Matsesën naidtedi tantiaquidquo nec —camenuc cuëte isquidbimboec aton ëshë isquid-isquidquo icposh.

¹⁵ —Utsin: “Ëmbiquen abitedi namenu,” catiapimbo icnuc abitedimbo namequid nec —camenuc shocosh piu nacnenaibimboec nac-nacquio aton taë icposh. —Nuquin Papapadquidquo nec —camenuc acte chodoquiacbimboec comapenec onqueposh.

¹⁶ Abiucshun uispa 7tedi sanamposh. Chështe cuënumbo icquid ana shëcuënuësh cueshqueposh. —Matses icsaid cuidquidquo nec —camenuc adposh. Aton bëtantete ushëbimboec bëchamuanquiecposh. —Bëdambo icquidquo nec —camenuc ad icposh.

¹⁷ Dacuëdampamboecsho istanequini Esusën dayumbi uebudpaccoc unësaniciimbimboec padishec. Adshobini Esusën camishquin bëdameposh. —Dacuëdenda. Nuquin Papapadquidquo nebi. Nidaid uabi yec ictenedi nëbi adquid yec nibëdantiapimbo icquidquo nebi. Adquid yec abitedishun Icbombo nebi.

¹⁸ Adquid yequi matsesën unës uaid yec uincuenash padpidec unëstiapimbo icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmen-dambi. Ëbi tantiesaboemi icsaido cuidacno nidmendac —queposh Esus.

¹⁹ Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta.

²⁰ Tanta. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboc ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibancho tantiec iccuededquidobëd iquebi,” quequin tantiaquin tabote manitsinaid 7tedi tabëcarno aid nënantanquo ëbibi iquebi —quequin aden ismeposhi Esusën.

2

Epeso yacnocquido Esusën chiaid

¹ Aden Esusën uispa 7tedi sananquin ismiosi. Tabote 7tedbidi manitsinaid tabëcarno aid nënantanquo abibi icquin ismiosi. —Ëbi tantiaquido chuibanquidën Icho yec ëbi tantiaquidobëd iquebi —quequin aden ismeposhi. Adshumbic naden chuiposhi. —Epeso yacnocquidon ëbi tantiaquidon iste ëmbi naden chuiboed dada uata. “Tanta, Epeso yacnocquido. Mibitedi chuinu.

² Mimbibi naidtedi tantiaquid nebi. Dayacquio icquin ëmbi chiacpadomboen mimbibi dadpen nabanoc. Utsibo chieshtonobi chieshtoenquo icquin mimbibi ëbi tantioc. Ëbi tantiaquido icsamenuen chiec: ‘Esusën namiaidquido yec mibi chinuic chopobi,’ quequin muaquidon chuiho: ‘Mua. Nuquin Papan chiaidpenquo mimbibi chuibanque. Utsibo chienda,’ quequin mimbibi aidon chiaid tantienquo iccoc. Aden mimbibi bëdamboen naoc.

³ Adembidi utsibon chieshënaqui chieshtoenquo icquin Nuquin Papan chiaidbëdta ëmbi naid mimbibi chuibanoc.

⁴ Aden bëdamboen nasho isun mibi icsaid abentsëc chuitsëcnu. Tauamboen mimbibi ëbi tantiaquiopadene. Aden ëbi tantiaquidquo icquin mimbibi utsibotsen tantiaquiopadene. Adodenedëmbi pacuëndacimboc ëbi bëdiactsëc tantiatsëcquin utsibotsen mimbibi bëdiactsëcbidi tantiatsec. Adec mibi icsacuededec.

⁵ Ëmbi chuiboed tantiash: ‘Ai, abimbo caic. Tauamboen Esus tantiaquiondaidi nëbimbibi bëdiactsëc tantiachitec. Adchitequini icsaoc,’ queshun tauamboen mimbibi naondacpadomboen ëbi tantiaquiota. Adembidi utsibotsen tantiaquiota. Adoenquo icschoembi mibi yacnoshon ëmbi chiaid mibi chuibanquid nibëdmendac. Adnuc ëbi tantiec cuëdënuic mibi pudued-puduedenquo ictsiandac.

⁶ Mibi icsaid ënquin chiombi. Nëbi mimbibi naid utsitsen isash bëdambo iccobi. Mibi cuëdënacno puduedshun nicodaitabon mibi icsamenuen icsamboen chuiho tantiaashun: ‘Aido icsamboshë iquec,’ mimbibi caoc. Adembidi aido bëdamboen istiapimbo icoabi.

⁷ Nëbi ëbi tantiaquido utsibo chuinu. Ëmbi Epeso yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiaata. Satanasën: ‘Icsamenu,’ caqui chieshtoenquo icquin ëbi tantiaasho Nuquin Papa yacno ëbëdi tabadmendambi. Tauamboen matses uashun Nuquin Papan aid dada tsadacno tied bëdamboshë yacno tied nënantan icquid cuëte matses unëstiapimbo icquid icmete

icnepampic. Aid cuète bacuë meniachimboecnuc mibi padpidec unësenquo icnuc ëbëdi tabadmendambi,” quequin ëmbi chuiboed dada uata –quequin Esusèn chuiposhi.

Esmidina yacnocquido Esusèn chiaid

⁸ Adshumbic Esusèn padpiden chuioaposhi. Aid nidaid uabi yec icpampidi nëbi adquid yec nibëdantiapimbo icquid nec. Adquid yec abitedishun Icbombo icshobi chieshëmënnquidon unës uacso chococaqui uincuempaccondash. Adondaid yec unësaid uincuemquidquo nec. Aidën naden chuiposhi. –Esmidina yacnocquidon ëbi tantiaquidon iste ëmbi naden chuiboed dada uata. “Tantia, Esmidina yacnocquido. Mibitedi chuinu.

⁹ Èbi tantiaquido icsho utsibon chieshënac mimbi dayun uaid nibëdquiendac. Nëbi mitsana nibëdquid yequi con Pa yacnuësh dadpen dayun uaquidbimboec mibi bëdamboshë iquendac. Chieshëmënnquidon mibi icsamboen chuishumboedtsen tantiembi. Mibi yacnoshon Satanasën namiac: ‘Isadaidbo nebi,’ quequidon mibi icsamboen chuishunosh. Nuquin Papan con matses caido yequi Nuquin Papan yuapenquo yec Satanasën yuaboen nec.

¹⁰ Aido tantias: ‘Ashibi mëyampatsiashe,’ quec dacuëdenda. Satanasën: ‘¿Ada Esus tantiaquido chieshtoenquo ictsiashe? Tanu,’ quequin namiacpadomboen chieshëmënnquidon mibi utsi-utsien quënnë nauedbanendac. Adoac daëdpactsëc ushec mibi mëyadendac. Pduenabi yec chieshtoenda. Chieshëmënnquidon: ‘Esus tantiaquido icsho mibi cuesunenu,’ caqui chieshtoenda. Aidon cuesuniacsho mibi Nuquin Papa yacno puduedmeshun ëbëdi tabadmendambi.

¹¹ Nëbi ëbi tantiaquido utsibotsen chuinu. Èmbi Esmidina yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Chieshtoenquo icquin ëbi tantiasho isun icsaido cuidquiacno nësecainquo iquendambi,” quequin ëmbi chuiboed dada uata –quequin chuiposhi Esusèn.

Pedcamo yacnocquido Esusèn chiaid

¹² Adoshombic ana shëcuënuësh chështe cuënumboshë icquid cueshqueboedën Esusèn naden chuioaposhi. –Pedcamo yacnocquidon ëbi tantiaquidon iste ëmbi naden chuiboed dada uata. “Tantia, Pedcamo yacnocquido. Mibitedi chuinu.

¹³ Mibi yacno Satanasën yuabo dadpen icnuc ëbi tantiec mibi chieshtoenquo iquec. Ènden Satanasën namiac mibi yacnoshon chieshëmënnquidon con yua Antipas caid cuesunepondash. Aidën chieshtoenquo icquin ëmbi naid chuibansho cuesuniacsho isumbic adembiti chieshtoenquo icquin mimbi ëbi tantiaquopondac. Aden mimbi bëdamboen naid tantiembi.

¹⁴ Adondaid tantiaquin mibi icsaidtsen chuinu. Mibi cuëdëncuededacno Esus tantiaquido icsamequid utsi-utsiec puduedpash. Badan caidbimboecquido aido nec. Èndenquimboshë matses utsibo chuiquid dapa Badac caidën: ‘Isadaidbo aquec cho,’ cac comapenen tantiaquidën Badan caidën isadaidbo Nuquin Papan chiaid niacmenuequin chuitampampic. Aidën chiaicpadomboen Badac caidën matses chidobon isadaidbo dada dadpen chudmebedpampic. Adshumbic ambi papa caid Nuquin Papapenquo tantiamenuen ambi papa quequin dasamboed nëish pichicaid pebededacno buampampic. Aden Nuquin Papan chiaid niac-niacmec icsamianquido mibëd iquec. Aido cuemepatecnëdan mimbi.

¹⁵ Adec nicadaitabo caido ëbi tantiate shubun puduedash mibëdi cuëdëncuededec icsamiante bumpec.

¹⁶ Aidon chiaid tantienda. Èmbi chiaid mibi niac-niacmenushe. Aidobëd tabadenda. Mibi cuëdëncuededacno chomenda. Èmbi chuiboed niacbidansho isun con ana shëcuënuësh cueshqueboedën chështen cuesachimboen mibi cuidtsiambique.

¹⁷ Nëbi ëbi tantiaquido utsibotsen chuinu. Èmbi Pedcamo yacnocquido chuibocpadomboembidi con Mayanën mibitsen tantiametsiashe. Pabiate cuembo icquin ëmbi chuiboed tantiata. Chieshtoenquo icquin ëbi tantiasho bëdambo icmendambi. Nuquin Papan isadaidbo mana caid pemedenequin dayun uacpadomboen mibi bëdamboen tabadmendambi. Adshumbic: ‘Èmbi tantiaidquid yec ëbi yacno puduedtequid nec,’ queshun cuënote ushu menendambi. Abi cuëmëdquid icnubi utsi uain cuënnquin aid cuënoten dada uatanquin menendambi. ‘Èmbi meneboedënnuidtsëqui ma isnu,’ quequin adoendambi,” quequin ëmbi Pedcamo yacnocquido chuiboed dada uata –quequin chuiposhi Esusèn.

Tiatida yacnocquido Esusèn chiaid

¹⁸ Adoshombic aidëmbidi padpiden chuioaposhi. Cuète isquidbimboec aton ëshë isquidquidquo yequi aton taë shocosh piubimboec nac-nacpambo icpash. –Icsaisambo yec Nuquin Papan Madombo nec. Adquid yec abitedishun naid tantiaquidquidquo icquin matses cuidquidquidquo nec –camenuec adquid isadquidën naden chuiposhi. –Tiatida yacnocquidon ëbi tantiaquidon iste ëmbi naden chuiboed dada uata.

¹⁹“Tantia, Tiatida yacnocquido. Mibitedi chuinu. Mimbi naid abitedi tantiemi. Ëbi tantiaquin mimbi utsibotsen bédamboen bédantiec. ‘Aton Papabédan Esusën bédamboenshë natsiash,’ quequin chieshtoenquo icquin mimbi ëbi tantiec. Adquid icquin ëbi tantiamenuen utsibo nashunquido mibi nec. Ëbi tantiesabon: ‘Padi. Esus tantienda,’ caqui mimbi chieshtoenquo icquin ëbi tantiapec. Tauamboen ëbi tantiaquin daëdpectsëc naondaïdi nëbi ëbi tantiaquioshon ëmbi chiacpadomboen mimbi dadpen naid.

²⁰ Adec utsi-utsiec bédambo icnubi icsamianquid chido abi iquec. Aid mimbi cuemepatecnëdan. Aid cuemenquo yec mibitedi icsaic. Mimbi cacumiabi mibi iccuededacno isadaïdno tsusedpan chido Èsabad caïdbimboecquid chido icsamboshë icquid muanuec puduedposh. Puduedshumbic: ‘Nuquin Papan chiaïd chuïquid nebique. Tantia. Chuinu,’ quequin abi bunaiduidquo chuïbanosh. Adoac ëbi bëdiactsëc tantiauidtsëcboedi aidën chiacpadec icsacuededposh. Nuquin Papapenquo utsibon papa caïd tantiabededacno puduedposh. Adshumbic aidon papa quequin dasamboed nëish pichicaïd pec tabadcuëd-quimbi aton chidopenquo chudbededposh.

²¹ Adsho isun aid chido: ‘Ma abi icsaïd ënu,’ qeshun badedquo cuidenquo iccombi. Adoboqui abi icsaïd ënte bunenquo iccosh.

²² Adec abi icsaïd ëntiapimbo icsho isumbimbi nëbi cuidendac. Ëmbi nac daicsabudash mëyadquiec aton ueten uendac. Ambi chiacpadomboen naquido ademïdidi mëyadquionoc cuidendambi. Aidon ambi naid ënshoembi cuidenquo ictsiac.

²³ Aid chido cuidquoquimbi aton bacuëbobimboecquido aidën chiacpadomboen naquin ëntiapimbo icquido ademïdidi cuidquiendambi. Ëmbi adoshon isun ëbi tantiaquidtedishun: ‘Matsesën otacquo tantiaïd tantiaquidquo Esus nec. Adquid icquin abi icsaïd ënenquo icquido cuidquin abi tantiaquido bédambo icmendac,’ quequin tantiatsiash.

²⁴ Tantia. Ambocquido ëbi tantiaquidombotsen chuinu. Aden Satanasën chuimïaidën chuïsho: ‘Aden chuïsho tantiatiapimbo iquebi,’ mimbi capoc. Aden bédamboen nasho isun utsi chienquo iquembi.

²⁵ Nëïduïdtsëqui chuinu. Mimbi bédamboen nabocpadomboen chieshtoenquo icquin ëbi tantia. Ëbi choabi yacpadembi adota.

²⁶ Choshombimbi chieshtoenquo icquin ëmbi chiacpadomboen naquidombo ëbédan chuïquid dapabo icmendac. Adoac ëbédan matses utsibo abitedi namendac.

²⁷ Aden Nuquin Papan aïdo ëbédta chuïquid dapa icmïacsho utsibon: ‘Dëniacquin ëmbiquen nanu,’ catiapimbo iquendac. Ëbi chieshënquido: ‘Esus dëniacquin ëmbiquen matses namenu,’ qesho tantiashun matsu nacnenquidën ambi nacnenaid icsambo icsho isun pos-posacbimboen cuidquiendambi.

²⁸ Badiadte anoentsëc uispa dapa choded-chodedbocpadquiec ënëdenquo yec ëbi tantiaquidobëd iquendabi.

²⁹ Ëbi tantiaquido utsibotsen chuinu. Ëmbi Tiatida yacnocquido chuïbocpadomboen Nuquin Papan Mayanën mibitsen pausuntsiashe. Pabiate cuembo icquin tantia. Chieshtoenquo icquin ëbi tantiasho ademïdidi bédambo icmendambi,” quequin ëmbi chuïboed dada uata —quequin chuïposhi Esusën.

3

Sadis yacnocquido Esusën chiaïd

¹ Adoshombic Nuquin Papan Mayan abi tantiaquidobëd tabadmequidquo icquin Esusën padpiden chuïposhi. —Abi tantiaquido chuïbanquid namequid nec —camenuen uispa 7tedi sananquin ismeboedën naden chuïposhi. —Sadis yacnocquidon ëbi tantiaquidon iste ëmbi naden chuïboed dada uata. “Tantia, Sadis yacnocquido. Mibitedi chuinu. Mimbi naidtedi tantiemi. Bédamboec tabadquido danquin utsibon: ‘Bédambo icquido nec,’ mibi canubi ëmbien adotiapimbo iquec. Mibi bédapenquo iquec. Unësacbimboen mimbi ëbi bédamboen tantienquo iquec.

² Isucunacbimboen ëbi padpiden tantiaquota. Nuquin Papan chiacpadomboen mimbi nauïdtsëccoque. Mimbi ëbi tantienquo iqueque. ‘Nuquin Papan chiacpadquiec bédamboec tabadnuna. Esus tantiaquionona,’ cananta.

³ Mimbi ëbi tantiabonondacpadomboen ëbi tantiaquota. Bëpiscudenda. Nëbi mibi icsaïd ënshun ëmbi chiacpadomboen naoata. Isucunenquo yacbimboen ëbi tantienquo icshoembi mibi cuidendac. ‘Ampequid choec,’ quequin tantienquo yacbimboen ëmbi cuidte tantienquo icsho mibi cuidtsiambique. Ëbi tantiaquota.

⁴ Mibi yacno icsaquido dadpen tabadnubi utsi-utsiec daëdpectsëc ambi naid icsa ucu-dacbimboec icsainquo yec bédamboec tabadec. Adec bëchish ucu-dacbimboec abi icsaïd ënash bédamboec tabadsho isun ëbëdi tabadmequin icsaisa icmendambi.

⁵ Èbi tantiaquido utsibotsen chuinu. Èmbi chuibocpadquidèn chieshtoenquo icquin èbi tantiasho ademibidi bédamboen isun Nuquin Papa yacno èbèdi tabadmequin icsaisa icmendambi. Aido cuëmédquid cuëmédquidquien Nuquin Papa chuibanendambi. ‘Aido èbi tantiaquidotedi neque. Nuquibèd tabadmenuna,’ quequin adoendambi Nuquin Papan abi yacnoshon uaido mayan bédabontsen tantianuc. Aden dada uaid ucudenquo yacimboben bëshunenquo icquin èbèdi tabadtequido abitedi tantiemi.

⁶ Èmbi Sadis yacnocquido chuiboed Nuquin Papan Mayanèn mibitsen tantiametsiashe. Pabiate cuembo icquin bédamboen tantiata. Chieshtoenquo icquin èbi tantiasho ademibidi bédambo icmendambi,” quequin èmbi chuiboed dada uata –quequin Esusèn chuiposhi.

Pidadepia yacnocquido Esusèn chiaid

⁷ Adoshombic icsaisambo icquin ambi chiacpadomboen naquidènquo Esusèn padpiden chuiposhi. Con tsusedpa Dabid yampicpadquid matses namequidquo yec ambentsèqui Nuquin Papa yacno puduedmequid nec utsibon: –Padi –catiapimbo icnuc. Abi tantiesabo cacumequid Esus nec. Aidèn naden chuiposhi. –Pidadepia yacnocquidon èbi tantiaquidon iste èmbi naden chuiboed dada uata.

⁸ “Tantia, Pidadepia yacnocquido. Mibitedi chuinu. Mimbi naid tantiemi. Mibi yacno èbi tantiaquido daèdpectsèc iquec. Adquid yec: ‘¿Ada nuquitedictsèqui chieshtoenquo icpatsiaba?’ queded-quededtsècquien mimbi èbi tantiaquioc. Chieshènaqui: ‘Esus tantiatiapimbo iquebi,’ quenquo mibi iccoc. Adec chieshtoenquo icsho isun èmbi namiac èmbi naid mimbi chuiban-chuibanendac utsibon èmetiapimbo icquin.

⁹ Aden isadaidbon mibi èmetiadquio iquec. Aido: ‘Con matses isadaidboudtsèqui Nuquin Papan bédamboen isendac,’ quec muaboedo Satanasèn yuabo niosh. Èmbimbo namiac mibi yacno cho-chosho mimbi chuibanendac. Adoac: ‘Ai, abimboen mimbi caoc. Nuquin Papan Madon Esusèn tantiaidombo mibi nec,’ aidon mibi caindac.

¹⁰ Èmbi chiacpadec chieshtoenquo icquin èbi tantiasho isash mibi cudasendabi. ‘¿Ada Esus tantienquo yantsiashe? Tanu,’ qeshun nidaid utsi-utsiec yacno tabadquido abitedi Satanasèn natiambo icmendac. Adosho mibi chieshtoenquo icquid icmendambi.

¹¹ Tantia. Nèbi choendabi. Utsibon chieshènaqui mibi icbocpadquiec chieshtoenquo yec bédamboec tabadta. ‘Èbi adenquo icsho isun Esusèn abi yacno puduedmenquo ictsiashi,’ quiash bédamboec tabadta.

¹² Aden chieshtoenquo icquin èbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yacimboecnuc con shubun icquido mibi icmendambi auèshquo cuentiapimbo icnuc. ¿Mitsipaden icbon: ‘Con na nec,’ quequin abi cuëmédquid dada uaquin ismepec? Ademibidi abitedi ismequin: ‘Con Pabèdtan con matses nec,’ mibi caindambi. ‘Nuquin Papa yacno èbi tabadaid Edusaden chuca caid abucùesh budtequid yacno tabadtequidombo nec,’ mibi caindambi. Nuquin Papan abitedishun Icbombo icmiac èbèdtambi chuiquid mibi icmendambi.

¹³ Èmbi Pidadepia yacnocquido chuibocpadomboen Nuquin Papan Mayanèn mibitsen pausuntsiashe. Pabiate cuembo icquin bédamboen tantiata. Chieshtoenquo icquin èbi tantiasho ademibidi bédambo icmendambi,” quequin èmbi chuiboed dada uata –quequin Esusèn chuiposhi.

Daudiseya yacnocquido Esusèn chiaid

¹⁴ Adoshombic abitedishun naid tantiaquin abimbo chuiquidènquo Esusèn padpiden chuioposhi. Nidaidbèdta abitedi uaquidènquo abitedishun Icbon chuiposhi naden. –Daudiseya yacnocquidon èbi tantiaquidon iste naden èmbi chuiboed dada uata. “Tantia, Daudiseya yacnocquido. Mibitedi chuinu.

¹⁵ Mimbi naid tantiemi. Chieshtoenquo icquin èbi tantiaquid ictiadquidi adquidpenquo mibi nec. ¿Èbi bédamboen tantiaquidon adopendactic? Padenquo. ‘Esus tantiaquid nebi,’ quiondaidèmbi mimbi naiduidi naquin mimbi èbi bèdiactsèc tantiatsèccoc. Adsho tantianshun: ‘Dayacquo yacimboben èbi tantiaquiopashun,’ caimbi mibi.

¹⁶ Mibi adec chieshtonoc èbitsen chieshtotiadquio iquebi. ‘Cacumiabimboen Nuquin Papa yacno èbèdi mibi tabadmenquo iquendambi,’ mibi catiadquio icchitebi.

¹⁷ ‘Nuquin Papan chiaid niac-niaquec icsapobi,’ quetiadquidi: ‘Èmbembi con na dadpen bedshun dayun uaic utsi bunenquo yec bédambo iquebi,’ mibi quepoc. ‘Esus tantienquo yec Nuquin Papabèd tabadtiapimbo icchitebi,’ quetiadquidi mibi adenquo iccoc. Nuquin Papa yacno tabadte tantienquo icsho isun mibi shubiatiadquio iquebi. Bèchish ucabi yacimboben mibi icsaid ènabi icsho mibi bédamboen istiapimbo iquebi. Pacuènèdacimboben èbi tantienquo mimbi iquec.

¹⁸ Adboedèmbi Nuquin Papabèd tabadte bunquin èbi tantiaquiota. Èbi tantiaquin bèchish ucacimboben mibi icsaid ènta. Adsho icsaisabimboecnuc mibi bédamboen isquin

ëbëdi tabadtequid icmetsiambique. Pacuënëdaid paposhquiachimboecnuc ëmbi naid mibi bédamboen tantiametsiambique. Èbi tantiata.

¹⁹ Èmbi tantiaido bédamboen tantiamembi. Aton papan: ‘Padi, mibi icsambo iquec,’ quequin bacuë ëmiacimboen ëbi tantiaquido icsasho isun ambi naid ëmenuequin natiambo icmendambi. Èbi tantiaquin mimbi icsamboen naid ënash bédamboec tabadta.

²⁰ Mibi tantiaquiembrie. ‘Èbi tantiata,’ ëmbi cac mibi: ‘Ai,’ qesho tantiash mibëd iquendabi. Pec tabadec bëisanquiachimboec mibëd iquendabi.

²¹ Tantia. Èbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aibëdi tabadquid nebi. Adquid yec aibëdi abitedishun Icbombo nebi. Adembidi ëmbi con Pan chiaid nacpadec chieshtoenquo yec ëbi tantiec tabadsho ëbëdi tabadmequin ëbëdtan chuiquid icmendambi.

²² Èmbi Daudiseya yacnocquido chuibocpadomboen Nuquin Papan Mayanën mibitsen pausantsiashe. Pabiata cuembo icquin bédamboen tantiata. Chieshtoenquo icquin ëbi tantiasho adembidi bédambo icmendambi,” quequin ëmbi chuiboed dada uata –quequin chuiposhi Esusën.

4

Nuquin Papa Uanën isaid

¹ Asia yacnocquido Esusën ëmbudquin chuibon abuc ispombi. Adshun isquien shëcuë shënciacimboec isadpec. Adnubien chuibocpadquiec shoncacimboec comapenec on-queoaposh. –Nëmbo cho. “Nadquid iquendac. Nadotsiandac,” quequin mibi dadpen ismenu –caposhi.

² Adoac Nuquin Papan Mayanën tantiamiac ambo nidacimboen ispombi. Ushquin isacimboembimbi caindac. Adshun isquien Nuquin Papambo chuiquid dapan tsadte dapanquo tsadpec.

³ –Chuiquid dapa abentsëcquiobi nec. Bédamboshë iquec –camenuc matses bunaidquo casëdubimboec nac-nacquio yec piumo yec bédamboshë isadposh. Abi tsadaid nënantanquo uenquebudpamboec uen podquedbipamboec umu-umupambo icposh. –Bédamboshë icquidquo nec –camenuc adquo icposh.

⁴ Nuquin Papa nënantan icnuc abi dacuenadec matses tsusiobo Esus tantiaquido chuiquid 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquo dasuידcuededposh. Chuiquid dapan mauetempo shocosh nacenaidquo mauecuededposh.

⁵ Adnubien Nuquin Papa yacnuësh abubimboec bed-bedquetanenubien abu tesquiani-acimboec cuëdtoposh. –Abitedishun Icbombo nec –camenuc adec cuëdtoposh. Nuquin Papan bëntsiacquo tabote taboaid 7tedi icnuc tabëcaid icposh. –Aton Mayan abentsëcshun Nuquin Papa bëisquiquimbi abi tantiaquido chianequid yequi Esus tantiaquidobëdtsen icoaic –camenuc aden ismeposhi.

⁶ Bëntsiacbidi actepenquo chian dapa acte-actetsëcquo isadposh.

Nuquin Papa tsadaid anoen daëdtsëcquo abi dacuenadec aben icquidbimboecquid 4tedi icposh. Dadano chedobi ëshë ictsëcquiec icposh. Utsi tanenquo. Abimbouidquo istequidquo icposh. Cachoc icnubi tacbiduc adquibidi icposh.

⁷ Abentsëc bëdi dapambo tëbuchoquidbimboec icposh. Utsibic baca bënëbimboec isadposh. Utsibic matsesën bëtantetebimboec bëisadposh. Utsibic chiqui dapabimboec isadposh.

⁸ Icho-icboec aton podo uicchunën podobimboec 6tedi icposh. Podonotsen adquibidi ëshëuidquo isadposh. Podo ananquo adquibidi icposh. Aidonquibi ënenquo icquin Nuquin Papa chuiposh nadec cuëdënquin.

–Icsaisambo yec bédamboshë icquidquo mibi nec.

Abitedishun Icbombo mibi icnuc mibipadquid utsi nibëdec.

Abitedimbo tantiaquidquo mibi icnuc mimbi tantiacmaid nibëdec.

Matses uabi yec icpampidi mibi nec. Nëbi adquid yec mibi nibëdantiapimbo icquidquo nec –quec badiadquidën badiadquidënquiec cuëdënashic inçhëshënsen cuëdëneneposh.

⁹ Aden dadanobi ëshëcquidon: –Mimbi nac bédambo iquebi. Mibi bédamboshë iquec, Papa. Abitedishun adembidi: “Bédambo iquec,” mibi cac bédambo ictsiashe, Papa –Nuquin Papa cadonenubi

¹⁰ tsusiobo 24ted icquido ambo tabadquido danëshën tinquebudcuededposh. Adtanquimbi mauete chicbededanquin Nuquin Papan tayun sambededposh: –Abitedishun Icbombo mibiuidtsëqui nec –quequin. Adotanquimbic aidontsen Nuquin Papa chuiposh nadec cuëdënquin.

¹¹ –Mibi bédamboshë iquec, Papa. Adembidi abitedishun mibi: “Bédambo iquec,” capashun.

Abitedishun Icbombo mibiuidtsëqui nec.
 Chuiquid dapambo abentsëcquiobi mibi nec.
 Mibipadquid utsi nibëdec.
 Nadatiambo icquidquio mibi nec.
 Comapenen tantiaquidquio icquin mimbi abitedimbo uapampic.
 Mimbi tantiacpadomboen mimbiuidtsëcquiobi abitedi uapampic.
 Adoac mimbi tantiacpadequi mimbi uaido nibëdanabi yec abi iquec.
 —quec tsusiobo cuëdëncuededposh.

5

Nuquin Papan chiacpadomboen namequid Esus isadaid

¹ Adshun isquien Nuquin Papan abiucshun ambi chiaid dada uaid sanampec. Abiuc daëdi dada uaid bidicabanquin: —Istemaidën isnushe —qeshun 7ted icnuc bitaccatempin bitaccabanaid neposh.

² Adnubien Nuquin Papan abi yacnoshon uaid mayan bëda chuiquid dapa comapenec onqueposh. —çTsuntsin nëid dada uaid bedshun bitaccaid chicbanquin chuibampatsiash? —quedo-quedoposh. —çTsuntsin Nuquin Papan chiaid bedshun isquin ambi chiacpadomboen naquin naimepatsiashba? —quequin tantiec adposh.

³ Adoquien ëcbedanenquio icposh abitedimbo. Nëidic Nuquin Papabëd tabadquidotedi. Nëidic nidaidën tabadquidotedi. Nëidic unësaidotedi. Aidtedi dada uaid bedshun bitaccaid chicbanquin istequid nibëdposh.

⁴ Adsho isashini unësquio icnuc shubipoc: —Aid dada uaid bedshun chicbanquin chuibanquid nibëdec —quiash.

⁵ Adshobini anocquid tsusion: —Otac. Shubienda. Ënëd. Is. Dada uaid bedshun chicbanquin chuibanquid abi iqueque. Nuquin Papan matsesmequin chomiondaidquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacadiapimbo icquid nec. Aidëmbi chieshtoenquio icquin Nuquin Papan chiacpadomboenuidi naquidquio icquin aid dada uaid bedshun namendac —caposhi.

⁶ Adoac isquien isadaidbon Nuquin Papa cuidmenquio icnuc abided unës uaid obeca bacuëbimboecquid Nuquin Papabëd abi tsadacnombo isadtsec. —Matses icsaid bedshunuec abided cuidadec unësaid Esusquio nec —camenuec adec isadposh. Utsibo dacuenadec tabadnuc nënantanquio Nuquin Papabëdquio icposh. Anoentsëqui dadanobi ëshëcquido dacuenadec tabadnuc abi uquëtsëc tsusiobouidquio dacuenadec tabadposh. Padnuc obecabimboecquid yec aton pais 7tedi icnuc aton ëshëmbo aidtedquiobidi icposh. —Abitedishun Icbombo yec utsin dëniacadiapimbo icquid Esusquio nec —camenuen aden pais ismeposhi. Adembidi: —Aton Mayambidi Nuquin Papan Mayan yec nidaid utsi-utsiec yacno matses abitedi yacno nidmiaid icnuc ompodëmëdtiapimbo icquid Esus nec —camenuen ëshë 7tedi ismeposhi ushquin isacimbocnuc.

⁷ Adshumbic obecabimboec isadboedën Esusèn Nuquin Papan abiucshunquio sananaid dada uaid bedposh.

⁸ Bedsho istanequien dadanobi ëshëcquidobëd tsusiobo 24ted icquido Esus ismec danëshën tinquebudcuededposh. —Bëdamboshë icquidquio mibi nec —quiash adcuededposh. Tsusiobon icbo-icboen ten-tencate sananquimbi utsiucshun shocoshëmpi bëdambo nuadnuc tauitempi sanamposh. —Ëmbi ten-tencamequin Nuquin Papa cuishoncami-acimboc Esus tantiaquido cuëdënaid iquec —quequin aden ten-tencate sananquin ismeposhi. Adembidi: —Nëshun tauiac nëid pushudquid Nuquin Papa yacno nidacimboc Esus tantiaquidon chianiaid iquec —quequin bëdambo nuadnuc tauitempi sananquin ismeposhi.

⁹ Adashic cuëdënte chucan Esus chiec cuëdëncuededposh tsusiobo. —Mibi bëdamboshë iquec.

Nuquin Papan chiacpadecc matses cuidmenquio icnuc mibided cuidadec unësondaidquio mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquio mibiuidtsëqui nec.

Mimbiuidtsëqui Nuquin Papan sanamboed dada uaid bedshun bitaccaid chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquio.

Nëidic matses utsibo.

Nëidic nidaid utsi-utsiec yacno tabadquido.

Aidtedi mibi tantiaquido yansho Nuquin Papan bédamboen isendac.

¹⁰ Adoac min yuabo yanshun Nuquin Papa yacno mibédi tabadquin: “Mibi bédamboshë iquec,” caded-cadedendac.

Mimbi tantiacpadën nidaidënuësh mibédtan chuiquid iquendac

—quec cuëdëncuededposh tsusiobo.

¹¹ Adnubien abi yacnoshon Nuquin Papan uaido mayan bédabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbédi nënantanquio icnuc anoentsëqui dadanobi ëshëcquidoidquico dacuenadec tabadposh. Abi uquëtsëc dacuenadec tsusiobouidquico tabadposh. Aid uquëtsëc dacuenadequic mayan bédabouidquico tabadposh.

¹² Adec tabadec mayan bédabo abitedimbo cuëdëncuededposh naden chiech.

—Isadaidbon obeca bacuëded cuidacimboec matses icsaid bedshunuec abided cuidadec Esus unëspodash.

Esusquico bédamboshë icquidquico nec.

Adquid icsho: “Abitedishun Icho icquin Nuquin Papan chiacpadomboen namequidquico mibi nec,” abitedishun capashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibëdec,” abitedishun capashun.

Adembidi: “Mibi bédamboshë iquec. Mibi tantiaquiembi,” abitedishun capashun

—quec cuëdëncuededposh mayan bédabo Esus tantiec.

¹³ Adnubien Nuquin Papan uaido abitedimbo cuëdëndocuededposh. Abi yacnocquidotedi yec nidaidën icquidotedi yec unësaid uincuemiaidotedi yec acten icquidotedi yec quec cuëdëncuededposh naden chiech.

—“Abitedishun Icbombo yec tsadte dapan tsadquidquico Nuquin Papa bédamboshë iquec.

Obeca bacuëbimboecquid abided cuidadec unësaid Esustsen bédamboshë iquec,” canuna, ënenquico icquin.

“Abiuidtsëqui Nuquin Icho nec. Utsi adquid ictiapimbo iquec.

Aidën nac nuqui bédamboshë iquec.

Abipadquid utsi nibëdec,” canuna ënenquico icquin

—quec cuëdëncuededposh abitedimbo.

¹⁴ Adsho tantiaash dadanobi ëshëcquido: —Ai, abimbo caic —quenubi tsusiobo 24ted icquido: —Nuquin Icho bédamboshë iqueque. Ismenu —quetanec Nuquin Papabëdta Esus ismec danëshën tinquebudcuededposh.

6

Bitaccaid chicaid chiaid

¹ Adnubien Esusën Nuquin Papan: —Nadoendambi —quequin chiaid dada uaid 7tedi bitaccaid tauamboen abentsëc chicposh chicabi icquid 6tedi icnuc. Aid chicnubien Nuquin Papabëd icquid dadanobi ëshëcquidën abentsëcshun abu cuëdacimboec comapenec cuëdquin: —Cho —caposh.

² Adoac cabayo ushumbo icquid catsadec dada canti sanampamboec chosho ispombi. Adec chosho isun: —Mibi chieshënnquido uesquin cuesun secaquidquico mibi nec —quetanquin chuiquid dapan mauetempo mauemeposh. Adoac adecbidi abi chieshënnquido cuesun secanuec nidposh.

³ Adnubien Esusën dada uaid bitaccaid utsi uidtsëcquid chicposh chicabi icquid 5tedi icnuc. Aid chicnubien dadanobi ëshëcquid utsin: —Cho —cac

⁴ cabayo piumbo icquid catsadec dada choposh. —Matses cuesun secananenquico icsho Nuquin Papan tantiacpadomboen aidën nac matses abitedimbo matses utsibobëd cuesun secananendac —qeshun chëshëte dapa matses siante dapa meneposh. Adomboen Nuquin Papan matses cuidte tantiameposhi.

⁵ Adnubien Esusën dada uaid bitaccaid uidtsëcquid chicposh chicabi icquid 4tedi icnuc. Aid chicnubien dadanobi ëshëcquid utsinsen: —Cho —cac cabayo chëshëmbo icquid catsadec dada choposh. —Pete daëdpactsëc icmete chiech —camenuen pete yuë tante sanamposh.

⁶ Adnubien dadanobi ëshëcquido dacuenadec tabadnuc nënantanshunquico Nuquin Papan cabayo chëshëmbo icquid catsadquid chuiposh. —Piuquid dadpenquico meniac aton yuë daëdpactsëcnuc tambanshun pete utsi-utsien daëdpactsëc menianquid iquendac —quequin pete utsi-utsiec nibëdte chuiposh. Adshumbic: —Pete utsi-utsien nibëdmetanquin tiedën

icquid pete utsi-utsien nibèdmenquo icquin nata —quequin chuiposh. —Nuquin Papan cuidac adec pete nibèdnuc matses pete bunquiendac —quequin cuidte utsi aden ismeposhi.

⁷ Adnubien Esusèn dada uaid bitaccaid uidictscècquid chicposh chicabi icquid 3tedi icnuc. Aid chicnubien dadanobi èshècquid utsintsen ènquimbi chuiquin: —Cho —cac

⁸ cabayo bèdiactscèc ushu-ushupactscècquid catsadec dada choposh. —Aid matses unès uaquid nec —quequin cuènsò tantiombi. Abipadquid utsin chinumposh. —Aidombi Nuquin Papan tantiacpadomboen matses cuidquin matses dadpenquioshè unès uabudnendac. Aidon namiac cuesun secananec dadpen naimèdbudnendac. Bunambi aidtedbidi unèsbudnendac. Daicsaidèmbic aidtedbidi. Aben icquid uinsadpambo icquidèn aidtedbidi acshun secaindac —quequin Nuquin Papan cuidte utsi ismeposhi.

⁹ Adnubien Esusèn dada uaid bitaccaid utsi chicposh chicabi icquid 2tedtsèqui icnuc. Aid chicnubien Nuquin Papa yacno isombi. Abi tantiate nèish pichicate dapa dayun chieshènquidon cuesun secaido Esus tantiaquido tabadsho ispombi. Aido chieshtoenquo icquin Nuquin Papan chiaidbèdta Esusèn naid chuibanec bèdamboec tabadsho aden cuesun secaido niosh.

¹⁰ Adoaido icquin comapenec cuèdquin Nuquin Papa chuidoneposh. —Abitedishun Icbombo icquin mimbi tantiacpadomboen namequidquo mibi nec. Icsaisambo yec muesambo mibi neque. En chui, Papa. Nidaidèn tabadquido èbi chieshènquin cuesun secaboedo ¿tedectscishun mimbi cuidpe? —caquin chuidoneposh.

¹¹ Adoaquin: —Chiata. Yuec-yuecpactscècshun naindambi. Min utsibobimboecquido èbi tantiaquido utsibo èmbi tantiactedi chieshèmènquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin Papan: —Èbèdi tabadmequin icsaisa mibi icmembì —qeshun abitiombi dasiuidbudte ushumbo icquid dasiuiimbamposh.

¹² Adshumbic Esusèn dada uaid bitaccaid utsi chicposh chicabi icquid abentsèc icnuc. Adnubien nidaid abichobi shèc-shècquemboec comapenec uèdèqueposh. Nidaid uèdèquenubi abucùesh chènquequideti dacuèdampambo yamposh. Ushè dashcute chèshèn bèpucacimboec inchèshquo icposh. Inchèshèn ushèbic intachimboec piumboshè isadposh.

¹³ Uispabic natiambo cunquenec cuète bacuè tididiquiacimboec nidaidèn tididieposh.

¹⁴ Abubic dashcute bidiquiacimboec isadposh. Macuèsh dapabic abitedi manèdcuededposh. Acte nènantan nidaid icquid abitedi manèdcuededposh.

¹⁵ Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nèidic chuiquid dapabo dadpenquo. Nèidic aidobèdta chuiquid utsibo. Nèidic sondado chuiquid dapabo. Nèidic aton na dadpen dayun uaquido. Nèidic cuesambo icquido. Nèidic matses yuabo. Nèidic matsesèn yuacmaido. Aitedi matses icsambo icquido abitedimbo sidquetanec ompodec cuemposh. Utsi-utsiec nidaid shècuè dapan ompodnobi utsi-utsiec macuèsh dapa yacno cuènote dapa dayun ompodposh.

¹⁶ Ompoduidtsash: —Macuèsh dapa cuitiadbudnec sebudnequin mabèspashuni. Nuquin Papan istuidshun cuidnushe —quenubien utsibo: —Cuènote dapa abucùesh paèdbudnequin ompopashuni. Nuquin Papan istuidshun cuidnushe. Adembidi abided cuidadec unèsaid Esusèntsen cuidnushe.

¹⁷ Aidon ambi tantiacpadènquibini nèimbobi cuidchitec. Padtembo. ¿Ttsuti cuidenquo icpatsiashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

7

Isadaidbo Nuquin Papa tantiaquidombo bèsiaid

¹ Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bèdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidèn uaquin cuncamenquo icposh. —Nuquin Papa: “Ma cunquequidèn icsa uabanu,” quiaibi icnuc abembi cunquequidèn nidaid yec acte yec cuète yec quenuc icsa uanushe —qeshun adoposh.

² Adnubien mayan bèda utsi ushè choacmiuèsh choposh. Nuquin Papa abi tantiaquido cudasèmenen dada uaquin bèsete sanamposh. Aidèn cunquequid uidèn uaquido comapenec onquequin chuituidposh.

³ —Chiata. “Nidaid yec acte yec cuète yec quenuc icsa uanushe,” qeshun adembi cunquequid uidèn uata. Nuquin Papa tantiaquido bèsebambono. Nuquin Papan matses neque. “Icsambo icquidobèdta cuidnushe,” qeshun bèsebambono —quetanquin Nuquin Papa tantiaquido bèsebamposh ushè choacmiuèsh choquidèn.

⁴ Adshumbic ambi bësebamboed tambanquin chuibamposh. —Bëseboedtedi Acobo caidèn madotedi 12ted icquidon matses tsyuecquido nec. Aidtedi tambanac 144,000tedi icposh dadpenquioshë.

⁵ Nèidic Acobo caidèn mado Uda caidèn matses tsyuecquido 12,000tedi. Nèidic Acobon madobidi Duben caidèn matses tsyuecquido 12,000tedbidi. Nèidic Acobon madobidi Cad caidèn matses tsyuecquido 12,000tedbidi.

⁶ Nèidic Acobon madobidi Ased caidèn matses tsyuecquido aidtedquiobidi. Nèidic Acobon madobidi Netadi caidèn matses tsyuecquido aidtedquiobidi. Nèidic Acobon madobidi Manases caidèn matses tsyuecquido aidtedquiobidi.

⁷ Nèidic Acobon madobidi Simeyon caidèn matses tsyuecquido aidtedquiobidi. Nèidic Acobon madobidi Debi caidèn matses tsyuecquido aidtedquiobidi. Nèidic Acobon madobidi Isacad caidèn matses tsyuecquido aidtedquiobidi.

⁸ Nèidic Acobon madobidi Sabadon caidèn matses tsyuecquido aidtedquiobidi. Nèidic Acobon madobidi Ose caidèn matses tsyuecquido aidtedquiobidi. Nèidic Acobon madobidi Benamin caidèn matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bëdan. Aden Nuquin Papabëda Esus tantiaquido dadpenquioshë ismeposhi. —Adquido iquendac —quequin adoposhi.

Esus tantiaquido Nuquin Papa yacno tabadaid

⁹ Aden Nuquin Papa tantiaquido bëseboedo 144,000tedi tambanquin ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshë tabadpec. Tambantiapimbo yactedi iquec. Nèidic nidaid utsi-utsiec yacno tabadquido. Nèidic matses utsibo. Nèidic matsesquio. Aidtedi Esus tantiaquido neposh. Nuquin Papa Esusbëd tabadacnombo tabadposh. Abëdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesèn chuiquid dapa ismiachimboen: —Nuquin Papa bëdamboshë iqueque. Ismenu —quequin niste podobiecquid sananquin uic-uiccaposh.

¹⁰ Aido comapenec cuëdëncuededposh.

—Abitedishun Icho icquin Nuquin Papan ambi tantiacpadomboen isadaidbon obeca bacuëded cuidachimboen aton Mado Esusded cuidpanëdash.

Adoac nuqui icsaid bedshunuec abided cuidadec unëspondash Esus.

Aid tantiaho icsaido cuidacno nidmenquo icquin nuqui abëdi tabadmec.

Aton Papabëd bëdamboshë iquec

—quec cuëdëncuededposh.

¹¹ Adsho tantiaho ambo tabadquido mayan bëdabotedi danëshën tinquebudcuededposh. —Nuquin Papabëd Esus abided cuidadaid bëdamboshë iqueque. Ismenuna —quiash adposh. Nënantanquo Nuquin Papabëd Esus tabadnuc abi uquëctëc dacuenadec dadanobi ëshëcquido 4tedi icquidquido tabadposh. Abi uquëctëc dacuenadec tsusiobo 24tedi icquidquido tabadnuc abi uquëctëc dacuenadec quic mayan bëdabouidquido tabadposh.

¹² Aid mayan bëdabotedi danëshën tinquebudcuededequi comapenec cuëdëncuededposh.

—Aden abi tantiaquido abëdi tabadmequid bëdamboshë iquec.

Esusbëdi Nuquin Papa bëdamboshë iquec.

Adembidi abitedishun: “Mibi bëdambo iquec, Papa,” quequin chuipashun.

Esusbëdi Nuquin Papa bëdamboshë iquec.

Abipadquin utsi nibëdec.

Comapenen tantiaquidquido icnuc ambi tantiacmaid utsi nibëdec.

Aiduidtsëqui bëdamboen tantiaquidquido nec.

Aidën nashunac bëdamboshë iquebi.

Nadatiambo icquid nec. Abitedishun Icbombo nec.

“Esusbëd Nuquin Papa bëdamboshë iquec,” canuna

—quecuededposh mayan bëdabotedi.

¹³ Adshumbic ëmbi 24ted icquid isboed abentsëcshun tsusion chuiposhi. —Ma ushumbo icquid abitiombi dasiuidquido ¿tsutsi nepec? ¿Mitsiüeshquido aido chosh? —cac:

¹⁴ —Tsaudi, tsusio. Mimbibien tantiec —capombi. Adsho tantiaho: —Tantia. Mibi chuinu. Satanasën: “¿Ada chieshtoenquo ictsiashe? Tanu,” qeshun natiamboshë icmiac Esus tantiec chieshtoenquo ictenedo nec. Adec chieshtoenquo icsho isun Satanasën tantiacpadomboen chieshëmënkuidon unës uapondash. Abided cuidadec unësaid Esus tantiaquido icsho icsaisa icmiaido yec dashcute ushumbo icquid dasiuidcuededposh.

¹⁵ Esus tantiaquido icsho Nuquin Papan abi yacnombo puduedmeshun aton yuabo icmepondash. Adoac Nuquin Papa yacnombo tabadquimbi abi ënenquo icquin tantiendac. Adembidi Nuquin Papan: “Con mado mibi nec. Con champi mibi nec. Nuquibi icnu. Cho,” qeshun abëdi tabadmequin bëdamboen dayun uaic.

16-17 Isadaidbo matsesèn nëish yua obeca dadpen dayun uacpaden abided cuidadec unèsaidèn Esusèn abi tantiaquido bédamboenshè dayun uaindac padpidec unèstiapimbo icnuc. Adoac pete bunenquio iquendac. Actetsen bundoenquio iquendac. Abi yacnuèsh ushèn pichiquenquio iquendac. Chun mèyadenquio iquendac. Nidaidènuèsh shubidenedi Nuquin Papa yacnuèsh shubitiapimbo iquendac. Natiamiante nibèdquiec iquendac. Unèsquio icmiantè nibèdquiec iquendac. Bacuè shubisho anin bèucquin bédambo icmiacimboben abi yacnoshon Nuquin Papan Esus tantiaquido bédambouidquio icmendac –quequin chuibamposhi tsusion.

8

Dada uaid bitaccaid nainquin chicaid

¹ Nuquin Papa yacnoshon tsusion chuibombien obecabimboec isadquin Esusèn nainquin dada uaid bitaccaid chicposh. Aden chicnubien Nuquin Papa yacnuèsh nadimbo icposh. –Dacuèdampambo iquec –quec media oda yec yuec-yuecpectsèc otacquo tantiec tabadposh.

² Adnubien Nuquin Papan abi yacnoshon uaido mayan bédabo sietetedi: –Nuquin Papan chiacpadomboen nanu –quec tabadposh. Adsho isun icho-ichoben shoncate sietetedi menebamposh.

³ Adnubien mayan bèda utsi ambobidi choposh. Choash bédambo nuadquid tauinuequin shocosh nacnenaid tauite dapa dayun nidtuidposh. Shocoshèmpin bédamboshè nuadnuc tauitempi utsi sanamposh. Adsho isun bédambo nuadquid nua meneposh. Adoac: –Nèid tauiac pushudquid Nuquin Papa yacno nidacimboec Esus tantiaquidon chianiaid iquec –quequin bédambo nuadquid sanshun tauite nacnenaid dapan tauiposh bédambo nuadnuc.

⁴ Aden tauiac Nuquin Papa yacnombo pushudquid nidosh. –Adembidi Esus tantiaquidon chianiaid abi yacnoshon tantiasun Nuquin Papan abi tantiaquido chieshènkuido cuidendac –quequin aden ismeposhi.

⁵ Adshumbic aid mayan bédan tauite dapan samèdquid cuète dètsisadaid isquidquio icquid bedshun shocoshèmpin sandoposh. Aden sandotanquimbic shocoshèmpichobi matses tabadacno masiabudposh. Nuquin Papa tabadacnoshon adoposh. Adnubien bedbedquetanepamboec abu tesquiianiabimboec cuèdtoposh. Adnubien nidaid abichobi saca-sacaquemboec uèdèqueposh. –“Nuquin Papan èbi chieshènkuido cuidpashun,” quequin Esus tantiaquidon chianesho tantiasun aden Nuquin Papan comapenen cuidendac –quequin aden ismeposhi.

Shoncate shoncaquin ismiaid

⁶ Matses tabadacno cuète dètsisadaid isquidquio icquid masiabudnubien shoncate bedboedon mayan bédabon shoncanuen sanamposh.

⁷ Adshumbic abentsècshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Ue tsasi yec cuète dètsisadaid isquidquio icquid yec intac yec quenuc chomeposh ue dapa choachimboecnuc. Aden chomiaidèn nidaid nuamboshè taidposh. Cuète dadpenquioshè taidposh. Uasin dadpenquioshè pichiqueposh.

⁸ Adnubien mayan bèda utsin shoncaposh Stedishun shoncabi icnuc. Shoncanubien macuèsh dpatembi icquid nédènquepamboec abucuèsh paèdec chian dapa mad caid nèpaèdposh. Adnuc chian nuamboshè intac yamposh.

⁹ Adèc intac yanaidèn acten icquid dadpenquioshè unèsbudneposh. Adecbidi cano dapa antabèdquidotedi abi canochobi mentoadbudneposh.

¹⁰ Adnubien mayan bèda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nédèn-nédènquepamboec abucuèsh budec acte nèpaèdposh. Aid acte nèpaèdboedèn acte utsi-utsiec dadpenquioshè actiapimbo yamposh.

¹¹ Aid uispa acte muca uaquid niosh. Aid nèpaèdquin muca uaid acte acash matses dadpenquioshè unèsbudneposh.

¹² Adnubien mayan bèda utsin shoncaposh 3tedishun shoncabi icnuc. Shoncanubien Nuquin Papan namiac chènquequidtedi icsa uaposh. Ushè cuesquinc inchèshèn ushè cuesquinc uispa dadpenquioshè cuesquinc caquin icsa uaposh. Adoaquien bédambo chènqueboedi bèdiactsècquio chènquiantsèccosh.

¹³ –Aden Nuquin Papan matses cuidquiendac –quequin èbi ismenubien chiqui dapa cuenequi matsesbimboec cuèdec comapenec cuèdcuemposh. –Esus tantiesabo Nuquin Papan cuidtequido tantiac unèsquioshè iquec. Shoncabi ichoedon mayan bèda utsin 3tedishun shoncabanuc Nuquin Papan icsaido cuidte abentsè chotsecnuc ismendac. Aid cuidte dacuèdampamboshè iquendac –quec cuèdcuemposh abuc cuenequi.

9

Mayan bëda utsin shoncanuc isaid

¹ Adnubien chiqui dapan chiapadomboen mayan bëda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bëda badedquio budash matses yacno choposh. Adsho isun Nuquin Papan chiapadomboen bëtashte chictempo meneposh. Podobitsi icsabo uidën uacno nidaid shëcuë uquëduccio icquid bëtashte chichte neposh.

² Aid chictempin chicaquien uquëduccio tied nêdênquedoacipamboec pushudtoposh. Abuc inchëshquio pushudquid icnuc ushë isadenquio icposh.

³ Adsho isaquien pushudacnuëshquio tsectsebiecquid dadpenquioshë cho-choposh. Chichumbamboec sianquidquio niosh.

⁴ Adsho isun aido chuiposh. Aton petembo caic: —Nuquin Papan tantiacpadomboen tiedên caniquidbêdta cuëte podò penda. Uasintsen penda. Adembidi Nuquin Papan cudasquin bësemiaido abi tantiaquido sebudnenda. Aido senquio icquin Esus tantiesabo bësiadabi icquiduidquio sebudneta —quequin chuiposh.

⁵ Adshumbic: —Unësnuc seshun secainda. Inchëshên ushë 5tedi nidmequin chichunên siachimbamboec sebudneta —cac tsectsebiecquidên sebudnequin ismeposhi.

⁶ Aid tsectsebiecquidên siac natiamboshë yec matses unëste bunquiendac. Unëste bunquidi badedi unëshquio iquendac.

⁷ Aden tsectsebiecquid ismeposhi. ¿Mitsipadquio nidaid cudasquid sondado catsadaid cabayo icpec? Adquio cabayobamboec tsectsebiecquid isadposh. Shocosh mauetebimbocquid mauucededposh. Matsesên bëtantetembobi bëisadposh.

⁸ Chidon têbucshumbamboec isadposh. Bêdin shëtambamboec aton shëta icposh.

⁹ Bêntsiac shicdiadquid cudaste shocosh nacnenaibimboc sictsasimbo icposh. Aid abi maisi cuensho tantiac tied nêdênquiacimbamboec comapenec cuëdposh.

¹⁰ Aid tsectsebiecquid chishpichoquid yec chichumbamboec sianquidquio neposh. Inchëshên ushë 5tedi nidmequin adquidên dadpenhun natiamboshë icnuc matses sebudneposh.

¹¹ Abi nidmequid aton icho Satanasên yuaido uidën uacnuësh choquidbidi niosh. —Unës uanquidquio nec —quequin isadaidbon onqueten abadon caposh. Quidieco matsesên onqueten apoyon caposh.

¹² —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

Chiqui dapan chuiboed utsi

¹³ Adnubien shoncate sanamboedên mayan bëda utsin shoncaposh abentsëcshun shoncabi icnuc. Shoncanubien tauite dapa Nuquin Papan bëntsiac tsadunaid yacnuëshquio onquedoshò tantiombi.

¹⁴ Adec onquequidên nêbi shoncaboed chuiposh. —Acte dapa Eupêdates caid yacnoshon matses cuidquido mayan bédabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh.

¹⁵ Aden chuitanac aid mayan bédabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adênquioi adouendac —quequin tantiacpadomboen adoposh.

¹⁶ Adoquien ambi namiaido cabayo catsadquido sondado chedo matses utsibo cuesun secanuec cho-choposh. Aido tambanaidtedi chuisho tantiombi. —Dadpenquioshë iquec cuëte podotedi. 200,000,000tedi iquec —queposh.

¹⁷ Êmbi isboedquio nadquio icposh. Abi catsadaid cabayobêdi sondado chedo shicdiadquid cudaste shictonqueuededposh. Shicdiadquid cudaste isac piumbo yec umumbo yec bëshpiu-bëshpiu icquid yec queposh. Cabayon mapi bêdi dapan mapibimboc isadposh. Ana shëcuënuësh nêdênquepamboec pushud-pushudpambo yec choposh. Cachinan bacuë pisenaid nuadachimboc asupede caid icsamboshë nuadposh.

¹⁸ Adshumbien ana shëcuënuësh choaidên matses dadpenquioshë cuesun secabudneposh.

¹⁹ Aid cabayo chedon ana shëcuënuësh matses cuesun secate icnubi aton incuentembi mapi utsi iccondash. Nisin mapibimbocquid pianquidquio niosh. Aidêntsen matses dadpenquioshë unës uabudnequin ismeposhi.

²⁰ Adnubien aden Nuquin Papan cuidaidên unës uamiabi yaidon matsesên abi icsaid êntiapimbo icposh. Ambi naiduidi nabamposh. Êntiadquidi abi icsaquiposh. Nuquin Papa tantienquio icquin podobitsi icsabo tantiaquin êntiapimbo icposh. Adembidi ambibi nacnenaid ambi papa caid ênenquio icquin tantiaposh. Utsibon shocosh nacnenaid tantiaposh. Utsibombic cuënote. Utsibombic cuëte. Adquid ambibi nacnenshun tantiabededposh.

Ambi nacnenaïd anan onquetiapimbo icposh. Pabiaten tantiatiapimbo icposh. Taèn caputiapimbo icposh. Adquid papa quequin tantiabededposh. Aid tantienquo icquin Esusquo tantiatiadquidi ambi nacnenaïduidi tantiaposh.

²¹ Cuesanquidon abi cuesun secaposh. Nènèchoquidombic abi unès uabudneposh. Cuète podo dauè icsa chodcaquidombic adembidi matses dadpen unès uabudneposh. Aton chidopenquo chudquidombic adambi utsi chudshumbededposh. Adembidi aton bènèpenquo chudmequidèn abi icsaid èntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushè. Èbi icsaid ènu —quetiadquidobi adenquo icposh.

10

Mayan bédan dada uaidèmpi pemiaïd

¹ Cabayo uinsadpambo icquid ismeboshombic utsitsen ismeposhi. Adoac mayan bèda chuiquid dapa utsi dacuèdampambo icquidquo Nuquin Papa yacnuèshquo budsho ispombi. Abu ushubimboec isadec abitiombi dasiuidbudpaccosh. Uen podqued uenquebudacpamboec mapino icposh. Ushèbimboec bêtantete bèchamauanquiecposh. Buintad nitsinaïd nédènquiacpamboec isquid-isquidpambo nidte icposh.

² Dada uaidèmpi bécadotsaid sanamposh. Budash nidtuidposh. Tsiembudcuenshun taè abiuçshun chian dapa mad caïd nètıncaquimbi taè opiocshon mananuc tincaposh. Ènapenquioshè icquid niosh.

³ Adashien bèdi noshquiachimboec nuamboshè cuèdtoposh. Adec cuèdquin chiac abu 7tedec cuèdtonequin ècbedtoneposh Nuquin Papan chiaïd chuiquin.

⁴ Aden abu cuèdquin ècbedtonesho tantiashun: —Abu cuèdquin chiaïd dada uanu —qeshobi: —Padi —caposhi Nuquin Papa yacnoshon chuiquin. —Abu cuèdquin chiaïdtedi dada uainda. Padi. Utsibo chuiquin dada uainda —caposhi. Adoac dada uainquo iccombi.

⁵ Adnubien mayan bèda tsiembudcuenshun chian dapa nètıncaquin utsiuçshun mananuc tincaboedèn ambibi podo abiuçquo cadoposh. —Nuquin Papan isnubi abimbo chuiquidquo nebi —quequin tantiamenuen aden ambibi podo abiuçquo cadoposh.

⁶ Adotanquin chuiposhi. —Tantia. Mibi chuinu. ¿Tutsi nidaïd uabi yec èndenquimboshè icpampic? Aidi Nuquin Papa nèbi adquid yec nibèdantiapimbo iguendac. Adquid icquin abitedi uapampic. Abu uashun aidèn icquidtedi uapampic. Nidaïd uashun aidèn icquidtedi uapampic. Acte uashun aidèn icquidtedi uapampic. Aden abitedi uaquidèn chidaidquo chuinu. Nèbi Nuquin Papan ambi tantiacpadomboen icsambo icquido cuidquimbi abi tantiaquido abèdi tabadmendac.

⁷ Èbi padquid mayan bèda utsin shoncate sanamboedèn: “Nèbi nainquin shoncanu,” cacpadèquo Nuquin Papan ambi chiampicpadomboen adoendac —queposh mayan bèda chuiquid dapa dacuèdampambo icquid Nuquin Papan matses cuidquin naimpanuda.

⁸ Adnubini abucuèsh cuèdquidèn chuiposh. —Aid mayan bédan sanamboed dada uaid bed —cac:

⁹ —Dada uaid beccho —capombi. Adoquien: —Nè bed. Bedshun che. Batambo icboedi min ana mucambo yanendac —caposhi. —Nèid bedshun chiacbimboen Nuquin Papan chiaïd cuishonquequin isban-isbanash mucambo yanacbimboec Nuquin Papan cuidte tantiash shubitiadquo mibi yanendac —quequin tantiamenuen aden chuiposhi.

¹⁰ Adoac aid bedshun chiash adquo yanobi.

¹¹ Adquo yansho isun mayan bédabo chuiquid dapan chuioposhi. —Nuquin Papan ambi chiaïd tantiamiac matsesèn nabante dadpen mimbi chuiabanendac. Nidaïd utsi-utsiec yacno tabadquidon nabantebèdta chuiquid dapabon nabante mimbi chuiabanendac. Aden Nuquin Papan tantiacpadomboen mimbi chuiabanendac —quequin chuiposhi mayan bédabo chuiquid dapan.

11

Nuquin Papan namiaïdon daèdshun naïd

¹ —Nuquin Papan tantiacpadomboen mimbi chuiabanendac —quequin chuishumbic mayan bèda chuiquid dapan piabimboecquid tambante meneposhi. Adotanquin naden chuioposhi. —Edusaden yacno nidshun Nuquin Papa tabadte shubu uashunaïd tambanta. Adotanquimbic Nuquin Papa tantiaquin bédambo nuadnuc tauinuequin nacnenaïd dapatsen tambanta. Adotanquimbic Nuquin Papa tantianuec aid shubun puduedpuedquido tambanta.

² Shubu nuntanquo tambanshun umanucquid daquènè uaid tambanenda. “Ambo Nuquin Papa tantiesabo isadaïdpembo pudued-puduedendac. Aidon Edusaden yacnoshon seta abentsè chotsecnuc matamequin dadpen icsa uabudnendac. Adash Nuquin

Papa tabadte shubu uashunaid daquënë uaidën pudued-puduedendac,” qeshun aid shubu daquënë uaid tambanenda. Aden Edusaden icsa uaquin seta 3tedi matamendac —quequin chuiposhi. —“Muainquo icquin Esushëdta ëbi tantiaquidombo nec,” quequin Nuquin Papan tantiec —camenuen aden tambanaido tantiameposhi.

³ Adnubini Nuquin Papan chuiposh. —Aden Edusaden icsa uanubi matses daëdquiobi ëmbi chuiboedquo chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiapadomboen chuibanendac. Adquid yec: “Matses abitedi icsamboshë icsho isash shubitiadquo iquebi,” quequin icsambo icquid abi icsaid ëmenuec dashcute icsactsëcquidquo dasiuidendac —quequin Nuquin Papan chuiposhi.

⁴ Adshobini mayan bëdan chuioaposh. —Aido Nuquin Papan oncamiaid daëd isadaidbo matses tsusedpan chuipampid nendac. “Nuquin Papan bëntsiauc cuëte odibos caid nitsinaid daëd bëdambo icquid iquendac. Ambobidi tabote daëd bëdambo icquid iquendac,” quequin chuipampid nendac. “Nuquin Papan Mayanën tantiamiaidquo icquin ambi chiaidquo chuibanendac,” camenuen aden chuipampic.

⁵ Aden abi chuibancho abi chieshënquidën: “Mibi cuesunenu,” caqui cuesuniadenquo iquendac. Nuquin Papan dayun uaid icquin ana shëcuënuësh choeboedën nibëdquiecnuc pichicacimboen abi cuesunenuequivotedi unës uaindac. Nuquin Papan cuidte tantiamenuen adoendac.

⁶ Adembidi Nuquin Papan cuidte tantiamenuen Nuquin Papan Mayanën namiaidquo icquin comapenen tantiaquin isebanendac. Aden ismequin nac abi nidabi yacpadequi ue choenquo iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuëdampamboecquin matses shubimendac Nuquin Papan cuidte tantiamenuen.

⁷ Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cuesun secaindac. Satanasën namiacpadomboen adoendac.

⁸ Edusaden yacnoshon cuesun secashun chococainquo iquendac. “Ma cuesun secaid ischitono,” qeshun chococainquo icquin podqued ansanendac. Nuquin Icho Esus cuesten decatanacnoshonquo matsesën adoendac. Equipito yacno icpampido yec Sodoma yacno icpampido yec quequidbimboec icsamboshë icquin aden Nuquin Papan chiaid chuibanquido cuesun secaindac.

⁹⁻¹⁰ Aden cuesun secabosh: “Nuqui mëyanquid nëid daëd neque. Chococatiapimbo iquebi,” qeshun chococainquo iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiaish cuishonquec abëd icquidobëd menenancuededendac. Matses abitedimbo caimbi. Nëidic matsesquo. Nëidic mayu. Nëidic nidaid utsi-utsiec yacno tabadquido. Aidtedi menenancuededendac. Abentsë chotsec ushquin aden ambi cuesun secaboed isbededec tabadendac —quequin chuiposhi mayan bëdan.

¹¹ Adashic abi onquec: —Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiacsho isash cuishonqueboedobi natia dacuëdec tabadendac.

¹² Adnubi Nuquin Papan abucshun cuënquin: “Nëmbo cho,” cac abu ushu datanec cuesun secaboed daëd abuctoendac. Abi chieshënquidon isnubi adendac.

¹³ Aid daëd abuctonoc nidaid saca-sacaquemboec natiambo uëdëquianendac. Nidaid uëdëquenubi shubu dadpenquo chimeshadbudnendac. Chimeshadbudnequimbi matses catashquin dadpenquo 7,000tedi unës uabudnendac. Adnubien unësabi icquido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien tantiatid,” quecuededendac —quequin chuiposhi mayan bëdan.

¹⁴ Aden chiqui dapan chuibocpadomboen mayan bëdan Nuquin Papan cuidte utsi chuiposhi. Nainquin chiabi iccosh. Abi utsi iquec.

Nainquin shoncaquin Uan ismiaid

¹⁵ Nuquin Papan uincuemetequido daëd chuibombien mayan bëdan shoncate sanamboedën nainquin shoncaposh. Shoncanubien Nuquin Papa yacnuësh nua cuëdencuededpash naden chiech.

—Nuquin Papabëdi aton Mado Esuquidistu abided ciudadec unësaid bëdamboshë iquec.

Abi chieshënquidon naid ëmeshun aid abentsëcshumbi matses abitedimbo namendac ënenquo icquin.

Abitedishun Icho nec

—quec cuëdencuededpash.

¹⁶ Adashic Nuquin Papa yacnombo icbo-icboec tsadten tabadboedobi tsusiobo 24tedi icquido: —Mibi bédamboshè iquec —quequin ismec danèshèn tinquebudcuededposh.

¹⁷ Adtanequi nadec cuèdèncuededposh.

—Nidaid uabi yec èndenquimboshè mibi icpampic, Papa.

Nèbi adquid yec nibèdantiapimbo icquid mibi nec.

Abitedishun Icbombo mibi icnuc:

“Èmbiquen dèniacquin namenu,” Satanasèn catiapimbo mibi iquec.

Nadatiambo icquid icquin mimbentsèqui matses abitedimbo mimbi namendac.

¹⁸ Nidaid utsi-utsiec yacno tabadquidon abi chuiquidobèdta nibi chieshèdenec.

Mimbi uaidtedi icsa uadeneç.

Adsho mimbi tantiacpadènquo nèbi mimbi cuidendac.

Matses abitedi uincuemetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobèdta mibi tantiaquido abitedimbo mibi yacno mibèdi mimbi tabadmendac.

Chuiquid dapambobèdta chuiquidpenquo mibi tantiaquidotedi bédambo icmequin mimbi adoendac

—quequin tsusiobon Nuquin Papa chuisho tantiapombi ushquin isacimboen.

¹⁹ Adshun isquien Nuquin Papa yacnombo con matses isadaidbon Nuquin Papa tabadte shubu uashunampid shècniacchobi icposh. Aid shubu nuntan isaquien Moisesèn ambi nacenaid Nuquin Papan chiaid sandoampid icposh. —Èndenquimboshè ambi chiampic-padomboen Nuquin Papan ambi tantiaidtedi nainquin naindac —camenuen aden ismeposhi. Aden èbi ismenubien bed-bedquetanec abu teshquianiacimboec nua cuèdtoneposh. Nidaid saca-sacaquemboec uèdèqeposh. Ue dapa nuamboshè choacimboec ue tsasi choposh. —Nuquin Papambo abitedishun Icbombo nec —camenuen aden ismeposhi Nuquin Papa yacnoshon.

12

Chidobèdta nisibimboecquid dapa ismiaid

¹ Adoshombic Nuquin Papa yacnoshombidi utsitsen dacuèdampamboecquidbidi ismeoaposhi. Adoac chido ushè dasiuidacimboec bèchamauanquieçsho ispombi. Inchèshèn ushè tincash tsadposh. Uispa 12tedi nacenaid mauete maueposh.

² Bacuè nua usunec tishiaidtsècquio yec shubibud-shubibudposh. —Isadaidbon chido Esus tishquid nec —camenuen aden ismeposhi.

³ Adnubien nisibimboecquid nuamboshè icquid choposh. Taèchopaidquio yec piumboshè icposh. Mapi 7tedi icposh. Pais 10tedi icposh. Aton mapidedi chuiquid dapabimboec mauete maucuededposh. Satanas niosh.

⁴ Adshumbic nisibimboecquidèn aton incuente ènapen icquid uic-uiccaquin uispa dadpen bedshun nidaidèn siabudposh. —Aden Nuquin Papabèd icquin Satanasèn abipadquido utsibon mayan bédabo icboedo utsi-utsien yuapampic. Aden yuash aton yuabobèdi nidaidèn choshon matsesens icsamete bunquieç —camenuen aden ismeposhi. Adshumbic chidon tishacsho bacuè penuen aiduidi bèisquin cainuidposh.

⁵ Adnubien chidon dada bacuè tishposh. Bédambo icquid matses abitedishun Icho ictequidèmpi niosh. Adshobien Nuquin Papan abi yacnombo buamposh nisibimboecquidèn petiapimbo icnuc. Buanshumbic abipadquid abitedishun Icbombo icmiac. —Aden Satanasèn Esus nibèdametiapimbo iquec —quequin ismeposhi.

⁶ Adnubien chido nèbi bacuè tishboed nisibimboecquid dapa cuenènec matses nibèdacnombo Nuquin Papan tantiacnombo nidposh. Ambobi tabadsho isun Nuquin Papan bédamboen dayun uaposh yuenquo seta abentsè chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

⁷ Adshumbic Nuquin Papa yacnoshon padpiden ismiac nèidtedi isoapombi. Nèidic nisibimboecquid dapa Satanasquibi. Nèidic mayan bédabo icboedobi Nuquin Papan chiaid niac-niaquec icsash podobitsi icsabo yanaido Satanasèn yuaido. Nèidic Nuquin Papabèd icquidombo mayan bédabo dadpen. Nèidic aido chuiquid dapambo Miqed caid. Aidtedi ispombi. Adnubien Satanas nadposh. —Aton yuabo mayan bédabo cuemiash Nuquin Papa dèniaquec èbimbo abitedishun icbo yantsiabi —quiash nicantiadquio icposh. Satanas chedo nidaidèn nidmiabi icnuc neposh.

⁸ Adshumbic: —Niunchitono —quequin bedbidan-bedbidanaquien Nuquin Papan yuabo Miqed chedo uidènquo icquido yec niadenquo icposh. Adshumbic Miqed chedon nisibimboecquid Satanas chedo nicaposh. Aton yuabobèdta Nuquin Papa yacnoshon nicaposh.

⁹ Nicaquien matses tabadacno nidaidën choec Satanas chedo bud-budposh. Eba caid icsamepamid Satanas niosh. Nëbi matses dadpenquioshë icsamequin yuate bunquieic.

¹⁰ Adnubien Nuquin Papa tabadacnoshon anocquidën comapenec onquequin chuibam-posh naden chuiquin.

—Aden Nuquin Papan aton Mado Esusbëdtan abi dëniacnuequido dëniacmenquio icposh.

Nuquin Papa chieshëncquidquio icquin abi tantiaquido chieshëncquien icsamboen chuishun-quid nec.

“¿Esus tantiaquido bëdambo icquidoda nedic? Ëmbi natiamiac aido chieshtotsiash,” quequin Nuquin Papa chuidenequid Satanas nec.

Satanas chedo cuemiash Nuquin Papa aton Mado Esus abided cuidadec unësaidbëdi dëniacadiapimbo yec abitedishun Icbombo nec

—queposh Nuquin Papa yacnuësh cuëdec.

¹¹ Adashic padpidec auëshbidi:

—Nëbi ëmbi isac Satanasën Esus tantiaquido chieshtometiapimbo icposh.

Satanasën: “Chieshtomenu,” caqui:

“Padi. Esusën yuambo nebi,” quec chieshtoenquio icposh.

Cuidmenquio icnuec abided cuidadec unësaid Esus tantiec chieshtoenquio icposh.

Adsho abi chieshëncquidon matsesën: “Padi. Esus tantienda. Cueschitomane,” caqui chieshtoenquio icquin adenuidi Esus tantiasho cuesun secameposh Satanasën aton yua icmiambobi.

¹² Satanas cuemiaid tantiash cuishonquenuna.

Nuquin Papa yacno tabadquidotedi nuquibi cuishonquenuna.

Ëbitedi cuishonquenuc nidaidën tabadquido matses yec mibi cuishonquetiapimbo iquec.

Nëshun cuemiatic mibi yacno budash Nuquin Papa chieshëncquieic Satanas chieshëmëncquieic tabadec.

Mibi icsamete bunquieic. “Nëbi Nuquin Papan ëbi cuidquieque.

Abi tantiaquido yuashunchitono,” quec mibi icsamete bunquin mibi natiambo icmendac. Adoac natiaic mibi tabadendac

—queposh Nuquin Papa yacnuësh cuëdec. Aden tantiameposhi.

¹³ Adshumbic ëmbi isadaidbon chido isboed padpiden ismeposhi. Adoac Esus tishquid isadaidbon chido unës uanuen nadancasho ispombi. —Nuquin Papa yacnoshon nicachitoshi —gueshun chieshëncquien nisibimboecquid Satanasën aid chido nadancaposh.

¹⁴ Adnubien Nuquin Papan chiqui dapan podobiecquid meniac bedanec aid podombi cuenec matses nibëdacnombo Nuquin Papan tantiacnombo chido cuemposh. Anoshombi nisibimboecquidën icsa uatiapimbo icnuc Nuquin Papan aid chido dayun uaposh. Seta abentsëc chotsecnuc matamequin dayun uaposh.

¹⁵ Adnubien nisibimboecquidën: —Aid chido unës uachitono —quequin ambibi ana shëcuënsun chomequin acte dapa chido dayun uacno nua chomeposh. Aden Satanasën Nuquin Papa tantiaquido isadaidbo matses nibëdametiadquio iquec. Adembidi Esus tantiaquido nibëdametiadquio iquec.

¹⁶ Acte dapa chomiachsho isun Nuquin Papan nidaid shëcuë uashun aid shëcuë acten nidmiosh chido yacno chiuidenquio icnuc.

¹⁷⁻¹⁸ Adsho isun nisibimboecquidën Satanasën nëishquioshon aid chidon bacuëbobimboecquido Esus tantiaquido chieshëncquioposh. Uesquin cuesun secatiadquio icposh. Nuquin Papan chiacpadomboen chieshtoenquio icquin bëdamboen naquido Esus tantiaquido caimbi.

13

Bëdibimboecquid dapa ismiaid

¹ Esus tantiaquido cuesun secate bunquid ismeboshombic Satanasëmbidi chian dapa mad caid cuëmanshun cainquin ismeoaposhi. Aden cainubien acte uquëducuësh bëdi dapabimboecquid pudundoposh. Mapi 7tedi icposh. —Nuquin Papa caid nibëduquieic. Ëbiuidtsëqui abitedishun icbombo icnu —quequin aton mapitedi bëdada uadaid neposh. Pais 10tedi icposh. Aid paistedi chuiquid dapan mauete paisën dectambampaccosh.

² Aton dada bëdin dadabimboec isadposh. Aton taë uinsadpambo icquid utsi oso caidën taëbimboec isadposh. Ana shëcuë bëdi utsi tëbuchoquidën ana shëcuëbimboec icposh. Adsho isun Satanasën ambi caimboed chuiquid dapambo icmeposh. Ambi tantiaidquio tantiamequin abi icsaid namebamposh. Adoac matses abitedimbo chuiquid dapambo yamposh. Aden Satanasën matses icsamboshë icquid chuiquid dapa icmequin ismeposhi.

³ Adshumbic padpiden ismeposhi. Adoac aid bëdi dapabimboecquid acte uquëducuësh choeboedën mapi abentsëc mëmuntiapimbo icnuc cuesuniaid uincuemaiad icsho ispombi.

Aden uincuemiaid icsho isash: —Comapenen tantiaquidien nechitec —qeshun matses abitedishun acte uquèducuèsh choboedèn chuiquid icsamboshè icquidèn chiapadomboenuidi nabededposh.

⁴ Adshumbic: —Èbi chuiquid dapa namequid mibi nec —quequin Satanas papa caquin matsesèn tantiabededposh. —Aden Satanasèn namiac èbi chuiquid dapapadquid utsi nibèdec. Comapenen tantiaquidquio icnuc utsibon nuqui cuesun secatiapimbo iquec —qeshun abi chuiquid dapa acte uquèducuèsh choboedtsen tantiaquioposh.

⁵ Aden matsesèn tantiaid icquin Satanasèn tantiamiacpadomboen Nuquin Papa chieshènquie: —Nuquin Papa caid nibèdquie. Èmbiuidtsèqui namembi —quequin matses abitedimbo nameposh. Aden Nuquin Papan tantiacpadembi inchèshèn ushè 42tedi nidmeposh seta abentsè chotsecnuc matamequin.

⁶ Aidèn Nuquin Papa chieshènquin naden muauaposh. —Nuquin Papa caid nibèdquie. Abi tabadaidtsen nibèdquie. Abi yacno tabadquido abitedi nibèdquie. Ambembi chiaid niosh —quec muaposh.

⁷ Adshumbic Satanasèn tantiamiacpadomboen Esus tantiaquido dadpen unès uabudneposh. Adembidi matses nidaid utsi-utsiec yacno tabadquido abitedimbo ambi chiapadomboen nameposh. —Matses icsamboshè icquid matses abitedi chuiquid dapa iquendac —quequin ushquin isacimbocnuc ismeposhi.

⁸ Aid caic matses abitedishun: —Nadatiambo icquid nec —quequin tantiaquiendac. Aid tantiaquido Esus tantiesabo nendac. Èndenquimboshè matses uabi Nuquin Papan tantiampicpadec abided cuidadec unèsaid Esusquio tantiesabo nec. —Adquido yec Nuquin Papan: “Èbèdi tabadmendambi,” quequin chiacmaidombo nec —quequin aden ismeposhi.

⁹ Pabiate cuembo icquin bédamboen tantia. Esus tantiaquido icsho mibi chuinu.

¹⁰ Nuquin Papan: —Èbi tantiaquid chieshènquin quènèn nauedquido cuidendambi —caindac. Esus tantiesabon Esus tantiaquido chèshten seshun secaindac. Adsho Nuquin Papan seshun secanquido cuidquiendac. Èbi adsho tantiash mimbi nacpadequi chieshtoenuo icta. Chieshtoenuo icquin Esus tantiaquin ambi chiapadomboenuidi nabanta.

Nidaid shècuènuèsh choboedtsen ismiaid

¹¹ Adshumbic padpiden ismeposhi. Adoac aben icquidbimboecquid utsitsen nidaid shècuènuèsh puduensho ispombi. Obecan paisbimboec aton pais daèd icposh. Satanasèn ancanquidquio icmiapadec dacuèdampamboec onqueposh. Bédambo icquid damianquien muaquin chuibanquidquio niosh.

¹² Adsho isun Satanasèn abia chuiquid dapa icmeboedèn nidaid shècuènuèsh puduemoed chuiquid dapatsen icmiac abèdtambi matses abitedimbo ancaquin nameposh. Aden namequin abi chuiquid dapa acte uquèducuèsh choboedèn chiapadomboen matses abitedi nameposh naden chuiquin. —Seshuniaid uincuemiondaidèn nuqui chuiquid dapan chiaiduidtsèqui natiaid —caposh.

¹³ Aden acte uquèducuèsh choboedèn abi chuiquid dapan chiaid namenuen comapenen tantiaquid icquin nidaid shècuènuèsh choboedèn dadpen ismeposh. Matses dadpeshun isnubi abucshun abembi taboadaid budmequin ismeposh.

¹⁴ Aden Satanasèn namiapadomboen comapenen tantiaquin ismiac matses dadpeshun: —Abimbo caic —quequin abi chuiquid dapa icsamboshè icquidèn chiaid nabededposh Nuquin Papambo tantienquio icquin. Abi chuiquid tantiamequid nidaid shècuènuèsh choboedèn: —Nuqui chuiquid dapa uincuemiaidquio icsho tantiaquin abibimboecnuc nuamboshè icnuc nacentà —cac matsesèn nacnemposh.

¹⁵ Nacnenacsho isun Satanasèn namiapadomboen nidaid shècuènuèsh choboedèn abi chuiquid dapabimboecnuc nacnemoedi tibocameshun oncameposh. Adoquien nacnemoedquioi chuiquid dapa icsabimboec onquequin: —Èbi tantiesabo neque. Cuesun secatan —cac yuabon abi chuiquid dapa tantiesabo cuesun secatamposh.

¹⁶ Adnubien nidaid shècuènuèsh choboedèn: —Nuqui chuiquid dapan yuabo nuqui nec —quequin ancabudquin matses dadpenquio dada uaqun bèsiadmeposh nèidtedi. Nèidic chuiquid dapabo. Nèidic chuiquidpenquio. Nèidic dadpen dayun uaquido. Nèidic aton na nibèdquido. Nèidic matses yuabotedi. Nèidic yuapenquio. Aidedi matses dadpenquioshè dada uaqun bèsiadmeposh. Utsi-utsien bétanteteno bèsiadmeposh. Utsi-utsien mèdante abiucquio mèsiadmeposh. —Acte uquèducuèsh choboedèn èbi chuiquid dapan yuabo nec —qeshun nameposh.

¹⁷ Adshumbic nidaid shècuènuèsh choboedèn chuiposh. —Adec èmbi chiapadec siadambo icquido piucquidbèdta mitsana utsi menenda. Èmbi siadmiaduidtsèqui mene —queposh. Utsi-utsiec abi chuiquid icsamboshè icquid cuèmèdquid dada uaqun bèsiadmiad nepoch. Utsi-utsiec aid cuèmèdaidbimboecquid naden 666 dada uaqun bèsiadmiad neposh.

¹⁸ ¿Ada ëmbi chuihoed tanto? Bëdamboen tantiaquidën: —Abi cuëmëdquidquo chienquo icquin naden 666 chuiquin dada uapac —catsiash. —Adec matses icsamboshë icquidquo chuiquid dapa yansho isun bëdambo icquid danenda —quequin ushquin isacimboecnuc aden ismeposhi.

14

Nuquin Papan cudasënaido ismiaid

¹ Adoshombic padpiden ismiac abided ciudadec unësaid Esusquo macuësh dapa Sion caid mananënquo tabadsho ispombi. Abëdi abi tantiaquido dadpenquo 144,000tedi tabadposh. —Con na neque. Chën —quequin cudasquin Nuquin Papan abi cuëmëdquidbëdta Esus cuëmëdquid dada uaqin bësemiaido niosh. —Adec Esus tantiaquido abëdi tabadendac —quequin aden ismeposhi.

² Adnubien Nuquin Papa yacnuësh ¿midapadpamboec cuëdtoposh? Acte nua chododoquiacipamboequien niaciposh. Abu tesquianiacipamboequien nechitosh. Ten-tencate dapa dadpen icbo-icboen sananquin ten-tencacipamboec comapenec cuëdëncuededposh.

³ Adec Esusbëdi macuësh mananënquo tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo 24tedi icquidobëdta dadanobi ëshëcquido 4tedi icquidën ambobidi tabadquin tantianuc adcuededposh. Abi icsaid bedshunuec abided ciudadec unësaid Esus tantiaquidon matsesënuidtsëqui aid cuëdënte chuca tantiec cuëdënosh.

⁴ Aido Nuquin Papa yacno nidabi yec nidaidën tabadnuc matses utsibo abitedimbo icsamboecshë tabadnubi aidoen bëdamboec tabadpanëdash. Utsibon Nuquin Papa Esusbëdta tantiatipimbo icnubi aidombien tantiaquiopanëdash. Abided ciudadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidombo niosh.

⁵ Chieshtoenquo icquin Esus tantiec muesabo icpanëdash. —Adquido iquendac —quequin ushquin isacimboecnuc aden ismeposhi.

Mayan bëda utsi 3tedshun chiaid

⁶ Aido ismëboshombic utsitsen ismiac Nuquin Papan abi yacnoshon uaid mayan bëda uicchnu cuenacimboec abuc cuensho ispombi. Bëndutiapimbo icquid Nuquin Papan chiaidquo matses chuinuac niosh nëdtedi. Nëidic matsesquo. Nëidic matses utsibo. Nëidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuinuac niosh.

⁷ Abuc cuenquimbi chuibemposh. —Nuquin Papauidtsëqui tantiaata. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquio iquec,” quequin tantiaata. Nëbi ambi chiaid niac-niacquido cuidquieque. Aidquio tantiaata —quequin chuibemposh abuc cuenquimbi.

⁸ Adnubien mayan bëda utsi abuc cuenoaposh. Cuenquimbi naden chuibenoaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcachimboen matses utsibo abitedi Nuquin Papa tantiamenquo icquin icsamequioposh. Aduidequi icsho ëndenquimboshë cuidampicpadomboen Nuquin Papan uesquin cuidquiendac —quequin chuibemposh mayan bëda utsin abuc cuenquimbidi.

⁹ Adnubien mayan bëda utsitsen abuc cuenoaposh. Aidëntsen chuibenoaposh. —Tantia. Nuquin Papan cuidtequido chinu. Chuiquid dapa icsamboshë icquid acte uquëducuësh choboed tantiaquin aibimboecnuc nacenaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiash ambi tantiaidën chiacpadec utsi-utsiec bësiaduedednubi utsi-utsiec mësiaduededposh. Aden abi chuiquid icsamboshë icquid tantiaquidon abi tantiatipimbo icsho Nuquin Papan cuidquiendac.

¹⁰ Aidtedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiacno chian anëdënquiacno nësecain adoendac. Abided ciudadec unësaid Esusënquo mayan bëdabobëdta isnubi adoendac.

¹¹ Ènenquo icquin adoendac. Aden Nuquin Papa chieshënquidquo tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquo icquin adëmbi cuidquiendac ènenquo icquin —quequin chuibemposh mayan bëdan. Aden ismeposhi.

¹² Èmbi chuihoed tantiaishun mimbi nabocpadomboembi chieshtoenquo icquin Esus tantiaquin ambi chiacpadomboenuidi nabanta. Utsibon chieshënquin: —Padi. Esus tantienda. Cueschitomane —caqui adenuidi ènenquo icquin Nuquin Papabëdta Esus tantiaquiota.

¹³ Adnubi Nuquin Papa yacnuësh comapenec onquequin chuioposhi. —Naden chuiquin dada uata. Chieshëmëñquidon: “Esus tantiec,” qeshun cuesun secaido Esus tantiaquido cuishonquendac —quequin chuioposhi. Adnubien Nuquin Papan Mayanëntsen: —Ai, abimbo caosh. Esus tantiaquido natiac tabadtenedobi unësash bédamboshë iquendac shubitiapimbo yacno tabadec. Ambi chiacpadquiec bédamboec tabadec unësacsho Nuquin Papan aden bédamboshë icmendac —quequin chuioposhi.

Intac nua icnuc Nuquin Papan cuidtequid chiaid

¹⁴ Adoshombic padpiden ismiac abu ushunquo Esus tsadsho ispombi. —Abitedishun Icbombo nebi —quec chuiquid dapan mauetempo shocosh nacnenaid maueshun chështebimboecquid sanamposh.

¹⁵ Adnubien mayan bëda utsin abi yacnuësh choquin comapenec onquequin Nuquin Papan chuiboed Esus chuituidposh. —Nëbi nidaidën icquid sinaid butebanquin sando. Nuquin Papan tantiacpadën nëbimbobi nata

¹⁶ —caquien chështebimboecquidën sinaid butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusèn buanendac —camenuen aden ismeposhi.

¹⁷ Adnubien mayan bëda utsi Nuquin Papa yacnuëshquibidi choposh chështebimboecquid sanampamboec.

¹⁸ Adec chështebimboecquid sanampamboec choshobien mayan bëda utsin matses tabadaco cuëte dëtsisadaid isquidquo icquid nidaid masiabudboedën tauite dapa dayunuëshquo choshon comapenec cuëdquin chuioposh. —Shancuinbimboecquid uba caid nidaidën caniquid chështebimboecquidën mëtebanquin sandoshon buanshun uba tish-tishten sando

¹⁹⁻²⁰ —caquien uba caid mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ënë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido chochomendac. Edusaden yacno cho-chomeshun ashunquo Nuquin Papan cuidac matsesën intac nuamboshë chididiquec nua mauanendac. Acte nua chëuëdacbipamboec cabayon mapi yaction intac chëuëdsho isombi. Ënapenquo quidometedos 300ted cactiombi cuësquec nuamboshë matsesën intac chëuëdsho isombi ushquin isacbimboen. —Aden Nuquin Papan abi chieshëñquido cuidendac —quequin ismeposhi.

15

Nuquin Papan cuidtequid 7tedbidi nabanaid

¹ Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icsho ispombi. Mayan bédabo niosh. —Aidon ambi chiacpadomboen ënquimbi matses icsaido cuidsho isash Nuquin Papa nëish bédanendac —quequin tantiaquin ispombi.

² Nuquin Papa yacnobidi chian dapa icposh. Actepenquo yec acte-actectscëcquo isadposh. —Nuquin Papa icsaquido cuidquidquo nec —camenuc tied nëdënquiacbimboec aid bëntse isadposh. Aid cuëmambi Esus tantiaquido tabadposh. Satanasën namiaidën acte uguëducësh choboedën chuiquid dapa icsamboshë icquidën: —Yuanu —cauidaido niosh. Chuiquid dapa icsamboshë icquidbimboecnuc nacnenaid tantiatiapimbo icquido aid niosh. Adecbidi icsamboshë icquidën ancabudacpaden nainquo yec aton yuabo ictiapimbo yec aid cuëmëdaidbimboecquid 666 dada uaqun siadmetiapimbo icquido niosh. Adec abi tantiaquido icsho Nuquin Papan meniaid ten-tencate cuëdëmec cuëdëncuededposh.

³ Nuquin Papan namiaid Moises: —Nuquin Papan nac ëbi chieshëñquidon ëbi cuesun secainquo icposh —quec cuëdëmpampicpadec cuëdëncuededposh. Nuquin Papa bédamboen ismenuc abided cuidadec unësaidquo Esus aton Papabëdta tantiec cuëdëncuededposh naden chiec.

—Nadatiambo icquin nabanquidquo mibi nec, Papa.

Abitedimbo uaquidquo yec abitedishun Icbombo mibi nec, Papa.

Matsesën naid abitedi tantiaquidquo abimbo chuiquidquo mibi nec, Papa.

Mimbi naid bédambo icnuc dacuëdampambo mibi iquec, Papa.

Nidaid utsi-utsiec yacno tabadquidon Icho icpampidi adecbidi matses abitedishun Icbombo mibi nec.

⁴ Matses abitedishun: “Nuquin Icho dacuëdampambo icquid neque.

Ambi chiacpadomboen nanuna,” mibi capashun, Papa.

Mibiuidtsëqui icsaisambo nec, Papa.

Adquid icquin mimbi chiacpadomboen icsaquido cuidquimbi bëdambo icquido mimbi bëdamboen isendac.

Adsho isun nidaid utsi-utsiec yacno tabadquidon matses abitedishun: “Mibi bëdambo iquec. Con Icbombo mibi nec,” caindac

—quec cuëdëncuededposh Esus tantiaquido.

⁵ Adshun isquien isadaidbon: “Nuquin Papa tabadte nec,” quequin shubuampicpadquid shubu shënciacchobi icposh. Nuquin Papa tabadacnombo tantiamenuen aden ismeposhi.

⁶ Auëshquio Nuquin Papan chiacpadec ëmbi isboedo mayan bëdabo 7tedi cho-choposh. Matses icsaquido cuidquido niosh aid. —Nuquin Papan yuabombo nec —camenuc dashcute nac-nacquo icquid dasiuidcuededash dashcute bëshpiu-bëshpiumbo icquid shic-tonquecuededposh.

⁷ Adsho isun Nuquin Papabëd icquid dadanobi ëshëcquid abentsëcshun maspanëmpi shocosh piu nacnenaic icbo-icboen menebamposh. Unëstiapimbo icquidën Nuquin Papan nëshëncuiochon cuidte cushtoaid maspanëmpi niosh.

⁸ Adnubien Nuquin Papa tabadaid nuntanuësh pushud-pushudpambo icposh. Adec dacuëdampamboecsho isash Nuquin Papa chuinec puduedtiapimbo icposh. Ënquin cuidambi padpidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadiapimbo icquin —camenuen aden ismeposhi.

16

Maspanëmpin cushtoaid

¹ Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. —Matses yacno nidshun maspanëmpin cushtoaid chiuinquin matses uesquin cuidta —quequin chuiposh Nuquin Papan.

² Adoquien abentsëcshun ambi bedboed maspanëmpin cushtoaid nidaidënshun chiuimposh. Adnubien ëmbi isboed acte uquëducuësh choboed chuiquid dapa icsamboshë icquidën yuaidotedi natiambo yec chiuë-chiuëtsëcquo yancuededposh. Satanasën nami-aidquo icsamboshë icquid tantiaquin abibimboecnuc nacnenaic tantiaquido yec aton icbo cuëmëdquid dada uaquin siadmiaido icsho aden cuidposh.

³ Adnubien utsin ambi bedboed maspanëmpin cushtoaid chian dapa mad caid nëchiuimposh. Adoquien aid chian mad caid intacac. Ënden unësaidën intacpamboecnuc intacac. Intacuidpambo icnuc acten icquidtedi unësbudneposh.

⁴ Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aïdtsen intacposh.

⁵ Adsho isun mayan bëda utsin acte dayun uaquidën Nuquin Papa chuiposh. —Aden mimbi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

⁶ “Ëmbi chiaid chuibanquidobëdta ëbi tantiaquido nua intac icnuc chieshëmëncuion cuesun secabudnepondash,” qeshun

cuesun secanquido cuidquin mimbi aton acte intacuashunacsho isun: “Mibi bëdamboshë iquec,” caimbi, Papa

—queposh mayan bëda acte dayun uaquid.

⁷ Aden acte dayun uaquidën chuisho tantiash Nuquin Papa tantiaquin nëish pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin compenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aid cuidec. Adsho isun: “Mibi bëdamboshë iquec,” Papa, caimbi —queposh mayan bëda utsi.

⁸ Adnubien utsintsen ambi bedboed maspanëmpi cushtoaid badiadën ushë bëchiuimposh. Adoquien Nuquin Papan namiacpadec matses baded-badedquiec ushën pichiebudneposh.

⁹ Adec pichiebudneshumbien Nuquin Papa chushcabededposh. —Icsauidequi icsho Nuquin Papan nuqui cuideque. Nuqui icsaid ënash ambi chiacpadec bëdamboec tabadnuna —quetiadquidëmbi chieshëncuion abi cuidquidquio Nuquin Papambo chushcabededposh.

¹⁰ Adnubien utsintsen ambi bedboed maspanëmpin cushtoaid chiuimbenequin acte uquëducuësh choboed chuiquid dapa icsamboshë icquid ambi namiaidobëd tabadacno

chuiimbeneposh. Adoaquien inchëshposh inchëshquio yec. Badiadenquo icposh. Adsho isash matses abitedi natiambo dacuèdcuededposh.

¹¹ Adec dacuèdcuededec: —Ambi chiaid niac-niacsho Nuquin Papan nuqui cuid-eque. Nuqui icsaid ènash ambi chiacpadec tabadnuna —quetiadquidèmbi: —Natiambo chiuèmianec Nuquin Papa icsambo iquec —qeshun Nuquin Papa chushcabededposh.

¹² Adnubien utsintsen ambi bedboed maspanèmpin cushtoaid acte dapa Eupèdates caid nèchiuimposh. Adoaquien Eupèdates caid acte nua icboedi nibèdquo yec uesadposh. Ma matses utsi-utsiec aton chuiquid dapabobèdi tsidadash Esus chedo cuesun secanuec ushè choacmiuësh choquin ma potenuequin aden acte uesadmeposh.

¹³ Adec aid matses cho-choabi icnuc ushè choacmishun cho-chometequidèmpi naden ismeposhi. Coqeshbimboecquid podobitsi icsa 3tedi ana shècuènuësh cho-chosho ispombi. Nèidic nisi dapabimboecquid Satanasèn ana shècuènuësh choquid. Nèidic acte uquèducuësh choebo chuiquid dapa icsamboshè icquidèn ana shècuènuësh choquid. Nèidic nidaid shècuènuësh choeboèn Satanasèn muauamequin oncameboedèn ana shècuènuësh choquid. Aidtedi chosho isombi.

¹⁴ Satanasèn yuabo icquin comapenen tantiaquin nacnenquido niosh. Matses utsi-utsien abi chuiquid dapabobèdtabi namenuc niosh. —Aidon namiac chuiquid dapabo abitedi aton yuabobèdi tsidadash ushè choacmiuëshquio cho-choendac. Nuquin Papa chieshèquin Esus chedo cuesun secanuec adec cho-choendac. Nuquin Papan tantiacpadènuobi adendac —camenuen mayan bédan aden ismeposhi.

¹⁵ Adnubien Esusquio cuèdposh. —Tantia. Chuinu. Mimi: “Nèbimbobi aid choec,” cacmaidquieni choendac. Ushenquio yachimboen èbi ènenquo icquin tantiec: “Nèbien Esus chochitec. Choshon nuqui icsaid abitedi chuiquin cuidnushè. Bèdamboec tabadnuna,” quec bèdamboec tabadta. “Nèbi nidnu. Nid,” cac: “Ai, con na ènden nacnenombique. Baded nid,” quiachimboec icta èbi cainec —queposh Esus.

¹⁶ Adnubimbi coqeshbimboecquid podobitsi icsabon namiac matses utsibo chuiquid dapabo abitedi aton sondadochodobèdi cho-chosho ispoc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

¹⁷ Adnubien maspanèmpi bedboed utsintsen ambembi chiuinquin Nuquin Papan cuidte ènquimbi ismeposh. Ambembi chiuinubien abi tabadacnuëshquio Nuquin Papa cuèdposh. —Padi. Nèbi èmbi tantiacpadomboen ènquimbi cuidec —queposh.

¹⁸ Adnubien abu bed-bedquetanepamboec abu tesquianenuec natiamboshè shècshècquemboec nidaid uèdè-uèdèquiamposh. Nuquin Papan tauamboen matses uambi adec nidaid uèdèquiambo. Bèdiactès nidaid uèdèquedenedi acquimboec uèdèquiamposh.

¹⁹ Adnubien matses dadpen yacno Babidonia caid yacnuësh nidaid abichobi icboedi 3tedi yanec tiadbudneposh. Aden Nuquin Papan: —Anocquido icsamboshè icquido nec —quequin Babidonia caid yacnocquido uesquin cuidquiosh. Adec nidaid uèdèquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh.

²⁰ Nidaid uèdèquenubi chian dapa mad caid yacno acte nènantan nidaid icquid abitedimbo nibèdambudneposh. Adecbidi macuësh abitedi nibèdambudneposh.

²¹ Abucueëshquio ue dapa choacimboec ue tsasi nuacquid dapa quidos 50 icnuc yuè tanaid dadpenquo paèdbudnequimbi matses tish-tishbudneposh. Aden ue tsasi dapan mèyansho isun padenquo ictiadquidèmbi matsesèn Nuquin Papa chushcabededposh. —Nuqui icsaid ènshun Esus tantianuna —quetiadquidèmbi chushcabededposh. —Adquido iquendac —quequin ushquin isachimboecnuc aden ismeposhi.

17

Chido chishpidabimboecquid ismiaid

¹ Adshumbic maspanèmpin icquid chiuimboedèn abentsècshun chuiuamposhi. —Isec cho. Mimi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquo icsamete bunquido nec,” quequin chido chishpidabimboecquid acte dapa bèntse tsadsho mibi ismenu. “Adquid icsho Nuquin Papan cuidquendac,” quequin mibi ismenu.

² Aido icsamboshè iquec. Matses utsi-utsien abi chuiquid dapabobèdta uisma uanten danoshcachimboen Nuquin Papambo tantiamenquo icquin ambi chiaid niacniacmequiosh. Aido cuidsho isec cho —queposh.

³ Adshumbic ushquin isachimboecnuc ismeposhi. Nuquin Papan Mayanèn tantiamiac masiuidquo yacno shubu nibèdacnombo chido aben icquid dapa catsadsho ispombi. Aben icquid piumboshè icposh. Aidèn dadan: —Nuquin Papa caid nibèdquo iquec —quequin

uesquin dada uapaidquio icposh. Aton mapi sietetedi icnuc aton pais 10tedi icposh. —Mimbi isboed acte uquëducuësh choboed chuiquid icsamboshë icquidquio nec —quequin aden aben icquid ismeposhi.

⁴ Aid catsadquid chido dashcute piumbo icquidbëd umumbo icquid dasiuidposh. Shocosh piu nacnenaïd chedo cuënotempi nac-naacquio icquid chedo payuec aidbidi mësiuidposh. Dëshote bëdambo icquid sanamposh. Aden sanansho dëshote anisquin isaquien icsambo icquidquidquio icposh. —Chido chishpidabimboec Babidonia caïd yacnocquido icsamboshë iquec. Uïisma uanten danoshcachimboen: “Nuquin Papa caïd nibëdquiec,” quequin tantiamequin matses utsibo dadpenquio icsamequiendac —camenuen aden ismeposhi.

⁵ Adshun isquien aid chido abi tantiamete abi cuëmëdquid bëtanteteno bëdada uadac. —Babidonia yacnocquido bëdambo icquido damianquidi icsamboen tabadmequido nec —quequin dada uaid icposh.

⁶ Aid chido paëmbo icquid acachimboec Esus tantiaquidon intac acash tantiaquidquio yamposh. —Babidonia caïd yacnocquidon Esus tantiaquido dadpen cuesun secaindac —quequin tantiamenuen aden ismeposhi. Dacuëdampamboecsho isash: —¿Mitsipadquiepequini ique? —quebudquïobi.

⁷ Adbudquïoshobini aid mayan bëdan: —“Tantiaquidquio iquec,” ¿quecta ique? Tantia. Chido chishpidabëdta abi catsadaïd aben icquid chuïnu.

⁸ Mimbi isboed aben icquid icsamboshë icquid ictenedi nëbi nibëdec. Yuecshun Satanasën abi tabadacnoshon padpiden chomendac. Adoacsho yuecshun Nuquin Papan chian anëdënquiacno nësecaindac. Aden cuidabi Satanasën chomebocsho isun Nuquin Papa tantiesabon: “Comapenen tantiaquidien nechitec. Matses nibëdanëdaïdi uincuenashien choachitosh. Aidi tantianu,” caindac. Matses uabi icquin Nuquin Papan: “Ëbi tantiaquido iquendac,” cacmaïdonquio adoendac —queposh mayan bëda.

⁹ Adshumbic padpiden chuïposhi. —Tantia. Ëmbi chuïboed bëdamboen tantiamenuen chuïnu. Naden tantiamenuen aben icquidën mapi 7tedi icquid mibi ismiombi. “Babidonia caïd yacno matses icsa uaquido tabadacno macuësh dapa 7tedi iquec,” quequin tantiamequimibi: “Chuiquid dapabo 7tedbidi iquendac,” camenuen aid mapi 7tedi mibi ismiombi.

¹⁰ Aid chuiquid dapabo Stedi nibëdnubi utsi abi iquec. Nëbi aidën aton matses namec. Utsitsen choendac. Choshon aton matses nametantsequi badedquio nibëdanendac.

¹¹ Nibëdanëdaïdi choashic ëmbi ismeboed acte uquëducuësh choboed chuiquid dapa icsamboshë icquidquio iquendac. Aidën ëmbi chuïboedo chuiquid dapabo 7tedishun namiachimboen aton matses icsamboenshë namendac. Adoacsho isun Nuquin Papan icsaïdo cuidquiacno nësecaindac —queposh mayan bëda.

¹² Adashic abi onquec: —Naden tantiamenuen aben icquidën pais 10tedi icquid mibi ismiombi. Chuiquid dapa utsibo 10tedi iquendac. Nëbi aton matses namiabi iquec. Padabi. Adquido yanendac. Satanasën acte yacnuësh choboedbëdta chuiquid dapabo icmiac matses icsamboenshë namiash yuec tabadabi badedquio nibëdanendac.

¹³ Nibëdanabi icquin aidon acte uquëducuësh choboed abi chuiquid dapambo icmendac. “Aidën namiac abi tantiaquidobëdta Esus nuquitedishun cuesun secatsiac nibëdquio icnuc,” qeshun aden icsamboshë icquid abi chuiquid dapa icmendac.

¹⁴ Aden Esus chieshënquidon: “Chieshtomenu,” cac Esusën yuaïdo abi tantiaquidotedi chieshtoenuquio iquendac. Aton Icho Esusën abided cuidadec unësaidën namiac chieshtoenuquio iquendac. Aden abi tantiaquidobëdta chieshënquïn cuesun secanuec cho-chosho isun Esusëmbi cuesun secaindac. “Ëbien matsesën Icbombo nec,” quetanquin adoendac —queposh mayan bëda.

¹⁵ Adashic padpidec: —“Nidaïd utsi-utsiec yacno tabadquido dadpenquio Babidonia caïd yacnocquidon icsamendac,” quequin tantiamenuen chido chishpidabimboecquid acte dapa bëntse tsadsho mibi ismiombi.

¹⁶ Aden Babidonia caïd yacnocquidon nasho isun mimbi isboed chuiquid dapa icsamboshë icquidën abëdtan chuiquid 10tedi icquidbëdtan Babidonia caïd yacnocquido chieshënendac. Aden chieshënquïn cuesun secatanquin shububëdtabi nëdëncaindac nibëdquiecnuc.

¹⁷ “Ma Babidonia caïd yacnocquido uesquin cuidnu,” quequin ambi tantiapadomboen Nuquin Papan aden acte uquëducuësh choboed chedo chuiquid dapabo icmendac.

¹⁸ “Matses utsi-utsien chuiquid dapabo aton matsesbëdtabi yuaquid abi iquec,” quequin mibi chido chishpidabimboecquid nëbi ismiombi —quequin mayan bëdan chuïposhi.

¹ Aden Babidonia yacnocquido cuidte chuisho tantiaboshombic mayan bëda utsi Nuquin Papa yacnuësh abucueësh budsho ispombi. Nuquin Papan icmiacpadquid mayan bëdabo chuiquid dapa yec bëchamauanquiecposh.

² Choshombic nua cuëdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibëdquiecnuc abi tabadtenecnombo podobit-suidpambo tabadendac. Ambobidi edesteuidquo tabadendac.

³ Babidonia caid yacnocquidon matses utsibo abitedimbo abi chuiquid dapaböëdta Nuquin Papa tantiamenquo icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquo icposh. Adsho Nuquin Papan cuidquiendac —quequin mayan bëdabon chuiposhi.

⁴ Adnubien Nuquin Papa abucueësh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobëdi icsasho ëbitsen cuidquionoshe,” qeshun aidon namiacpadomboen nainda. Auëshquio niqueta —quesho tantiombi.

⁵ Nuquin Papa yacnoshombidi utsin chuiposh. —Ënëdenquo yec icsaudequi icsho isun ambi tantiacpadomboen Nuquin Papan cuidquiendac.

⁶ Babidonia caid yacnocquidon matses utsibo dadpenquo icsamequioposh. Aden icsamequido icsho Nuquin Papan nëbi nëishquioshon uesquin cuidquiopashun —queposh mayan bëda.

⁷ Adashic abi onquec: —Babidonia caid yacnocquido cuidtequido nec. Ambi naiduidi naquin aton na dadpenquo bedash: “Aidtedi dayun uaic bëdambo iquebi,” quepec Nuquin Papan cuidte tantienquo yequi. Adsho tantiaashun: “Natiambo icnuc comapenen cuidquiopashun,” caimbi. Otacquo tantiec: “Nuquin matses yuabo dadpen icnuc nuqui bëdamboec tabadec. Chido niante bënë unësaid mëyadacimboec mëyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec.

⁸ Adsho ambi: “Nëbi ëbi cuidec,” cacmaidënquo cuidendac. Nuquin Papanquo abitedishun Icbombo icquin comapenen tantiaquin nacnenquidquo icquin badedquo cuidquiendac. Aden dadpenquo unës uabudniacsho isash natiambo sedenquecuededendac. Aton pete nibëdquiecnuc natia bunendac. Aton shububëdi dadpenquo nêdënquendac —queposh mayan bëda.

⁹ Adashic abi onquec: —Adec Babidonia yacnuësh nêdënquec pushudtonesho isash: “Aidon namiacpadomboen Nuquin Papa tantienquo icquin con na dadpen bedtenembi,” quequin chuiquid dapabon nadambocain sedencabededendac.

¹⁰ “Tantia. Nuqui tantiaido sidquebudneque,” quec uinte paëdtampamboec dacuëdtanash uanoshon isec tabadendac. Adec tabadec: “Aido unësquimboshë iquec. Aton matses aton yuabobëdi dadpenquo icpadenec. Ambi dayun uaid dadpenquo icpadenec. Matses utsibo dadpen namepadenec. Aido tantiac unësquimboshë iquec. Badedquo uesquin cuidquiopac,” quec sedenquecuededendac Babidonia caid yacnocquido tantiec —queposh mayan bëda.

¹¹ Adashic abi onquec: —Babidonia caid yacnocquido aden cuidacsho isash utsibotsen: “Ëmbi meniaid bedshun piucquid dadpen menedenebi. Nëbi adquid nibëdquiecnuc. ¿Tsuntsimbini ëmbi meniaid cuidquin piucquid menepatsiashba?” quec sedenquecuededendac.

¹² Aidobidi: “Nadquid Babidonia caid yacnocquido menequin piucquid dadpen bedtenembi. Nêdic shocosh piu. Nêdic shocoshquio. Nêdic casëdubimboecquid cuënote bëdambo icquid. Nêdic dashcute bëdambo icquid. Nêdic dashcute piumbo icquid. Nêdic dashcute umumbo icquid. Nêdic sêntebimboecquid nacnenaïd. Nêdic aben icquid edepanten shëta nacnenaïd. Nêdic cuëte utsi bëdaïdquo nacnenaïd. Nêdic shocosh utsi nacnenaïd. Nêdic cuënote nac-nacquo icquid nacnenaïd. Piucquid dadpen menequin adquidtedi Babidonia caid yacnocquidon bedpadenec.

¹³ Utsitsen dadpen bedpadenec. Nêdic batambo icquid sabimboecquid. Nêdic bëdambo nuadte. Nêdic bëdambo nuadec danoshquete. Nêdic acte paëmbo icquid. Nêdic bëchi. Nêdic pan nacnentequid. Nêdic nëish yua baca caid. Nêdic nëish yua utsi obeca caid. Nêdic nëish yua cabayo caid. Nêdic matses antsadsho cabayon nimbanguin buante. Nêdic ambi chonoa uatequido matses ambi ampequin bedaido dadpen. Babidonia caid yacnocquidon aidtedi dadpenquo bedtenesho aton piucquid dadpen bedpadenembi,” quependac nidaïd utsi-utsiec yacno tabadquido —queposh mayan bëda.

¹⁴ Adashic abi onquec: —Abi piucquid menedenedën dayun uaid nibëdanesho isash: “Aid matses bunaidquo ambi dayun uaid pete nibëdquiecnuc. Ambi dayun uaid dashcute bëdambo icquidbëd aton na utsi dadpen abitedi nibëdquiecnuc.”

¹⁵ quiaish natiambo dacuëdec uanoshon isec tabadec sedenquecuededendac abi piucquid menedenedo tantiec.

¹⁶ “Aid matses tantiac unēsquimboshē iquec. Matses dadpen yuaquin matses dadpen namepadenec. Aton matses dashcute bēdambo icquid dasiuidcueddetenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcueddetenec. Utsimbic casēdubimboecquid shocosh piu nacnenaid payudenec. Utsibic casēdubimboecquid utsi payuec mēsiuidtenec. Adec: ‘Con na dadpenquo icnuc bēdamboec tabadebi,’ quepadenec Babidonia caid yacnocquido.

¹⁷ Adsho isun Nuquin Papan abi ushēmbi cuidquiac ambi dayun uaidbēd aid matses badedquo nibēdanac,” quec sedenquecuededendac abi piucquid menedenedo tantiec. Adecbidi nidaid utsin icquidotsen sedenquecuededendac. Nēidic cano dapa dancha icbo. Nēidic dancha ichobēd nidquido aton yuabo. Nēidic icbo piucquid meniash dancha antabēdtoquido. Nēidic nuēcquid bedshun piucquid bednuen menequido. Aidedi uanoshon isec sedenquecuededendac.

¹⁸ Nēdēnquec pushudtonesho uanoshon isash: “Adquido utsi nibēdec,”

¹⁹ quiaish natiaquec sedenquecuededendac. Adec shubiec: “Ēbipadquid dancha icbon bēaidedi bedshun piucquid dadpen menedenedo tantiac unēsquimboshē iquec. Is. Cuidquiac badedquo nibēdanaque,” quec sedenquecuededendac –queposh mayan bēda.

²⁰ Adashic mayan bēdabidi: –Ēbien cuishonquendac. “Nuquin Papa yacno tabadquidotsen ēbēdi cuishonque,” quequin chiendambi. Esus tantiaquid chuiquinc Esusbēd icquidombo chuiquinc Nuquin Papan chiaid chuibanquid chuiquinc caquin: “Cuishonquec tabadnuna. Mibi chieshēnquin natiamiacpadomboen mibi chieshēnquido Nuquin Papan uesquin cuidquioshe,” quequin chiendambi –queposh mayan bēda.

²¹ Adnubien mayan bēda utsin uidēnquo icquidēnquo nidaid moco nuacquid dapa yuēmboshē icquid cadotanquin acquimboen acte nēnebidanquimbi chuiquinc. –Ēmbi acquimboen nēnebocpadomboen Nuquin Papan Babidonia caid yacnocquido uesquin cuidquiendac nibēdquiecnuc.

²² Adoac aido ictenecnombo nadimbo iquendac. Ten-tencate ten-tencainquo iquendac. Utsibobic cuēdēnenquo iquendac. Utsibombic shoncate shoncainquo iquendac. Cuēte chēshun nacnenenquo iquendac. Piacbo macuesenquo iquendac. Nadimboshē iquendac.

²³ Tabote taboadaid nibēdendac. Dada aton chido ambi nēbi bedaidbēdi mamēnenquo iquendac. Nibēdec. Nadimboshē iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi nauidi napadenec. Aden naquin ambi icsamboen tantiaid matses utsibo abitedi adembidi tantiamequin icsamepadenec,” quendac.

²⁴ Nuquin Papan cuidabi icnuc aden icsamequin Babidonia caid yacnocquidon Nuquin Papa chieshēnquin ambi chiaid chuibanquidobēdētabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac –queposh mayan bēda.

19

Chieshēnquido cuidacsho isash cuishonquaid

¹ Aden mayan bēdan Nuquin Papan Babidonia caid yacnocquido cuidte chuiho tantiombi. Adshun tantiaquin Nuquin Papa yacnuēshquio Esus tantiaquido dadpenquioshē comapenec cuēdēncuededeposh.

–Nuquin Papa bēdamboshē iquec.

Aiduidtsēqui matses abitedishun Icbombo nec.

Aton Mado abided cuidadec unēsaid tantiasho matses bēdamboen isec.

² Muesambo icquin ambi chiacpadomboen naquidquio nec.

Abi tantiesabo ēnēdenquo yec icsauidēqui icsho cuidquidquio nec.

Adquid icquin: “Icsamboshē iquec,” quequin matses utsibo icsamequido Babidonia caid yacnocquido cuidquioposh.

Nuquipadquid Esus tantiaquido cuesun secacsho isun cuidquioposh

–quec cuēdēncuededeposh.

³ Adashic padpidemboec:

–Nuquin Papa bēdamboshē iquec.

Is. Pushud-pushudpambo icnuc nēdēncaquin Babidonia caid yacnocquido uesquin cuidquioshe

–quec cuēdēncuededeposh Esus tantiaquido dadpenquioshē.

⁴ Adsho tantiasu Nuquin Papa chuiquid dapan tsadten tsadnuc abi dacuenadec tabadquido: –Nuquin Papa Nuquin Icho nec –quequin ismenuec danēshēn tinguēbudcuededeposh. Adec tinguēbudcuededequi: –Abimbo caic. Nuquin Papa bēdambo iquec –quecuededeposh dadanobi ēshēcquido 4tedi icquido tsusiobo 24tedi icquidobēdi.

⁵ Adashic auëshquiobidi abentsëc cuëdposh.

—Nuquin Papa matses uaquidquio yec bédamboshë iquec, canuna.

Nuquibi abi tantiaquidtedishun: “Nuquin Papa bédamboshë iquec,” canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa bédambo iquec,” canuna

—queposh.

Esusën abi tantiaquido beduante chiaid

⁶ Adsho tantiash abu tesquianiabimboec acte nua chododoquiacbimboec Nuquin Papa yacnocquido dadpenquio cuëdëncuededposh.

—Abi chieshëñquidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bédamboshë iquec.

⁷ Nuquin Papa tantiec cuishonquenuna. Nuquin Papa bédamboshë iquec.

Dadan aton chido buntacquo beduanacimboen abided cuidadec unësaid Esusën abi tantiaquido beduanshun abi yacno tabadmendac.

Bënën beduanabi yac chido: “Con bënën nëbi beduanebi,” quiash nacnemëdquiacbimboec: “Nëbien con Icho chochitec,”

quiash Esus tantiaquido bédamboec tabadec.

⁸ Abi tantiasho Nuquin Papan bédamboen isaïdo yec abi icsaid ënash:

“Nëen con Icho chochitec,” quiash bédamboec tabadec.

Aden abi tantiasho Esusën dashcute chuca ushumbo icquid dasiunacimboen abitedi icsaisa icmendac

—quec comapenec cuëdëncuededposh.

⁹ Adnubi mayan bédan chuioposhi. —Ëmbi chuibocpadomboen dada uata. “Isadaidbo aton chido bedquin aton matses cho-chomiash pemec bédamboec tabadquid. Adembidi abi tantiaquido Esusën: ‘Cho,’ cac abi yacno nidaniash cuishonquequiec tabadendac,” quequin dada uata. Abimbo caimbi. Nuquin Papan chiaidquio chiec nebi —queposh mayan bëda.

¹⁰ Adsho tantiashini Nuquin Icho danec ismenuec danëshën tinquebuidpoc. Adshobini: —Ëbi aden ismenda. Nuquin Papauidsëqui aden ismeta. Mibipadquid Nuquin Papan yuabidi nebique. Nuquin Papan Mayanën Esus tantiamequin Nuquin Papan chiaid dada uamepampic. Aidëmbidi namiac mibipadquidobëd Esusën yua nebique. Ëbi aden ismenda —queposh mayan bëda.

Cabayo ushu catsadquid bédamboshë icquid

¹¹ Adshumbic abuc isquin Nuquin Papa yacno shëcnepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: —Abi tantiaquidobëd cuëshëdtiapimbo icquid yec ambi chiapadomboen naquidquio Esusquio nec —quequin tantiombi. Ambi chiapadomboen icsaïdo cuidquidquio icquin icsaïdo cuesun secanuec niosh.

¹² —Matsesën ompodëmëdtiapimbo icquidquio nec —camenuc cuëte isquidquio icquidbimboec ëshë icposh. —Abitedimbo chuiquid dapambo nebi —quec mauete dadpen mauesh. Abi cuëmëdquid abi bédada uadaid tantiadenquio icposh. Utsibon tantiatiapimbo icnuc ambentsëqui tantiati niosh. —Nuquin Papabëdtan Esusën naidtedimbo matsesën tantiatiapimbo iquec —camenuc adec bédada uadaid ismeposhi.

¹³ Abi cuëmëdquid utsiembi tantiatsëccoc. —Nuquin Papapadquidquio yec abi tantiamanquid nec —quequin cuënaid niosh. Aton dashcute bëntse icquid cuidaidën intaquën punacimboec piumboshë isadposh. —Abi tantiesabo cuidquidquio nec —camenuc aden ismeposhi.

¹⁴ Esus bëyuc nidnuc abi tsibanec abi tantiaquidobëd mayan bédabo cabayo ushquidquidquio catsadcuededec cho-choposh. Icsaisa icmiaïdo yec dashcute ushumbo icquid bëchish nibëdquidquio dasiuidcuededposh.

¹⁵ Abi bëyucquid ana shëcuënuëshquio chështe cuënumbo icquid cueshqueposh. —Ambi chiapadomboen matses icsaïdo abitedi cuidquidquio Esus nec —camenuc aden ismeposhi. Adquid icquin nidaid utsi-utsiec yacno tabadquido icsauidequi icsho uesquin cuesun secaindac. Nuquin Papan chiapadomboen naquin shancuinbimboecquid uba caid nua ënë icnuc tish-tishacimboen nua intac icnuc cuesun secaindac.

¹⁶ Aton dashcute bëntse icquidën abi cuëmëdquid utsi dada uaccosh. —Abipadquid utsi nibëdnuc abitedimbo chuiquid dapambo yec abitedishun Icbombo nec —quequin dada uaccosh. Aton bëusudquid yacnombo adembidi dada uaccosh.

¹⁷ Adnubien ushë mëducquio tabadquin mayan bëda utsin edeste chedo abuc cuen-cuensho comapenec cuëdquin chuiquosh. —Nuquin Papan cuidquin cuesun secaidon nami chec cho-cho.

¹⁸ Èmbi chiäcpadec cho-choshon matsesën nami mimbì nua tëpuisquin chendac nëidtedi. Nëidic matses utsi-utsien chuiquid dapabo. Nëidic sondado chuiquid dapabo. Nëidic dada cuesabo. Nëidic cabayo chedo abi catsadquidobëdtabi. Nëidic matses utsibo abitedimbo. Nëidic matses yuabo. Nëidic matses yuapenquio. Nëidic bacuëbo. Nëidic caniaido abitedi. Adquidtedi uesquin chec cho —quequin edeste chedo chuiquosh. —Ambi tantiacpadom-boen Nuquin Papan matses uesquin cuidquiendac —quequin aden ismeposhi.

¹⁹ Adshumbic mayan bëdan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobëdi tsidadash cho-choposh coqueshbimboec-quad podobitsi icsabon namiacpadec. —Cabayo ushumbo icquid catsadquid Esusquio abi tsibanquidobëda cuesun secanu —caqui

²⁰ cuesun secadenquio icposh. Adshobien Esusën acte uquëducuësh choboed chuiquid dapa icsamboshë icquid bedposh. Adotanquimbic aid tantiamequid nidaid shëcuënuësh choboed Satanasën oncamiaidtsen bedposh. Aid comapenen tantiaquin ismequin muaquin abi chuiquid dapan icsamboshë icquidën chiäcpadomboen matses namequidquio niosh. Adec muaquin abi chuiquid dapabimboecnuc nacnemequidtsen niosh. Adecbidi: —Èbi chuiquidën yuabo nec —quequin matses dadpen bësiadmequid niosh. Adec icsamianquidquio icsho bedposh. Abi chuiquid dapabëda bedshun unës uabi chian dapa ënëdenquio yec anëdënquequid icsamboshë nuadquidquio nësecaposh.

²¹ Adshumbic Esusën ana shëcuënuësh chështe cuënumbo icquid cueshquequidën: —Èbi chieshënquidotedi unësta —caquien cho-choboed utsibo abitedi unësbudneposh. Adsho isun caimboedon edeste chedon nua-nuaic tëpuisquin matsesën nami chebededposh. —Aden Esusën abi chieshënquido nibëdamendac —camenuen aden ismeposhi.

20

Satanas uidën uaid

¹ Adshumbic padpiden ismeoaposhi. Adoac mayan bëda utsi Nuquin Papa tabadac-nuësh budsho ispombi. Podobitsi icsabo Satanasën yuabo shëcuën tabadacno bëtashaid chictëbëda shocosh bucubimboecnuc nacnenaaid dapa sanamposh.

² Adshumbic Eba icsamenuc nisipampid Satanasquio bedposh. Bedtanquimbic shocosh bucubimboecnuc nacnenaaidën ambi sanamboedën uidën uaposh.

³ Uidën uatanquimbic aton yuabo uidën uacno shëcuë aneposh. Adotanquimbic shëcuë bëtashquioposh puduentiapimbo icnuc. Seta dadpenquio 1000tedi matameshun bëtashte chicshun Satanas cuemenuen adoposh. —Aden seta 1000tedi matamiabi icquin abi uidën uactedembi matses muauaquin icsametiapiimbo iquec —queshun chicten bidiaquin uidën uaquioposh. Aden ismeposhi.

⁴ Adshumbic utsitsen ismeoaposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiäcpadquid abimbo chuiquido icquin Esusbëdtambi matsesën naid abimbo chuibamposh. Aden matses bëdamboen nameposh. Satanas uidën uacpadembi seta 1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uquëducuësh choboed chuiquid dapabëda abibimboecnuc nacnenaaid tantiapimbo icquido neposh. Adecbidi: —Aidën yua nebi —quec aid chuiquid icsamboshë icquid cuëmëdquid dada uadec bësiadiapiimbo icquido niosh. Utsibic mësiadiapiimbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiäc tabad-posh.

⁵ Unësaidotedi uincuemiämba icposh. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh.

⁶ Adnubien tauaquin uincuemiaido bëdambo yec cuishonqueposh: —Padpidec unëstiapimbo iquebi —quiash. —Adquid icquin Nuquin Papan yuabo yec: “ ‘Esusbëd Nuquin Papa bëdamboshë iquec,’ canuna,” quequin chianequid nendac. Aid seta 1000tedi matamequin Esusbëdtambi utsibo bëdamboen namequid nendac —quequin aden ismeposhi.

Satanasquio chian anëdënquequid nëniaid

⁷ Adshumbic aidtedquio seta 1000tedi matameshun uidën uaid chicquin Satanas cuemendac.

⁸ Adoquien matses icsamenuc muaquin chiec nidaid utsi-utsiec yacno nidendac. Aden aidën muaquin namiaquien matses dadpenquio Esus chedo cuesun sianuec tsidadendac.

Nëidic nidaid Coc caid yacnocquido. Nëidic nidaid utsi Macoc caid yacnocquido. Nëidic matses utsibo abitedi cuète podotedi dadpenquioshë.

⁹ Aidedi tsidadash cho-choash Esus tantiaquido tabadacnombo Nuquin Papan tantianobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac.

¹⁰ Adshumbic aido icsa uamequidtsen Satanasquo bedshun acte uquëducuësh chondayd chuiquid icsamboshë icquidbëdta nidaid shëcuënuësh chondayd ënden nësecaondacnombo chian anëdënquequid Satanastsen nënendac. Adoac aido ënëdenquo yec natiamboshë iquendac. Aden ismeposhi.

Icsambo icquido cuidte chiaid

¹¹ Adshumbic padpiden Nuquin Papan matses cuidte ismeposhi. Adoac tsadte nuacquid dapan uushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuec adec tsadposh. Icsambo icquido cuidquidquo yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadtiapimbo yec.

¹² Nuquin Papa yacno unësaïdo uincuemiaïdo abitedimbo tabadposh. Adnubien bëshunenquo icquin dada uaten dada uabanacimboben Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abëdi tabadmequimbi abi tantiesabo comapenen cuidnun aden chuibamposh.

¹³ Unësaïdo abitedi icpish. Utsi-utsiec unësaçsho chian dapa mad caid nëniaïdo uincuemiaïdo niosh. Utsi-utsiec nidaïden chococaid uincuemiaïdo niosh. Adsho aidon naidtedi Nuquin Papan chuibamposh.

¹⁴⁻¹⁵ Adshumbic Esus tantiesabo icsho documento nibëdquidbimboecsho abi yacno tabadmenquo icquin chian dapa anëdënquequid uesquin nësecabamposh. Aden Esus tantiesabo nësecan unëstequido utsibo nibëdposh. Esus tantiesabo aton dada unësan abi tantiate tabadacno utsibo tabadenquo icpish. Adnubien Esus tantiaquido Nuquin Papa yacno tabadec unëstiapimbo icquiduidquo icpish. —Adquid iquendac —quequin aden ismeposhi.

21

Nuquin Papabëd tabadaidquo

¹ —Esus tantiesabo chian anëdënquequid nësecaïndac —quequin ismëboshombic padpiden ismeoaposhi. Adoac abu chucambo icsho ispombi. Nidaïdtsen chucambo icpish. Abubëdi nidaïd shëni nibëdnuc utsi chucambo icquiduidquo icpish. Ënden iccondaid chian dapa mad caïdtsen nibëdposh.

² Adnubien Esusbëdi Nuquin Papa tabadaidquo abichobi Edusaden chuca caïd abucueësh budposh. Chido nëbi bedboedën aton bënë cuishoncamiacimboc cuishoncamiacquid yec bëdamboshë icpish.

³ Adnubien Nuquin Papa tsadacnuëshquo comapenec cuëdposh naden chiec. —“Con matses nec,” quiash nëbi Nuquin Papa matsesbëdi tabadendac cuëshëdenquo yec. Adsho isun aton yuabo icquin matses abitedishun: “Nuquin Icbombo nuqui tantiaidquo nec,” caïndac.

⁴ Ambo Nuquin Papan abitedi chuca uacnombo aïdbëdi tabadec matses shubitiapimbo iquendac bëun ucacimboc. Nidaïd shënin tabadec abitedi unëstequiduidquo icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —quepish Nuquin Papa yacnuësh onquec.

⁵ Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaquin chuca uaindambi bëdamboshë icnuc —quepish Nuquin Papa Esusbëdi. Adshumbic ëbi chuiposh. —Ëmbi aden chuiboed dada uata. Ëmbi muesambo icquin abimbo chiaïd nec —quepish Nuquin Papa Esusbëdi.

⁶ Adashic Nuquin Papa padpidec onquec: —Ëmbi chuiboctedimbo nainquin naindambi utsibon: “Padi,” catiapimbo icnuc. Ëndenquimboshë nidaïd uabi ictenedi nebi. Nëbi adquid yec nibëdantiapimbo icquid nebi. Adquid yec abitedishun Icbombo icquin ëmbi tauaidtedi nainendambi. Adquid icquin acte bunacimboc ëbëd tabadte bunquidon con Mado Esus tantiasho ëbëdi tabadmendambi.

⁷ Satanasën: “Chieshtomenu,” cauidaïdo Esusbëdta ëbi chieshtoenquo icquin tantiaquido ëbëdi tabadmendambi bëdamboshë yacnombo. Ëbi papa casho: “Ai, con mado mibi nec. Con champi mibi nec,” caïndambi.

⁸ Adshumbic utsibo chian dapa anëdënquequid icsamboshë nuadquid nësecaindambi. Nëidtedi icsamboshë icquido adoendambi. Nëidic ëbi bëdiactsëc tantiauidtsëcboedobi chieshëmënkuidon: “Cuesnu,” cac chieshtoash tantiesa yanoaido. Nëidic Esus tantiesabo abitedi. Nëidic icsamianquido. Nëidic chieshëmënc cuesunianquido. Nëidic dada aton dada utsibëdi chichudnanquido. Nëidic aton chidopenquio chudquido. Nëidic aton bënëpenquio chudmequido. Nëidic nënëchoquidobëdtabi cuëte podon unës uante bunquido. Nëidic ambi nacnenaidi papa caquin tantiaquido. Nëidic muauanquido. Aidtedi chian dapa anëdënquequid nësecaindambi —queposh Nuquin Papa.

Abi tantiaquido Esusbëdi icte chiaid

⁹ Adnubien mayan bëdan Nuquin Papan matses cuidte cushtoaid chiuimboed abentsëc choshon chuioposhi. —Isec cho. Chido nëbi bedboedën aton bënë cuishoncamiacbimboen abided cuidadec unësaid Esus cuishoncamequido tabadaid mibi ismenu. Cho —caposhi Esus tantiaquido ismenuen.

¹⁰ Adshumbic Nuquin Papan Mayanën tantiamiac ushquin isacbimboen isombi. Mayan bëdan ëbi buanquin ispombi. Aden buanshun macuësh dapa mananënquio tsadumposhi. Adoac anoshon isquien abucueësh Nuquin Papa abi tantiaquidobëd abi tabadaid abichobi shubu dadpen icquid budposh. Aid tabadaid Edusaden chuca caposh.

¹¹ Aid tabadaidquio aid shubutedi Nuquin Papa tabadaid yec abi yacpadquio abichobi bëchamauanquiecposh. Casëdu bëdambo icquidbimboec isquid-isquidquio isadposh.

¹² Shubu abitedi nënantan icnuc abichobi daquënë uaid icposh. Abucquio icnuc daquënë uaid niosh. Daquënë uaid puduedte shëcuë 12tedi icposh. Aid shëcuë icboicboen isquid yec mayan bëdabo 12tedbidi icposh. Aid shëcuë bëtashte 12tedbidi icposh. Aid bëtashten Acobon mado cuëmëdquid 12tedbidi dada uabampaccosh naden. Bëtashten Acobon mado Ose cuëmëdquid dada uatanquin bëtashte utsin Acobon mado utsi Uda cuëmëdquid dada uatanquimbic adenuidi bëtashten bëtashtenquien Acobon mado cuëmëdquid cuëmëdquidquien dada uabampaccosh.

¹³ Aid daquënë uaid puduedte shëcuë ushë choauc 3tedi icposh. Ushë nibëdauc node yauc aidtedbidi shëcuë icoposh. Ushë nibëdaucbidi sud yauc aidtedbidi shëcuë icposh. Ushë budauc aidtedbidi shëcuë icposh.

¹⁴ Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbëdi icquido ëbitedi cuëmëdquid 12tedi aid cuënote dapan abentse-abentsen dada uabampaccosh naden. Cuënoten ëbi cuëmëdquid Uan dada uatanquin cuënote utsin Petedo cuëmëdquid dada uapaccosh. Adenuidi cuënoten cuënotenquien Esusbëdi icquido cuëmëdquid cuëmëdquidquien dada uabampaccosh. Adoshombic nidaid uëdëshcabanshun tauaquin sandoshon cuënote utsi tsindoaid aid daquënë uaid niosh. —Esus tishabi icnuc Nuquin Papa tantiapampidobëdi Esus tantiaquido Nuquin Papa yacno Esusbëdi tabadendac —quequin tantiamenuen Acobon mado cuëmëdquidotedi dada uaidbëdta Esusbëdi icquido cuëmëdquid dada uaid aden ismeposhi.

¹⁵ Adshumbic ëbi chuiboedën mayan bëdan shocosh bëdaidquio nacnenaid tambante sanamposh. —Nuquin Papa tabadacno tambanquin daquënë uaidbëdtabi puduedte shëcuëtedi tambanten tambanu —queposh.

¹⁶ Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac quidometedos 2,200ted cactiombi iccosh ënapenquioshë. Aidtionuidi iccosh cuëma abitedi. Adoshombic abuc yacmi cuembotsen tanac aidtionquibidi icposh.

¹⁷ Nidaid cuënote nuamboshë icquid dapa tsindoquin daquënë uaid bitsipambo icquidtsen tanac nuamboshë bitsi icposh. Matsesën nacnenaid tambanten tanac metedos 65ted cactiombi icposh nuamboshë bitsipambo.

¹⁸ Daquënë uaid abichobi isquid-isquidquio isadposh. Bëdamboshë icposh. Padnuen shubu abitedi shocosh bëshpiu-bëshpiuctsëcquid nacnenaiduidquio yec nac-nacquio icposh.

¹⁹ Aid daquënë uaquin tauaquin sandoaid nidaid cuënote dapa casëdubimboecquid bëdambo icquid matses comapenec bunaidquio utsi-utsien dabitaccabanaid niosh. Abentsëc aspe caid umu-umumboctsëcquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi.

²⁰ Utsibic onise caid piumbo icquid. Utsibic conadina caid piu-piupactsëcquid. Utsibic quidisodito caid bëshpiu-bëshpiupactsëcquid. Utsibic bedido caid umu-umupactsëcquid utsi. Utsibic topasio caid piu-piupactsëcquid utsi. Utsibic quidisopadasa caid nushan-nushanacbitsecquid. Utsibic asinto caid umumbo icquid utsi. Utsibic amatista caid umumbo icquidbidi. Aidtedi dabitaccabancaccosh. —Nuquin Papa yacnombo bëdamboshë iquendac —camenuen aden ismeposhi.

²¹ Daquënë uaid puduedte shëcuë 12tedi icposh. Aid bêtashtetedi acte chiumbim-boecquidën casëdu ushu uaid nuacquid dapambo abichobi-abichobian nacnenaid niosh. Ambo shubu dadpen icquid nënantanquio podqued icposh. Aid podqued shocosh bëshpiu-bëshpiuctsëcquid acte-actectsëcquio icnuc mabiunaid icposh. —Esusbëd Nuquin Papa tabadacnombo bëdambo icquiduidquio iquendac —camenuen adu ismeposhi.

²² Ambobi abi bëisec tabadacnombo Nuquin Papa tabadte shubu uashunaid nibëdposh. Ambo Nuquin Icho Esus abided cuidadec unësaidbëd Nuquin Papa icsho bëisquiquin tantie canocquido tabadendac.

²³ Ambobidi inchështanec badiadenquio iquendac. Badiadën ushë isadenquio iquendac. Inchëshën ushëtsen isadenquio iquendac. Nuqui icsaid bedshunec abided cuidadec unësaid Esusbëd Nuquin Papa bëchamuanquieccquid icquin ambo ushëmbouidi icmendac. Inchëshaid tantiaidenquio iquendac. —Nuquin Papa icsaisambo icnuc abi yacno icsaido nibëdquio iquendac —camenuen aden ismeposhi.

²⁴ Icsaisambo icquin Nuquin Papan tantiamiac matses utsi-utsiec abi chuiquid dapobëdi Esus tantiaquido yanendac. Adash Nuquin Papa yacnombo quenec tabad-cuenash: —Esusbëd Nuquin Papa abitedishun Icbombo nec. Abipadquid utsi nibëdec —quendac.

²⁵ Nuquin Papa matsesbëdi tabadacnombo inchëshenquio icnuc: —Icsambo icquido puduednushe. Bêtashnu —quetiapimbo icsho isun daquënë uaid shëcuë bêtashenquio iquendac. Shëcniacchobi iquendac.

²⁶ Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: —Daëdpactsëc tantiaquin matses daëdpactsëc namebampadenembi. Nuquin Papa aton Mado Esusbëdi comapenen tantiaquidquido yec abitedishun Icbombo nec. Abipadquid utsi nibëdec —quendac abitedi.

²⁷ Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuquin Papan bëshunenquio icquin dada uacimboen: —Icsambo icboedi abided cuidadec unësaid con Mado Esus tantiaquido aido nec. Con bacuëbo nec —capendac. Aden ambi con bacuëbo caido abi yacno puduedendac. —Nuquin Papa yacno adquio bëdamboshëuidquido iquendac —quequin aden ismeposhi mayan bëdan.

22

Nuquin Papa yacno acte ismiaid

¹ Adshumbic aid mayan bëdan padpiden ismeoaposhi. Adoac Nuquin Papa abided cuidadec unësaid aton Madobëdquio tsadte dapan tabadacnuësh matses unëstiapimbo icmeteguid acte bëdambo icquid nushan nibëdquidquido chëuëdsho ispombi.

² Nuquin Papa yacnuëshquio choec chëuëdec ambo tabadquido Esus tantiaquido tabadaid shubu nënantanquio chëuëdposh. Aid cuëmambi matses unëstiapimbo icmeteguid cuëtetsen icposh. Baded-badedquieac bacuëquidquido niosh. Inchëshën ushë choan-choanquieac badequido bacuëquid niosh. Aid cuëte podon nidaid utsi-utsiec yacno tabadquido bëdambo icmeteguid niosh. —Aton Mado abided cuidadec unësaid tantiaquido abëdi tabadmequin Nuquin Papan unëstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abëdi tabadmequin Nuquin Papan daicsabudtiapimbo icquid icmendac —camenuen cuëte aton podobëdta ismeposhi.

³ Aden abitedi bëdambo icmiac cuidtequido nibëdquido iquendac. Icsambo icquido nibëdnuc Nuquin Papa aton Mado Esusbëd tabadacnoshon aid daëdi tantiaquieac Esus tantiaquido tabadendac.

⁴ Adec: —Con bacuëbo nec —quequin Nuquin Papan abi cuëmëdquid dada uaqin bësiaidon Nuquin Papambo bëisquieac tabadendac. —Nidaidën tabadec bëdamboec tabadquido Nuquin Papabëd tabadec abipadquido bëdamboshë yanendac —camenuen aden ismeposhi.

⁵ Ambo bëdambouidquido yec inchëshenquio iquendac. Nuquin Papa bëchamuanquieccquidëmbi ushëmbouidquido iquendac inchëshaid tantiaidenquio yec. —Aden abi tantiaquido bëdamboen isquin ënenquio icquin bëdamboshë icmendac. Chuiquid dapabo icmiac Esusbëdtambi ënenquio icquin namendac —quequin ismeposhi.

⁶ Adshumbic mayan bëdan chuioaposhi. —Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën namiaid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi —quepesh Nuquin Papan abi yacnoshon uaid mayan bëda.

⁷ Adnubini Esusënquio naden chuiposh. —Chieshtoenquio icquin ëbi tantiata. Nëbimbobi nidaidën choec buduidpoc ëbi ismequid mayan bëda ismenuec. Adsho mibi bëdambo icmendambi —caposhi Esusën.

⁸ Uan nebi. Abimbo chuiquin nëid dada uaombi. Aden mayan bëdan chuibanquin ismeposhi. Aden ënquimbi ismiaquini: —Nuquin Papapadquiden nechitec —quetanec danëshën tinquebuduidpoc ëbi ismequid mayan bëda ismenuec.

⁹ Adshobini: —Padi. Aden ëbi ismenda. Mibipadquid Nuquin Papan yuabidi nebique. Èndenquimboshë Nuquin Papan tantiamiac min tsusedpabo isadaidbon ambi chiaidquio dada uapampic. Nëbi ëmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidsëqui tantiaquin aden ismeta —caposhi mayan bëdan.

¹⁰ Adashic padpidec: —Èmbi chuibamboedbëdta ëmbi ismeboedtedi chuiquin dada uata. “Nëid dada uaid isec onquequin ma Esus tantiaquidon tantianu. Nëbi adquid yanushe. Chieshtoenquio icquin Esus tantiec ma tabadnu,” qeshun dada uata.

¹¹ Nëbimbobi Esus chonoc Esus tantiesabo badedquio bëdamboec tabadcuentiapimbo iquendac. Abi icsaid badedquio ëntiapimbo iquendac. Esus tantiaquido abi bëdamboec tabadacpadquiecbidi bëdamboec tabadpashun —queposh mayan bëda.

¹² Adnubini Esusën chuioaposh. —Chieshtoenquio icquin ëbi tantiata. Nëbimbobini choendac. Choshon matsesën naidtedi tantiaquin icsaido cuidquimbi ëbi tantiaquido ëbëdi tabadmendambi.

¹³ Nuquin Papapadquidquio nebi. Èmbi tantiacmaid nibëdnuc abitedi comapenen tantiaquidquio nebi. Nidaid uabi yec ictenedi nëbi adquidquio yec nibëdantiapimbo icquid nebi. Adquid yec abitedishun Ichombo nebi.

¹⁴ Icsambo ichoedon ëbi tantiasho icsaisabimboecnuc Nuquin Papan bëdamboen isendac. Adshun ëbi yacnombo puduedmequin unëstiapimbo icquido icmendac unëstiapimbo icmiantequid cuëte bacuë chemiacbimboen.

¹⁵ Padnuen ëbi tantiesabo bëdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nëidic nënëchoquidobëdi cuëte podo chodcashun unës uante bunquido. Nëidic dada cuididimbo. Nëidic chido chishpida. Nëidic aton chidopenquio chudquido. Nëidic aton bënëpenquio chudmequido. Nëidic cuesanquido. Nëidic papa quequin ambi nacnenaidi tantiaquido. Nëidic abi bunaiduidquio naic muauanquido. Aidtedi Nuquin Papa yacno puduedtiapimbo iquendac.

¹⁶ Èmbi chiacpadomboen mayan bëdan mibi ismebamposh. “Ma ëbi tantiaquidon iste dada uanu,” quequin ëmbi chiacpadomboen mibi ismebamposh. Nuquin Papan dada uamiac matsesën: “Dabidën tsyuecquid yec abitedimbo chuiquid dapa iquendac,” quequin chuipampid nebi. Isadaidbon cainaidquio nebi. Utsin: “Dëniacnu,” cadtiapimbo icquid nebi. Adquid icquin matses abitedimbo namendambi —quequin chuiposhi Esusën.

¹⁷ Adsho tantiashun Nuquin Papan Mayanën tantiamiacpadomboen chuiquin: —Nëbimbobi Esus chonoshe. Aidquio tantiabenta —caindac Esus tantiaquidon Esus tantiesabo chuiquin. Èmbi chuiboed tantiaquidtedishun: —Nëbimbobi chonoshe. Aidquio tantianuna —cac bëdambo ictsiash. Adsho tantiash Esus tantiesabo acte bunacbimboec Esus tantiate bunsho Nuquin Papan bëdamboen isendac. Nuquin Papa bëdamboen ismenuen menete nibëdnuc Esusuidi tantiasho Nuquin Papan bëdamboen isquin abëdi tabadmendac.

¹⁸ Tantia. Èmbi chuiboed tantiaquido chuinu. Nuquin Papan: —Nadquid iquendac. Yuecash utsi iquendac —quequin ëbi ismeboedtedi dada uaombi. Èmbi dada uaboed tsitënquin ambembi chiaid dada uainda. Èmbi chuibocpadomboen Nuquin Papan mibi cuidtsiashe.

¹⁹ Adembidi ëmbi dada uaboed utsi uainquio icquin abimbo chuita. Èmbi chuibocpadomboen Nuquin Papan mibi unëstiapimbo icquid icmenquio ictsiash. Adembidi bëdamboshë yacno abëdi mibi tabadmenquio ictsiash.

²⁰ —Ma aidtedi tantianu —quequin Esusën chiacpadomboen mayan bëdan aidtedi ismeposhi. Èmbi chuibocpadomboen Esusën: —Nëbimbobini choendac —caposhi. Adsho tantiashun: —Ai, nëbimbobi chota —capombi.

²¹ Mibitedi Esus tantiaquidotedi tantiaquin: —Ambi nabocpadomboen Nuquin Icho Esusën bëdamboen isquin bëdambo icmepashun —caimbi. Padi. Aidtedi chuiquin dada uaombi.